


ND 27-12-66

DR
440
M87
1910

Mustafā Nūrī, Pāṣā
Netāyic ūl-vukū'āt
Tab.2

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY



Mustafa Nuri Paşa

NETAYIC 1824-1889.

Netayic il - Mukū'at

نتائج الوقف

جلد اول

طبعة ثانية

استانبول

باب عالی جاده سنده « اخوت » مطبعه سنده طبع اولتمشدر

۱۳۲۷

DR
440
1887
1910

جلد اول من نتائج الوقوعات



بِسْمِ اللَّهِ الرَّحْمَنِ الرَّحِيمِ

حمد وثناى رب العالمين وصلاة والسلام حضرت سيد المرسلين وترضية آل واصحاب
كزين وظيفة وجيبه سى ايضا قلند قدن صكره شو وجهله عرض مافى الضمير دابتدار اولانور
فقير كمبضاعه اولان طفوليتمدنبرو مطالعة توارىخ وتبع آثار اسلافه مائل اولديغمد
متداول ومشهور اولان تاريخلرن ماعدا بعض ارباب وقوفك مواد مشهوده لرى اوزر
يازد قلرى آثارن دخی خلیجه رسائل ونوایحی مکررا مطالعه وتدقیق لیش وبلطفه تع
اوتوز سنه دن متجاوز زماندنبرو باب عالی وخزینة مالیه ودفترخانه خاقانی مأموریت وم
صبنده وباخصوص جنتمکان سلطان عبدالعزیز خان حضرت تالرینك اوائل سلطنتلرنده مابین
همایون باش کتابتند بولندیغ جهتله حسب المأموریه مطلع اولدیغ حوادث ایامی ومشهود
عاجزانهم اولان قوانین قدیمه وقیودات عمیقہ فی نظر امعاندن کچورمش اولدیغمدن بقدر
اللیاقه استنباط ایلدیکمه کوره سلطنت سنیة عثمانیه نك بدایت ظهورندنبرو اداره سیاسیه
ونظامات موضوعه وعرفیه سى بالدفعات تبدل ایش اولغله بونلرک حقابق اسباب ونتایج
واقعه لری مبین اولمق واخلافه عاجزانه بریادکار براغلمق اوزره اشبورسالة مستمندانه می
ترتیبه مباشرت ایلدم .

اگرچه نیت عاجزانهم هر عصرده جاری اولان نظامات ملکیه وقوانین عسکریه واداره
مالیه وتفرعات سائرہ فی توضیحه منحصر ایسه ده بمقصدك لایقيله میدانہ چیقارلمسی ضمننده
وقوعات کونیه نك محملاً ترقیم وبرتکمله علاوہ سى ايله مقصد اصلینك تتمیم اولنسی مقتضی
اولدیغی مثللو تغییرات کلیه تاریخلرندن بدأ اولنمق اوزره سلطنت سنیة نك شهنامة واقعاتی
القی بابہ بالتقسیم هر بابك تکمله سنده حاوی اولدیغی عصرک نظامات جاریه وقوانین مرعیه سى
على قدر الامکان توضیح واتیان قلنمق صورتی اختیار قلندی .

علامه ذوفنون مؤرخ ابن خلدون هر دولته سن نمو وسن وقوف وسن انحطاط اثبات
واعمار دولی اکثریا یوزیکر می سنه اولمق اوزره ایراد ایدوب حالبو که کندیسى سکز یوز

سکز سنه هجریه سنه قدر معمر اولمق حسیله بغداد واندلس و مصرده اوچر بشر یوز
سنه سلطنت سورن خلفای عباسیه و امویہ و فاطمیہ بی مدرک اولدینی حالدہ بود عواده بولنسی
هر اوچ قرنده اصول و عادات دولت کلیا متحول و متغیر اولور دیمکه محمول اولوب بو
عادات طبعیه ایسه دولت علیه عثمانیه ده دخی حکمتی اجرا ایلدیکی هر بابک مقایسه تکمله سیله
ظاهر اولمق ایچون :

برنجیسی باب ابتدای ظهور کوبه عثمانیه دن تیمور حادثه سنه قدر یوز بش سنه ک ؛
وایکنجی باب چای سلطان محمدخان حضر تلرینک تجدید دولته موفقیتلرندن سلطان بایزید
ثانی حضر تلرینک ترک مشغله سلطنت بیوردقلری طقوز یوز اون سکز سنه سنه دکن
یوزاون اوچ ییلاق ؛

واوچنجی باب یاوز سلطان سلیم خان حضر تلرینک جلوسلرندن بیک اوچ تاریخه
قدر سکسان بش سنه ک ؛

ودردنجی باب سلطان محمد خان ثالث حضر تلرینک تاریخ مزبورده وقوع اولان جلوسلر
سلرندن بیک طقسان طقوز سنه سنده سلطان سلیمان خان ثانی حضر تلرینک جلوسلرینه ؛
وایشنجی باب اورادن بیک یوز سکسان سکزده منعقد اولان قاینارجه معاهده سنه دکن
مرور ایدن زمانلرده واقع اولان حادثاتی ؛

والتنجی باب اندن صکره صورتیاب ظهور اولان احوالی مبین اوله رق ترتیب و اشبو
اثر ناچیزانهم (نتایج الوقوعات) نامیله توسعیم قلندی مع مافیه ضروری الوقوع اولان
خطیئاتنک دامن عفو و صفح ایله مستور و قلم معارف رقله تصدیح و تصحیح بیورلمسی

السید مصطفی

ومن الله التوفیق

مستر محمد

ناظر دفتر خاقانی

حالا

❖ باب اول ابتدای ظهور آل عثمان ایدالله ملکه الی آخر الزماندن ❖

❖ سکز یوزدرت تاریخنده واقع تیمور وقعه سنه قدر اولان وقعاتی ❖

❖ میندر ❖

مفصلات تواریخده مسطور اولدینی اوزره برمدت اخلاطده متوطن اولان قانی خان
قبیله سی ماوای قدیملری اولان ماهان طرفلرینه عودت ایلک نیتیه جعبر قلعه سی جوارنده
نهر فرآندن مرور ایدرلر ایکن امیر قبیله اولان سلیمان شاه غریقا فوت اولغله ترک ایلدیکی
درت نفر اولادندن ایکسیسی وطن قدیملرینه عودت ایدوب دیگر ایکسیسی اولان ارطغرل

غازی ایله دوندار بك درت بشیوز خانه قدر توابعاتلریله کشور رومه منتقل واول تاریخده
قونیه ده حکمران کشور روم اولان دولت سلجوقیه نك زیر حمایت سنده داخل اولمیریله
انقره جوارنده واقع سکود ییلاسی مسکن تعیین قلندیغندن اوراده توطن ایلدیلر .

بوتاریخه قدر که تقریباً هجرت سنه نك التي یوز اوتوز سنه سی راده لیدر قوه اسلامیه
آیدین و مغنيسا و قره سی و کوتاهیه و انقره و قسطنطنی و سینوب طرفلرینه دکن ایلر یلیوب
اناطولی قطعه سنده روملر انده یالکیز بروسه و ازمید سنجاقلریله بولی سنجاغنك بر
پارچه سی و قره دکر سواخلنده صامسون و طربزون قلعه لری قالمشیدی بورالرده بولنان
امرای ملت مسیحیه هر قدر استانبول ایمپراطورلرینه تابع ایسه لرده دره بکلی مثلاً
هر بریسی زیر حکومتده بولنان مواقعه بالنوراث متصرف ایدلر روم ایمپراطورلری برارالق
فرنکلرک استانبولی استیلالردن ناشی ازنیقه مرتحل و ذاتا سن شیخوخنه واصل اولمسیله
اگرچه التمش یتیم سنه مرورنده برتقریب پای تخت قدیمك استردادینه دسترس اولدی
ایسه ده قوت و مکنتی همان بالکلیه محو اولمق درجه سنه رسیده اولدیغندن و قتیله بنا اولمش
اولان استانبول حصن حصینك متانت و رصاتی سایه سنه صیغتمش ایدی

دولت سلجوقیه واسع الممالك بر دولت قوی شوکت اولدیغنی حالده تاتارلرک مهاجماتی
و شهزادگانك نائل سلطنت اولمق ایچون یکدیگریله اولان مخاصمات و محارباتی و بعضاً
تاتار پادشاهلرینه التجاری سبیلریله التي یوز الی تاریخدن صکره قوت و مکنت
و هیئت اجتماعیلرینه وهن و خلل تطرق ایدوب کوندن کونه تنزل ایتکه باشلا دیلر .

اناطولی قطعه سی بو حالده ایکن ارطغرل غازی سکود صحراسنده ساکن اولوب
دولت سلجوقیه امراسندن و بولندیغنی موقعك روملر ایله همحدود اولمق حسیله اوج
یعنی منتهای حدود بکلرندن اولغین سلاطین سلجوقیه نك سفرلری واقع اولدقجه اعوان
و انصار یله خدمت دولته بولنور و مسکننده بولندقجه جوارنده واقع رومستانه چاپول
ایدوب اموال غنایمله مقتم اولور ایدی چونکه دولت سلجوقیه نك هر نه قدر روم
ایمپراطورلریله مصالحه لری واقع اولور ای دیسه ده طرفین سرحد امراسی یکدیگری
ممالکنه تجاوز ایدرک صحرالرده بولنان اهالی و حیواناتی اسیر و غصب ایلک عادات
عصریه دن ایدی بناءً علیه استحصال منافع ایله کوندن کونه ارطغرل غازینك قوتی
تزیاید و جمعی تکثر ایدرک اورالرده یراشوب عمری آخر اوانجه یه قدر غزا و جهاده
و تزیید ثروت و اقتدار ایله محافظه تبعه و بلاد صرف همت ایلشدر .

ارطغرل غازی التیوز سکسان تاریخنده ترك ملك مجازی ایتدکده اوغلی عثمان غازی
امیر قبیله اولوب سلاطین سلجوقیه طرفندن امارتی تصدیق قلندی .
مشار الیه دخی پدري کبی غزا و جهادی پیشه ایدنمکله انا فانا قدر و شانی و قوت
و سامانی ترقی ایدرک واحدا بعد واحد قره جه حصار و بیله جک و یار حصار و اینه کول
قلعه لرینی فتح و تسخیر ایتمش و یکیشهری ابنیه منیع و رفیع ایله تزین ایدوب دارالملک
ایدنمش اولدیغندن سلطان سلجوق اولان علاءالدین ثانی جانبندن اسکیشهر قصبه سی
فتح ایتدیکی ممالک الحاق و جمله سی بر سنجاق اعتباریله عثمان غازی عهدده سنه توجیه
اولدقدن ماعدا طبل و علم امارت احسانیه دخی شان و شهرتی لامع الاشرق قلندی
بویابده دیوان سلطان علاءالدین صدر اولان فرمان هایون ایله جوابی فریدون بك
منشأتنده مسطوردر .

عثمان غازی بروجه مشروح بر سنجاق والیسی کسب ایلدکدن اون اون ایکی سنه
مرورنده غلبه تدریجیه تاتار دولت سلجوقیه پی کاملاً مضحج و تارمار ایتمش اولمسیله
امرای سلجوقیه دن کر میان اوغلی کوتاهیاده و قره سی و صاروخان و آیدین و منتشا
وحید اوغلاری ناملرینه منسوب اولان یرلرده واسفندیار و رمضان و ذوالقدریه اوغلاری
قسطمونی وادنه و مرعش طرفلرنده وقتا بوقت اعلان استقلال ایتدکری مثللو عثمان
غازی دخی التیوز طقسان طقوز تاریخنده نامنه خطبه قرائت ایتدیرهرك حوضه حکومتده
واصل مرتبه استقلال اولدی .

تبریزده فرمان فرما اولان ایلیخان جنکیزی طرفندن مقدا دولت سلجوقیه به ناظر
تعیین اولوب قیصریه ده اقامت ایدن ارتنا بك وارث سلطنت سلجوقیه اولمق دعواسنده
ایدیسه ده سالف الذکر ولایه سلجوقیه مومی الیه اطاعت ایتدکرنندن بشقه مؤخرأ فرمان
اوغلاری قونیه ده تشکیل حکومت ایلدیلر .

مؤخرأ سلطنت ایلیخان دخی کسب تفرق و تشتت ایلدیکنه مبنی تاتار پادشاهلرینک
اناطولی احوالیه تقیده اقتدارلری قالمدیغندن و مزبور ارتنا بك دخی قوه موجوده سیله
امرای سلجوقیه پی تحت اطاعته آلمغه مقتدر اوله میه جغنی تیقن ایدرک قیصریه و حوالیسی
حکومتیه قناعت ایلدیکندن شیوه قدر اناطولی قطعه سنده ملوک طوائف حدوثنه منجر
اولدی .

بوندن صکره عثمان غازی تاریخ وفاتی اولان یدی یوز یکرمی التي سنه سنه قدر
بالتدریج بروسه و قوجه ایلی و حوالیسی فتح و تسخیر ایدوب بروسه شهری پای تخت

عثمانی اولوق اوزره درون قلعه ده واقع آق کنبه نام مناسر دروننه دفن اولمسنی وصیت ایدرک اعلان استقلالدن یکریمی یدی سنه مرورنده و یتش یاشنده ارتحال دار بقا ایلشدر عثمان غازینک وقوع وفاتیه اوغلی اورخان غازی مسند نشین تخت استقلال اولوب اینکی سنه صکره ازمید و هرکه قلعه لری فتح و شهزاده اکبر سلیمان پاشای غازی به توجیه قلنمش ویدیوز اوتوز بر سنه سی خلی وقتدنبرو تحت محاصره ده بولنان ازنیق شهری دخی تسخیر اولنوب بر مدت مقرر سریر سلطنت اولمشدر .

شهزاده سلیمان پاشا روملر النده بولنان طراقلی یکجه سی تسخیری نیتیه حرکت ایدوب آوازه عدل و دادی مشهر آفاق اولدیغندن اهالیسی عرض انقیاد ایتدکلری مثللو مدرنی و کونینک حاکم لری دخی اطاعته مجبور اولملریله خلق الزام جزیه ایله یرلرنده تقریر و همت اورخانی ایله بر آیدن زیاده محاصره دن صکره کملیک قلعه سی دخی تسخیر قلندی .

شمعی به قدر اسلام النده بولنان ممالکک تعرض اولنمامشیکن امرای سلجوقیه دن قره سی والیسی اولدینی حالد امثالی مثللو کسب استقلال ایدن عجلان بك فوت اولوب درگاه اورخانیده بولنان اوغلی ایله باباسی یاننده اولان دیگر اوغلی بیتشده وارث ملک پدر اولوق اوزره وقوعبولان محاصره و قتال قره سی سنجاعنک حکومت عثمانیه به کیرمسنی موجب اولغله لواء مزبور شهزاده سلطان مراده توجیه بیورلدی ویدیوز اوتوز سکنز سنه سنه قدر بروسه و ازمید و بولی سنجاقلرنده بولنان ممالک عیسویه کاملاً تسخیر اولنوب حدود عثمانیه اسکدار جهتنده قرتاله واصل اولمش و اناطولی طرفنده یالکیز الاشهر ایله بیغا قلعه سی روملر النده قالمشدر .

بوندن صکره یدی یوزاللی سکنز سنه قدر توارینخده وقوعات حربیه به دأر ایضاحات اولمامسنه نظراً بو مدتده تشید بنیان دولت خصوصلرینه اعتنا قلنمش اولمسی ظن اولنور . مفصلات توارینخده بیان اولدینی وجهله شهزاده سلیمان پاشا معیتده بولنان مجاهدین ایله یدی یوزاللی سکنز سنه سی روم ایلی طرفنه بالمرور کلیسولی و دیمتوقه و برغوس طرفلرینی و معارض کورفزی روملر الندن اخذ و تسخیر و بولایر قصبه سی مرکز امارت اتخاذایدوب توسیع ممالکک صرف همت ایتدکه ایکن صید و شکار ائناسنده آتدن دوشوب فوت اولدی .

بو وجهله روم ایلیده بولنان موحدین سردارسز قالدقلری زمانده روم و بلغار و صرب و افلاق امراسی بالاتفاق اوتوز بیک قدر عسکر ایله برآ و بحرآ هجوم ایتمشلر ایشه ده

بلطفه تعالی هزیمت کامله به گرفتار اولدقلرندن بومظفریت اهل اسلامك روم ایلیده استقرارینی تأمین ایتدی .

وقوعات مزبوره عقببنده یعنی یدی یوز آلتمش بر سنه سی اوائلنده اورخان غازی سکسان بر یاشنده و حکومتك اوتو بشنجی سالنده بروسهده مرتحل دار آخرت اولدی . خداوندکار غازی لقب جلیله مشهور اولان سلطان مرادخان اول حضرتلری یدی یوز آلتمش بر سنه سی پدری اورخان غازی پرینه مربع نشین سریر سلطنت اولدقده اولان سوق سپاه ايله انقره قلعه سنی امرای ساجوقیه بقایاسندن اولان آخیر نام متغلبه اللرندن نزع ایلدکدن صکره عسکر انجم شمار ايله روم ایل طرفه کنار وچورلی پی عنوة ومسوری پی صلاحاً داخل قبضه اقتدار ایدوب ادرنه حاکمك سد سپاه اسلام اولمق ایچون کوندردیکی عسکری سازلو دره نام محله تدمیر و ادرنه قلعه سنی تسخیر ایلدی .

بعده روم ایل بکلبکیسی نصب اولنان لالاری شاهین پاشا و امرادن اورنوس بک معیتلریله سوق اولنان جنود ظفر مقرون زغره و کوملجنه طرفلرینی الحاق قلمرو هایون ایلدکدن صکره پاشای مشار ايله ادرنهده تقریر اولنوب موکب پادشاهی پای تخت اولان بروسهیه معاودت ایلدی .

مؤخرأ میرمیران مشارالیهك همیله قلبه قلعه سی فتح اولندیغنه مبنی حاکمك نظم و تشویقيله صرب وافلاق وبوسنه و بحار قراللری عثمانیانی روم ایلندن طردایتمك اوزره عقد اتفاق واللی آلتمش بیک عسکر ايله ادرنهیه طوغری هجوم ایلدکری واصل سمع مرادخانی اولیجق مدافعه قصدیله بروسهده حرکت بیوریلوب حاجی ایل بکی نام امیر دلیر استطلاع احوال دشمن ایچون سکیز اون بیک مقداری جنود اسلامیه ايله اولجه بعث و تسیر اولندی .

اول شهنسوار عرصه بختیاری حالا صرب صندیغی دیمکه مشهور صحراده اولان متفقین اردوسی جوارینه بر شب تارده واصل اولوب کمال غرورلرندن ناشی دشمنك بی حزم و احتیاط کیمی مست و خراب و کیمیسی آلوده خواب اولدقلرینی تحقیق ایتمکه متوکلا علی الله مهاجمه نمای سطوت اولوب عسکر دشمنی مرتبه استیصاله ایصال ایلدی .

بوخبر مسرت اثر پادشاه غازیك روم ایل جانبیه عبورندن مقدم واصل سمع هایون اولمغه فریضه شکری ایفا و بیغا قلعه سنی روملر اتندن بعدالتسخیر مقر سلطنت اولان بروسهیه عودت بیوردیلر استانبول ایمراطوری طرفندن کیلر ايله یلاق اباد ساحنه عسکر

اخراج اولدینی استخبار قلنمغه ارسال سپاه ایله بر مقرداری اسیر و ماعداسی تدمیر قلندی .

یدیوز التمش سکر سنه سی خداوندکار غازی حضرتلری ایکنجی دفعه اوله رق روم ایلی جانبنه عبور وادرنه شهرینی دارالملک روم ایلی اولق اوزره سرای هایون و ابنیه رفیعہ انشاسیله معمور ایدوب یتمش یدی تاریخنه قدر کاه کندولری کیدرک و کاه امرا ارسال ایدرک و یزه و صداقو طرفلری و اورنوس بک ضرب شمشیر یله قواله و درامه و سیروز جانلری ضبط و صرب قرانک زیر حکمنده بولنان نیش قطعه سی دخی صولت پادشاهی ایله ساسله تملک ره ربط قلندقدن بشقه قرال مزبور سنوی رکاب هایونه اللی قیه کموش اعطا ایتک شرطیله مظهر عفو عالی و کوستندیل و نیکولی و سلستره حکمدارلری دخی التزام ویرکو ایله نائل مصافات شهر یاری اولدیلر .

بعده روم ایلی بکک بکلکی تیمور طاش پاشایه بالتوجیه بروسه یه عودت و ولاته سلچو . قیه دن ایکن کوتاهی ده کسب استقلالی ایدن کر میان اوغلنک کریمه سنی بیوک شهزاده لری اولان ییلدیرم بایزیده الیویرمکله جهاز عروس اوله رق کر میان زاده نک طرف پادشاهی یه تسلیم ایلدیکی کوتاهی و سیما و طاوشانلو قصبه لری ممالک عثمانیه یه منضم اولدینی مثللو حمیدایلی حاکمی بولنان حسین بکدن سیدی شهری و بیکشهری و بلواج و قره داچ و اسپارته نمن معلوم ایله اشترا قلندی .

پادشاه غازی اوچنجی دفعه ارله رق روم ایلی جانبنه بکچوب صوفیه قلعه سنی فتح و تسخیر بیوردقلری اواند قرمان اوغلی اشترا اولنان مواقع مذکور سبیلله ممالک عثمانیه نک قلمرو حکومته کسب اتصال ایتسندن توحش ایدرک و خداوندکار حضرتلرینک روم ایلیده اولان مشغولیتی فرصت اتخاذ ایلهرک ممالک محروسه یه دست تعدی پی دراز ایلدیکندن یدی یوز سکران یدی سنه سی موکب هایون اناطولی یه عودت و قونیه صحراننده جمعیت قرمانیانی رهین پریشانی و هزیمت ایلدکدن صکره قونیه قطعه سی دخی محصور اولمشیکن قرمان اوغلنک حایله سی بولنان کریمه پادشاهی نفیسه سلطان شفاعتیه مظهر عفو هایون اولدی .

روم ایلی بکک بکلکی تیمور طاش پاشا مناستر و پرله و قارلی ایلنی بعدالتسخیر بوسنه و هر سک مملکتلرینی سوخته آتش خسارات ایلدیکندن حاکملری بالضروره التزام ویرکو ایله تحصیل امنیت ایتشلردی .

قرمان اوغلی مسئله سی حدوتنه و بلکه بیلرندده قرارگیر اولان اتفاق خفی یه بناء

بوسنه قرالی اظهار معامله سرکشی به جرأت ایلدیکندن لالا شاهین پاشا معیتله سوق اولنان یکریمی بیک قدر جنود موحدین غارت ممالک دشمن ایله مشغول ایکن قرال مرقوم بعته اوزرلرینه هجوم ایتمکله عساکر اسلامیه منهزم و اکثریسی دائره شهوددن منعدم اولدیغندن اولحوالیده بولنان و مقدما التزام ویرکو ایلمش اولان حکمداران ملت عیسویه دخی زروء عصیانہ عروج ایتمکین سلطان مراد خان حضرتلری روم ایلی طرفنه مرور و برقوء مفرزه ایله صدراعظم علی پاشایی مأمور ایدرک شمنی و براوادی و طرنوی و نیکبولی و سلستره قلعہلری فتح و تسخیر ایتدیلدی .

قونیہ محاربه سنده موکب همایون معیتده بر مقدار صرب عسکری بولنوب بونلردن اموال اهالی به اطالة دست تعدی ایدن چند نفر شقی حقنדה اجرای سیاس بیورلمشیدی بومادهدن صربلور پک زیاده منفعل اولوب مملکتلرینه عودت لرنده اظهار عدواته قیام و سالف الذکر امرای عیسویه بی اضلاله اهتمام ایتمکده اولدقلری تحقیق کرده پادشاهی اولمغین نیت تأدیپ ایله سلطان ظفر قرین حضرتلری فلبه ده مشتانشین اولدغی صرب قرالک مسموعی اولیجق جوارنده بولنان ملوک عیسویه ایله عقد اتفاق ایدرک و یوز بیکدن زیاده عسکر و متعدد حکمدارلر ایله شهریار انامه مقابلہ ایچون ممالک عثمانیه به هجوم ایتلریله یدیوز طقسان برسنه سی رمضان شریفنده قوصوه صحرا سنده محاربه عظیمه مشهوره وقوع بوله رق اردوی متفقین کاملاً گرفتار هزیمت و پریشانی و خداوندکار غازی دخی اردو گاه دشمنی سیر ایدر کن مقتولین اراسنده مجروحان یا تمقده بولنان میلوش نام صربلو فدائی ضربیله شهیدان عازم ملک جاودانی اولمشدر سن عمرلری التمش بش و مدت سیاحتلری اوتوز بوشته قریبدر .

خداوندکار غازی حضرتلرینک شهادتی وقوعنه مبنی تعقیب دشمن ایله مشغول اولان بیوک شهزادهلری یلدرم بایزید خان معسکر هایونه کلوب جالس سریر حکومت اولسیله برابر طرف طرف امرا و سپاه ارسال اولنه رق ممالک دشمن غارت ایتدیرلمکله بیحد و قیاس اسرا و اموال نفیسه ایله اردوی همایون مالامال اولدی .

روم ایلی سرحداتی تأمین و تحکیم اولندقدن صکره سلطان جدید اناطولی به عودت و طوائف ملوک النده بولنان آیدین و صاروخان و منتشا سنجاقلرینی حکومت عثمانیه الحاق ایله توسیع دائره مملکت بیوردقلری مثللو روم ایلی بکار بکیسی تیمور طاش پاشا دخی قره طوه معدنیله اولحوالیده بولنان معادن سائرہ بی تسخیر ایدرک اموال بیشمار ایله رکاب هایونه واصل اولدی .

ماوك عيسويه نك اتفاقى ماده سنده قرمان اوغلى ذى مدخل وبنكه اشد اسباب وعلل اولغله ترتيب مجازاتى نيتيله رايات عثمانيه تجتر واهنرازه آغاز ايدوب كرميان و تكة و حميد ولايتلى حاكملى يدرندن نزع و ممالك قرماندن قونيه و آق شهر و نيكده شهرلى كشور عثمانيه به الحاق و قرمان اوغله لارنده و طاش ايلي قصبه لرى ارزاني بيورلدى .

افلاق حاكمى متعهد اولدينى و ير كويى ارسالده اهل اوزره حركت ايتمكين پادشاه غازى سكزيوز طقسان اوچ سنده اولجانيه عطف عنان و بر حمله ده صف سپاه افلاق بريشان ايتمكله و ير كوي قديمى تضعيف ايلدىلر .

قرمان اوغلى علاء الدين بك پادشاه انامك روم ايلي طرفنه عبورندن استفاده طريقتنه سالك و ممالك عثمانيه نك عارتنه متهالك اولغله ييلديرم خان حضرتلى سير سريغ ايله اناتولى به رجعت ايدوب و قوعبولان محاربه ده مظفريت كامله به نائل و ابن قرمان دائره شهوددن زائل اولدى .

سيواس و توقاد سمتلى دخى قبائل تاتاردن اولان قاضى برهان الدين دبست تغلبندن انتزاع قلندى .

افلاق حاكمك عصيانى قسطنمونى حاكمدارى بولنان اسقنديار اوغلك تشويقيه ظهوره كلديكى متحقق اولديغندن نيت تاذيب ايله اولجانيه حركت هايون و قوعبولدقمده اسقنديار زاده سينوبه فراروسينوب قلعه سنك يندنه ابقاسى نيازى تكرر ايتمكله قسطنمونى و كره نحاس ممالك عثمانيه علاوه ايله اكتفا و ممالك مفتوحه به شهزادگان و امرا تعيين و اسرا قلندى .

عثمانيان عليهنه اوله رق و نديك و فرانسه و سائر اوروپا حكامى طرفندن سالانبك ساحله كايتلو عسكر اخراج قلندينى خبرى وارد اولغله سلطان بايزيد حضرتلى طقوز يوز طقسان اتى تاريخنده اولجانيه سوق سمند استعجال و دلالات تيغ بيدريغ ايله جيوش وارده يى استيصال ايتدكدن بشقه سالانبك و يكي شهر قلعه لرى دخى تسخير ايلدى .

يدى يوز طقسان يدى سنده ادرنده جمع سپاه اوله رق حصن حصين استانيول تحت محاصره به اندى ايسده حجار قرالى پادشاهى بو عزمنندن و ازچورمك ايچون يوز بيكدن زياده عسكردن مركب بر متفقين اردوسى تشكييله نيكيولى قلعه سنى محاصره ايتمكين بالضروره استانيول محاصره سى ترك اوله رق اول طرفه عزيمت و عسكر دشمنى كرفتار هزيمت ايلدىلر .

استانيولك تكرر محاصره سى نيتيله كولك صومسيره سنك اوست جانبده واقع كوزلجه

حصار تعبیر اولنان انطاطولی حصارى بنا اولمغله استانبول ایمپراطوری سنوی اون بیک
التون ویرکو ویرمک و درون استانبولده براسلام محله سی احدائیه قاضی و امام نصب
وتعین قلمق شرطریله متشبث ازیا استیمان اولمغین لمصلحه مساعد و بوجهله مصالحه
وقوعندن صکره ارسال امر اوسپاه ایله ترحاله و آنه شهرلری روملر الندن و دیور یکی
وکاح و بهستی طرفلری متغلبه اترک یدلرندن اخذ اولنوب ممالک عثمانیه یه اضافه قلندی.
مفصلات توارینخده بیان قلندیغی اوزره اون بش یکر می سنه دنیرو سمر قند طرفلرنده
ظهور و ممالک اسلامیه یی کرفتار شروشور ایدن تیمورلک اولحوالیده بولنان ملوک غلبه
ایدرک جمعیت کثیره وقوه عظیمه پیدا و عراق عرب و عجم و اذربایجان قطعه لرینی دخی
ضبط و استیلا ایتمکله بغداد پادشاهی اولان سلطان احمد جلایر و تبریز حکمداری بولنان
قره یوسف سطوت تیموریدن هراسان و التجا کنان سلطان بایزید درگاهنه شتابان
اولدقلری مثللو جانب پادشاهیدن مملکتلری ضبط اولنان طوائف ملوک دخی یتوره دخالت
وسلطنت عثمانیه دن عرض شکایت ایتلریله و یتور منسوب اتندن اولوب ارزنجان طرفلرنده
حکمران اولان طهرتن اوزرینه یدلیرم بایزیدخان هجوم ایدرک اولاد و عیالی اسیر ایلمکله
بوماده دن و طرفینده بولنان ملتجیلرک ترغیب و تشویقلرندن حادث اولان حالات و جریان
ایدن مخبرات و معاتبات یتور مغرورک ممالک عثمانیه یه قدوم شومنی مستلزم اولدی

بناء علی ذلك یتور خوزیز سکر یوز اوچ سنه سی کشور رومه عنان انکیز اولوب سیواسی
تخریب و اهاالیسنی انواع عقوبتله تعذیب ایلدکدن صکره شام و حلب طرفلرینه عزیمت
و مدافعه سی ضمنده سوریه طرفلرینه وارد اولان ملک مصری کرفتار هزیمت ایدوب
عادت مستمره سی اوزره اولحوالی بی نهب و یغما و انواع شاعت و مظالم اجرا ایلدی
ایرتسی سنه و اواخرنده مبالغاتدن قطع نظر ایکیوز بیسکدن متجاوز عسکر یتور
اردوسنده و یوزیکر می بیک قدر جنک اور بایزید خان معسکرینده بولندیغی حالدده انقره
محراسنده محاربه عظیمه مشهوره و قوعبوله رق بقضاء الله تعالی اردوی هایون هزیمت
کامله یه کرفتار و سلطان بایزید دخی مبتلای دام اسار اولمغله یدی سکر آی مرورنده
حال اسارتده و سلطنتک اون دردنجی سائنده و قرق درت یاشنده ارتحال داربقا ایلدی

فصل اولک تکمله سی

دولت سلجوقیه نک انقراضیه ظهور ایدن طوائف ملوکدن بریسی دخی عثمان غازی
اولوب ملک و نفوسا سائرلرندن کوچک کی کورندیکی حالدده بیان احواللری صددنده

بولندیغمز دوت عدد پادشاهان ذیشانك تقریباً یوز الی سنه قدر اولان مدت سلطنتلوند
 ممالك سلجوقیه کاملاً تحت حکومت دولت علیه داخل اولدقدن بشقه طونه ساحلارینه
 دکن روم ایلی کشورینك فتح و تسخیر اولمسی و بر جمعیت قلیله نك بو درجه ده کسب
 جسامت و عظمت ایلمسی مادی و معنوی بر طاقم وسائل و اسبابك تجمعیله صورتیاب
 حصول اولمشدر شویله که اولاً مشار الیهم حضراتی احکام شریعت جلیله احمدیه یه کردن
 داده مطاوعت اولوب مواد حقوقیه یی حوزه حکومتده بولسان شهر و قصبه لره تعیین
 ایتدکاری قضاته تحمیل و کندولرینی دخی بوبابده افراد ناس منزله سنه تنزیل ایدرک حکومت
 شرعیه یه اصلاً مداخله ایتمالرله عدالت شریعت نبویه ملک و دولترینی اعمار و احیا
 ایشدر . ثانیاً متبوعلری بولسان دولت سلجوقیه یه نهایت حکومتلرینه دکن مقام اطاعت
 و انقیادده ثابت قدم اوله رق بر وقتده عصیان و تغلب وادیسنه سلوک ایلدکلرندن حق
 سبحانه و تعالی حضرتلری دخی مکافات جزیه احسان و دولت عثمانیه اوزرینه وقت وقت
 خروج ایدن ارباب بغی و طغیانی مقهور و مدمر ایده کلشدر . ثالثاً دولت سلجوقیه نك
 انقراضی وروایمپراطورلغتك ضعف و اختلالی سبیلرله عثمانیانك مهدامارتلری جوارنده
 بردوات قوی شوکت بولنامسی ظهور سلطنت سنییه یی تسهیل ایشدر . رابعاً طائفه عثمانیه
 سرحد اسلامده متوطن و دائماً غزا و جهاد ایله مشغول اولدکلرندن نوبنو فتوحاته
 نائل و اموال و غنایم ایله ثروت و سامانه واصل اولدقجه صیت شهرت و شانلری ولوله
 انداز اقطار اولدیغندن طاب مشوبات غزا و خواهش اموال غنیمت و اسرا ایله اطرافده
 بولسان شجعان مسلمین آقین آقین بارگاه عثمانیه التحاق والتجا ایلدکلرندن کون کوندن
 موکب عثمانی کسب عظمت و مهابت ایلدی . خامسا ارباب فضل و معارفه تعظیم والتفاتلری
 و اعوان و انصار دولته تیمار صورتیه اراضی تملیک و تفویض ایدرک منافع دولندن
 حصه مند ایلری و توسیع ممالك و تزئید نفوس اسلامیه حقدن اولان اقدام و همت
 فوق العاده لری و عدل و داد و اعمار بلاد امرنده اولان دقت و غیرنلری و بوبابده اتحاد
 ایلدکاری قوانین و نظامات حکمت آمیزلری تأسیس بنیان دولت و تحکیم ارکان سلطنت
 عثمانیه یی موجب اولمشدر .

عثمان غازی واصل امارت اولدقدن صکره خیمه بدوتی قصر حضریته تبدیل و مرکز
 حکومتی اعمار و انشا ایتدیردیکی بکیشهره تحویل ایدوب اواخر مدتده علت تقریسه
 ابتلاسی جهتیله غزا و جهاد مصلحتی و اداره امور عسکریه یی کوچك اوغلی اورخان
 غازی یه تحمیل ایش و اورخان غازی دخی جالس سریر حکومت اولدقدن اون ایکی سنه

مرورینه دکن پدری کبی بالذات حرب و قتال ایله مشغول اوله رق عصر مزك تقسیمانه قیاساً بروسه و اذمید و قره سی سنجاقلرینی داخل دائره حکومت ایله کدن صکره امور حربیه بی بیوک اوغلی شهزاده سلیمان پاشایه تفویض ایتمکله مشارالیه دخی کلیولی حوالیسنی ضبط ایدوب بولایرده متمکن و مستقر اولمسیدی .

سلطان مراد خان اول عصرنده ادرنه و قوصوه محاربه عظیمه مشهوره لرینک ثمره غالبیتی اوله رق ممالک عثمانیه طونه ساخلارینه و صرب حدودینه قدر توسیع قیلنوب بعدازین محارباتک الذخیرلو و منفعتلوسی روم ایلنده وقوعبوله جفندن ادرنه شهری روم ایلی پای تختی آنحاذ اولندی اناطولیه دخی انقره و بیغا سنجاقلری حربا واسپارته سنجاغی اشترأ و مملکت کرملان دینلان کوتاهیه سنجاغنک برمقداری جهاز طریقله داخل قلمرو عثمانی اولوب طوائف ملوکک سرفرازی کچنان قرمان اوغلی حکومتی دخی خداوندکار غازینک سیف سطوتیه مغلوب اولدیغندن سلطنت عثمانیه دولت معظمه هیئته کیردی باخصوص خداوندکار غازینک مصره کوندردیکی ایلمچی و ساطتیه مصرده بولسان خلیفه عباسی طرفندن تنفیذ حکومت شرعیه ایچون اجازتنامه و سلطان روم عنوانی وارد اولمغله پادشاهه سلطان مراد نامی و دولترلرینه دولت عثمانیه و متممیان درگاه سلطنتلرینه عثمانلی تعبیرلری زبازرد انام و طوائف ملوک ایسترایسته مز وقوعبولان غزواتده موکب هایون معیتنه عسکر ارسالیله اعانه ایلمکله رام اولدی مؤخرآ دخی یلدرم خان حضرتلری نیکبولی و سلانیک محاربه مشهوره لرنده نائل فوز و ظفر اوله رق سلانیک و یکیشهر واتنه بی اوردۀ قبضۀ اقتدار و اناطولیده بولنان طوائف ملوک ممالکنی دفعۀ حوزۀ حکومتنه ادخال ایتمکله کشور عثمانی بی طونه دن سیواسه قدر توسیع ایدوب استانبول و صرب و بوسنه و افلاق حکومتلرینی ویرکو اعطاسنه اجبار ایلشیدی بو قدر مظفریت اوزرینه ذاتنده اولان تهور و غرور مرتبه کماله واصل و مع مافیه بعض کونه احتشام و هوایه میلندن ناشی امرا و طوائف عسکریه نک آبا و اجدادینه اولان اعتقاد و اعتمادلری زائل اولدیغندن بشقه اولان سلطنتی تیمورک زمان استدراجنه تصادف ایلدیکندن اوتارینجه قدر مرارت مغلوبیتله تلخکام اولمیان حکومت عثمانیه سیلاب زده شرو شور اولدی تیمور خونریزک احوالی تتبع ایدن ارباب انصافک معلومی اولدیغی اوزره مومی الیه ملت اسلامیه اوزرینه جناب حقک بر بلای عظیمی اولدیغنده شبهه یوقدر چونکه مرکز امارتی کویا سمر قند ایشه ده باشنده مجتمع اولان حشرآتی نهب و غارت اموال عباد ایله اغنا و بوسیدله قوت و عظمت پیدا ایلمکی اعتیاد ایدنمکله دائماً سفر برلک حالنده بولنور ایدی بونک ایجاب طبعیسی

اوله رق دو کدیکی قان وایتدیکی ظلم و تخریب ایلدیکی بلدان حد و حسابیه کلیوب اکثریسی
دخی ممالک اسلامیه اوزرنده در آسیای وسطاده کی ملوک اسلامیه یی زیر وزیر ایتدکدن
سکره عراق و اذربایجان طرفلرینه هجوم ایدرک قهر و وصولتدن فرار ایدن بغداد پادشاهی
سلطان جلایر ایله تبریز حکمداری قره یوسف بارگاه یلدرم خانیه دخالت ایتلریله بونی
سر رشته امل ایدوب اولابر صورت متجربانه ده انلری طایفه قیام ایلدی اگر سطوت
وصولتدن یلدرم بایزید خانه خوف و خشیت طاری اولوب مطاوعتکارانه حرکت کوستر
مش اولسه درجه ثانیه ده کندوسنه التجا ایدن طوائف ملوک مملکتلرینی استرداده
آشبت ایده جکی میدانده ایدی هر نه حال ایسه اورالره حاجت قالمیه رق یلدرم خان مرحوم
غایت شدتلی و تحقیر امیز جوابلر ارسالیله کبر و نخوتنه طوقندیغندن کسر شوکت عثمانیه
قصیده سوق موکب ظلم و اعتساف ایدوب لیکن حقانیت و شفقتدن بشقه کندوسندن بر
شی صادر اولمامش کی کاه سلطنت عثمانیه مثللو مجاهد بردواتی پریشان ایلکی تجویز
ایتمدیکم حالده یلدرم خان حضرتلرینک خلاف آداب ملوک نامه سنه درج ایلدیکی شتم
و طعن بی مجبور حرب و قتال ایلدی دیهرک و کاه ممالک مورته لرندن و دارو دیار و اولاد
و عیال لرندن مهجور اولان طوائف ملوک نثار ایلدکلی کوز یا شلرینه دایانه مدم یوللو
مقالات نشر ایلهرک مقصد اصلیبی اولان غارت و یغما ماده قبیحه سنی ستر ایتدی واقعا
یلدرم خان طرفندن دفعه اودرجه تهور و طعن و آشنایع اظهارینه لزوم یوغیدی
حتی بوبابده و کلاسی دخی و خامت انجامی ممکن اولدینی مرتبه بیان ایدرک منعه سعی
ایلدیله ایسه ده کارکر اولمادی تیمور نامه لرده کوریلان تفصیلاتدن مستفاد اولدینی اوزره
معسکر تیموری بردریای بی پایان اولدقدن بشقه امرا و افراد عسکرینه نک اطاعت
و انقیادلی حد کالده و نظام و انتظامجه دخی اولوقته کوره تحت انضباطده اولوب لیکن
جوش عثمانیه ده ها منتظم و مکمل و طوب و تفننک مثللو اسلحه ناریه یه مالک
ایدو کندن اردوی تیموره غلبه اولمق مستبعد دکل لیکن بر طاقم اسباب هزیمتک
تجمعی مظفر دائمی اولان لوای عثمانینک سر نکون اولسنی مستلزم اولدی . شویله که اولا
طوائف ملوک یدندن نزع اولنان ممالکک اهالیسی قلت زمان سببیه سلطنت عثمانیه یه
عبودیت واسطه حاصل ایدمه دکارندن حین محاربه ده تیمور معسکرنده مشاهده ایلدکلی
اسکی بکلی جانبیه فرار ایلدیله . ثانی اردوی هایون معیتده سکر بیک قدر صرب
عسکری بولندیغندن بوندن آشام اولنور و مثال اوله رق خداوندکار غازی نک اواخر
سلطنتده فرمان اوغلی ایله ترتیب ساز اولدینی صف مصافک نتیجه سی قصود محاربه سنک

وقوعه و خداوندکار غازی‌نک شهادت‌ه باعث اولدی دینلور ایدی . ثالثاً بومحارب‌ه‌نک ظمورینی ذاتا ارکان دولت تجویز ایدم‌مدک‌ری کبی یل‌دیرم خان حضرت‌لری هوا وهوسه انهما کلری ثمره‌سی اوله‌رق عسکر ووظائفجه بعض تنقیحات اجرا ایش بولندیغندن متفقانه وفدا کارانه حرب اولنه‌مدی . وپادشاه مرحوم بوغوغانک سبیتی بتون بتون کندو اوزرنده ایدوکنی بیلدیکندن حد امکانده ایکن فراردن عار ایدرک برقاچ‌پوزکشی ایله قالنجه‌یه قدر بالذات چالیشوب انهایتنده اسیر اولمشدر .

احوال ارکان دولت

عثمان غازی‌نک پدرندن قالمه برطاقم امرا وارکانی وار ایدیسده قاعده دولت اوزره تعیین مناصب اولنیموب فقط بیوک اوغلی علاءالدین پاشا تحصیل علم وعرفانه سالک مرد کامل وکوچک اوغلی اورخان بک ارباب حرب وقتال وادیسنه مائل اولمغله علاءالدین پاشا پدری یاننده آرام ایدر واورخان بک سردارالق وظیفه‌سنی ایفا ایلر ایدی .

اورخان غازی جالس سریر امارت اولدقدن صکره ابرام والاحاج ایله علاءالدین پاشایی مقام وزراته اصعاد ایشمکله پاشای مشار‌لیه وقت وحواله مناسب وتأیید بنیان‌دولتی موجب نظامات عسکریه وسائره وضع وتنظیم وبعده گوشه‌انزوایی منصب دنیایه تقدیم ایلدیکندن مؤخرآ اورخان غازی‌نک اوغلی سلیمان پاشا فریدون بک مجموعه‌سنده مسطور اولان منشور موجب‌نجه دیوان هایونده وزیر وکافه امرا وجیوش عثمانیه‌یه امیر نصب اولندی . خداوندکار غازی‌نک یتشمش شهزاده‌سی اولدقدن بشقه عزساطنت حقوق ابوت وبنوتی سالب اولق زمانی ککش وحقی اوچنجی دفعه روم ایلی‌یه تشریف‌لرنده بروسه‌ده قائم‌مقام براغیلان شهزاده ساوجب‌بک کندو نامه سکه وخطبه ضرب وقرائت ایتدرمشیدی . بناءً علی‌ذلک واسط سلطنت مراد خانیده قاضیه‌سکر بولنان جاندارلو قره‌خلیل خیرالدین پاشا نامیله وزیرنصب اولنوب سکسان یدی سنه‌سنده وقوع وفاتنه مبنی مع‌الوزاره قاضیه‌سکر بولنان اوغلی علی پاشا پدری مقامه اعتلا ایلدی .

قوم ترک بیننده بیوک اولاده پاشا دینمک عادت اولمسیله علاءالدین پاشایه وسلیمان پاشایه پاشالق اضافه‌سی طبعی اولوب جاندارلو قره‌خلیله خیرالدین پاشا نامنک اعطاسی اولاد مقامه قیامنی تلمیحا اولق کرکدر . روم ایلی فتیح اولدقدن صکره لالا شاهین ومؤخرآ تیمور طاش پاشا روم ایلی بک‌لر بکیسی نصب اولنه‌رق بولمده دخی پاشالق نامی ویرمش

ودها صکرملری تیمورطاش پاشایه و بعض امرایه وزارت احسان اولمش اولمسیله علی پاشا وزیر اعظم عنوانیله تمیز قلمشدر .

هرسنباقده برر میرلوا وهرقضاده برر قاضی وانقرده اناطولی بکلیر بکیسی مقیم اولوب پای تخت قاضیلری سفر وقوعنده موکب هایون ایله عزیمت ایدم کلمشیکن اوائل سلطنت مراد خانیده سالف الذکرچاندارلو قره خلیل بروسه قاضیلکندن مجددا احداث اولنان قاضی عسکرلک مأموریتته انتخاب اولندی .

شهرزاده کان اناطولی به مخصوص اولمق اوزره برر سنباقده میرلوالق مأموریتیه اجرایی حکومت وامور سیاسیله کسب مهارت ایدم کلدکارندن بارگاه پادشاهیده وزیر اعظم وقاضی عسکر وطوائف عسکریه ضابطانی ودفتردار و بعض امرا وخدمه مخصوصه پادشاهی بولنور ایدی .

صورت اداره اراضی

ممالك عثمانیه نك اراضیسی تیمار و خاص نامیله ایکی صنفه تقسیم اولنوب مثلا بشیوز قریه بی شامل اولان برسنباغك ایکی اوچیوز کوی ایجابنه کوره ایکیشر اوچردن کسان طقسان تیماره بالتفریق شجریان مسلمینه تفویض اولمش و ماعداسی خاص اعتبار اولنهرق اقتضاسی وجهله شهرادکان ووزرا و بکلیربیکی و میرلوا وسائر امرایه حصه افراز اولندقدن صکره بقیه سی خاص هایون نامیله خزینه دولته براغلمشدر . ذکر اولنان خاص و تیمارلرچفتك دیمك اولیوب چونکه هر خاص و تیمارلر حاوی اولدینی اراضی شونك بونك متصرف اولدقلى ترلاردن عبارت اولهوق اصحابی زراعت وحرث ایدرلر و عشر شرعیسی و فراغ وانتقال اراضیده معین اولان خرجی خاص و یا تیماره متصرف اولنلره اعطایلرلرکه اصطلاح قانون اولهوق اشبو خزینه دولته عائد حقوقه متصرف اولان خاص و تیمار اصحابنه صاحب ارض دنیلور و بعض اراضینك اشبو صاحب ارضلق حقوقی فاتحلى اولان ووزرا و امرایه طرف پادشاهیدن تمليك اولنمغله حاصلاتی انشاسنه موفق اولدقلى خیرات و میراثه وقف و تخصیص ایلدکاری کبی سلاطین عظام حضراتی دخی کندو جامع و مدرسه وسائر میراثلرینه مناسب مقدار اراضی وقف و تسجیل ایشلدر .

اصحاب تیمار تیمارلری داخنده ساکن اولهوق حوزه تیمارینك ضابط و حارسى اولنمغله محافظه سنه و کندوسی دخی حصه مند منافع اولهجنی جهتله زراعت و حرثاتك تزیایدینه اعتنا و غیرت و سفر وقوعنده مکمل سلاح و توانا آتی و حالته کوره توابعاتی ایله تحت

لواسنده بولندی میروانک قومانداسی التمه ایفای وظیفه حرب و قتال ایلر ایدی بونلرک قوانین و نظاماتی عصر سلیمان خانیده استکمال قلمش اولمسیله ان شالله تعالی فصل ثالثه مقدار و کمیترلی و دسترس اولدقلری منافعک درجاتی وقاعده توجیهاتلری برتفصیل ذکر و بیان قلنه حق ایسنده بوراده اساس مصاحت بروجه اجمال ایراد و اتیان قلندی

تأسیسات و ترقیات

پادشاهان عظام حضراتنک ارباب غزا و جهادده التفات و اعتبارلری برکمال اولدیغندن کرک اعاون و انصار قدیمه نک و کرک میخال بک و اورنوس بک کبی صکردن بارکاه عثمانی به التحاق ایدن امرانک اولاد و احفاد لرندن فن حرب و قتالده ماهر بهادرلر یتشمکده اولدینی مثللو اصحاب فضل و معارف حقنده مبذول بیوریلان تلطیفات و تعظیفات ثمره سیله از وقتده مرکز دولت مجمع فضلا و معارفندان اولمشدر بونلردن بریسی دخی اورخان غازی نیک برادری علاءالدین پاشا اولوب زمان و مکانی تشکیل بنیان دولته مساعد کور دکارنده صرف نیروی اجتهاد ایله عساکر موظفه ترتیب و تعیین البسه و قیافت ایله طوایف عسکریه بی ارباب حرف و زراعتدن تمیز ایلدیلر و اعظم علایم استقلال اولان سکه قطعی خصوصنه اورخان غازی بی ترغیب ایدرک اوچی بردرهم سیم خالصدن عبارت اولمق اوزره اچقه قطع اولندی

چونکه عثمان غازی هر نقدر نامنه خطبه قرائت ایتدرمش ایسه ده سکه قطعنه موفق اوله مدیغندن تداول ایدن نقود سلاطین سلجوقیه اسامیسیله مسکوک ایدی عثمان غازی عصرنده ادوات قلعه گیری مرتبه کماله واصل اولمدیغندن بروسه و ازنیق مثللو اولوقته کوره مستحکم اولان قلعه لرک فتح و تسخیری ضمنتده مدت مدیده محاصره دن بشقه چاره اولمامسیله مذکور قلعه لرک جوارلرینه استحکامات بنا و ایچلرینه عسکر وضع اولنوب اوزراون بشر سنه تحت محاصره ده طوتمش و باخره ویره ایله التمشیکن ارباب هنر و معارفک همتیه از مدت مرورنده دهایی منتشر اولمقده اولان اسلحه نازییه تدارک اولمشدرکه قوصوم محاربه سنده طوب و تفنک استعمال قلندیغنی بعض تاریخلرده مسطور اولدقدن بشقه اولبابده اصدار و بروسه به ارسال اولنان فتحنامه ده دخی محرر

بیان احواللری صددنده بولندیغمز پادشاهان عظامک و وزرا و امرالرینک بروسه ازنیق وسائر محللرده بنا و انشا ایلدکلری جوامع و مدارس و خان و حمام وسائر آثارلری الیوم

موجود اولمغله قدرت و قوتلرینه و مدنیت و معارفک نه درجه یه قدر ایلرولمش اولدیغنه
مقیاس صحیح اوله بیله جکندن اولباید اطناب مقاله حاجت کوریه مز و ابنیه مذکور دنک
اکثریسی غالباً روم معمارلرینه یایدیرلمشدر حتی خداوندکار غازی نام سامیسنه منسوب
اولان جامع شریفی انشا ایتدیرمک تصویریه بر معمار تحریرسنده ایکن روم ایمپراطورلری
طرفندن عثمانیان علیهنه اوله رق یلاق آباد ساحلنه سوق اولنان عسکر قرین انهرام
اولدقده النان اسرا ایچنده بر معمار بولمغله ذکر اولنان جامع شریف ایله برخیلی ابنیه
مذکور معماره بنا ایتدیرلمش اولدینی بعض توارینخده مذکوردر .

احوال عسکریه

عثمان غازی زماننده ارباب حرب و ضربدن اولان اهالی اسلامیه ایجاب ایتدیکجه عموماً
سفره کیده گلشیکن ممالک وسعت و اهالیده کثرت حاصل اولدقده جیوش منتظمه و موظفه
ترتیبی لازم کلدیکندن اورخان غازی جلوسنده بونک اجراسنه تشبث اولندی مع مافیه
فتح اولنان ممالک اکثر اهالیسی عیسوی اولمغله و تکثیر نفوس اسلامیه مادهسی ایسه
اک زیاده اعتنا اولنه حق اموردن بولمغله بویکی مقصدی جامع اولان دیوشیرمه قانونی
وضع قلندی شویله که خرسیان چوجقلرندن هر سنه ممکن اولدینی قدر اطفال اخذ و جمع
اولنوب تربیه و تعلیم شرائط اسلامیه اولندقدن صکره رکاب هایونده قشله نشین اولق
اوزره یومیه بر راجه وظیفه و تعینات مقتضیه ایله پیاده عسکری ترتیب اولندیکه یکچیری
دینلان عسکر بونلدر بوقانون وضع اولندقده ابتدا کی سنه بیک نفر چوجق النوب
بعده کیتدیکجه توسیع اولمش و بیک الی تاریخلرینه قدر جریان ایلشدر مؤخرآ اشبو
دیوشیرمه چوجقلرندن یک چوق امرا و وزرا و محمود پاشا ورستم پاشا و صوقوللی محمد پاشا
کی عظما ظهوره گلش اولمسیله خرسیان اهالی چوجقلرینی کندو رضا و بلکه رجالریله
ویرمه باشلادقلری توارینخده مسطوردر

ممالک عثمانیه توسع ایتدیکجه تیار چو غالب تیار تیکثر ایلدیکجه سواری عسکری ارتمقده
ایسه ده بالاده بیان اولدینی اوزره تیارلو سپاهیسی تیارلری داخنده توطن ایدم کلریله
مرکز سلطنتده یکچیری عسکری کی وظیفه یومیه ایله موظف بر سواری عسکری ترتیبی
لازم کلدیکندن خداوندکار غازی عصرنده روم ایلی بکار بکیسی اولان تیمور طاش پاشا
همتیله ابنی سپاهیان بلوکی تنظیم و ترتیب قلندی بونلر دخی دیوشیرمه چوجقلرینک

کزیدملرندن و محارباتده النوب سرای پادشاهیده ووزرا خدمتلرندده تربیه اولمش اسرانددر
بو حالده تیمارلو سپاهیسی اوروپالولرک ژاندارمه دیدکاری ایالات عسکری حکمنده ویکچری
وسپاه اوجاقلری پادشاهلرک عساکر خاصه سی مقامنده اولدیغندن مرکز سلطنتده حاضر
بولورلر ایدی که یکچری پیاده و ابنای سپاهیان سواریدر بونلرک تفصیل احوالدری
دخی عصر سلیمان خانیه تصادف ایدن فصل ثالده توضیح قلنه جقدر

احوال مالیه

واردات دولت جزیه شرعیه دن و متجاوز اولان ملوک عیسویه نك ویرکوی
مقطوعلرندن و خواص هایون اعشاریه کمرک و ملحقلر حاصلاتندن واک جسیمی اموال
غنائیم خمس شرعیسندن عبارتدر که اشبو خمس شرعی خداوندکار غازی عصرنده قرمانی
مولانا رستم القاسیه وضع و تأسیس قلنمشدر

وارداته نسبتله مصارف پك جزوی اولوب چونکه عساکر عثمانیه نك قسم اعظمی اولان
تیمارلو سوارسی ایله وزرا و امرا و ارکان دولتک اکثری کیندولرینه تخصیص اولنان
خاص و تیمارلرک حاصلات عشریه سیله موظف اولدقلرندن خزینه دولتدن اعطا اولنان
مصارف قبو قوی تعمیر اولنان یکچری و درگاه عالی سپاهیلری یومیه معینه لریله بعض
علما و ساداته تخصیص قانان وظائف یومیه دن عبارتدر

فضله واردات جامع و مدرسه و کوپری و خان و حمام مثللو عماراته صرف اولنور ایدیکه
ممالک عثمانیه نك هر طرفنده الآن آنارلری باقیدر یلدرم بایزید خان زمانه قدر پادشاهان
عظام حضراتی تزیینات و احتشاماتدن غایت ساده اولوب حتی عثمان غزینک محالفتی برقاج
طاقم اسایحه ایله بش اون آت و اوچ بش سواری قیوندن عبارت ایدوکی توارینجده مسطور
اولوب بوکا ایسه عدم اقتدار معنایی ویریه من چونکه یکریمی اوتوز سنه برسینجاقلقدن
زیاده ممالکته بروجده استقلال متصرف اولان بر حکمدار اگر ارزو ایتمش اولسه پك چوق
تجملاته دسترس اوله جنی درکاردر

خداوندکار غازی به سور هایونده اورنوس پك طرفندن تقدیم اولنان هدایا که یوز
نفر کوله و یوز نفر جاریه الارنده التون و کموش تبسیلر طوترلر و ایچلرندده آوانی زر و سیم
ملو ایدی بونلری کاملاً مصر سلطاننه اهدا ایتدیکی کبی سلطان مشارالیه طرفندن وسائر
حکمدارن و امرا جانبلرندن وارد اولان هدایای کلیه نك بریسی نفی ایچون توقیف

ایتموب شرفا وعلما و غزاة موحدینه تقسیم بیورمش اولدقلری دخی بوقضیه بی مؤیددر
یلدیرم بایزید خانک وزیر اعظمی بوانان علی پاشا که یفین وقته قدر جاری اولان دارات
وزارتک مخترعیدر مزین و ملبس ایچ اوغلانلری و حرم اغالری قوللانمق و آوانی زر
وسیم استعمال ایلکم یوللرینی آچدیغندن وقاعدۀ دخی دولتک ترفه وتنم زمانی حلول
ایلمش ایدوکنسندن یلدیرم خان حضر تلری التون دوکملو والتون تللرایله نسج اولمش
البسلر کیمکه وزر وسیمدن مصنوع آوانی استعمال ایلکمکه باشلوب سائر احتشامات
وتزیینات دخی بومقیاس اوزره جریان ایلدیکنسندن اواخر ایام سلطنتنده وظائف عسکریه بی
تقلیله مجبور اولدی برکت ویرسون مصارف کلیۀ دولت اولمق لازم کلان معاش وزرا
وامرا و مأمورین و عساکر عثمانیه نک قسم اعظمی اولان تیمارلو سپاهینک معاشلری خاص
وتیمار صورتیله حاصلات عشریه دن محول بولندیغندن خزینۀ دولتک مضایقه سی تمامیله
میدانه چیقمدی

حکام شرعیه خزینۀ دولتدن وظیفۀ یومیه ایله موظف ایکن عصر یلدیرم خانیده
بعض مکارهه جرائتلرندن ناشی تأدیب و تربیه لرینه تشبث اولندقدۀ صدر اعظم علی پاشا
بونلرک وظیفۀ معینه لری پک جزوی اولدیغنی و متأخرین اخذ اجرت خصوصندۀ قلمزن افتا
اولدقلرینی بیان ایله ترکه و حجت کبی مواتیق شرعیه یه رسم معین وضع و تخصیص ایتدرمشدر

احوال خارجیہ

دولت ساجوقیه نک انقراضی ایله مکنت و ممالک تلری طوائف ملوکه منقسم اولدیغنی
مملو استانبول ایمپراطور انک کال ضعف و فتوری سببیلہ انک توابعاتی دخی طوائف
ملوک هیئتہ کیردیکنسندن عثمان غازی نک جوانب اربعه سنده ذی قدرت و بطش شدید صاحبی
حکومت قالمماغله غازی مشارالیه ایله اورخان غازی زمانندۀ اناطولی قطع سنده ممالک
عیسویه قولایقله تسخیر اولندقدن صکره سایمان پاشا روم ایلی یقه سنه مرور ایلدکده
شمدی یه قدر اهمیت ویرمدکلری دولت عثمانیه روم ایلندۀ بولنان حکمداران ملت
مسیحیه یه موجب دهشت اوله رق بالاتفاق قوۀ عظیمه ایله مدافعه یه قیام ایلدیلر ایسه ده
ادرنه باصغتنده وقوصود محاربه سنده هزیمت کامله یه گرفتار اولملریله رایات عثمانیه طونه
ساحلرینه و صربستان حدودینه و آتیه طرفلرینه قدر واصل اولدیغندن بالضروره افلاق
وبوسنه و صربستان حکمدارلری و استانبول ایمپراطورلری ویرکوا عطا سنه راضی اولدقلرندن
باشقه اینجاب ایتدکجه عسکرلریله خدمت دولتده بولمغه دخی مجبور اولدیلر

اناطولیده بولنان طوائف ملوک ممالکندن اولاً قره‌سی بعده انقره واماسیه و سیواس طرفلری حوزه حکومتہ ادخال اولمسیله و طوائف ملوک اک قوتلوسی بولنان قرمان اوغلی حرکات تجاوز کارانه‌سنه بناءً خداوندکار غازی‌نک کرفتار قهر قهرمانیسی اولمغله طوائف ملوک جمله‌سی سرفرو برده انقیاد اولمشلر ایدی لکن یلدرم خان حضرتلری غایت متهور و مغرور اولدیغندن مناسبت وقوعه و تانی و احتیاط طرفلرینه اصلاً نکاد. التفات ایتیه‌رک آیدین و منتشا و حمید ایلی و قونییه و کریمیان و اسفندیار حکمدارلرینی بر حمله‌ده قاجیروب ذکر اولنان مملکتلره طرفندن والیر نصب و تعیین ایتکله یو کیفیت تیمور وقعه‌سنه سبب اولدی

اورخان غازی و خداوندکار غازی و یلدرم خان حضرتلری روم ایمپراطورلرندن قیز الدقلری کچی کریمیان و قرمان اوغللریله و سائر طوائف ملوک ایله قیز الوب و یردرک صهریت حاصل ایتمشلر ایسه‌ده بوضورت دولت علیه‌نک مستعد اولدیغی توسیع ممالکله حائل اولمقدن بشقه بلکه اساس صهریت توسیع ممالکی مستلزم اولمق مقصدینه مبنی ایدی چونکه خداوندکار غازی اوغلی یلدرم خان حضرتلرینه کریمیان اوغلنک قیزی‌نی الیویردکده جهاز اوله‌رق کوتاهیه‌سنجاغنک بر قاج قضاسی حکومت عثمانیه‌یه تسلیم اولندیغی. خالد بالعکس کریمه‌لری نفیسه ساطانی قرمان اوغلی علی بکه تزویج ایلدکده فریدون‌بک منشأ‌تنده مسطور اولان خطبه نکاح مزایاسندن استدلال اولندیغی اوزره مملکت قرماندن اقسرای و اقشهر و ایلغین قصبه‌لری سلطان مشارالیه‌ایه تملیک ایتدیرلمشدر وقوعات سائریه دخی عطف نظر اولمقدده بو قضیه ثابت اولور چونکه یلدرم بایزید خانک کریمیان اوغلی قائن پدری و قرمان اوغلی انشته‌سی ایکن نطع کشور کشاییده شاهان مصاهرت رهین پیادگان اجانبندن اصلاً فرق و تمیز قلنما مشدر .

سلاطین عثمانیه حضراتی اروپا قطعه‌سندده نائل فتوحات اولدقجه ملوک اسلامیه بیننده فضائل غزا و جهاد ایله کسب شرف و افتخار ایده‌کلدکلرندن اولبابده سلاطین مصریه ایله ملوک سائریه یازیلان فتحنامه و کلان تبریک‌نامه‌لر فریدون‌بک منشأ‌تنده مسطور اولمغله معاملات خارجیه‌لرینک بعض جهت‌لری دخی آندن مستبان اولور .

باب ثانی

یلدرم بایزید خان حضرتلرینک وفاتندن سلطان بایزید خان نانی‌نک فراغ مشغله سلطنت ایلدکلرینه قدر تقریباً یوز اون اوچ سنه‌لک وقوعاتی متضمندر .

روم ایلی طرفلرینه تسلط ایدم میوب حتی روم ایمپراطورلری جانبدن ارسال اولنان
استخوان پاره هدايا ايله قناعت ایلدی . لکن اناطولیهجه مقتدر اولدیغی مظالمی اجراده
قصور ایتدکدن بشقه چایی سلطان محمدک امامیه طرفلرنده تدمیر اشقیا حقنده سرزده
ظهور اولان موفقیتلرینی استماع ایتدکده انی دخی احما ایلمکه تشبث ایلدی . شویله که
عقب محاربهده برطاقم تاتار سرکردهلری ممالک عثمانیهک نهب وغارتنه قویولدقلری مثللو
بالطبع خصمای عثمانیاندن اولان طوائف ملوک توابعاتی وباخصوص اسفندیار اوغلانک
متعلقاتی یلدرم خان شهزاده لرینک فرصتیاب اقتدار اوله بیاملرینی منع ایچون بشر اونر
بیك حشرات ايله توقاد واماسیه طرفلرنده طولاشدقلرینه مبنی چایی سلطان محمد خان
حضرتلری بالضروره بونلرک دفع وازاله سنه مجبور اولمشیدی . کندوسنک قپوسی خلقی
وتحت حکومتده بولنان امامیه عسکری ایکی اوچ بیك کشیدن عبارت ایکن توفیقات
الهییه مقارنتیه او مثللو جمعیت عظیمه صاحبی اولان اشقیا وخونه بی واحدأ بعد واحد
تنکیل وتدمیر ایلمکه باباسنه خیر الخلف اوله بیله جکی تبیین ایلدیکندن تیمور مغرور کندوسنه
داماد ایدنمک وعدیه دعوتنامه تحریر واصدار ویلدرم خان حضرتلرینی دخی اجباتی آمر
مکتوب ازبارینه اجبار ایلدی .

شهزاده مشار الیهک امرا وارکانی تیمورک نمقوله غدار وستمکار اولدیغنی بیان ايله
اجباتی تجویز ايله مامشار ایکن بر مقتضای سن شباب فریفته خصم مکار اولملریله برایکییک
سواری ايله سوق سمند شجاعت ایدوب لکن چند مرحله کیدر کتمز یولنی بکلمکده
اولان ایکی طاقم خونه یه دوچار اولدیغندن حملات رستمانه سیله جمله سنی تارمار ایتمش
ایسهده بونلرک ظهوری مطالعات امرا وارکانی مؤید کورنمکه مقرر امارتنه عودت
واعذارنامه ايله خواجه سی صوفی بایزیدی معسکر تیموره ارساله مسارعت ایلدی .
بو اوانده ایسه یلدرم خان وفات ایتمکه تیمور تعزیتنامه وبعض هدايا ايله خواجه
مومی الیهی سلطان محمد طرفه اعاده وادرنده مربع نشین امارت اولان بیوک شهزاده امیر
سلیمان دخی هدايا وتسلیتنامه فرستاده ایلدی .

تیمور تیرهده مشتانشین ایکن جنويزلرک از میر لیماننده انشا ایتدکلری قلعه بی ملوک
اسلامیه تسخیر قدرتیاب اوله مدقلرینی استخبار ایتدکده هم قدرتی خلقه کوسترمک
وهمد فرنگلرک مدخر اولان مال ومنال لرینی یغما ایلمک ایچون اول بهارده از میر هجوم
ایدوب حمله اولاده فتح ایلدکدن صکره مقرر حکومتی اولان سمر قنده عودتی تصمیم وقره
تاتار دینلان قومی بالاستصحاب ضرب کوس رحلت ایلدی .

ذکر اولئان قره تاتار طائفه سی جنکیزیلر جانبندن سلاجقه یه نظارت ایتک اوزره رومه اعزام اولئان اقوامدن اولوب مرور زمان ایله قیصریه و سیواس طرفلرنده خیمه نشین اوله رق توطن ایشلر ایدی . یلدرم خان مرحوم سیواسی حوزة حکومتیه ادخال ایلد کده بونلری تکالیف دیوانیه دن معاف ایدوب یالکیز سفرلر وقوعنده خدمات حریبه ده استخدا م قلمقده اولدقلرندن کوندن کونه تکثر ایدرک قرق الی بیک نفوسه بالغ اولش وتیمورنک رومه توجه ایتد کده بونلرک رؤسائی سلطنت رومی وعد ایله خفیاً جلب ایلدیکنه مبنی درجنک اول طائفه مرقومه تیمور عسکرینه التحاق ایشلر ایدی . ایش بتدکن صکره تیمور هر نه مطالعه یه مبنی ایسه بونلری برابر کوتورمکی تنسیب ایدوب لکن رضالریله کتیمه جکلری معلوم اولدیغندن عسا کرکلیه ایله جوانب اربعه لرینی احاطه ایدرک الوب کتمشدرکه تیمورک رومده اولان افعالنک الخیرلوسی بودر .

هر تقدیر خارج صدد ایسه ده از میر شهری مسقط رأس عاجزانهم اولدیغندن بوبابده بعض معلومات درجی تصویب قیلنوب فقط شهر مذکور ممر انام اولمق حسیله حال حاضرینی توصیفه حاجت اولدیغندن یالکیز احوال قدیمه سیله سبب معموریتی ایراد قانور . شویله که از میر لیمانی اناطولینک مرسای مواردی اولدیغندن بشته غایت منفعتلو طوزله لری بولمغله مختصرجه برشهری ولیمانه ناظر جبل اوستنده قیدفا نامنده برماکه یه منسوب قلعه یی حاوی اولوب بوقلعه آیدین اوغللرینک زیر حکمنده ایدی سیاح مشهور ابن بطوطه نک یازیشنه کوره والی مملکت بولن آیدین بک زاده محمد بکک اوغلی خضر بک کیلر تجهیزیه دائماً اظهاری وروم مملکتلرینی اوروب اموال واسرا اخذ ایدد کلدیکندن مومی الیهدن پاییه شکایت وقوعبولوب پیادخی بین الملل متد اول اولان قوه بحریه نوبتی ید اقتدارلرنده بولئان جنویزلولره امر ایتمکله برکیجه بغته سفن کثیره ایله شهری باصدقلرنده مومی الیه خضر بک قلعه دن اینوب مدافعه یه چالشمش ایسه ده مقتدر اوله میوب کندوسی دخی شهید اولدی بوجهتله جنویزلولر شهری ضبط ایدوب لکن نه انلر قلعه یه ونه ده قلعه ده بولئانلر شهره ظفریاب اوله مدیلر بناء عالیه جنویزلولر ساحل ایمانده برقلعه انشا ایدرک لیمانک وطوزله نک منافعه دسترس اولدقلری حالده مذکور قلعه یی بوجه بالاتیمور فتح وتسخیر و اساندن تخریب ایلدی . بوقلعه نک اوچ طرفی دکز و طرف رابی قره اولوب تیمورک دکز طرفلرینی املا ایتدیردک تسخیر ایلدیکی توارینخده مسطور ایسه ده موقعی معلوم دکدر . بوندن صکره از میر شهری آیدین اوغلی سلاله سندن اولوب از میر اوغلی دینلان جنید بکک تحت حکومتیه داخل اولمغله لیمانه ناظر اولان سالف الذکر قیدفا قلعه سیکه

یقین وقتہ قدر تربیعاً اون اون ایکی آرشون جسامتندہ مرمر اوزرینہ حک اولنمش
ملکہ مزبورہ نک ویاخود الہہ سنک رسمی مدفن اولسی محتمل اولان طاشدن اویمہ بر
صندق اوزرندہ وقلعہ قپوسی خارجسندہ دیوار قلعہ یہ کوملی اولدینی خالدہ موجود
ومشہود ایدی

چنیدبک لیمانک محاربه سندن اول صولت عثمانیہ دن وجودینک محافظہ سنہ محتاج
اولدیغندن اشبو قلعہ یی تعمیر وتحکیم ایلدی عصر مرادخان ثانیہ اناطولی بکلربکیسی
یخشی بک چنیدبک دفع وازالہ سنہ مأمور اولغلہ پک زیادہ زحمت چکدی ومدت مدیدہ
محاصرہ ایلہ ظفریاب اولہ بیلدی مذکور قلعہ ہر نقدر لیمانہ ناظر ایسہ دہ اسکی طوپلرک
منزلہ کورہ لیمانک محارسہ سنہ کافی اولمدیغنے وتحصن ضمنندہ دخی دوات علیہ جہ لزومی
یولمدیغنے بناء اعتباردن اسقاط اولنوب لب دریادہ واقع وحصارجامعی دیمکله مشہور اولان
جامع شریفک پیشکاھندہ تقریباً اون اون ایکیک زراع مربع جسامتندہ برقلعہ بنا وانکله
سفاین دشمن تسلطی رفع اولنمشیدی

بیگ سکسان بر تاریخندہ کوپرلی اوغلی قاضی احمد پاشا کرید فتحندن عودتندہ
ازمیرہ اوغرایوب اھالینک نیاز واسترحاملری اوزرینہ ایکی ساعت مسافہ دن جسم مکرلر
وکارگیر یوللر انشاسیلہ آدم باندن قالین برصو اجرا ایتدکن بشقہ یونہ طاشدن بیوک
برخان و بر چارشو و بر چفتہ حمام و بر جامع شریف انشا ایتدیدی کی بنا امینی اولان وکیل
خرجی عثمان اغادخی مشارالیک اجرا سنہ موفق اولدینی صو جسامتندہ برصو کتورمش
ومؤخرآ دخی مرزیفونی قرہ مصطفی پاشا کوچک وزیرخانی نامیلہ دیگر برخان ویشل
دیرکلی اسمندہ چفتہ بر حمام و دھا صکرملری دارالسعاده اغاسی بشیراغا جسم خان و چارشولر
انشا ایتدرمشدر

ازمیر شہرینہ سکز میل بعدی اولان ولیمانک قپوسی حکمندہ بولنان سنجاق برونی
نام محلہ کرید سفرلری سبیلہ عصر محمد خان رابعہ برقلعہ انشا وعظیم طوپلر وضع اولنمشدر کہ
بوقلعہ یکی قلعہ نامیلہ الا آن موجوددر مرور زمان سبیلہ وھن طاری اولدیغندن بیگ
ایکیوز قرق درت سنہ سنندہ ازمیر اعیانی بولنان پدرم منصور ی زادہ امین افندی مرحوم
بافرمان ہایون تعمیرینہ مأمور اولغلہ ماملکنی صرف ایلہ قلعہ یی تعمیر وخارجہ طایبہ لر
وبرد کردن بردکرہ خندق انشا ایتمشدر غریبدرکہ صدر مشارالہ قندیہ محاصرہ سندہ
اصاغہ ایتدیروب استعمال ایلدکن صکرہ کتوروب مذکور قلعہ یہ وضع ایلدیکی ایکی قطعہ
طونج طوپکے ایچنہ آدم کیرہ بیلورو بریسنک اغزندہ ایکی دانہ کلہ یاردسی اولغلہ صاغلامنہ

غازی بوکا شهید دینلور بروج مشروح خارج قلمه یه طایه لر انشا اولندقد بوطوپلری
حیقارمنی نصیم ایلدکاری حالده مقتدر اولنه مامشدر کریدده اعمال اولنه رق کتورلمکله
قلمه دن طایه یه حیقاریله مامق بیننده اولان اقتدارک فرقی معلوم اولق اوزره اطناب
مقال قلندی

اشبو قلمه نك بناسیله ازمیر شهری پیشکاعنده اولان سالف الذکر لیان قلمه سنك
اهمیتی زائل اولدیغندن اطرافنه چارشو و خانلر بنا اولمشیدی بیک ایکیوز سکسان التی
سنه سی متعلق بیوریلان مساعدۀ سنیه موجبنه درون قلمه ده بولنان یکرمی بش اوتوز
قدر خانه اشتر و قلمه هدم اولنه رق ارامل و ایتم ایچون انشاسی تصور اولنان اصلاحخانه یه
ایراد اولق اوزره یرینه چارشو یا پلمسنه تشبث اولندی اسباب مشروح ایل شهر کوندن
کونه کسب جسامت و جمعیت ایدوب حتی وقتیه قنای بلده ده بولنان مزاراقلر شمدی
وسط شهرده قالمشدر ینه صده رجوع ایدلم

تیمورک عودتی اوازه سی منتشر اولدقد برقاچ یوز بیک غارتکرك کذرکاهی نه حاله
کیره جکی محتاج بیان اولماغله قریبتی اولان محالر اهالیسی طاغلر باشلرینه چکلدکاری مثللو
جایی سلطان محمد دخی اماسیه یی ترک ایل بولی طاغلرینه صعود ایدوب مترقب انجام کار اولدی
تیمور شومک جهنم اولوب کتدیکی تحقیق ایتدکده یاننده بولنان برقاچ بیک عسکر
ایله اینوب بروسه یه توجه ایتش ايسه ده اولجه عیسی چلبی کنج اختفادن ظهور ایدرك
متوسد و سادۀ حکومت اولمش بولندیغندن ایکی برادر داعیه تاج و تخت ایل محاربه یه ابتدار
و حالات عسکر محمدی صف سپاه عیسوی یی تارمار ایتمکله سکز یوز التی سنه سنده چلبی
سلطان محمد بروسه یه داخل و دیهم اجرادینه واصل اولدی

کرمیان زاده نك مودوع ید امانتی اولان جنازه یدلیرم خانی وشهزاده
موسی جایی جاب اولنه رق جنازه مشارالیه یی تربۀ مخصوصه سنه دفن ایتدیروب برادرلرینی
صنوف نوازشه قرین بیوردیلر ادرنده حکمران اولان امیر سلیمان برادری چلبی سلطان
محمدی ازاله ایتک قصدیه اناطولی یه کچمکی تصمیم ایلدیکی حالده وزیر اعظم علی پاشا عیسی
چلبی یی تسلط ایلمکی ده ها مناسب کوردیکندن موجبنه عیسی چلبی امیر سلیمان
جانبندن اقتدار اولنه رق تکرار محاربه یه تصدی ایتدی ايسه ده ینه منهزم اولدینی مثللو
منتش و صارو حان و ازمیر اوغلارینك معاونتیه متجاسر اولدینی هجومنده دخی پریشان
اولماغه مؤخر اسکی شهرده مختفی ایکن دیار عدمه ایصال قلندی .
اندشاه مؤید سلطان محمد آیدین طرفنه نهضت ایدوب ایانلوغده وقوعبولان محاربه ده

از میر و صاروخان و منتشا ارغلرینی پریشان ایلکله آیدین و مغنیا سنجاقلرینی آسخر
و صاروخان اوغلی خضر شاه بکی قتل ایدوب از میر اوغلی جنید بکک اعتذارینی قبول
ایله یالکیز از میر قلعه سنی یدنده ابقا ایدرک بروسه یه عودت بیوردیلر .

خضر شاه بکک قتلی خصوصنده منجم باشی تاریخ مشهورنده وقعه تیموریده عفو
ناقابل جرمه تصدیسی موجب قتلی اولدی ذیمش ایسه ده نمقوله جنایت اولدینی تصریح
اولنماشدر اگر طرف خلافته بولنق و یا خود عیسی چلبی یه اعانه ایلک تمهتی اولسه
طوائف ملوکک جمله سندن صادر اولمش بر حال اولغله امثالی مثللو مظهر عفو اولق لازم
کلوردی لکن بو خضر شاه عیاش و سفیه بر حریف اولغله وقعه تیموریده ناموس خاندان
سلطنتی محل بروضع تاهموارده بولنمش اولق کر کدرکه سائرلری حقنده اولان عفو جمیل
محمد خاندن محروم اولمشدر .

استقلال محمد خانی امیر سلیمانی بی ارام ایتمکله عساکر کلیه ایله اناطولی یه کچوب سلطان
محمد اوزرینه هجوم ایلدکده کیفیت بین الاعیان تذکر اولنوب امیر مشار ایله هر نقدر
عیش و عشرته مبتلا واستحقاق خلعت سلطنتدن معرا ایسه ده شهزادکانک اکبری وروم ایلی
امراسی عموما فرمانبری اولغله احوالی لایقوله میدانه چیقنجه یه قدر اختیار تائی و مقام
بله دن تبری اولنسی قرار کیر اولدیفندن چابی سلطان محمد اماسیه یه رحلت و امیر سلیمان
تعقیب کنان انقریه مواصلت و بعده بروسه یه عودت ایلدی .

عادت جاریه سی اوزره هر کون حماملرده ذوق و صفا ایله مشغول اولدینی چابی سلطان
محمدک مسموعی اولدقده سپاه ارسته ایله یغته بروسه یه مهاجمه نمای سطوت اولدیه دخی
کثرت باران سببیه بعض نهرلری کچمک ممکن اولماغله برقاق کون محاربه دن صکره اماسیه یه
مراجعت بیوردیلر .

امیر سلیمانک عیسی چابی بی سلطان محمد تسلیط ایلدیکنک نظیره سی اوله رق بو
کره کوچک شهزاده موسی چابی سلطان محمد جانبندن بالاقدار سینوبدن روم ایلی طرفه
اصرار اولنغله امیر سلیمان اناطولی بی ترکه مجبور اوله رق روم ایلی یه عودت و امیر سلیمانک
احوال سرمستیسندن بیزار اولان روم ایلی امراسی موسی چلبی یه اتاع ایتمشدر ایکن
امیر مشار الیهک ورودند یه انک طرفه میل کوسترملریله موسی چلبی شواحق جباله
اختیار فرار ایلدی .

بو اوانده که سکزیوز اوز اوچ سنه سیدر وزیر اعظم اولان علی پاشا وفات ایدوب امیر
سلیمانک انتظام احوالی کلیاً مختل اولغله بر مقدار عسکر ایله موسی چلبی یغته آدرنه یه

هجوم ایلدکده امیر مشارالیه بر حمامده مست و مدهوش بولندیغندن افاده کیفیت ایچون حضورینه کیرنلره غضب ایدوب حتی بولردن یکچیجری اغاسی حسن اغانک صفالنی دلاک اوسترسيله نراش ایتدیرمکله بوحال جمله نک روگردان اولمسنه بادی وبالاخره استانبوله طوغروفراد ایتمشیکن اثنای راهده طوتغله عازم ملک جاودانی اولمشدر .

موسی چالینک روم ایلییه حین اعزامنده نائل املی اولور ایسه خطبه وسکه نام محمدخانی ایله مزین اولسی مشروط ایکن واصل مسند حکمرانی اولدقده دعوائی استقلاله تصدی ایلدیکنه وهرنصل اواسه برملکده ایکی حکمدارک اجتماعی قابل اولماق قاعده صحیحه سنه بناء سلطان محمد خان حضرتلری عساکر کلیه ایله روم ایلنه کچوب وقوعبولان مقاتله ده نائل ظفر اولمشیکن جیوش پادشاهینک تعقیب فراریان ایچون مرکز لرندن آریله رق سلطان محمدک جمع اندک شمار ایله قالدیغی موسی چالینک منظوری اولیجق رکابنده بولنان قیوقولی عسکریله هجوم ایلدیکندن بالضروره سلطان محمدخان حضرتلری رجعت و بروسه یه عودت بیوردیلر .

موسی چلبی تند مشرب وسوء ظنی غالب بر ذات اولدیغندن اکثر امرای قدیمه یی عزل وتنکیل ایلدیکی مثللو سرفراز امرا اولان اورنوس بکی دخی معاملات غیر لایقه ایله تحقیر وازعاج و سافل ناسدن کورشاه ملک نامنده بریسنی وزیر ایدینه رک قلوب انامی کندوسندن تغیر ایلدیکنه مبنی صدر اعظم متوفی علی پاشانک اوغلی ابراهیم پاشانی سفارت وویرکو طایله استانبوله کوندردیکی حالدده پاشای مشارالیه ادرنه یه عودت ایتیموب سلطان محمد درگاهنه واصل وایرتسی سنه که سکزیوز اون التی نارنجیدر سلطان محمد خان حضرت تلی تکرار روم ایلی جانبنه کنذار ایتدکده روم ایلی امراسنک اکثری موکب هایونه داخل اولمغله موسی چلبی مقابله دن اجتناب ایله نیش طرفلرینه طوغری حرکت و سلطان محمد دخی تعقیب کنان اولحوالییه مواصلت ایلدیکندن بالجبوریه مقاتلات شدید و قوعیله جمعیت موسویه بریشان و کندوسی دخی طوتیلوب ایصال محله خاموشان قلندی .

تیور وقعه سندن موسی چلبی شهادتنه قدر مرور ایدن اون ایکی اون اوچ سنه قدر زمان ایچنده ممالک عثمانیه ده انواع حروب و مقاتلات وقوع بوله رق نهایت استقلال محمد خانی حصولیله سفینه دولت مرسای سلامت واصل و امواج فتن اولدقجه زائل اولدی .

قرمان اوغلی محمد بک سلطان محمد خان حضرتلرینک موسی چلبی ایله اولاز مشغولیتنی فرصت اتخاذا ایدرک بر آیدن زیاده بروسه یی محاصره ده جرأت ونهب و غارت مثللو حرکات باغیانیه جسارت ایتدکدن بشقه بعضی روم مؤخر لرینک روایتنه کوره یلدرم خان مرحوم .

مك تربه سنی تحریب و انواع حقارت اجرا ایتمكده ایكن موسى چایینك جنازه سی ظهور
ایلدكده چایی سلطان محمد خان حضر تیرینك موفقیتنی اذعان ایدرك خوف مجازات ایله
قراره استعجال ایلدی .

متعاقبا سلطان محمد دخی اناطولی یه عودت و قرمان اوغلی اوزرینه تحریك لوای
سطوت ایدوب اقشهر و بیكشهری و سیدی شهری و سائر سعید ایلی تعبیر اولنان ممالك که
عصر مراد خانیده نمن معلوم ایله اشتراقلنمشیکن وقعه تیمورده قرمان اوغلی الله کچمشدی
تکرار ممالك عثمانیه یه الحاق قلندقدن صکره قونیه دخی محاصره اولندیغی حالده بعض
عوائل ظهور یله ترك بیورلدی .

ایرتسی سنه ینه قرمانیان تادیبی نیتیه انقره صحراسی مرکز اردوی هایون اولدقده
مزاج پادشاهی متغیر اولسنه مبنی اختیار سکون اولنقدده ایکن اناطولی بکربکیسی بایزید
پاشا قرمان اوغلنه پادشاه انامک ناهزاجلغنی اخبار و لطائف الحیل ایله امیده دوشیره زک
اغفال ایلسی اوزرینه بغته اردوسنی باصوب قرمان اوغلی محمد بک ایله براوغلی در دست
ایدرك حضور هایونه ایصال ایلدی .

بر موجب مکارم اخلاق قیما بعد دولت عثمانیه یه خصومت ایتامک اوزره قرمان اوغلنه
یمین ایتدیردکن صکره اطلاق و بایزید پاشانک ایالتیه منصب وزارت الحاق بیورلدی ایکن
قرمان اوغلی مملکتی جانبیه کیدرایکن بزم عثمان اوغلاریله اولان محاصره من المهد الی
الحد در دیهرک چرا کاهده بولنان خیول پادشاهی یی غصب ایتمش و برقاج سنه صکره
انطاکیه یی محاصره ایتدکن طوب کله سیله اوریلوب و پاره پاره اولوب یمین شکنک
جزاسنی کور مشدر .

مشاهیر فضالان شیخ بدرالدین موسی چایی عصر نده قاضی عسکر لاک ایله مبیجل
اولوب استقلال محمد خانی ظهور نده وظیفه تقاعد ایله ازینقده اسکان اولنمشیدی قاضی عسکر لکی
زمانده کتخداسی بولنان بورکلوجه مصطفی بو آراق قره برون طرفلرنده خلقی شیخ
مشار الیه اتباعه دعوت ایدرك بر طاقم حشرات جمع ایلدیکی مسموع اولدقده شیخ مشار
ایله خوفه تبعیتله سینوبدن افلاق طرفه گذار واندن سلستره یه کچوب دلی اورمان
ایچنده تحصن و قرار ایلدی اناطولی بکربکیسی بایزید پاشا بورکلوجه مصطفی جمعیتنی
تفریق و کندوسنک جامه خیانی تمزیق ایلدیکی مثللو شیخ مشار ایله دخی طوتیلوب
سیروزده معسکر هایونه واصل اولدقده خروج علی السلطان تهمتی و سعدالدین تفتازانی
تلامیذنن حیدر هروی فتواسیله اول علامه فضائل مدار سیروز بازارنده بردار قلندی .

طوسیه و کنگری و قلعه جک ممالک عثمانیه مضافاتندن ایکن تیمورلنک تقسیماتنده اسفندیار اوغلی ایاتنه الحاق قلنمش ایدی سلطان محمد خان حضرتلری ملک موروثلری طلبنه قیام ایدوب ابن اسفندیارده ایسه مخالفتنه اقتدار اولماقله ذکر اولسان شهرلری جاب دولته تسلیم ایلدی.

انلاق حاکمک ممالک عثمانیه تعرضاتی اولجانبه حرکت هایون وقوعی استلزام ایتمکله کشور افلاق یازده خیول یغما و ایساجی و یرکوک قلعهلری تعمیر و انشا اولندقدن و اوچ سنهک و یرکو استحصال قلندقدن صکره اناطولییه عودت بیورلدی. تیمورک رومه هجومه باعث اولنلردن قره یوسف برمدت مصرده محبوس اولدقدن صکره تیمورک و فقیله حیات تازه تحصیل و برتقریب ایله حکومت تبریزی تسخیر ایتشیدی جایک و قره حصار شرقیده اجرای حکومت ایدن و سلطنت عثمانیهیه منتسب کچنان بقایای امرای ساجوقیه احفادینی طرد ایله کندو منسوباتی اقامه ایلسی اولجانبه موجب حرکت هایون اولوب معاونت پادشاهی ایله مواقع مزبورده ینه امرای مرقومه یدلرندم تقریر و صامسون قلعهسی تسخیر اولنلرق معاودت بیورلدی.

موکب هایون اسکلیه واصل اولدقدن اوچ بش بیسک چادری حاوی بر عشیرت منظور پادشاهی اولوب لدی التحقیق تاتار سرگردلرندن منت بکک توابعاتی اولدینی تبین ایلدکده ارکان دواتی مؤاخذه و (تیمور عودتندن صکره کشور روم تاتار شومدن خالیدر دینلور ایدی بونلر ندر و کندو حاللرینه براقیلور ایسه قره تاتار جمعیتلرینه نظیره اومز می) بیوروب هیئت مجموعه لرله فایده جوارنده اسکاتلرینی امر و فرمان ایلدیلرکه حالا بونلرک مسکنلرینه تاتار بازاری دینلور.

بروسهده بناسنه صرف همت بیورلمقدن اولان جامع و مدرسه و سائر مبراته وقف ترتیبی لازم کیمکه عصر اورخان غازیده فتح اولنمشیکن امیر سلیمانک ایپراطوره تسلیم ایلدیکی هرکه و ککبوزده و پندک و قرتال از سر نو تسخیر و بعضلری وقف و تسبیل اولندی سلطان محمد خان حضرتلری ادرنده مقیم ایکن سکیز یوز یکر می درت تاربخنده قرق اوچ یاشنده و بالاستقلال سلطنتک سکزنجی سالنده مرتحل دار آخرت اولوب جنازهلری بروسهیه نقل و تربته مشهوره لرینه دفن قلندی.

شهریار مشار الیه حضرتلری حلیم و صبور و شجیع و غیور تهدیدینی ایقاعه قادر موفقیتی باهر بر پادشاه جلیل الشان اوله رقی انواع محن و مشقت ایله دولت عثمانیهیه تجدید ایش و یکر می درت محاربهده بالذات موجود بولنوب قره قریب یاره یمشدر بو قدر

مشغولیتی ارسندده ادرنه و بروسهده پک چوق خیرات و مبراتہ موفق اولدقدن بشقه
 حرمینه صره ارسائی دخی ابتدا بونلر وضع ایلدی ذاتاً علیل الوجود اولدقلرندن اکثر
 وقتلری خسته لکله کچوب کنج یاشنده ارتحال بیوردیلر بعضیلر تاریخ ولادتلری یدی
 یوز طقسان اوچ اولق اوزره ضبط ایدوب پدرلری وفتنده اون ایکی یاشنده ایدی دیرلر
 بعضیلری دخی ولادتلری یدیوز سکسان برده ایدوکنندن پدرلری ارتحالنده یکرمی
 درت یاشنده بولندیغنی بیان ایدرلر پدرلری زماننده اماسیه والیسی و تیمور محاربه سنده
 چرحه جی اولسنه و صکرده کی اجرا آتلیینه و شهزاده لری سلطان مرادک تاریخ ولادت
 سکز یوز اتی سنه سی بولمنسنه باقیلنجه روایت ثانیه صحیح اولق لازم کور ایسهده
 بعض تاریخلرده دخی والدملری شاه خاتون کرمان اوغلی یعقوب بکک همشیره سی ووق
 اوزره مسطور اولوب مشارالیه یدیوز سکسان اوچ تاریخنده یلدرم بایزید خان
 حضر تلیله ازدواج ایتش اولدیغندن بو تاریخلرده دخی بریا کلسلق اولق ایجاب یدر
 بنابرین شهریار مشارالیه ک تاریخ ولادت صحت اوزره تعین ایده من

بروجه مشروح چلبی سلطان محمدک ادرنهده وفاتی وقوع بولدقده وارث تحت سلطنت
 اولوب اماسیه طرفلرنده بولان بیوک شهزاده سلطان مراده کیفیت انبا و مرحومک وصیتی
 اوزره امر وفات اخفا اولنهرق (پادشاهمزه از میر اوغلی اوزرینه سفری وارد) شایعه سیله
 موکب هایونده بولان عسکرک برمقداری اناطولی طرفه کچورلمش ایسهده سپاه و ساجدار
 طائفه سی ماده ارتحالی قفطن ایله مطلقاً پادشاهمزه کوردلم دیو اصرار ایلدیلر وکلای
 دولت بو کیفیتدن بغایت مضطرب اولدقلری حالده حکیم باشینک ترتیبی وجهه مرحومک
 جسدی البسه ملوکانه ایله بر قراکلق اوپهده تحت اوزرینه اوپوردیلوب و آرقه سنه بر
 آدم وضع اولنوب ضابطاندن اوچ بش کشی ایچرویه صوقلدی و رای میتة موضوع
 اولان آدم مرحومک اللریخی و باشنی تحریک ایلدیکنندن و مهابت هایون ایله ظلمت موقع
 اطلاع حقیقت حاله میدان ویرمدیکنندن ضابطان مرقومه دعا ایدرک چیقیدیلر بو فقرده
 مورخین متفق الکلام اولوب انحق مرحومک میتی بعض اجزا ایله تخنیط اولندیغنی درکار
 ایسهده تدبیر مشروحک تمامیه عقله توفیق اولمنسی مشکلیجه در هر نه ایسه بونی متعاقب
 بروسهده سلطان مراد ثانینک جلوسی خبری وارد اولمغله ارکان دولت جنازه پادشاهی نی
 الوب بروسه یه کلدیلر و مرحومی وفتندن قرق ایکی کون صکره ایدیکه دفن ایلدیلر.

تجدد سلطنت خبرینک شیوعی اوزرنده تیمور محاربه سنده ضایع اولان شهزاده
 مصطفی چلبی اولق ادعاسیله سالنیک طرفلرنده بر شخص ظهور ایدوب اورنوس اوغلاری

و سایر امرا و عسکری طائفه سی دعواسنی تصدیق ایله معیتنه مجتمع اولدقلرندن نوبت
 سلطنت بنمدر دیرنه یه کلوب اعلان حکومت و اناطولی یه چمک اوزره حرکت
 ایلدیکی سلطان مرادک مسموعی اولدقده بر مقدار عساکر ایله بایزید پاشا مقابله سنه کوندردی
 لکن حین التقاده بایزید پاشانک معیتنده بولان عسکر دوزمه مصطفی نامیله مشهور اولان
 مدعی مرقومه دخالت ایتلمیله پاشای مشار الیه دخی اتباعه مجبور اولدی دوزمه مصطفی
 اولا بایزید پاشایی وزیر ایدنمش ایسه ده صکره صداقتدن امین اوله مدیغندن سازلی درده
 اعدام و اوله مسبوق الخدمه بر وزیر عالیشان کینام ایلدی

هر نه صورته اولور ایسه اولسون ممالک عثمانیه نك شورشدن مستفید اولق ارزوسنده
 بولان ازمیر اوغلی جنید بك دوزمه مصطفی نك وزارتتی وزیرنی یوکلنوب عساکر کثیره
 ایله اناطولی طرفه عبور و اولوباد نهرینک بر طرفه نصب اردوی شر و شور ایلدی
 نهر مزبورک دیگر جانبنده بولان سلطان مراد اردوسی مخالفینه نسبتله ضعیف اولدیغندن
 تدابیر حکیمانه ایله تفریق جمعیتلرینه تشبث لازم کلمکله روم ایلی امراسنک مشاهیرندن
 اولوب موسی چلبی طرفده بولنق تهمتیه سکیز سنه دنبرو توقادده محبوس اولان میخال
 اوغلی محمد بك سریعاً جلب اوله رق انک طرفدن روم ایلی امراسنه التفات مؤثر اعطا
 اولندیغنی کی وزیرادن حاجی عوض پاشا جانبندن جنید بکه مکتوب یازیلوب جنابکیز
 ابنی ملوکدن ایکن بویه مجهول النسب بر شخصک وزارتتی قبول ایلکزشانکیزه و منفعتکیزه
 مخالفدر یولنده نیجه مقدمات تمهید و صورت صداقتده دوزمه مصطفی یه تقدیم اولسان
 عریضه ده دخی امراکیز بو طرفله اتفاق ایدوب سزه غدر ایتک اوزره درلر دیو بعض
 مغالطه درج اوله رق مرقومک اوهای تشدید اولندیغندن آن غیر منقسمه ده جمعیتلری
 بریشان و مدعی مرقوم روم ایلی جانبنه فراره شتابان اولغله سلطان مراد دخی درقفا
 اوله رق ادرنه یه بالوصول مرقوم یکجه ده طوتیلوب ادرنه قلعه سنک برجه صلب اولندی
 بزم تاریخلرک افداتی بو مرکزده ایسه ده روم مؤرخلرینک روایتنه نظراً شهزاده
 مصطفی چایی تیمور واقع سندن صکره استانبوله کلش و چایی سلطان محمدک زمان سلطنتنده
 مشار الیهک التماسیه لئی ده حبس اولنمشیکن روم امپراطورلری دخی حکومت عثمانیه نك
 شتاندن مستفید اولان طوائف ملوک ایله هم مساک اولدقلرندن تبدل سلطنت وقوعنده
 مصطفی چالینک روم ایلی جانبندن مرورینه خفیاً مساعد ایتشاردر .

نظر دقتله باقلدیغنی حالده بو صورتک صحی استدلال اولنور زیرا ذات و شخصی
 معلوم امرا و اعیان اولان بر شهزاده نك نامیله اجنبی بر آدم چیقوب روم ایلی امرا

و عسكرينك على العموم اكا اتباع ايتى مستبعددر لکن بارگاه دولته بولنان ارکان سلطنت انکاردن بشقه چاره بوله مدققرندن مشار اليه دوزمه مصطفى نامنى ويرمکه مجبور اولدیلر .

حکومت ايمپراطوريه نك دوزمه مصطفى يه اولان اعانه مغنويه سندن ناشى سلطان مراد حضرتلرى اخذ انتقامه قیام ايتمکه شهر استانبول تحت محاصره يه النوب خيلىجه ده تضيق اولمشيکن قرمان و کرمان اوغلرينك اضلايله حميد ايلنده والى اولان کوچك برادرلرى مصطفى نام صبي شهزاده ازنيق شهرينى استيلا ايله دعواى استقلاله مجاسرت ايلديکندن استانبول محاصره سى ترك اولنه رق اولطرفه عزيمت اولدى .

شهزاده نك لالاسى اولان شربدار الياس بك بعض مواعيد ايله طرف پادشاهيدن مجلوب اولديغندن شهزاده يى طوتوب تسليم ايتمکه دفع فتنه مقصديله يچاره معصوم ازاله قلندى .

اسفنديار اوغلنك تهمت مشروحه سندن فضله اوله رق طراقلى يكيجه سنى محاصره ايلديكى مسموع هايون اولدقده سوق سمند جلادت ايله بولى حواليسنده اسفندياريلر جمعيتنى پريشان ايلدکدن وقسطمونى و کره نحاس ممالك عثمانيه يه الحاق اولندقدن صکره اسفنديار اوغلى متحصن اولديغى سينوب قلعه سندن ضراعتنامه ارسال و کریمه سنى پادشاه انامه عقد ايلک نيازى تکرار ايتمکه مظهر عفو هايون اولدى .

پادشاه حضرتلرينك بومشغوليتى اره سنده افلاق بكي اولان دراقوله طونه يى مرور ايله بعض يرلرى غارت ايتشيدى . ترتيب مجازاتى ايچون روم ايلي جانبنه حرکت هايون وقوعى استماع ايتدکده ادرنه ده تقيل دامن سلطانى يه مسارعت وايكى ييللق ويرکوسنى تقديمه مبادرت ايلديکندن اعتذارى موقع قبولده واقع اولدى .

منتشا اوغلى الياس بك فوت اولوب دائره هايونده بولنان اوغللرى سوداى استخلاص ملك موروث تهتمه بناء ولاؤفا للملوك قاعده سنه اتباعا حبس اولنه رق منتشا سنجاغى ممالك محروسه يه علاوه قلندى .

ازمير اوغلى جنيد بکک دفعاتله وقوعبولان حرکاتى و آيدىن سنجاغى بکيله دائمى حکمنده اولان مقاتلاتى سبيليله ازاله وجودى لازم کمش ونصب کرده تيمور اولان بومثللو کوچك کوچك حکومتلرک رفع والفا سى زمانى حلول ايش اولديغندن اناطولى بکتر بکيسى حمزه بك ايله آيدىن بكي بخشى بك مأمور ايديله رک خيلىجه مقاتلات وقوعدن صکره جنيد بك ايله اوغلى قورد حسن اعدام و يوز سنده دن متجاوز زماندن برو اورالرده حکومت ايدىن آيدىن اوغلى خاندانى کمنام قلندى .

پادشاه حضرت تلی روم ایلی حدودینک تأمینی ایچون ادرنده بولندقلری اوانده که سکنر یوز اوتوز تاریخیدر . قرمان اوغلی محمد بک کندوسنه التجا ایدن تکه اوغلی احضادندن عثمان چلبی اقدار وانطالیه محاصره سنه ارسال ایدوب کندوسی دخی استحضار ادوات قلعه کیری به اشتغال اوزره اولدینی مسموع اولسنی متعاقب محافظ قلعه بولنان فیروز بک وفات ایتمکه اوغلی حمزه بک جانشین پدر اولمشیدی . تکه اوغلنک خسته اولدینی حالد استانوز طاغنده خیمه نشین اقامت بولندینی استخبار اولندقدمه حمزه بک قرمان اوغلی کلکسزین بونک تدارکی کورلمسنه تشبث ایدرک کوندردیکی فرقه حربیه تکه اوغلی جمعیتنی باصوب پریشان و عثمان چلبی پی اعدام ایلدیلر .

قرمان اوغلی بو حالک وقوعندن پک زیاده مکدر اوله رق برآیدن متجاوز قلعه پی محاصره وطویلر وضعیله تضییق ایتمکده ایکن سلطان مرادک اناطولی به عودتی خبری منتشر اولغله بر ساعت اولایشنی بتورمک ایچون قلعه نک هجومه قابل اولان محانی تحری انباشنده قلعه دن آتیلان کله ایله اوریلوب پاره پاره اولدی .

محمد بکک اوغلی ابراهیم بک پدرینک جنازه سنی الوب قونییه عزیمت ایلدیکي ائنده علی بک نامنده اولان قرنداشی خوفه تبعیتله قلعه به التجا ایلدیکندن بشارتنامه ایله معاً درگاه هایونه ارسال قلندی . و پادشاه حضرت تلی همشیره لرینک برینی میر مشارالیه ترویج و صوفیه سنجاغنی دخی توجیه ایتمکه الی الوفات اوراده مقیم اولدیلر .

ابراهیم بک قونییه واصل اولدقدمه عمیسی علی بکی تسلطن ایلش بولغله بالضروره برادری عیسی بک ایله برابر سلطان مراد حضرت تلی رینه دخیل دوشدیکنه بناء پادشاه حضرت تلی بولره دخی برر همشیره لرینی ترویج ایلدکدن صکره ابراهیم بکه عسکر و مهمات حربیه اعطاسیله پدری مقامنه اقعاد و عیسی بکی رکاب هایونده توقیف ایلدی . ابراهیم بک دخی حمید ایله سنجاغندن اولوب باباسنک غصب ایلدیکي یرلری تسلیم ایله وظیفه تشکری یرینه کتوردی .

سلطان مراد حضرت تلی جلوسندن صکره ولایتکاهی اولان اماسیه پی لالاری بولنان یورکچ پاشایه و یرمنیدی . مشارالیه اولحوالی پی تطهیرد آغاز ایدوب اولا ترکان عشیرتندن یوزغاد صحراننده خیمه نشین اولوب واردین و صادرینه صارقندیلک ایتمکده اولان قزل قوجه اوغللرینه پادشاه طرفدن اولمق اوزره فرمان اصداریله جانیک تسخیری ایچون معینته جلب و کندوسی خسته لک اشاعه ایدرک بولنری اوچ بشیوز نفر توابعلریله مناسب یرلره قوناق و یردکدن صکره بغته جمه سنی اعدام ایلدی .

ثانیاً عثمانیچق جوارنده برقیانک تپه‌سند و واقع قلعه‌یه تحصن ایتش اولان حیدر نامنده برپیر کلیتو ذخیره ادخار ایدرک طرف سلطنته اطاعتدن مجتنب ایدی. مرقومک آدم‌لرندن بعضیلرینی پاشای مشار الیه پس برده‌دن جلب ایدرک ذخیره انبارلرینی احراق ایتدیرمکله پیر مزبور ی نفسی تسلیمه مجبور ایلدی.

ثالثاً جانیک حاکمی بولنان الب ارسلان اوغلی حسین‌بک که سلاجقه احفادنددر. انک اوزرینه حرکت ایتک تدارکنده ایدوکی میر مومی‌الیهک مسموعی اولدقد هرنه قدر بن پادشاهه عاصی دکم و مراد جانیک قلعه‌سی ایسه‌کندم تسلیم ایدرم دیو التجا ایتش ایسه‌ده بیچاره کیفیت مطاوعتی اکیلاده مدیغندن پیر حیدر ایله معاً و مقیداً رکاب هایونه ارسال و مواقع مزبوره قلمرو حکومته ادخال اولمقله مومی‌الیه‌مایه طرف پادشاهیدن خالصر تخصیصیه روم ایلنده اسکان اولندیلر.

کرمیان اوغلی یعقوب‌بک سکسان یاشنی متجاوز برپیر اولوب اولادی دخی اولمدیغندن همشیره سنک حفیدی بولنان سلطان مراد حضرتلرینی زیارت و مالکینی پادشاهه وصیت ایتک صورتی تصمیم ایتمکله سکزیوز اوتوز برسنه‌سی بالاستیدان کوتاهیهدن حرکت و بروسه‌یه مواسلت ایلدکدن صکره کلیولی طریقیه ادرنه‌یه واصل و انواع احتراماته نائل اولوب بعدالعوده برسنه مرورندد مرتحل دار آخرت اولمقله کوتاهییه سنجانی ممالک عثمانیه‌یه الحاق قلندی.

ارتق اناطولیده طوائف ملوکدن قرمان واسفندیار اوغللری حکومتلرندن بشقه حکومت قالمیوب انلر دخی سطوت عثمانیه‌یی طامش و تقلید پادشاهی ایله نائل امارت اولمش اولدقلرندن اسکی اهمیتلری قالمامشدر.

سلانیک قلعه‌سی عصر یلدرم خانیده فتح اولمشیکن تیمور وقعه‌سندد روملر الله‌چکش و استانبول ایمپراطورلری شعبه‌سندن اولمق اوزره اوراده بر حکومت تشکل ایتشیدی. سکزیوز اوتوز ایکی سنه‌سی اولطرفه سوق موکب جلادت و کلیولیدن دخی سفن حربیه ارسالنه مباشرت اولنوب هرقدر وندیک کیملری روملره معاونت ایدیلر ایسه‌ده پنجه عثمانیاندن تخلصه مقتدر اوله مدقلرندن برآیدن متجاوز محاصره‌دن صکره عنوة تسخیر قلندی. بوندن صکره طرف طرف امرا و سپاه ارسالله ارناوودلق و مجارستان طرفلری غارت اولمقله ایکن مجارستان سرعسکری اورنوس بک اوغلی علی بک منهزم اولدیغنه و قرمان اوغلی ابراهیم بک ایله سمندره حاکمی ویلیق اوغلنک اتفاق خفیلرینه مبنی مجارلر طونه‌یی کچوب ممالک اسلامییه هجوم ایلدکلری کبی قرمان اوغلی ابراهیم بک دخی حمید

سجافنی تسخیر ووالیسی بولنان شربدار الیاس بکی اسیر ایلدی .
 بونک اوزرینه پادشاه حضرتلری ادرهده اقامتی اختیار وروم ایلی بکلر بکیسی سنان
 پاشای عسا کر کلیه ایله مجارلر اوزرینه تسیاریتمکله دشمن اردوسی کوکرجنلک قلعه سی
 محاصره ایله مشغول ایکن پاشای مشارالیه یتیشوب دشمنی مرتبه استیصاله ایصال ایلدی .
 ایرتسی سنه کسکیز یوز اوتوز طقوز تاریخیدر پادشاه انام دخی قرمان اوزرینه حرکت
 وقونیه یی آورده قبضه حکومت ایلمش ایکن ابراهیم بکک طاش ایلمدن اعتذارنامه سی
 وارد اولوب حلیله سی بولنان همشیره پادشاهی دخی شفاعت ایتمکله ینه عفو هایونه نائل
 وازسرنو مملکت موروثه سی حکومته واصل اولدی .

پادشاه غازی قرمان اوغلنی تأدیب ایله مشغول ایکن مجارقرالی طونه یی کچوب الاجه
 حصاری محاصره ایتش وپادشاهک روم ایلنه عودتی شایعه سی اوزرینه مأیوساً مملکته
 کیتمشدی بوجرائنه مقابله ایچون مجارستانه سوق عسکر منصور اولنوب طمشوار وهر
 منشادهک غارت وبلغراد قلعه سی محاصره سی نتیجه بخش مراد اولمدی ایسه ده اطرافنه
 ایصال خسارت اولنه رق ادرنه یه عودت بیورلدی .

صربستان حکمداری بولنان ویلیق اوغلی قرمان اوغلیله مجارقرالینک اتفاقه واسطه
 اوله کلدیکندن صورت مجازاتی تصور قلنمقده ایدوکنی حس ایدرک مقدمات پادشاهی یه
 عقد ایلدیکی کریمه سنک جهازی حاضر اولدیغنی عرض ایله پنجه عقابدن تخلص کریبانه
 وسیله آرامقده ایدی چونکه یلدرم خان زماننده صربستان قرالی بولنان لاس اوغلی
 کریمه سی یلدرم خانه ویروب انک واسطه وشفاعتیه خلیجه منافع دسترس اولدیغندن بو
 کره دخی او یله اولورقیاسنده ایدیلر اگرچه عروس مزبوردارات فاخره ایله جلب اولندی
 ایسه ده تصمیم مجازاتندن فراغت بیورلماغله سکیز یوز قرق سنه سی موکب هایون جانب
 غزایه منعطف اولق اوزره ایدوکندن بحثله افلاق حاکمی دراقوله وویلیق اوغلی رکاب
 هایونه دعوت قلندی .

دراقوله ایکی اوغلی ایله موکب هایونه واصل اولوب ویلیق اوغلی دخی ایکی نفر
 اوغللری ارسال ایلدیکی حالدده جمله سی کلیبولی و توقاتده حبس اوله رق اردوی هایون
 سمندره جانبنه سوق بیورلماغله بو کیفیت ویلیق اوغلانک مسموعی اولیجق مجارقرالنه التجا
 ایلدی وقوه قاهره پادشاهی ایله دارالاماره سی اولان سمندره و نیکیبولی قلعه لری تسخیر
 قلندی انجق قره چاپی زادهک قوائجه فرمان عالی یه اطاعة رکاب هایونه واصل اولان
 امرای مسیحیه یی بلاجنجه حبس ایلمک شامنی ظهور ایدوب اولا مزید بک و ثانیاقوله

شاهین پاشا قومانداریه کشور افلاقه سوق اولئان ایکی فرقه عسکر اسلام منهزم اولدی.
حتی بو انهزاملر سببیه قرمان اوغلی ینه امیده دوشوب ممالک عثمانیه به تجاوزوبک
پازاری وسائر بعض قصبهلری غارت ایتمکله سکمز یوز قرق الی سنه سی پادشاه انام قرمان
اوغلی اوزرینه عطف لجام ایدوب کمال غضبلرندن خلاف آیین عثمانی ممالک اسلامیه یی
قونیه به دک بازده خیول یغما ایتدیردیله .

قرمان اوغلی ابراهیم بک عادت جاریه سی اوزرینه طاش ایانه فرار ایدوب متشبث
دامن امان اولغین بوکره دخی حلیله سی اولان خواهر پادشاهی شفاعتی واولاد حضرت
مولانادن عارف چلبی توسطیه نائل عفو هایون اولدی .

محار قرانه التجا ایدن ویلیق اوغلنک تشویقی وقرمان اوغلی ابراهیم بک ممالک
عثمانیه یی بیلرندده تقسیم ایلک تکلیفی اوزرینه قرال مزبور اوغلنی ویانقو نام بکله بکیسی
بر جسم اردو ایله سوق ایدوب الاجه حصار ونیش حوالیسی یاقوب یقمقده اولدقلری
مسموع پادشاهی اولدقده سیرسریع ایله قرماندن عودت ایدرک مانع مرور دشمن اولق
اوزره ایزلادی دربندی طوتلشیدی بوجهته دشمن بوظازی کچمکه مقتدر اوله مامقله
برابر تقرب موسم شتادن ناشی رجعتده دخی مجبور اولدقلرینی درپیش مطالعه ایله ترتیب مکر
وآل وصورتا اختیار فرار ایتمه لریله پادشاه حضرتلری بکله بکی قاسم پاشایی و توقادوالیسی
بلبان پاشایی و بولی بکی اولوب همشیره لرینک زوجی ووزیر اعظم خلیل پاشانک برادری
اولان محمود چلبی یی عساکر وافیله تعقیب دشمن ایچون کوندردیلر .

بونلر غافلاً کیتمکده ایکن یانقونک نیش دربندنده پوصویه وضع ایلدیکی عسکر
جنود اسلامیه یی بغته احاطه ایتمکله اکثری شهید و محمود بک ایله یرمقداری اسیر اولدی .
پادشاه حضرتلرینک ادرته یه عودتلرندده بر طرفدن ویلیق اوغلنک و دیگر جانبدن
محمود بک حلیله سی سلطان حضرتلرینک رجا و نیازلرینه بناء مصالحه یه رضا کوستریلوب
سمندره قلعه سیله محبوس بولئان اوغللری ویلیق اوغلنه تسلیم و محمود بک ایله سائر اسرای
اسلامیه تخلص قانندی .

تکرار انهزام سلطان مراد حضرتلرینه باعث اکدار و آلام اولدینی خالد بیوک
شهزاده لری اولان اماسیه والیسی سلطان علاءالدینک وقوع انعدامی بتون بتون یأس
وقتورلرینی موجب اولغله سکمز یوز قرق یدی سنه سی فرزند ارجمندلری سلطان محمد
خان حضرتلرینی ایالتکاهی اولان مغنیسادن جلب و تحت سلطنته اجلاس ایدوب کندولری
مغنیساده عزالت کزین اولدیلر .

بوخبر منتشر اولدقده قرمان اوغلی ابراهیم بك حکام عیسوییه ابلاغ پیام و سلطان مرادك اختلال شعورینه مبنی اون ایکی یاشنده اولان شهزاده سی مقامنه اقعاد ایلسی بك بیوک برفرست زمانی ارئه ایتشدردیو اعلام ایلسنه مبنی مجار قرالینك وزیر ی اولان یانقو مباشرتیه مجار و آلمان و بوسنه و هر سك و افلاق و بغداد و وندیک حکامی بیننده و اهل صلیب طرزنده براتفاق استحصال و عساکر کلیه ایله بلغراددن کچوب اوکلرینه کلان ممالک اسلامییه ایصال خسار ایدرك دوبریجهیه طوغرو کلمکده اولدقاری ارکان دولتک مسموعی اولدقده بویله بر هجوم عمومینك دفعی سلطان مرادك قدومنه موقوف اولدیغنی پادشاهه عرض ایله دعوتنامه یازلدی سلطان مراد حضر تلی اولا صورت استغنا کوستر مشرلر ایسه ده تکرر دعوت و اهمیت مصلحت جهت لر یله مغنیسادن حرکت ایدوب لکن اقدکز بوغازی التمش یتمش قطعه وندیک سفینه لر یله مسدود اولدیغندن بالضروره استانبول بوغازینه توجه ایلدیلر .

وزیر اعظم خلیل پاشا دخی روم ایلی حصارینك موقعنه کلوب ساحله طوپلر وضعیه امر مروری تأمین ایلدیکندن سالما ادرنه یه مواسلت و جنود اسلامییه یی بالاسته صاحب جانب دشمنه سوق سمند جلادت بیوردیلر .

سکز یوز قرق سکز سنه سی رجیک طقوزنجی صالی کونی وارنه جوارنده تلاقئ فریقین وقوعبولوب غایت شدتله طرفین یکدیگرینه هجوم ایتمکله اناطولی بکلر بکیسی قراچه پاشا و برخیلی امر اواصل مرتبه شهادت و اکثر عساکر اسلام اطرافه پریشان اوله رق سلطان مرادك یاننده قیوقولی و بعض امرادن بشقه کیمسه قلمدیغنی مجار قرالینك منظوری اولدقده عالیته جازم و بوجعیتی دخی طاغتمغه عازم اولوب اسب تهوره ارخای عنان ایلسیه یکیکچر یلر ایکی شق اوله رق قرالی اورته یه آلدقندن صکره خضر نام بر یکیکچری اتدن ییقوب باشنی قطع ایلدی .

سر مقطوع در حال بر مزرعه طاقیلوب اعلان قلمغله عساکر دشمن پراکنده و پریشان اولدیغندن تعقیبلرینه روم ایلی بکلر بکیسی داود پاشا مأمور و معرکه کاهدن طونه یه قدر اولان ایکی کونلک یول قتلا ی دشمن ایله مالا مال اولدی .

سلطان غازی بویله بر فتح عظیم ایله کامیین اوله رق ادرنه یه عودت ایلدکده وزیر اعظم خلیل پاشا و سائر وزرا تخت دولتدن روگردان اولملرینه باعث اولان ملاک زائل و قبول سلطنته مائل اولدقلرینی تفرس ایلر یله سلطان محمد حضر تلیینه پدر کزک هر نقدر قبول ایتیه چکی درکار ایسه ده لاجل التطیب ساعطتی تکلیف ایلمکمز حقوق ابوت و بنوت

ایجابندند در دیو القا ایلدکلرندن سلطان محمد دخی نیاز قبول تخت وتاجه آغاز ایلدی .
ایرتسی کونی سلطان مراد غازی صید وشکار بهانه سیله ادرنه جوارنده واقع بحق
تپیه چیقوب امرای عسکریه یی جلب ایله استمزاج ایلدکده جمله سنک تکرر سلطنتلرینه
آرزو کش اولدقلری متعین اولدیغندن ایکنجی دفعه اوله رق تحت عثمانی به جالس وسلطان
محمد دخی بتکرار خلعت امارت صاروخانی لایس اولدی .

سلطان مراد حضر تلی مغنیسادن ادرنه به کلور ایکن اقدکز بوغازینی وندیك کیلری
ابلوقه ایلش بولمنسندن ناشی وندیك اوزرینه سفر تصمیمنده اولوب انحق بونک سمت
سهولتی موردنک تسخیرینه موقوف اولدیغنه وموره شبه جزیره سنک روم ایللی قطعه سنه
اتصالی اولان محل که دربند دینلور واوچ میل عرضی حاویدر موره حکمداری جانبندن
بورایه متین بر دیوار ویش موقعنه مستحکم حصارلر ویشگاهنه جسم خندق یاپیش ایدوکنه
بناء کرمه حصارلری دیومشهور اولمشیدی بونک تسخیری ایچون سکزیوز اللی تارینخنده
سوق سمند سطوت ایدرک تیشه اهتمام مجاهدین ایله مذکور دیوار وحصارلر خاکله یکسان
واستانبول ایمراطورلری شعبه سندن اولان موره حکمدارلری مجبور استیمان قلمغله
مظفر آ ادرنه به عودت بیورلدی .

ارنوودلق حاکمک اوغلی اولان اسکندر بک مقدما خلی زمان سرای پادشاهیده
تربیه اولمش وشرف اسلام ایله دخی مشرف اولمشیدی پدری وفاتنده نصب پادشاهی ایله
وعلی روایة فرار ایدرک ارنودلق حکومتنه نائل اولدقدن صکره اعلان عصیان ایلدیکنه
وعم زاده سی بولتان حمزه بک دخی پادشاهی اسکندرک تربیه سنه تشویق ایتمکده ایدوکنه
مبنی سکزیوز اللی بر سنه سی اولطرفه عزم هایون واقع اولوب اچه حصار قلعه سی
تسخیر اولندی ایسه ده اسکندری اله کتورمک ممکن اولماغله بوندن صکره یکر می بش
سنه قدر زمان بونک غائله سی تمتد اولمشدر .

وارنه محاربه سندن فرار ایدرک مجارستانه واصل اولان جنرال یانقو اخذ انتقام
سوداسیله تکرار براتفاق عمومی احداثه تشبث ایدرک لهوجه وافلاق وبغدان بانلری یعنی
حکمدارلرینی قاندریوب جسم براردو تشکیلیله طونه یی مرور وقوصوه صحراسنه ورود
ایلدی پادشاه غازی دخی جمع عسکر خصوصنده زیاده اعتنا ایلدیکندن قرمان اوغلی بیله
موکب هایونه بر مقدار عسکر کوندرمشیدی سکزیوز اللی ایکی شعبانک دردنجی جمعه
کونی ترتیب صفوفه مباشرت اولندی چونکه واته معرکه سنده عسکر اسلامک پریشانلغنه
سبب موکب هایونک آرقه سی تأمین وتحکیم اولمندیغنی قضیه سی ایدوکنسندن بوکره

قانون عثمانی اوزره پادشاه غازی قپوقولی دینلان یکچی و سپاه و سلاحدار بلوکلریله
وسطده وروم ایلی عسکری صاغ وانا طولی عسکری صولده طوروب آقچی بکلری
چرخیه تعیین اولندقلری مثلو صاروجه پاشا بر مقدار عسکر ایله اردوی هایونک ارقه سنی
محافظه مأمور اولدی ایکی کون ایکی کیجه علی الاتصال آتش حرب و قتال اشعال
اولنهرق جیوش متفقین هزیمت کامله یه کرفتار و باجمله مهماتلری داخل قبضه اقتدار اولوب
یانقو بوکره دخی فرار ایلدی ایسه ده بانلرک ایکسی فرسوده شمشیروله وچه بانلری اسیر
اولدی له بانی کندوسنی بیلدیرمیوب الدن اله صائمغه بالاخره خلاص اولمش وچه بانی
حضور هایونده قتل قلنمشدر .

سلطان مراد حضرتلری بعدالعوده ادرنه ده آرام ایتکده ایکن سکنر یوز
اللی بش سنه سی محرمک برنجی کونی خسته لوب اوچنجی کونی قرق طقوز یاشنده
وسلطنتک اوتوز برنجی سالنده مرتحل دار آخرت اولمغه سلطان محمد خان حضرتلری
مغنیسادن کلوب تخته بلوس ایدنجه یه قدر اون ایکی کون کیفیت وفاتلری کتم و خفا
اولنهرق بعده بروسه یه کوندریلوب تربه مخصوصه ترینه دفن قلندی مشار الیه سلطان
مراد ثانی حضرتلری قوی العزم وشدیدالسیاسه برپادشاه اولوب موفق اولدقلری خیرات
ومبرات مفصلات تواریخده مسطوردر اجدادندن مراد اول ویلدریم بایزید خانه و مخدوم
وحفیدلری سلطان محمد و سلیم خان اول حضرتلرینه نسبتله توسیع ممالک امرنده پک
ایلرویه کیده مامشار ایسه ده بونارک زماننده اولان کثرت اسرا و اموال غنایم هیچ بر
وقته کورلماش و تیمورک غارتی سببیه ضایع اولان ثروت عثمانیه بالغاً مابلغ یرینه کلشدر .
ابوالفتح سلطان محمد خان حضرتلرینک جلوسلرینی متعاقب قرمان اوغلی ابراهیم
بک بر معتاد عصیان و کرمان و منتشا و صاروخان و آیدین اوغللری سلاله سندن بر در بدری
ممالک موروثه لری استخلاصنه ارسال ایدوب کندوسی دخی ممالک عثمانیه غارتنه ال
اوزاتدینی مسموع هایان اولدقده انا طولی جانبیه کذار بیورلدی صیت صولت موکب
پادشاهی ایله مذکور در بدرلر پریشان و قرمان اوغلی دخی طاش ایله کریزان اولوب
ممالک قرمان قونیه یه قدر تسخیر اولمشیکن توسط شفا ایله ینه ابراهیم بکه احسان
و بروسه جانبیه عطف عنان قلندی .

استانبول تسخیری سلطنت عثمانیه نک مطمح نظری اولوب سلطان مراد مرحوم
ایسه بواسطه ادای حاصل ایش و فرزند ارجمندلرینه یازدینی وصیت نامه ده توصیه و تشویق
ایش اولمغه بروسه دن روم ایله عودت بهانه سیله بوغاز ایچنده واقع انا طولی حصاری

دینلان کوزلجه حصاره کلوب قارشویه مرورلری اثناسنده درت آیده و علی روایه قرق کونده روم ایلی حصارینی بنا و ایچنه مستحفظلر وضع بیوردیلر .

استانبول ایمراطوری بوخصوصدن پک زیاده اضطرابه دوشوب وزیر اعظم خلیل پاشایه مراجعت ایلدی ایسه ده برنمره حاصل اوله مدی .

یلدیرم بایزید خان زماننده واقع اولدینی کبی متجاوز اولان ملوک عیسویه فسخ عزیمتی موجب تجاوزانه مقتدر اوله ماملری ایچون حدود اسلامیة تأمین و تحکیم اولندقدن و بیوک طوپلر و سائر لوازمات قلعه کیری اعمال واستحضار ایتدیرلر کدن صکره یوز بیکدن متجاوز جنکچی عسکر و بر اولقدر دخی چاپو لچی و سائر ایله قلعه استانبول برآ و بحرآ محصور اولوب توارینخده تفصیل اولندینی اوزره اللی اوچ کون محاصره ایله سکزیوز اللی یدی سنه سی جاذی الاخره سنک یکر می یدنجی صالی کونی عنوة فتح و تسخیر اولندی .

پادشاه حضرتلری اون سکز کون قدر استانبولده اقامت ایلد کدن وسلوری و بوغادوس کبی نواحی بی دخی تحت حکومت آلدقن صکره تعمیر قلعه و تنظیم مملکت خصوصاً لرینی قارشیدیران سلیمان بکه بالتودیع ادرنه به عزیمت ایله شتایی اوراده امرار و بعث عسکر اینه اینوس قلعه سنی و قارشوسنده واقع طاشوز اطه سنی قلمرو سلطنته ادخال ایلدی .

صرب و بوسنه و موره حکمدارلریله ویرکو مقاوله اولمش ایسه ده مؤخرآ صرب حاکمک و وقوع و فتنه مبنی صربستانک بعضی لرلی غارت و سکزیوز التمش تارینخده باغراد قلعه سی محاصره اولنه رق فتحی قوه قریبه به کیشیکن مجار قرالی عسا کر کلیه ارسالله محافظه قلعه به کافه اقتدارینی صرف ایلدیکندن وقوعبولان مهاجمات نتیجه بحش مراد اولمیوب عسا کر اسلامیة رجعته مجبور اولدی

ایرتسی سنه اردوی هایون موره جزیره سنه سوق اولوب کردوس و باللی بادره و سائر برقاچ قلعه آلدقن صکره پادشاه حضرتلری اسکوبده مشتا نشین اولوب اول بهارده وزیر اعظم محمود پاشا ارسال اولنه رق صربستانک بقیه قلاعی تسخیر ایتدیرلمکده ایکن موکب پادشاهی سمندره اوزرینه راهی اولغله و اولوقت قلعه مزبوره بوسنه قرالنک ید ضبطنده بولغله قرال مزبور مفتاح قلعه بی رکاب هایونه تقدیم ایلدی بووجهله سکز یوز التمش اوچ تارینخده کاملاً صربستان داخل حکومت عثمانیان اولمشدر

بوندن صکره پادشاه غازی اناطولی جانبیه کچوب قره دکر ساحلنده واقع و جنوبزلر ضبطنده اولان اما صره قلعه سنی فتح و تسخیر و اسفندیار اوغلی اسماعیل بکه قلبه سنجاغنی

توجیه ایدرک ممالك اسفندیاری کشور عثمانی به الحاق ایلرلیه نصب کرده تیموری اولان طوائف ملوکذن قرمان اوغلی حکومتدن غیری حکومت قالمدی

برمدتدنبرو ایران شاهی اولوب کوندن کونه کسب قوت وعظمت ایدن اوزون حسن استانبولک فتحندن صکره طربزونده تشکیل حکومت ایلان روم ایمپراطورینک قیزی نزوج ایدوب اماسیه سنجاغی ملحقاتنه دخی تعرضدن خالی اولمامسیله قیونلی حصاری ضبط ایتشیدی پادشاه حضرتلری حصار مزبورى استرداد ایتدکدن صکره طربزون اوزرینه عزیمت ایتک اوزره اولدیغی حسن طویلک مسموعی اولیجق هم حرکات واقعه سندن اعتذار وهمده طربزون حکومتی پنجه قاهره محمد خانیدن تخلیصه چاره بولوق ایچون والدهسی ساره خاتونی رکاب هایونه اعزام ایلدی مومی ایها مظهر الطاف پادشاهی اولدی ایسه ده نیت هایونی تحویله قادر اوله میوب قلعه طربزون برآ و بحرا محصور و بوجه استیان تسلیمه مجبور اولدی

افلاق حاکمی اولان قازقلی ویوده که دراقوله بکک اوغلیدر افعال واطوارندن حرکت باغیانه حس اولمقدن ناشی رکاب هایونه دعوت اولندقدن امر پادشاهی به اطاعت صورتی کوستروب فقط کشور افلاقک محافظه سیچون بر مقدار عسکر کوندرلمسنى عرض ایلدیکنه مبنی نیکبولی بکی حمزه بک مأمور اولمشیدی قازقلی ویودهک ورودینه انتظار اولتور ایکن حمزه بکی ومعیتمده بولنان جنود اسلامیه بی قتل عام ایلدیکی خبری واصل اولغله پادشاه غازی سکر یوز التمش اتی سنهسی کشور افلاقه سوق سمند جلادت ایدوب جمعیت اشقیایی پریشان وقازقلی ویوده دخی مجارستانه فرار ایتکله افلاق حکومتی مومی الیهک قرنداشی اولوب خیلی وقتدنبرو رکاب هایون خدمتمده بولنان رادوله ویوده به احسان اولنه رق عودت وعساکره اجازت ویرلمکسزین کلیوایدن اناطولی طرفه مروره مسارعت اولندی

یازمنده لدی الوصول دونمای هایون دخی مدلولو جزیرهسی مقابلنه لنگر انداز اولغله جزیره مزبوره برمدت جزیره محاصره اولندقدن صکره صلحاً تسخیر قلندی ضبط وقایع ایدن مورخین اسلاف کرک بالاده محرر و کرک بوندن صکره یازلمسی مقرر اولان فتوحاتک هر بریسنه برر سبب ایراد ایدوب صرب و فاقرانلک تی واسفندیار اوغلانک تاقی امرهایونده بطائتی واماصره ده بولنان جنویزلرک سفن تجاریه به تسلطی مملکتلرینک باعث انتزاعی اولدی دیرلر وحادثات ضروریه وضعیفه بی اسباب قویه دن عد ایدرلر حالبوکه هر دوات وملت وقت وحالی مساعد بولدقجه توسیع ممالکدن کیرو طور مامق

عمرطیعی اولوب فاتح حضرتلرینک عصری دخی سلطنت عثمانیه‌نک زمان نشوونماسی و هنکام ترقی و اعتلاسی اولدیغندن بوندن بشقه سبب تحری ایتمک، تأویلات آرامق بوعندندر بناء علی ذلک سکزیوز التمش یدی سنه‌سی وزیر اعظم محمود پاشا ارسال و متعاقباً بحریک لوای شوکت و اقبال اولنوب ایالت بوسنه کاملاً تسخیر و اسیر ایدیلان بوسنه قرالی موکب هایونده تدمیر اولندقدن صکره هرسک جانبیه عطف عنان قلندی

هرسک قرالی مملکتک نصفی تسلیم و اوغلنی دخی خدمت پادشاهی‌یه تقدیم ایدوب چوق کچمکسزین فوت اولدیغندن مذکور قراللق دخی ممالک عثمانیه‌یه منضم اولدی قرال مزبورک اوغلی مؤخرآ شرف اسلام ایله مشرف اولوب بالدفعات صدر وزارت و عزت صهریته نائل اولمش و هرسک زاده احمد پاشا نامیله کسب اشتهار ایتشد

موره جزیره‌سنده واقع کردوس قلعه‌سی موره حکمدارلری جانبندن محاصره و عصر مراد خانیده تخریب اولنان کر مه حصارلری تعمیر اولندیغنی مسموع هایون اولدقده سکزیوز التمش سنه‌سی وزیر اعظم محمود پاشا ارسال اولنوب مذکور حصارلر یکیدن تخریب و کردوس قلعه‌سی تخلیص اولندقدن ماعدا موره جزیره‌سک جهت شرقیه‌سنده بولنان قلاع کاملاً انتزاع اولمغله بوندن صکره موره حکمدارلری بولنان روم ایمپراطولنی شعبه‌سی پایدار اوله‌مدیغندن جزیره‌ مرقومه‌نک غرب طرفنده واقع اینه بحتی و متون و قرون و سائر قلاعه و ندکلور استیلا ایش و مؤخرآ سلطان بایزید زماننده انلر دخی فتح اولنوب موره جزیره‌سی بالتمام حوزه حکومت عثمانیه‌یه داخل اولشدر .

قرمان اوغلی ابراهیم بک فوت اولدقده جاریه‌دن متولد اولان بیوک اوغلی اسحاق بک جانشین پدر اولمشیکن کوچک قرنداشی اولان پیر احمد بک که چلبی سلطان محمدخان مرحومک کریمه‌سندن دنیا‌یه گلشدر امداد پادشاهی ایله سکزیوز التمش سکزی سنه‌سی مسند نشین حکومت اولمشیدی درت سنه مرورنده طور ادبدن خروج ایلدیکندن پادشاه حضرتلری قونییه‌یه سایه انداز مهابت اولوب منازع دفعنی استحصال و ایالت قرمانی بیوک شهزاده‌لری سلطان مصطفی‌یه توجیه بیوردیلر .

وزارت عظمادن معزول اولدقدن صکره کلیبولی سنجاغی توجیه اولنان محمود پاشا دونمای هایون ایله و ندکلور یدنده بولنان اغریبوز جزیره‌سک فتحی ایچون ارسال بیورلمغله سکزیوز التمش اوچ سنه‌سی جزیره‌ مرقومه تسخیر اولندی و ندکلور دخی مدلولو اطه‌سنه و بعض سوا حله تسلط ایتشلا رایسه‌ده برشیئه قادر اوله‌میوب رجعت قهقری‌یه مبتلا اولدیلر .

كذلك احمد پاشا بعض امرای قرمان یدنده بولنان قلاعی ضبط ایتك ایله مشغول ایکن
احفاد ساجوقیه دن اولوب نواحی جزئیه سیله علائیه ده علم افراز امارت اولان قلیج
ارسلانک اوزرینه کیدرک مومی الیهده ایسه یارای مقاومت مفقود اولدیغدن امارتگاهنی
ونفسنی تسلیمه مجبور اولدی .

پاشای مشارائیه مزبور ی رکاب هایونه کوندردکده روم ایلنده کوماجنه سنجاغی
احسان اولمش ایسه ده امیدی درجه ده مظهر الطاف اولدیغدن مؤخرأ مصره فرار
ایشدر بعض مورخین بوکاو برده عصر مراد خان ثانیده جانیک حاکمی ایکن نفسنی تسلیم ایدن
حسین بکه مغدوردر دیرلر واصلأ جانب سلطنته مخالفت وادیسنه سلوک ایتدکلی و آبا
واجداد لرندن موروث اولان حکومتلرندن مطاوعتکارانه تعیش ایلمکده بولندقلری خالد
مظهر قهر دهر اولدیلر دیو تأسف ایدرلر .

قونیه حکومتدن طرد اولنان قرمان اوغلی احمد بک ایران شاهی اوزون حسنه
التجا و سلطنت عثمانیه نك حقارنده ظهور ایدن معاملاتندن بٹ شکوی ایدوب حسن
طویل ایسه طریزون فتحندن طولانی فاتح حضرتلرینه مغیر و سیف جهانگیری ید اقتدارنده
اولمق خلیاسی کندوسنجه مقرر اولدیغدن بر مقدار عسکر ایله عم زاده سی یوسفجه
میرزایی رسال ایله توقاد و قرمان طرفرینی تاراجه ایتدار ایتمکله قونیه والیسی اولان
شهزاده سلطان مصطفی اناطولی عسکر یله یتیشوب اکثر غارتگرانی قتل و تدمیر و یوسفجه
میرزایی اسیر ایلدی .

حسن طویلک بویله آچیقدن آجیغه تعرضاته اجتناساری محرك غیرت صاحبه قرانی
اولمغله موکب هایون تبختر و اهترازه آغاز ایدوب جانب شرقه توجه بیورلدی سیواسه
بعدالوصول روم ایلی بکلر بکیسی مراد پاشا یکریمی بیک قدر عسکر ایله ایلرو ارسال اولوب
پاشای مزبور ایسه قنطرة تجریه دن مرور ایتماش بر جوان زور آور اولدیغدن دشمنی
کوزینه کسیدیره دک مهاجه نمای استعجال و اوزون حسنک دام مکر و فرینه گرفتار
اولمغله کندوسی و معیتنده بولنان عساکرک اکثریسی تلف اولدی .

بونک اوزرینه حسن طویلک غروری بر قاتدها ترقی ایدرک بایبورذ قربنده معسکر
پادشاهی یه مقابل اولدقده ذات پادشاهی قبو قوی عسکر یله وسطده و شهزاده سلطان بایزید
جناحینده و اناطولی و روم ایلی و سائر ایالات عسکری موضعلرنده طوروب سکزیوزیتمش
سکزی سنه سی ربیع الاولنک اونالتنجی چهارشنبه کونی حربه مباشرت اولندی .
رکاب هایونده بولنان قبو قوی هنوز یرلرندن حرکت و تشهیر سلاحه مبادرت

نکسزین جناحینده بولسان جیوش عثمانیه نك هجومیه اردوی دشمن پریشان
حسن طویل سمت ادباره کریزان اولمغله کافه مهمات و ادواتی ادخال قبضه تسخیر
اون بش یکرمی بیک قدر اشخاص دخی اسیر اولندی بونلرک احوالی لدی التفقد
چلرنده تیمور احفادندن اوچ میرزا و بش اون نفر فضلا و پک چوق ارباب صنایع
جود اولدینی تبین ایتیکله بومثللولر ممالک محروسه یه اسرا و قره قویونلی طائفه سندن
نلر حقننده عفو عمومی اجرا اولنوب فقط اق قیونلی طاقمی که لازم الازاله اشرادن
یلر انلردن دوت بیک نفری کردن داده تیغ سرتیز اولدی

موسم شتا قریب و تعقیب دشمن خصوصی بلاد اسلامیه یی مستلزم تخریب اولدیغندن
دوته قرار ویریلوب قره حصار شرقی حوالیسنه کلندکده محافظی بولنان داراب بک
سلیم حصاره مسارعت ایتیکله میر مزبوره چرمن سنجاغی احسان بیورلدی .

قرمان اوغلی پیر احمد بک حسن طویلاک باشنه بلا و شمع اقبانه موجب انظفا اولدقدن
کره ارمناک و سلفکه طرفلرینه وارد اولدینی مسموع پادشاهی اولدقده تکرار کدک
قد پاشا ارسال بیوریلوب هجوم ناکهانی ایله میر مزبورک جمعیتی پریشان و عائله سنی وضع
دیکی مینان قلعه سی مجبور استیمان قلمغله بیچاره پیر احمد بک بوالم جانکاه ایله برسنه
زورنده حدود شامده فوت اولدی .

قونیه والیسی شهزاده سلطان مصطفی سکز یوز یتش طقوز سنه سی دودلی حصاری
جی نیثیله اول طرفه حرکت ایدوب امرای قرماندن محافظت قلعه بولسان آتمجه بک
د ازین آل قرمانک اعاده حکومت ایدد بیلملرندن مأیوس اولمغله قلعه یی تسلیم ایلدی
شهزاده مشار الیه بو وجهله نائل مطلب اولدی ایسه ده بعدالعوده ارتحال دار بقا
وردیلر .

جنویزلر قوه بحریه لری سایه سنده اق دکز و قاره دکزک بعض ساحلرینه متصرف
ملشر ایدی بو قیلدن اوله رق قریم جزیره سنک جهت شرقیه سنده واقع کفه سنجاغی
میر اولنان یرده یعنی بحر آزاق بوغازنده بر قاق پاره قلعه اعمار ایدوب اوطور مقده
لدقلری و ملوک تاتارک قلعه کیرلکه عدم قدرتلرندن و علی روایه جنویزلر واسطه سیله
روپا معمولاتنه دسترس اوله کلدکلرندن تعرضدن اجتناب ایتیکده بولندقلری حالده
سکز یوز سکسان تاریخنده کدک احمد پاشا اوچیوز پاره سفینه ایله قره دکزه اخراج
لنوب کفه و آزاق و منکوب قلعه لری تسخیر ایتدیرلدی آلان اسرا ایچنده قریم
مانی ایکن وفات ایدن حاجی کرایک منکلی کرای نامنده بر اوغلی اولدینی خبر آلنوب

كذلك احمد پاشا بعض امراى قرمان يندده بولنان قلاعى ضبط ايتك ايله مشغول ايكن احفاد ساچوقيه دن اولوب نواحى جزئيه سيله علائيه ده علم افراز امارت اولان قليج ارسلانك اوزرينه كيدرک مومى اليه ده ايسه ياراي مقاومت مفقود اولديغندن امارتگاهنى ونفسى تسليمه مجبور اولدى .

پاشاي مشارايه مزبورى ركاب هايونه كوندرد كده روم ايلنده كوماجنه سنجاغى احسان اولتمش ايسه ده اميدى درجه ده مظهر الطاف اولديغندن مؤخرأ مصره فرار ايشدر بعض مورخين بوكا برده عصر مراد خان ثانيه جانك حاكمى ايكن نفسى تسليم ايدن حسين بكة مغدور درديرلر واصلأ جانب سلطنته مخالفت واديسنه سلوك ايتدكلرى و آبا واجدادلرندن موروث اولان حكومتلرندن مطاوعتكارانه تعيش ايلمكده بولندكلرى خالد مظهر قهر دهر اولديلر ديو تأسف ايدرلر .

قونيه حكومتدن طرد اولنان قرمان اوغلى احمد بك ايران شاهى اوزون حسنه التجا وسلطنت عثمانيه نك حقارنده ظهور ايدن معاملاتندن بث شكوى ايدوب حسن طويل ايسه طر بزون فتحندن طولاي فاتح حضر تارينه مغبر وسيف جهانكبرى يداقتدارنده اولمق خاياسى كندوسنجه مقرر اولديغندن بر مقدار عسكر ايله عم زاده سى يوسفجه ميرزاي ارسال ايله توقاد وقرمان طرفدارى تاراجه استدار ايتكله قونيه واليسى اولان شهزاده سلطان مصطفى اناطولى عسكريله يتيشوب اكثر غارتكرانى قتل وتدمير ويوسفجه ميرزاي اسير ايلدى .

حسن طويلك بويله آچيقدن آچيغه تعرضاته اجتسارى محرك غيرت صاحبه قرانى اولمغله موكب هايون تبختر واهترازه آغاز ايدوب جانب شرقه توجه بيورلدى سيواسه بعدالوصول روم ايلي بكلكر بكيسى مراد پاشا يكرمى بيك قدر عسكر ايله ايلرو ارسال اولوب پاشاي مزبور ايسه قطره تجربه دن مرور ايتامش بر جوان زور آور اولديغندن دشمنى كوزينه كسديره رك مهاجمه نماي استعجال واوزون حسنك دام مكر و فريبنه گرفتار اولمغله كندوسى ومعيتمده بولنان عساكر ك اكثريسى تلف اولدى .

بونك اوزرينه حسن طويلك غرورى برقاندھا ترقى ايدرک بايبورد قربنده معسكر پادشاهى به مقابل اولدقده ذات پادشاهى قيو قولى عسكريله وسطده وشهزاده سلطان بايزيد جناحينده واناطولى وروم ايلي وسائر ايالات عسكرى موضعلرنده طوروب سكر يوزيتمش سكر سنه سى ربيع الاولنك اونتيجي چهارشنبه كوني حربه مباشرت اولندى .

ركاب هايونده بولنان قيو قولى هنوز يرلرندن حركت وتشهير سلاحه مبادرت

ایتمکسزین جناحینده بولسان جیوش عثمانیه نك هجومیه اردوی دشمن پریشان و حسن طویل سمت ادباره کریزان اولمغله کافه مهمات و ادواتی ادخال قبضه تسخیر و اون بش یکرمی بیک قدر اشخاص دخی اسیر اولندی بونلرک احوالی لدی التفقد ایچلرنده تیمور احضاردن اوچ میرزا و بش اون نفر فضلا و یک چوق ارباب صنایع موجود اولدینی تبین ایتمکله بومثللور ممالک محروسه یه اسرا و قره قویونلی طائفه سندن اولنلر حقنده عفو عمومی اجرا اولنوب فقط اق قیونلی طاقی که لازم الازاله اشرادن ایدیلر انلردن درت بیک نفری کردن داده تیغ سرتیز اولدی

موسم شتا قریب و تعقیب دشمن خصوصی بلاد اسلامییه یی مستلزم تخریب اولدیغندن عودته قرار ویریلوب قره حصار شرقی حوالیسنه کلندکده محافظی بولنان داراب یک تسلیم حصاره مسارعت ایتمکله میر مزبورده چرمن سنجاغی احسان بیورلدی .

قرمان اوغلی پیر احمد یک حسن طویلاک باشنه بلا و شمع اقبالنه موجب انظفا اولدقدن حکره ارمناک و سلفکه طرفلرینه وارد اولدینی مسموع پادشاهی اولدقده تکرار کدک احمد پاشا ارسال بیوریلوب هجوم ناکهانی ایله میر مزبورک جمعیتی پریشان و عائله سنی وضع ایلدیکی مینان قلعه سی محبور استیمان قلمغله بیچاره پیر احمد یک بو الم جانکاه ایله برسنه سرورنده حدود شامده فوت اولدی .

قونیه والیسی شهزاده سلطان مصطفی سکز یوز یتش طقوز سنه سی دودلی حصاری فتیحی نیتیه اول طرفه حرکت ایدوب امرای قرماندن محافظ قلعه بولنان آتمجه یک بعد ازین آل قرمانک اعاده حکومت ایدد بیلملرندن مایوس اولمغله قلعه یی تسلیم ایلدی شهزاده مشار الیه بو وجهله نائل مطلب اولدی ایسه ده بعدالعوده ارتحال دار بقا بیوردیلر .

جنویزلر قوه بجزیره لری سایه سنده اق دکز و قاره دکزک بعض ساحلرینه متصرف اولمشلر ایدی بو قیلدن اوله رق قریم جزیره سنک جهت شرقیه سنده واقع کفه سنجاغی تعبیر اولنان یرده یعنی بحر آزاق بوغازنده بر قاق پاره قلعه اعمار ایدوب اوطور مقده اولدقلری و ملوک تاتارک قلعه کیرلکه عدم قدرتلرندن و علی روایه جنویزلر واسطه سیله اوروپا معمولاتنه دسترس اوله کلدکلرندن تعرضدن اجتناب ایلمکده بولندقلری خالد سکز یوز سکسان تاریخنده کدک احمد پاشا اوچیوز پاره سفینه ایله قره دکزده اخراج اولنوب کفه و آزاق و منکوب قلعه لری تسخیر ایتدیرلدی آلمان اسرا ایچنده قریم خانی ایکن وفات ایدن حاجی کرایک منکلی کرای نامنده بر اوغلی اولدینی خبر آلتوب

لدى التحقيق حاجى كرايك وفتند حرب وضربه قادر سگىز اون نفر اولادىنك تحصيل
حکومت ضمنند. بىنلرنده مقاتلات کثیره وقوعبولديغندن مشار اليه منکلى کرای برقاچ
کون جالس مسند حکومت اولدقدن صکره برادرلرينك تسلطلری سبيله جنويزليله
التجا ايلديكى تين ايتش اولسنه مبنى اکرام واحترامى امرنده اهتمام اولنمقده ايکن قریم
اطهسند تحدث ایدن شورش وغوغا بروجهله تسکین اولنه مدیغندن قریمک علما وامراسی
مشار اليه منکلى کرایک علی طریق النیابه قریمه کوندرلسی نیازینی متضمن رکاب هایونه
عرض محضر تقدیم ایتلریله درحال دارات ولوازماتی ترتیب اولنه رق ارسال و قریم
حکومتیله توقیر واجلال بیورلدی.

اشقودرده تفرید ایدن اسکندرک تأدیپ وتریه سی ایچون دفعاتله عسکر سوق اولنمغه
يك چوق تلفات وقوعبولمش و ارناوودلغك اكثرى مواقى ضبط و ایلصان قلعه سی
بنا اولنه رق اولدقجه امنیت حاصل اولمش ایسه ده ارناوود اسکندریه سی دینلان
اشقودره تسخیر اولنه مامشیدی بو دفعه دخی بو خصوصه مأمور اولان روم ایلی بکیر
بکیسی خادم سلیمان پاشا موفق اوله مدغنه و بغداد حاکمک دخی حرکات سرکشانه سی
مشاهده قلندیغنه مبنی پادشاه غازی حضر تلی سگىز یوز سکسان بر سنه سی اولجانبه
عطف عنان ایدوب کشور بغداد ایکی آیدن زیاده فرسوده سم سمند غازیان اوله رق
بعدالعوده محارقرانك طونه وموروذهرلری ملتقاسنده بنا ایلدیكى قلعه تخریب قلندی.
بو سفرد افلاق ویوده سی موکب هایون معیتده بولنمقه الزان غنایمندن اکا دخی حصه
افراز اولندیکه اکثریسی جنوار سوریلری ایدی.

ایرتسی سنه اشقودره قلعه سی محاصره اولتوب لکن موقعك صربلغی و قلعهك
رصاتی مانع فتح اولمغه سد مخرج و مداخل ایچون جوارینه بر قلعه بنا و اشقودره
ماحققتندن بولنان اوچ عدد پانقهك تسخیریه اکتفا بیوریلهرق عودت هایون وقوعنی
متعاقب اسکندر بکک وقوع وفاتی جهتیله اشقودره قلعه سی دخی اهالیسی جانبندن تسلیم
اولنمغه ارناوولغك کیغلق قطعیه سی کاملاً حوزده حکومت عثمانیه دخی داخل اولدی.

سگىز یوز سکسان درت سنه سی کدک احمد پاشا دونمای هایون ایله ارسال اولتوب
اولونیه طرفلری فتح اولندقدن صکره نابولی الکاسنده واقع اوترانته شهرى وجوارنده
بولنان برقاچ قلعه فتح اولمش ایسه ده پاشای غازی تکرار عسکر و مهمات المق اوزره
ایکی سنه مرورنده عودت ایدوب بو اوانده ایسه فاتح حضر تلی وفات ایتش وسلطان

بایزید جم سلطان غائله سیله مشغول بولتمش ایدو کندن ناپولی جهته باقلمغه زمان مساعد اولمدیغنه مبنی ایتالیانلر ممالک مزبورده نك استردادینه دسترس اولدیلر .

کذلك وزرادن مسیح پاشا سردار لغیله ردوس قلعه سی محاصره اولنوب فتحی قوؤ قریبه یه کاشیکن پاشای مزبورده قلعه ده مدخر اولان اموال طرف حکومت عائددر غارت اولمسون دیو دللاللر ندا ایتدیرمکله مهاجمینک روگردانلقلرینه بادی و بی فتح و ظفر عودتی مؤدی اولدی .

ذوی القدریه خاندانی که چلبی سلطان محمد مرحومه و فاتح حضرتلرینه قیز و یروب شرف صهریتله مشرف اولمشلردر بولنلرذن حکمدار وقت بولنان شهسوار بك بر آردلق فاتح حضرتلرینه مخالف و مصرایله طرفدار کورنمشیکن مؤخرأ مصر سلطانی قایتبای بر تقریبله شهسوار بکی اله کتوروب مصرده باب ذویلده بر دار و ممالک ذوی القدریه بی میر مرحومک برادرینه توجیه ایلدیکنه و منازل حجه اولان برکه لرك تعمیر حقه ده اولان نیت پادشاهی یه دخی مساعده ایلدیکنه بناءً فاتح حضرتلری عربستان سفری عزیمله اسکداره گذار و ککبوزه قریبنده نصب سرادقات اجلال ایلدکده سکسان الی سنه سی ربیع الاولنده الی ایکی یاشنده و سلطنتک اوتوز ایکنجی سالنده مرتحل دار آخرت اولدی .

مژده سلطنت آماسیه والیسی بولنان سلطان بایزیده اسرا و امر وفات اخفاواندی ایسه ده تدابیرده بعض قصور وقوعنه مبنی یکیکچریلر کیفیته مطلع اولملریله رفع علم شقاوت و وزیر اعظم قرمانی محمد پاشایی قتل ایلدکدن صکره بیوت یهودی غارت ایلدیلر . سلطان بایزیدک شهزاده لرندن سلطان قورقود استانبولده بولمغله بدری طرفندن نیابةً تحت سلطنته اصعاد اولمدیغنی متعاقب سلطان بایزید دخی وارد اولمغله آتش فتنه منطفی اولدی .

قونیه والیسی بولنان جم سلطان پدرینک وفتی و برادرینک جلوسنی استماع ایلدکده شرکت سلطنت دعواسنه قیام و بروسه جانبه عطف لجام ایدوب ایکی بیک یکیکچری ايله بروسه محافظه سنه کوندریلان آياس پاشا مقاومت قادر اوله مدیغندن سلطان جم شهره داخل و سرای هایونه نازل اولوب نامه خطبه قرائت ایتدیردک اعلان استقلال ایلدی سلطان بایزید حضرتلری سپاه اراسته ايله بالذات جم سلطان اوزرینه هجوم ایدوب یکیشهر صحراسنده تقابل صفین وقوعبولدقه سلطان جمک لالاله سی اولان یعقوب بك طرف سلطنتدن مجلوب بواندیغنه مبنی موکب هایونه التجا ایلکله سلطان جمک عسکری بریشان و کندیسی قونیه طرفه کریزان اولدی .

قونیهدده بولنان والده و عیال و اولادینی بالاستصحاب جانب مصره و اورادن دخی
حرمین شریفنه عزیمت و ایفای فریضه هجیدن صکره سلطان مصرک اعانه سی و آل قرماندن
قاسم بکک اتفاقه دعوتی اوزرینه ینه قرمان حدودینه عودت ایلدی .

طرف پادشاهیدن جم سلطانهارسال رسول و رسائل ايله حکومتکاهی اولان قونیهدده یالتک و ارداتی
کندوسنه ویرلمک اوزرده قدس شریفده اقامت ایلمسی تکلیف اولندی ایسه ده سلطان جم ارضا
اولنه مدیغندن قوه کافیه ايله کدک احمدپاشا مأمور اولمغله کرک سلطان جم و کرک قاسم بک عسکر یله
وقوعبولان مقاتلاتده پاشای مشارالیه مظهر فوز و ظفر اولدیغندن سلطان جم بوجهتدن نائل امل
اولمقدن محروم اولدیغنه و قاسم بک دخی دولتک مشغولیتی روم ایلی طرفنه دوشوروب کندوسنجه
ممالک قرمانک ضبطی کسب سهولت ایلمک مقصدیله سلطان جمی روم ایلی جانبنه کچمکه تشویق
ایلدیکنه منی شهزاده سادهدل ردوس قوالیرلرندن کمی طای ایچون آدم کوندروب کتورتدی
مفصلات تواریخده بیان اولندیغی اوزرده سلطان جم کمی یه بندکدن صکره حریتی
غائب ایتمکه اون ایکی سنه قدر اوروپاده قلوب آخر الامر مسموماً وفات ایلدی

شویله که برمدت ردوسده توقیف وبعده پاییه اهدا اولنه رقی پایا دخی جانب دولت
علیه دن تحصیل منفعت خصوصنده سلطان جمی آلت اتخاذ ايله امرار وقت ایتمکده ایکن
سلطان جمک والده سی بود بون خاندانندن بولنان فرانسه قرانک همشیره سی اولوب
استانبول ایمپراطورینه تزویج ایچون کوندردلیکی حالدده ایام فتحه تصادف ایددرک فاتح
حضر تلیرنک شرف ازدواجیله مشرفه و سلطان جمی متولد اولمق حسیله فرانسه قرالی
سلطان جم اوزرینه دعوای حق قرابت ايله حرباً تخلیص ایتیش ایسه ده طقوز یوز
تاریخنده پایا طرفندن خفیاً اسمیم ایتدیرلمشدر بعض روایتده دخی قوجه مصطفی پاشا
سلطان بایزید طرفندن کوندریلوب بربر اولمق اوزرده شهزاده یه انتساب وزهر آلود
اوستره ايله تراس ایددرک سبب ارتحالی اولمشدر هر نه ایسه سلطان جمک وفاتیله سلطان
بایزیدک اوهامی برطرف اوله رقی جنازه شهزاده دخی کتوریلوب بروسه ده تربه مخصوصه
دفن اولندی .

سلطان جمک فرارندن صکره قرمان اوغلی قاسم بک حرکات واقعه منندن اظهار
ندامت و ماطفت پادشاهی یه دخالت ایتمکه علائیه سنجاغی احسان اولنه رقی سلطان بایزید
ادرنه یه رجعت ایلدی .

پادشاه حضر تاری سلطان جم غائله سیله مشغول ایکن بغداد حاکمی کشور افلاقه
اعراض ایتسیله موکب هایون بغدادنه سوق اولوب سکز یوز سکسان طقوز سنه سی کالی

و آق کرمان قلعه لری فتح اولندی و بوسفرهایونده قریم خانی منکلی کرای خان و افلاق و یوده سی معیت پادشاهیده بولندی .

بعدالعوده بغداد حاکمی کلّی بی محاصره ایتدی ایسه ده اولحوالیده بولنان امرای عثمانیه نك سطوت سیوفله فراره مجبور اولدیغندن ایکی سنه علی الاتصال ممالک بغداد پامال خیول یغما اولوب نهایت جانب سلطنتدن و یوده نصیله اسایش مملکت استکمال قلندی .

مصرده سلطنت ایتمکده اولان دولت چراکسه نك ذوالقدریه و رمضان اوغلی حکو- متلرینه اولان تغلبی دولت علیه خوش کلمدیکی کبی مملکت قرمانک حکومت عثمانیه به التحاقی دخی مصر لولرک ایشنه الیورماملکه دولتین بیننه برودت واسترقاب کیرمشیدی حال بویه ایکن سلطان مصرک جم سلطانه اولان اعانه سی مضر اولان آتش عداوتی اشعاله باعث اولدیغنه مبنی قرمان بکدر بکیسی قره کوز پاشا سرحدده بولنان قلاعی تسخیره مأمور اولمقله ادرنه و ترسوس قلعه لری ضبط اولندی ایسه ده مصردن اعزام اولان اردونک مدافعه سنه تعیین اولنان اناطولی بکدر بکیسی هر سک زاده احمد پاشا وقوع بولان محاربه ده منهزم واسیر اولمقله مصر لولر مذکور قلعه لری استرداد ایلدیلر .

بونک اوزرینه سکز یوز طقسان اوچ سنه سی وزیر خادم علی پاشا سپاه اراسته ایله ارسال اولنوب ادرنه قریبده محاربه شدیده وقوعیله ایکی طرف دخی زیاده زده لنوب مفارقت ایلدکدن صکره اردوی هایونک عودتی خبری فرط مخافه ایله طی مسافه ایدن مصر لولره واصل اولدقده تکرار ممالک عثمانیه جانبنه حرکت ونیکده ولارنده به قدر غارت ایتدیلر .

بوخبر سمع هایونه ایریشدکده تکرار سردار تعیین قلندقدن بشقه بالذات عزم پادشاهی دخی تقرر ایتمش و علما وارکان دولت مصر سفری اوزرینه اتفاق ایتمشیکن تونس پادشاهی سلطان عثمان حفصی طرفندن توسط اولنوب مفتی عصر اولان مولانا زین العربی دخی سفک دماء مسلمیندن اجتناب اولمق بابنده نصایح مؤثره ایراد ایتمکله سکز یوز الی سنه سی ترک محاصره به قرار ویریلوب چقور اووده ضبط اولمش اولان برقاج پاره قلعه دخی حرمین شریفین وقفی اولمق حبسیله حکومت مصریه به تسلیم قلندی .

بحار قرالی فوت اولوب غیر منکوحه برقاریدن متولد اوغلندن ماعدا خلف ترک ایتدیکنندن انک و یاخود له قرال زاده سنک مقام حکمرانی به اصعادی خصوصندم انکروس امراسی بیننه اختلاف دوشدیکنه و بان تعبیر اولنان بلغراد محافظی پادشاه حضر تلی اولطرفه

گور ایسه باغرادى تسلیم ایدہ جکئی اخبار ایلدیکنه بناء سکزیوز طقسان یدی سنہ سی
موکب شایون صوفیہ یہ وارد اولدقدہ امرای انکروس له قرال زاده سنی مجار تحتہ اجلاس
ومحافظ مرقومی تبدیل ایلدکلی خبر المغلہ ارناوردلق طرفہ توجه اولنوب عصیان
اوزره بولنان نواحی تحت تربیہ یہ ادخل اولندقدن صکرہ دارالسلطنہ جانبہ مراجعت واتی
سنہ قدر زمان اختیار سکوت واقامت بیورلدی

بومدت ایچنده سمندره بکی اولان میخال اوغلی علی بک مجارستانی غارتہ کیدوب
عودتندہ بوصوده بولنان دشمن عسکرینه مغلوب اوئش اولدیغندن مجار قرالی غیرتہ
کئوب عساگر کلیہ ایله درنجیل بان نام جنرالی بوسنه تسخیرینه کوندردیکی بوسنه بکی
یعقوب پاشانک مسموعی اولدقدہ تحت لواسندہ بولنان غزاة موحدینی جمع ایله
خروالستانہ چکوب قروانام محامدہ وقوعبولان محاربہ شدیدده فرقة دشمندن اون بیکی
مقتول وجنرال مرقوم ایله برابر اوله رق اون بیک قدری دخی قید اسره موصول اولدی
بوخبر نصرت واصل سامعہ دولت اولدقدہ پاشای غازی یه روم ایلی بککری بکیلیکی
عنایت بیورلدی

مجاروله حکومتلری یک وجود حکمنہ کیرمش اولدیغنه مبنی مجارلورک حرکات
واقعه لرینه مقابله واهلورک دخی بغدادہ تسلط لرینه بناء ساستره بکی مالقوج اوغلی بالی
بک قرق بیک قدر جنود مسلمین ایله لهستانہ هجوم ایدوب ایکی آی سرتاسر کشورلہی
یامال خیول یغما وغارت ایدرک غنائیم واسرای لایخصی ایله دارالامارہ سنہ عودت ایلدی
وندکلورل یدندہ بولنان مورہ جزیرہ سنک جهت غربیہ سی فتح وتسخیر اولتمق
تصمیم اولمغلہ بوسنه ایالتی وزارتدن متقاعد اسکندر پاشایہ بالتوجیه ونیدیک مالکئی غارت
ایتمی اراده بیورلدیغندن پاشای مشارالیه پایجہ وبوسنه لوفجہ سی ودراج کبی قلاعی فتح
ایتدکدن بشقہ تاوندیک شہرینه قدر غارت ایتدکده ایکن طقوز یوز درت سنہ سی وزیر
هرسک زاده احمد پاشانک معیتہ روم ایلی واناطولی بککری بکیلی مصطفی پاشا وسان پاشا
تعیین اولنهرق ارسال وودونمای هایون دخی قپودان داود پاشا قومانداسیله تسیار قیلنوب
برآ وبحرأ محاربات شدیدہ وقوعندن صکرہ اینہ بختی قلعہ سی تسخیر اولمغلہ وخبر فتح
انهای راهدہ سلطان بایزید حضر تلرینه واصل اولمغلہ ادرنہ یه عودت اولندی

بوندن صکرہ مورہ ایالتی خادم علی پاشایہ توجیه وقلاع سائرہ نک ضبطنہ سردار نصب
وطقوز یوزیدی سنہ سنہ قدر برآ وبحرأ محاربات کثیرہ ایله متون وقرون وسائر
حصارلر تسخیر اولنهرق مورہ ایالتی ونیدیک اشتراکندن تخلص قلندی

وندکلور فرانسه لوردن استمداد وسفن کثیره ایله مدلولوی بوکره دخی محاصره
ایتملر ایسه ده مغنیا والیسی شهزاده سلطان قورقودک اغانه سیله منهزماً فرار ایلدکری
مثلو اناتولی ساحلرینه وقوعبولان تسلطلرندن دخی فائده مند اوله مدیلر
سلطان بایزید خان حضرتلری حد ذاتنده سفر وحرکتدن مجتنب وراحت وازوایه
راغب برپادشاه دوریش نهاد اولدیغی حالد برش وافیون کی بعض مکیفاته ابتلاسندن
ویاشنی آلاجه قواسنه ضعف وخال طریان ایلدیکندن امور سلطتی وکلاسنه تحمیل
وطاعات وعبادات مراسمی تکمیل وادیسنه ساوک ایدرک دولت صاحبسر کی قانغله وقوعات
آتیله دهشت بخشای ظهور اولمشدر شویله که شیخقله شاهانی جمع ایدن شاه اسماعیل
صفوی خطه ایرانی ضبط وجوارنده بولنان حکومتلرک کیمنی الفا وکیمیسنی امرینه ربط
ایدوب نائل اولدیغی غایبات متوالیه وکثرت عسکریه یه مغروراً تیمور یولنی طوته رق
اسکداره قدر قبضه حکمنه ادخال ایکی قورمش وکندوسی اکثراً حدود اوزرنده
ظولاشوب ارسال نقبا ایله اناتولی خلقنی مذهبنه دعوت ایدرک خلیجه طرفدار پیدا
ایشیدیکه بقیه سیف سلیم خانی اوله رق بولاردن بعض قبیللر الان اناتولی ایچنده
موجوددر حال بومر کرده ایکن قونیه ومغنیا وکفه والیرلی بولنان سلطان علم شاه
وسالمان محمود وسلطان محمد نام شهزاده لرک متعاقباً وفاتلری پادشاه حضرتلرینک بتون
بتون فتور ویاغنی مستلزم اولدیغندن آماسیه والیسی بولنان بیوک شهزاده سلطان احمد
فراغ سلطنت ایکی تصمیم ایدوب شهزاده مشارالیه ایسه لین الجانب حلیم وکریم
اولدیغندن وبوجهتلرله وکلانک دخی ایشنه موافق کلدیکندن بوبابده پادشاهی تشویق
ایدرلر ایدی

ایکنجی شهزاده سلطان قورقود اصحاب فضل وکالدن وادبایله هم بزم الفت عرفدن
اولوب پدرینک بونیتنه مطلع اولدقده طائفه عسکریه ایچنده ال پیدا اتمکله تشبث ایلدیکنه
مبنی مغنیاادن قالدیرلوب حکومتکاه سابق اولان تکیه کوندردلی لکن مشارالیه
بو توجیهدن بوی تبعید استشام ایلمکله مغنیااده ابقاسی نیازی تکرار ایلدیکی حالدده متمر
اوله مدیغندن بالضروره تکیه کیتدی ایسه ده برمدت مرورنده کال انفعالنندن مصره فرار
ایدوب مؤخرأ سلطان مصرک نصایحیه تکرار سنجاغنه عودت واعتذار نامه تقدیمه
مسارعتله مظهر عفو پادشاهی اولمشیکن بغته تکدن قیام ومغنیا جانبنه عطف
لجام ایلدیکی خبری واصلدر دولت اولدقده حسب الوقت والحال ینه مغنیا والیکله
ابجال بیورلدی

لکن شهزاده مشارالیهک بو حرکت فوق العاده سی پادشاهک شایعه ارتحالی تکوننه باعث اولدیغنه و تکه حوالیسی حاکم دن حالی قالدیغنه بناء شاه اسماعیل مجلوبلرندن و تکه اهلایسندن بر ملحد قاعده اعجام اوزرد شاد قوی نامنی طاقوب باشنه طویلنان ایکی اوج بیک قدر اشقیای روافض ایله اناطولی بکک بکیسی قره کوز پاشایی باصه رق عسکرینی تارومار و کندوسنی اله کتوروب کوتاهی قلعہ سی برجنه بردار ایلدی

بو پیام بارد سمع دولته وارد اولیجق شهزاده سلطان احمد تنکیل اشقیایه مأمور اولمش ایسه ده عهده سندن کله مدیکی جهته وزیر اعظم خادم علی پاشا بر مقدار عسکر ایله استانبولدن قالقوب اشقیایه اوزرینه توجه ایلدی و سلطان احمد ایله برلشوب بوایشه موفق اولندقدن و خلق بیننده شهزاده مشارالیه تحصیل نام و شهرت ایلدکدن صکره اجلاسی ماده سی تصمیم قلندی

علی پاشا اشقیانک ایران طوغری قاقچقده اولدققرینی استماع ایلدکده اجتماع عسکر حاصل اولمق سزین اسب تهوره سواروار قه لرندن مهیم رزن الغار اولوب سیواس حوالیسنده کؤک جای نام محله یتشدی انجق اشقیایه فنا بر موقعده کیرودونوب علی پاشایه هجوم ایتکله پاشای غازی نیک شجره عمری کوتاه و اشقیایه دخی شاه اسماعیل درگاهنه رو براه اولدی

اوچنجی شهزاده اولان طربزون والیسی سلطان سلیم خان حضرتلری حرب و ضربه مائل و فضلیت و شجاعتله مشتهر غضوب و غیور بر شهزاده مهاتم فور اولدیغندن دائره سی جمع شجعان و ملجاء معارفندان زمان ایدی علی الدوام کرجی طائفه سی و شاه اسماعیل منسوباتیله محاربه لر ایدوب حتی بایبورد و ارزنجانی فتح ایتکله ارکان دولتک افاداتی اوزرینه پدیری جانبدن فرمان عالی صادر و یالکیز حوزه حکومتک محافظه سیله مقید اولوب تجاوزی حرکاتدن بجانب ایتیمی باینده تنبیه پادشاهی واقع اولمشیدی

سلطان احمد حقنده اولان تصمیماتی استماع ایتدکده احوال دولتک اغتشاشندن و طربزونک سمتسز لکندن بحث ایدرک روم ایلنده بر منصب طلب ایدوب وارد اولان جوابده روم ایلی وجود پادشاهی ایله محافظه یه مقرون و شهزادکانه اورادن سنجاق توجیهی خلاف قانون اولدیغندن اناطولیدن قغنی سنجاغه رغبت ایدر ایسه ویریه جکی بیان اولندقدن پدیرم ایله کوروشوب احوال دولتی شفاها عرض ایتک اقتضای مصلحتدن اولمشدر دیرک مخدوم مکرملری سلطان سلیمانک حکومتکاهی اولان کفیه مرور وقریم اوزرنده طولاشه رق اون بیک قدر آدم ایله طونه نهرندن عبور ایدوب سلستریه واصل اولدی

ارکان دولت سلطان سلیمك مزاج و مشوارندن متوحش اولدقلری حالدہ روم ایلی یه کچمسندن بتون بتون و همه دوشوب بوحرکاتی عادتاً عصیان عد ایدرك جمع عسکر ایله سلطان بایزیدی ادرنه یه کوتوردیلر سلطان سلیم دخی تقرب ایلدکده ارسال رسل و رسائل ایله ماده ملاقات وقت مرهونه تأخیر و شمديك سمندره منصبيله توقیر اولنوب خلعت سلطنت شہزادگان هیچ برسنه الباس اولنماق و ولی عهد تعیین قلمیوب مشیت الهیه یه براقلمق شرائطيله فصل دعوی اولندی

لکن سلطان سلیم خان حضرتلری اناطولی احوالی کسب انتظام ایدنجه یه قدر بزم بورالرده بولنماز لازمدر دیهرك قزانلق حوالیسندہ قرار اوزره ایکن سلطان بایزیدك استانبوله عودت و سلطان احمدہ دعوتنامه ارساله مبادرت ایلدیکنی استماع ایلدکده حرکت سریعه ایله چورلی جوارنده موکب هایونه یتشدی سلطان بایزید حضرتلری عربہ ایچنده ایدیلر ارکان دولت عربہ نك پرده لرینی قالدیروب دست شریفکزی تقیله کلان مخدومکزك اردوسنه نظر بیورك دیو سلطان سلیمك عسکری ارائه ایله محاربه یه رخصت الوب همان طویلره آتش ویردیلر سلطان سلیم محاربه دن اجتناب ایلدی ایسه ده ضروری بر مقدار مقاتله وقوع بولمسيله اخیولی یه رجعت و مقدا اوراده استحضار ایلدیکی سفینه لر ایله کفیه عودت ایلدی بونك اوزرینه سلطان بایزیدك استانبوله وصولنی متعاقب سلطان احمد اسکدار جوارنده واقع مال تپیه وارد اوله زق ظهور مژده سلطنته مترقب اولدیغی حالدہ یکچیریلر سلطان سلیم طرفه مجذوب و مجلوب اولدیغندن مخالفتہ قیام ایدوب (سلطان احمد شیطان قوی و قعه سنده لایق ناموس دولت حرکتہ موفق اوله مانغله باعث شین ورزالت اولدی سلطان قورقودا کرچه علم و فضل ایله متصفدر لکن بوعصرده مقام سلطنتك اهل و اربابی دکدر سلطان سلیم امر اداره سیاستده ماهر و خصمای دولتک حقندن کلکه قادر اولدیغندن بویله زمانده اندن بشقه پادشاه قبول ایتیز) دیهرك غوغایی بیودوب سلطان احمد طرفدار اولان وکلا خانہ لرینی غارت ایتلریله بالضروره سلطان احمد خبر ارسال و شمديك تأخیر مصلحت ایجاب ایتشدر مألنده اعتذارلر ایله منصبی طرفه عودتی استعجال اولدیغندن رجعتہ مجبور اولدی

ارتق بونك اوزرینه هوادکشمکه هر طرفدن سلطان سلیمه دعوتنامه لر یاغدرلدیغندن شدت شتایه باقیوب طونه منجمد ایکن اوزرندن بالمرور سیر سریع ایله طقوز یوز اون سکنر سنه سی صفر الحیری اوائلنده استانبوله واصل و یکی باغچه چایرنده رکز اولنان اردوگاهنه داخل اولدی

برقاج کون مرورنده پدری ایله آت اوزرنده لدی الملاقات سلطان بایزید حضر تلی
 شاه اسماعیلک متغلبانه اطوارندن شکایت و (سنى سردارا يدوب کوندرديم) ديه رك ضميرنى
 يوقلمغه مبادرت ايتدکده بو امر عظيم بلا سلطنت قابل تنظيم دکلدرد جوائى المغله خواه
 ناخواه تحت سلطنتى سلطان سليمه تسليم ايدرك عزات کزين اولمق اوزره خواص خداميله
 مالقرديه عزيمت ايلدى ايسه ده اثنای راهده التمش التى ياشنده وسلطنتک اوتوزايکنجى
 سالنده واصل خلدبرين اوله رق جسد شريفلى جامع لامع الانوارلى پيشکاهنده واقع
 تر به مخصوصه لرینه دفن اولندى عمارت عامرهلرنده الآن محفوظ اولان وقفیه لرنده مسطور
 اولدینى اوزره جسد شريفلى حضرت خالد جوارنده مقابر مسلمينه دفن اولنوب
 اوزرينه قبه بنا اولنماق جمله وصيتلرندن ايکن نه مطالعه يه مبنی اجرا اولمدينى تحقيق
 قلنه مامشدر

ايکنجى فصلک تکمله سى

تيمورك صدمه سى جسم دولته اغرياره لر اچديغندن اعاده عافيت اقبال قولای شى دکل
 ايکن مجدد دولت القابنه لایق ومظهر اولان چلبى سلطان محمد مرحومک اقدام وغيرتى
 وتوفیقات الهیه يه مقارنتيله التيام پذير اولمشدر چونکه تيمورلنک آيدین وقونیه وقسطمونى
 وکوتاهیه اياتلرينى حکمدار سابقلرينه اعطا ايتمکله اناطولى قطعه سنده ممالک عثمانیه ازميد
 وبروسه وباليکسرى وانقره وآماسیه سنجاقلرينه منحصر قالوب يلديرم بايزيدک فعدانيه
 شهرادکان دخی برى برینه دوشدکلرينه وطوائف ملوک ايله استانبول ايمپراطورلى عثمانلى
 اوجاغنى سوندرمک وتکرار فرصتياب قوت مکنت اوله بيلملىرى منع ايتمک ايچون قولاً
 وفعلاً مقتدر اولدقلى افسادات واضرارأتى اجرادن برآن کيرو قالمدقلىرينه مبنى ممالک
 عثمانیه اون سندن متجاوز مقساتلات دائميه ايچنده قالمشيدى اگرچه روم ايلي قطعه سى
 تيمورك پازده خيول يغماسى اولمدي ايسه ده اناطولى اعانه سندن محروم قالدیغندن سالنیک
 وصرستانک بعضى لرلى دن چيقدقندن ماعدا ويرکو اعطا ايتمکده اولان ملوک متجاوز
 عيسويه معاملات سرکشانه يه متجاسر اولوب فقط جناب حقک لطف و احسانيله قوصوه
 وادرنه محاربه لرلى مثالو اهل صليب هيئتنده اتفاق عمومى ايله هجومه قدرتياب اوله مديلر
 واکثريا دولتلك بويله پريشانلقلى زماننده ارباب قدرتدن بوانان ولایه وامرا دعواى
 استقلاله نصدى ایده کلشیکن وروم ايلنده اورنوس بک وميخال بک خاندانلىرى کبی حشمت
 وقوت صاحبي امرا موجود اولدینى حالد هيسچ بريسى بو طريقه کيتمديلر وولى نعمت

زاده لرینه خیانت ایتمدیلر برده جناب حق هر قبالغك ایچنده بعض محسنت دخی خلق ایده کلدیکندن تیمور وقعه سی دولت علیه نك انتباه وتجددینی موجب اولدی چونکه یلدریم بایزید خان عصرنده زیب وزینته وهوا وهوسه میل ورغبت علامتلی ظهوره کلمکه کوندن کونه ایلرولیه جکی وبایزید خانك وفاتنده بیوک شهزاده امیر سلیمانك قاعده جالس تحت دولت اوله جغی درکار وشهزاده مشارالیهك احوال تن پرورانه سی ایسه ثابت وآشکار ایدوکنندن عواقب امورك وخامق ملحوظ ایدی لکن یلدریم خانك بوصورتله قتدانی شهزادگانك تفرقه سنی استلزام ایدهرك قاعده بوزلمغه وچلی سلطان محمد مر حوم ایله امرا ووزراسی حصول مطلبه قدر انواع فلاکت ومشقت ودرلو درلو مخاطره ومقاتله ایچنده بولهرق جفا کشلکه ازسرنو الفت ایلمکه مزاج دولته عارض اولان طورغونلق زائل اولدی

بووجهله چلی سلطان محمد مر حوم دولتی یولنه قویدقدن ومراد ثانی حضرتلری دخی تیمور وقعه سنده اولان ضایعاتك اکثریسی استرداده موفق اولدقدن صکره اواخر سلطنتنده وارنه وایکنجی دفعه اولهرق قوصوه محاربه لری کبی ایکی جسم میدان جنکنده نائل فوزوظفر اولدیغندن هیبت شمشیر عثمانی دوست ودشمنه هیبت مدهشه سابقه سیله عرض دیدار ایلدی

فاتح حضرتلری دخی مرکز استقرار دولت اولان استانبولی ومتعاقباً صربستان وهزسك وبوسنه یی وموره نك برجیه یله طربزون وقریم ومدللوی حوزة حکومتیه ادخال وقونیه نك ضبطیه نصب کرده تیموری اولان طوائف ملوکک الغاسنی اتمام ایدوب صاحب ظهورلق دعواسنده بولان حسن طویلی دخی تأدیب وتنکیل ایلمکه سلطنت سنیه نك شان وشهرتی وغلبه وعظمتی ولوله انداز جهان اولمشدر

یلدریم خان مرحوم استانبولك فتحی قوه قریبه یه کتورمشیکن تیمور وقعه سی سبیلله تأخر ایدوب الی ایکی سنه مرورنده فتح اولمنسه باقلانجه تیمورك صدمه سی دولت عثمانیه نك اعتلاسنی اولقدر زمان تأخیر ایتمش اولدیغی علی طریق الموازنه استدلال اولنسه بحاجدر

فتوحات عثمانیه ایکی نوعه منحصر اولوب بریسی دولت عثمانیه جه ودیگری ملت اسلامیه جه فتحدر شق اول ذاتاً اهل اسلام طرفندن فتح اولمنش اولدیغی حالده مؤخرآ سلاطین عثمانیه جانبندن ضبط قلنان وشق ثانی هنوز اسلام اله کچمیان یرلرک فتحی اولوب بونوعی ایسه اك زیاده مشروع وممدوحیدر وفاتح حضرتلرینك اکثر فتوحاتی دخی

بوقیلدن وزلال شرع شریف حضرت نبوی بی جریان سبقت ایتیان ممالکه اجرا ایلک موفقیتی جمله سندن اولغله بحق ابوالفتوحات والمغازی لقب جلیلی حائز اولمشدر سلطان بایزید حضرت تلرینک اوان سلطتی پدر وفرزندینک زمانلرنده اولان حرکات سریعه وشدیده واجراآت مهمه وجسیمهیه نسبتله ایام سکونت وعطالت حکمنده وهله اواخر سلطنتی بتون بتون شورش ایچنده در چونکه مشارالیه درویش نهاد ورکوب ونزولدن محتجب برپادشاه اولوب فقط برادری سلطان جم اوروپاده بولندجه ممالک عثمانیهیه دخولندن بغایت وهمناک اولدیغندن خلقک نظر تحسینه مظهر اوله جق حرکاته نفسی تحت مجبوریتده کوردرک اوائل ساطنتنده بغدادنه سفر ایدوب کلی واقکرمان قلعه لرینی فتح ايله کشور بغدادن اوزرنده حکومت عثمانیهیه تأسیس وتأکید ایش ومؤخرأ مورمه جهته عطف همته هنوز تسخیر اولنه میان قلاعک ضبطنی استحصال ایش ايسه ده طقوز یوز تاریخنده سلطان جم وفات ایددرک ذهن بایزید خانیده غائله عظیمه اولان معنی مندفع اولدیغنه ویوقاریده مذکور اولدیغی وجهله کندولری دخی یاشنی الدجه ومبتلا اولدیغی برش وآفسیون کبی مکيفاتک اعصابنه تأثیری آرتدجه بتون بتون امور سلطنتی وکلایه تفویض ایلدیکنه مبنی شاه اسماعیلک ممالک عثمانیهیه نفوذی تزیاده باشلادی ونهایت شهزادکانک ظهور وخروجیه ترک سلطنت ایلکه مجبور اولدی

احوال ارکان دولت

فصل اول تکمله سنده بیان اولندیغی اوزره خداوندکار غازی زماننده نائل وزارت اعظمی اولان خیرالدین پاشانک ارتحاننده اوغلی علی پاشا وانک دخی وفاتنده کذلک اوغلی ابراهیم پاشا واودخی فوت اولدقده ینه اوغلی خلیل پاشا وزیر اعظم اولوب یکرمی بش سنه دن متجاوز پایدار اولمشیکن استانبول ایمپراطورینک مخلص اولوق وفتح قسطنطنیه خصوصنده ارائه مشکلات ايله عوق وتأخیره سعی ایتک تهمتیه عقب فتحده قتل اولندی بونلرک دردی دخی اصحاب فضل وکالدن وتشکیل دولت وتوسیع مملکت خصوصلرنده خدمت وصداقتلری مسبق ذواتدن اولوب ایچلرندن علی پاشا هوا وهوسه میل ايله مشهور ایدیسده تدبیر امور ملکیده دخی ماهر ایدی انجق بوخاندانک مدت وزارتلری طقسان سنه قدر ممتد اوله رق علی التوارث نائل مقام وزارت عظمی اوله کلدکلرینه مبنی شجره سلطنتک برشعبه سی حکمنده کورلدکارندن وبو ايسه استقلال سلطنته مخالف اولدیغندن بشقه خلیل پاشا فاتح حضرت تلرینک ابتداکی ساطنتلرنده خلغنه سبب مستقل

اولوب باخصوص خواجه تاریخنک روایتته نظراً سلطان مراد ثانی حضرتلری حین احتضا-
رنده فاتح حضرتلرینی وصی مختار و خایل پاشایی نظارته اختیار ایلمسی خاندانلرینک منشأ
اضمحلالی اولمشد .

بعد زمان محمود پاشای ولی روم ایلی بکلیر بکیلیکله معاً منصب وزارت عظمی یه نائل
واون بش سنه قدر خدمات مرغوبه ابرازینه موفق اولدقدن صکره قونیه سفرلرنده
قرمان اوغلی خاندانی طوتمق ممکن ایکن مروتمندانه حرکت ایلمک تهمتیه معزول وایکی
سنه مرورنده ینه مقام اولنه موصول اولوب حسن طویل انهرامندن صکره حضورهایونده
عقد اولنان مجلسده اکثر وزرا پادشاه حضرتلرینی تعقیب دشمنه سوق ایلدکلری حالد
محمود پاشا طرف خلافتده بولنوب اوزون حسنک بوسده دن صکره بریده طور مق
احتمالی اولدیغندن طاغیر باشنده وقت کچوره جکی بدیهی اولسنه نظراً تعقیبی بر فائدهی
منتج اولیه جنی مثلوممالک اسلامییه غارت واهالیسنه ایصال ازیت دخی پادشاهمیزکی دیانت
وعدالته موافق دکلدر دیمکله عودته قرار ویرلشیدی لکن خصمائی اگر حسن طویل
تعقیب اولسنه اله کچمک مقرر ایدی دیو سلطان محمدی اغضاب ایلدکارندن تکرار عزل
ایله ادرنه جوارنده واقع خواص محمود پاشا دینلان محله اقامه قلندی .

برمدت مرورنده قونیه والیسی شهزاده سلطان مصطفی فوت اولدقده تغزیه ایچون
استانبوله کیمکله خصمائی تکرار نائل اقبال اولمسندن خوفه دوشوب محمود پاشانک شهزاده
مرحوم ایله بینونت قدیمه لرینی دخی بیلدکارندن وفات شهزاده دن نمون اولمشد زمیننده
القائه مسارعت ایلدیلر

لدى التفحص اولوقته مرعی اولان ایام ماتم تمام اولدیغندن البسه ماتمی چیقاروب شطرنج
اویونیه مشغول ایدوکی تین ایسکله قرق کون یدی قلهده حبس بعده قتل اولندی .
بوندن صکره خدمت وزارت عظمی حقیقه الوزرا نامیه مشهور اولان رسالهده بیان
اولنان ترتیب وجهله دیوان هایونده بولنان وزیریه تفویض اولنه کلمشد مقتولین مشار
الیهمایه اوچنچی اولق اوزره انواع خدمات جلیله سی مسبوق اولان کدک احمد پاشا وائل
سلطنت بایزید خانیده ادرنده عطف تیغ تلف اولمشد شویله که احمد پاشا سلطان بایزیدک
بروسه حوالیسند جم سلطان ایله محاربه سی هنگامنده رکاب هایونه وارد ومقام صداقتده
قائم اولغله انواع التفاته نائل وایکنجی دفعه اوله رق خدمت وزارت عظمایه واصل اولمشیدی
دشمنلری مشار الیهی جم سلطان طرفدارغیله اتهام وانک بقاسی سلطان جمک سلطنتی
موجبد دیو سلطان بایزیدی اخافه ایلدکلرینه و بایزید خان حضرتلری قرنجه نیک بیله

رنجیده اولسنه راضی دکل ایسه ده جم سلطاندن بغایت وهماک اولدیغنه منی محافظه جان ایچون مشار الیهی قتل ایتمک مجبوریته حاصل ایدرک ترتیب اولنان برضیافت کیجه سی ختامنده بیچاره احمد پاشا کشته تیغ قضا اولدی .

ابوالفتح حضرتلرینک اواخر سلطنتلرنده قاضی عسکرلک اناتولی روم ایلی اعتباریه ایکی یه تقسیم اولندیغندن دیوان هایونده وزیر اعظم وبر قاج وزیر وایکی قاضی عسکر واستانبول قاضی و نشانچی ودفتردار ویکچیچری اغاسی وبلوک اغاری وخواجکان دیوان هایون موجود بولنور ایدی .

نشانچیاغک وظیفه سی دیوان هایوندن صادر اولان اوامر علیه یه نظارت ایتمک و توجیهات عسکریه که تیمار وزعامت توجیهاتیدر انلری قانون و نظامی دائره سنده جریان ایتدیرمک و ممالک مفتوحه نک تحریرینه اعتنا ایلمک قضیه لری اولوب حاصلی صکره دن کسب تمیز و تحیز ایدن رئیس لک منصبیه دفتر امانتک وظائفی جائز و رئیس ودفتر امینلری انک معیتنده ایدی .

بلوک اغاری یکچیچری و سپاه و سلحدار واورته بلوکلر دینلان علوفجیان یمین و یسار و اشاغی بلوکلر تعبیر قلنان غرباء یمین و یسار اوجاقلرینک اغاری اولوب دیوان هایون خواجه لری دخی شمدی اردو محاسبه جیسی دیدیکمز مأموریتلره عائد وظائفی رؤیت ایدن بلوکات مذکوره کاتبلری و بکله کجیلک و مکتوبجیلق و واردات و مصارفات محاسبه جیلکلری مقامنده بولنان ضابطان اقلام دیمکدر مراتب دولته وصولک یولی دخی شو ووجهله ایدیکه دوشیرمه چوجاقلرینک و سفرلرده النان اسرا اطفالنک کریده لری افراز وادرنه و بروسه و کلیولی و غلظه سرایلرنده تربیه و تلقین شرائط اسلامیه اولندقدن صکره سرای پادشاهی یه النور و برمدت خدمت هایونده بولنوب لیاقتنه کوره کسب درجات ایدرک بعده بلوک اغاقلرندن و یاخود اوزنکی اغاقلرندن که میر علم و میراخور اول و ثانی و قیوچی باشیقندن کنایتدر بریه چراغ اولوب بر زمان دخی او خدمتلرده اثبات لیاقت ایتدکدن صکره حالرینه کوره میرلوالق و یاخود بکلر بکیاسکله طشره یه کوندربلور و بروقت دخی اداره ملکیه واردولر معیتنده احوال حربیه یه کسب و قوف ایدرک بعده طالعی مساعد اولوبده خدمات جایله یه موفق اولور ایسه منصب وزارت ایله اکرام قلنور و دیوان هایونده قاعد اولور ایدی نشانچی ودفتردار کبی ارباب قلمدن و طریق علمیه دن و طوائف عسکریه ایشکذارلرندن دخی قطع مراتب ایدرک نائل وزارت اولنلر وار ایسه ده اکثریتی بالاده بیان اولنان طریق ایله اولدینگی ترجمه حاللرندن معلومدر

اولوقتک وزیراسی عصر من اصطلاحیجه سردار اکرم دیمک اولوب لیکن بونلرک
ایکیشر اوچر بیک وبعضیسنک دهازیاده دأثرلری خلقی بولندیغندن برمقداری استانبولده
ساکن اولدقلری قوناقدہ وماعداسیلہ حیوانات وخیام وسائر اسباب سفریہلری استانبول
خارجنده اولان چیقتلکلرندہ حاضر طوردرق برایش ظهورندہ ایچلرندن بریسی سردار
نصب اولنوب مثلاً اون یاخود یکریمی اورته یکیچری وسواری بلوکلرندن علوفیجان یمین
وغرباء یسار بلوکلری معینہ تعیین وکیدهجکی محاکم جوارندہ بولنان بکلر بکی ومیرلوالردن
دخی اقتضاسی درجه سی رفاقتہ مأمور ایدیله رک غایت سهولتله براردو تشکل ایدر ایدی
اکر صدر اعظم کیدر ایسه بریسی قائممقام اولوب بالذات پادشاهک حرکتی مستلزم سفر
ظهورندہ بریسی استانبول محافظه سنده وسفر روم ایلی طرفه ایسه بریسی دخی اناطولی
وعکسی تقدیرندہ روم ایلی محافظه سنده قالب قصورلری موکب هایون ایله عزیمت ایدر
ومعرکه کاهده ایجابی وجهله استخدام قنورلر ایدی

وبعض وزرا بالایحساب منصب وزارتدن عزل اولنهرق بکلر بکیلیکیله کوندردلیکی
وبعضیلری دخی بروجہ تقاعد برر سنجاق امارتیه مدافعه اولندیغنی واقع اولمشدر
خلفای عباسیه ده جاری اولان عادتہ توفیقا وزیر اعظملمره وکالت سلطنتده استقلالنی
مشعر اولمق اوزره مهر هایون اعطا اولنور ایدیکه حالا مرعیدر فقط اولوقت مهر هایون
یوزک اوزرینه محکوک اولمغله وزیر اعظملمر پارمقلرینه طقارلر ایکن صکرملری التوندن
اوزره کیسه ایچنده اوله رق جیبلرندہ حفظ ایده کلشلردر

دیوان هایون دخی بروجہ آتی عقد اولنور : ایام تعطیلیه دن ماعدا هر کون علی السحر
پادشاه انام دیوانخانیه چیقوب وزرا وارباب دیوان یرلو یرندہ طوردرلر اولا نوبت
پادشاهی که مهتر خانہ هایوندر چالینور عثمان غازی به سلطان علاءالدین سلجوقی طرفندن
طبل و علم وارد اولوب چالندقدہ غازی مشارالیه تعظیماً ایاق اوزرندہ طوردمش
اولدیغندن اخلافی دخی نوبت چالینور ایکن قائماً استماع ایدرلر ایدی فاتح حضرتلری
عصرندہ سلطنت عثمانیه دولت سلجوقیه کات اندر قات فوقه ترقی ایش اولدیغندن
بوقاعده عز سلطنته موافق کلامکله اکیوز سنه اول وفات ایدن سلطان علاءالدین سلجوقی به
تعظیماً قائم اولمق بیهوده دردیو ترک بیورلدی کذلک فاتح عصرینه قدر پادشاهلر وزرا
ایله برابر اوطوردرلر ایکن کدک احمد پاشا وزارتندہ اتراکدن بر مصلحتی دیوان هایونه
کیروب دولتی پادشاه قنغکزدر دیو کال غلظت ایله سؤاله جسارت ایتمکله موجب انفعال
پادشاهی اولدیغنی احمد پاشانک منظوری اولیجق بعدما پادشاهمیزک ورای قفسدن استماع امور

بیورملری اقتضای وقت و حالدن اولمشدر دیمکله وزرانک اوطوردینی محله ناظر اقامتگاه
هایون ترتیب و اوکنه قفس وضع اولندی

بروجه مشروح نوبت چالندقدن صکره امور مهمه دولته دائر اوراقی رئیس الکتاب
افندی او قویوب قراری درحال اجرا اولتور یعنی قنئی دائردیه متعلق ایسه خواجکان
دیوان هایون تحریر و ترقیم ایدوب بعده چاوشان و متفرقکان هایون ایله حاضر بولسان
چاوش باشی دعاوی عظیمه یه دائر اولان ارباب مصالحی طاقم طاقم دیوان هایونه
کتوره کله ایجابی وجهله محاکات اجرا و قنغیسنه عائد ایسه قاضی مسکرلر یا خود استانبول
قاضیسی جانبندن حکم شرعیسی ایفا اولندیغنی متعاقب اولا وزیر اعظم منفرداً و مؤخرآ
وزرا مجتمعاً و انلردن صکره ایام معینه سنده قاضی مسکرلر و یکیچری اغاسی حضور هایونه
کیروب امر مأموریتلرینه متفرع خصوصات وار ایسه عرض ایدوب چیقارلر و منصب
ویریله جک علما و امرایه خلعتلر اکسایله مأموریتلری اعلان قلنه رق دیوان تمام اولورکه
بواجرا آنک جمله سی ظهر وقتندن اول ختامه رسیده اولمغله ارباب دیوان یرلورینه عودت
وامور مأمورلرینه مواظبت ایدرلر وزیر اعظم وقت عصردن صکره کندو سراینده دخی
دیوانه چیقوب تذکره جیلری و سائر دائره سی خلقی متحیزانی و چاوش باشی ایله چاوشان
و متفرقکان اطرافنی احاطه ایدرک دیوان هایونه متحمل اولمیان مصالحی رؤیت و اقتضا
ایدن یرلره حواله سنی امر ایتمکله صادر اولان امرینی تذکره جیلر آیاق اوزرنده بولندقلری
حالد عرض حال بالالرینه و یا خود بیاض اوزرینه تحریر و ترقیم ایدرلر ایدی .

تأسیسات و ترقیات

استانبولک فتحیله دولت عثمانیه مرکز استقرارینی استحصال ایلش اولدیغندن شهر
مذکور پای تخت اتخاذا اولنه رق اولاسکی سرای صکره یکی سرای اعمار و انشا اولندیغنی
مثللو فاتح و سلطان بایزید مرحوم و وزرا و امرالری ناملرینه منسوب اوله رق الان باقی
اولان جوامع و مدارس و حمام و مکتب مثللو خیرات و مبرات ایله پیدرپی مملکتی تزیین
ویکیچری قشله لری ایله عصر مزک اصطلاحنه کوره مکتب اعدادی دیمک اولان و دیو-
شیرمه چو جقلرینک تربیتکاهی بولنان عجمی اوغلنلر قشله سنی انشا ایلدیلر .

جمعیت عظیمه یی حاوی اولان موکب عثمانی درون استانبولده توطن ایدوب قونیه
و اناتولینک سائر موقعارندن خلیجه نفوس دخی نقل خانه ایتدیریلهرک اسکان قلندیغندن
از وقتده معموریت عظیمه حاصل اولدی .

چونکه روم مورخ لرینک بیاننه کوره قبل التسخیر استانبولک نفوسی تقریباً یوزاللی یوز التمش بیک راده لرنده اولوب درون سورده اون درت قصبه و اونقدار اداره بلدییه موجود اولمغله مذکور قصبه لک ارالر ی باغلق و بغچه لک ایدی که ابن بطوطه نیک بالمشاهده روایاتی دخی بونی تأیید ایدر روملرک برازی اثنای محاربه ده تلف اولوب بعضیلری دخی فرار ایلش ایسه ده اکثر بیسی قبول رعیت ایله یرلرنده قالدیغندن فاتح حضرتلری امور روحانیه و مذهبییه لرینی رؤیت ایتک ایچون بطریق انتخاب ایتدیرتدی و تشریفات مطنظنه ایله صورت مأموریتنی و امتیازات متمتضیه یی حاوی برات عالی احسان ایلدی حتی روم ایمپراطورلرینه مخصوص اولان جسیم و مکلف فراجیه که حالا یطریقار مواقع رسمیه ده تلبس ایدرلر انی دخی اکسا ایلدی جوامع شریفیه ته تحویل اولنانلردن ماعدا یعنی روملره کفایت ایدمک مرتبه ده بولنان کلیسالری دخی یدلرنده ابقا بوردی .

استانبولک طرف بریسی ذاتاً حوزه حکومت عثمانیه یه داخل و سرحد عثمانی ایسه ایکیوز ساعتک مسافه دن متجاوز اولدیغندن بشقه روم ایلینک کافه بلدانی اول عصرک استحکاماتی حاوی اولمغله برآ استانبوله دشمن کله بیلیمک مستحیل اولدیغنه و قره دکنر بوغازی روم ایل و اناطولی حصارلریله مسدود اولدیغنی مثلوق دکنر بوغازی دخی قلعه سلطانیه و قارشوشنده واقع قوم قلعه نیک انشاسیله ترصین و تأمین قلندیغنه مبنی استانبول سورینک تحکیم و تعمیرینه چندان التفات اولنماشدر .

روم دولته ضعف طاری اولدقجه ایمپراطورک وارکان دولتک تعظمت و تزیناتی ترقی یدرک قوری بر دبدبه و داراته و انواع تشریفاته مستغرق اولدقلرندن سلطنت سنیه استانبول تحتیه مالک اولدیغنی مثلوق بونلر دخی وارث اولدی که سورغوجلر و صولاق و پیکرودرلو درلو البسه لر ایله آایلر اوجمله دندر حتی افندی تعبیری بیله روملردن مأخوذدر .

سلاطین عثمانیه حضراتنک جمله سی اگرچه علوم و معارفک انتشارینه اعتنا ایدرلر ایدی لکن فاتح حضرتلری بو خصوصه بالذات اقدام و همت بیورمغله بروسه و ازنیق و ادرنه و استانبول مدرسه لرنده هر نوع فتونده ماهر اصحاب فضل و کمال یتشمکده اولدیغندن ماعدا خارجدن دخی پک چوق علما و ارباب معارف جلب ایدمک اولعصرده بولنان دول متمدنه نیک برنجیسی اولمشدر علمای اعلامک تفصیل احوال و تألیفاتلری مشهور و ترجمه شقایقه مسطور اولمغله تفصیلدن مستغنی اولدیغنی کبی فاتح جامع شریفنک معماری معمار ایاسک و سلطان بایزید جامعنک معماری معمار کمال الدینک مرتبه معلوماتلرینه اثرلریله استدلال اولنق طبعیدر .

فاتح مرحوم استانبول محاصره سی ایچون دو کدیردیکی ایکی عدد بیوک طوپ که اولعصره قدر امثالی کورنامشدر. بریسی اوریان نام بر بحار مهندسک دیکری صاروجه اسمنده بر یکچرینک عملیات ماهرانه لرندن اولدینی مفصلات توارینخده محرر اولدینی مثللو خاقان مشار الیهک اضاعه قوالیب اقتدار ایلدیکی طویلردن بر خیایسی آلآن قلعه سلطانیهده موجود و بریسی ویده و کجه و غایت مصنع ایدوکی مشهود اولوب خبارده ایجادی دخی فاتح مشار الیه مسند و اشقودره محاصره سنده اعمال و استعمال قلندینی روایت کرده ثقاتدر

کدک احمد پاشا ایتالیا سواحلنده واقع اقرانته دوقه لغنی ضبطایتد کده کوزل برقلعه انشایتدیرمش اولدیغندن کندوسنک بالاده مسطور اولدینی اوزره رکاب هایونه عودتندن صکره ایتالیا نلر بوقلعه یی تسخیر ایدنجه یه قدر پک چوق زحمت چکوب سینی لدی التحریر صنایع انشایه سندن اولدینی استدلال ایلریله فن استحکاماته اساس اتخاذا اولنمش ایدوکی ومؤخرأ ایتالیان وفرانسز مهندسلری جانبندن فروعاتنده جزوی تصحیحات وقوعبولمش ایهده اس اساس استحکامات بو کونکی کونه قدر کدک احمد پاشا استحکاماتی اولدینی فن مزبور علماسندن پروسیالو بیرو نام مؤلفک علوم متنوعه مجموعه سنده و سونین نام روسیه مهندسی کتابنده ودها سائر استحکامات جسیمه کتابلرینک مقدمه لرند تصدیق و اعتراف اولنمشدر.

اسلحه ناریه کوندن کونه تصلیح و استعمالی تسهیل اولنه رق جیوش عثمانیه تسلیح قلمغله سلطنت سنیه اردولری هم عساکر موظفه و معلمه یی وهمده اسلحه جدیده یی حائر اولوب دول متجاورده ایه هنوز عساکر موظفه تشکیل و لایقیله اسلحه جدیده تنظیم اولنمدیغندن موکب عثمانی دنیانک الک منتظم اردوسی دینمکه شایان ایدی.

صنایع و حرف دخی ایلرولوب اقمشه متنوعه و قالیجه و صوف و چینی انواعی معمولات حد کماله واصل و حالا بروسهده واقع چاپی سلطان محمد مرحومک جامع و تربه سنده اولان بنظیر چینی لرکه کورنلر علی العموم تحسین ایدرلر دلی محمد نامنده بر استادک اثر مهارتی اولوب عاملی اولان مرقوم وضع ایتدیکی (عمل محمد مجنون) امضاسیله ابقای نام ایلشدر.

اداره ملکیه خصوصنده دخی حکیمانه و موشکافانه قانون و نظاملر وضع و حتی استانبول خایجنگ طولماسی مقصدیله کاغد خانه طاغاری زراعتدن منع اولنه رق آیرق کوکی اکدیلمش و بویله جه جزئیاته بیله اعتنا قلمشدر.

دولت علیه‌نک برنجی دوشندیکی شی نفوس اسلامیه‌نک تکشیری و باخصوص روم
ایلیده توفیری قضیه‌سی اولقله بوسنه و ارنابودلق جهتلی اهلینک دین اسلامه داخل
اولملری امرنده پک بیوک همت و مساعی صرف اولنوب ثمره خیره‌سی دخی اقتطاف
اولنمقدمه اولدیغی کبی اناتولینک مواقع مختلفه‌سندن خلیجه عشائر و قبائل روم ایلی‌یه
کچیریلوب بالقانلرده و دوبریجه و هرسک و سلانیک طرفلرنده اسکان قلمشدرکه فتحان
نامیله الآن سلانیک طاغلرنده مقیم اولان یورکلر دخی بونلردندر.

بر طرفدن دخی هر سنه معتاد اولان دیوشیرمه چوجقلری و سفرلرده النان اسرا
ملت اسلامیه‌یه التحاق ایده‌کلدیکنندن یومآفیوماً اهل اسلام قوت و کثرت حاصل ایدرایدی
دیوشیرمه چوجقلری سنوی بش‌القی بیک نفردن عبارت ایهده اسرانک مقداری
پک زیاده اولوب حتی فاتح مرحوم اوزون حسنه غلبه ایتدکده شکرانه مظفریت اوله‌رق
جمیع ممالیکم آزاد اولسون دیمکله لدی‌التحقیق قرق بیک نفره بالغ اولدیغی تحقیق‌کرده
ثقة مورخین اولمغله وزرا و امرا و طوائف عسکریه‌نک اللرینه کچن اسرا بوندن قیاس
اولنه بیلیر.

چونکه مملوک پادشاهی بولنان اسرا خمس شرعیدن مجتمع اولسنه نظراً اولعصرده
ملت اسلامیه‌نده ایکی یوز بیک اسیر بولندیغی استدلال قنور.

احوال عسکریه

قبو قولی دینلان طوائف عسکریه‌نک پیاده‌سی اولان یکچریلره مؤخرأ احداث اولنان
طوپجی و خمیره جی و لغمجی و جبه جی بلوکلری الحاق قلندیغی مثلوسوارسی بولنان سپاه و سلحدار
بلوکلرینه دخی علوفجیان یمین و یسار غربای یمین و یسار نامیله درت بلوک علاوه قلندی
ممالک عثمانیه توسع ایتدکجه تیمار چوغلوب تیمار ایلدکجه ایالات عسکری اولان
تیمارلو سپاهیسی تزايد ایلکله سلطنت سنیه هر قنغی طرفه اولسه قولایقله یوزبیک منتظم
عسکر سوقنه مقتدر ایدی.

باخصوص ملت اسلامیه‌نک قدرت بذنیه صاحبلی علی‌العموم جهاد ایلهم‌امور و مکلف
اولدقلرینه و روم ایلینک اکثری طرفلرنده توطین اولمش اولان ترک و تاتار قیللری
و ارنبودلغک بعض مواقعی اهل‌سی زراعت و حرثله مشغول اولیوب عثمانلیق مسلک‌کننده
یعنی وزرا و امرا دائرلرنده ماهیه‌لو اوله‌رق خدمت عسکریه‌ده و برطاقی دخی سرحداتده
مقیم اولان اقینجی بکلری معیتلرنده بولندقلرینه مبنی اهل اسلامک قسم کلیسی عسکرلک.

محتاج اولدینی ارباب حساب و تدقیق طرفدن بیان اولمقده ایدوکنه باقیلور ایسه مبلغ مذکور عصر مزه کوره کلیتو مبالغ دیمک اولدیغندن معین اولان علوفه دن فضله یوقدر اقیچه اقراض و هبه ایلک اقتدار مالی بی معین اولدینی کبی فاتح عصرینه قدر مسکوکات عثمانیه کموش اقیچه په منحصر ایکن مشارالیهک بحار اتونی وزن و عیارنده التون قطع ایتدیرمش اولسی دخی ثروت دولت علیهک ترقیسنی مؤیددر سلطان بایزید مرحوم اماسیه و استانبول و ادرنده جوامع و عمارات و عظیم متفرعات و کیوه قربنده سفریه نهری اوزرنده جسیم و کار کیر کوپری و سائر خیرات و مبرات انشاسنه موفق اولمش ایسهده اواخر سلطنتده مضایقه مالیه حادث اولوب دونماتدارکی ایچون فوق العاده اوله رق استانبول و بعض شهرلر اهالیسنه ویرکو توزیع و مؤخرآ ترک اولدینی بعض تواریخده مسطوردر جق اول عصرده بر آیدن متجاوز استانبولده زلزله واقع اولوب پک چوق کار کیر ابنیه منهدم اولمغله پادشاه ایچون چاقمه یعنی اخشاب دائره لر بنا اولندی و سلطان احمد جمع شریفنک بولندیغنی موقعک الت طرفنده کون کورمز کلیسا دیمکله معروف اولان و باروت مخزننی اتخاذا قنسان ابنیه رصینه په صاعقه اصابتله بر هوا اولوب جوارنده بولنان بیوتی و درت بیک نفوسی افنا ایلسی شامت مظالمه حمل اولندیغندن ویرکوی مذکورک سبب تأخیری اولمشدر لکن بوه مضایقه ضروری الوقوع برشی اویوب موقت و سوء ادا ددن منبعث ایدوکی فصل آتی مزایاسندن معلوم اولور .

احوال خارجیہ

ممالک دولت علیه په مجاور اولان دولتلر آسیاچه ایران و مصر و اوروپاچه و ندیک و بحار وله دولتلرندن عبارت اولمغله بونلرله و فو عبولان معاملات خارجیہ بروجہ آتی بیان اولور: تیمورک ممالک عثمانیه په هجومه قدر سلطات سنیه ایله ایران حکمدارلری بیننده معامله خصمانه ظهور ایتماش ایدی وقعه مزبورده دن صکره دخی دولت علیه ا کمال ضایعاتله مشغول و ایران حکمدارلغی کاه قره قویونلی و کاه تیمور اولاد و احفادی ید اقتدارلرینه موصول اولمغله مناسبت واقع اولدقچه ارسال رسل و رسائل ایله دوستانه امرار وقت اولور ایدی .

وقتا که فاتح عصرنده آق قیونلی طائفه سندن ابوالنصر دینلان حسن طویل ایران ملوکنه غلبه ایدرک کسب عظمت و شوکت ایلدکده تیموریانه طور ایله سرحدات عثمانیه بی تجاوز و متعظمانه مکتوب ارسالنه جرأت ایتمکله فاتح مرحومک سیف سطوتیه لوای

استدراجی سرنگون اوله رق غائله سی بر طرف اولدی چوق زمان کچمکسزین کندوسی
ومؤخرأ اولاد واعقابی نوش پیالہ مرک ابله وادی عدمه روان وشیش صفی اردبیلی
اولادندن شاه اسماعیل اشاعه مذهب شیعی و آبا واجدادی مریدلرینک فداکارانه اقدام
وغیرتی ثمره سیله تحت نشین ایران اولدی .

شاه مشارالیه هم صاحب مذهب وهمده حکمدار ذیقدرت اولدیغندن ایشنی ایکی
طرفلو طوته رق اولانا طولی ایچنه ارسال نقبا ایله خلقی مذهبنه دعوت وکایتلو مرید
پیدا ایلدیکنه شیطان قولی دینلان شقی دخی انلردندر .

ممالک شاهانده اول درجه ده درریش وقلندر صورتنده اشیخاص چوغالدی واول
مرتبه ده پادشاه اسلامه واهل سنته عداوت ومتبوع خفیلری اولان شاه شیعه یه فداکارانه
نصرت وخدمت ایدرلر ایدیکه تعریف اولنمز حتی سلطان بایزید مرحوم ارنبودلق
سفرندن عودت بیوردقلرنده آلایلہ ادرنه یه کیرر ایکن برطار سوقاقده قلندر هیئت
برلئیم سل سیف ایله هجوم ایدوب رکاب هایونده بولنان بندکانی طاغتمغله آرقالدی واصل
مرام اوله یازدی هله پادشاه ایله هم رکاب اولان اسکندر پاشا ضرب دیوس ایله مزبورک
باشنی ازدی .

بناءً علیه بومثللو اجلافک ومذهب شیعه متبعلرینک طرد ودفعلرینه تشبث اولندی
ایسه ده بومطلبک حصولی برقوة قاهره یه محتاج اولوب علاوة رحم وشفقتله اولور بتراموردن
اولمدیغندن رفع ودفعلری شویله طورسون کوندن کونه تکثر وتزاید ایلدیلر وارکان
دولتدن بعضیلری بیله مذهب مزبور محبت خاندان نبوی اولمق زعمیله درونی میل ومحبت
باشلادیلر بوحالمرسلطان بایزیدک انزواسی ایامنه دخی تصادف ایتمکه شاه اسماعیل اسکداره
قدر ضبط ایلمکی قوروب حدود اوزرنده طولاشمغه باشلادی ودوات علیه دخی حسن
مدافعه یه وچول بهانامیله اقچه وبوغچه ویردرک دفع ایلک تشبثنه مجبوریت تحتنده بولندی
بوحالمره نظراً روزکارک نه نتیجه ویره جکنه انتظار اولنورکن زمام امور سلطنت سلطان
سلیمک یداقتدارینه کچهرک هوا بردن بره دیکشدیکه تفصیلاتی ان شاءالله تعالی عصر آتی
فصلنده ایراد اولنور .

بغدادده خلفای عباسیه منقرض اولدقدن صکره آل عباسدن مصرده خلیفه انتخاب
اولنوب سلاطین مصریه انلردن تقلد سلطنت ایدرلر ایدی اگرچه خلفای مشارالیم
امور حکومتیه مداخل دکلر ایسه ده خلافتلری عموماً ملت اسلامیه جانبندن مصدق
اولمعه ملوک اسلامیه نک اکثریسی حکومتلرینی شرع شریفه توفیق ایلک مقصدیله خلیفه

عصر درن اجازت نامه آله کلدکری مثللو سلاطین عثمانیه حضراتی دخی قاعده عمومیه مذ کوره بی ایفا و بومناسبتله سلاطین مصریه ایله رسم مراسلات و موالاتی اجرا ایدر لر و فتوحات جسیمه و قوعنده تبشیر نامه لر و غنایم دن هدایای مناسبه کوندر لر ایدی حتی سلطان مراد ثانیك وارنه مظفریت عظیمه سنده ارسال ایلدیکی هدایا ایچنده یکر می بش نفر آهن پوش اسیر بولندیغدن غزوه مزبورده نك اهمیت و صلاحتی بولردن استدلال اوله رق اول هفته منابرده (الله ینصر ابن عثمان) دعاسنی ادا ایلدکری معتبرات توارینجده مسطوردر فقط تیمور نك كرك دوات علیه و كرك سلطنت مصریه نك دشمن محاربی ایکن و یلدریم بایزید خان ابله سلطان مصر بیتنده بو باده مخبره جریان ایلدیکی حالدیه نیچون طرفینك حرکاتی یکدیگرینه توفیق اولنه مدینی حلی مشکل بر معمارد زیرا تیمور سکزر یوز اوج سنه سی سیواسی تخریب ایتدکن صکره شام و حلب طرفلرینه هجوم ایلدیکی زمانده سلطان بایزید دخی اذربایجان حاکمی طهرتن اوزرینه کیتمشیدی ظاهر حاله باقلنججه یلدریم مرحوم ملک مصرک اردوسيله برلشوب یاخود بری عربستان جانبدن و دیگری قونیه اوزرندن حرکت ایدرک تیموری اورته یه آلسه لر اغلب احتمال اوزره کسر تسلط و تغلبی الطاف سبحانیه دن مأمول ایدی .

اناطولیده واقع طوائف ملوک ممالکی ایکنجی دفعه یعنی فاتح عصرنده کاملاً حوزه حکومت عثمانیه یه داخل اولدقده ممالک مصریه ایله کشور دولت علیه بیتنده آل رمضان و آل ذوالقدریه حکومتلری قالمشیدی بولردخی جنکیز و قعسی سبيله و طنلرینی ترکه مجبور اولان قبائل اتراکدن اولوب آدنه و مرعش طرفلرنده توطن ایدرک تشکیل حکومت ایتشلر ایسه ده حکمدارلری استقلال کامله مظهر اوله میوب اکثریا مصر پادشاهلری طرفدن و بعضاً دخی دولت علیه جانبدن مذ کور خاندانلر منسوب و باتندن اوله رق ملتجی اولنلر بالاقدار مقام حکومته اصعاد اولنه کلدیکی جهتله بوندن طولای دولتین بیتنه استرقاب کیردیکندن فاتح مرحوم عربستان سفری نیتله حرکت ایلدیکی حالدیه و قوعوفاتی تأخیر عزیمتی مستلزم اولمشیدی متعاقباً سلطان مصرک جم سلطانه اعانه سی محرک غیرت بایزید خانی اولمغله کانون مقاتله فروزان اولمشیکن بروجه اشعار سابق مفتی عصر بولنان مولانا زین الدین عربینك سفک دماء مسلمیندن اجتناب اولنمق حقنده عرض ایتدیکی شاهد زیبای نصایح پادشاه حضر تلرینك آینه قلب حقایق آشناییلرنده دلا رام کور نمکین ترك مخاربه یه رضا داده اولوب دولتین بیتنده اولان شرره فتنه رقابت آغوش رمادده تستر ایلدی .

وندیک جمهوری مالک اولدینی قوه بحریه سایه سنده توسیع تجارت و ثروت و مندرس

اولان روم امپراطورلغى انقاضندن استفاده ايدرك كريد و سائر بعض اطه لرايله موردنك بر مقدار يرغنى تحت تصرفه المشيدى جيوش عثمانيه مورد و بوسنه طرفلرينه واصل اولدقدن صكره دوات عليه ايله محارباته مجبور اولدى ايسه ده موردده اولان مستمالكاتنى و دالماچياده واقع بعض سواحانى الدن چيقارمقدن و بوسنه عسكرينه و نديك شهرينه قريب يرلره قدر غارت ايتديرمكن بشقه برشى حاصل ايدميه رك محاربات بحريه ده دخى كليتلو ضايعاتنه گرفتار اولمغله غائب ايتديكى ممالكك استردادندن قطع اميد ايله طالب مصالحه اولدى اول عصر ك صالحلى ايسه عصر من معاملاتنه مقيس اولمديغندن كيفيت انعقادلرينك بيان و توضيحه ابتدار اولندى :

محارب اولان دولته يأس و فتور عارض اولدقده ركاب هايونه و اركان دولته و سرحدات امراسنه اياچي و هدايى مناسبه ارساليله استرحام ايدرك عفو پادشاهى يه نائل اوله بيلور ايسه مقام صدق و استقامتده دائم اولدقجه و مغاير مصافات حال و حر كتمده بولمقدقجه طرف سلطنت سنده دن مؤاخذه اولتميه جغنى متضمن فرمان على اعطا اولنوب انلر طرفندن سند اخذينه تنزل اولنمز ايدى .

چونكه فتح اولنان محلك استرداد احتمالى و ياخود حكومت دوات عليه يه ترك قلنديغنى تصديق ايتديرمك احتياجى مفقود اوله رق طرفينك زير حكمنه كيرمش بولنان محلك محتاج شرح و ايضاح اولمغله حدود تعيينى و برطاقم شروط و قيود بيانى تكلفنه لزوم بوغيدى مع مافيه اثنائى صاحده سرحدات آقنجيلرى فرصت بولدقجه چته يه كيتمك تعبيريله يكديكرى ممالكنه تجاوز ايدرك حيوانات و اسرا اغتنام ايلك ناقض مصالحه و موجب شكايات اولمديغنى بعضاً طرفين سرحد محافظلى بيننده بربرلى ممالكنه طوپ چكلمامك اوزره مقاولات وقوعندن استدلال اولنور كه طوپسز تجاوز ايدن چته جيلر تحت مساعدده بولنورلر بو حالله نظراً اول عصر ك مصالحه لرى يالكنز حر كات كليئ عسكر يه يي دافع بر نوع متار كه ديمك اولور .

دو برونك جمهورى كه راغوزه جمهورى دخى ديرلر ذاتاً و نديكلوردن امين دكللر ابكن دولت عليه نك بوسنه و ارناو و لوق طرفلرينه طوغرى ايلر و لديكنى مشاهده ايلدكلر ندم امنيت و آسائشى حمايه سلطنت سنيه ده بولملايله اوچ سنده بر كره يتمش بشيك قره غوش يعنى ريال و يركو و يرملك اوزره عرض اطاعت ايلدكلر ندن بشقه و نديك ايله هم حدود اولوق مضر تندن قور تلق اوزره ممالكتلرينك و نديك ممالكنه متصل اولان ايكي جهتنندن

تقریباً یازم و بر ساعت عرضنده بر خط آیروب جانب دولت علیه تسلیم ایشان
ایدیکه بو خطك بری قیلق و دیگری ستورینه لیمانلرندن بدأ ایله هر سك اراضیسنه منتهی
والآن تحت حکومت سلطنت سنیهدر مذکور جمهورلق درتیوز سنهدن متجاوز بو
حالد امین و سالم پایدار اولدقدن صکره بیک ایکی یوز اون بش تاریخنلرند فرانسه
ایمپراطوری بوناپارت طرفندن ضبط اولنوب صکره نیمچه لویه منتقل اولدی

دولت علیه روم ایلیك فتحیه مشغول ایکن طونه نك بو طرفنده بونان حکمداران
ملت عیسویه مجار قراللرندن استمداد ایده کلدکلرینه و مجار دولتی طونه نك قارشو
جانبده واقع و سلطنت سنیهدن اوزاق ایسه ده مطالعه انجام کار ایله مبتلای خوف و هراس
اولدیغنه مبنی حکمداران سالف الذکر پیشوا اوله رق بالدفعات هجوم ایدوب لکن ضایعاتدن
غیری بر شیده نائل اوله میه رق فقط طونه نك بو طرفنده واقع بلغرادی بر تقریبه اله کچورمش
وفوق العاده استحکام ایله تحصین ایدرك برسد سدید استحصاله موقق اولمشیدی عساکر
عثمانیه مرة بعداخری مجارستانی غارت ایلدی ایسه ده بلغرادك فتحی ممکن اوله مامسیله
کاه مصالحه و کاه محاربه صورتیه امرار وقت اولنمقده ایدی

افلاق امارتی یلدریم بایزید خان زماننده ویرکو اعطاسنه مجبور اولوب تیمور وقعه سی
سیبله و صکره لری بروجه آتی تشویقات ثمر سیله صورت مخالفتده کورندکجه جیوش
عثمانیه نك صدماتنه گرفتار و فاتح عصرنده بغداد مملکتی دخی سطوت سلطنت سنیهدن
خبردار اولمغله و باخصوص سلطان بایزید و اینك اوائل سلطنتنده بندر واقکرمان
قلعه لری فتح و تسخیر اولمغله مملکتین ممالك عثمانیه دن معدود اوله رق فقط والی تعینه
عدم تصدی ایله ایچلرندن و یوده انتخاب ایتدیریلور و معین اولان ویرکولری سنه بسنه
رکاب هایونه تقدیم اولنور ایدی افلاقك اول ویرکوسی قرق بیک التون ایکن بردنعه
وقوعبولان عصیانلری مجازاتی اوله رق سکسان بیکه ابلاغ قلمشدر

له دواتی مملتینك حکومت عثمانیه ارتباطی بروجهله هضم ایده مامکله بعضاً و یوده لری
تشویق و بعضاً دخی سوق عسکر ایله متشبت تفریق اولدیغندن کرک عساکر تاتار و کرک
سرحدات عثمانیه امراسی پک چوق کره لهستانی غارت و یغما ایلدیکنه بناء له دواتی دخی دولت
علیه ایله دوام مخاصماتده تزیید ضرردن بشقه بر شیده مقتدر اوله میه جغنی تیقن ایدرك رکاب هایونه
وقریم خانه و سرحد امراسنه ایچه و بوغچه لر تقدیمیه عهد و امانی مشعر فرمان هایون استحصاله
موفق اولدیکه بونلرک دها زیاده تفصیلاتی انشاء الله تعالی درجه درجه فصول آتیهد ایراد اولنور

باب ثالث

سکز یوز اون سکز سنه سنده واقع یاوز سلطان سلیم جلوسندن بیک اوچ تاریخنده
مرتحل دار آخرت اولان سلطان مراد ثالثک اواخر سلطنته قدر اولان سکسان
بش سنهک وقوفاتی متضمندر

یاوز سلطان سلیم خان حضرتلری اکرچه طوائف عسکریه نک طلب واستدعالری
اوزرینه نائل سلطنت اولدی ایسه ده قبل الجلوس یکی بغچه چایرنده خیمه زن اقامت
ایکن امرای عسکریه ایله عقد مقاوله ایدوب امور سلطنته مداخله وخلاف ادب حرکت
ایتمه جکلرینه وامرندن چیقمیوب ارباب جنایتیه صحابت ایلمه جکلرینه عهد وامان الهرق
بوشرطلر ایله قبول سلطنت ایشیدی معتاد اولان جلوس بخششی ایله ترقیاتک اعطاسی
اثناسنده برمتعین بک وبریکچیری و برسپاهی طور ادبدن خارج حرکاته تصدی ایلدکلرندن
اوچنی دخی صلب ایدرک اجرای شروط مقاوله یه بوندن بدأ ایلدی

شهزاده مکرملری سلطان سلیمانی کفهدن جلب ایدرک استانبول محافظه سنه بالتعین
کندولری یکریمی بیک قدر عسکر ایله برادرلری سلطان احمدک اناطولیده اولان تسلطنی
دفعه عازم اولدی چونکه بایزید خان مر حومک جمله وصایاسندن بریسی بلاموجب
برادرلرینه سل سیف ایتمامک قضیه سی اولدیغندن پادشاه حضرتلری اثنای جلوسده
استانبولده بولنان سلطان قورقوده مدلولو سنجاغنی منصب قدیمی بولنان لواء صاروخانه
الحاقاً توجیه وانواع تکریمات ایله اعزام ایدوب لکن سلطان احمد نیل سلطنتدن
مایوساً اسکداردن رجعتیه مجبور اولدقده کمال غضبندن قونیه یی محاصره یه جرأت وپادشاه
عصره اعلان عصیان ومخالفت ایلدیکنه مبنی بالضروره انک دفع تساطی لازم کلشیدی
موکب هایون انقریه واصل اولدقده سلطان احمدک ملاطیه طرفلرینه طوغری
فرار ایلدیکی خبر النغله واوزرینه کیدلسه سلطان مصره دخالت ایده جکی آشکار بولنغله
بروسیه عودتله بالسهوله اله کچورلمسی تدابیرینه تشبث اولندی

بارکاه پادشاهی یه دخالت ایدن بش نفر برادر زاده لری اقتضای حکم عصره ووزیر
اعظم قوجه مصطفی پاشا سلطان احمد ایله نهانی اجرای مکاتبه ده بولندیغنه بناء اعدام
اولندکلرندن صکره کویا طوائف عسکریه بونلرک بلا موجب قتللرندن طولایی سلطان
سلیمدن روگردان و سلطان قورقودک جلوسنی خواهان اولق زمیننده سلطان قورقوده

اطواره اولسان محررات مصنعه شبهه دن وارسته طریق ایله شهزاده مشارالیه واصل اولغله بچاره شهزاده بونی صحیح ظن ایدوب برطاقم مواعیدی مشعر جواب یازدیغندن پادشاه شدیدالمشرب شکار شایعه سیله بغته بروسه دن حرکت ومغنیسایه صوات ایدوب سلطان قورقود اگرچه فرار و تکه ساحل لرندن کمی یه بنوب سلطان جم کبی صاوشمق آشیته ابتدار ایلدی ایسه ده یقه یی اله ویرمکه زمرة شهدایه الحاق قلندی

سلطان احمد دخی بومئلاو مکاتب مصنعه یه اعتماداً بروسه جوارینه جلب واطرافی احاطه اولنه رق در دست ایدیلوب انک دخی شهباز روحی اعلا ی علینه پرواز ایلدی اکثر مورخین شهزادگانک قولایاقله اله کچملرینی موفقیت سلیم خانیدن عد ایدرلر واکر بونلر شاه اسماعیل و مصر سلطاننه التجا ایاسلر سلطان سلیم هیچ برطرفه حرکت ایدمهز و نائل اولدینی فتوحاته مظهر اوله مزدی دیرلر و پادشاه مرحومک برادرلرینک شهادتندن بک زیاده متأسف و متأثر اولوب اغلیه رق بوبدعت هیئتی نسامزده ایجاد ایدن رحمت حقدن بعید اولسون دیوانکسار ایلدکلرینی روایت ایدرلر

هرنه حال ایسه ورته سلطنت منازعه سی برطرف اولدقدن صکره شاه اسماعیلک اناطولی ایچنه کوندردیکی نقبا معرفتیه تضایل ایلدیکی عشائر وایلات کمال تدقیق ایله لدی التحری مذهب شیعه یه داخل اولش قرق بیك قدر نفوس ثبت دفتر اولغله بونلرک اشداسی قتل و تدمیر و سبک مغز اولملری تأدیپ و تنکیل قلندی

بعده سلطان سلیم روم ایلی یی طولاشه رق ادرنه یه رهبت بخشای ورود اولوب ملوک متجاورمه دن کلان ایایچیلری کمال دارات واحتشام ایله قبول وایجاب حاله تطبیقاً تلطیف و ترهیب ایلدی

بووجهله امور داخلیه یولنه قونلدقدن صکره مقصد اقصى اولان شاه اسماعیل تأدیپ ایچون شرق سفری اعلان و طقوز یوز یکرمی سنه سی محرمنده ادرنه دن استانبوله سوق موکب اقتدار ایله بشکطاشدن طرف اسکداره گذار بیورلدی

سلطان سلیمک هجومی شاه اسماعیلک معلومی اولدقدن حرکات سابقه سندن تجاهل ایله بومئلاو معامله خفمانه اجرا سنک سببندن سؤال معروضنده نامه وایایچیلری کوندردی ایسه ده سلطان سلیم اصلاً حرکتنه خالی کتوره یه رک وایایچیلری تدمیر و تحقیر ایددرک اول تاریخده سرحد ممالک عثمانیه اولان سیواسده عساکر متحشده نك یوقامه سنی اجرا و قرق بیکنی سیواسده توقیف ایدوب منتخبی اولان یوز بیك نفر جند منصور ایله کشور ایرانه داخل اولدی

شاه اسماعیل مقابله به پکده جرأت ایدم مدیکنه مبنی اوزاق طولاشمقده وطوائف
عسکریه ایسه (ایکی آیدر ایران ممالکنده کشت وکذار ایتدی کمز حالد شاه میدانه
چیقمیور بوقدر آغر عسکر ایله بوندن ایلرویه کیدلمز) دیهرک عودت آرزوسنی سمع
پادشاهی به القا ایتمکده اولوب حتی لاجل الاخافه اوطاغ هایونه قورشون دخی آتدیله
ایسه ده سلطان سلیم خان شاه اسماعیلک کسر شوکتی حاصل اولمقسزین رجعت اولندیغی
تقدیرده بوقدر زحمت نافله به کیتمش اوله جغنی بیلدیکندن یکیچرک کفتکوسنه اصلا
قولاق اصمیوب (بلا محاربه دونمک احتالم یوقدر جانی استیان بنمله کلسون استراحت
طلب ایدن تن پرورلر دونسون) جواب قهر عتابیله تبریزه طوغری حرکت وشاه اسماعیلک
غضبنی تحریک ایله میدانه چقمسی ایچون تستر واختفاسنه تعریضاً لباس زنان وکسوه
صوفیان ارسالنه مساعت ایلدی

وکلاهی دولت دخی عودت مطالعه سنده ایسه لرده سویلکه جسارت ایدم مدکلرندن
مقرب پادشاهی اولان همدم پاشایی قاندر دیرلر پاشای مزبور غرور جوانی ونشئه کامرانی ایله
بر تقرب لزوم عودتی یاد ایلد کده تیغ سرتیز سلیم خانی ایله تباه وسائرلره باعث انتباه اولدی
شاه اسماعیل سلطان سلیمک تحقیراتنه وکندو امراسنک تعریضات و تشویقاتنه
طیانه میوب تبریز جوارنده واقع چالدران صحراسنده موکب عثمانی پی استقبال ایلدی
شاه مزبورک عسکری هم کترتلی وهم کاملاً سواری وبر فرقه سی زرهللی
بولندیغی وذاتاً دخی غلبه ایله مألوف اولمش وسلحشورلقده کسب ممارست ایتمش
بر طاقم فدایی ایدوکاری جمله تحقیقاتدن اولسنه مبنی درجنک اول شدتله هجوم
ایده جکلری درکار اولدیغندن قانون قدیم عثمانی اوزره تفنک انداز اولان یکیچریلر
صف حربک وسطنه وضع اولنوب جانیننه طوپلر تعیه وزنجرلر ایله یکدیگرینه ربط
قلندی اردوی هایونک ارقه سی مهمات عربهلری ایله تحصین اولنوب چادرلر دخی اولقدر
صیق قورلدیکه ایپلرینک بربرینه مربوطیتندن ازلرنده سواری دکل پیاده بیله حرکت
ایده مز ایدی ودشمنی طوپلرک نشانگاهنه چکمک ایچون اوکلرینه عزب تعبیر اولنان
عسکر قونلدی

شاه اسماعیل بالذات موکب هایونک صول قولنه شدتله هجوم ایدوب عزبلری
طوپلرک اوکندن منحرفاً ایچرو المغه وقت ویرمامکله کلی تلفاته سبب ارلدقندن وروم
ایلی بکلر بکیسی ایله بعض امرایی مقتول سیف حیف ایلد کد نصکره ارقه جانیندن
معسکر هایونک ایچنه کیرمکه صولت ایتدی ایسه ده بوجه محرر مهمات عربهلرینک

و چادر ایلیرینک حیلولتندن مقتدر اوله میوب سلطان سلیم طرفندن صول قول امدادینه
قبو قوی بلوکلرندن عسا کر منتظمه دخی ارسال قانمغله شاه مزبور بالضروره عودته
مجبور اولدی معسکر هایونک صاغ جناحده قوماندان اولان اناطولی بکلیر بکیسی
سنان پاشا بو حالی مشاهده ایلد کده صاغ قول طوپلرینک پیشگاهنده بولنان عزب طائفه سی
طوپلرک ادرلرندن و اوزرلرندن ایچرویه الوب تمام نشانکاهه کلش اولان امرای اعجام
اوزرینه آتش ایتکه باشلدی

شاه جانبندن بوقوله حمله ایچون معین اولان وکیل السلطنه عبدالباقی خان و دیاربکر
حاکمی استاجلو محمد خان و سائر صنادید صفویه از وقت ایچنده دانه قوارع آتش فشانه
هدف و معیتلرنده بولنان جنود روافض دخی افتاده صحرای تلف اولمغله شاه اسماعیلک
کوکب اقبالی غروب یوز طوتدی

ایرانلرک و هله اولاده اولان شدت هجوملری بو وجهله کچشدیرلر کدنصکره
برمدت دهامحاربه یه دوام اولنوب طوب و تفنک قارشوسنده سوارینک پایدار اولسی ممکن
اوله مدیغه مبنی عسا کر اعجام پراکنده و پریشان و شاه اسماعیل دخی طو تملق مرتبه سنه
کلشیکن مجروحاً فراره شتابان اولدی

شاه مزبورک اردوسی و پابند فرار اولق ملاحظه سیله استحصاب ایلد کلری اهل
و عیاللری و حتی شاعک تاجلی خانم نامنده اولان زوجه سی اغتنام اولنوب بعده جانب
تبریزه سوق موکب اجلال بیوزلدی

تبریز اهالیسی موقع اطاعت و فرمانبریده قائم اولمغله غارت و خسارتدن امین اولوب
فقط بیک قدر ارباب هنر و صنایع اهل و عیاللریله برابر استانبوله اعزام و ارسال قلندی
سلطان سلیم قاره باغده مشتانشین اولوب اولبهارده تمکرار شاه اسماعیل اوزرینه
صولت ایتک افکارنده ایدیه دهه یکچیریلر عودت خصوصنده هم زبان نیاز اولوب
موسم شتا دخی تقرب ایشکله رکاب هایونک تبریزه دخولندن طقوز کون مرورنده
آوازه کوس عودت ولوله انداز زمین و زمان و اثنای راهده یکچیریلری تحریک تهمتیه
وزیر اعظم هر سک زاده احمد پاشا معزول و وزادن دوقه کین اوغلی احمد پاشا مقتول
اولوب اناطولی بکلیر بکیسی خادم سنان پاشا وزارت عظمی یه ارتقا ایلدی اما سییه
بعد الوصول موسم شتا انده امرار اولنوب طقوز یوز یگر می بر سنه سی اول بهارنده
حرکت و طالیع معسکر هایونک سیف سطوتلریله کجاک و دیاربکر و چشکیزک طرفلری
امرای اعجام اللرندن تخلیص قلندی

ذوالقدریه حاکمی اولان علاءالدوله دولت مصریه طرفدارى اولوب سنه سابقهده موکب پادشاهینک بعض مهمات فرقه لرینه تعرض ایشیدی ترتیب جزاسی ایچون وزیر اعظم سنان پاشا و حاکم مشارالیهک برادرزاده سی اولوب خدمت سلیم خانیده بولغان شهسوار اوغلی علی بک اعزام بیورلغسله بالمحاربه علاءالدوله وارکان وامراسی قنطره شمشیردن امرار وممالک ذوالقدریه دینیلان مرعش ایالتی مشارالیه علی بکه احسان قلندی ملک مصر اولان سلطان غوریدن نامه وایاچی کلوب شهسوار زاده علی بکهک نظر التفاتدن اسقاط اولنمسی وممالک ذوالقدریهده کافی السابق خطبهده نامی یاد قلنمسی التماس ایتمکله بوکونه متحکمانه معامله دن پادشاه حضرتلرینک طبع سلیملری متغیر اولوب قوجه چرکس ار ایسه مصرده خطبه سی مستمر ایتسون جواب قهر عتابیله ایلچیسی اعاده وذوالقدریه ممالکینک علی بکه احسان اولندیغی حکایه سیله علاءالدوله نک سر بریده سی دخی علی رغم الاتف فرستاده قلندقدن صکره دارالسلطنه استانبوله مراجعت بیورلدی

اماسیه مشتاسنده عکری طائفه سی برر بهانه ایله دفتردار پیری پاشا وخواجه سلطان حلیمی چلینک خانه لرینی غارته اجتسار ایتشلر ایدی استانبوله بعدالوصول ضابطان عسکریه بالذات حضور پادشاهی یه جلب وسبب فتنه دن سؤال ایله تضییق ایدلکده وقعه مزبورده وزرادن اسکندر پاشا وقاضیه سکر تاج زاده جعفر چلبی وسکبان باشینک تحریکی اثری اولدیغی بیان ایلر یله اوچی دخی شمشیر کلو کیره مبتلا اولدیلر

شاه عجمه تابع اولان امرای اکرادی سمت اطاعته دعوت ایچون اماسیه مشتاسندن ادریس بدلیسی ارسال اولنغله مولانای مشارالیه رامی واشتی وسوران و عمادیه وحسن کیف وبدلیس وحیزان وجزیره عمریه حکامنی وبونلر امشالی یکر می بش قدر امرای اکرادی گاه تخویف وگاه تلطیف ایله ربقه اطاعت دولت علیه یه بند ایلدی شاه اسماعیل طرفندن دیار بکر استخلاصنه مأمور ایدی لان قره خانک دفع تسلطی ضمنبنده میرمیران قرمان خسرو پاشا سردار تعیین اولنهرق قوج حصار قربنده مقاتله عظیمه وقوعیله اون بیک قدر عجم ایله قره خان مقتول اولوب بومظفریت جلیله نک ثمره سی اولهرق کردستان طرفلرنده بولغان بقیه قلاع وسنجار وموصل واورفه سنجاقلری دست تغلب ایرانیاندن اتزاع قلندی

شاه اسماعیل طلب عفو صلح ایچون مکرراً ایلچیلر کوندر دیسهده مظهر مساعدده اوله مدیغندن ملک مصر اولان سلطان غوری یه نامه یازوب اکر سلطان سلیم برکره

دها ایران هجوم ایدر ایسه کشور عجمی ضبط ایدرجکی وبعده نوبت ملک عربیه کلهجکی درکار اولسنه مبنی شمیدن بونک چاردهسنه باقلمسنی تذکار ایلشدی سلطنت سنیه ایله دولت چراکسه بینهنه ایسه قرق سنه دنبرو رقابت کیرمش وامرای چراکسه فن فروستده اولان مهارت لرینه مغرور و متکبر برقوم جاهل اوله رق سلطان سلیمک درجه قوت و مکنتنی تمیزه غیر مقتدر بولنش اولق حسیله صورت توسطده اظهار تحکم و عداوته مجاسرت ایلکه باشلادیلر

حالبوکه شاه اسماعیل سیف سطوت سلیم خانی ایله مقهور اولدقدنصکرده جهانگیرک سوداسندن فراغت و میدان حربیه چیقدیغنه ندامت ایدوب عیش وعشرتیه منهملک اولمسيله اولجانبدن اندیشه بی موجب حال قالمدیغنه مبنی تسخیر کشور عرب ذهن پادشاهیده جولان ایتمکده ایدی بناء علیه ظاهرآ ایران و باطنآ عربستان اوزرینه سفر نیتیه طقوز یوز یکریمی ایکی سنه سی اوائلنده وزیر اعظم سنن پاشا یکریمی بیک قدر عسکر ایله دیار بکرم طوغری حرکت و سلطان سلیم دخی متعاقباً تحریک لوای سطوت ایلدی

روم ایلی قاضی عسکری زیرک زاده و امرادن قردهجه پاشا سفارتله سلطان غوری یه ارسال و تسطیر اوانان نامه هایونده ایران اوزرینه اولان حرکتی بیان ایله خادم حرمین اولدیغکزدن دعای خیریه کز رجا اولنور مالی تذکار اولندی لیکن سلطان غوری شهریار باند اقتدارک نیتنی تفرس ایلدیکنه مبنی عربان و عسکردن ماعدا اون اوچییک عبدمشتری ایله تحریک لوای نهضت ایدرک حلبده سفیران مشارالیهما ایله لدی الملاقات برقاچ کون حبس و تحقیر ایلدکدن صکره ملاحظه انجام کار ایله بالتطیب اعاده و ایران اوزرینه سفر ایتک مرادکز اولدیغی حالد نیچون دونما کزک اسکندریه یه عزیمتنی تنیه ایلدیکز دیو تعریضی متضمن جواب نامه دخی فرستاده ایلدی

موکب هایون بوجاق دره نام محله واصل اولدقدن مشارالیهما تقیل سریر دولتمصیر وزبان شکوی ایله سرگذشتلرین تقریر ایلدکلرینه و صدر اعظم دخی حدود عربستانه بالوصول ملاطیه معبرندن عبور ایچون حکام چراکسه یه مراجعت ایلدکده سدباب رخصت ایله فتح دروازه عداوت ایتدکلرینه مبنی سلطان غورینک سالک اولدیغی طریق ناموافق مؤکد عزم سابق اوله رق اردوی هایونک یوزی شرقه ایکن قبله طرفنه چویریلوب عربستان اوزرینه سوق توسن عظمت قلندی

عینتاب و ملاطیه و دیوریک و بهسنی و قلعه الروم ضبط اولدقدن صکره طقوز یوز یکریمی ایکی سنه سی رجبنده حاب قربنده واقع مرج دابق نام صحراده مصر اردوسیه مقاتله

عظیمه مشهوره وقوع بولوب بش ساعت ظرفنده عسا کر چرا کسه منهزم و سلطان غوری دخی دائره شهوددن منعده اولدی

حلب و ایسی اولوب عرض اطاعت ایدن خیری بک واسطه سیله حلب سکانی موکب هایونی کمال تعظیم ایله استقبال ایلد کمرندن غارت و خسارتدن مصون اولدیلر سلطان غوری شاه اسماعیل کبی اسکداره قدر ضبط ایثک او همنه قانع اولیوب استانبولی دخی تسخیره نیت و حین محاصره ده صرفه محتاج اولدیغی مبالغی تهبه و اسب تصحاب ایش ایدو کندن حلب خزینه سنده مدخر بولنان یکر می کره یوز بیک اتون یعنی عصر من فیئانه نظراً بر میلیون لیرا ایله اشیای سائر و مودوع امرا اولان اموال کثیره مضبوط خدام سلیم حانی اولدی .

اون سکنز کون حلبده اقامتدن صکره طرف شامه عطف لجام اجلال اولنوب حما و حمص و طرابلس و قدس شریف سکانی صف بسته مقام اطاعت اولمشلر ایسه ده حاکم غزه اولان جانبرد غزالی بر مقدار چرا کسه و عربان عسکر یله غزه ده اقامت ایدوب مصره سد سپاه اولق و یا خود سلطان سلیم عودت اختیار ایدر ایسه شامی تخلص ایملک افکارنده بولندیغی تحقیق کرده پادشاهی اولغله وزیر اعظم سنان پاشا ارسال اولنوب جمعیتی تدبیر و جنود عثمانیه حقنده بد معامله یه متجاسر اولان غزه اهالیسی تازیانه شمشیر یله تعزیر ایتدیرلدی . شامده اوچ درت آی آرام و غائله شتا بر طرف اولدقدن صکره تسخیر مصر ایچون عزیمته اقدام اولنوب وزرادن حسام الدین پاشا مشکلات بریه بی بیان ایتدکده بقاسی عسکر بیننده فتور و او هاهی استلزام ایده جکندن ایران سفرینه قربان اولان همدم پاشایه تردیف و دولت شهادت ایله تشریف قلندی .

بونک ارزرینه مراد هایونه مخالف کلام تفوهنه کیسه ده قدرت و جسارت قالماقله موکب هایونه لزومی اولان صو و ذخائر برابر کتورملک کبی مشکلات عظیمه اختیار اولنه رق یوله دوزلدیلر لکن عنایت حق ایله بعضاً یغمورلر یا غمغه قور قیلان شیر و قوعب و لمق سزین طقوز یوز یکر می ایکی سنه سی ذی الحجة الشریفه سنک سلخنده مصر قربنده واقع برکه الحاج نام محله نصب سر اداقت اجلال و همان اولکون ترتیب بزم رزمه استعجال اولندی . سلطان غورینک و فاندن صکره مصرده تسلطن ایدن سلطان طومانبای ریدانیه صحرا سنده تشکیل ایلدیکی اردویی طوب و تفنک و سائر ادوات جنک ایله تحصین ایتمش ایسه ده پادشاه صاحب تدبیر احوال دشمندن خیر اولدیغنه مبنی جبل مقطعدن نازل

ومعركة كاهه طرف خلافتدن واصل اولمغله طومانبايك سعى واقدامى نتیجه پذیر اوليوب جمع اندك شمار ايله فراره مجبور اولدى .

چراكسه جنديلرينك سلحشورلقلرى وفرط جسارتلىرى تسليم كرده ياره اغيار اولوب حتى اسلحه ناريه به مقابله ايدميه جكلرينى تفرس ايلدكلرنده برقاچ نفر چركس فداييسى بالذات سلطان سليمه ايصال مضرت ايتك ايچون رايث هايون اوزرينه هجوم ايلديلر توفيقات ربانيه جمله سندن اوله رق پادشاه حضر تلىرى موقع آورده بولمغله سنجاق ديندم طوران وزير اعظم سنان پاشا ورمضان اوغلى محمود بك وعينتاب واليسى يونس بك كشته تيغ قضا اولدى لكن بو درجه جان سپارانه چالشمش لر ايكن خيبت وخسراندن غيرى برشيته نائل اوله مديلر .

محاربه ختام بولمقدن صكره سلطان سليم شوكت باهره وكوكبه قاهره ايله مصر ايچندن كچوب بولاقدن منصوب اولان معسكر هايونه نزول بيورديلر .

چندكون مرورنده سلطان طومانباي جمع ايدم بيلديكى عربان عسكريله بغته مصره دخول ايدوب اوچ كون اوچ كيجه درون شهرده محاربه ممتد ولايعد جان وبىكلرجه نوجوان سيلاب زده فتن اوله رق يوم رابعده طومانباي جانب فراره سوق سمندواهالى مصر دخى الامان صداستى بلند ايلديلر .

مؤخرآ طومانباي دخى تعقيبنه مأمور اولان امرايه نفسى تسليمه مجبور اولمغله حضور هايونه ايصال اولمقدن سلطان سليم مشاراليسى مصر واليدكنده قوللانمق نيتنده بولنش ايسه ده معامله سر كشانه اظهار ايلديكندن وعربلر اسانبدن الله ينصر طومانباي هداسى منقطع اولمديغندن شهنسوارزاده على بكه تسليم اولنوب باب زويله وه بردار قلندى چونكه ميرمشاراليهك باباسى مصر لولر مقدما باب مذكورده صلب ايلش اولمقدن انا كابدل طوتلدى سنان پاشادن صكره مقام وزرات عظمايه اعتلا ايدن يونس پاشا مصر واليدكنه تعيين اولنش ايسه ده طمع خامندن ناشى مقتول اولان امراي چراكسه حرملرينى مصادرديه باشلا ديفندن حكومت مصر خيى بكه وشام ينه امراي چراكسه دن اولوب مؤخرآ باركاه سليم خانى به دخالت ايدن جانبرد غزالى به توجه ومصر محافظه سيچون خيى بك معيته بشيوز يكىچرى وبشيك سوارى براغيلوب درت آى قدر مصرده اقامتدن صكره جانب شامه واندن حله عودت بيوردلدى

اثنائى راهده بركون وزير اعظم يونس پاشا پادشاه حضر تلىله مصاحبت ايدمرك كلورلر ايكن (بوقدر زحمت ومشقتلر چكيلهرك مصر فتح اولمقدن صكره برخائى

چرکسه ویرجککزی بیلسلر قوللرک ارقه که دوشوب گلزلر ایدی) دیو تعریضه جسارت ایلدیکی انده همان ائک باشنی چکوب اوراجقده پاشای مشارالیهی قتل ایتدیردکن صکره اناطولی قاضیعسکری بولنان کمال پاشا زاده بی یاننه چاغیروب مصاحبت ایدرک یوله دوام ایلدی کمال پاشا زاده نك اتی نصلسه برصو برکندیسنه باصهرق سرپندیسی سلطان سلیمی باشند آیاه قدر چاموره غرق ایلدیکندن مولانای مشارالیه پختابه دوشدکده (علما آتی ایانندن اوزریمه صیجریان چامور باعث فخر ومباهاتمدر بعدالوفات صندوقه اوزرینه اورتسونلر) دیو فراجه سنی چیقاروب حفظ ایتدیردی وبومعامله ایله قدردانلغنی عالمه بیلدیردی مذکور فراجه الآن صندوقه لری اوزرنده طورور

خدمت وزارت عظمی به انتخاب اولسان استانبول محافظی پیری پاشا حلبده رکاب هایونه لدی الوصول شاه عجمک قره باغده تحزب واجتماع اوزره اولدیغنی استماع اولندیغندن قرق بیك قدر عسکر ایله پاشای مشارالیه محافظه سرحد ایچون اعزام اولندقدنصکره پادشاه حضر تلی جانب رومه عطف زمام ایدرک طقوز یوز یکر می دوت سنه سی رجب شریفنده استانبوله واصل وبرقاج کون مرورنده ادرنه به مرتحل اولوب بعدالشتا استانبوله عودت بیوردیلر

وزیر اعظم بیردجک مقابله سنده ضرب خیام آرام ومملک مفتوحه نك تنظیم امورینه اهتمام ایدوب شاه عجمک جانب خراسانه کریزان اولدیغنی خبر النغله بعدالاستیذان عودت ورکاب هایونه مواصلت ایلدی

بوزق اشقیاسندن جلال نام مفسد توقا دسمتنده برغارده قرار ومهدیلک دعواسیله یکر می بیك قدر حمقا جمع ایلدیکی استخبار اولنغله روم ایلی بکلر بکیسی فرهاد پاشا استیصالنه تعین ومرعش حاکمی شمسوار اوغلی علی بکه دخی پاشای مشارالیه التحاق ایلمی توصیه وتلقین اولنشدی میر مشارالیه فرهاد پاشانک وصولنه ترقب ایتیمه رک اشقیای مزبورده بی تنکیل وتدمیر ایلدی عصر سلیمان خانیده و بیك تاریخنندن صکره ظهور ایدن بومقوله اشقیا جمعیترینه جلالی تعبیری بونلردن اقتباس طریقله اولدیغنی مرویدر

برمدت قدس شریف وبرالشامه مستولی اولان اهل صلیب ملک صلاح الدینک همتیله اورالردن طرد اولندقلرنده ردوس جزیره سنده جمهور صورتنده برحکومت تشکیل ایدوب مجاهد معناسنه اوله رق قوالیر نامیله یاد اولنورلر وتدارک ایلدکلری قوه بحریه واسطه سیله سفن اسلامیه بی طوتمق صنعتیله مشغول اولورلر ایدی

فاتح مرحوم عصر نده بونلرک دفع مضر تلرینه ابتدار وردوسک تسخیرینه صرف
اقتدار قلندی ایسه ده قلعه سی فوق العاده استحکامات ایله تحصین اولمش و درونی فدا ییلر
ایله مملو بولمش اولدیغندن ضبطنه موفق اولنه مامشتدی

لکن مصر فتح اولندقدن صکره استانبول ایله مصر ارسنده موارد سفاین تکثر
ایتمک طبیعت مصلحتدن اوله رق بونلرک تحت امنیت کیرمسی دخی بهمه حال ردوسک
تسخیرینه منوط بولندیغنه بناء وکلای دولت سلطان سلیمی بوخصوصه تشویق و ترغیب
ومهمات مقتضیه تدارکنه اقدام ایتمکده ایدیلر

پادشاه حضرتلری ایسه برکرم دها ایرانه هجوم ایدوب هنوز تأسس ایتمکده اولان
مذهب شیعه و دولت صفویه بی محو وافنا ایتمک نیتنده اوله رق حالبوکه علمای عصر براقلم
فتح ایلمکدن بر عیسوی کوی آلوب برخرستیان مسلمان ایتمک دها خیرلورد و سلطان سلیمک
کافه حرکاتی سفک دماء مسلمینی مؤدی اولوب بوکایسه مولاراضی اولمز دیه رک تعریض ایتمکده
ایدوکلرندن و وکلانک ردوس سفریله سلطان سلیمی اشغاله چالشماری دخی بو نکته یه
مبنی اولدیغندن پادشاه حضرتلری (بن اقلیمار فتح ایتمک ارزو سنده یم سز بنی بر حرسز
جزیره سنی تسخیر ایله مشغول ایتمک ایسترسکمز حالبوکه بنم بوندن صکره آخرت سفرندن
بشقعه سفرم یوقدر و بزم ارتحالمز لازم کلمشدر زیرا بقامز چوق آدمک فناسی ایجاب
ایده یور) جواب جامع الکلامیله ردوس سفرینی رد بیوز دیلر .

فاتح مرحوم استانبولی تسخیر ایلمکده اهل یسنه امان احسان ایدوب اداره امور
روحانیه لری چون بعض امتیازات ایله بطریق نصب ایلمش و امرای عیسویه بی دخی تلطیف
و تجلیل ایتمش ایدی بر مدت مرورنده قانته قوزن و سائر بعض امرا بر تقریبه استانبولی
استرداد ایتمک سوداسنه دوشدکری و اولوقت طربزونده و مورده تشکیل حکومت ایدن
روم امپراطورلری تعلقاتیله مخبریه کیرشدکری استماع اولندقدن متجاسرلری تأدیب
اولوب سلطان بایزید عصر نده دخی بو وسوسه کاملاً زائل اوله مدیغندن سلطان سلیم
روم طاقه سنک یا قبول اسلام ایلمرینی و یا خود استانبولی ترک ایدوب کیتملرینی امر ایلدی .
وکلای دولت بو بابده اضطرابه دوشوب لکن پادشاهک شدت هیبت و غضبندن
مخالفته جسارت ایده ماملرینی مفتی عصر اولان زنیللی علی اقدی یه مراجعت ایلدیلر .
مفتی مشار الیه فاتح مرحوم بونلره عهد و امان احسان و برقطعه فرمان دخی اعطا
ایلمش اولدیغندن شمدی بوتکلیف شرعاً جائز اولمز دیو افنا ایتمکله سلطان سلیم فرمانی
کورده یم دیو طلب ایلادی کیفیت بطریقه افاده اولندقدن ذکر اولنان فرمان بر حریقده

محترق اولدیغنی بیان ایلدیکله ایش برقات دهامشکلاته کرفتار اولدقدہ مفتی مشارالیه اثبات ماده دخی کافیدر دیدیکنه مبنی اختیار یکیچریلردن ایکی کشی دیوان هایونده ادای شهادت ایدوب سلطان غضوب حضرتلرینک دعواسی عایینه حکم اولمغله غائله برطرف اولدی طقوزیوز یکرمی التی سنه سی شعباننده پادشاه حضرتلری ادرنه یه عزیمت ایدوب آنجق پدرلری مرحوم ایلہ ترتیب ساز دف مصاف اولدقلری اوغراش کویی نام محله وصوللرندہ مبتلا اولدقلری علب شیر پنجه مشد اولمغله قرق کون قدر اوراده آرامه مضطر اولوب سنہ مربوره شوالنده الی بریاشنده وسلطنتک طقوزنجی سالنده ارتحال داربقا بیوردیلر پادشاه مشارالیه حضرتلری مدیر و بهادر و تهدیدینی ایقاعه قادر احوال علمدن خیر غضوب و مهیب حقه قائل واقتضاسی درجه ده کر مکاراغه مائل لطیف کو بر شهریار عظیم الشان ایدیلر احوال مبسوطه و حکایات آتیه مزایاسندن اوصاف مذ کوره ایلہ اتصاف قلری موقع ثبوتہ واصل اولور .

عربستان سفرینه عزیمتدن مقدم پیری پاشایه مضمر درونی افشا ایلدکده پاشای مشار الیه جنکیز و تیمور کی جهانگیر لک چولی کچمکلرینی و بوخصوصده اولان مشکلاتی بیان ایلدیکندن مظهر غضبلی اولمشیدی بعدالفتح پیری پاشایه خطاب ایدوب (ایشته بن کیتدم و مصری فتح ایتدم) بیوردیلر پاشای مشارالیه دعای هایونلرینی تکرار و مطالعہ سابقه سنک سخافتنی اقرار ایلدکده (یوق سنک عرض ایلدیکک ملاحظات موافق حال و مطابق حزم و احتیاط ایدی لکن خالق بکا باباسنی و قرنداشلرینی اولدردی دیو طعن و دشنام ایتدکده اولدقلرندن دولت علیه یه فوق العاده بر خدمت ایلہ بو تهمتی فراموش ایتدیرمکه مجبور اولدیغمدن ناشی مخاطرات ملحوظه یی کوزمه آلدیم) بیورمشلردر .

برکون ینه پیری پاشا ایلہ اثنای مصاحبتده (تیمورلنک بزم بیوک پدری طوتدیغندن بو کیفیت سلاله من اوزرنده برلکه براقدی بونک ازاله سی ایچون هندستانده حکومت ایتدکده اولان تیمور اولادلری اوزرینه سفر ایتک ایسترم) بیوردیلر پاشای مشار الیه (بووقعه نک اوزرندن یوز سنه دن متجاوز زمان مرور ایتش وسلطنت سنیه کز مؤخرأ بو قدر فتوحات و ترقیه مظهر اولمش ایدوکندن بولکه طبیعتله زائل اولمشدر مع مافیه هندستانک بعدیتی سببیلہ سفر حد امکانده دکلدر) دیدکده عصر مزده کشاد اولنان قنال موقعنی بالتعریف (اورادن بحر سوسی آقدکزه الصاق ایدر و بحرأ هندستانه کیدرم) بیورمشلردر که بوققره احوال عالمه اولان وقوفلرینه شاهد عادلر

ینه برکون اندرون هایون اغالرندن اوتوز قرق کشی یه بردن غضب ایدوب قتلرینی

امر ایشلر ایدی مفتیٰ عصر زنیللی علی افندی کیفیتی استماع ایلد کده حضورهایونه واروب شویله بروقه ایشتم دیمسنه جواباً (افندی ارتق سن امور سلطنته مداخله باشلادك) بیورمشلردر افندی مشارالیه دخی (بز امور اخرویه کزك محافظه سنه مأمور اولدیغمزه مبنی احکام شرعیه بی بیان کادم) دید کده پادشاه حضرتلری (اصلاح احوال عمومیه ایچون بر فرقه مک قتل تجویز اولمنش دکلدر) دید یکنه جواباً (اصلاح عالم بونلرک قتلرینه منحصر دکلدر قباحترلرینه کوره تعزیر اولنق مرتبه کفایه ددر) دیو بیان حقیقت حال ایلرله پادشاه حضرتلری (قتلرندن واز کچدم لیکن قیومده طور ماسونلر کتسونلر) دیمشلر مفتیٰ مشارالیه عرض تشکرله برابر (بونلر خدام مخصوصه شاهانه کزدن بولند قتلرینه مبنی بلانایاره چیقاریلور ایسه خدمات سافله ده بولنغه مضطر اولورلر بوایه موافق شان سلطنتکزدکلدر نایاره ویریلور ایسه بلا موجب بیت المال مسلمین اضرار اولمنش اولور اتمام عافیت بیوروک و قباحترلرینه کوره تعزیر ایله خدمته آلیقویک) دید کده بوکلام حق قبول ایشلردر

مصر فتحیله بکام اولدقلرنده شریف حجاز اولان ابوالبرکات تنیه فتح وظفر ایچون اوغانی کوندرمشیدی تکریمات فائقهیه مظهر اولدقندن بشقه اهالی حرمین شریفنه ایکیوز بیک التون عطیه کوندردیله و علمای مصر سلاطین سالفه مصریه و قفلرینک ضبطنه فتوی ویرمشلر ایکن ابقاسی طرفنی اختیار بیوردیلر و مصر خزینه سنده بولنان تبرکات جلیله یعنی ذات مابه الموجودات حضرت رسالتپناهییه واجله احباب کرام حضراتنه منسوب امانات سنیه ایله بعض نوادر اشیان غیر بسنی آلیوب خزینه مصریه بی تخلیه ایلدیله وروم و زراسنک عربستان اداره سیله عدم القتلرینی درپیش ملاحظه ایدوب مصری خیری بکه و شامی جانبد غزالی یه ویردیله بونلرک جمله سی علو جناب و کر مکارلفنک دلائلنددر

پادشاه مرحومک اویخوسی غایت آز اولغله اکثر ایالی بی مطاعه کتب ایله امرار ایدرلر و تزیناته اصلا رغبت بیورمزله ایدی بعض محرملری سبندن سؤال ایتد کده (وکلا و امرانک البسه رسمیه تلبس ایللری پادشاهلرینه تعظیم آدر بز کیمی تعظیمه مجبوزر که اختیار کلفت ایدلم) بیورمشلر

حاصل کلام کال پاشا زاده نیک مرتبه سی تمام کاشف احوالی اولغله انک تحریر یله ختم

مقال اولندی

ترکیب بند

عزمده نوجوان خزمده پیر	✽	صاحب السیف صائب التذیر
هم صف آرایدی هم آصف رأی	✽	نه وزیر ایسترایدی نه ده مشیر
الی شمشیر ایدی دلی خنجر	✽	نیزه ایدی قولی و پرمغی تیر
آزمده چوق ایش ایشیدی	✽	سایه سی اولمشیدی عالم کیر
شمس عصر ایدی عصرده شمسک	✽	ظلی ممدود اولور زمانی قصیر
تاج و تخت ایله فخر ایدر بکلر	✽	فخرانکه ایدردی تاج و سریر
کوکلی اول سورده بولوردی سرور	✽	که چلا چاغریدی تیغ و نفیر
رزم ایشنده ورم عیشنده	✽	کورمدی پیرچرخ آ که نظیر
کیرسه میدان رزمه شیر دلیر	✽	چیتسه ایوان بزمه مهر منیر
اولیجق دار کیر اول شیر	✽	اکسون وقانلر اغلسون شمشیر
حیف سلطان سلیمه حیف و دریغ	✽	هم قلم اغلسون آکا هم تیغ

وزیر اعظم پیری پاشا سلطان سلیمک و فتی اخفا و مغنیا والیسی بولانان شهزاده سلطان سایانه سرعت ورودی لزونی انها ایتمکه شهریار جدید استانبوله واصل و تخت خلافت عظمایه نائل اولدینی خبری پاشای مشار الیه وارد اولدقه اردوی هایون ایله جنازه سلیم خانی بی بالاستصحاب استانبوله شتاب ایلدی سلطان سلیمان حضرتلری پدر مکرملرینک جنازه سنی استقبال و حین حیاتلرنده نزهتگاه مرغوبلری اولان میرزا سراینه دفن ایتدیروب اوزرینه تربه و جوارینه جامع و تفرعات انشا ایتدیردیلرکه سلطان سلیم جامعی دیمکه معروفدر .

سلطان سلیمک خبر وفاتی منتشر آفاق اولدقه شام والیسی اولان جانبرد غزالی سلطنت مندرسه مصریه بی اعاده ایتمکه عزیمت و مصر والیسی خیری بکی اتفاقه دعوت ایدوب میرمومی الیه ایسه عاقل و دور اندیش بر ذات اولدیغندن بو امرک حصولی مرتبه استحاله ده اولدینی ادراک ایدوب انجق غزالینک کندو اوزرندن تسلطی دفع ایچون دعوتیه اجابتی حلبک تسخیرینه تعلیق ایلدی . بنابرین جانبرد غزالینک حلب محاصره ایلدیکی خبری رکاب هایونه واصل اولدقه فرهاد پاشا سرعسکر نصب وارسال و شهنسوار زاده یه دخی حلب محافظی قرهجه پاشایه امداد ایلمی ایچون فرمان عالی اصدار اولندی .

محافظ مشارالیهک اقدامی وشهسوار زاده‌نك مهاجماتی جانبرد غزالی بی ضبط حلبدن
مأیوس وفرهاد پاشانك قرب وصولی دخی رایت امیدینی معکوس ایتمکله شامه عودت
ایدوب قدوم سرعسکره منتظر اولدی فرهاد پاشا شام جوارینه لدی الوصول وقوعبولان
محاربه‌ده عساکر شامیه منهزم ومحدول وجانبرد غزالی دخی مقتول اولدیغندن سبطوت
شمشیر عثمانی عربستان خلقه تکرار عرض دیدار مهابت ایلدی .

ارکان دولت سلطان سلیمان حضر تلیزینی لذت فتوحاته داداندرمق ایچون غزاجهاده
ترغیب ومجار قرائنك تبریک جلوسه مسارعت ایلدیکنی بیان ایله بلغرادك فتحه تشویق
ایلدکلرندن طقوز یوز یکریمی یدی سنهسی اولجانبه سوق سمند جلادت اولنوب وزیر
اعظم پیری پاشایی اولجه بلغراد محاصره‌سنه اعزام وکندولری بودین نیتیه طونه نهرینی
مرورده اقدام ایشلر ایکن تکرار انهای پاشای صاحب تدبیرایله عودت وبلغراد پیشگاهنده
اولان وزیر اعظم اردوسيله ملاقات ایلدیلر برآی قدر محاصره‌دن صکره قلعه‌ بلغراد
عنوة مسخر تیغ ظفر پیکر وجوارنده بولنان چند عدد پلنقه دخی مرأت فتحده جلوه‌کر
اولغله امرمحافظه‌لری آتام واهالیسندن برمقداری استانبوله نقل ایله جانب دارالسلطنه‌یه
عطف زمام اولندی .

مطمح نظر دولت اولان ردوس تسخیر ایچون انواع سفایندن آلتیوز آلتمش درت
کمی استحضار ووزیر ثانی مصطفی پاشا ایله ارسال اولندقدن صکره سلطان سلیمان خان
حضر تلیری سوق موکب عظمت واقتدار ومرمرس اسکله‌سندن ردوس جزیره‌سنه‌گذار
بیوردیلر متانت قلعه‌آلتی آیی قدر کیجه وکوندوز اشغال انش حرب و قتاله بادی وپک چوق
ضایعات وتلفاتی مؤدی اولدینی حالد بالآخره قوه قاهره ایله فتح وتسخیر وجوارنده
واقع استانکوی وبودروم قلعه‌لری دخی دفتر فتوحات سلیمان خانیه درج وتسطیر
بیوریه‌رق عودت هایون واقع اولدی .

فرهاد پاشانك اوتهدنبرو شهسوار زاده‌یه غیض وخصومتی اولغله میر مشارالیهی
دعوای استتلالده بولنمق تهمتیه غمز ایلدیکندن ردوس اوزرینه حرکت هایون وقوعندن
مقدمه ظاهراً محافظه سرحد وباطناً فیاضه ابن شهسواری سد ایچون اعزام قلنمشیدی علی
بك فرط صداقته اعتماداً فرهاد پاشانك اردوسنه داخل اولدقده قتل اولنغین ذوالقدریه
خاندانی رهین اضمحلال وپریشانی اولدی .

دولت چراکسه اواخر ایامنده تورک لوندری سواحل یمنه منتشر وبعض مواقعک
خطیه تشکیل حکومته مقتدر اولوب اقایم مصر حکومت عثمانیه‌یه داخل اولدقده عرض

اطاعت و فرمانبری به مجبور بولند قلرندن طرف سلیم خانیدن بعض مرتبه عسکر و امرا ارسال و بکربکیاکی لوندات مزبور سر آمدانندن کمال پاشایه توجیه قلمشیدی مؤخرآ طائفه لونددن اسکندر نامنده برخارجی دعوای استقلاله قیام و تبدیل خطبه و سکهیه اهتمام ایلدی ایسه ده میرمیران مشارالیهک شمشیر غیرتیه شقی مرقوم ازاله و آسایش مملکت اعاده قانندینی خبر مسرت اثری رکاب هایونه واصل اولدی

ردوس محاصره سی اثنا سنده مصر والیسی خیری بکک خبر وفاتی وارد اولغله وزیر ثانی بولنان مصطفی پاشا حکومت مصر ایله اجلال و قادر غله ایله ارسال قلندی.

ردوسدن عودت هایون وقوعندن صکره جه بر کون پادشاه حضر تتری وزیر اعظم پیری پاشایه (غایت مقبول و معتمد بر قولم واردر بر بیوک منصب ایله بهر مند ایتمک ایسترم) دیهرک افاده مرام و وزیر اعظم مشارالیه نکته یی تفرس ایدرک (اولیه مرغوب و موثوق بنده لرینه لابق اولان قوا مکزک مأوریتدر) جوابیله استغفایه قیام ایلمکین پیری پاشایه تقاعد احسان اولوب خاص او طه باشی ابراهیم آغا منصب وزارت عظمایه اعتلا ایلدی وزیر ثانی بولنان احمد پاشا که سلطان سلیم مرحومک امکدار لرندن اولوب پدر لری سلطان بایزید ایله وقوع بولان مصادمه دن عودتله احوالی به شتاب ایدر لر ایکن عقب کیر لر دن برقاج نفری یتشوب سلطان سلیمه سوء قصد ایلد کارنده جمله سنی دفع و قهر ایدن قهرمان زماندر سلطنت سلیم خانیده میراخور و مؤخرآ وزیر اولمشیدی مهر هایونک بویه خلاف اصول ابراهیم اغایه ویرلمسندن صبر و قراری منسلب و مصر والیدکنه طالب اولوب کیتدی لکن ابراهیم پاشانک مرکز اهانتده قیام و افنای وجودینه نصب نفس اهتمام ایلدیکنه مطلع اولدقده بواسطراب ایله متصدی اولدینی حرکات مزبوحانه اعلان عصیان ایلمک و نکته قونیه رق و دعوای استقلاله مبادرت و تبدیل خطبه و سکهیه جرأت ایلدی دینه رک صدر مشارالیهک تسلیط ایلدیکی امرای مصریه دن محمد بک طرفدارانی بالاستصحاب پاشای مشارالیه اوزرینه هجوم ایله قتل و افنا و خزینه مصریه یی یغما ایلدیلر .

بو خبر واصل در دولت اولدقده مصالح مختلفه مصریه نک تنظیم و تسویه سی وزیر اعظم ابراهیم پاشانک کیتمسنه محتاج کورینوب کمال اجلال و استقلال ایله اعزام قلمغین برقاج آی مصرده اقامت و اعاده اسایش مملکته موفق اولدقن صکره عودت ایلدی .

طقوز یوز او توز ایکی سنه سی تسخیر کشور انکروس نیتیه سلطان سلیمان خان حضر تتری سوق سمند جلادت ایدوب ره راستده بولنان قلاع دست دشمندن انتزاع اولنه رق موکب هایون مهاج صحرا سنه واصل اولدی .

مجار قرالی توجه پادشاهی بی استماع ایتدکده متجاوز ملوک عیسویه دن استمداد و عسا کر کلیه جمع و اعداد ایدرک مزبور صحرا ده مقابلیه مبادرت ایلدی ایسه ده قوه نقاره عثمانیه به تاب آور مقاومت اوله میوب انهزام کامل ایله منهزم و کندوسی دخی دائره شهوددن منعدم اولمغه پادشاه غازی اردوی هایون ایله بودین پیشگاهنه رهبت بخشای ورود اولدی .

امرای مجار مقام فرمانبریده پایدار اولمغه مجار قراللی خدام درگاه سلیمانیدن اولوب حقنده وعد جلیل سبق ایدن اردل بانی اوغلی یانوشه ارزانی بیوریلوب مقرر سریر خلافت جانبیه مراجعت قلندی .

سلطان سلیمان خان انکروس سفریله مشغول ایکن اناطولیده ذوالنون اوغلی وحاجی بکتاش اوغلی کبی جلالیلر ظهور و باشلرند مجتمع اولان بشر اوزر بیک حشرات ایله ممالک محروسه یه القای شروشور ایلدکلری استماع اولمغین صدر اعظم ابراهیم پاشا اعزام اولنوب بالمحاربه جمعیت اشقیا تارمار و مرقوملر دخی طوتیلوب قنطره سیف سیاستدن امرار قلندی .

نمجه قرالی اولان فرندوشک طرف پادشاهیدن مجار قرالی نصب بیوریلان یانوش قرال اوزرینه هجوم و بودینی تسخیر ایله یانوشی فراره مجبور ایلسی تکرار اولجانبه حرکت هایون وقوعی استلزام ایسکله طقوز یوز اوتوز بش سنه سی تحریک لوای سطوت و قلعه بودین ایکنجی دفعه اوله رق آورده قبضه جلادت بیوریله رق ینه یانوش قراله احسان اولندقدن بشقه مهاج محاربه سنده مقتول اولان مجار قرالک اله کچمش اولان و قرونه تعیر قلنان قدیم مجار قراللی تاجی ایله سرافتخار ترین اولندی .

بعده نمجه قرالک حرکات واقعه سنه ترتیب جزائیتیه ویانه اوزرینه حرکت اولنوب یکریمی برکون محاصره و کمال کر میتله محاربه اولندیغی حالد تسخیری ممکن اوله مدی . چونکه صدراعظم ابراهیم پاشا ویانه قلعه سی تکلفات عظیمه یه محتاج اولماق مطالعه سیله بیوک طویلر استصجابنده قصور ایلشیدی اگرچه برمدت دها محاصره یه دوام اولندیغی حالد شاهد مطلوب مرأت تیسرده جلوه نما اوله جفی بدیهی ایدیه ده ذاتاً ویانه ایله ممالک اسلامیه بینده علاقه اتصال اولدیغنه مبنی ضبطی غیر قابل و موسم شتا دخی داخل اولوب مع مافیه ویانه نک سکسان یوز ساعت قدر جوانب اربعه سی غارتگران عسا کر واسطه سیله تخریب و احراق قانه رق امر جزا کاینغی ایفاقلمش اولدیغندن ویانه ده محبوس بوانان اسرای اسلامیه نک سبیلاری تخلیه قانمق و مجار قرالنه تعرض اولنماق اوزره

محصورینك وقوعبولان نیاز واستدعالری موقع قبولده واقع اولوب دار اسلامه عودت وشدت شتادن خلیجه زحمت چکیلهرك استانبوله مواصلت بیورلدی .
 نمنجه قرالی فرندوش مجارستان هواسندن کندوسنی الهمدیغندن طقوز یوز اوتوز سکز سنه سی تکرار بودین قلعه سی محاصره ایلدکده سمندره سنجانی میرلوا سی اولان یحیی پاشا زاده محمد بك تحت حکمنده بولنان جنود موحدین ایله امداده شتاب واردوی هایونك دخی قریب الوصول اولدیغنی اشاعه و اشراب ایتمکله فرندوش قرال عودته مجبور اولدی .

بو خبر دو دواته واصل اولدقده سلطان سلیمان خان حضرتلری تکرار سوق توسن عظمت ایدرك نمنجه ممالکنی زیر وزبر و یکرمدن متجاوز قلاعی مسخر تیغ ظفر پیکر ایدوب حد و حساب کلز انواع غنایم و یوز بیکدن متجاوز اسرا اخذ ایدرك جانب دار السلطنه یه معاودت بیوردیلر .

فاتح مرحومك نصب کرده لری اولان قریم خانی منکلی کرای خان فوت اولدقده اکبر اولادی اولان محمد کرای جالس سریر حکومت و بر مدت مرورنده شهیداً مرتحل دار آخرت اولغله غازی کرای نام سبی اوغلی وارث تحت پدر اولدی ایسه ده صباوتی حبسیله قریمده انواع شورش حادث اولدیغندن منکلی کرای مرحومك اولادنن اولوب کوچکلککندنبرو دائرة سلیم خانیده تربیه اولنش اولان سعادتکرای طرف پادشاهیدن قریم خانلغی ایله بر مراد و کفه مقاطعه سندن یومیه بیك اقچه جیب خر جلغی تعیینیه منظومه اقبالی مستزاد قانمشیدی بر قاچ سنه متکا پیرای حکومت دشت قیجاق اولدقندن صکره اسلام کرای نام برادری حرباً تحت خانی بی غصب ایتمکله سعادتکرای دردولته کلوب صنوف عواطفه قرین و الی الوفات استانبولده مکین اولدی .

بو جهته اسلام کرای تحت قریمده مستقر اولدی ایسه ده حرکات واقعه سی مخالف رضای سایمان خانی اولدیغنی بیلدیکنندن خوف تیغ پادشاهی ایله راحت و حضوردن مهجور و بواندیشه ایله عاقبت حکومت قریمدن عرض فراغه مجبور اولغله قریم خانلغی رکاب هایونده بولنان صاحبکرای نام کوچك برادرینه توجیه بیورلدی .

امرای اکراددن بتلیس حاکمی بولنان میر شرف شاه عجم درکاهنه دخالت ایتمکله بتلیس حکومتی اولامه پاشایه توجیه بیورلمشیدی میر مرقوم شاه طرفندن اقدار اولنه رق پاشای مشار الیه اوزرینه هجوم ایدوب وقوعبولان محاربه ده منهزم و مقتول اولدی ایسه ده شاه عجمك بوکونه متجاوزانه حرکتی و باخصوص بغداد حاکمی اولوب طرف پادشاهی یه

تمایل بولنان امیر ذوالفقاری بر تقرب ایله قتل و اعدام ایتسی چالیران محاربه سندن
برو مستور خاکستر تغافل اولان آتش عدوانک، یکی باشند شرر افشان اولمسی استلزام
ایسکله صدر اعظم ابراهیم پاشا جیوش کافیه ایله جانب شرقه اعزام بیورلدی.

صدر مشار الیه وان قلعہ سنی و ارجیش و وسطان و عادالجواز و اخلاط بلده لرینی
ادخال قلمرو سلطنت ایدرک تبریزه داخل و متعاقباً سلطان سایمان خان حضرتلری دخی
موکب هایون ایله واصل اولوب شاه مشار الیه اردوی صدر اعظمی ایله مقابله تدارکنده
ایکن صاحبقران عصرک و رودینی استماع ایتدکده جبال شاهقه یه کریزان اولدیغندن خطه
اذربایجان فرسوده سم سمند عثمانیان اوله رق جانب بغداده عطف عنان اولندی.

شاه جانبدن محافظ بغداد اولان تسکلی محمدخان نیم جان ایله سمت فرارده پویان اولمغین
دارالخلافه بغداد بی اتعاب شمشیر فتح و تسخیر اولوب آلتی آی مقداری اقامت هایون
مدتنده حله و شهر بان قاعه لری ولورستان و واسط و مشعشع و جزایر قطیف الکالری فرالقب
شهریاری ایله شرفیاب و بصره حا کمی راشددخی عرض اطاعت و انقیاد ایله سالک راه صواب اولدی
خطه بغدادک اسباب محافظه سی اتمام و شاهک وانی محاصره سی استماع اولمقدن ناشی
تکرار ایران اوزرینه سوق سمند اعزام اولوب موکب هایون درگزینه واصل اولدقده
شاهک عفو جرایم رجاسیله نیاز نامه لری وارد اولدیغته و مقصد اصلی اولان عراق عرب
حوزه حکومته ادخال قلمش ایدوکنه بنه نظر قبولده واقع اولوب طموز یوز قرق
ایکی سنه سی اوائلنده استانبوله مواصات میسر اولدی.

صدر اعظم ابراهیم پاشا سلطان سایمان خان حضرتلرینک شهزاده لکندنبرو منظور
نظر التفاتلری اولوب اون اوچ سنه دن عبارت اولان زمان صدارتنده دخی فوق العاده
استقلاله مظهر اولمشیدی غرور جوانی و نشئه کامرانی ایله بعض حرکات ناسزایه
مبادرت و القاب و مناشیرده سرعسکر سلطان نامنی اشاعت ایتسکله خصمائی شرکت سلطنت
دعوا سنده اولمق تهمیله متهم ایلدکارندن و پادشاه حضرتلری دخی اوضاع و اطوارندن
وسوسه یه ذاهب اولدیغندن معتاد اولدینی اوزره برکیجه سرایده الیقونیلوب و کافی السابق
التفات و احترام ایفا بیوریلوب جامه خوابنه واردقده تعیین اولتان مأمورلر واسطه سیله
قتل و افنا و مهر صدارت ایاس پاشایه اعطا قلندی

مدلولو اهالی سندن اورج بک نام غازی تدارک ایلدیکی برقاچ قطعه سفینه ایله یقین و قته
قدر جاری اولدینی و جهله دول غیر متعاهده تبحار کیلرینی ضبط ایله اغتنام ایده کلسکله کوندن
کونه جمعیت و اقتداری تزیاید ایلش و برمدت افریقا ساحلارنده کشت و کذار و عاقبت الامر

جزایر غربی ضبط ایله جای تحصن و قرار ایلد کدنصکره مرتحل دار آخرت و برادری خیرالدین بك جالس سریر امارت اولمشیدی لکن میر مشارالیه تورک آدمی اولمق حسبیله افریقا ساحلارنده تشکیل ایتدیکی حکومتک دوامی ینسه تورکستانک اغانه سنه و بودخی پادشاه عصرک مساعده سنه محتاج اولدیغنی درک و تیقن ایلدیکندن اهایلسنک وقوعبولان استدعاسی اوزرینه جزایر حکومتی سلطان سلیمان نامنه اوله رق قبول و مؤخرأ پادشاه حضر تلرینک بغداد سفرینه عزیمتلرندن مقدم اون سکر پارد قادرغه ایله در سعادت و ورود ایلكه جزایر غرب بکدر بکیلیکی الحاقیله قبودان دریا نصب و بندکان ساختت سنه سالکینه ادخال قلمشدر

مشارالیه امور ترسانه یه نظام و دونمای هایونه رونق تام و یروب بعد قورقه جزیر دسنی تسخیر نیتیه رایت هایون تجتر و اهترازه آغاز ایتدکده مشارالیه خیرالدین پاشا و وزرادن سردار تعین قلنان لطفی پاشا ایکوز سکسان پاره قادرغه ایله ارسال قاندی چونکه وندکلور خیلی مدتدنبرو جانب سلطنت سنیه مطاوعتکارانه حرکت اوزره بولندقلری حاله کچن سنه بوسنه قلاعنک بعضیلری تعرض و عثمانلو تجار سفینه لرینه تسلط ایتمشلر ایدیکه بودخی دولت علیه نك خصم طبعیسی اولان اسپانیا قرالی و آلمانیا ایمپراطوری مشهور شارل کنک اثر تشویق و تحریکی در بناء علیه طقوز یوز قرق اوچ سنه سی توغ پادشاهی قورقه مقابله سایه ساز و دونمای هایون دخی جزیره مزبورده جوارینه لنگر انداز اولوب قرق اوچ کون حصر و تضییق اولمش ایسه ده فتح و تسخیری میسر اوله مدیغنه و موسم شتا دخی تقرب ایلدیکنه مبنی ایکوزدن زیاده قراخریب و افنا و جنود موحدین انواع غنایم ایله اغنا اوله رق طرف دار السلطنه یه عودت بیورلدی

بغدان و یوده سی پترو متعهد اولدیغی مال خراجی ارسالده اهمال اوزره حرکت واعادی دولت ایله عقد پیوند موافقت ایلدیکندن اسب همه ارخای عنان اولوب طقوز یوز قرق بش سنه سی علم پادشاهی کشور بغدادده لامع اشراق اولدی مجرد مهابت کوبه موکب هایون ایله مزبور و یوده برکیجه بغته عازم سمت فرار و جمع ایتدیکی سکسان بیک قدر حشرات آن واحده تار مار اولمغله بغدان کبراسندن اولوب بروقتدنبرو ملازم رکاب هایون اولان چیتنه ولد استغان بك و یوده نصیله تختگاه عثمانی جانبیه رجعت و عسا کر تاتار ایله معیت پادشاهیده بولنان قریم خانی صاحبکرای تشریفات هایون ایله مکرم اولدقندن صکره حکومتگاهی جانبیه عودت ایلدی

بغدان سفرینه حرکت هایون اثناسنده قبودان عازی خیرالدین پاشا یوز الی پاره

قادرغه ایله اقدکزر محافظه سنه اعزام قلمشیدی وندیکه تابع کرید وکریه وکفالونیه مثللو
یکرمی بش قطعه جزیره غارت و تخریب اواندقدن صکره اوچیوز پاره قادرغه و یوز پاره
قالیوندن عبارت اولان واسپانیا امرالمرندن مشهور آندریادوریا قومانداسنده بولسان
متفقین دونماسیله اینه بختی اچیققرنده محاربه شیدیه واقع اوله رق جنود موحدین نائل
فتح و ظفر و یوز قادرغه ایله الی قدر قالیسون مسخر اولدینی خبر مسرت اثری واصل
در دولت اولدی

بونک اوزرینه وندکلور اوچ یوزبیک یالیز التونی تضمین سفر و سنوی سکنز بیک
التون ویرکو ویرمک اوزره عتد صلحه موفق اولدیلر

هندستان حکمدارلرندن کچرات پادشاهی اکبر شاد برطرفدن هایون شاهک و بر
طرفدن پورتکیزلرک مهاجمتندن مضطرب اولمغله خلیفه اسلامه عرض شکایت ایلدیکندن
سلطان سایان حضرتلری بغداد سفرینه متبی حرکت اولدقلمری زمانده مصر بکلر بکیسی
سایان پاشا هند سفرینه مأمور اولوب استانبولدن و مصردن جنکچی و کورجکی اوله رق
اوتوز بیک قدر عسکر ترتیب و سویشده تنظیم اولسان دونمایه ارکاباً اعزام قلمشیدی
لکن مزبور سایان پاشا اق غلردن و حکمت حکومتدن عاری جبارده دن اولمغله جدهیه
و یمن ساحلرینه اوغرایه رق عدن شهرینه واصل اولدقده حاکی بولسان ابن عامری
عرض اطاعت ایتش و کندوسی دخی امان ویرمشیکن مائه طمعاً قتل و اعدام ایلدی .
بو حوادث یمن و هند طرفلرینه منتشر اولدقده عموم خلقک تنفرینه باعث اوله رق
حتی کچراته وصولنده اکبر شاه وفات ایتش ویرینه محمود شاه قاعد مسند امارت اولمش
بولمغله شاد جدید پورتکیزلر ایله اتفاق ایدرک پاشای مزبوره مدافعه ایلشدر .

بناءً علی ذلک سایان پاشانک اورالرده وقوعبولان محارباتی بر فائده بی مفید اولیوب
یالکز کندوسنک ثروت و سامانی مستلزم اولدی مؤخرآ استانبوله کلوب بذل اموال
ایدرک ایاس پاشادن صکره صدراعظم اولان لطفی پاشا اوزرینه وزارت عظمایی استحصال
ایتش ایسه ده وزیر ثانی خسرو پاشا ایله دیوان هایونده مجادله بی یکدیگرینه خنجر چکمک
درجه سنه قدر ایصال ایلدیکندن معزول و چوق کچمکسزین دار مجازاته موصول اولدی
یرینه رستم پاشا صدر اعظم اولمغله مورخین بو وقعه بی انک تصنیغه حمل ایدرلر سایان
پاشا سفرندن صکره پیری قبودان و کال قبودان و سیدی قبودان قوماندالریله مکرراً
سویشدن هندستانه دونمالر کوندریلوب چوق جنکدر اولمشدر که تفصیلاتی کاتب چلبی
مرحومک اسفار البحار نام تاریخنده مندر جدر .

طرف پادشاهیدن مجار قرالی نصب اولنان یانوش قرال فوت اولمغله اوغلی استفان
صندالی قرالی یه اقعاد اولنمشیدی لکن صبی شیر خوار اولمق ملاسه سیله نمچه قرالی
اولان فرندوش بو کره دخی بودینی محاصره ایله مشغول حرب و ستیز اولدینی مسموع
هایون اولدقده وزرادن محمد پاشا و سکبان باشی علی جناح الاستعجال ارسال و متعاقباً
تحریرک لوای شوکت و اقبال اولنوب بودینه لدی التقرب نمچه قرالینک قرق بیکه قرب
عسکری قتل و اعدام و محاصره ایچون کتوردکلری طوب و تفنک و سائر ادوات جنک
کاملاً ضبط و اغتنام قانددینی خبر مسرت اثری پاشای مشار الیه طرفندن واصل و مظفریت
عظیمه وقوعه اطلاع حاصل اولمغله سرور نا محصور ایله بودینه مواصلت و نمچه قرالینک
رشته طمعنی قطع ایچون استفان قراله باباسی اوجاغی اولان اردل قرالغی توجیه و بودین
ایالتی طقوز یوز قرق سکز سنه سی یحیی پاشا زاده محمد پاشایه تفویض قلمندی

موسم شتا ادرنه ده امرار ولوازمات سفریه استکمال اولندقدن صکره نمچه قرالندن
اخذ انتقام نیتله رکاب همته وضع قدم بیوریلوب شقلوش و استرغون و استونی بلغراد
قلعه لر یله نیجه قلاع و بقاع نمچه لولر یندن امتزاع قلمغله و قرال مشارالیه هجوم عثمانیانه
تاب آورمقاومت اوله میه جغنی تیقن و مجارستانی در دست ایده یم دیرایکن ویانه بی محاطر دیه
القا ایده جگنی تفضن ایتمکله سنوی اوتوزیک التون ویرکو ویرمک شرطیله ترک محاربه
خصوصنده استحصال مساعده ایدوب سکتوار سفرینه قدر یکر می ییلدن متجاوز زمان
ممالک نمچه هجوم جیوش عثمانیه دن امین اولدی .

طقوز یوز تار یخندن صکره جه اندلسه بولنان حکومت اسلامییه کلیاً مندرس اولمغله اکثر
اهل اسلام قبول رعیت ایدوب قالمشیر ایکن اسپانیوللرک کوندن کونه تزیاید ایدن اذا
وجفالری طاقت فرسا اولدیغندن طاقم طاقم افریقا ساحل لرینه کچمکه باشلامر یله خیرالدین
پاشانک کیفیت ظهور و غزواتی متضمن تاریخ خصوصیده و کاتب چلبینک اسفار البحارنده
تفصیل اولدینی اوزره اولوقتلرده قورصان حالنده بولنوب تحت تملکنده بولنان اون
یش یکر می پاره کمی ایله اسپانیول سفینه لرینی طوتمق و مقتدر اوله بیلدیکی ساحل لری
اورمق ایله مشغول و مغتنم اولان پاشای مشار الیه ذکر اولنان اندلس مسلمانلرندن
التمش یتش بیک قدر نفوسی تخلص و افریقایه کچورمشیدی

اسپانیای قرالی اولان شارل کن مؤخرأً المانیا ایمپراطور لغی احراز و قرنداشی فرندوشی
نمچه تحت قرالیسنه اصعاداتیمکله کسب عظمت و قوت ایدرک بر طرفدن افریقا ساحل لرینه
تجاوز و بر طرفدن فرانسه یه تخطی ایدوب حتی فرانسه قرالنی اسیر ایتش و افریقا

خلفه اسپانیولر بپنده اولان عداوت مرتبه قصوایه واصل اولدینی حالد شارل کن
مجارستانی قرنداشی اولان نجه قرانیه ضبط ایتدیرمک داعیه سیله ظهوره کلان محاربات
متوالیه دن ناشی سلطان سایان ایله دخی خصومت قویه پیدا ایش ایدوکنه مبنی فرانسه
قرانک شارل علیه اوله رق واقع اولان استمدادی سلطنت سینه نک منافعه تمامیه موافق
کله رک طقوز یوز قرق طقوز سنه سی خیرالدین پاشای غازی مکمل بردونما ایله ارسال قانندی
مشارالیه اوچ درت سنه علی اتوالی اسپانیا ساحل واطه لرینی غارت و تخریب و اسپانیا
دونماریله و افریقا ساحل لرینه مستولی اولان اسپانیولر ایله کرة بعداخری محاربه لر
ایدک فتوحات عظیمه یه موفق اولدقدن و برآ و بحرآ اسپانیولرک کسرقوت و قدرت لرینی
استیصال ایدک اعلام عثمانیه نک هیبت و سطوتنی اق دگزده یار و اغیاره اعتراف ایتدیر-
دکن صکره استانبوله عودت و سکسان یاشنی متجاوز اولدینی حالد مرتحل دار آخرت
اولوب بشکطاشده اعداد ایلدیکی تربه مخصوصه یه دفن اولندی .

غازی مشار الیه اق دگزلی رایات عثمانیه حکمنه وضع ایلدکن بشقه مکتب تربیتده
طورغود پاشا و قایج علی پاشا و جزایر بکلر بکیسی حسن پاشا و صالح پاشا کی مجاهدینی
یتیشدیرمش اولمغله بعدالوفات دخی خیلی مدت آناری پایدار اولمش و افریقا ساحل لرینه نک
کاملاً اسپانیولر تسلطندن نخلیص و قبریس جزیره سنک فتحی انلرک اقدام همتیه میدانه کلشدر
طقوز یوز الی تاریخنده نجه سفرندن عودت هایون و قوعندن صکره الی بش
سنه سنه قدر اختیار حضور و راحت اولنشیکن دارای عجم اولان شاه طهماسبک برادری
انقاص میرزا درگاه سایان خانی یه دخالت و قرنداشنک ظلم و تعدی سندن شکایت ایتمکله
انک رجاسیله ایران اوزرینه حرکت اوانوب مقدمه فتح اولمشیکن مؤخرآ شاه عجمک
ید استیلا سنه گرفتار اولان وان قلعه سی بعدالتسخیر شهزاده مشار الیه بعض امر او قبائل
اکراد ترفیق اوله رق کشور ایرانه اعزام قانندی ایسه ده درایت و لیاقتی حصول مطالبه
کافی اولدیغندن برادرینک دانه فریبی ایله افتاده دام اعدام اولدی .

پادشاه حضرتاری حلبده مشتا نشین اولوب اول بهارده ینه ایرانه هجوم اولنق نیتیه
حرکت ایتمشیکن شاهک قرارگاهی معلوم اولدینی جهته متاعب بی فائده دن غیری برشی
حاصل اوله میه جفی تبین ایلمسنه مبنی استراحت اشکر منصور ایچون استانبوله عودت بیوردی
صدر اعظم رستم پاشا القاسیله قریم خانی صاحبکرای معزول و منصب خانی یه منکلی
کرای اخفادندن دولت کرای موصول اولوب خان معزول در دولته عازم اولدی ایسه ده
خلفی غدیریله اثنای راهده سیراب شهد شهادت اولدی

اردل قرالی استفانك صباوتی و امرای اردلك نمچه قرانه تمایلی سبیلریله ممالك اردلن اولان طمشوار و پچوی و لیووه قلعهلری نمچه عسکری دست محافظنه کچدیکی مسموع پادشاهی اولمغله طقوز یوز اللی طقوز سنه سی میر میران روم ایلی صوقوللی محمد پاشا ارسال اولانه رق ذکر اولنان پچوی و لیووه و ایرتسی سنه وزرادن احمد پاشا سردار - لغیله طمشوار قلعهلری فتح و تسخیر اولنوب بقیه ارداستان امتیازات سابقه سنده ابقا و اولیابده بر قطعه فرمان عالیشان اعطا قلندی

صدر اعظم رستم پاشانك حلیله سی مهر ماه سلطان شهزاده سلطان بایزیدك لابوین قرنداشی اولمق حسیله صدر مشار الیه وراثت سلطنتك اكا انحصاری ترتیب متمداتنه ساعی اولدیغندن بیوک شهزاده سلطان مصطفی خصم قویسی ایدی .

شاه عجمك بعض سرحدات خاقانی به اطالة دست خسارت ایلدیکی رسیده سمع هایون اولدیغنه مبنی رستم پاشا اناطولی جانبنه امرار قلنمغله سلطان مصطفی نك ایالت کاهنه تقرب ایلد کده شهزاده مشار الیه بغته کندیوسنی باصوب قتل ایتك افکارنده بولندیغنی استخبار و طرف پادشاهی به اشعار ایلدیکنندن پاشای مشار الیه استانبوله جلب اولندی بر طرفدن انك القا آتی و بر طرفدن اثر تصنیعی اوله رق طوائف عسکریه نك پادشاهك اختیار لغندن و شهزاده سلطان مصطفی نك تحت سلطته لیاقت و استحقاقندن بحث ایللری شهزاده مشار الیهك طالب تخت و تاج و متشبت مطلب اولمسی حقنده سلطان سلیمان خان حضرت تلرینك و همنی درجه تحقیقه ایصال ایلدیکنندن طقوز یوز التمش سنه سی ایران سفری شایعه سیله استانبولدن حرکت و قرمان ارکلیسنه مواصلت اولنوب سلطان مصطفی بر موجب امر هایون معسکر پادشاهی به وارد اولدیغنی آنده قرق یاشنده ایکن شهد شهادتی نوش ایلدی و بوفسادك مؤلفی بولنان صدراعظم رستم پاشا تطیب انام و ستر افعال سیهقام ایچون معزول و مقام صدارت عظمایه طمشوار فاتحی احمد پاشا موصول اولدی .

موکب هایون حلبده مشتاشین اولوب اول بهارده ایران اوزرینه حرکت و شاهك حرکات غارتکرانه سنه مقابله روان و نحجوان اطرافنی یکریمی کونلك مسافه به قدر آتش فنا ایله خاکستر قلندقدن صکره مشتای ارضرومه عودت بیورلمش و حرکات سرکشانه لرینه مجازاة کشور کورجستان دخی غارت قلنمشدر .

ارضرومه اقامتدن مقصد پادشاهی سنه آتیده ینه ممالك ایرانه هجوم نیتنه مبتنی اولدیغنی شاه طهماسبك معلومی اولمغله ایکی کرم تقدیم نیازنامه ایله استدعای عفو و صلح ایلدیکنندن

ترفيه رعاى طرفين ايجون مساعدۀ پادشاهی به مقرون اوله رق طقوز التمش ایکی سنه سی
تختگاه عثمانی جانبیه عودت وسکتوار سفرینه قدر اون برسنه استراحت بیورلدی
پادشاه حضرتلری ایرانده ایکن مقتول سلطان مصطفی اولق و بر تقریبه دست جلاددن
قورتمش بولمق ادعاسیله یانبولی طرفلرنده بر شخص ظهور ایدوب باشنه خیلی اشقیا جمع
ایتمشیدی روم ایلی محافظه سیچون ادرنده مقیم اولان شهزاده سلطان بایزید شیخ
مرقومی اله کچروب اعدام ایتش ایسه ده کویا مر قومک ظهوری صدراعظم بولنان احمد
پاشانک اثر تصنیعی اولدینی رستم پاشا طرفدارانی اولان حرم هایون متفدانی جانبندن
ذات شاهانه به القا اولندیغنه ورستم پاشانک صدارتده بولمسی سلطان سلیمان خان حضرتلرینک
باعث حضور قلب وامینی بولندیغنه بناء احمد پاشا بوافترا ایله کشته تیغ قضا ورستم
پاشا اینکچی دفعه اوله رق مهر هایونه نائلتله کارفرما اولدی .

طقوز یوز التمش التی سنه سی کوتاهییه والیسی اولان کوچک شهزاده سلطان بایزیده
آماسیه و مغنیسا والیسی بولنان بیوک شهزاده سلطان سلیمه قونییه سنجاقلری توجیه
اولمغله بومعامله دن سلطان بایزید استشمام بوی تبعید ایلدی .

چونکه سلطان سلیمان خان حضرتلری واصل سن شیخوخت اولوب یا خصوصیات
تقریبس ایله خسته بولندقلرندن ایکی شهزاده بیننده آتش رقابت تاج و تخت علو افشان
اولمشیدی بنا برین اگرچه سلطان بایزید امر هایونه امتثالاً آماسیه به کیتمش ایسه ده
مقدمه کندوسنک وحالا سلطان سلیمک لاله سی اولان مصطفی یاشانک دانه مکر و فریبیله
کرفتار دام نفاق اولوب جمع عسکر ایدرک سلطان سلیم اوزرینه هجوم ایلدی .

صدر اعظم رستم پاشا سلطان مصطفی وقعه سیله مهم ایدوکنیدن بودفعه شهزاده لر
احوانه دائر سوز سولمکه قادو اولماغله و سلطان بایزید پدری جانبندن وقوعبولان
نصایحی تلقی ایتمامکله عاصی نظریله باقیلوب جانب سلطنتدن ارسال سپاه و تعیین امرای
اطراف ایله سلطان سلیم طرفی تقویه اولمغین قونییه صحراننده وقوعبولان محاربه ده سلطان
بایزید منهزم و فرار کنان ایالتگاهنه عازم اولدقدن صکره عفو جرایم نیازی حای
طرف پادشاهی به تقدیم ایلدیکی نیاز نامه لر و جانب هایوندن پرسش احوال ضمننده
کوندریلان فرمانلر لالا مصطفی پاشانک تدابیر رهزانه سیله طرفینه واصل اوله مبدیغندن
بیچاره سلطان بایزید عفو پدر عالیکهردن نا امید اولوب بالضروره درت نفر اولادینی
استصحاب ایدرک شاه عجم درگاهنه التجا ایلدی

شاه مشارالیه شهزادمنک قدومتی سرمایه جرم منفعت ایدینه رک مفصلات توارنخدمه

بیان اولندیغی اوزره درت بش سنه علی التوالی مراسلات و مجاوبات جریان ایدوب نهایت طرف پادشاهیدن و وارث تخت اولان سلطان سلیم جانبندن برملیوندن متجاوز التون و کیتلو هدایا و یرملک شرطیله شهزاده مشار الیهک میتاً تسلیمی قراراشدیرملغله طقوز یوز آلتش طقور محرمده سلطان بایزید درت نفر اولادیله قزوینده اعدام و جنازه لری طرف رومه اعزام قیلقوب خارج سیواسده دفن ایتدیرلدی .

خیرالدین پاشا مرحومدن صکره هر سنه دونمای هایون اقد کزه چیقوب اسپانیا جزیره و ساحل لرینی غارت و افریقا طرفلرندن اسپانیولارک دفعنه سعی و غیرت ایده کلدکارندن جزایر و طرابلس غریبه اولان حکومت عثمانیه کسب تأسیس ایشیدی . طقوز یوز آلتش بش و آلتی سنه لری ینه فرانسه قرالنک طاب و استعداسی اوزرینه قبودان دریا پیاله پاشا آقد کزه چیقوب دشمن ساحل و جزیره لرینی غارت و فرانسه لرله معاونت قانندیغی مثللو مؤخرآ اسپانیا و ایتالیا فدیایلی کیتلو دونما ترتیبیله طرابلس غرب پیشگاهنده بولنان جربه جزیره سی ضبط و تحکیم ایلدک لری طرابلس بکک بکیسی طورغود پاشا طرفندن عرض اولمغله مشارالیه پیاله پاشا طقوز یوز آلتش سکز سنه سی دفع دشمن ایچون اولجانبه سوق مر اکب سطوت ایدوب متفقین دونماسی جربه قاه سنک آلتنده بولندقلری حالد اوزرلرینه هجوم اولته رق و قوعبولان ملحه کبراده قرق قدر دشمن کیمسی ضبط و ناپولی جنرالی و مشهور اندریا دوریانک اوغلی سرجلیا امرالی سلسله اسره ربط قیلقوب سفاین سائر کلاً اغراق و افنا اولندی .

بعده طورغود پاشا غرب عسکر یله وارد اولمغله قلعه مرقومه نک فتحه غیرت و عون و عنایت جناب رب قدیر ایله آورده قبضه جلادت قندقدن صکره بالتخریب قبودان مشارالیه سفن مفتوحه و اسرای مرقومه ایله دارالسلطنه یه مواصلت ایلدی . جربه جزیره سنک تسخیرندن صکره آقد کز قورصانلرینه مرکز اولان مالطه آطه سنک ضبطی تصمیم اولنوب طقور یوز یتش ایکی سنه سی اسفندیار اوغلی سلاله سندن وزیر رابع مصطفی پاشا سردار و معیتته قبودان دریا پیاله پاشا تعیین و طرابلس غرب بکک بکیسی طورغود پاشایه دخی مرافقی متضمن فرمان هایون اصدار و تسیار قلندی مع مافیه طورغود پاشانک رأی اوزره حرکت اولمسنی کرک سردار و کرک قبودان پاشایه طرف پادشاهیدن توصیه و تنبیه بیورلمشیکن دونمای هایونک مالطیه وصولنده طورغود پاشا هنوز کلامش اولدیغندن اضاعه وقت اولنماق مطالعه سیله لیمان قلعه لرینک محاصره سنه مباشرت اولنوب چند کون مرورنده پاشای مشارالیه وارد و کیفیت

تشبیه مطلع اولدقده اصل مالطه حصاری تسخیر اولمقدقه بونلر ایله اوغراشمق اتلاف لوازمات و اتعاب عسکردن غیری برشیئی مفید اولمیهجفی بیانیله سردار و قیودان پاشا لرد عتاب ایتمش ایسه ده لاجرم مباشرت اولنان امرک آتمای لازمه دن ایدوکندن یو بایده صرف اقتدار و یکریمی اوچ کون محاربه شدیده و قوعیله ذکر اولنان قلعه لر فتح اولنوب لکن اننای محاربه ده طورغود پاشا شهید اولدیغندن و لوازمات قلعه کیری په دخی نقصان طریان ایلدیکندن اصل مالطه قلعه سنک محاصره سی نتیجه بخش مراد اولماغله غارت اطراف ایله اکتفا اولنه رق عودت قلندی .

سلطان سلیمان خان حضرتلرینه علت پیری مستولی اولق حسبیله آلتمش تاریخنندن حکره برطرفه حرکت بیورمدیغندن و آلتمش سکز سنه سنده صدراعظم رستم پاشانک و فتیله مقام صدارت عظمایه اعتلا ایدن سمیز علی پاشا دخی رکوب و نزوله غیر قادر ایدوکنندن آفتاب سطوت عثمانیه نمچه قرالی نظرنده منکسف کورندیکنه مبنی معین و معهود اولان ویرکونک ارسالنده اظهار بطائت اولمغه باشلامشیدی . سمیز علی پاشانک دخی و فتیله صدراعظم نصب اولنان صوقوللی محمد پاشا اقتدار سلطنت سینه پی تکرار اظهار ایلک لزومنی عرض و آنها و پادشاه حضرتلرینک بالذات سفره عزیمتلی باینده تشویق و اغرا ایتکله اون ایکی سنه دن برو آرامگیر کنج کون اولان رایات همایون تبختر و اهترازه اغاز ایدوب طقوز یوز یتمش درت سنه سی محرمنده قلعه سکتوار محصور لشکر جرار اولدی بو قلعه قوه قاهره دولت علیهیه مقاومت ایتک اوزرد خلی وقتدن برو فوق العاده تحکیم و ترصین قلنمش و بهادرلکه مشهور اولان رزونجق نام خروات جنرالی جیوش و مهمات متخبه و مکمله ایله محافظه سی درعهده ایدوب قیامش اولمغه بادی نظرده فتح و تسخیری خارج طوق بشرکی کورینور ایدی لکن عسا کر اسلامیه نک اقدام و غیرتی و فداکارانه مهاجماتی ثمره سیله بر قاچ کون ظرفنده واروش قلعه ضبط اولنوب ایچ قلعه ده بولنان جنرال مرقوم سمت تسلیمه دعوت قلندقدده مرکز مخالفتده پابرجا اولدیغندن اطراف حصاره طاغیرکی اودون یغلوب آتش ویرلمسیله دائراً مادار کرفتار التهاب نار اوله رق بر وجهته آرامه امکان قلمدیغنه مبنی جنرال مرقوم بر مقدار اتلو ایله چیقوب صاوشمق صددنده ایکن قتل و تدمیر و قلعه مرقومه فتح و تسخیر قلندی

نمچه قرالی مکمل براردو ایله امداد ایچون جوار سکتواره کشیکن اعانهیه قدرتیاب اوله مدیغی حالد قلعه مرقومه نک قوه قاهره اسلامیه ایله زیر وزیر اولدیغنی استماع ایتدکده ارتکاب رجعت قهقری ایلدی

یتیمش درت سنه سی صفرینک یکر می برنجی کونی بوفتح مبین وقوعبولوب اواخشام سلطان سایمان خان حضرت تلمری علت زحیردن یتیمش درت یاشنده وسلطنتک قرق سکنزنجی سالنده مرتحل دار آخرت اولمغله برطرفدن کوس شادمانی چالینور وبرطرفدن درون اوطاغ هایونده خفیا مرحومک جنازه سی غسل قیلنور ایدی

کیفیت وفات بر معتاد کتم اولنوب کوتاهیه والیسی بولنان وارث سلطنت سلطان سایم خان حضرت تلمرینه ضراعتنامه ارسال وامر ورودلری استعجال اولنوب طوائف عسکریه تعمیر قلعه وتحریب دیار دشمن مثللو مشاغل ایله اشغال قلندی

سلاطین عثمانیه ده سلطان سایمان خان حضرت تلمری کبی بختیار برپادشاه کمدیکی مواد آتیه ایله ثابت اولورکه اولاً اوان جوانیده یعنی یکر می الی یاشنده جلوس ایدوب قرق سکنز سنه سلطنت سورمشدر ثانیاً صدف سلطنتک در یتیمی اولمغله ورثه سلطنت منازعات ومقاتلاتندن مصون قالمشدر ثالثاً پدر جنت مقرلری شرق وغربی سیف سطوتیه لرزان وارکان دوات وانراد عسکریه بی بروجہ اتم تربیه ایتمکله قدر ومنزاتی واصل مرتبه عال العال اولمش برتخت عالیبخته جلوس ایشدر رابعاً کمال پاشا زاده وابوالسعود افندی کبی تشکیل دولته قادر فضلیه وخیرالدین پاشا وطورغود پاشا مثللو مجاهدینه مقارن اولمشدر کندولری دخی اوائل سلطنتلرنده اجداد عظاملری کبی بالذات اداره امور دولت ایدوب اون اوچ دفعه علم افرازسفر اولمشدر ایسه ده طقوز یوز الی تاریخنندن صکره اولکی همت ومساعیسنه نسبتله نوعما کسل طاری اولدی

حق ذکر اوانان اون اوچ سفرك طقوزی سلطنتلرینک نصف اولنده ویالکیز دردی نصف اخرنده بولنمی وعجم شاهنه التجا ایدن شهزاده سلطان بایزیدی شاه عجمی تهدید ایدرهک حیا المی شان سلطنتی ایجابندن ایکن خلاف مأمول اچه وبوغچلر اعطاسیله میتا المغه راضی اولمنی بوقضیه بی مؤیددر

مژده سلطنت سلطان سلیم حضرت تلمرینه واصل اولدقده سرعت سیر ایله استانبوله وارد وتخت عثمانیه صاعد اولدیغنک دردنجی کونی اردوی هایون جانبیه حرکت وصدر اعظم صوقوللی محمد پاشا دخی فلعه سکتواری تعمیر وامور سرحداتی تنظیم ایلدکنصکره سلطان سایمانک جنازه سی صاغلغنده بندیکی عربیه تحمیل ایدوب اردوی هایونله باغراده طوغری عودت ایلدی

اگرچه پادشاه مرحومک وفاتی مکتوم ایسه ده امتداد زمان وروش حرکات سبیله موکب هایون خاقنک محسوسی اولمغله وپادشاه جدیدک بلغرادده منتظر ورود موکب

سلطنت اولدینی استخبار قلعه بفراده قریب محله امر وقت اعلان قانندی
 صدر مشارالیه سلطان سلیمه تذکره تقدیم ایدوب اردوی هایونی استقبال وطوائف
 عسکریه ترقی احسان بیورملرینی وارردو خلقی رسم بیعتی اجرا ایلدکن صکره اوطاغ
 هایونه کیرملرینی بیان ایشیدی سلطان سلیم ایله برابر کلان مقربان بوتکلفاته حاجت
 اولیوب امر جلوس و بیعت استانبولده تمام اولمغه صدر اعظمک بویله اعظام ماده ایلی
 کندو موقعی محافظه مقصدینه منیدر دیملیله سلطان سلیم اردوی هایونی استقبال ایلدکن
 سکره طوائف عسکریه نیک بیعتنه التفات ایتیه رک طوغریجه اوطاغ هایونه داخل اولدی
 بو کیفیت عسکری طائفه سنک کوجنه کیدوب انواع قیل و قاله متجاسر اولملریله
 و سلطان سلیم دخی یا کاش یوله کتدیکنه واقف اولمغه طوائف عسکریه بی تلطیف ایچون
 لالاسی بولسان حسین پاشایی روم ایلی مناصبتدن بریله یانندن دفعه مجبور اولوب لکن
 بونکله دخی مقصد حاصل اوله مدیغندن بعد العوده استانبوله الای ایله کیرلدیکی کون
 یکیکچر یلر سرای هایونک قیوسی قبادوب سلطان بایزید جوارنده ایکی ساعت قدر سلطان
 سایی آت اوزرنده توقیف و وزیرایه انواع حقارت ایلدیلر نهایت ایچلرندن برقچ نفر
 سوز صاحبلی حضورهایونه جاب ایله ترقی بخششلی قانون قدیم اوزرد اعطا اولمجه
 وعد بیوریلر ق کوج حال ایله غوغا تبس اولندی

بعد ازین صدر اعظمک معروضات و افادته کیمسه نیک اعتراضه جراتی قالممغه واصل
 استقلال تام اولمشدر

سلطان سلیمان مرخوم سکتوار سفزینه عزیمت بیوردقلری قپودان دریا پیاله پاشا
 دوتنای هایون ایله اقدکزه ارسال قلنمشیدی ساقز جزیره سنه واصل و امری جزیره
 اطاعت صوریلرینه اغتراراً پاشا کیمسنه داخل اولدقده جمله سنی اوروپایه اجلا و قلعه یه
 وضع و مستحفظ و امرا ایلدی بو خبر واصل سمع سلیمان خانی اولمقسزین مرتحل داربقا
 اولملریله سرلوحه ظفر نامه سلیم حانی اولمشدر

تبریک جلوس ایچون ملوک اطرافدن ایلچیلر کلدیکی کبی نمچه قرالی جانبندن دخی
 سفیر مخصوص وارد اولمشیدی سلطان سلیمان زماننده معقود اولوب سکتوار سفری
 سبیلله مختل اولان معاهده تجدید اولندی

اقصای عراق عربده واقع ملک مشعشع حاکی اولان ابن علیان اطاعت سلطنت
 سیه دن روگردان اولوب بصره حوالیسنی غارت ایتیشکن میر میران بغدادلی اسکندر پاشا
 شمیر سطوتیله تأدیب و ترهیب قلندی

آل مطهردن یمنده اماملق ادعاسنده بولنات آدم علم افراز عصیان اولمغله ایالت حبش بکدر بکیسی اولان اوز دمیر اوغلی عثمان پاشا یمین بکدر بکیسیکله اولجانبه ارسال و میر میران شام لالا مصطفی پاشا مأموریت سرداری ایله اجلال اولنمشیکن میر میران مصر سنان پاشا صرف تقدینه مساعی ایله سردارلق خدمتی استحصال ایدوب طقوز یوز التمش التی سنه سی درتیک سوار ی ایله برآ جانب یمنه عزیمت ایلدی

لکن وصول سرداردن مقدم عثمان پاشا ساحه یمنی فتنه آل مطهردن تطهیر ایتمکین. سنان پاشا برسنه قدر اولخوایدده حاکم مطابق العنان اولدقدن و اموال عظیمه اکتساب ایلدکدن صکره مصره عودت و یمین فاتحی عنوانی علاوه القاب منخرت ایلدی

آزاق دکنزینه منصب اولان تن نهریله حزر دکنزینه دوکیلان و وانا نهرینک بک دیکرینه قربیت حاصل ایلدیکی درت فرسخ قدر رحفر اولنور ایسه قاره دکنزدن بحر حزره امرار سفاین ممکن اوله رق تورکستان طرفلرینک تحت حکومت عثمانیه به ادخالی قابل اوله جغی کفه بکدر بکیسی اولوب فن هندسه ده مهارت کامله سی اولان قاسم پاشا طرفندن عرض اولنمغله پاشای مزبور اتمام خدمت ایله مأمور اولوب قیو قولی بلوکلرندن برقاچ بیک عسکر ارسال و قریم خانه دخی بوخصوصده اجرای معاونت ایلک ایچون نامه هایون اصدار اولندی و ایشه مباشرت قانندی ایسه ده خان مشارالیه بو مقصد حاصل و حکومت عثمانیه تورکستانه واصل اولدینی تقدیرجه قریم امارتی پایدار اوله میوب ممالک دولت علیه نک ایالات سائره سی حکمنه کیره جگنی درپیش مطالعه ایدرک صورت خیر خواهیده ترتیب ایتدیکی مقدمات مکر فریب عودت نابهنگام اقتضا ایتمکله عسا کر اسلامیه انواع فلاکت و مشقنه گرفتار و نصفندن زیاده سی تاف زده روز کار غدار اولدی

سلطان سلیم خان حضرتلری قونیده حکمران ایکن مصر بکدر بکیسی طرفندن تقدیم اوانان اتلری قبریس قورصانلری غصب ایلدکلرندن زینت افزای تحت عثمانی اولدقلرنده اخذ انتقامه قیام و دونمای هایونک استکماله نصب نفس اهتمام ایدوب لالا مصطفی پاشای قبریس فتحه سردار و دونمایه پیاله پاشای سر عسکر نصب ایدرک بیکچری اغالغندن قپودان دریا اولان مؤذن زاده علی پاشا ایله برابر طقوز یوز یتمش سکر سنه سی محرمنده اقدکزه ارسال و اناطولی عسکرینک سلفک اسکله سنده مجتمع اولملری ایچون بکدر بکیلره فرمان هایون اصدار بیوردیلر

دونمای هایون و مأمور اولان مجاهدین طوزله اسکله سنه واصل اولدقدن و لوازم قلعه

کبری ترتیب قیلندقدن صکره دارالاماره جزیره اولان لفقوشه قلعه سی محصور لشکر منصور اولدی

قرق کون قدر اتش حرب و قتل کرما کرم اشتغال اوله رق قلعه مرقومه عنوة فتح و تسخیر و کرینه و باف قلعه لری اهالی سی تسلیم حصار ایلدکلرندن الزام جزیه ایله برلرنده تقریر اولنوب بعده متانت و رصانتله مشهور آفاق اولان ماغوسه حصاری تحت محاصره مه اندی ایسه ده ضبط و فتحی زمان طویله محتاج اولدینی تعین ایلدیکندن دونمای هایون اموال غنایم ایله درسه اته اعاده قانندی

ایرتسی سنه دونما سرعسکری نصب اولنان پرتو پاشا و قیودان مشارالیه علی پاشا ایله اوچیوز یکریمی پاره قادرغه چیقاریلوب جزایر غرب میر میرانی اولج علی پاشا دخی حسب الامر یکریمی قلعه قادرغه ایله التحاق و امرا ولوند کیلری تجمع ایتمکله دونمای هایون درتیوزدن زیاده سفینه اولدینی حالد ماغوسه یه واصل اولدی

براً و بحرأ امر محاصره تشدید اولنغین محصورین استیانه مجبور اولدکلرندن اوروپایه نقللری ایچون یکریمی قطعه سفینه تخصیص اولنمشیکن قلعه جنرالی سردار اکرم مصطفی پاشایه ملاقی اولدقده ماغوسه قلعه سنده بولنان اسرای مسلمین کیفیتی سؤل اولنوب (اسیرلرم ایدی جمله سنی قتل ایلدم) دیو جواب و یردیکنه و بو ایسه مغایر شرائط استیان بولندیغه مبنی سردار اکرم دخی مجازاة جنرال مزبوری اعدام ایلدی

جزیره قبریس سکانی عموماً تحریر ایتدیریلوب یوز یکریمی بیک قدر نفوس ذکور موجود بولنغله بهرینه برر التون جزیه تخصیص قانندی

دونمای هایون کرید و قورقه جزیره لرینی غارت ایتدکدن صکره لوند کیلرینه ارائه رخصت و دروم ایلی عسکری دخی ساحلله اخراج اوله رق استانبوله عودت تصورنده ایکن ونديک واسپانیـک اوچیوزدن متجاوز کیلری ظهور ایتمکله امر مدافعه لری بین الامرا مذاکره اولدقده نقصان عسکر و مهمات سیدلریله اینه بختی ایماننده استحکامات التنده اقامت اولنمسی اولج علی پاشا و سائر فن دریا متفنگلری بیان ایلملر ایکن قیودان پاشا نیک تهور ناجاسی ایمان مزبوردن خروجی مستلزم اولوب اینه بختی اوکلرنده محاربه شیدده وقوعیله درجنگ اول قیودان پاشا شهید و دونمای هایون سفینه لرینک اکثریسی مغروق و محروق اولدی

سرعسکر پرتو پاشا برتقریبله قره یه چیقوب استانبوله وارد اولدقده معزول و چوق کچمکسزین رحمت حقه موصول اولمشدر

اولج علی پاشا کندو کیلرینی قورتاردقدن بشقه دشمن کیلرندن یکر می ایکسینی تسخیر ایدرک درسماعده واصل اولمغله منصب قپودانی ایله تجیل واولج لقبی قلیچه تبدیل اولندی صغین دونماسی نامیله زبازرد مورخین اولان اشبو همزیمت بحریه اوزرینه وندیك واسپانیه لولر سلطنت سنیه نك برقاج سنه دونما اخراج ایده میه جکی اعتقادنده ایکن صدر اعظم صوقوللی محمد پاشانك اقدام وهمتیه بش التی آی ظرفنده یوز الی پاره قادرغه انشا وتجهیز قلوب دونماسرداری تعیین اولنان وزیر پیاله پاشا ایله قپودان دریا قلیج علی پاشایه تودیعا اقدکزه تسیر اولندی

اوارین اوکلرنده دشمن کیلرینه تصادف قانمش ایسه ده دونمای هایون خلقی سنه سابقه وقوعاتندن متوحش اولوب دشمن آمیرالری دخی خلاف مأمول برخصمه راست کلدکلرندن ایکی طرف دخی محاربه دن اجتناب ایدرک آیرلدیلر بنابرین بوسنه تلافی مافات ممکن اوله میوب فقط دشمن دخی تصمیمکرده لری اولان سواحل اسلامیه غارتنه مقتدر اوله مدیلر ایرتسی سنه که طقوز یوز سکسان برتاریخیدر دونما سرداری نصب اولنان فانج یمین سنان پاشا وقپودان قلیج علی پاشا ایکوز الی قادرغه واون قطعه معونه دن مرتب دونمای هایون ایله اقدکزه تسیر اولنوب وندیکه تابع سواحل وجزایر سوخته آتش غارت قانمقدمه ایکن وندیکلورلر استانبولده عقد صلحه دسترس اولدقلرندن اولبابده سردار وقپودان مشارالیه هایه فرمان عالی وارد اولوب موسم دخی کذاران اولمش اولسنه مبنی استانبوله عودت ونه آتیه ده حلق الوادسفری ایچون تدارکات مقتضیه مسارعت قلندی چونکه اسپانیوللر تونس ملوکی اولان بنی حفص خاندانندن بعضیلرینی صحابت صورتیه تونسه اجرایی نفوذ ایدوب باخصوص تونس پیشگاهنده واقع حلق الواد قلعه سنی تحکیم وکندولرینه جای قرار ایدندکلرندن انلرک اورادن طرد ودفعی سلطنت سنیه نك لازمه ذمت همتی اولمش ووندنکلورلر ایله عقد صلح اولمغله بونك اجرایی کسب سهوات ایشیدی طقوز یوز سکسان ایکی سنه سی ینه سردار وقپودان مشارالیه هایه دونما وعساکر بریه ایله اولجانبه رایت کش سطوت اولوب مسینا وسچلیا اطهرلی غارت اولندقدن صکره اوتوزیدی کون محاصره ومقاتله شدید ایله ذکر اولنان حلق الواد قلعه سی فتح وتخریب وایکی سنه اول دونمای هایون انهمانه سبب اولان اسپانیول امیرالی قلعه ده محصور بولمغله سرمقطوعی باب قلعه یه آویخنه قلندی

بوفتح مبین خطه تونسک حکومت سلطنت سنیهیه التحاقنی مستلزم اوله رق بنی حفص

ملوکی بقیه سندن اولنلر استانبوله کتوریلوب تعیین وظائف یله الی الوقات متمم نعمت
دوات اولدیلر

پادشاه حلیم سلطان سلیم حضر لرینک سبب معلوم ایله وجودلرینه طاری اولان اسقام
متحدث علت سرسام اولدوغندن سرای هایونده بنا بیسوردقلری بیوک حمامه ایلك
کیرشلرنده ایاقلری قایوب دوشمکه وجودلرینک برضری بردلندی و بو عارضه عاقبت باعث
رحلتلری اوله رق سکسان ایکی سنه سی واسطه شعبان شریفنده الی ایکی یاشنده و سلطنتک
طقوزنجی سالنده عازم دار عقب اولدیلر

شهریار مشارالیه مائل عیش و طرب و شاعر خوش کو برخسرو جمشید مشرب
اولغله افور سلطنتی پدری زماندنبرو مقام وزارت عظماده بولنان و شرف صهریتلریله
مشرف اولان صوقوالی محمد پاشایه تفویض ایدوب کیندولری مصاحبلری شمس پاشا
و جلال بک و شاعر مشهور باقی افندی کی ندما ایله بوغاز ایچنده واقع چبوقلی و سلطانیه
مسیره لرنده و سائر موقع نشاط افزاده امرار زمان ایملردر روش و رفتارلری یلدرم
خان اوغلی امیر سلیمانه بک شبیه ایسه ده هنگام سلطنتی امیر مشارالیهک زمانه کی فتن
و غوغاوانی اولمديغندن و شریک سلطنتی دخی بولمديغندن حادثات روزگار ایله رنجش
خاطر دن امین اولمشدر

سلطان سلیمک جنازه سی سرای هایون بوزلغنده حفظ اولنوب مغنیساده علم افراز
حکومت اولان سلطان مراده مؤرده سلطنت ارسال اولمغله طقوز یوز سکسان اوچ سنه سی
رمضان شریفنده استانبوله واصل و تخت عالیخت عثمانی یه نائل اولدی
قریم خانی دولتکرای خان واصل رحمت رحمان اولدوغندن حکومت قریم سعادتکرای
اولادندن محمد کرایه توجیه و احسان بیورلدی

فلس و مراکش سلطانی اولان شریف عبدالله عزم عدم آباد ایتدکده اوغلی محمد
مستنصر تحت پدره نائل اولمشیدی عمی شریف عبدالملک دعوائی حق سلطنت و جانب
دوات غایه دن استعانت ایتمکه جزایر غرب بکار بکیسی رمضان پاشا اعانه و امداده مأمور
اولمشیدی پاشای مشارالیهک اقدام و غیرتیه شریف عبدالملک تحت مغربه مالک و محمد
مستنصر پورتکیز قرالنه التجا طریقه سالک اولدوغندن قرال مزبور شریف مشارالیهی
دیار فاسک تسخیرینه آلت اتخاذ ایدرک اوچ یوز طوب و سکسان بیك عسکر ایله آفریقاه
مرور ایلش ایسه ده وادی السبیل نام محله محاربه عظیمه و قوعنده اهزام فاحش ایله
منهزم و شریف مشارالیه ایله قرال دخی دائره شهوددن منعدم اولمغله شریف عبدالملک

نائل استقلال اولمشیکن برقاج کون مرورنده مرك شادی به مبتلا اولدی
 شاه اسماعیلدن صکره دارای عجم اولان طهماسب شاه الی اوج سنه فرمان فرمای
 ایران اولدقدن صکره مسموماً مرتحل دار آخرت اولغله اوغلی اسماعیل ثانی جانشین
 تخت شاهی اولوب مذهب اهل سنته سالک اولمق حسیله شیعی اولان امرا وارکان دولتی
 قتل و اعدام و خاندان صفویه دن اون بش نفر شهزاده بی کمنام ایدوب یالکیزی شور
 و صحر اولان کور خدا بنده بی ابقا ایلمشیدی لکن آرمسی چوق کچمکسیرین خیانت
 امرای اعجام ایله مقتول و مذکور خدا بنده تخت سلطنته موصول اولوب عدم قدرت
 و قات لیاقتی سبيله خزینه دولتی انلاف و هیئت حکومتی رهین اختلاف ایلدیکندن جزوی
 همتله کشور ایرانک ضبط و تسخیری ممکناتدن ایدوکی ارضروم بککر بکیسی خسرو پاشا
 طرفندن عرض اولندیغنه مبنی سلطان مراد حضرتلری سفر آچغه قیام ایلدی صدراعظم
 محمد پاشا بوايشك خلافتده بولنوب (مملکت اعجام کاملاً فتح اولنسه دخی دوات علیه
 ضرردن بشقه برشیئه دسترس اوله من چونکه کشور ایرانی تحت حکمنده طوتیق ایچون
 اورالرده کلیتلو عسکر بولندیرمق لازم کلوب وارداتی ایسه مصارفه کفایت ایتمز و طائفه اعجام
 هر نوقت فرصت بولور لر ایسه عصیان قیام ایدر لر بو حالر عسر سلیمان خانیده مکرر آوقوعبولان
 ایران سفر لر یله تجربه اولنمشدر) دیو واقع الحالی بیان و سفک دماء مسلمیندن احتراز باینده
 صرف تاب و توان ایلدی ایسه ده صدراعظمک خلافتده بولنا نلرک اغرا و تشویقیله
 پادشاه حضرتلری بو عزمنندن فراغت ایلدیکندن قبریس فاتحی اولان لالا مصطفی پاشا
 سردار نصب اولنوب طقوز یوز سکسان بش سنه سی اوائلنده جانب ایرانه عطف
 عنان ایلدی

اولتاریخده ملاحقات کشور ایراندن اولان چیلدیر صحراسی مرکز سرادقات لشکر
 منصور اولدقده یکریمی درتیک قدر عجمک مترصد هجوم اولدقلری استخبار اولنوب
 سردار اکرم مصطفی پاشا بالذات محاربه دن تعنف و استکبار و دفع تسلطلری ایچون برقاج
 بککر بکی ارسال ایتمکله و توغبولان مقاتله ده اون بشبیک مقداری عجم مضموره نشین
 عدم ونیجه صنادید صفویه کمنده اسره منضم اولدی بومظفریت اوزرینه تفلیس و شروان
 طرفلرنده بوانسان حکام ایران فرار ایتمکین اولحوالی حوزه حکومته ادخال ومع الوزاره
 اوزتمیور اوغلی عثمان پاشایه توجیه اولنوب موسم شتاتک تقرینه بناء سردار اکرم مشتای
 ارضرومه عودت ایلدی

سردار مشارالیهک کزیده سپاه ایله رجعتی شاه عجمک مسموعی اولیجق اوغلی

حمزه میرزایی اوتوز بیک قدر عسکر ایله عثمان پاشا اوزرینه کوندرمکله شماخی
محرسانده اوج کون اوج کیجه اش حرب و قتال کرما کرم اشتغال اولوب یوم رابعده
قریم خانک برادری عادلکرای عسا کر تاتار ایله امداده یتشمکین چیوش اعجام پامال
خیول لشکر منصور اولدی لکن چند کون مرورنده اوچیوز قدر تاتار ایله عادلکرای
وبرادری غازی کرای چاپوله جیقدقلرنده مکین مکین اولان ایرایلره اسیر اولملر ایله
بوشئه ایله حمزه میرزا تکرار جمع سپاه و عثمان پاشا اوزرینه هجوم ایدرک شماخی
قلعه سی محاصره ایلدی

عثمان پاشا برمدت مدافعه دن صکره متانتی مکمل و ذخیره جمعه مستعد اولان دربند
شماخی که تیمور قبو قلعه سی دخی دیرلر بالجمله طوب و مهمات ایله اورایه رجعت
وطاغستان جانلیرینی اورده قبضه حکومت ایلدی

عادلکرای صباحت وجه ایله ممتاز برشهراده بنام اولدیغندن شاهک حر می کیندوسنه
دلبسته اولق شایعه نه مبنی غلوی عام ایله شهید اولوب غازی کرای مدت مدیده قهقهه
قلعه سنده محبوس اولدقدن صکره اسارتدن تخلص کریبان ایدرک استانبوله وصولی
متعاقب قریم خانی نصب قلنش و مشاهیر خانان قریمدن اولق اوزره زیور صحائف
تواریخ اولمشدر

اواخر سلطنت سلیمان خانیدنبرو صدر اعظم بولان صوقوللی محمد پاشا سلطان
سلیم ثانی جاوسنده سنجاقدن برابر کلان امرا و مقربینی طرد و تکدیر ایتدیرمش
اولدیغندن پادشاه زمان سلطان مراد ثالث مغنیه امارتنده ایکن بندکانی (افدمزک
سلطنتی بکله رز لکن محمد پاشانک صدارتی اواننده ارزو ایلیز زیره بزه دخی پدرکزک
مقربلرینه ایتدوکنی ایدر) دیرلر ایدی

مع مافیه مشارالیه ابتدای صدارتندبر اتابک دولت و صاحب شان و شهرت اولدیغندن
وساطان مرادک دخی انشته سی بولندیغندن شهریار مشارالیه لاجل الجاوس استانبوله
وارد ویالی کوشکنده محمد پاشایه ملاقی اولدقده تقییل دسته مسارعت ایدوب هر قدر
پاشای مشارالیه بومعامله دن ابا و وظیفه عبودیتی اجرا ایلدی ایسه ده سلطان مراد صکره دن
بوتنترانه نادم و مشارالیه ی تحقیر و استئقاله عازم اولوب درلو درلو جفالر ایدر ایدی
نهایت طقوز یوز سکسان اتی سنه سی شعباننده صدر مشارالیه کندو سراینده ایکندی
دیوانی ایدرایکن بر مجذوب عرضحال تقدیم ایدرک کی تقرب و خنجر ایله سینه سندن
اورمغله بر ساعت مرورنده وفات ایلدی و تفصیلات مبسوطیه مطلع اولنر مجذوبک بو

جزئتك مصنع اولمسنه ذاهب اولديلر هر نه حال ايسه بوجهله صدر صدارت منحل اولديغندن وزير ناني احمد پاشا حائز مقام وكالت كبرى اولدى

سردار اكرم مصطفى پاشا اسناد تقصير ايله معزول ووزير رابع سنان پاشا مستند سپهسالارى به موصول اولمغله مشار اليه مصطفى پاشا استانبوله عودت ايتشيدى

طقوز يوز سكرسان يدى سنه سى ربيع الاولنده صدر اعظم احمد پاشا وفات ايلديكندن مصطفى پاشا مقام قائمقامى به اصعاد اولنوب بعد ازين مهرهايون اعطاسى ووزير اعظم اطلاق لغو اولندينى اعلان اولندى

لكن اوچ آى صكره مهر شريفك ايران اوزرنده سردار اولان سنان پاشايه ارسال قلنديغنى مصطفى پاشا استماع ايتد كده خصم قويسنك كندوسنه ترجيح اولمسنه طيانه ميوب حضرت خالد مشهد شريفلرينه يوز سوردهك آلام دنيا دن خلاصى جناب حفيدن تمنى ايتشيدى قوناغنه عودت ايلديكى متعاقباً خجاة وفات ايلدى

مشاراليه قبريس فتحنده وايران سرعسكر لكانده خدمات جليله به موفق اولمشيكن مقصد اقصاسى اولان مهر صدارتله بكام اوله مامسنى بعض مورخين مقدمالاسى بولنديغنى شهزاده سلطان بايزيد حقنده سبقت ايدن تصنيعات ظالمانه سى مجازاتى اولمق اوزره ايراد ايدرلر

صدراعظم سنان پاشا ايران سفرنده برخدمته موفق اوله مديغندن بعض اوهامه تبعيته طوائف عسكريه ومهمات سفريره بى بكار بكيلىره تسليم ايدرلر بلاستيدان درسهاته چيته كلديكندن عزلى قرار داده ايكن بذل درهم ودينار ايله مقام صدارتده پايدار اولدى ايسه ده برقاج آى مرورنده عزل ومعافريه اجالا اولنوب ديوان هايون ووزارسندن سياوش پاشا صدراعظم وفرهاد پاشا سردار عجم نصب اولندى

طقوز يوز طقسان برسنه سى فرهاد پاشا روانى تسخير وسور بناسيله تحصيل ايتد كدن وچقاله زاده سنان پاشايى مع الوزاره محافظ نصب ايلد كدن صكره مشتاي ارضرومه عودت ايلدى

شروان جانبلرنده بولنان وزير اوز تيمور اوغلى عثمان پاشا اولحواليدنه نجه آثار مردانكى اظهار واون يدى قطعه قلعه نك مفتاحلرينى داخل قبضه اقتدار ايدوب صادر اولان امر هايون موجب نجه جعفر پاشايى نامزد خدمت محافظه ايدرلر دشت قبجاقدن عازم دركاه سلطاني اولمغله كفه به داخل اولد كده قريم خانى بولنان محمد كراى برادرى عادل كرايك اسارتندن طولايى عثمان پاشانك خصم جاني اولديغندن اخذ انتقام قصديله

ارضر و مدد بولان یولداش لر مزی قرق ایچون فرمان کوندرلش دیهرک دیوان هایونده ولوله سازغوغا اولمیرله بیک سنه سی اواسطنده فرهاد پاشا معزول و سیاوش پاشا ثالثاً صدر صدارته موصول اولدی

بیک برسنه سی رجبنده یکچیری علوفه سی کاملاً تسلیم و سپاه علوفه سی مقسطاً ویرلمک اوزره تصیم قانمغله اشقیای سپاه دیوان هایونده عربده و غوغایه جرات و صدر اعظم سیاوش پاشا ایله دفتر دار امیر پاشانک قتلرینی طلبه مبادرت ایلرله دفع شقاوتلری ضمننده علوفه لری اتمام اولدینی حالده ینه مرکز عناد و اصرارده پایدار اولدیلر بوشمکش آرمینده سرای هایون خدامی که مطبخ و اخور خلقیله قوجیلر و بوستانلار و نجاردن عبارتدر اشقیانک شاید دیوان هایونه و بلکه دارالسعاده دن ایچرویه هجوملری وقوع بولورایسه مدافعه لری مصلحتی ایچون مترقب و منتظر ایدیلر

ایچلرندن من غیررویه بر (اورک) صداسی ظهور ایدوب موجود بولنانلر دخی طرف پادشاهیدن امر صدورینه ذاهب اولدقارندن یکپاره حمله ایتلرله اشقیای سپاهدن ایکوزدن متجاوز کشتنی مقتول و ماعداسی فراره مجبور اولدی صنادید سپاهدن محروک فتنه اولنار تفریق و ازاله اولنوب اولدقچه تربیه لری حاصل و صدر اعظم سیاوش پاشا نشریفات پادشاهی یه نائل اولمشیکن درعقب معزول و سنان پاشا ثالثاً صدر صدارته موصول اولدی چونکه سنان پاشا مصر و یمنده کلیتو ثروته دسترس اولمغله انک بذلیله هر مقصدینه نائل اولوب اولکی صدارتنده سرای خلقی بیننده اینجیلی کوشک و تاریخلرده سنان پاشا کوشکی نامیله معروف اولان قصری و مؤخرآ دخی عصر موزه قدر باقی اولدینی حالده هدم اولمش اولان یالی کوشکنی پادشاه حضرتلری بنا ایلدکن بشقه کرک بوشکلرک تقدیمی اواننده و کرک سائر اوقاتده هدایای عظیمه و نقود کثیره عرض ایتدیکی مثلاً و حرم هایون و مقربان سلطنتی و طوائف عسکریه نك سوز صاحب لرینی عطایای و فیره ایله جلب ایتمش اولدیغندن و تحصیل صدارت هواسندن بر آن کیر و قالیوب طرفدارانی دخی مناسبت و وقوعنه مترقب ایدوکندن سیاوش پاشانک کرک صدارت ثانیه سنده و کرک اشبو اوچنچی دفعه سنده طوائف عسکریه نك دیوان هایونه هجومی شامت قدمی اقتضاسندن اولق اوزره اتفاق کلام حاصل اولمغین بویله بر موفقیت عقبنده عزلی و وقوع بولمشدر

سر حد نشین اولان اقنچی طائفه سی و بعضاً امرای طرفین یکدیگری ممالکنه کچوب چاپول ایلک عادات عصریه ایجابندن ایسه ده بوسنه بککتر بکیسی حسن پاشا دولته اولان سفرلرده جاری اولان قاعده و جهله عموماً بوسنه نك طوائف عسکریه سی جلب

و جمع ایدوب نمچه ممالکنه مرور و بهکه قلعه سی فتح و پک چوق بلاد و قصبائی تخریب و یغما ایتمکه نمچه دولتی طرفندن عرض شکایات و پاشای مشارالیه بوسنه دن قالدیرلمدینی حالده موجب نقض عهد اوله جغنی حکایت اولندقدده حواله سمع اعتبار اولندقدن بشقه روم ایلی بکلیر بکیسی اعانه سنه مأمور ایدلمشیدی لکن تبدل صدارت مناسبتیه مذکور اعانه توقیف اولنوب حسن پاشا ایسه بوندن بی خبر اولدینی حالده ایکنجی دفعه خرواستانه کچهرک سیدسقه نام قلعه بی محاصره ایله مشغول ایکن نمچه لولر کیتلو عسکر ایله ورود و واقع اولان مقاتلده حسن پاشا و هرسک بکی محمد بک و اکثر جنود موحدین شهید شهادتی نوش ایلدی

بو خبر واصل در دولت اولدقدده حضور هایونده عقد مجلس مشورت اولنوب بعض حقایق بین اولانلر سر حدات خاقانی سلطان سلیمان عصری کبی دکلدر اکثر دیرلکاره شهر سایه پرورلری اوشدی و بو جهتله وظیفه خواران محافظه قلاع ایچ ایله دوشدی دیو سفردن بجانب اولنمی طرفنی ترجیح و حتی خواجه سلطانی سعدالدین افندی (بن دولت علیه تاریخ یازمقدیم و بو عصره تقرب ایلدم ایسترمکه پادشاهک بر قولی عجم شاهنک برادر زاده سنی رهن آلوب کتوردی و نمچه قرالی دخی ایکی ییلاق ویرکوسنی تقدیم ایتدی مفاد مباحات انجامیله خاتم زین مقال اولهیم) دیه رک صاحبک بوزولنمی خیرلو اوله جغنی تصریح ایلدی لکن صدر اعظم سنان پاشا فرهاد پاشانک کشور کشالقله اولان شهرتی چکه میوب اکا تفوق ایتک مطالعه سنه سالک و سفره مهالک اولدیغندن سعدالدین افندی یه خطاباً (پادشاهک بر قولی عجم شاهنک برادر زاده سنی رهن الدیغنی و بر قولی نمچه قرالی طوتوب کتوردیکنی بیان ایله ختم وقایع ایام ایدیکنز) جواب مغرورانیه سیله باب سفری کشاد ایتکه قرار ویردیدی و موسم شانک تقرینه باقیه رق و خلافتده اولانلرک کفرینه حکم ایتدیره رک بیک بر سنه سی واسطنده علی العجله بلغرادده غازم اولدی

بلغرادده مشتا نشین اولمق اوزره تصمیم اولنمشیکن نمچه لولرک یتش سکسان بیک عسکر ایله استونی بلغرادی و استرغونی محاصره ایلدکلری خبری وارد اولمقله بودین جانبیه سوق موکب سطوت اولنوب جوارده بولان بولاته و پسر قلعهلری تسخیر اولندقدن و جنود موحدینک حملات شجیعانه لری ثمره سی اوله رق استونی بلغرادی و استرغونی محاصره ایدن دشمن اردولری دفع و سکز قطعه محاصره طوپلری ضبط قلندقدن صکره بقیه شتایی امرار ایچون بیک ایکی سنه سی صفر نده بلغرادده عودت اولندی

لکن بوسنه واسط شتاده ایکی آق قدر هوالر مساعد کیتمکله و بودینده سر عسکر
نامیله براقیلان سردار زاده محمد پاشا مدافعه دشمنه موفق اوله مامغله سکز اون قدر پلنقه
استیلای دشمنه گرفتار اولمشدر

صدر اعظم سنان پاشا اول امرده سفری تهوین ایتیش ایسه ده مشکلات حربیه یی
و دشمنک شدت هجومی مشاهده ایلدکده تلاشه دوشوب عموماً قیو قوی بلوکارینک
اردوی هایونه کوندرملرینی عرض و التماس ایلدی و موجبنجه فرمان صادر اولدی
صنادید یکچریان رکاب هایون سکون اوزره اولدقجه یکچیری اوجاغنک هیئت
مجمعه سیله سردار معینته مأموریتی خلاف قانوندر دیو قیل و قاله جرأت ایتدیلر ایسه ده
حکم زمان بونی ایجاب ایتشدر دنیله رک عزیمتلی تا کید قلندیغندن جمله بلوکلر اردوی
هایون جانبنه راهی اولدیلر

قریم خانی غازی کرای حسب الامر یوز بیک قدر تاتار عسکر یله اردوی هایونه
کلور ایکن طار بر بوغازده اشکر اندایه نصادف ایتمکله بالحرابه یکر می بیک مقدارینی
قتل و تدمیر و التی بیکینی اسیر ایلدی .

اولهار حلولنده سردار اکرم مشتای باغراددن حرکت و تاتار نام مختصر قلعه یی
آوردۀ قبضه دولت ایتدکدن صکره رایه نهرینک طونه یه منصب اولدینی محله واقع اولوب
سلطان سایان زمانده احراق اولنق حسیله یاق نامیله زبازرد مورخین اولان کلوار
قلعه سنی محاصره ایلدی آنجق طونه نهرینک قارشو یقه سنده کیتلو بر دشمن اردوسی
موجود اوله رق دائماً قلعه یه امداد ایده کلدکلرندن وانک دفعی استحصال اولندقجه قلعه یه
ظفر ممکن اوله میه جنی تعین ایلدیکندن قارشویه عسکر کچوزمک ایچون کوپری انشاسنه
مباشرت قلندقدده هر تقدردشمن امر مدافعه ده بذل مجهود ایتدی ایسه ده مقتدر اوله
مدیغندن کوپری آتام و تاتار خان و خیام و سائر جیوش اسلامیه نک هجومیله اردوی دشمن
پراکنده و پریشان و بالجمله طوب و جبخانه و خیام و سائر مهمات حربیه لری ضبط و اعتنام اولندی
بونک اوزرینه محصورین قلعه دخی رایتکش استیان اولدیغندن موجود اولان طوب
و مهماتیله داخل قبضه دولت و طوائف عسکر یه دن اون بیک قدر عسکر وضع و مجدداً
بکلر بکیک اتخاذا قلوب مشتایه عودت انناسنده قومران قلعه سی دخی محاصره اولندی
ایسه ده تقرب شتا مانع فتح و تسخیر اولدیغندن بیک اوچ سنه سی اوائلنده بلغراده
مواصلت اولندی

اقدنجه افلاق ویوده سی فوت اولمغله امارت افلاق متوفانک برادری میخال بکه توجیه

اولنشدی میر مزبور اولوقتک قاعده سی اوزره تنظیم دائره امارت ایچون استانبولده بولنان و بو مثللو تجارت ایله مشغول اولان یکچیری و سائر کساندن مجوهر خنجر و آت طاقی و آوانی سیم و اشیای متنوعه مبابعه ایارک محل امارتنه عزیمت ایتش اولمغله آلاجلولری استیفای حقوق ایچون بکرشده تجمع ایدوب ضیقه باشلادیلر لکن اشیای مزبوره غایت فاخش صائمش و اوزرینه فائض دخی ضم اولنمش ایدوکندن تأدیه سی خارج امکان اولدیغنه و صدراعظم سنن پاشا مهمات حربیه تدارکنده بطائت اسنادیله میر مزبور اظهار غیض و غضب ایدرک بر معتاد تقدیم ایلدیکی هدایاسنی رد و قهر و تنکیانه مسارعت اوزره اولدیغنی اشمار و اشاعت ایدوب نتیجه لو ایسه امارتین ویوده لرینی واردل قرالنی دائره اتفاقه دعوت ایلکده ایدوکنه بناءً میر مزبور بغته علم افراز عصیان اولوب آلاجلولو لرندن و سائر ددن بکرشده بولنان اوچ درت بیک قدر اهل اسلامی قتل و اعدام ویرکوکی واروشنی احراق ایتدکن بشقه طونه نک بو جهتنده اولان روسجق و سائر قصباته دخی اطاله دست عدوان ایلکه باشلادی .

وقعه مذکور ددن مقدم بغداد ویوده سی استغان بک رکاب هایون جانبندن عزل و فرهاد پاشا دائره سنده پرورشیاپ اولان بغداد بک زاده نصب اولوب صندالی امارتنه اقعاد ایچون مباشر تعیین اولنان قبوجی باشی ایله کوندربش بولمغله معزول ویوده دخی بو قاریشقلنی فرصت اتخاذ ایدرک امر هایونه اظهار مخالفت ایلدیکندن مرعش بکر بکیسی مصطفی پاشا میر معزولی طرد و تبعیده ویکی ویوده یی اصعاد و تقریرد مأمور اولوب طونه نهرینی مرور ایتش ایدیکه عاصی مزبور پاشای مشار الیهی باصوب کندوسنی شهید و عسکرینی پریشان ایلکه سنه بوغازندن و دینه قدر نهر طونه سواحلنده بولنان بالجهله بلدان و قراده امنیت زائل و انواع فتن و شرور حاصل اولدی .

پادشاه زمان سلطان مراد خان ثالث حضرتلری جمعیت نسایه انهماکاری سببیه علت مثانیه مبتلا اوله رقبیک اوچ سنه سی جمادی الآخره سنده الیه یاشنده و سلطنتک یکرمنچی سالنده مرتحل دار آخرت اولدیلر

شهریار مشار الیه حضرتلری ناز و نعیم ایچنده نشو و نما بولمغله سفره دکل سرای هایوندن طشره بیله چقیمیوب برطاقم شعرا و ندما و مضحک و جوجه و خواننده و سازنده ایله امرار زمان ایشلردر مع مافیه تصوفه مائل و حقه قائل منهیات و سفک دمدان محتجب اولوب فقط جمع مال و اشتهای هدایای غیر معتاده ایله مشتهر ایدیلر بناءً علیه آتیده تفصیل اولنه جنی وجهله اکثر نظام دولت علیه نک انحلالنه اوان سلطنتلری مبدأ اولمشدر

باب ثالثك تكمله سی

مقدمه کتابده ایراد اولدینی اوزره مقصد عاجزانه هر عصرده دولت علیه نك صورت اداره و نظامات جاریه سی تصریح منحصراً اولوب اشبو فصل ثالثك حاوی اولدینی مدت ایسه قوت و شوکت سلطنت سینه نك درجه عالیه و قوانین و نظامات مرتبه کماله واصل اولدینی زمان اولسیله برابر عادت الهیه اقتضای نتیجه تشویش و فتوری مستلزم اولان بعض احوال و مقدمات دخی سر زده ظهور اولدیغندن بو بابده بسط تفصیلات اولنق اقتضا ایلدی :

دولت علیه نك هیئت متشکله سی ایجابجه طور و حرکتی پادشاهان عظام حضرتانك احوال ذاتیه لرینه تابع اولدیغندن سلطان بایزید خان ولی مرحومك مبتلا اولدینی فتور و رخاوت کافه ارکان و امرایه دخی سرایت ایتمکله اعصاب دولته یورغناق و عروق ملتله طور غناق کشیکن یاوز سلطان سایم خان حضرتلری رونق ساز تحت عثمانی اولدقلرنده دفعه تبدل اطوار و افکار و وقوع علیه سلطنت سینه کویا برغضنفر خواب آلود ایمش ده او یانمش و یا خود صلاح و ادواتدن خالی بر سفینه کوه اندام ایمش ده طوبانمش حکمنی حائز اوله رق کلزار سلطنت مشار الیه حضرتلرینك آب و تاب اقدام و سطوتیه تجدید رونق و انتظام ایلدی و خلعت جلیله خلافت دخی مصرده اك صکره کی خلیفه اولان مستمسك باللهک فراغیه سلاطین عثمانیه حضرتانك زیور دوش افتخاری اولدی .

بناءً علیه اعدای دولت مقهور و مدمر اولوب پادشاه مشارالیه عصرنده ممالک مصریه ایله سوریه و کردستان و سلطان سلیمان زماننده عراق عرب و مجارستان و آفریقا ساحلاری و سلطان سایم ثانی عهدنده قبریس جزیره سیله تونس ایالتی و سلطان مراد ثالث سلطنتنده اذربایجان و شروان الکالری الحاق کشور عثمانی قلمغه ممالک سلطنت سینه فاس حدودندن حبشستانه و اقصای یمنده واقع عدن بندرندن مجارستانه قدر کسب وسعت و جسامت ایلدی

سلطان سلیمان مرحومك اکثر غزواتی مجارستان اوزرنده اولمغه اورالره صرف ایتدیکی اقتداری عجمستان و ترکستان جانبازنده اعمال ایمش اولسه ملت اسلامیه نك قسم اعظمی نقطه واحده جمع ایده بیلور ودها خیرلو اولور ایدی دیو بر ملاحظه السنه انامده دوران ایدر لکن عصر مزبور و قتمزدیک اوزاق اولدیغندن اوزمانك حکمی تمامیه تاریخ کتابازندن استنباط اولنق ممکن اولمقدن بشقه شوراسی دخی جای مطالعه درکه

افریقائی و عربستان و کردستانی فتح ایدن و صکره تحت حکمده طوتان تورک قومک و جیوش عثمانیه ک منبعی اسرا ایله دیوشیرمه چو جقلریدر چونکه دولت علیه اوروپا سفرلرنده ضایع ایتدیکی نفوسک اضعاف مضاعفی اسرایه دسترس اولوب ملت اسلامیه به الحاق ایده کلمکله ابتدای ظهور دولتنبرو النان اسرا حساب اولنسه ملیونلره بالغ اولور و آتکثر نفوس عثمانیه به نقدر خدمت ایلدیکی تین ایدر مع مافیه فضائل جهاد و اغتنام اموال و سهولت طریق سفر مثللو باشلو سبیلر دخی میدانده اولمغله بو خصوصلر نظر تدقیقه الندیغی حالده اوروپا سفرلرینک اختیاری طبیعت مصالحت اقتضاسندن و بلکه دولت علیه جه الک منفعتلو اموردن بولنسی ظن و تخمین اولنور

سلطان بایزیدولی مرحومدن ماعدا سلاطین سالفه حضراتی تنظیم امور مهمه و ترتیب صفوف حربیه خصوصلرینه بالذات نصب نفس اهتمام ایلدکلری و سلطان سلیمان دخی اوائل ساطنتنده مسلک اسلاف کرامی اوزره حرکت ایتدیکی حالده دولت و ثروت کالنی بولمش و ریاض سلطنت اذهار ترفه و تنعم ایله طونامش اولدیغندن بشقه او اخر ساطنتلرنده ضعف پیری به علت نقریس دخی منضم اولمغله بالضروره حضور و آسایشه میل ایله اداره امور دولتی دوش وکلایه تحمیل ایلکه باشلادیلر و دیوان هایونه حاضر و ناظر اولمز اولدیلر سلطان سلیم ثانی و مراد خان ثالث عصرلرنده ایسه عموماً هیئت دولته زیب و زینت و دارات و احتشام کوندن کونه چو غالب سفر برک و جفا کشلک خصلت قدیمه لری متروک اولق یولنی طوتدی

منقولدر که یاوز سلطان سلیم مرحوم ساطان غوری ایله تقابل صد دنده کند و عسکرینی تیموره و مصر اشکرینی زر و زیوره مستغرق کورمکله همربابی بوانان کمال پاشا زاده به بوصورتک احکامندن سؤال ایلدکده (جیوش عثمانیه مصر یلرک اشیا نفیسه لری غارت ایتک ایچون هر نوع فدا کارانی اختیار ایده جکلری امر طبعی اولدیغندن اسباب مظفریت شاهانه لری جمله سندنر) دیو جواب و یرمش و پادشاه مشارالیهک شهزاده مکرملری سلطان سلیمان زر و زیور ایله آراسته البسه ایله حضورلرینه کیردکده (سلیمان آنک نه کیسون) بیور مشلردرینه بونی مؤید اوله رق کور یجلی قوجی بک سلطان مراده تقدیم ایلدیکی رساله سنده سلطان سلیمان وزرا سندن احمد پاشانک بش التیوز عبد مشتری واکا کوره اسلحه و مهمات سفریه سی موجود اولدیغی حالده ایکی کورکی اولوب برینی دیوانده و بریسی خانه سنده تلبس ایده کلدیکی بیان ایلشدر حال بومنوال اوزره ایکن سلطان سلیم ثانی و مراد خان ثالث عصرلرنده عموماً هیئت دولته بر طرفدن زیب و زینت و دارات و احتشام

چو غالوب بر طرفدن دخی سفر برک وجفا کشک خصلت قدیمه لری غائب و مساکن
وملا بسده و امر تعیشه انواع تکلفات حادث اولدی و پادشاهلرک سفره کتیمی شویله
طورسون دیوان هایونه کلری بیله ایچی قبولی و طوائف عسکریه و طائف معینه لری نک
اعطاسی کونلرینه منحصر کی قالمغله توجیهات مناصب و امور مهمه یه دائر خصوصات
معروضات ایله استیذان قلنمق اصولی تأسیس ایلدی

مواد مبسوطه نک استلزام ایلدیکی حالات متعلق اولدینی اداره لرک بیانی صره سندده
ایراد قیلنور

احوال ارکان دولت

ارکان دولت باب سابق تکمله سنده بیان اولنان صورتده اولوب فقط شیخ الاسلاملرک
ایشی خدمت فتوایه منحصر و فاتح عصر نده استانبول قاضیسی حضر بکه علاوه مأموریت
اولدینی حالده مؤخرآ کمال پاشا زاده و ابوالسعود افندی کی فضلا بعدالصداره منصب
فتوایه رونق بخش اولمیرله منصب مزبور صدرین محترمینک فوقنده اوله رق طریق
علمیه نک رئیسی و محاکم شرعیه نک ناظری اعتبار اولنوب کیدرک بالجمله توجیهات علمیه
انک ترتیب و تنسیبینه وابسته اولمش و صدر اعظم لر ایله هم رتبه طو تباشدر

یلدیرم بایزید خان عصر نده سادات کرامه ناظر تعیین اولمشیکن صکره لری متروک
اولمغله سلطنت سلیمان خانیده سید صبیح النسب اولان طریق علمیه رجالدن نقیب
الاشراف نصب اولمش و سادات کرامک سلسله نامه لری نقیب افندی جریده سنه قید
ایتدیریلوب بالایجاب تأدیبی اقتضا ایدن شرفاً دائره نقابتده جنس و توقیف اولنه رق احاد
ناسدن تمیز و تفریق قلنمشدر

سلطنت سنیه سفن حربیه تدارک ایتدکن صکره بحرآ بر جانبه سفر و وقوعنده کیلره
ارکاب اولنه جق قره عسکرینه و زرادن برسی سردار نصب و تعیین اولنمق قاعده دولتدن
ایکن مؤخرآ یاوز سلطان سلیم خان حضر تلری ترسانه پی کایبوایدن استانبوله نقل ایدرک
امور بحریه کسب جسامت ایلدیکندن و باخصوص مصر و ردوس و قبریس و آفریقا
ساحل لری فتح اولندقدن صکره مرادده سفاین عثمانیه تکثر ایلسیله مایطه و اسپانیا
قورصانلردن اقدکوزک محافظه سی ایجاب ایتدیکندن هر سنه دونمای هایون چیقارلمق
اقتضا ایلدی بناءً علیه و زرادن و یاخود میر میراندن مستقل قپودان دریا نصب اولنمغه
باشلانیه رق بومأموریت دخی مناصب سلطنت سنیه نک اهم و اعظمندن اولمشدر

ممالك دولت كسب جسامت ايتدجكه مصالح مهمه دخی تكثير ايلديكندن اناطولى وروم ايلي دفتردارى ناميله ايكي دفتردارلق دها ايجاد اولنوب اصل دفترداره باش دفتردار وبونلره ايكنجى واوچنجى دفتردار دينلور ايدى لکن صكره لرى امور ماليه كاملاً باش دفتردارلق مقامنده تجمع ايلديكندن ايكنجى واوچنجى دفتردارلق پايه كچي قالوب قدامى رجاله جهت تعيش اولمش و شق ثانى وثالث تعبيريله دفتر توجيه ساتده مقيد اولديغى حالده وقعه خيره دن صكره العا قلنمشدر

(وزير) معين معناسنه اولمق اعتباريله اسمى مسناسنه موافق اوله رق وزرا پادشاهان عظامك معاونلرى و وزير اعظم انلرك رئيسى ايكن سلطان سليمان مرحوم اوائل سلطنتنده مقبول و مرغوبى اولان ابراهيم اغاي خلاف وتيره اسلاف اوزره دفعه مقام وزارت عظمايه اصعاد وفوق العاده استقلال اعطا ايلديكى مثلاً اوان پيريسنده دخی رستم پاشايه توديع مهام انام ايسكله ينه اسمى مسناسنه موافق اوله رق وزير اعظم لره صدر اعظم و وكيل مطلق و دها صكره لرى صاحب دولت دينمكه باشلاندى و سلطان سليم ثانى مرحوم دامادى اولان صوقوللى محمد پاشاي صدر اعظم بولوب كاملاً تحمیل امور سلطنت ايلدى

سلطان مراد ثالث عصر نده پاشاي مشاراليهك شهادتى وقوعدن صكره اصول دكشوب وزرا تحصيل صدارت امر نده يكديكرينه مسابقت ايچون طرف سلطنته و حرم هايون و مقربان پادشاهى صاحب نفوذ لرينه تقديم هدايا ايله استحصال مقصد ايدى كلكلر نندن مسند صدارت كيمسه ده پايدار اوله ميوب صيق صيق تبديل ايدر اولدى

چونكه مقدم لرى بر جانبه سردار اوله رق كوندري لان وزرا و امرا فتوحات لرى غنايتمدن اولمق اوزره پادشاه عصره هديه تقديم ايتمك قاعده دولتن اولوب حتى قپودان دريا غازى خيرالدين پاشا بردفعه سفر عودتنده اموزلرنده برر پستال چوقه ايله ايكيبيك اسير و كذلك اموزلرنده برر كيسه اچه ايله ايكيوز غلام واللرنده كمش تپسى ايچنده اطلس كيسه لر ايله بيكر التونى حامل دفعه يوز غلام وينه اللرنده التون تپسيلر ايچنده اينجو و مرجان تسييخلر و كردانققلر و التون قدحلر و سائر اشياى نفيسه يي شامل ايكيوز جاريه تقديم ايشيدي كيدرك سفر عودتى و اموال غنايم قيدى بر طرف اولوب استانبوله كلان وزرا و بلكر بكيلىر هديه تقديم ايدر اولديلر حتى سلحدارلقدن مصر واليسى اولان ابراهيم پاشا قبه وزارتيله استانبوله دعوت اولندقدن تقديم ايلديكى هدايايه يكر مى كرم يوز بيك التون قيمت تقدير اولنمشدر كه عصر من حسابنه كوره بر مليون ليرا ديمك اولور مذكور هدايا سكسان بيك مثقال التوندن مصنوع مرصع بر تخت و التون و مجوهرات ايله

آراسته اسلحه و آت طاقملری و اشیای سائر و برقاچ یوز حیواندن عبارت اولدینی توارینخده مسطوردر صدر اعظم سنان پاشا دخی و وزیرای عصرک اغیاسندن اولمغله سلطان مراد ثالث حضرتلری ایچون کاخانه ده واقع اولوب حالا آناری باقی اولان ایجیلی کوشکی بنا ایتدکده عظیم برضیافت ترتیبیه عرض و کلیتو مرصعات دخی تقدیم ایلشدر و اول عصرده وزرا و امرانک جمله سی حاللرینه کوره هدایا اعطاسنه مجبور اولدقلری مثلو عیدیه و نوروزیه نامیله هدایای رسمیه تقدیمی دخی معتاد حکمنه کیرمشدر

وزرای سالفه نك درجه ثروت و قدرتلرینه انارلری برهان و مقیاس اولوب فقط ایچلرندن بعضیلری فوق العاده زنکیندر از آن جمله رسم پاشانک کندوسیله حایله سی مهرماده سلطان نامه ادرنه قیوسنده واسکدارده و زندان قیوسی جوارنده و ازمیدده بنا ایلدیکی جامعلر و مدرسه و خانلر و سائر آثار که پک کلیتو مبالغه محتاجدر بونلری تنظیم ایلدکن صکره حین وفتنده و قسمر حسابنه کوره تقریباً اوچیوز بیک کیسه اچهک مخلفاتی قالمشدر رتبه میر میرانی ایله قیسودان دریا اولان قلیج علی پاشا مشهور اولان جامع شریفی و اوقافی بنا و ترتیب ایلیوب بعده حین وفتنده بشیوز بیت التون تقدی چقمقله و ورثه سی دخی اولمغله جانب بیت امانه اخذ اولمشدر فاتح یمن سنان پاشانک استانبول و اناتولی و روم ایلی و عربستان و یمنده ابنیه جسیسه اوله رق یوزدن متجاوز مبراتی و انلری اداره یه کافی اوقافی اولوب حتی عصرنده حیرته شعور اولان ثروتنی کورن عقول ضعیفه اصحابی علم کمایه ظفریاب اولمشدر ظننده ایدوکلری مضبوط آثار رواتدر

وزرا و امرای دولتک معاش مخصصلری بختنده دخی شو و وجهله عرض تحقیقات اولنور که والیلمکده بولنان شهزادکان حضراتنه اوتوز ایکی یوک اچهک خاص تعیین قلمق قانون دولتدن اولدینی بعض توارینخده مسطور اولمیه برابر سلطان سایم ثانی شهزاده لکی اولنده قونییه و ایسی ایکن الی بش یوک اچهک خاصه متصرف اولدینی یننه تاریخلرده مندرجدر

صدر اعظملرک یکریمی یوک اچهک خاصی اولدینی حالد فاتح مرحوم محمود پاشانک و سلطان سلیمان دخی ابراهیم پاشانک خاصلرینی اوتوز یوک ابلاغ ایلشدر قبه وزیرلرینک حیثیترینه کوره اونر اون بشر یوک و نشانجی و دفتردار و رئیس کبی عضمای رجالک ایکیشر اوچر دردر یوک اچهک خاصلری و قلم خواجه لرینک و کتبه نك و متفرقه تعبیر اولنان خدمه دولتک درجه لرینه قیاساً خاص وزعامتلری اولوب کرک بونلرک و کرک طشرده بولنن بکلر بکی و میرلوا و تیمار کتخداسی و دفتردار مثلو

مأمورینک خاص وزعامتلی و تیمارلو سپاهیسنتک تیمارلری کیفیتلری و بوبابده موضوع اولان قوانین ان شاءالله تعالی آئیده تفصیلاً ایراد اوانور سلطان سلیمان وزراسندن لطفی پاشا آصفنامه نامیه قلمه الدینی رساله سنده (اوان صدرتمده یگرمی یوک اچهلک خالصه اولدیغندن اون یوکی دائردم مصارفنه کفایت ایدوب بش یوکی تصدق اوانسور و بش یوکی خزینهمده قالدور ایدی) دیو براداره موازنه سی کوستر اول عصرک براچه سی و قتمزک تمام برغروشی وزن و عیارنده اولمنه نظراً مشارالیهک دائره سی مصارفی سنوی ایکییک کیسه دیمک اولوب کندوسی هر قدر کثرت خدم و حشمه مشهور اولنلردن دکلسه ده امثال واقرائنه و حکم زمانه کوره دائره سی خلقی بهمه حال ایکییک کشیدن اکسک اوله میه جفندن مبالغ مزبورده ایله ادارده سی قابل اوله مامق اقتضا ایدم چکی بادی نظرده وارد خاطر اولور لکن اول عصرلرده و بلکه یقین و قتلره قدر ممالک محروسه اوجوزلق اولمق مطالعه سیله حوائج عامه دن اولان حیووبات و سائره خارجه چیقارلمز ایدی چونکه اوروپادن مبايعه اولنه کلان امتعه جزویاتدن اولدیغنه و اخراجی تحت مساعدده بولسان برقاچ قلم اشیا بلغاً مبالغ اکا تقابل ایلدیکنه مبنی ممالک محروسه نک ما کولاتجه بولمق و اوجوزلق برحالد بولمسی بغایت التزام اولان مواددن اولغله فی الحقیقه بعض وقیفه لر مزایاسندن استدلال اولسان اوجوزلق تصور و حسابک خارجنده در برده وزرای عظامک استابول قیرلرنده چفتاکلری اولغله حیوانات و اکثر آدملری اوراده ساکن اولوب چفتلکک محصولاتیله و غایت ساده صورته تعیش ایددکلرندن اول وقتک مصرفی زمانمزک فیثات و تکلفاتنه بروجهله قیاس قبول ایتمز مع مافیه معادنک اشیا به نسبتنده دخی فرق عظیم واردر

اوائل دولته میرمیران و میرلوالر اونر یگرمیشر سنه و بلکه دهها زیاده منصبلرنده مستقر اولمیرله پک چوق آثار خیریه و تنظیمات ملکیه به موفق اوله کمشلر ایکن کیدرک رکاب هایونده اولان تبدلات سریعه بولنره دخی سرایت ایلدیکندن بر منصبک اوچ بش سنه تبدلاتدن وارسته اولمسی شاذ حکمنه کیردی و بنا برین امرایه قدرتسزلک و معسوریت ممالکه نقصان کلکه باشلادی و مأمورین دخی انواع ارتکابات متجاسر اولدیلر ماده رشوت طبیعت بشرده مرکوز بر فطرت اولدیغندن شئون عالم بروقتده بوندن خالی دکل ایسه ده جای بحث و دقت قلت و کثرتی و متجاسر لرینک مظهر مجازات اولوب اولمامسی قضیه سیدر صدراعظم رستم پاشا رشوتسز منصب توجیه ایتمز ایدیه ده انصافی دخی الدن بر اقمز ایدی دیرلر و حتی بعض مورخین انصافی بیان صدندنه بردفعه ارضروم بکلر بکیسی طرفندن بشیک التون تقدیم اولندقد ارضروم منصبک بو قدر التونه تحملی یوقدر دیو

اوجيك التونى الوب ايكى بيك التونى اعاده ايلديكنى يازارلر بوندن استدلال اولنور كه اخذ رشوت اولوقلرده ممنوعيت قويه تحتندن چيقمشدر صوقولى محمد پاشا صدارتنده بوداد وسند ملعونه يه فى الجملة كسل كلشيكن مشاراليهك وفاتندن صكره اولدرجه ايلرولديكه اقسام وانواعى بيان عديم الامكاندر حتى قسطمونى حكمدارلرى اولان آل اسفنديار سلاله سندن اولوب مصاحب شهريارى اولان مشهور شمسى پاشا بركون ياليسنه غايت بشاشت ايله كلوب سببى سؤال اواندقده (بوكون سلطان مراد حضر تلىينه بيوجك بر رشوت قبول ايتديردم بعدما بولدت دماغ سلاطينده مستقر اولور وانتظام دولتك انحلالنى ايجاب ايدرك بوصورتله بندخى اجدادك انتقامنى المش اولورم) ديديكنى على افندى كنه الاخبار نام تاريخنده ايراد ايلشدر

اوائل دولته علمای اعلامك فضل ومزيتلى اعتباريله مشيخت وقاضيسكرلك ومولويتلر توجيه اولنور ايكن الان جارى اولان اصول وقاعده طريقت علميه وضع وتأسيس اولنلغه انجام حال موجب تأسف وملال اولدينى مثلاً امارت ايلات والويهيه وصول ايجون باب سابق تكمله سنده بيان اولنان طريق متروك اولوب كسب ثروت ايتيش ملتزمير ميرلواومير ميرانلغه دسترس اولور اولديلر وبناء عليه ظلم واعتسافده كسب مهارت ايتيش نيجه نيجه نااهلان مناصب دولته شايان كورلك مقدماتى ظهوره باشلاديكه فصل آتیده بونك نتایجى دخى ان شاء الله تعالى ايراد اولنور

تفصیلات اداره اراضی

واردات دولتك اك باشلوسى عشر حاصلاتى اولوب اگرچه بوواردات خاص وزعامت وتيمار صورتيه وزرا وامراوبندكان وايلات عسكرى اولان تيمارلو سپاهيسنه ووقف ناميله نشر معارف خصوصلرينه ويورتلق اوجاقلىق تعبيريله حدود محفظلرينه وينه اوجاقلىق اصطلاحيله بعض قلاع وامصار يرلو نفراتنه مخصوص ايسهده بوتخصيص وتقسيم سببيله سلطنت سنيه وكلا ورجال دولت ومأمورين اقلام وبالجملة طشره والى ومأمورلرى معاشدن وارسته اولدقدن بشقه آتیده تفصيل اولنه جنى وجنله بلا مصرف يوز قرق بيك قدر سوارى يه مالك اولديغنه مبنى اشبو اراضى توجهاتك نظام موضوعى دائره سنده جرياننه فوق العاده اعتنا اولنمشيدى

حتى رارضك وقفه وياخود خاصك زعامته ويا زعامتك تيماره تحويلى والحاصل موضوع لهنك جهت اخرايه تبديلى لازم كلور ايسه اراده مخصوصه پادشاهى اوزرينه

نشانجی بولنان ذاته خطاباً تصحیح امرعالیسی صادر اولوب موجبجه نشانجی دخی قیود دفتر خاقانی بی کندو قلمیله تصحیح وزیرینه امضاسنی وضع ایلک و بوفرمانک طغراسنی مطلقاً صدر اعظم بولنانلر چکمک مقتضای قانون دولتن ایدی چونکه کړک امور مهمه یه وکړک دعاوی یه دأثر صادر اولان فرمانلرک طغرالرینی قبه وزیرلری یعنی ایکنجی و اوچنجی و دردنجی وزیرلر دیوان هایونده او طور دقلری زمانده چکرلر ایدی

هرکسک معلومی اولدینی اوزره اراضی اوزرنده ایکی وجهله تصرف جاری اولوب انک بریسی حق زراعتیدرکه طابو سندلیله متصرف اولان کسان زراعت وانکله تعیش ایدرلر ایکنجیسی او ارض محصواتک عشر شرعیسنی الموق و محمولاتی طالبنه تفویض ایلک و فراغ واستقالی وقوعنده معین اولان خرجنی استیفا ایدرک طابو سندی و یرمک حق اولوب بودخی دولته عائد اولدیغندن سلطنت سنیه بو حقی خاص وزعامت و تیمار اصحابنه اعطا و تقسیم و بعض خیرات و مبرات و وقف اولوق اوزره تخصیص ایلشدر

مثلاً برقریهنک اراضیسی طابو سندلریله سکسان یوز نفر اهالینک عهدۀ تصرفلرنده اولدینی حالده او قریهنک کافۀ اراضیسی اوزرنده بولنان و جانب دولته عائد اولان حقوق عشریهسی برسپاهینک تیماری و یا برزعیمک زعامتی و یا برمیرلوانک خاصیدر و یا خود خیرات و مبراتدن برشینک مصارفی قارشولنی اوله رق وقفه تخصیص اولمشدر

بوابده تطویل کلام ایلدیکمزدن طولایی شو و وجهله اعتذار اولتورکه مالیه خزینہ سی مأموریتلرنده بولندیغمز اولنده قره طاغ حدودی تحدید اولنوب اشقودره ملحقاتندن بر مقدار اراضی قره طاغلور طرفنده قالدیغندن صاحبلرینه جانب دولتن تضمین صورتنده اراضی و یرمک لازم کلشیدی

انک اوزرینه مجلس مخصوص قراریلہ کلان بیوردینک مالی (کچنده اشقودره ده بر تیمار محلول اولمشدر بوتیمارک اراضیسی تضمین و یریلہ جک ادملرہ تقسیم اولنسون) حکمنی شامل اولمغله تیمار دیمک چفتلک دیمک اولدینی و تیمار داخلنده بولنان ترلارک صاحبلری بولندیغنی جواباً اشعار اولمشدر

برده زمانمزد قلمه الثمان تاریخلردن خیرالله افندی تاریخنده پادشاهان عظام حضر اتنک واردات مخصوصهلری خاص نامیلہ برطاقم چفتلکاتدن عبارتدر دینلوب حالبوکه چفتلک ایلہ خاص بیننده فرق عظیم اولدینی و تیمار وزعامت و خاصلرک کلیاً العاسی یکر می اوتوز سنه لک شی بولندیغنی حالده بو وجهله احوالترینک اونودلمسنه نظراً دها صکر دلری بتون بتون معلوم اولمیه جق بر حاله کله جکی مطالعه سنه مبنی ینه تفصیلاته دوام اولنوق اقتضایلدی:

بروجه مشروح اراضینک حقوق عشریه سنه متصرف اولانلرد لسان قانونده صاحب ارض دینلور واهالیدن بریسی ترلاسنی صاته حق اولسنه صاحب ارض حضورنده تقریر ویرمک وصاحب ارضک اذنی لاحق اولمق لازمدر و دیرلک دخی دیرلرکه دیرلک مدار تعیش معناسنه اولمغله طرف دولندن ویریلان هر نوع علوفه یومیه یه و خاص و تیمار وزعامته پادشاه دیرلکی اطلاق اولنور

صاحب ارض دیرلکی داخلنده محلول اولان اراضی یی و خالی عن الزراعة بوانان یرلری طابوی مثیلله طابورینه تفویض ایلر فقط کندو عهدده سنده الیقویه من و آخر قضا اهالیسنه صاته من مکرکه بیوک چفتلک اولوب کوی اهالیسنک دخی اراضی یه احتیاجی اونیه چونکه کندو عهدده سنده الیقویه بیلسه بالا خرد کویک چفتلک اولسنی و آخر محالر اهالیسنه صاته بیلسه کویلونک مضایقه حاللرینی ایجاب ایددجکندن ذکر اوانان محذورلری دفع ایچون بووجهله قانون وضع اولنمشدر

فتح ممالک واقع اولدجه اراضیسی تحریر ایتدیریلوب هر قریه نک مقدار حاصلات عشریه سی و نفوسی وقایع خانه دن عبارت ایدوکی و هر قضانک مستقلاً و یا خود مشترکاً استعمال ایلدکاری اورمان و مرعی ثبت و ترقیم اولنوب مثلاً بر سنجاغک یوز یوک اقیچه حاصلات عشریه سی اولوبده دیرلکک هر نوعی دخی بولمق فرض و تقدیر اولندیغی حالده یکریمی یوکی خاص و اون یوکی زعامت و قرق یوکی تیمار و یکریمی یوکی اوقاف و اون یوکی اوجاقلق و یورتلق اولمق اوزره تقسیم اولنمشدر که بروجه ترتیب کیفیتلری بیان و توضیح اولنور: حاصلات مقیده سی یوز بییک اقیچه دن زیاده اولان دیرلکه خاص اطلاق اولنور و طرف پادشاهی یه مخصوص خواص هایون ایله سلاطین عظام حضراتنه تخصیص اولنان حاصلردن ماعدا وزرا و بکلربیکی و میرلوا و سائر بندکانه معین اولان حاصلر منصبلریله قائمدر

یعنی هر منصبک متصرفی معین اولان خاصنه دخی تصرف ایدر و اصحاب خاص سفره عزیمت ایلدکده قاچ یوز بییک اقیچه خاصی واریسه هر بشیک اقیچه سی ایچون برجه لو کوتورمکه بورجلو و بوتقدیرجه اون یوک اقیچه خاصی اولان بر بکلر بکی تام السلاح و حرب و ضربه قادر ایکیوز جبه لو ایله سفره کتمک مقتضای قانوندر فقط جبه لولر امرانک توابعاتی دیتک اولدیغندن اکثریا بر بکلربیکی و یا خود میرلوا خاصی نسبتیله بورجلی اولدیغی جبه لولک برقاچ مثانی استصحاب ایدر و قوسی مکمل تعبیریه شایان سایش و تحسین اولورلر ایدی

حاصلاتی یکریمی بییک اقیچه دن یوز بییک اقیچه یه قدر اولان دیرلکه زعامت اطلاق اولنور

وبولندى حاصلات مقیده مقدارينك هر بشيكي ايچون برجهلو كوتوررلر لكن زعامتلر
 هر ايلات مركززنده بولنان خزينه و تيمار دفتردارلرينه وزعامت كتخدالرينه و هر سنجاقده
 اولان الای بكنه و قلاع خاقانی دزدارلرينه وركاب هايونده بولنان قپوچى باشلره و خواجكان
 ديوان هايهته و متفرقه تعبير قلنان زعمایه و دفتر خانه و خزينه عامره و ديوان هايون قلمى
 كتابنه توجه اولنه گمكله پك بيوك بر جنايتى ظهور ايتدكه عهد سندن رفع اولمز بناء
 عليه قيد حياتله مقیددر

حاصلاتی اوچينك اقچه دن يكرمى بيك اقچه يه قدر اولان ديرلكه تيمار تعبير قلنور
 و قليج تيمار اطلاق اولنان اوچينك اقچه سندن صكره هر اوچينك اقچه ايچون ديرلك
 صاحبي برجهلو كوتورمك مقتضای قانوندر مثلاً التيك اقچه تيمارده متصرف اولان سپاهی
 برجهلو و طقوز بيك اقچه تيمارده متصرف اولان ايكي جبهلو واون طقوز بيك اقچه تيمارده
 متصرف اولان بش جبهلو كوتورمكه بورجلو و تيمار اصحابي ديرلكك بولنديغى سنجاقده
 متوطن اولق مشروطدر

تيمار اوچ نوعه منقسم اولوب برنجيسى و اك كلتيوسى اشكنجى تيماريدركه متصرفلى
 الای بكيى بيراغى التنده مأمور اولدغى سفره اشر ايكنجيسى مستحفظ تيماريدركه
 منسوب اولدغى قلعه محافظه سنده بولنور اوچنجيسى خدمت تيماريدركه بعض سرحداته
 بولنان جوامع امامت و خطابته و سراي هايونلر خدماتنه مخصوصدر حتى سراي هايونه
 سنوى اوتوز بيك سنبل صوغانى كوتورمك و شاهين و چاقير دينلان قوشلرى تدارك و تقديم
 ايتك ودها بونك كى ايشلرى رؤيت ايتك ايچون مخصوص تيمارلر وارددر بعضاً دخى الذات
 پادشاهلر بعض امكداران سپاهيانه متصرف اولدقلى تيمارلرينى تملك ايشلردر كه ورته سنده
 توارث ايدر

بر تيمار ويازعامت محلول اولدقه متوفانك حرب و ضربه قادر اولادى وار ايسه اكا
 و يريلور اكر ولدى صى ايسه ايفاي خدمته مقتدر اولنجيه قدر جبهلو كوندركم شرطيله
 توجه قلنور بلاولدفوت اولان ديرلك اصحابنك تيمار ويازعامتى جبهلولردن مستحق اولانه
 ويرلك اوزره بكلر بكيلى تذكره اعطا ايدوب بعددر سعادتدن برات شريف ايله تفويض
 قلنور فقط تيمار ايسه مثلاً اون بش بيك اقچه لك وزعامت ايسه اوتوز قرق بيك اقچه لك
 بولنديغى حالده ايجابنه كوره تيمارك اوچ بش بيكي وزعامتك يكرمى يكرمى بش بيكي توجه
 اولنه رق اوست طرفلرى شايان مكافات كوريلان ديرلك صاحبلىنه ترقى يعنى ضميمه
 صورتيله تقسيم اولنور و بويله ترقيلىر ايله بر سپاهينك تيمارى يكرمى بيك اقچه يي تجاوز

ایدرایسه زعامت اعتبار قیلنور

یوز سنهده برکده عموماً تحریر ممالک نظام موضوعی ایجابندن ایدایسهده سلطان سایم ثانی زماننده ختام بولان تحریردن صکره اجرا اولنه مدیغنه و ترقیات مشروحه سببیه دیرانکلیر دخی حصه لره منقسم اولوب باخصوص مرور زمان ایله دیرانکلیر حاوی اولدییی اراضیده معموریت و خرابی و قوغندن ناشی یازوسی یعنی حاصلات مقیه سی ترقی و تنزل ایلدیکنه مبنی برانارده یازیلان اقیچه برامر اعتباری و بایکجه حصه دارانه تقسیم حاصلاتی ارانه ایچون بر میزان حکمنده قالمشدر

برسنجاق و یالایلتک اشکنجی زعما و ارباب تیماری سفرده مأمور اولدقدده هم محافظه وطن و عهده ارقد اشرینک دیرانکلیری امورینی تسویه اینک ایچون اونده بری مملکتلرنده قوروجی قلوب ماعداسی کیدر و مأمور اولدقلری سرعسکرک معیتنه وصوللرنده یوقلمه اولنوب کرک دیرلک اصحابی و کرک جبه اولری آرو آرو دفتر اولمغله فلان سپاهی و یافلان جبه او فلانجه پاشانک دفتر لوسیدر دینلور که سفرده اثبات وجود ایتش دیمکدر اکر سر حدانده قشله مق لازم کلورسه هر سنجاق سپاهیسی ایچلرندن بشر اونر آدم انتخاب ایدوب خرجاتی نامیله یعنی تیمارلری حاصلاتندن کندولرینه خر جلق کتورمک اوزرده مملکتلرینه کوندولر ایدی چونکه بوندلر سفرده بوندقلری وقت بیله معاش و تعیین مثللو برشی ویرلر ایدی بک اختیار و عمل مانده اولنلری تیمارینک ترقیاتی مساعدایسه انکله تقاعدایدیلرک قلیج تعبیر اولنان و وظیفه حریبه یی شامل اولان اساس تیمار آخره تفویض قلمغله یکیدن مصرف آچامتسزین هم بر آدم تقاعده نائل اولور و همده اعداد عسکریه نقصان ترتب اینلر ایدی قوانین مبسوطه بک چوق انتظامات و حکمیاتی موجب اولدییی ادنا ملاحظه ایله معلوم اولوب بوندلردن برنجیسی سفرلر نقدر متمد و تلفات مشدد اولسه عساکر مرقومه دن بر نفر اکسامک احتمالی یوقدر چونکه بر تیمار محلول اولور ایسه اون طابلی بولنور ایکنجیسی اکثر اصحاب تیمار ابا عن جد و طنلرینک ضابط و حارسی و مملکتلرینک اوجاق زاده سی اولمغله اهالی بونلری بیوک کورمش اولدقلرندن و کندولری دخی خاندانلقه مفتخر صاحب دارات آدملر یدو کلرندن قری و قصبه لرینک محافظه سنه قادر و اشقیا واجانب تسلطی احتمالنده در حال اهالینک ایشه برارلرینی طوپلیوب دفع و تنکیل اعدایه مسارعت ایدم بیله جک قوه عصبییه مالک ایدیلر اوچنجیسی بونلرک اولادلری بابالرینه خلف اوله بیامک استحقاقنی تحصیل ایتش بولمق ایچون وقت صباوتلرندن آته بنمک و اسلحه قولالتمق خصوصلریله اشتغال ایده کلد کلرندن فروست و سلاح شورلقده کسب

مهارت ایدرلر ایدی دردنجیسی بونلرک منافی دیرلکلی داخاند بولان زراعک تکثر
زراعتلرینه وابسته اولدیغندن محتاج اعانه اولان اهالییه تخم و حیوانات اعطا و زراعتدن
خالی محل قلماسنه اعتنا ایتلملیه و کندولری ایچون دخی حیوان یتشدرمک مجبوریتند
اولملرینه ممالک محروسه نك معموری و توانا حیوانلر یتشمسی امرلرند تاثیرات کلهلری
بدیهیاتدن بولمشدر

بوطائفه نك تشویش نظام و انتظاملری مقدماتی دخی شووجهله سرزده ظهور اولدیکه
محلول اولان دیرلکلر حرب و ضربه قادر و احباب حیثیت و ناموسدن اولان و ملازمه نك
ایله خدمتی مسبوق بولان مستحقینه توجیه اوانه کلور ایکن عصر سایان خانیده چاشنکیر
باشیلقدن بکلر بکیک ایله چیقان خسرو پاشا رشوت ایله ویرمک سیئه سنه پیشوا اولدی
عصر مرادخان نالنده ایران سرعسکری اولان عثمان پاشا محلول اولان تیماروزعمتلری
کندو توابعاته توجیه ایتدکه باشلامغله ایالتلر خاقی دعوایه قیام ایلدکارند (بنم آدملم
بنمله برابر بونجه سفرلرده بولمش و پادشاه دیرلکنه کسب استحقاق ایتمشدر) دیوجواب
و یروب نهایت محلولانک ثانی مشارالیهک منسوباته و نثانی ایالتلو ملازمه لرینه توجیه اولمق
اوزره قرار ویرلدیکنی کورینجهلی قوچی بک لایحه معلومه سننده ایراد و بونک ابتدای
وقوعنی عثمان پاشایه اسناد ایتدکنصکره فی الحقیقه مشار الیهک آدملری یمن و ایران
سفرلرند بک چوق خدمات حربیه ده بولند قارندن استحقاقلرینی تصدیق ایلر ایسه ده توارینخ
متعدد مؤلفلری ساطان مراد ثالث صوقولای محمد پاشا حقنده واقع اولان تحقیراتی
بیان صدندند مشار الیهک اون یدی نفر اغواتنک متصرف اولدقلری نمالو تیمار
وزعامتلی خواص هایونه ضبط اولنوب بدل اوله رقیازوسندن یعنی حاصلات مقیده سندن
متنزل چورک تیمارلر ویردیلر دیو حکایه ایدرلر بوقدیرجه وزرادرلرند بولان توابعاته
دیرلک توجیهی دهها اول جریان ایتمش دیمک اولور

اگرچه اولوقتک ادارسنجه هر وزیرک دائره سی بر مکتب حکمنده اولدیغندن لیاقت
و استحقاقی مشاهده اولناناره دیرلک توجیهی محالف حکمت حکومت دکل ایدیسه ده
پادشاه دیرلکنه نائل اولنلر بعدازین افندیلری دائره سننده قلمیوب دیرلکک معین اولان
موقعنده ایفای خدمت ایلاری لازم کلور ایکن بوقاعده صحیحیه رعایت اولنلر اولدی
حتی بیک بر سنه سننده کشاد اولنان سفر مذا کرانده سرحدات عساکر مرتبه دن خالیدر
دیرلکلر ایچ ایله دوشدی دیدکلری بو معنایی متضمن ایدی زیرا اصحاب حربیه مخصوص
اولان تیماروزعامت متصرفلرینک دیرلکارینک بولندیغنی سنجاقده ساکن اولملری و خلافنده

بولنانلرک دیرلکی رفع اولنسی اقوای شرائط قانون هایوندن ایدی
 برده کرک خواص هایون و کرک وزرا و امرا خاص وزعامتلی امانا معرفتلیله تعشیر
 اولنه کلور ایکن رستم پاشا خواص هایونی اتزامه ویرمک بدعت مخربه سنی ایجاد ایدوب
 کیدرک وزرا و امرا خاص وزعامتلینه و اوقاف اراضیسنه و بلکه تیماراره قدرسرایت ایلدی
 ماترملر دیرلک اصحابی کبی ایلرو سنه لر حاصلاتنک تکثری مطالعه سننده اولنامرلیله
 زراعه درلو درلو ظلم و تعدی یه متجاسر اولدقلرندن ممالک دولتک خرابیسنه بو دخی بر
 سبب قوی اولدی

اوائل دولته خرسیتیانلقدن فتح اولنان ممالکک بعض قراسی سلاطین عظام حضرانک
 انشاسنه موفق اولدقلری خیرات و مبرات مصارفتنک تسویه سی ایچون وقف و تخصیص
 اولندیخی مثللو بعضیلری دخی اورنوس بک میخال بک و لالا شاهین پاشا و تیمور طاش
 پاشا کبی بالذات خدمت فتحده بولنان مجاهدین مسلمینه و بعض اعزّه کرامه تملیک بیور-
 لدیغدن انلر دخی وقف ایتشلردر تملیک اولنان شی عینیله تیمار وزعامت و تیردسی اوزره
 زراعت باطا بوتحت تصرفلرند بولنان ترلالرک حقوق عشریه و عرفیه سی اولمغله جانب
 وقفدن تعشیر و محلول و خالی عن الزراعه اولان یرلری طالب اولان زراعه تفویض اولنوب
 حاصلاتی خیرات و مبرات مصارفنه صرف اولنور ایدی

ملوک اسلامیهدن نزع اولنان ممالکده ملوک سالفه نک کرک کندو وقفلرینه و کرک اعزّه
 کرامه تخصیص ایلدکاری اراضی اکثریا حال و قفیتده ابقا اولندی لکن کیدرک بو خصوصده
 دخی سوء استعمالات جریان ایتمکه باشلا یوب یوزسنه اول فتح اولنوب خاص وزعامت اعتبار
 اولنان اراضی وزرا و امرا یه تملیک اولنور و وقف ایدیلور اولدی

یاوز سلطان سلیمدن بعض مقربلری بر مقدار اراضی تملیکنی رجا ایلدکارلرند (ابتدای
 جلوسه زده غفلتله علی پاشایه بعض قرا تملیک ایتشیدم اصحاب سیفک محصصاتی ماوضع
 لهنک غیرینه ویردیکمدن طولایی حالا نادم ویشیانم) بیوردقلری منقولدر

دها صکره لری ایش بتون بتون چغرندن چیقمغله اراضی توجیهات و تخصیصاتی
 حقنده تفصیل اولنان مقدمات افسادیه نه درجه ارمه قدر ترقی ایتدیکی ونه مرتبه ده اغتشاش
 امور دولتی مستلزم اولدیغی انشاء الله تعالی آتیده ایراد اولنور

اوجاقلق تعبیری ترسانه عامره مصارفنه و یاخود بر قلعه مستحفظلرینک و یا بر شهر
 یرلو نفراتنک علوفه یومیه لرینه قارشولق اوله رق تخصیص قلنمش اولان برقاق قریه
 و یا بر قضا حاصلات عشریه و عرفیه سنه اطلاق قیلنور و بونار دخی عینیله دیرلک کبی اداره

و وارداتی ما وضع لهنه صرف اول نور فقط او جاقلق یالکنز اعشاره منحصر اولیوب جزیه
و میزان حریر و کمرک مثللو بعض رسوماتدن دخی تخصیص اولمشدر

یاوز سلطان سلیم مرحوم چالديرانده شاه اسماعیلی تدمیر ایلدکدن صکره ادریس
بدلیسی بی کوندروب حدود اوزرنده بولنان امرای اکرادی طرف دولت علیه اتباع
ایتدیرمش اولدیغندن امرای مومی الیهکم متوطن اولدقلری محالر کندولرینه یوردلق
واو جاقلق نامیله توجیه اولندی یوردلق و او جاقلق حاوی اولدیغی اراضینک واردات
عشریه و عرفیه سی و امر حکومتی متصرفلرینه عائد و خدمتاری دخی حدودی محافظه
ایتمک و او جانباره اردو سوق اول نور ایسه سر عسکرلر معیتده بولنق ماده سندن عبارت
اولوب حل و قوعنده دیرلکلری اوغللرینه و بلاولد ایسه او خاندانن مناسبه توجیه قانمق
دخی جمله شرائطنددر

ممالك عثمانیه نك حاوی اولدیغی ایالات

ایالت روم ایلی پاشا سنجاغی یعنی مرکز ایالت اولان مناستر و صوفیه لوالریله مورد
واسکندریه یعنی اشقودره و یانیه و ترحاله و کوستندیل و اوخری و دوقه کن و اولونیه و ایلبصان
وسلانیك و دلونیه و اسکوب و و دین و الاجه حصار و پرزرین و پرشته و سلستره و نیکبولی
و چرمن و ویزه و قرق کلیسا و بندر و اقبکرمان سنجاقلرینی حاوی اولوب بکلر بکیسنک
سنوی برملیون یوزبیک اچهلک و میرلوالرینک دخی ایکوز بیک اچهلکدن بشیوز بیک
اچهلکه قدر خاصری واردر بو ایالتده طقوز یوز اون درت زعامت سکنر بیک اوجیوز
التمش تیمار اولمغله بالجمله حاصلات مقیده لری الی الی ملیون سکنر یوک کسور اچیه بالغ
وقوء عسکریه سی دیرلک اصحابنک جبه لولریله برابر اوتوز اوچ بیک قدر سواریه
رسیده اولور

سلستره دن صکره محرر اولان سنجاقلره مؤخرآ اوزی و قلهرون و کیلی لوالری الحاق
اولنهرق سلستره ایاتی تشکیل اولدیغی مثللو مورد دخی آلتی سنجاغه بالتقسیم مستقل
ایالت اتخاذا قانمشدر

ایالت بوسنه سرای بوسنه و کلیس و هرسک و ایزورنیق و بوزغه و راجنه و کرکه
و راهویجه سنجاقلرندن عبارت اولوب بکلر بکیسنک سنوی التیوز الی بیک اچهلک
و میرلوالرینک یوز یتمش بیک اچهلکدن التیوز قرق بیک اچهلکه قدر خاصلری واردر
بو ایالتده اوجیوز سکنان طقوز زعامت و تیمار اولدیغی حالده عمومک حاصلات مقیده سی

اون ایکی مایون اکیوز بیک اچیه بالغ و قوّه عسکریه سی جبهه لوار یله برابر اوچیک سواری یه رسیده اولور هر نه سبیه مبنی ایسه بو ایالتک دیر ایلکاری جسامت لوجه تفریق و قبودان تعبیر اولور خاندانلره تقسیم قلمق حسیله عدد تیمار و زعامت سائر ایالاته و عموم حاصلاته نسبتله آرزجه در

ایالت طمشوار طمشوار و کوله و موروه و جناث و یانود سنجاقلرینی حاوی اولوب صکره دن فتح اولان شبش و لغوش و قاجاص و وازاد و بشک لوارلرینک الحاقیه اون بر سنجاغه ابلاغ اولمشیکن مؤخر آیانوه و بر قاچ سنجاچ دها بر لشدیر یلهرک و اراد ایالتی تشکیل قانمشدر طمشوار بکلر بکیسنک سنوی سکزیوک اتی بیک یدیوز طقسان بش والویه ملحقه میرلوارلرینک یوز طقسان بیک اچیه لکدن اوچیوز بیک اچیه لکه قدر حاصلری وارد و عموما خاص و زعامت و تیمارلرک حاصلات مقیده لری سکسان بش یوک کسور اچیه اولوب عسکریسی دخی ایکی بیک سواری یه بالغ اولور

ایالت بودین بودین و سمندر و پجوی و استونی بلغراد و اوسک و مهاج و استرغون و سرم و شمولطورینه و سکسار و اگری و قانیر و صوائق و سکدین و خطوان و فلک و سجان و سکتوار و قوبان و نوبغراد سنجاقلرینی شامل اولدینی خالد مؤخر اگری و قانیر سنجاقلرینه یدیشر لوار الحاقیه مستقلا ایالت اتحاد اولندینی مثللو ایوار فتحندن صکره کذلک یدی سنجاچ تشکیلله بر ایالت دها ترتیب اولندی

شوراسی دخی اخطار اولور که تفصیلات مبسوطه مزک مأخذی اولان دفتر امناسندن عین علی افندینک « قوانین آل عثمان در خلاصه مضامین دفتر دیوان » نامنده اولان رساله سی بیک اون اتی تاریخنده ترتیب اولمش ایسه ده بیک یوز سنه لرینه قدر اولان وقوعاتک بعضیلری دخی رساله نک حین طبعنده علاوه اولوب فقط هر فصل ایسه کراید فتحی درج و تسطیر قلمامش و اسامینک صحی التزامه نمیدر ندر خلی تغییرات اجرا اولمشدر بنابرین فصل آتیده تکرار ایراد اولمغه لزوم قالماق ایچون هر نه قدر بیانی صد دنده بواندینمز مدتک خارجنده ایسه ده علاوه مزبور دنک لزومی اولتلی دخی تسطیر قندی : بودین بکلر بکلر بکلر سنوی سکزیوک سکسان بیک و ملحقاتی بولنان میرلوارلرک اکیوز اون بیک اچیه لکدن یدیوز قرق بیک اچیه لکه قدر حاصلری اولوب مجموع ایاتده ایکی بیک یدیوز یکر می ایکی قلیج زعامت و تیمار وارد قلیج تعبیری دفتر خاقانی اصلاحاتندن اوله رق ارباب حربه مخصوص اولان زعامت و تیماراتک اصل باش قلمنه یعنی اساسنه اطلاق اولمغه ترقی اوله رق صکره دن الحاق و اعطا اولان ملحقات قلیج تعبیرندن

خارج قالور وحل وقوعنده قلیچی مجدداً بریسنه وملحقاتی ترقی اولهرق دیرلک اصحابنک مستحق مکافات اولانلرینه علاوه توجیه قیلنور
بغداد ومصر وبودین ایالتلری وقیمله دارالسلطنه اولدقلرندن میرمیرانلرینک قوچیلی قایغه
بنمک ورکابنده صولاق و بیگ یورتیمک وبردرجهیه قدر توجیهاته مأذون اولمق کبی بعض
امتیازلری وارایدی

ایالت اناتولی پاشا سنجاغی اولان کوتاهیه ایله صاروخان وایدین وخداوندکاروقسطمونی
ومنتشا وبولی وانقره وکنغری وقره حصار صاحب وتکه ایلی وحیدایلی وسلطان اوکی
وبالیکسری سنجاقلرینی حاوی اولوب بکلر بکیسنک اون یوک و میرلوالرینک ایکی یوکن
القی یوک اقچه لکه قدر حاصلری واردر بو ایالتده یوز طقسان بش زعامت ویدییک یوز
التمش القی تیمار اولمغله جبهلولریله برابر قوه عسکریه سی اون یدییک سواریه بالغ اولور
ایالت قرمان پاشا سنجاغی اولان قونیهدن ماعدا نیکده واقسرای وبکشهری وقیرشهری
وقیصریه واقشهر سنجاقلرندن مرکب اولوب بکلر بکیسنک سنوی القی یوک التمش بشیک ومیر
لوالقلمرینک یوز طقسان بیگ اقچه لکدن اوچیوزاللی بیگ اقچه لکه قدر حاصلری واردر
وبو ایالتده یوز اون القی زعامت و بیگ بشیوز درت تیمار موجود اولمغله جبهلولریله برابر
قوه عسکریه سی درتیمک القی یوز سواریه رسیده اولور

ایالت جزایر بحرسفید کلیبولی واغریبوز واینه بختی وقارلی ایلی ومسسترده وردوس
ومدلولو وقوجه ایلی و بیغا وصغله سنجاقلریله سالیانه ایله تصرف اولنان ساقز ونقشه ومهدیه
لوالرینی حاویدر بوایالت قپودان پاشاغله مربوط اولوب بکلر بکیسنک یعنی قپودان پاشانک
سنوی سکز یوز سکسان بشیک ومیرلوالقلمرینک ایکیوز اون بیگ اقچه لکدن درتیوز
قرق بیگ اقچه لکه قدر حاصلری واردر اشبو ایالتده یوز یکریمی القی زعامت و بیگ
درتیوز طقسان ایکی تیمار بولمغله قوه عسکریه سی جبهلولریله برابر درتیمک بشیوز نفره
بالغ اولور وبونلره دریا قلمی اطلاق قیلنوب دریا سفرلرینه اشراک میرلوالری دخی برر
ایکیشر کمی ایله دونمای هایون معیتده ایفای خدمت ایدرلر صغله یعنی ازمیر سنجاغی
ترسانه کتخدالرینک خاصیدر

ایالت قبریس پاشا سنجاغی اولان لفقوشه ایله ایچایل و سیس وعلائییه وطرسوس
سنجاقلرینی وسالیانه ایله تصرف اولنان کرینه وباف وماغوسه لوالرینی شامل اولوب
بکلر بکیسنک سنوی القی یوک وسنجاق بکلر بکیسنک ایکیوز بیگ اقچه لکدن ایکیوز قرق
بیگ اقچه لکه قدر حاصلری واردر بو ایالتده اوتوز سکز زعامت و بیگ القی یوز

یگر می یدی تیمار اولمغله قوه عسکریه سی جبهه لولریله برابر درتیک بشیوز کشی به بالغ
اولور وقبر بس بکار بکیلری برکمی وبریدک ایله دریا سفرینه اشک اوزره مأموردر
جزیره مذکوره فتح اولندقدن صکره اهمیت زمانیه سنه بناء ایالت اتخاذ قلمش ایسه ده
بکار بکیسنک تقویه بازوی اقتداری ایچون خارجدن اعانه یه لزوم کورندیکندن اناطولی
ساحلنده واقع اولوب بالاده محرر اولان درت سنجاقلر علاوه والحاق اولمغله ایجابی تقدیرنده
میرمیران ایالت مذکور سنجاقلرک ارباب زعامت وتیمارینی جزیره جلب وایستخدام
ایده یلورایدی

ایالت ذوالقدریه مرعش وملاطیه وعینتاب وقارص ذوالقدریه وصمصا سنجاقلرندن
عبارت اولوب بکار بکیسنک الی یوک یگر می سکر بیگ درتیوز الی ومیرلوالقرینک
اوچیوز بیگ اقیچه لکدن بشیوز بیگ اقیچه لکه قدر خاصری واردر وبوایالت یگر می
طقوز زعامت وایکی بیگ یوز قرق تیماری حاوی اولمغله قوه عسکریه سی جبهه لولریله برابر
بشیک بشیوز سوار یه بالغ اولور عصر سلیمان خانیده مرعش حکمداری بولان شهسوار
زاده علی بک فرهاد پاشا غدریله مقتول اولدقده زعامت وتیمارلر میرمرحومک توابعاتنده
بولمق مصالحه سیله رفع والغا ومقاطعات میریه اتخاذ قلمشیدی بر قاق سنه مرورنده
جلالیلر ظهور ایدوب دیرلکلرندن محروم اولان کسان دخی انلره التحاق ایله جمعیت
شقوت کسب جسامت ایلدیکندن اولوقت صدراعظم بولان مقتول ابراهیم پاشا مذکور
مقاطعه لری هیئت اصلیه سنه ارجاع واسحابنه وسائر مستحق اوللره اعاده وتوجیه ایدرک
جمعیت اشقیایی طاغیغه موفق اولمش واول زماندن برو تکرار زعامت وتیمار صورتیه
تصرف اولنه کلمشدر

ایالت رومیه صغری پاشا سنجاغی اولان سیواس سنجاغیه امامیه وچوروم وبوزق
ودیوریک وچانیک وعر بکیر لوالرینی حاویدر بکار بکیسنک طقوز یوک ومیرلوالرینک ایکوز بیگ
اقیچه لکدن اوچیوز الی بیگ اقیچه لکه قدر خاصری واردر بوایالتده یگر می طقوز زعامت
واوچیک یگر می بر تیمار اولمغله جبهه لولریله برابر قوه عسکریه سی طقوز بیگ مقداری
سواری به رسیده اولور

ایالت ارضروم ارضروم وقره حصار شرقی وکیغی وخنس وپاسین علیا وملازگرد
وتکمان وقوزی جان واسپر وطرطوم وپاسین سفلا ومامروان سنجاقلرینی شامل اولوب بکار
بکیسنک سنوی برمایون ایکوز اون درت بیگ ومیرلوالرینک یوز بیگ اقیچه لکدن اوچیوز
یگر می بیگ اقیچه لکه قدر خاصری واردر بوایالتده یوز یگر می زعامت وبشیک یوز الی
طقوز تیمار اولمغله قوه عسکریه سی جبهه لولریله برابر یدی بیگ سکر یوز سوار یه بالغ اولور

ایالت شام دمشق و قدس شریف و غزه و صفد و نابلس و عجلون و لجون و بقاع و عکه و تدمر و صیدا مع بیروت و کورک مع شویک سنجاقلرینی حاوی اولوب بکلر بکیسنگ سنوی برملیون اچقه لک و میرلورینک اکیوز بیک اچقه لکدن اوچیوز التمشیک اچقه لک قدر خاصلری واردربوایالتده یوز یکریمی سکمز زعامت و سکمز یوز التمش سکمز تیار اولمغله جبهه لولریله برابر قوه عسکریه سی اکیبیک التیوز مقداری سواریه رسیده اولور

ایالت طرابلس شام طرابلس و حما و حص و سلمیه و جبلیه سنجاقلرندن عبارت اولوب بکلر بکیسنگ سنوی سکمز یوک اچقه و میرلورینک اکیوز اون بیک اچقه لکدن اوچیوز طقسان بیک اچقه لک قدر خاصلری واردربوایالتده التمش اوچ زعامت و بشیوز التمش بر تیار اولمغله جبهه لولریله برابر قوه عسکریه سی بیک درتیوز سواریه بالغ اولور

ایالت حلب حلب و ادنه و اکراد کلیس و بیره جک و عزیز و معره و ترکان حلب و عزاز و متیج مع مضیق سنجاقلرینی حاوی اولوب بکلر بکیسنگ سنوی سکمز یوز اون یدی بیک و میرلورینک اکیوز بیک اچقه لکدن بشیوز بیک اچقه لک قدر خاصلری واردربوایالتده یوز درت زعامت و یدیوز طقسان طقوز تیار موجود اولمغله قوه عسکریه سی جبهه لولریله برابر اکیبیک بشیوز سواریه بالغ اولور ادنه سنجاغیکه طوائف ملو کدن رمضان اوغللری حکومتکاهیدر فصل سابقده بیان اولندیغی اوزره بونلر کاه سلاطین مصریه و کاه دولت عثمانیه طرفدار کچنمکده ایکن مصر فتح اولندقدن صکره بالطبع دولت علیه نک زیر حکمنه داخل اولدقلرندن سنوی اون یوک کسور اچقه لک خاص تعیین و حکومت تعبیریه ادنه ده تمکین اولتمش ایدی مرور زمانله حکومت مربوطه مندرس اوله رق مستقل ایالت اتخاذا قلمشدر

ایالت رقه باشا سنجاغی اولان اورفه سنجاغیه جماسه و خابور و دیررهبه و بنی ربیع و سروج و غنه سنجاقلرینی حاوی اولوب بکلر بکیسنگ سنوی التیوک سکسان بیک اچقه لک و میرلورینک یوز بیک اچقه لکدن اکیوز سکسان بیک اچقه لک قدر خاصلری واردربوایالتده اوتوز یدی زعامت و التیوز اون التی تیار اولمغله جبهه لولریله برابر قوه عسکریه سی بیک التیوز سواریه بالغ اولور

ایالت قارص قارص و رجوان و زار و شاد و کچوان و قغزمان مع شوره کل سنجاقلرندن مرتب اولوب بکلر بکیسنگ سکمز یوز یکریمی و میرلورینک اکیوز بیک اچقه لکدن درتیوز بیک اچقه لک قدر خاصلری واردربوایالتده بیک اکیوز التی زعامت و تیار اولمغله قوه عسکریه سی بونستده اولق اقتضا ایدر

ایالت چلدرد چلدرد واولتی وخرنوش واردتوج واردهان وحجرك وبوسخو وماخجیان
واجارد وپناك وبرتكرك ولوانه ونصف لوانه وشوشاد سنجاقلرینی حاوی اولوب بكار
بكيسنك طقوز يوز يكرمی بشبك وميرلوالرينك ايكوز بيك اقچه لكدن التي يوز بيك
اقچه لكه قدر خاصلری واردر والويه اخيردنك دردی يورتلق واوجاقلق وجهله تصرف
اوانور بوايالتده طقسان یدی زعامت وبشيوز الى طقوز تيمار اولمغله قوه عسكريه سی
جبهلولریله برابر بيك سکنز يوز سواریه رسیده اولور

ایالت طربزون طربزون وباطوم وكونيه سنجاقلردن عبارت اولوب بكار بكيسنك
سنوی یدیوز اتوز درتبيك سکنز يوز الى طقوز اقچهلك خاصي واردر بوايالتده الى
التي زعامت ودرتيوز طقسان سکنز تيمار اولمغله جبهلولریله برابر قوه عسكريه سی بيك
یدیوز الى سواریدر

ایالت کفه بوايالت بر سنجاقدن عبارت وقریم جزیره سنك بحر آفاق جانبده واقع
برقاج قلعه یی حاوی اولوب بكار بكيسنك التیوز یتش طقوز بيك اقچهلك خاصي
واردر وقریم خانلرینه اعطا اولنه کلان یومیه بیکر اقچه جیب خرچلغی کفه مقاطعه سندن
محولدر مع مافیه بشیوز الى درت عدد تيمار وزعامت دخی موجوددر

ایالت موصل پاشا سنجاغی اولان موصل سنجاغیله باجوانلو و تکریت واسکی موصل
وهورن وبانه لوالرینی حاوی اولوب بكار بكيسنك سنوی التیوز سکسان بيك وميرلوالرينك
ايكوز بيك اقچه لكدن ايكوز يكرمی بيك اقچه لكه قدر خاصلری واردر وایکیوز یتش
درت زعامت وتیماری جاویدر

ایالت دیاربکر پاشا سنجاغی اولان آمد یعنی دیاربکر لواسیله خرپوط وارغنی وسیورک
ونصیبین وحسنکیف وحشککزک وسعرد ومفارقین واقچه قلعه وسنچار وخابور وصغمان
وقولب ومهرانی وترجیل واوتاق وپرتک وچباچور وچرمیک سنجاقلرینی حاوی اولوب
بكار بكيسنك برمایون ايكوز بيك وميرلوالرينك يوز بيك اقچه دن بشیوز بيك اقچه لكه
قدر خاصلری واردر بوسنجاقلرك سکزینه اکراد بکاری یوردلق واوجاقلق وجهله
متصرف اولدقلری مثللو درتیوزدن متجاوز عشائر اکراد بکاری دخی واردر که میرلوالر
کی صاحب توغ و علم اولیوب زعما حکمنده در وبو ایالتده قرق ایکی زعامت والتیوز
سکسان سکنز تيمار اولمغله قوه عسكريه سی جبهلولریله برابر بيك سکنز يوز واکراد
عسکریله معا طقوز بيك سواریه بالغ اولور

ایالت وان وان وعادلجواز وارچیش وموش وبارکیری وکارکار وکسانی واسیارد

واغاکس واکراد بنی قطور وقلعه بایزید وبردع و اودجق سنجاقلرینی حاوی اولوب بکلیسینک سنوی برملیون اوتوز ایکی بیک و میرلوالرینک ایکیوز بیک اچهدن درتیوز الی بیک اچه لکه قدر حاصلری واردر بویالتده یوز طقسان طقوز زعامت وطقوز یوز اون الی تیمار اولغله قوه عسکریه سی بونستده اولق اقتضا ایدر

بغداد و بصره و مصر و یمن و حبش و لحا ایالتلریله جزایر بحر سفید و حلب ایالتلرنده واقع بعض سنجاقلر سالیانه لو اولدیغندن اول امرده بونک تعریفنه ابتدار اولنور شویله که سالیانه لو دینلان ایالات والویه ممالک سائره کبی و قتیله خاص وزعامت و تیمار صورتیه تفریق و تقسیم اولنماغله بالجمله حاصلات عشریه و عرفیه سی خزینة دولته عائددر بناءً علیه حاصلات واقعه دن میرمیران و میرلوالره سالیانه یعنی معاش سالیه ویرلی قولی تعبیرقلنان محلی طوائف عسکریه سنه علوفه معینه اعطا اولنوب فضله سی جانب دولت علیه کوندریلور فقط شوراسیدخی معلوم اولسونکه مصر ارسالیه سی درتیوز بیک التون ایکن عصر سلیمان خانیده مصر بکلیسی پاشا التیوز بیک التونه ابلاغ وارسال ایلدکده سلطان سلیمان مرحوم سببی استفسار ایلدی پاشای مزبور هر نقدر بوفضله حسن اداره و تصرفاتم ثمره سیدر یوخسه قدیمندن زیاده اهالی یه برشی طرح اولنماشدر دیو جواب ویردی ایسه ده پادشاه مشارالیه حضر تلری مذکور فضله یی خزینة عامریه قبول ایتیموب استانبوله اجرا ایلدکلی صو یوللرینه و کمرلرینه خرج ایتشلردر

ایالت بغداد بغداد و حله و زنکی اباد و جوارز و رماحیه و چنکوله و قره طاغ و درتنک و سماوات و بیات و درنه و دهبالا و واسط و کرند و تیمور قپو و قزانیه و کیلان و ال صایح و عمادیه سنجاق و حکومتلرینی حاویدر بغداد بکلیسینک برملیون درتیوز بیک اچه سالیه سی اولوب الویه ملحقه نیک بعضیسنده خاص امرا وار ایسه ده اکثریسی سالیانه ایله موظفدر

ایالت بصره عصر سلیمان خانیده بغداد فتح اواندقده بصره امیری راشد عرض اطاعت ایتمکه بروجه حکومت کندوسنه تفویض اولنوب برمدت مزبورک اعقابی تحت اداره سنده قالدقدنصکره جانب دولت علیه دن میر میران کوندرلکه باشلادی و التزام صورتیه بکلیر بکیلره توجیه اولنور اولدی حاصلاتی اون یوک اچیه بالغ اولور ایالت لحا بودخی بغداد فتحندن صکره حوزه حکومت عثمانیه داخل اولوب سکزیوز سکسان بیک اچه سالیانه ایله میرمیران کوندریلور ایکن مؤخرایا عربان تسلطنه کرفتار اولغله بغداد والیرینک اقتدار لوجه لری بدرجه یه قدر تنفید حکومت ایدرلر ایدی

ایالت یمن سلیمان پاشا و منان پاشا سفر لرندن صکره یمنک اکثر مواقعی تحت حکومت دولته داخل اولوب مخا وزید و صنعا و تغزو و صهله و کوبان و طویله و معارب و عدن لوالری تشکیل قلمش و بکلیر بکلیر خلیججه آثار براقوب بر آراق عدن آبروجه بکلیر بکلیک اتخاذ اولمشیکن بیک تاریخندن صکره لری اورالره باقلمغه زمان مساعد اولمدیغندن اکثر محالری اماملرک دست تصرفه کچمشدر

ایالت حبش مصوع و سواکن سنجاقلرندن عبارت اولوب فقط اوز تیمور اوغلی عثمان پاشا حبش بکلیر بکیسی ایکن حبشیلر ایله عظیم جنکلیر ایدوب توسیع دائره حکومت ایلمش ایدی مؤخرأ ایالت مزبورده برطاقم نااهللره توجه اولمغله شیرازه حکومت بوزلدی ده صکره جده سنجاغی مرکز ولایت اتخاذ اولوب ایالت حبش دخی الحاقاً توجه اولنور اولدی سالیانه سی اون بر یوک سکسان بیک اقچه در

ایالت مصر جرجه و ابریم والوحدات و منفوط و سیوط و بهنسا و شرقیه و غربیه و منوفیه و منصوریه و قلیوبیه و بحیره و اسکندریه و دمیاط و رشید سنجاقلری حای اولوب بکلیر بکلیککنک درتیوز سکسان یدی کیسه سالیانه سی وارد

ممالک محروسه ده واقع سنجاقلره تعیین اولنان میرلوالر جانب دولت علیه دن انتخاب وارسال اولنور ایسه ده مصر و بغداد کی اوزاق اولان ایالتلرک الویه ملحقه سنه بکلیر تعیین ایدرلر ایدی دولت چرا کسه بقایاسندن اوله رق مصرده برطاقم کوله من بکلیر موجود اولوب بونلره مخصوص مناصب و کویلر وارد که بکلیر بکلیر تفویضه مآذوندر اسکندریه و دمیاط و رشید سنجاقلری ساحلده بولنمق تقریبیله اکثریا بوجه خاص ترسانه عامره امراسنه توجه اولمغله طرفلرندن متسلم کوندروب اداره ایتدیرلر و فضله حاصلاتیله تعیش ایدرلر بو کوله منلرک نتایج احوالی ان شاء الله تعالی فصول آتیله ده تفصیل اولنور

طرابلس غرب و تونس و جزایر ایالتلری بونلره غرب اوجاقلری اطلاق اولنور و امر اداره لری بتون بتون بشقه برحالددر شویله که بو ایالتلر فتح اولندجه یرلی قوی نامیله سکیزراونر بیک ترک عسکری براغامشیدی اسپانیوللرک اندلسده بولنسان عربلر حقنده متجاسر اولدقلری حرکات غدارانه سبیلله ملت اسلامیه ایله اسپانیالور بیننده خاصمه قویه حادث اولدیغنه و دولت علیه نک ایسه اسپانیا دولتیله اصلاً معاهده سی سبقت ایتدیکنه مبنی ذکر اولنان اوجاقلر خلقی تدارک ایلدکاری سفن حربیه ایله علی الدوام اسپانیا ساحل و جزیره لری غارت و تجار سفینه لری اخذ و ضبط ایدر و ایجاب ایتدیکجه دونمای هایون معینه جلب اولنهرق خدمات سفریه ده بولنورلر ایدی

برده اول عصرده مائطه قورسانلری اسلام تجار سفینه لرینی شکار ایتمک ایله مشغول و مألوف بولندقلرندن غرب اوجاقلری دخی دولت علیه جه انلره مقابل طو تاشدر اسپانیوللر بو اوجاقلرک اک قوتلوسی و کندولرینه اک قریبی بولان جزایره دفعاتله هجوم ایلدیلر ایسه ده کلی ضایعاته کرفتار اوله رق رجعت قهقری یه مجبور اولمشلردر کیدرک مذکور اوجاقلرده عصیت عسکریه حاصل وفی الاصل بولر یکیچری ایکن دایي تعبیری ایله کمی قپودانلری و صاحب نفوذ ضابطان حادث اولمغله بکلر بکیلرک چوقاق حکمی قالمیوب حل وقوعنده ایچلرندن انتخاب ایدر اولدیلر و جانب سلطنت سنیه دن دخی تصدیق و توجیه اولمغه باشلادی ایکی اوچ سنه ده بر کره طرف دولت علیه یه هدیه تقدیم ایدرلر و ترسانه عامرده دن دخی کندولرینه سفینه وادوات حربیه اعطا اولنور ایدی

اناطولی و اقدکز جزیره لری اهالیسنک اشپلری و برجنایتله مهم اولوب تحریات حکامه مبتلا اولنلر غرب اوجاقلرینه فرار ایدرلر و بعضا دخی مذکور اوجاقلردن مخصوص مأمورلر کلوب از میر و سائر یرلرده بایراقلر آچهرق صولومه دن جان و یرمک و ترله مدن مال قزانمق استیانلر بایراغمز آلتنه کلسون دیو دللاللرندا ایتدیروب عسکر یازارلرایدی ده ا صکرملری مذکور اوجاقلر خلقنه اوروپا دولتلریله عقد معاهده ایتمکه جانب دولت علیه دن رخصت اعطا اولمغله و بعضاً دخی اجبار قلنمغله بتون بتون بر سربست اداره استحصال ایلدیلر واقعا بونلرک معاهده لری دولترجه مرعی اولان قیود و شروط پولتیقیه یی حاوی اولمیوب ترک محاربه دن عبارت و برنوع متارکه دیمک ایسه ده بو مأذونیت آتیده دولت علیه یه بیوک مشکلاتی دعوت ایتمشدر

بالاده تسطیر اولنان ایالاتدن ماعدا دولت علیه یه تابع بعض حکومتلر دخی واردرکه بروجه آتی ایراد اولنور :

شرافت حجاز شرفای ادارسه دن شریف قتاده بشیوز طقسان طقوزسنه سی حرمین شریفینی شرفای هواشم یدندن اخذ و ضبط ایدوب تشکیل حکومت و امارت ایلش ایسه ده بحر احمر ساحلاری سلاطین مصریه زیر حکمنده بولندیغنه و بلدتین مبارکتینک ذخائر و ارزاقی مصردن کلکه منوط ایدوکنه مبنی مصر پادشاهلرینک ناملری خطبه لرده یاد اولنور و بر درجه یه قدر امر و نهیلری دخی تنفیذ قیلنور ایدی

یاوز سلطان سلیم مرحوم فتح مصر ایله کامیین اولدقده شریف وقت بولنان ابو البرکات تبریک فتح و ظفر ایچون اوغلنی و الا آن زیب آرای خزینه عثمانی اولان بعض تبرکات جلیله یی اعزام و ارسال ایتمکه مظهر صنوف تکریم اولمشیدی

یمن و حبش طرفلرنده کوندن کونه جیوش عثمانیه تکثر ایدرک طقوز یوز قرق درت
سنه سنده حرمین شریفینه طرف دولت علیه دن قاضی نصب وارسال و سنان پاشانک یمن
سفری عودتنده جده کمرکنک نصف حاصلاتی شریف بولنلرله تخصیص قانندی
دها صکره لری لواء جده و ایالت حبش و شیخ الحرم ملک مکّه خدمت جلیله سی بر اشدریلوب
میرمیران و وزیرایه و مدینه منوره شیخ الحرم ملک مأموریت علیه سی دخی دارالسعاده اغاسی
معزوللرینه تفویض اولنه کیکله شریفلرک ایشلری شرفایه نظارت و بدوی عربانه حکومت
ایتمکه منحصر قالدی

مع مافیه طرف دولت علیه دن علو شانلرینه احترامده قصور اولنیوب هر سنه صرّه
هایون امناسیله اینجو و الماس ایله مرصع خلعت و نامه هایون ارسال اولنوب و حل السهی
ظهورنده و یاخود بالایجاب انفصاللری و قوعنده سلاله جلیله لرندن انتخاب اولنان ذات
شریفه توجیه امارتی متضمن منشور و تشریفات پادشاهی کوندریلورکه جناب حق الی قیام
الساعه پایدار بیورسون بو اصول الآن مرعی و جده و الیرلیه بالاشترک اجرای حکومت
ایتمکه اولدقلری مرئیدر

قریم خانلغی فاتح مرحوم عصرینک و قوعاتی صرهمسندده ذکر و بیان اولندیغی
اوزره منکلی کرای خان فاتح مشارالیه حضرتلری جانبندن قریمه ارسال قلندقدن صکره
جانب دولت علیه برنوع مربوطیت حاصل اولمغه سلطان بایزید مرحوم بغداد سفرینه
عزیمت ایتدکده خان مشارالیه دخی علی طریق الاعانه موکب هایونه کلوب خدمتده
بولنش و عسکر تاتارک فتح ایتدکلری بالطوه نام اراضی خانلره خاص تخصیص قلمشیدی
فاتح حضرتلری عصرنده کدک احمد پاشا شمشیر سطوتیه جنویزلردن فتح اولنان
کفه و آزاغ و منکوب قلعه لری قریم شبه جزیره سنک جهت شرقیه سندده واقع و بوسیله
دولت علیه جزیره مذکوره اراضیسندن حصه دار بولندیغنه بناء نفوذ دولت کوندن
کونه حکومت تاتار اوزرینه کسب قوت ایدوب نهایت خانلر عصر سلیمان خانیده عزل
و نصب اولمغه و خان زاده لردن بر قاچ شهزاده رهن اوله رق استانبولده توقیف قلممغه
باشلانمش و کفه مقاطعه سندن یومیه بیک اقچه جیب خرجانی تخصیص قلمشدر

لکن قریم خانلری ملوک اسلامیه دن معدود و امر حکومتلرنده و محاور بولندقلری
ملوک عیسویه ایله جنک و صاحب خصوصلرنده بر درجه یه قدر مستبد بالرأی اولدقلری
مثالو خطبه لرده دعای پادشاهی به تردیفاً خانلره دخی دعا اولنور و کندو ناملرینه اوله رق
سکه قطع ایتدیرلر ایدی بونلرک عزل و نصبی و قوعنده و القاب و معاملاتده ملوکه لایق

اعزاز و تشریفات ایله تکریم و سفر لر ظهورنده دعوتی متضمن نامه هایون و سکیان بها نامیله خرج راه ارسال قلنه رق امر احترام تتم اولنور و معزول اولان خانلر و اولاد و تعلقاتلری اسلمیه و یانبولی و تکفور طاغی و چتالجه کبی مناسب موقعلرده بالاقامه چفتلکات و سالیانه و سائر معینات کافیه ترتیب و تخصیص اولنور رق ترفیه حاللرینه اعتنا قیلنور ایدی سلطان مراد ثالث عصرنده سمین محمد کرای عزل اولنمقدده بز عثمانیانک امر اسندنمیز که انلرک عزلیله معزول اولهیم قریم تختی بکا آبا واجدامدن موروثدر دیو ادعای استقلاله تصدی ایتدی ایسه ده خانی اسلام کرای ساکن اولدینی محلدن استانبوله جلب ایله حضور هایونده متلبس خلعت خانی اوله رق دونمای هایون ایله ساحل قریمه واصل اولدقدده قوم تاتار خان جدیده اتباع ایتلریله محمد کرای هدف سهام روزکار اولدی کذلک عصر مراد خان رابعده ینه محمد کرای نامنده برخان عزنی قبول ایتیموب وادی عصیان سالک اولمغله صورت جبرییه ده ابقاسی منشورینی استحصال ایلدی ایسه ده انک دخی انجام حالی نشانه تفنک فنا اولمغی انتاج ایلدی اوچیوز سنه قدر مدتده بوایکی محمد کرایدن ماعدا خانان قریمدن هیچ بریسی علم افراز عصیان اولما مشدر قریم حکومتک حدودی و اداره داخلیه سی لایقیله معلوم اولیوب فقط اور قیوسنک خارجنده واقع صحاری جسیمه قبائل تاتار و نوغای و قزاق ایله ملو و خانلرک درجه اقتدار و حرکتلرینه کوره بونلره امر و نهیلری جاری اولوب نفس قریم خلقی ایسه مدن و امصارده ساکن اولملریله برابر بدوی الطبع اولدقلرندن وغایت کلفتسز اوله رق کرک کندولرینک و کرک آتلرینک مأ کولاتلرینی ترکیلرینه وضع ایله بر ایکیوز ساعتک مسافیه قدر ایلغار ایدد کلدکلرندن علی الدوام قزاق و روس وله مملکتلرینه چاپول ایدرک کیتلو اسرا و حیوانات چیقاروب ساترلر و بونکله تغیش ایدرلر ایدی خانلر دارالاماره اولان بغچه سرایده و وزیر اول و ثانی حکمنده اولان واکثریا سرعسکرک و وظیفه سنی ایفا ایدن قلغای و نورالدین سلطانلر و سائر میرزالر هر بریسی قریم شهرلرندن برنده اقامت و اجرای حکومت ایدوب خانلرک برجانبه سفری و قوعنده دائرلری خلقی و اهالیدن حرب و ضربه قادر اولنلری جمع ایدوب موکب خانییه الحاق ایده کیشلر در طرف دولت علیه دن وظیفه خوار اوله رق خدمت خانیده بولنان بیک قدر طوائف عسکریه دن غیری عساکر منتظمه معلوم دکل ایسه ده سالف الذکر سلطان و میرزالر ایله امرای تاتار کندولرینه منسوب قبائل خلقیله خان اردوسنه واصل و اجتماع حاصل اولدقدده اوتوز قرق بیک و بلسکه دهها زیاده جنکا ورده رسیده اولدقلری ثابتدر حتی

بیك تاریخندن صکره لره قدر قریم خانلری مسقوه شهرینه قدر بالدفعات ایلغار و غارت و روسیه وله دولترلندن ویرکوی سنوی اخذ ایده کلمش لر ایکن بالاخره طائفه تاتاره ضعف و تن پرورلاک مستولی اوله رق اسکی بطش و شدت لری درجه درجه زائل اولغله ممالک اعدایه تجاوز شویله طورسون کندو ولایتلری بیله محافظه یه قادر اوله میوب بالاخره ذل اسارته کرفتار اولدیلر شوراسی جای دقتدرکه قریم خانلری غازی و مجاهد ملوک اسلامیه دن اولوب کړک منفرداً و کړک اردوی هایونلر معیتند غزوات عظیمه و فتوحات جسیمه یه نائل و درلو درلو الطاف و التفات دولته واصل اولمش لر ایکن کفه سنجاغی کبی کوچک و ممالک عثمانیه یه غیر متصل و قریم جزیره سی اوزرنده واقع برلواپی نه خانلر طلبه جرأت ایده یلمش ونه جانب دولت علیه دن قریم حکومتیه الحاق قلمشدر فقط یاوز سلطان سلیم مرحوم کفه دن روم ایلی طرفه کلور ایکن قریم حانی پک چوق اکرام و احترام و اعانه عسکریه ایله وظیفه مخادتی اتمام ایتسی عقبنده ان شاء الله نائل تحت پدر اولور و کفه سنجاغنک قریم حکومتیه الحاقیه حق مزده درکار اولان لطف و کرم کزی اکال بیوررسکنز دیدکده خاقان مشارالیه پادشاهلر هر نوع لطف و کرمی دریغ ایتزلر انجق ملک ویرمک پادشاهلره کوره دائره امکاندن خارجدر دیدکاری منقولدر

افلاق و بغداد امارت لرینک و راغوزه جمهورلغنک احوالی باب سابق تکمله سنده مسطور اولوب فقط طورله و طونه نهرلری ساحل لرند اولان قلاع نوبنو تحکیم و تعیین مستحفظین و امرا ایله امر حراست لری تتم اولنغله مملکتین اوزرنده اولان حقوق دولت کوندن کونه کسب متانت ایلدی .

اردل قرالغی سلطان سلیمان مرحوم مجارستانی فتح ایتدکده اردل حاکمی بولنان یانوشی بودین تخته اصعاد و سکنز اون سنه مرورنده وقوع وفاته مبنی اوغلی استفانی پدری مقامنه اقعاد ایتشیدی لکن استفان صبی شیر خوار اولوب والده سی و کاله تسویه امورده قائمه اولدی ایسه ده نیچه لولر بو وسیله ایله قلعه بودینی تسخیر ایتمک سوداسنه دوشدکلرندن قلعه مرقومه ولایه دولت محارسته تودیع واردل قرالغی مزبور استفانه توجیه بیولدی

بوندن صکره مذکور قراللق بیك یوز تاریخنه قدر پایدار و تابعیت سلطنت سنیه ایله شهرت شعار اولوب قرال لرینک حرکاتی دخی و قوعات حربیه صره سنده ایراد اولندیغندن تکرارندن صرف نظر قلندی

اردل قرال لرینک تشریفات و معاملاتجه افلاق و بغداد و یوده لرندن برقاج وجهله

فرق و امتیاز لری اولوب اولاً القاب و مناشیرده مملکتین بکلرینه و یوده واردل حکمدارلرینه قرال تعبیر و تسطیر قیلنور ایدی ثانیاً حین نصبلرنده مملکتین بکلرینه قوقه تعبیر قلنان و قول کتخدالرینه مخصوص اولان قلنسود کیدیریلوب اردل قرالرینه قورونه دینلان تاج اعطا اولنه کلمشدر ثالثاً مملکتینده بولنان قلاع امرای عثمانیه دست محافضلرندم اوله رق اردل قلاعی ایسه قرالرد مودوع بولمشدر رابعاً مملکتین امارتلری صکره لری روملردن خدمت دولته اولان بعض کسانه توجیه اولنه کلوب اردل قرالغی ایسه دائماً اهلینک انتخاب ایلدکاری یرو کبراسنه تفویض اولنور ایدی

❦ باب دولته موجود اولوب خزینة هایوندن علوفة یومیه ایله موظف اولان علما و مأمورین و قپو قولی تعبیر قلنان و پادشاهلرک عسا کر خاصه سی حکمنده بولنان طوائف عسکریه نک کمیت و مقدارلریله نظامات و قواعد مرعیه لری بوجه آتی بیان اولنور ❦

مأمورین و عسا کر عثمانیه نک بر صنفی کندولرینه تخصیص و ارائه اولنان حاصلات عشریه و دیگر صنفی خزینة دولتن علوفة یومیه ایله موظف اولدقلری بالاده تحریر قلنمش و حاصلات عشریه ایله تعیش ایدنلرک احوال و کیفیتلری بوجه تفصیل بیان و ایراد اولنمش اولدیغندن صنف ثانینک توضیح مقدار و نظاماته شروع اولندی

وظیفه یومیه ایله موظف اولان طوائف دائماً رکاب هایونده موجود و حاضر بولند- قلرندن قپو قولی تعبیریه مسمی و پادشاهان عظامک بندة مخصوصی و عسا کر خاصه سی حکمنده بولمشدر طقوز یوز یتمش اوچ سنه سنده واقع سلطان سایمان مرحومک سکتوار سفرینه عزیمتلرندم بونلرک مجموعی قرق سکزیبک اوچیوزاون اتی نفر ایکن عصر مراد خان ثالثه التمش درتیبک درتیوز یکرمی اتی نفره و بیک تاریخنندن صکره طقسان بربیک اکیوز ایکی نفره بالغ اولدیکه هر صنفی آبرو آبرو ایزاد اولنور :

شیخ الاسلام اولان ذواتک یومیه یدیوزاللی و بالفعل روم الی قاضی عسکرلرینک بشیوز یتمش ایکی و اناطولی قاضی عسکرلرینک بشیوز التمش ایکی و معزوللرینک اکیوز اللی و استانبول قضا سندن منفصل اولانلرک یوز یکرمی و بعضاً اکیوز و حرمین و ادرنه و بروسه دن منفصل اولانلرک یوز و سائر مولویت معزوللرینک سکساز و طقساز اقچه و وظیفه یومیه سی اولدیغی مثللو مدرسین کرام مدرسه لرینک و قفلری جانبندن موظف ایدیلر مع مافیة بالفعل حکومت شرعیه ده بولنان صدور و موالینک خرج موایقندن کلیتلو وارداتلری اولوب معزوللری اوائله و وظیفه یومیه لری ایله تعیش ایدرلر ایکن اتیده تفصیل اولنه جنی و جهله برطرفدن اقچه نک قیمتی تناقص و برطرفدن زینت و احتشام تکثر ایتمکله ترفیه حاللری ایچون

ارپه لقلر احداث و تخصیص قانندی شویله که صدور و موالی به بعض قضاالرك حکومت شرعیه سی تفویض اولنه رق انلر دخی طرفلرندن نائب ارسالیله اداره ایتدی ردرک فضلہ حاصلاتی مدار تعیش ایدر اولدیلرینه اسباب مشروحه به مبنی کتبه و متفرقه و سائر بندگان زعامت متصرفلرینه ضمیمه اوله رق علوفه یومیه و علوفه یومیه متصرفلرینه زعامت ویرلمکه باشلادی عصر مراد خان ثالثده امرای عسکریه و بندگان دولت و سرای هایون خدامنک معین اولان وظیفه لر یله عدد نفوسلرخی مبین اولان جدول بروجہ آتی ایراد اولنوب بعده صنوف عسکریه نك بیاننه مبادرت قلندی

علوفه یومیه

نفر	اچیجه
۰۱	یکچیری اغاسی
۰۱	میر علم
۱۰	سربواین اغالر
۰۳	بیوک و کوچک میراخور و جاشنکیر باشی
۰۱	چاقرچی باشی
۰۶	سپاه و سلحدار و علوفجیان یمین و یسار و غرباء یمین و یسار اغالری
۰۲	چاوش باشی و قیوجیلر کتخداسی
۰۱	جبه جی باشی
۰۷	اوزنکی اغالقلرندن معزول بوانانلر
۲۵	مخادیم وزرا و علما و امرا و دفترداران و اغایان
۳۲	اغایان متقاعدین
۰۵	اغایان اهل حرف
۱۳	بغدان و افلاق و یوده لرینک قیو کتخدالری
۰۲۴	کاتبان دیوان هایون
۰۱۶	کاتبان خزینۀ عامره
۱۳۳	شاگردان خزینۀ عامره
۰۲۰	کاتبان احکام مالیه
۰۲۵	مشاهره خواران

سرای هایونده بولنان خدام پادشاهی وسائره

علوفه یومیله‌ری

نفر		اچه
۷۰۹	غلمانان اندرون مع اغایان	۷۰۸۰
۱۰۹	جماعت تبرداران خاصه	۰۵۷۵
۴۳۳	جماعت متفرقه‌کان درگاه عالی	۴۶۸۰
۳۲۴	جماعت جاوشان درگاه عالی	۸۸۲۰
۲۷۱	جماعت چاقرجیان خاصه	۱۶۷۰
۲۷۶	شاهینجیان	۱۳۴۵
۰۴۵	اتمجه جیان	۰۲۲۵
۰۰۲۱	اطبای خاصه	۰۸۹۳
۰۰۰۵	جماعت شاگردان منیجیان	۰۰۲۴
۰۰۴۱	جماعت اطبای یهود	۰۶۴۳
۰۸۳۳	جماعت مهتران خیمه	۵۴۷۸
۰۲۲۸	جماعت مهتران علم	۲۰۷۴
۰۰۱۹	جماعت خزینه‌داران بیرون	۰۷۴۲
۰۰۴۴	جماعت معماران خاصه	۲۴۹۹
۰۰۱۵	جماعت مؤذنان خاصه	۰۱۹۸
۰۰۳۶	جماعت سقایان دیوان	۰۳۳۵
۰۰۵۷	جماعت شاطران خاصه	۰۳۳۲
۱۱۲۹	مطبخ عامره و کیلار خلقی	۹۳۰۸
۰۳۱۹	جمله خاص و خلعت درزیلری	۳۰۳۰
۰۹۴۷	خدمه اهل حرف	۸۱۶۴
۴۳۲۲	بیوک و کوچک اخورده اولان سراج و خدمه	۲۳۶۱۳
۱۹۲۵	درگاه عالی بوابلری	۱۶۸۸۱
۰۴۱۷	باب هایون بوابلری	۰۹۶۰۳

۱۲۵۲۵

فصل اولده محرر اولان امرا و بندکان

۱۲۸۶۰

خاص وزعامت و تیمار ایله تعیش ایدن وزرا و مأموریندن ماعدا خزینۀ دولندن وظیفه خوار اولان امر اوخدمه بروجه بالا اون ایکیک سکر یوز التمش نفره بالغ اولدیغنی بیاندنصکره طوائف عسکریه نک کیفیت و کمیتلری توضیحه شروع اولندی

یکچیری اوجاغی

برنجی وایکنجی فصل تکمله لرندۀ ایراد اولندیغنی اوزره یکچیری طائفه سی عصر اورخان غازیده خرستیان چوجقلرندن دوشیریلان اطفالدن ترتیب اولنوب کتدجکۀ قاتون و نظاملری تصحیح و تنظیم و عصر سلیمان خانیده تکمیل و تتمیم قلندی شویله که دوشیرمه چوجقلری عجمی اوغلانلری قشله سنندۀ تربیه و تاقین شرائط اسلامیۀ اولندقدن صکره یکچیریلره الحاق اولنور و خارجدن یکچیری یازلق محال حکمنده بولنور ایدی حتی یاوز سلطان سلیم مصر سفرینه عزیمتلری هنکامنده بر تاجردن مبالغ و فیره استقراض ایدوب بعدۀ تأدیۀ اولنه جغنی زمانده تاجر مرقوم نیازۀ آغاز و اوغلی اوچ اقچه علوفۀ پادشاهی ایله عسکری سلکنه ادخال قلندیغنی حالده مبالغ مستقرضه یی هبه ایدۀ جکئی بیان ایلدیکندن کیفیت حضور هایونه عرض اولندقدۀ موجب غضب سلیم خانی اولوب تیز تاجرک پاره سی ویرلسون و عسا کر عثمانیه ایچنه اجانب قارشیدیرمغه سبب اولنر جناب حقک لغنته مظهر اولسون دیدکاری مسطور تواریخ اولدیغنی مثالو سلطان سلیمان مرحوم سکتوار سفرینه کیدر ایکن دائما بندکاری رهوارک کمی قیرملقه تعمیرینه اهتمام اولنهرق بر یکچیری نفری بلورسز صورتده یامشیدی پادشاه حضر تارینک مسموعی اولدقدۀ طائفۀ عسکریه یه اصناف قارشیدیرلمش اولدیغندن آ ز قالدی یکچیری اغاسی قضا زده اوله یازدی هله توسط شفعا ایله اغا قورتارلدی ایسه دم کمی تعمیر ایدن یکچیری یی تقاعد علوفه سی احسانیه اوجاقدن اخراج ایلدیلر

حال بویله ایکن بیک طقسان سنه سنندۀ سلطان مراد ثالث حضر تارینک شهزاده سلطان محمد ایچون ترتیب وایکی آی قدر تمدید ایلدیکی سورختانده تجمع ایدن جانباز وحقه باز و پرندۀ باز مثالو اشخاصک و سور هایون خدمتندۀ بولنان کسانک صورت تلطفلری کندولرندن استفسار اولندقدۀ جمله سی یکچیری اوجاغنه ادخال اولنق نیازندۀ بولنملریله اسعاف مسؤلرینه اراده تعلق ایلدی یکچیری اغاسی بولنان فرهاداغا ضابطان و امکداران اوجاق ایله کیفیتی درمیان مذا کره ایدوب اشخاص مرقومه اوجاغه قبول اولندیغنی حالده اداب و تربیۀ عسکریه و قوانین موضوعه رهین اختلال اوله جغندن بحثله اعتذار ایلدی

ایسهده طرف پادشاهیدن امر سابق تأکید اولمغله اغای مشارالیه استعفا سنی تقدیم ایدرک وظیفه صدافتی یرینه کتوردی

لکن نه چاره که خلفی اولان یوسف اغا اشخاص مرقومه بی قبول ایتدکدن بشقه اغا چراغی نامیله بر خیلی منتسبان ازباب اقبالی یکیکچری یازوب جویبار فسادی آب روی جیوش عثمانیه اولان یکیکچری اوجاغنه اساله ایلدی فقط شوراسی جای دقتدرکه یکیکچری اوجاغی نظاماتنک مبدأ فسادی اوجاغک ایجادندن ایکوز التمش سنه دن زیاده زمان مرورندن صکره وافع اولمشد

بعدازین شفیع مجبره مالک وبذل رشوته سالک اولنلر ایچون صنوف عسکریه به التحاق ایتدکه مانع قالمدیغنه وتکثر عسا کر ایله برابر ایراندن فتح اولنان یرلرک محافظه سی ضمانتده اوجاقلردن نفرات ترتیب وارسالی ممکن اوله مدیغنه مبنی اوج سنه خدمت محافظه ده بولنق شرطیله وقول اوغلی وقول قرنداشی نامی ومجدد آعلوفه تخصیصیله یکیدن بش اون بیک یکیکچری یازلدیغندن بیک تاریخنندن صکره جه مع ضابطان یکیکچری اوجاغی عجمی اوغلانلریله برابر قرق سکز بیک التیوز سکسان سکز کشی به وسنوی علوفه لری یوز اون برملیون یوز یتمش ایکیک بشیوز یکرمی التی اقچه به بالغ اولدی

حالبوکه سلطان مراد ثالث جلوسنه قدر عجمی اولنلریله برابر کافه یکیکچریان یکرمی بیک راده لرنده اولوب انحق عصر مزده بولنان عسا کر نظامیه کبی جمله سی بیکار وقشله نشین اولمغله متقاعد اولمدجه تأهل ایتدک واصنافلق ایتدک ممکن دکل ایدی بوجه محرر اوجاغک نظامی بوزلدقن وتربیه سز اجلاف ایله طولدقن صکره منتسبن گروهی افندیلرینک یانلرنده اوطورور وبرفرقه سی دخی الیش ویریش ایله مشغول اولور اولدی بوندن حاصل اولان مضرات پک چوق ایسهده اک مؤثرلری عسا کر منتظمه عثمانیه نک کیدرک درندی بر عسکر حکمنی اتساب ایلسی وعلوفه لرینه خزینه دولت طاقت کتوره مامکله انواع مکارهه مجبوریت حاصل اولسی ودها فناسی دوشیرمه اصولنک متروکیتنی نتیجه ویرمسی قضیه لریدر چونکه علوفه خوار اولان قپو قولی اوجاقلری دفعه برر مثلی تزايد ایدوب بر طرفدن دخی اجلاف اهالی سالد عسکری به کیرمکه چالشمقده اولدقلرندن خزینه دولتی وقایه مقصیده صدر اعظملر ایچون اک بیوک ممدوحیت تقلیل عسکره موفق اولمق واک زیاده مدخولیت تکثیر نفرا ته مساعدده کوسترمک ماده لری اولمغله طبیعتیله دوشیرمه اصولندن استغنا حاصل اولمشد

یکیکچری اوجاغی جماعت وبلوک وسکبان بلوکی نامیله اوج سنه ویوز طقسان التی

اورته یه منقسم اولوب برنجیدن یوز برنجی یه قدر جماعت وینه برنجیدن اتمش برنجی یه قدر بلوک و کذاک برنجیدن اوتوز دردنجی یه قدر سکبان بلوکی تعبیر اولنورایدی هر اورته نک چور باجی و اوسته و اوده باشی و متولی و بیر اقدار و امام و باش قره قوللقجی نامیله ضابطانی و چاوش حکمنده قره قوللقجیلری و مفتاح و قالیون تیموری و بالق و علم و دیوس مثللو برر نشانی اولمغله قشله و قوللقلری قیوسنده و بیر اقلرنده بونشانلر منقوش اولدیغی حالده صکر دلری افراد عسکر یه منسوب اولدقلری اورته نشانلری مریکب و یاخود باروت ایله قوللرینه و بالدرلرینه دو کدر مکی اعتیاد ایدنمشلردر

اوجانک طرف دولتدن منصوب براغاسی و برکاتبی اولدقدن بشقه ایچلرندن قول کتخداسی و صامسونجی باشی و زغر جی باشی و طور نه جی باشی و محضراغا و باش چاوش و کتخدایری نامیله ضابطان عمومیه سی واردر که بونلره قطار اغالری اطلاق اولنور بودخی صکر دلری یکچیچری اغالری قول کتخدالرندن اولمغه باشلامغله ایچلرندن سلسله وقوع بولدیغندن کنایتدر

اوانلده سکبان اورته لری سکبان باشی بولنان ذاتک زیر اداره سنده ایکن مؤخرأ یکچیچری اغالری حکمنه داخل اولمغله سکبان باشلیق ایشسر بر منصب قالوب فقط اردوی هایون ایله یکچیچری اغالری عزیمت ایتدکده سکبان باشیلر استانبولده یکچیچری اغالغی مقامنده قائم و در سعادته بولنان هر نوع یکچیچری یه حاکم اولورلر ایدی

اوجانک ابتدای ترتیبده بهر نفره یومیه برر اقچه علوفه تخصیص اولنمشیکن صکر دلری اوچ اقچه یه و بیگ تاریخلرینه قریب زمانلرده بش اقچه یه چیقوب فقط سفرلرده مظفریت عظیمه واقع اولدقجه و بعضاً سفره کیدیلور ایکن اردوی هایونده موجود بولنانلرینه یعنی قشله لرنده قوریجی قلانلردن ماعداسنه برر ایکیشر اقچه ترقی ویریه کلدیکندن بعض امکدارانک علوفه یومیه سی اون اون بش اقچه یه قدر تزیاید اتمش و بوجهتله علوفه نفرات متخالف المقدار بولمشدر

برده بعض قلعه لره هجوم ایچون و یاخود بوکا مقیس مخاطر دلی ایشلری رؤیت ایلمک ضمننده ایجاب ایتدکجه اوچر بشر اقچه ترقی ایله یکچیچریلردن ایکی اوجیمک سردن کجدی و تعبیر اخرله دال قلیج یازارلر ایدی که فدایی دیمکدر بونلردن صاغ قلانلر مذکور ترقی یه نائل اولدقدن بشقه امتیاز مخصوص اولمق اوزره سردن کجدی قاوغی نامیله برنوع قاوق کیرلر و سردن کجدی اغاسی دیو مظهر تکریم اولورلر ایدی

هر اورته نک قشلاسنه مرتب اولان ات واکمک تعینلری و نفراتک البسه عینیه

وبدلیه‌لری کندولرینه مخصوص عادات و تشریفات اوزره وارد و واصل اولدیغی مثللو معاملات روز مره لرنده والیه مخصوصه لرنده پک چوق قاعده و اصوللری وار ایسه ده بیان و تصریحی تفصیلاتی مقتضی وفائده استماعدن عاری اولدیغندن ترك اولندی

پادشاهان عظام حضراتی برنجی بلوگک یولداشلرندن و وظیفه حواریلرندن اولمغه علوفه چیققدجه یکچیری اغاسی قیافتند برنجی بلوگک قشله سنه کلوب دائره مخصوصه سنده اوطورور و علوفه معینه سنی اخذ ایدوب عودت ایدر ایدی .

قشله لرك برطاقی شمعی احمدیه میدانی دینلان ات میداننده و برازی شهزاده جامع شریفی قارشوسنده اولوب برنجی بلوگک قشله سی ایسه شهزاده عثمان بابا تربه سی نامیله مشهور و مشهود اولان مرقدك ارقه سنده واقع اولمغه دائره همایون مرقد مزبورك اوزرنده اولدیغی بیلانلرك افاده سندن مستباندیر .

پادشاهلر علوفه المغه کلور ایکن اغا قپوسیکه عصر مزده باب فتوادر اورادن مرور ایتك ویکچیری اغالری کاسه ایله شربت عرض ایدرك ات اوزرنده ایچمك جمله قوانیندن اولدیغی و بودخی اوجاغه پادشاهلرك کمال امنیتنی کوسترمك مقصدینه مبنی ایدوکی منقولدر

چالديران سفرنده یکچیرلرك واقع اولان شقاوتلری اوزرینه یاوز سلطان سلیم مرحوم تربیه مقتضیه لرینی اجرا ایتمکله بونك حسن تأثیری ثمره سی اوله رق بیك تاریخلرینه قدر معامله سرکشانه ده بولمیدیلر اگرچه سلطان سلیم ثانی جلوسنده طلب برقی ایله حرکات بی ادبانه تصدی ایتدیلر ایسه ده مفصلات تواربخك سیاق و سباقه عطف نظر اولندقدده صدر اعظم بولنان صوقوالی محمد پاشانك رأینی تزییف یولندد مقربینك وقوعبولان تشجیع لرینه مبنی سلطان سلیم مرحوم مبالا تسر برحالد بولندیغندن وقعه مزبوره صدر مشارالیهك تعلیمیه دنیه مز ایسه ده مساعدت ضمیمه سیله سرزده ظهور اولمشدرکه بودخی زوربالغك دوام ایتماسیله استدلال اولنور

چونکه بیك تاریخندن صکره واقع اولان حادثات فجیعده تجربه اولندیغی وجهله برکره طوائف عسکریه یوزه چیققددن صکره تأدیبات شدیدیه تصادف ایتدکجه امر شقاوتك ارقه سی الیه مدینی ظاهر در

جبه جی اوجاغی

قبو قولى عسکرینك پیاده اوجاقلرندن بریسی دخی جبه جی اوجاغی درکه طویجی

وعربہ جی اوجاقلری دخی انک متفرعاتندن معدوددر بونلر دخی حاللرنجه تکثر ایدوب
بیک تاریخنندن صکرملری یدیییک طقوز یوز التمش الی نفره وعلوفه سنویهلری اون
بش ملیون اوجیوز قرق التیییک ایکیوز سکسان درت اچیه رسیده اولدی مذکور
اوجاقلرک مناسب دیوانیهدن اوله رق برر آغا وعصر من اصطلاحنه قیاساً محاسبه جی موقعنده
برر کاتبلری ویکچری اوجاغی مثللو اورته وبلوک وضابطلری اولوب آیاصوفیه جوارنده
وضوئخانه طرفنده اولان قشله لرنده اقامت وامور مأمودلرینک تنظیم و تعلیمیه امرار وقت
ایدوب ایجاب ایتدکجه مناسب مقداری سرعسکرلر معیتنه کوندریلور ومو کب هایون
چیقدیغی حالده هیئت مجتمعه لریله عزیمت ایدرلر ایدی

سواری اوجاقلری

کذلک قبو قوی عسکرینک سواریسی که الی بلوک نفراتی دینلان سپاه وسلحدار
وعلوفجیان یمین ویسار وغربای یمین ویسار بلوکلریدر بونلرک ایکیسنه باش وایکیسنه اورته
وایکیسنه اشاغی بلوکلر دینلیدیکی مثللو سپاه بلوکنه قیرمزی بیراق وسلحدار بلوکنه صاری
بیراق واورته واشاغی بلوکلره آلاجه بیراق تغیری دخی مستعملدر
چونکه سلطان علاءالدین سلجوقینک عثمان غازی یه کوندردیکی علم بیاض اولدیغندن
پادشاهان عظام حضراتی آق سنجاق اتخاذا ووزرا وبکلر بکیلر دخی اکا اتباع ایدوب
فقط طوائف عسکریه نک رنگ آمیز بیراقلری وهر صنفک نشان وعلامت فارقه لری وارایدی
اشبو سواری اوجاقلرینک منبغی دخی دیوشرمه چوجقلریله سفرلرده انسان اسرا
اطفالیدر که مذکور چوجقلرک ایچلرندن متناسب وقابلیتلولری استانبول وادرنه وکلیبولی
سرای هایونلرنده تربیه اواندقدن صکره یدی سنه ده برکره چیقمه تعیریه کسب لیاقت
ایدنلری بلوکلره تقسیم اولنه کلشددر

عصر مراد خان نائنده بونلره دخی خارجدن اشخاص داخل اوله بیلمک قیوسی
آچلمغله سلطان سلیمان زماننده آلتی بلوک خلق یدیییک کنی راده سنده ایکن مؤخرآ
یکرمی بیکی وعلوفه سنویهلری یوز اوتوز ملیون اچیهی تجاوز ایتدی سائر اوجاقلر کی
بونلرک دخی طرف دولتدن منصوب آغا وکاتبلری وواجق کتخداسی وچاوش نامیه
ضابطانی وار ایدیسه ده پیاده اوجاقلری قدر مکمل اولدیغندن آتیده بیان اولنه جق
شقاوتلری قلت ضابطانندن منبغث اولدیغی کاتب چلبی ایراد ایدر بونلرک قشله لری اولیوب
آت بسلمک خصوصنده سهولت اولق مطالعه سنه مبنی بروسه وادرنه مابیننده اولان قری
وقصباتده توطنلرینه مساعدده اولمش ایدوکنندن بعضیلری استانبول ایچنده وبعضیلری

جوار قریه لرده ساکن اولور و علوفه چیقدجه کلوب علوفه سنی آلورلر ایدی
باش بلوکلر نفراتنک یومیه اون اوچر واورته بلوکلر خلقنک اون برر واشاغی بلوکلر
طاقنک طقوزر اقیچه علوفه یومیه لری اولدیغی بعض توارینک مزایاسندن استدلال اولنور
ایسه ده بومقدارلر ابتدا بلوکلره چراغ اولدقلری زمان تخصیص اولسان علوفه اولوب
مع مافیه بیوک سفرلرده احسان اولنسی جمله قوانین دولتن اولان ترقیلر سببیه سفر
کشیده اولان امکدارانک علوفه لری بوراده بی تجاوز ایده کملردر

سلطان سلیمان مرحوم سفرلره عزیمت ایلدجه ملازم نامیله سواری بلوکلرندن
اوچیوز کنی افراز ایدوب دائرة همایون محافظه سنده وعصر من تعیراتجه یاورلک
خدمتلرنده استخدام ایدرک بعدالعوده مکافاة بعض سلاطین تولیتلرینک وجسیمجه
مقاطعات میریه نک برسنه لک اداره سنی وجبایت جزیه مثللو خدمتلری بولره تفویض
ایتمکله خدمات مزبورده دن متبفع اولورلر ایدی

بوقاعده کیدرک قانون حکمنی اکتساب ایتدکن بشقه طائفه مرقومه خدمات مالکیه
منافعندن والتراجیلقدن لذت المریله برابر حائز ثروت واقتدار واستحصال احتشام
ودارات ایله کامکار اولدقلرینه وایران سفرلرنده سرعسکر بوانانلرک توجیهلریله ایجلیرینه
اجنبی قاریشوب اداب و تربیه لری دخی بوزلدیغنه مبنی سلطان مراد ثالث عصرنده ایکی
دفعه علم افراز بنی وشقاوت اولوب دیوان هایونه هجوم ایلدیلر

ان شاء الله تعالی فصل آتیده بیان اولنه جغی وجهله بیک تاریخندنصکرده لری سفر
اولسون اولسون هر سنه طائفه مزبورده نک صاحب قدرتلرندن اشخاص کثیره ملازم
یازیلوب خدمت نامیله هر نوع خدمات مالکیه و دیوانیه یه طالب اوله رق قبه آلتی مناصبه
وبلکه صدارته قدر بزم حقمزدر دیرلر ووکلای دولته ایتدکاری اذا وجفا قالنر ایدی

کاه منفرداً وکاه یکچریلری دخی جلب ایدرک مجتمعا متجاسر اولدقلری زوربالقلرک
حد وپایانی اولیوب باخصوص سلطان عثمان وقعه سی کی بر ماده فجیعه یه آلت اولدقلرندن
اولا سلطان مراد رابع مرحومک سیف سطوتنه ومؤخرآ کوپرلی محمد پاشانک تیغ سیاستنه
کرفتار اوله رق پیمانه ناموس وحرمتلری شکسته ودهان لاف وکذافلری بسته اولدی
بغدازین هر قدر بواوجاقلر کلیاً الغا اولندی ایسه ده نظر اعتبار دولتن اسقاط والسنه
انامده تهمت خیانت ولی نعمت ایله یاد اولنمغه کوندن کونه مقدارلری مرتبه جزویه یه تنزیل
ومعامله بی اعتباری ایله ترذیل اولنهرق وقعه خیریه یه قدر بویلجه گذارنده ایام اولدیلر

ترسانه اوجاغی

قپو قولی اوجاقلرندن بریسی دخی ترسانه خلقیدر که عزب طائفه سی دخی دینلور

مقدارلری ایکیبیک اوچیوز التمش درت نفر دن وعلوقه سنویهلری یدی ملیون یدیوز
 یتش طقوز بیک التیوز التمش سکز اقچه دن عبارتدر بونلر سفینه قبودان ورئیسلریله
 ضابطان و طوپیجی نفراتیله کیلر ترسانه ده بولند قجه محافظه لرینه مأمور اولان کسان
 دیمکدر چونکه دونما چیق دقجه دریا قلمی تعبیر اولنان سواحل سنجاقلرینک زعما وارباب
 تیماری سفر دریا ایله مکلف بولند قلدن انلر دونمای هایونه کیردکن بشقه ایجاب
 ایتدکجه یکچیجری وسائر طوائف عسکریه دن لزومی مقدار نفرات دخی ارکاب اولنور
 واولوقت کیلری کورکله حرکت ایلدیکنه مبنی کورک چکمک خدمتی دخی فورسه دینلان
 اسرایه کوردیریلور ایدی زیرا سفرلرده اخذ اولنان اسراک اطفالی سرایلره وعجمی
 اوغلانلری قشله لرینه ویرلدیکی مثللو یکریمی اوتوز یاشنده بولنانلری ترسانه کورکنه وضع
 اولنق قاعده دن وباخصوص اکثریا بحر سیاه ساحل لرینی غارت ایتک قصدیله اوزی صویندن
 چیقان قزاق طائفه سی واقد کزده کز مکده اولان قورصانلر اشقیاسی اله کچدکجه ترسانه
 کیلرینه تقسیم اولوب تیمور بند اولد قلدی حالده کورک چکدیرمک عادات عصریه دن بولنشدر

بوستانجی اوجاغی

عجمی اوغلانلردن اوچ بشبیک کشی استانبول وادرنه سرای هایونلریله اسکدار وداود
 پاشا و بوغاز ایچنده واقع حدایق سلطانیه ده بوستانجیلق خدمتی و دائره هایونک قایقچیلق ایشی
 اجرا ایدرلر ایدی کیدرک بونلر دخی بر عسکر اوجاغی هیئتنی اکتساب ایدوب بوستانجی باشیلر بوغاز
 ایچنک و سرای وحدایق پادشاهی جوارلرینک امور ضابطه سنه مأموریت ایله حائز امتیاز اولدیلر

طشهرده بولنان یرلی قولی اوجاقلری

بالاده ترقیم وتفصیل اولنان قیو قولی وایالت عسکری اولان زعما وارباب تیماردن
 بشقه بغداد و مصر و غرب اوجاقلرنده و شام و حلب و ارض روم و قونیه و کوتاهیه و بروسه
 وازمیر و قبریس وادرنه و سلانیک و بوسنه و بلغراد و طمشوار و بودین کبی مرکز ایالت
 اولان موقعلرده یرلی قولی نامیله یکچیجری وسائر صنوف عسکریه دن بلوکلر ویکچیجری
 اغالری ویکچیجری سردارلری و قلاع خاقانیه ده یماق تعبیریه مستحفظ نفراتی موجود اولوب
 بونلرک علوفه ووظائف مقننه لری اوجاقلق تخصیص اولنان اعشار وجزیه و میزان حریر
 رسمی مثللو وارداتدن تحصیل وایضا اولنور و شهزادکان حضراتی منصبده بولند قجه طرف
 سلطنتدن معین اوله رق خدمتلرنده وزیر مقامنده لالا ودفتردار و نشانجی و رکاب هایون
 ترتیبه تطبیقاً بلوک اغالری وهر صنف عسکردن اوچر بشر یوز کشی بولنور ایدی
 روم ایلی ایالتده یورک وانا طولی ایالتده مفعخم ووزنده مسلم نامیله الی بیک قدر بر نوع

عسکر وار ایدیکه بونلره برر چفتلک یعنی سکسانز یوزر دونم اراضی اعطا وعشر شرعیلری دخی بدل خدمت اوله رق کندولرینه ترک اولمش وزعمادن میریورکان ومیر مسلم ناملریله ضابطان نصب قلمشیدی سفر روم ایلی جانبیه واقع اولور ایسه یورکان طائفه سندن وانا طولی یه اولور ایسه مسلمان کروهندن بنوبت تعبیریه بشده بری معسکر هایونه جلب اوله رق یول اچق وخندک قازمق کبی خدمتلی ایفا ایدرلر ایدی صکره لری بواشلر اکثر مملکتین عسکرینه کوردیریه کلدیکندن ذکر اولسان یورکان ومسلمان طائفه لری رفع والفا واراضیلری دریا قلمنه الحاق قلمغله منسوخات نامیه برخیلی تیمار حاصل اولوب متصرفلری اسفار بحریه یه اشر اولدیلر

اقنجی طائفه سی

روم ایلمده یکر می بیك مقداری اقمجی گروهی وار ایدیکه اقمجی بکری معیتده ممالک اعدایه چاپول ایدوب نهب و غارت و اموال غنایم ایله تحصیل ثروت ایده کلدکلرندن سفر واقع اولدجه اردوی هایونک حرکتندن مقدم امرلر ارسالیله ممالک اعدایه تسلط اولورلر وبونلر خفیف سواری اولدقلرینه مبنی قلعه واردو اوزرینه وارمیوب قرای معموره دشمنی تخریب ایدرلر ایدی موخرأ بووظیفه عسکر تاتاره منتقل اولدی

احوال امور مالیه

سلطان بایزید مرحومک اواخر سلطنتنده مصالح دولت مختل ومشوش اولمغله امور مالیه جه دخی مضایقه حاصل اولمشیدی یاوز سلطان سلیم نائل تخت ودیهم اولدقده بعض تجارتدن استدانیه مجبور اولمشیکن مؤخرأ سلاطین مصریه نک خزینه سنه مالک وطریق حسن اداره یه سالک اولمغله کلیتو نقود ادخار ایلدی

حتی (التون ایله طولدردیغم انبارلری اخلافدن هرکیم اچه ایله املا ایده بیلورایسه کندو مهری ایله تمهیر ایلسون والا خزینه هایون بنم مهرم ایله مهرانسون) دیو وصیت ایلمکله الی الآن اندرون خزینه سی مهر سلیم خانی ایله تمهیر اولور

عصر سلیمان خاییده حوزه حکومت دولت فوق الحد کسب وسعت ایتسیله برابر تزینات واحتشامات تکثر ووظائف عسکریه ترقیات متعاقبه ایله تزايد ایتدیکی وساطان سلیمان مرحوم خیرات ومبرات معلومه ومشهوده لرینه خزینه لر صرف ایلدیکی حالده مشکلات مالیه یی ایما ایدر توارینجده برشی کورلیوب فقط خاقان مشارالیهک طقوز یوز یتمش اوچ سنه سنده سکتوار سفرینه عزیمتلرنده که سلخ شهر سلطنتلریدر سرای هایونده بولنان بعض آوانی زرویمی ضربخانه یه اعطا ایدوب سکه ضرب ایتدیردیکی وسنه مزبوره ده

واردات دولت یوز سکسان اوچ ملیون سکسان سکنز بیک و مصارف یوز سکسان طقوز
ملیون التیوز الی یدی بیک اچہ اولمغله التیوز الی التیبیک طقوز یوز اچہ اچیق بولندی
بالماسبه نعیاً تاریخنده وعین علی افندی رساله سنده مسطوردر

سلطان سلیم ثانی عصری دخی صدر اعظم بولنان صوقوالی محمد پاشانک حسن
ادارہ سی ثمره سیلہ ضرر سزجه کچوب سلطان مراد ثالث زماننده بروجہ بالا عساکر
موظفہ نک تکثری و اتلافات و اسرافاتک تزیادی سبیلرله امور مالیه مختل و وقت وزمانیلہ
علوفہ و یریلک قاعدہ قدیمہ سی معطل اولوب ارکان دولت تدارکات مبالغ خصوصندہ انواع
مکاربه اختیارینہ مجبور اولدیلر

اگرچه بیک بر تاریخنده یعنی مراد ثالث حضر تیرینک اواخر ساطعتندہ واردات
ایکیوز طقسان اوچ ملیون درتیوز بیک اچہ یه بالغ اولوب عصر سلیمانیدہ اولان
وارداتدن یوز اون ملیون اچہ تزیاد ایلدی ایسہده مصارف دخی اوچیوز التمش اوچ
ملیون درتیوز بیک اچہ یه رسیده اولمغله اچیق یتمش ملیون اچہ یه پیوستہ اولدی
مصارفک آرتمسی علوفہ خوارانک تکثرندن منبعث اولدیغی معلوم ایدوکنندن اندن
بحث ایجاب ایتیوب وارداتک نہ سبیلرله ترقی ایلدیکی بروجہ آتی ایراد اولنور :
توجیه مناصب خصوصندہ بالادن ادنا یه قدر هدایا ورشوت تعاطیسی رایکان اولمسیلہ
برابر مصارف خزینہ نک تکثرینہ قارشواق اولمق ایچون واردات تحریمی امر ضروری
کورندیکندن اولاً جسیمجه زعامت و تیمارلر محلول اولدقچہ ارباب استحقاقه توجیه اولنمیوب
مقاطعات میریه نامیلہ خزینہ دن بالتوقیف سنہ بسنه ملتزم لره الزام و بدلاتی ایراد قید اولمغہ
باشلادی و بوسیلہ ایالات عسکرینک تدنی و قدرتسز لکتری مقدماتی حادث اولدی ثانیاً
مسکراتہ رسم وضع اولمشیکن رعایا بودن اشتکا ورسم مزبورک جزیه یه علاوہ سنی استدعا
ایتملریلہ ادنا و اوسط و اعلا اعتباریلہ النقطہ اولان اون ویکرمی و اوتوز اچہ جزیه
شرعیہ به نصف ضم اولنوب ادنا اون بش و اوسط اوتوز و اعلا قرق بش اچہ یه ابلاغ
قلندی ثالثاً وفات ایدن وزرا و امرانک مصادرات نقودیلری دخی برواردات غیرمقررہ
حکمنہ کیردی رابعاً عصر اورخان غازیده طقسان عیارنده و اوچی بردرهم وزننده اچہ
قطع اولنوب بایزید ثانی عصرینہ قدر بوزلماشیکن مؤخرای عیاری سکسان بشہ تنزیل
قلندقدن بشقہ یوز درهم سیمدن درتیوز ودها صکرہ لری بشیوز اچہ و بالاخرہ مراد
ثالث زماننده سکنز یوز اچہ قطع اولمغہ باشلادی مع مافیہ لصوص مسکوکات اولان
یهودی صرافلر اچہ لریک اطرافنی کسمکه متجاسر اولدقارندن قرہ غروش یعنی درکلی

اریال قرق اقیچه یه ایکن سکسان اقیچه یه والتون التمش اقیچه یه ایکن یوز یکرمی اقیچه یه فیرلادی چونکه دولت علیه نك اساس معاملات نقودیه سی اقیچه اوزرینه مبنی اولوب غروش تعبیری برنوع سکه اسمی ایکن یقین وقتلرده یعنی عصر مزدن یوز یوز الی سنه مقدم قرق پاره اعتبارینی و اساس معاملات اولمق حکمنی اکتساب ایشدر

بنابرین فاتح زمانندن برو قطع اولمقده اولان التون یالدر التونی وزن و عیارنده اوله رق بیك تاریخندن صکرده قدر اصلا تغیر ایلدیکنه مبنی اقیچه نك وزن و عیاری تنزل ایلدیکه التونك فیثاتی ترقی ایدوب یعنی قرق اقیچه یه ایکن الی الی اقیچه ایکن التمشه یوزده ودها زیاده یه چیه کیشدر

نقودك اشیایه نسبتی بختنه کلنجه طقوز یوزیتمش درت سنه سننده واقع سکتوار سفرنده برابر بولنان سالنیکلی مصطفی افندی سفر مزبورده غلا واقع اولیوب آرپه نك کیله سی اون اقیچه یی تجاوز ایتدیکنی تاریخ مشهورنده بیان ایدر بوحاله باقلنجه آرپه نك فیثات عادیه سی یدی سکرز اقیچه اولدینی و تقریباً ایکی درهم کش ایلر برکیلر آرپه الیه بلدیکی استدلال اولمغله عصر مز حسابنه نسبت اولنور ایسه براقچه نك اوتوز اوتوز بش پاره قیمتنده بولندینی و اشیایه نسبت قیلنور ایسه براقچه نك یوز پاردلغه یقین ایش کوره بلدیکی معلوم اولور

بالاده بیان اولنان واردات و مصارفات طوغریدن طوغری یه خزینه دولته کیروب چیقان مبالغ اولوب بودخی جزیه شرعیه و بدل مقاطعات میریه و مکرك و ملاحلر حاصلاتیه دول متجاوره و ایالات ممتازده دن النان ویرکولردن عبارت اوله رق اعشار شرعیه و بعض رسومات بروجه تفصیل سابق خاص وزعامت و تیمار و او جاقلق و یوردلق او جاقلق نامیله پادشاهان عظام و سلاطین و شهزادگان و وزرا و امرا و تیمارلو سپاهیسنه و بیوک شهرلرده و سرحداتده بولنان یرلی قوی و مستحفظ عسکرینه مرتب و منقسم اولمغله واردات نامیله مذکور اولان مبالغ خارجنده در

احوال ترقیات علوم و فنون

بوعصرده علوم و فنون کرکی کبی ترقی ایدوب نوبنو ظهور ایدن علما و فضلا کرک استانبولده و کرک ممالک عثمانیه ده واقع مرکز لوا و قضاالرده اولان محاکم شرعیه مأموریتلرینه یعنی قاضیقلره بالغاً مبالغ کفایت ایتدکن بشقه پک چوق فضلا دخی استانبولده و طشره لرده نشر علوم و معارفه دائر حصر حیات مستعار ایتشلر ایدی هندسه و معمارلق و سایر معارفه دائر اولان فنون اربابی ایسه حیلیدن خیلی ترقی ایدوب معمارسنان شهزاده و سلیمانیه وادرنده واقع سلطان سلیم جامع شریفلرینی و مشهور

و معلوم اولان وزرا و امرا خیرات و مبراتلرینی اساس متین و طرز دلنشین اوزره انشا ایدرک اسلاف و اخلافه تفوق و رجحانی اثبات ایلشدی حتی سلطان سلیمان مرحومدن هند پادشاهلری معمار طلب و نیاز ایلدک لرینه مبنی معمار سنانک شاکر دلدردن موسی اوسته ارسال قلمغله بنادر هندیده طرز رومی اوزره ابنیه جسیمه بنا و اعمار ایلدیکی مرویدر یاوز سلطان سلیم مرحومک زماننده اعمال اولسان طویلردن بر قطعه سی الان مدلولو قلعهنده موجود و اوزرندده سلطان سلیم بن بایزید خان غوانی و عمل مصطفی و طورسون کاتب طوینخانه امضالری و طقوز یوز یکریمی اوچ تاریخی محرر و منقش اولوب بوطوب یکریمی انتی قاریش طولنده و تقریباً یکریمی ایکی چاپنده اولدینی حالدده صارمه تعبیر اولنان صورتده تیمور چوقلدردن اعمال اولنمش و اربابنک افاده سنه کوره غایت مصنع و عاملنک مهارت و لیاقتنه دلیل قوی بولنمشدر

کذلک عصر سلطان سلیم خان ناییده قودان اولوب سلطان مراد ثالث زماننده وفات ایدن مشهور قلیچ علی پاشا جزایر بکدر بکیسی ایکن اصاغه ایتدیردیکی جسیم طوینج طویلر الان طوینخانه عامره ده موجود و اوزرلرندده مشارالیهک نامی منقش و مشهوددر

و ممالک عثمانیه معمولاتی اوله رق انواع قلیچ و تفنگ و مزراق و زرده مثللو شیلر الحاله هذه موزه خانه لرده و شونک بونک النده پک چوق اولمغله محتاج تفصیل دکلدر

حاصل کلام دولت علیه کرمک لوازمات حربیه جه و کرمک ابنیه و مقتضیات بشریه دن اولان ارزاق و منسوجاتجه خارجه محتاج اولمیسوب اگرچه تزینات و احتشاماته رغبت اماره لری ظاهر اوقدن صکره چوقه و اقمشه فرنگیه و ساعت و شکر کبی برقاچ قلم اشیا مبابعه اولمغه باشلادی ایسه ده بودخی کبرایه مخصوص ایدی

پادشاهان عظام حضر اتنک و باخصوص سلطان سلیمان مرحومک بنا و انشا ایلدک لری مدرسه لری بعضیلری علوم عالییه و بعضیلری دخی طب و هندسه مثللو فنون حکمیه و ریاضیه به مخصوص اوله رق تعلیم و تعلم امرنده فوق الحد دقت و اعتنا اولنور و دولته لزومندن زیاده ارباب معارف یتشدیریلور ایدی

وزرا و امرای دولت عموماً غزا و جهاد ایچنده نشو و نما بولدقلری جهته فنون حربیه و حرکات عسکریه جه کسب مهارت و ماسکه ایدرک تنظیم مهمات سفریه و ترتیب صفوف عسکریه خصوصلرندده سبقت ایدن درایت و خدمتلی معلوم اولوب اگرچه ارکان حربیه ایشلرینی رؤیت ایدن اصحاب هنر و معارفک مفرد تیله اسم و رسملری بزم تاریخلرده محرر دکل ایسه ده اثر دن مؤثره استدلال اولنمق قاعده سنجه پای تخت سلطنتدن مصر و بغداد و ویانه کبی مواقع بعیده جه جسیم اردولر سوق اولنه بیلیمک و سوشیدن هند

دکترلرینه دونما کوندرملک وینه سفن حربیه وعساکر بریه ارسالیله اسپانیوللرک بورنلرینک دیننده اولان افریقا ساحلرینی ید استیلالرندن تخلص ایلمک نقدر قوت ومکنته ونه درجه ده معارف وانتظاماته محتاج اولدینی ازاده کلفه بیسان اولغله ترقیائک مرتبه سی وقوعاتک اهمیت ومشکلاتیله موازنه اولنق امر طبعیدر

احوال خارجیّه

عصر سلیمان خانیده عجم واوروپا دولتلریله معاهدات رسمیه تنظیم اولمغه باشلیوب فقط سلطنت سنیه نك معیار غالبیتی اوله بیله جکی وجهله همجوار بولنان اوروپا دولتلرندن ویرکوی سنوی اخذیله عقد مصاحله اولمشدرشویله که وندکلور ممالک دولت علیه به قریب اولان بعض مواقع ایچون ویرکو اعطاسنی درعهده ایتکه مجبور اولوب حتی قبریس جزیره سی ویرکوی اوله رق مصر خزینه سنه ویره کلدکری قرق بیک التون مصرک فتحندن صکره خزینه دولته منتقل اولدینی حالده عصر سلیم خان ثانیده جزیره مزبوره تسخیر ومتعاقبا وندکلور ایله تجدید صلح اولندقدمه مبلغ مزبورک کما کان طلب اولنماسی ایچون خلیجه تلاش ایشلردر نمچه دولتی سنوی اوتوز بیک التون ویرکو اعطاسنی متعهد اولغله مبلغ مزبور هر سنه مأمور مخصوص واسطه سیله تقدیم اولندقدن بشقه سرحد عثمانی اولان استرغون قلعه سی محافظنه وبودین والی وقاضیسنه وارکان دولته دخی پاره لر وزر وسیمدن معمول هدیه لر کوندرلر ایدی بونک تشریفات وتفصیلاتی پچوی تاریخنده مسطوردر

له دولتی برقاچ کره بغداد بکلرینی عصیانه تشویق ایدرک اعانه فعلیه ده دخی بولمغله بالدفعات لهستان پامال خیول عثمانیان ایدلایکندن کرک طرف سلطنت سنیه به وکرک قریم خانلرینه ویرکو وهدایا اعطاسنی تعهده مضطر اوله رق تحصیل مصافاته دسترس اوله بیلمشدر روسیه دولتک اول عصرلرده سلطنت سنیه ایله پکده معامله سی اولیسوب قریم خانلریله کاه محارب وکاه مصالح اوله رق ویرکو وهدایا اعطاسیله تاتارلرک غاراتندن اولدجه مملکتی محافظه ایدر ایدیه ده برطرفدن دخی قزان تاتارلغنی ضبط وتسخیر ایله مشغول اولوب وقریم خانلری ایسه بالدفعات مسقویه قدر غاراته قدرتیاب اولمشلر ایکن قزان جهته عطف نظر دقت ایتیه رک استحصال منافع روز مردلریله اوقاتگذار اولدقلرندن روسیه دولتی اولحوالی بی بالتدریج زیر حکمنه کچیرمشدر

عصر سلیمان خانیده سلطنت سنیه نك محارب بواندینی اوستریا واسپانیا دولتلریله فرانسه دواتی مخاصمه اوزره اولدیغندن دولت علیه ایله فرانسه بیننده عقد اتفاق وتنظیم معاهدات اولندیغنی مثللو ایرانیلر دخی دولت علیه علیه ده اوستریالولر ایله عقد اتفاق ایتمشلردر انکلتزه دولتی ممالک عثمانیه دن اوزاق وحرکات خصمانه بی موجب حالاتدن

وارسته بولندیغندن بشقه اول عصره کوره ترکستان ایله خلیجه معامله تجارتی اولدیغنه مبنی
 دائماً ابراز و دو مخالست ایده کلکله دولت مشارالیه ایله دخی عقد معاهده قلمشدر
 ذکر اولنان معاهده لرده تجار اجنبیه نک کتوردکاری مال ایچون ویرملری لازمکلان
 کمرک رسمی ایضا ایلدکن صکره کندولرندن برکونه رسم طلب اولنماسی و حقوقه
 دائر ایکی اجنبی بیننده تکون ایدن دعوانک کندو قونسوسلری معرفتیه رؤیت قلمسی
 وتبعه دولت علیه ایله اجنبی ارسنده واقع اوله جق دعاوینک رؤیتنده ترجمانلری حاضر
 بولنوب درتیک آنچه لکدن زیاده اولان محاکات کنار محکمه لرنده کورلیه رک قاضیسکرلر
 حضورنده مرافعه اولنسی کبی بعض مساعدات مندرج اولدیغندن بولنر عصر مزده باعث
 مشکلات اولمقده ایهده اولوقته کوره اهمیت ویریه جک و محذور مطالعه اولنه جق مواددن دکل ایدی
 چونکه ممالک محروسه ده بولنان اجنبی تجاری حال مسافرتده واستملاک املاکدن
 و خرده فروشلقدن ممنوع اولملریله ذاتاً تکالیف اعطاسنی ایجاب ایدر کیفیتله مألوف
 اولدقلری مثللو فرضا برفرانسز و یا خود انکلیز تاجریله متاع تجاریسنی کتورمش اولان
 کذلک فرانسز و یا انکلیزلو برقبودان بیننده تکون ایده بیله جک دعوانک محاکم دولت علیه ده
 رؤیتنی طلبده فائده و قونسوسخانه لرنده فصل و تسویه اولنسنده دولته برضرر کورلمدیکندن
 لا باس حکمنده طوتشدر چونکه هر وقتده یاپیلان معاهده لر مزاج عصره توفیق اولنه کلوب
 یوخسه اوچیوز سنه د سکره اداره دولت شوهیته کیره جکدر اول زمان بوماده لر مضر
 اولور مطالعه سنی درپیش ایده بیلمک عقول بشریه نک خارجنده اولدینی جای اشتباه دکلدر
 بوکادلیل آرانیلور ایه عصر مزده واقع اولان فرانسه محاربه سی کوستریله بیلور که فرانسه
 ایمپراطوری اوچنجی ناپولیونک ولوله شوکت وسطوتی بتون عالمه دهشت انداز اولوب جمیع
 دول شرنندن استعاده ایتمکده ایکن پروسیا اوزرینه اعلان حرب ایلدیکنک آینه وارمقسزین
 اردولری پریشان و کندوسی اسیر اولدقندن بشقه مؤخر آ پروسیا لور پارس شهرینی دخی تسخیر ایلدیلر
 حالبوکه فرانسلر یکریمی اوتوز کون ظرفنده برلینه کیره جکلرینی اعلان ایدوب
 کافه ناس دخی پروسیا لورک قدرتیاب مدافعه اوله میه جقلرنده متفق الکلم اولغله نتایج واقعه
 کیسه نک خیال و خاطرینه کلز ایدی

شوراسی دخی علاوه مقال اولنور که تفصیلات مبسوطه دن غرض عواقب امورک تفکری
 عبث اولمق معناسنی متضمن اولیوب قاعده التده اولان تخمینلرک و بدیهیاتدن اولان مقدماتک نتایجی
 ظاهر اولور ایه ده اولیه اوچیوز سنه صکره واقع اوله جق حالات بیلنمز و بلکه حادثات نا که ظهور
 کونیه ایله ملحوظ و منتظر اولان پک چوق مواد تغیر و تبدل ایدردیمکدر بنابرین مشید بنیان
 دولت اولان اسلاف عظامه عاقبت بین اولماق نقیصه سنی اسناد ایلک مغایر انصاف و مخل آدابدر



نتائج الوقف

جلد ثانی

طبعة ثانية

استانبول

باب عالی جاده سنده ۲۰ نومرولی « اخوت » مطبعة سنده
طبع اولمشر

۱۳۲۷

بِسْمِ اللَّهِ الرَّحْمَنِ الرَّحِيمِ

باب رابع

بیك اویچ سنه سنده واقع جلوس محمد خان ثالثدن بیك طقسان
طقوزده وقوعبولان سلطان محمد خان رابع خلغنه قدر طقسان بش
سنه لك وقوعاتی متضمندر

باب ثانی خاتمه سنده بیان اولندیغی اوزره بیك برسهنه سی اواخرنده اوستریا دولتی
اوزرینه سفر آچیلوب سردار اکرم سنان پاشا بودینه قدر عزیمت وموسم حربك گذرانی
جهتیه بیوك بر محاربه واقع اولمقسزین بلغرادده عودت ایلد کدن صکره سفرک ایکنجی سنه سی
بلغراددن تکرار ترفیع رایات اقتدار وویانه یه قریب راهی نهری کنارنده اولان یانق قلعه سی
محاصره یه ابتدار ایدوب قلعه مرقومه یی محارسه قصدیه وارد اولان بیوك بر نمچه اردوسی
پیشان وكافه طوب ومهماتلری ضبط وقلعه یی دخی تسخیر ایتکله مظفراً بلغرادده عودت
ایتمشدی لکن اوستریالولرك افساداتی وپاپانك امرای ملت مسیحیه یی اهل اسلام علیه نه
دعوتی وسردار اکرم سنان پاشانك افلاق بکی میخال بك حقنده اولان تفوهات تهدید
انکیزی سبیلریله افلاق وبغدان واردل امارتلی بالاتفاق اعلان عصیان وطونه ساحلرینی
تخریب وتالان ایلدکلری حوادثنك ورودینی متعاقب مراد خان ثالث حضر تلی مرتحل
دار آخرت اولدی

سلطنت سلطان محمد خان ثالث

سلطان محمد خان ثالث حضر تلی جالس تخت خلافت اولوب قائممقام بولسان
صدر سابق فرهاد پاشایی مهر صدارت ایله تکریم وسردار اکرم ملک ایله توقیز ایلدی
اول امرده مذکور امارتلك تأدیپ وتربیه سیله طونه سواحلتك تأمین ایدلمسی لازمه
مصاحندن اولمغاله صدر مشارالیه اردوی همایونی بالاستصحاب روسجغه واصل اولوب
طونه اوزرینه کوپری قورمق ایله مشغول ایکن سنان پاشا هوادارلری اولان قائممقام
ابراهیم پاشا ووزرادن چغاله زاده وجراح محمد پاشا وشیش الاسلام بوستان زاده وروم ایلی
قاضی عسکری شاعر مشهور باقی افندی اتفاق ایدوب طوائف عسکریه فرهاد پاشادن
متنفر اولدقلرندن معیتنده لایقیه خدمت ایتزلر وکندوسنك عاصی میخال بك ایله اتفاق

خفیی وارد دیرك اغراض ذتیہ لرینی اجرا ایچون بویله برتنك وقتده تبدیل سرداردن جانب دولت علیہ عائد اوله جق مضرائی اختیار والقای مفتریانہ اجتسار ایلدیلر .
پادشاه صافدل مکر دشمندن غافل بولمغله مهر هایونی استرداد وفرهاد پاشایی عالم هستیدن ابعاد ایچون مأمور کوندردی ایسه ده وصولندن اول پاشای مشارالیه کیفیتدن خبردار اولمغله مهر شریفی وادارہ عسکریہ یی یکیچری اغاسی ساطورجی محمد پاشایہ تسلیم ایدرک روسجقدن فرار واستانبوله کلوب حضرت خالد جوارنده اولان چقتلکننده مختفياً قرار ایلدی خلفی اولان سنان پاشا اردوی هایون جانبہ راہی اولدقدن صکره فرهاد پاشا والدہ سلطان طرفہ هدایای عظیمہ تقدیمله عفوی مشعرخط هایونہ دسترس اولوب باخصوص قائم مقام ابراهیم پاشایہ دخی غایت ذی قیمت برخنچر اهداسیله تحصیل امنیت وبعض اصدقاسیله کورشمکه مبادرت ایلدیکی حالده ابراهیم پاشای غدار تکرار اعدامنی تاختیص ایله استحصال اراده ایلکله مسبوق الخدمه اولیله برغازی وزیر عارف شیر شمشیر اولدی

صدر جدید بیک اوچ سنہ سی اواخرندہ اردوی هایونہ واصل اولوب انشا اولنان جسردن طونہ یی مرور وبکرشہ توجہ ایلدی میخال بک جمع ایدہ بیلدیکی یکرمی اوتوز بیک قدر عسکر ایله بکرش بوغازندہ معسکر هایونی استقبال ومتصدی حرب و قتال اولدی ایسه ده قدرتیاب مدافعه اوله مدیغنه مبنی بکرشہ واندن ترغوشته قصبہ سنہ عودت واوراده دخی پابرچای تمکن اوله مامسیله اردل طاغلرینه فراره مسارعت ایلدی سردار اکرم بکرش وترغوشته قصبہ لرینه سور انشاسیله تضییع اوقات ایلدیکنندن وباخصوص تبدل صدارت سببیلہ زمان سفر طارلشمش وجیوش عثمانیہ دخی اموال غنائم ایله پربار اوله رق عودت ارزوسنہ دوشمش ایدوکنندن میخال بک اتخاذ فرصت ایله تکرار ظهور وترغوشته جبراً وقهرآ استیلا ومستحفظ لرینی انواع اشکنجه ایله شهید ایلسیله بکرشک محافظہ سی ممکن اوله میہ جنی استدلال ویاپیلان سور تخریب واحراق اوانہ رق عودت اولندی طونہ ساحلہ لدی الوصول کوپری یه مأمورلر تعینیلہ اموال غنایمندن خمس شرعی النغہ مباشرت وبوایش ایله مشغولیت خلانده میخال بک تعقیب ایتمکده اولدیغی استماع اولندقدہ سردار اکرم هنگام شبده کوپردن کچوب ایرتسی کون دخی طوب ومهمات وجیوش اسلامیہ مرور ایتمکده ایکن بین الصلاتینده میخال بک عسکری یتیشہ رک دانه طوب ایله جسری شکست ایلر یله کرده قلان عسکر وباخصوص اقنچی طائفہ سی دوکوشہ دوکوشہ سرمست سلاف صاف شہادت اولدیلر حتی ابتدای ظهور دولت

عثمانیه دنیرو استخدام اولنه کلان اقنچی طائفه سنک انقراضنه بووقعه نك سبب مستقل اولدیغنی بعض مورخین ایراد واتیان ایلشدر .

صدر مشارالیه افلاق اوزرینه توجه ایتدکده نمنجه حدودنده واقع سرحدات اسلامیه نك محافظه سیچون اوغلی محمد پاشایی مع الوزاره سرعسکر ایدوب اناطولی و بوسنه و قرمان و سیواس و بودین و طمشوار و حلب و سکتوار و یانق بکلبکیلرینی و سپاه و سلحدارر بلوکلرینی معیتنه تعیین ایتشدی نمنجه لولرک استرغونی محاصره ایلدکلی استخبار اولندقدده بودیندن قالقوب معیتنده بولسان امرا و جنود اسلامیه ایله اولجانیه عزیمت ایلدی لکن محاربه یه مباشرت اولندیغنی کون سرعسکر مزبور جرأت عارضی تحصیل ایدیم دیرایکن مست مدهوش اولوب آت اوزرنده استفراغ ایتکه ویوروسونلر دیو هذیان سویلکه باشلادیغنی امرا و طوائف عسکریه نك منظوری اولیجق مظهر لعن و دشنام اولمقدده و طرف طرف محاربه اولمقدده ایکن عسکر بوزلدی ظنیه بودینه فرار ایلدیکنه مبنی جیوش اسلامیه نك برمقداری رجعت و اناطولی بکلبکیسی محمد پاشا بیك بشیوز قدر سواری ایله استرغون قلعه سنه دخول ایلدی و برآی قدر مدافعه دشمن خصوصنده بذل مقدور ایتدی ایسه ده انقطاع امداد و اشتداد قلت زاد سبیلرله قلعه مرقومه نمنجه لولرک ید استیلاسنه تسلیم اولندی

حاصل کلام سفرك اشبو اوچنچی سنه سی وقوعاتی سلطنت سنیه نك شان و عظمتنه موجب نقیصه و شین اولوب هیبت انکیز دول اولان عسا کر عثمانیه افلاق و یوده سنه مغلوب و نمنجه طرفنده دخی استرغون قلعه سیله برقاچ پلنغه ایادی اسلامیه دن مسلوب اولدی

بونک اوزرینه سنان پاشا خدمت صدارتدن معزول ویرینه لالا محمد پاشا موصول اولمشیکن صدارتنک اونجی کونی وفات ایلدیکنه و قائم مقام ابراهیم پاشا فرهاد پاشانک قتلنه سبب اولق تهمتیه پادشاه حضرتلری نزدنده متهم ایدوکنه مبنی شیوه قدر سنان پاشانک بشنچی دفعه صدر اعظم اولسنه منجر اولدی مشارالیه بوکره بالذات پادشاه انامک سفره عزیمتنی سوق و تصویب و خواجه سمدالدین افندی دخی تشویق و ترغیب ایتکه شهریار نوجاهی اختیار مشقت سفره قائل و طریق غزا و جهاده مائل ایلدکلرندن موسم شتاده استحضار لوازم موکب هایونه تقید اوزره ایکن صدر مشارالیه مرتحل دار آخرت اولمغه اقتضای حکم زمان ایله چار ناچار ابراهیم پاشایه تفویض خدمت صدارت قلندی

غزوه مشهوره اكری

سلطان سلیمان عصر نذنبو آرام کیر کنج سکون اولان رایات سلطانیه تجتر و اهتزازه اغاز ایدرک بیک بش سنه سی اوائلنده پادشاه اسلام بلغراده واصل اولغله بین الارکان جهت توجه مذا کرده اولدقدده بعضیلر قومران قلعه سنک تسخیرینه عزیمت اولغنی تنسیب ایتدیلر ایسه ده قلعه مرقومه طونه ایچنده براطه ده واقع اولوب پادشاه حضر تلرینک اختیار کلفت ایلدکلرینه دکیه جکندن واکری قلعه سی استحکامات جسیمه دن ونمچه ممالکی ایله اردل ولایتی فاصل اولق حسیله مواقع مهمه دن اولدیغندن انک فتحیه نمچه لولرک اردل طرفلرندن قطع ایادی تسلطلری قرارلشدیرلدیغنه مبنی بلغرadden صاوه وواره دیندن طونه نهرلری کیلوب قلعه مرقومه پیشکاهنده نصب سرادقات شوکت ویکرمی کون قدر محاصره ومقاتله شدیده وقوعیله آورده قبضه دولت قلندی

بالذات پادشاه آل عثمانک مجارستانه توجهی اخباری منتشر اولدقدده نمچه لولر پاپانک امر وقراریه دول عیسویه دن بالاستعانه اهل صلیب طرزنده برهیئت حربیه تشکیل ویوز الی بیک قدر عسکر جمع ایتشلر ایدی اکری محاصره سی هنکامنده اردوی هایونی باصمق تصورنده اولدیلر ایسه ده یتیشه مدکلرندن اکریه سکنز اون ساعت مسافه ده واقع حاج اوه صحراسنده رکز خیام ارام ایلدکلری مسموع ارکان دولت اولدقدده ینه خواجه سعدالدین افندینک ترغیب وتشویقیله موکب هایونک دشمن اوزرینه هجومی تنسیب قلنه رق حرکت اولندی

معسکر اسلامده الی الی بشبیک قدر قپو قولی وبر اولقدر دخی ایالات عسکری ووزرا وامرا توانعائی موجود اولدقدن بشقه قریم خانی غازی کرایک برادری فتحکرای یکرمی بیک تاتار سوارسیله معیت پادشاهیده حاضر ایدی بیک بش سنه سی ربیع الاولک دردنجی کونی تقابل صفین واقع اولدی ایسه ده بر مقدار محاربه دن صکره حلول وقت شام ایله طرفین اردوگاهلرینه چکلدیلر مخیم هایون ایله اردوی دشمن ارده سنده بربطاقلق اولوب ایکی محلنده کچید یرلری اولغله ایرتسی کونی دائرة هایون ایله پادشاهدن ماعدا کافه وزرا و صنوف عسکریه بتاغی اوته جانبه کچوب حرب و قتاله مباشرت ایتسکله نمچه لولر اول امرده اغفال قصدیله صورت خوف وهراس ارانت ایشلر ایکن بردن بره آتش افشان هجوم اولدقلرینه مبنی جیوش اسلامیه نک یوزی دونوب بتاغی برو طرفه مرور ودشمن دخی درقفا اوله رق عبور ایدرک اردوی هایون ایچنده یقه یقه غوغایه باشلانلدی

و پیادگان دشمنان موکب هایون چادرلرینی غارته متجاسر اولنلری اگرچه آشچی وقره قوللقچی وخربنده مثللو چادر بکجیلری اللرینه کچن الات ایله اعدام وافنایه آغزایدیلر ایسه ده بو حالی مشاهده ایدن کوته بینان عسکردن اردوی هایونک ربغه مساوی بی عار عازم سمت فرار اولمغله وزرای عظام پادشاهی احاطه ایدرک خواجه افندی صبرو ثبات موجب فوز ونجات اوله کلدیکنی پادشاهه تقریر ایدرایدی دشمنک صف مرتبیلری بوزلمق حسابله از وقت ظرفنده قوت وشدتلی مبدل ضعف وانکسار اولدیغندن عودته شتابان اولدقنری مشاهده اولندقدن انجام کاره منتظر و مترقب اولان سواری سرعسکری چغاله زاده سنان یاشا وفتحکرای سلطان تعقیبه مسارعت ایتلریله یوز بیکه قریب دشمن افتاده خاك هلاک اولدقدن ماعدا بقیه السیوفلری دخی اردوگاهلرنده پایدار اوله میوب وقت غروبده طاغله دوشدیلر بنابرین معسکر دشمنده موجود اولان اونر بیک فیلوریلک طقسان یدی قطعه طوپ وپک چوق ضرزن وشاهی وکافه جبه خانه ومهمات ضبط واغتنام اولندی چغاله زاده مهر صدارت وفتحکرای سلطان برادری غازیکرای یرینه قریم خانلی ایله تشریف اولتوب فراریلرک درالکری چالندی یعنی دفاتر خاقانیده اولان اسامیلرینه خط بطلان چکیلوب اله کچلری عقوبات شدیدیه کرفتار اولدی لکن اشوب مظفریت عظیمه اوزرینه مهابت دور سلیمانی اعاده فلنمشیکن لایقيله ثمره غالبیت اقتطاف اولنه مدیغنی وقعه ده حاضر بولنان بجوی ابراهیم افندی تاریخ مشهورنده بیان ایدوب دیرکه (اگر اول قیش پادشاه حضرتلری بودین یاخود بلغرادده مشتانشین اولوب اولهارده تکرار هجوم اولنسه ویانه یه قدر تسخیر اولنق ودلخواه اوزره عقد مصالحه ایدمک ممکن ایدی نه چاره که عقب غزای اکبرده استانبوله عودت بیوریلوب امور سفریه کوشک طوبلغله دشمنه تدارکات مافات خصوصنده ارخای عنان اولندی)

موکب هایون ادرنه جوارنده ایکن والده سلطان شفاعتنامه سیله ابراهیم پاشا ثانیاً صدر صدارته اعتلا ایتلکه درحال سانی جغاله زاده نک نصب کرده لرینی عزل وازعاجه قیام ایدرک اولا سرعسکرلک خدمتیه بلغرادده براغلامش اولان صوقوالی محمد پاشا زاده حسن پاشایی تبدیل وامر عظیم سرداری بی کرک قدرت وکرک رأی وتدبیرجه ضعفادن اولان ساطورجی محمد پاشانک کردن بلاهته تحمیل ایلدی ثانیاً غازیکرای انفصالی استماع ایلدکده دائره اطاعتدن خروج ایده جکی مجزوم اولمغله بویه بر وقتده دولته غائله عظیمه بی مستلزم اولدجقدر دیو پادشاهی وارکان دواتی اخافه ایله فتحکرایک عزله صرف ماحصل قدرت ایدوب هر نقدر پادشاه حضرتلری غرس یمینلری اولان خان

عالیشانك محافظه جاعنه اعتنا ایلدی ایسه ده ابراهیم پاشانك تزویراتی ابطاله قدرتیاب اوله مدیغنه مبنی ناچار بری غازیکرای وبری فتحکرای نامنه اوله رق ایکی قطعه ابقا فرمانی تصدیر اولنوب اگر غازیکرای قریمدن چیقمش بولنور ایسه فتحکرایک فرمانی اعلان قلمق وچقماش اولوبده طائفه تاتار غازیکرایک بقاسی ارزوسنده اتفاق ایتمش بولنور ایسه اولخالده انك فرمانی ارئه اولنق تعلیماتیه وزیر مذکور منتسبلرندن خندان اغا نامنده برمفسده تسلیماً ارسال اولندی اغای مزبور سینوبه واصل اولدقد غازیکرای اورایه کلمش بولمشیکن خلاف تعلیمات حرکت وفرمانی اعطا ایله برلکده قریمه عودت وعزیمت ایلدیلر فتحکرای ایسه جریان وقعه دن خبردار اولغله تقریر حکومتی متضمن خط هایون تحصیل ایش ایدوکنندن غازیکرای فرمانی وفتحکرای خط شریفی ابراز ایتدکده امرای تاتار حیرتده قالوب بالاخره حکم شرع شریفه مراجعت ایلری اوزرینه غازیکرای طرفداری بولنان مولانا ازاغی دیارمزده اعتبار طغریالی فرمانه اولوب خط هایونه تقلید احتمالی واردر دیمکه غازیکرای مقام حکومتده مستقر وبعض مصالحین توسطیله فتحکرای دادر اکبرینك دستبوسنه واردقد هذف سهام قضا واولاد واعقابی دخی کشته تیغ جفا اولدی صد حیف ودریغ که اوپله بر غازی خدیو نوجوان ابراهیم پاشانك غر ضکارلغی یوانه قربان اولمشدر

سردار ساطورجی محمد پاشا بیک التی سنه سی محرمنده بلغراددن حرکت وبودین جانبنه عزیمت ایتمکه یانق قلعه سنی محاصره ایدن نمچه لولر قومرانه عودت ایلدکلرندن مقدا فتح اولمشیکن مؤخرأ نمچه لولرک ید استیلاسنه گرفتار اولان تاتا پلنقه سنی تسخیر ایچون برخیلی وقت مشغول اولدقدن ومذکور پلنقه نی فتح ایلدکدنصکده واج صحراسنه وارد اولان نمچه اردوسيله بش اوز کون علی التوالی مقاتله یه ابتدار ایلدی ایسه ده اردوی دشمنه ظفردن مأیوس اولدیغنه وقاسم دخی مرور ایلدیکنه مبنی طرفین مشتالرینه عودت ایلدیلر اردل قرالی اولان زیغمون دخی بو اوانده طمشواری محاصره ایتشیدی لکن ظفریاب استیلا اوله مدی

پادشاه حضر تلری صدر اعظم ابراهیم پاشایه فرهاد پاشانك قتلنه آلت اولدیغندن طولایی مغیر ایکن بوکره فتحکرایک دخی انعدامنه باعث اولمسندن ناشی بغایت منکسر وملول وسردار ساطورجی محمد پاشانك برخدمته موفق اوله مامسی صدر مشالیهک تدابیر لازمه ده قصورینه محمول اولغله صدر عزتدن دور ومهر هایونه خادم حسن پاشایی مسرور ایلدی لکن صدر جدید عاناً مناصب دولتی مزایده یه باشلایوب تجریم ایلدیکی کسانه

دخی (سزدن الدیغم مبالغ یا تمه قالور ظننده اولیکیز زیرا والد سلطان بنی قسطه کسمشدر جمع ایلدیکیم اچمه و اشیا بی مشارالیه ای تقدیم ایتمکله مأمور و مجبورم) دهرک اعلان ایتمکده ایدی بو اوندی شیخ لاسلام بوستان زاده فوت اولمغله پادشاه خدمت فتوایی خواجه سعدالدین افندی یه ویرمک مراد ایلدیکی حالد صدر اعظم شاعر باقی افندی یه توجیه ایتدیرمک ایچون بر ایکی دفعه تلخیص ایتدی ایسه ده کارکر اولیوب خواجه مشارالیه مسند فتوایه باعث مزیت وزین و جامع الریاستین اولدیغنه و صدراعظمک بمقرب پادشاهی اولان غضنفر اغا حقنده اولان غیضی دخی اغای مومی الیه عکس ایلدیکنه مبنی خواجه افندی ایله بالاتفاق صدر مشارالیهک افعال واقوال نامرضیه سنی افاده و تقریر ایلر یله سیف سیاستله مقتول و صدارت عظمایه جراح محمد پاشا موصول اولدی

بغدان اراضیسی تاتارستانه ملاصق اولمق حسیله اهالیسی مهاجمات تاتاره تاب آور مقاومت اوله مدقلرندن قریم خاننه عرض اطاعته مجبور اولمشلر ایسه ده افلاق بکی میخال بک واردل قرالی زیغمون بر طرفدن جانب دولت علیه تقدیم معروضات ایله استیفای جرایم یولنده اغفاله مباشرت و بریاندن مقتدر اولدقلری مرتبه حرکات خصمانه یه مجاسرت ایده کلدکلرینه واردلستان تحت اطاعته التمدیقه افلاقک ضبطی قابل اوله میه حقنه مبنی سردار ساطورجی محمد پاشایه بیک یدی سنه سی موسم صیفنده اردلستان اوزرینه سفر ایتمک اوزره رکاب هایون جانبدن اصدار فرمان اولنمشیدی لکن سردار مشارالیه بلغراددن حرکت ایتمکسزین یعنی سنه سابقه او اخرنده نمچه لولر یانق قلعه سی محافظلرینک کمال غفلت اوزره آرام و طوائف عسکر یه دن اکثر یسنک پچوی واستونی بلغراد طرفلرنده تأهل ایدرک اورالرده امرار ایام ایلدکلرینی استخبار ایلر یله قومران قوماندانی اولان پالغی نام جنرال بر کیجه بغته یدی سکز بیک سواری و پیاده عسکر ایله قلعه قپوسنه قدر کلشیکن کیسه نیک خبری اولمدیغندن و قلعه نیک متاتی کالده ایسه ده قپوسی غایت ضعیف و خندق اوزرنده بولنان آصمه کویری دخی تکاسل جمله سندن اوله رق قالدیرلماش بولندیغندن بر نوع اغاچ طوپ ایله قپویی شکست ایدرک یکیکچری اغاسی اولان سرخوش و محافظه خدمتیه مأمور اولان جیوش حال سرمستیدن بیدار اولنجه یه قدر قلعه یی استیلا و قورتیه بیلان بش اون کشیدن ماعداسنی اعدام وافنا ایلدی

بصره سمترلرنده تحشد ایدن عربان مشایخندن سید مبارک علم افراز عصیان اولوب بصره و لحسه حوالیسنی تاراج ویغما ایتمکله اهالی قرا و قصبات عجم شاهندن استعانه ایلدکلرینه مبنی اوچبیک قدر عجم کلوب انلرک غاراتی دخی عربانک سیاتنه منضم اولدیغی

پیامی واصل در دولت اولدقدمه مذکور عجملرك كير و النمسى چون شاهه نامه هاپون اصدار ووزرای دیوان هاپوندن صوقوللی محمدپاشا زاده حسن پاشا سردارلق ناميله بغداد والیلمکنه تعیین وارسال قلندی

سردار ساطورجی محمد پاشا بلغراددن حرکت و طونه اوزرینه تمديد اولنان جسردن قارشو جانبه مروره مباشرت ایدوب بیك یدی سنه سی اوائل محرمنده بکرك حراسنه رکز خیام وقریم خانی غازیکرایک ورودینه انتظاراً اللى بش کون آرام ایلد کدنصکرده مشارالیه عسا کر تاتار ایله واصل معسکر هاپون اولمغین اردلستانه توجه ووراد قلعه سنی محاصره ایلدی لکن بوسفردن مقصد ممالک اردلی غارته منحصر اولدیغی جهتله بیوک طوپلر وادوات قلعه ستانی استصحاب اولمدیغنه و موسم شتا دخی تقرب ایدرك یغمورلرك کثرت اوزره نزولنه مبنی بر آئی قدر ممتد اولان امر محاصره نتیجه بخش مراد اولمدیغی مثللو حین محاصره ده كرك اقتجی طائفه سی و كرك جنود تاتار چاپوله رخصت طلب ایلدجه بعدالفتح برلکده کیده رز دنیله رك تأخیر اولمیر یله غارت ممالک عصات دخی حاصل اوله مدی نمچه لولر ایسه اون بشیک قدر ایتالیان و التمش یتشبیك مقداری بحار و خروات عسکرندن مرتب براردو ایله یوریوب کچن سنه فتح اولنان تاتارلنقه سنی و سائر پانقه لری ضبط ایلدک لری و بودینی تحت محاصره یه الدقلری خبری سمع سرداره منعکس اولیجق یگر می بیك قدر تاتار عسکر یله بعض امرای امداده ارسال ایدوب کندوسیدخی و اراد محاصره سنی ترك و بودینه کیدمك شایعه سیله حرکت ایتمش ایسه ده نهرلرك طغیانی و ذخا ترك قلاتی و دواب و مواشینك طاقتسز لکی سبیلر یله قدر تیاب اوله مدیغندن بلغرادده عودت ایلدی بودین محافظه سنده بولنان مرعش بکربکیسی سنان پاشا و استونی بلغراد بکربکیسی سمندر پاشا مقاتلات واقعده شهید و تریا کی حسن یاشا ایله سمندره بکی محمد بك زخم دار اولدقدن صکره و اروشی ترك و قلعه یه تحصن ایلدکلرندن اگرچه دشمن و اروشی ضبط ایتدی لکن اطرافدن امداده کلان جیوش اسلامیه بشته یه طوپلر وضع ایدرك نمچه لولری ازعاج و موسم شتادخی حلول ایتسیله استیلای قلعه دن مأیوساً و اروشی تخریب و احراق ایدرك یقیلوب کیتدیله .

بوسنه نك وقوعات متألمه سنندن بریسی دخی حافظ احمد پاشا انهرامیدر شویله که بوسنه والیسی اولان پاشای مشارالیهك معیتنه برقاچ بکربکی تعیین اولنه رق طونه یالیلری محافظه سنه مأمور ایدلمشیدی نیکبولی یه واصل اولدقدمه میخال بکک بر آدمی کلوب عفوجرایم رجاسنی تکرار و مساعده بیورلدیغی حالد میخال بکک خا کپای وزیر مشارالیه رومال اوله جغنی

تذکار ایملکه حافظ پاشا بوکا الدانوب اوطاغنی انواع زیب وزینت ایله تزین ایدرک میخال
 بکک بنه جکی قایغه نکران ایکن وادی دیکردن اوزرلری آل چوقه پوشیده لو عربهلر
 کورندی میخال بکک ادمندن سؤال اواندقده هدیه عربهلری ایدوکنی بیان ایلسی
 عقبنده میرمزبور عسا کر کلیه ایله ظهور و مذکور عربهلرک دخی طوپ عربهلری اولدینی
 تین ایدوب عسا کر اسلامیه ایسه غافل بولندیغندن حمله اولاده وزیر مشارالیه عازم سمت
 فرار وبالجمله خیام ومهمات نصیب دشمن مکار اولدی بونک اوزرینه میخال ضال یکریمی
 کون قدر نیکبولی قلعه سنی محاصره ایتدی ایسه ده اطرافدن وارد اولان جیوش اسلامیه نک
 صولتیه مایوساً افلاق جانبیه مرور ایلدی

وقوعات مبسوطه صدر اعظم جراح محمد پاشانک و سردار ساطورجی محمد پاشانک
 رهاوت وعدم اداره لرینه محمول و صدر مشارالیه عزل اولنه رق سردار مزبور دخی مقتول
 اولغله خدمت صدارت ثالثاً ابراهیم پاشایه توجیه و سردار لوق دخی عهده سنه تحمیل اولنوب
 قپودان خلیل پاشا قائم مقام و چغاله زاده سنن پاشا ثانیاً قپودان دریانصب بیورلدی حالبوکه
 ساطورجی محمد پاشا ابتدای نصبنده بوایشه عدم لیاقت واستطاعتی بیان ایله اعتذار ایتیشیکن
 قبول اولندیغنی و رکاب هایونده عقد اولنوب سردارک اردلستانه توجه ایلسنه قرار ویریلان
 مجلسده جراح محمد پاشا (نیمچه لولر استرغونده تخریب واجتماع اوزره اولملریله بودین
 جانبی ترک اولنه رق اردلستانه عزیمت مخاطره لیدر اقتضاسنه کوره حرکت اولنق اوزره
 سردار تحبیر اولنسون) دیمشیکن مشر اولیوب اردله توجهی متضمن امر قطعی کوندلیدی
 اونودلدی و جراح پاشایالکنز عزل ایله قورتیلوب بیچاره ساطورجی پاشا شربت شهادتی
 نوش ایلدی .

صدر اعظم ابراهیم پاشا استحضار لوازم سفریه ایله مشغول اولوب ایکن پادشاه
 حضرتلری کچن سنه ایچ خزینه دن الی میلیون اقچه ویردیکی حالده بو سنه مصارف
 سفریه نک اعطاسنده تردد کوستردیکندن حضور هایونده عقد اولنان بر مجلس عمومیده
 شیخ الاسلام سعدالدین افندی و جاهاً اقچه طلبنه جرأت و پادشاه دخی بالضروره اظهار
 موافقت ایتملکه صدر مشارالیه طوائف عسکریه یی مستصحباً جانب بلغراده عطف زمام
 ایلدی بیک سکزی سنه سی محرمنک اوائلنده زمون صحراسنه مرور واردلستان طرفلری
 بازده خیول غارت ایدلمک ایچون بودیندن بشته جانبیه عبور اولنوب ضبورده مشتانشین
 اولان قریم خانی غازی کرای ساطورجی پاشا مرحومک تهمتده مشترک طو تلق و سوسه سیله

مستشعر اولدیغندن هر قدر صدر اعظم تعظیم وتوقیرنده مبالغه ایلدی ایسه ده مطمئن ومؤتلف اوله میوب کولریوز کوستردی .

نمچه لولرک اردوسی استرغونک قارشوسنده واقع جکردلن صحراسنده اولدیغندن اولادشمن اوزرینه واریلوب برطرف ایدلکدن صکره غارته سوق جیوش قائممسی تنسیب قلمغله نمچه لولر وقت قزانمق وایوار ایالتی خساردن محافظه ایلک قصدیله مأمور کوندره رک صلحه طالب اولدقلرینی اظهار ایلدکلرندن مذاکره یه مباشرت واکری ایله استرغون مبادله قلمق مثللو بعض شرائط ایراد ایلدیلر ایسه ده مرادلری اغفال ایدوکی تین ایلدیکنه مبنی ترک مذاکره ایله طابورلری اوزرینه وارلمغه قرار ویرلدیکی حالده ممدود اولان کوریدن استرغون طرفه کچوب جسری دخی قالدیرملریله هجوم جیوش اسلامیه دن تخلیص کریبان ایلدیلر بنا برین صدر اعظم برآی قدر اولحوالیده اقامت و طرف طرف اقتجی سوقیله ایوار ایالتی واردلستانک بعض طرفلرینی غارت ایتدیردکن صکره مشتای بلغراده مراجعت ایدوب یکیکچری وسائر قیوقولی عسکری بلوکلرینی استانبوله اعزام وایالات عسکرریله ولاتی مناسب مشتلاره تقسیم ایلدی قریم خانی بوقیش دخی الیقومغه چوق چالشدی ایسه ده خان مشارالیه عساکرتاتارک ضعف حاله کرفتار اولدقلرندن بحثله آرامه اقتدارلری قالدیغنی بیان وتذکار ایله جانب قریمه روبراه عزیمت اولدی .

عصر مزده طابور تعبیری یدی سکزیوز کشیدن مرکب برفرقه عسکرریه اطلاق اولنوب حالبوکه اول وقتلرده اردو اطرافنه خندق چویرمک ویاخود عربیه مثللو شیلر وضعیله اطرافنی تحصین ایتک واقع اولدقجه بزم تاریخلرده طابور قوردی تعبیریله توضیح واستحکام التده بولنان دشمن اردولرینه طابور اطلاق اولنه کلشدر .

کرانامنده بریهودی قاریسی برتقریبله حرم هایونه یول بولوب واسطه رشوت اولدیغندن بک چوق مناصب مزبورده نک دلاتیله توجیه اولنمده ایدی طائفه سپاه قائممقام خلیل پاشا سراینده مجتمع اوله رق بوبابده عرض شکایته قیام ومزبوره جاب اولندیغنی آنده پاره پاره ایلمکه اقدام ایلدکلرندن والده سلطان بووقعه نک ظهورندن بغایت منفعله اولوب قائممقام مشارالیهک مسامحه وبلکه تحریکنه حمل ایدرک عزل ایتدیرمکله مسند قائممقامی یه حافظ احمد پاشا موصول اولدی .

عاضی میخال بک اردلستانی قبضه تصرفه ادخال ایلدیکندن بحثله افلاق ایالتیله برابر عهده سنه توجیهنی مستدعی صدر اعظمه یازدیغنی عریضه یی دیمو نامنده برمعتمد آدمی ایله ارسال ایتکله صدر مشارالیه دخی کیفیتی انها ویدیوی دخی استانبوله اسرا

ایلیشیدی مرقوم نیکبولی وقعه‌سندده حافظ احمد پاشایی اغفال ایدن حریف اولدیغندن پاشای مشارالیه بالاامان مزبوری قتل و اعدام ایلیکنه و صدر اعظم سرحدده بولندیغی حالده قلاع خاقانینک تفتیشی ایچون بر چاوش کوندرمک کی خلاف اصول و ادب حرکاته جسارت ایتدیکنه مبنی صدر مشارالیهک شکایتیه عزل اولنه‌رق یکچیچری اغاسی بولنان مشجی حسن اغا مقام قائممقامی‌یه اعتلا ایلدی

اول بهار حلولنده قبوقولی بلوکاری سردارا کرم معیتنه قادمه جنبان عزیمت اولمغله بیک طقوز سنه‌سی محرمنده صدراعظم بلغراددن قیام و اوسک کوپریسی مقابلنده نصب سرادقات اسلام ایدوب استرغون محاصره‌سنه عزیمت منوی ضمیری ایکن بودین والی‌لکندن معزول تریاکی حسن پاشایله جهت توجه مذاکره اولندقدده بودین قلعه‌سنک صاغ طرفنده و دراهه نهرینه منصب اولان برق صوبی کنارنده واقع (قنیزه) قلعه‌سی قلاع متینه‌دن و اوسک معبریه کذرگاه اردوی همایونه قریبتندن ناشی مستحفظلری دائماً معسکر اسلامک خط حرکاتی تخریب و تضییق ایده‌کدکارندن اولا قلعه‌ مرقومه‌نک تسخیر یلهره راستک تأمیننه سوق ایلدیکنه و مطالعات معروضه موافق احتیاط کورلایکنه مبنی اوسک جسری مرور اولندقدن صکره جانب یساره عزیمت و قلعه‌ مرقومه‌نک محاصره‌سنه مباشرت قلندی چند کون مرورنده قلعه‌ مزبور دی محارسه ایچون وارد اولان نمچه اردوسی طابور قوروب او طور مغله بر طرفدن قلعه محاصره و بر جانبدن علی التوالی یدی کون طابور اوزرینه مهاجمه اولنه‌رق اکرچه دشمن استیصال اولنه‌مدی ایسه‌ده قرار وثباته دخی تاب و توانلری قالمدیغندن بالضروره عودت و رجعت و محصورین دخی ناچار قلعه‌ مرقومه‌نی ایادی اسلامیانه تسلیم ایلدیلر سکتوار و پچوی و شفلوش و اوسک سنجاقلرینک الحاقیه قنیزه قلعه‌سی بکلیک بکلیک اتخاذ و الاجه ایلی حسن پاشایه توجیه اولنوب ایکی سنه خدمت محافظه‌ده بولندقدن صکره سواری بلوکلرینه قید ازلتمق شرطیه اوچبیک قول اوغلی و ترقی احسانیه یکریمی قدر چورباجی و وافر یکچیچری قلعه محافظه‌سنه براغیلوب و عموماً قبوقولی نفراتنه ایکیشر اقچه ترقی احسان اولنوب مشتای بلغرا ده عودت و بر معتاد یکچیچری اغاسی طوائف عسکریه ایله استانبوله و بکار بکیلر دخی مشتتا تعیین اولنان محالره عزیمت ایلدیلر حافظ احمد پاشا انهمند نصکره طونه سر عسکری نصب اولنان کوزلجه محمود پاشا افلاکه مرور ایتدکده میخال ضال اوچ دفعه مقصدی حرب و قتال اولدی ایسه‌ده جمله‌سندده عساکر اسلامیه منصور و مظفر و بالجمله طوپ و مهمات حربیه‌سی مضبوط و مستخر اولمغله مخدول و منکوب اردلستانه فرار ایلدی لکن مقدما نمچه‌لور ایله دخی بوزشمش اولدیغندن

انلر طرفدن کشته تیغ سیاست قانمغله یدی سکمز سنه دنبرو دغدغه فرسا اولان کانون
فسادی منطقی اولدی

غزوه عظیمه قنیزه

قنیزه نك فتحی نمچه لولر پك کران کلمکله نزع واستردادی ایچون تدارکات عظیمه یه قیام
ایدوب اسپانیا و فرانسه و ایتالیا دن قرق الی بیک فدایی عسکر جلب و محار و سائر کندو
عسکر لریله برابر یوز بیک کشیا کدن متجاوز براردو تشکیل ایلمکده ایدوکلری
استخبار اولندیغنه مبنی صدر اعظم ابراهیم پاشا قنیزه محافظه سنی تریاکی حسن پاشانک
عهده درایتنه تودیع ایدوب قپو قوی اوجاقلرینک ورودینه مترقب ایکن مرتحل دار
مجازات اولمغله قائم مقام بولنان یمشچی حسن پاشا صدر اعظم و سردار اکرم نصب اولنهرق
علی العجله معسکر هایون جانبنه راهی اولدی .

نمچه ایمپراطوری عساکر مجتمعه نك قرق بیک قدرینی استونی بلغراد اوزرینه سوق
وماعداسیله بالذات قنیزه محاصره سنه عزیمت ایدوب استونی بلغراد کیدنلر طقوز کون
ظرفنده قلعه مرقومه بی ضبط ایلدیلر .

بوخبر سردار اکرمک سمعنه واصل اولیجق اولا قلعه مرقومه استرداد وبعده
قنیزه یه امداد اولنق اوزره بیک اون سنه سی اوائلنده اولجانبه عطف زمام واستحکام
الته کیرمش اولان دشمن اردوسنک تدمیرینه اقدام ایلدی ایسه ده موقعک صاربلنی
مانع ظفر اولمغله و موسم شتا دخی تقرب ایتمکله سکدینه عودت ایدوب قنیزه نك نتیجه
احواله دیده کشای انتظار اولدی .

نمچه ایمپراطوری عساکر کلیه ایله قنیزه بی محاصره ایدوب موخرآ استونی بلغراد
تسخیر ایدن فرقه مفرزه دخی منضم اولمغله کمال شدت ایله مقاتله قلمقده ایکن مفصلات
تواریخده مسطور اولدینی وجهله تریاکی حسن پاشا برجانبدن مدافعه شجیعانه یه قیام و بر
طرفدن دخی خدعه حکیمانه ایله محار و نمچه لولر بیننه منافرت وعدم امنیت القامنه اهتمام
ایدوب عاقبت تشبث ایلدیکی تدبیرکارکر تأثیر اوله ده محار لولر ایمپراطوری براغوب
ملکترلرینه کیتدیلر و طوبوپ کشان اولان حیواناتی استصحاب ایتدیلر مع مافیه ایام محاصره
ایکی بجق آبی کچمش وقاسم دخی مرور ایتمش اولمغله جناب حتمک عنایتیه بردن بره
برقیش مستولی اولدیکه ال وایاق طومتزدرجه یه واردی و ایمپراطور کمال ضجرت ایله
فراره مجبور اولدی بناءً علیه قرق الی قدر محاصره طویلری که هربری بریردن جلب

اولنش غایت قیمتدار و مصنع ایدی انلر و بالجه خيام و مهمات و جبه خانه و حتی ایمپراطورک بارکاهيله التون و کمشدن معمول تربزه و صنداليه لری حاليله يرنده قالدیغندن کافه سی اغتنام اولندی عساکر مجتمعه مخالفیندن بک جزؤیسی شمشیر سرتیز مجاهدیندن تخلص کریان ایده بيلمشدن صدر اعظم بک زیاده تلاش و حیرت ایله سکدینده مقیم ایکن بوفتح مبین نصیب مسلمین اولدقدن سروراً بلغراد مشتاسنه عزیمت ایدوب تریاکی حسن پاشا رتبه وزارت و انواع تعطفات پادشاهی به واصل و معیتده بولنان امرا و جیوش اسلامیه دخی انعامات و ترقیاته نائل اولدیلر نمچه لولرک دندان امید و طمع لرینی شکست ایتک ایچون مؤخرأ مذکور طویلر اولوقت دارالامان اولان بلغرادہ نقل اولمشدر .

ظهور جلالیان

بروقتدنبرو نمچه سفرلری ملابسہ سیله اناطولی ولایه و عسکر دن خالی قالدیغندن هر طرفده جلالیلر ظهور ایدوب بولنرک اشداسندن اولان قره یازیچی نام شقی بش اون بیك قدر حشرات جمعیله اورفه طرفلرینی خراب و بیاب ایتمکده اولدیغی استماع اولندقدن اوچنجی وزیر بولنان سنان پاشا زاده محمد پاشا سرعسکر تعیین اولنه رق سنه سابقه ده ارسال اولنمشیدی حبش بکدر بکیلیکنندن معزول و اناطولی تفتیشیله مأمور اولان حسن پاشانک متجاسر اولدیغی ظلم و اعتسافدن طولای ترتیب جزاسنه تشبث اولندیغدن پاشای مزبور دخی یازیچی مرقومه دخالت ایتمکله محمد پاشا رها قلعه سننده ایکیسینی بردن محاصره و تضییق و قره یازیچی حسن پاشای تسلیم ایتک شرطیله استیان ایلدیکنه مبنی دفع فتنه ایچون کندوسنه اماسیه سنجاغی توجیه اولنه رق و پاشای مزبور استانبوله کوندریله رک اشد عقوبتله قتل اولندی انجق قره یازیچی شقاوت سابقه سننده پایدار اولدیغندن سرعسکر مشارالیه استیصالنه قیام ایشیکن سیواس بکدر بکیسی علی پاشا مجارستان سفرینه عزیمت ایچون استانبولدن مرور ایلدیکی اثناده عاصی مرقوم حقننده حسن شهادت و حرکات واقعہ سی سرعسکر مشارالیهک سطوت و تسلطندن خوفه منیدر دیمکله و علی روایه شیخ الاسلام صنع الله افندینک برادر زاده سنه قره یازیچی جانبندن اوتوز بیك التون تقدیم اولنغله محمد پاشا سرعسکر لکدن عزل اولنسوب شقی مرقومه بودفعه دخی چورم سنجاغی احسان اولندی لکن مرقومک حرکات شقاوتکارانه سنندن رجوعی شویله طورسون نعمیا تاریخنده صورتی مسطور اولان و فرمان هایون روشیله برطاقم هذیانی مشتمل بولنان حکمنامه سی مزایاسندن معلوم اولدیغی اوزره دعوای سلطنته قدر متجاسر

اولمسیله قهر و تنکیلی ضمننده بغداد والیسی صوقولای محمد پاشا زاده حسن پاشا سرعسکر نصب و استانبولدن دخی حاجی ابراهیم پاشا تعین و ارسال قلندی ابراهیم پاشا سرعسکر مشارالیه التحاق ایتمکسزین حرب و قتاله متصدی و منهزم اولمش ایسه ده حسن پاشا جمعیت اشقیایی پریشان ایدرک قره یازیجی بی سیواس طاغرینه قاچردی لکن متعاقباً شقی مرقوم فوت اولدقده سرکردگان اشقیا برادری دلی حسنی مقامنه اقامه و حسن پاشانک بغداددن کلکده اولان اموال کثیره و اشیای نفیسه سنی نهب و غارت ایدرک بوسبيله کسب قوت و توفیر جمعیت ایلدکلرندن پاشای مشارالیه اوزرینه قدرتیاب هجوم اولدیلر حسن پاشا معیتنه مأمور اولان عسکره رخصت انصراف و یرمش بولندیغنه مبنی یالکز قپوسی خلقی مدافعه اشقیایه غیر کافی ایدوکنندن توقاد قلعه سنه تحصن ایدرک جمع عسکره اقدام ایتکده ایکن مقرب پادشاهی قپواغاسی غضنفر اغا سوقیله طواشیانندن دیاربکر بکلر بکیسی بولنان خسرو پاشایه سرعسکرلک تفویض اولمغله حسن پاشانک قوه نفوذیه سی سکتهدار ایدلدی مع مافیه اشقیا توقاد قلعه سنی تسخیرده سعی بلیغ ایتکده ایسه لرده لوازم قلعه کیریدن معری اولدکلرندن بروجله حصول مقصده مقتدر اوله میوب فقط حسن پاشانک صباحلری قلعه قپوسی خارجنده اوتور مقده ایدوکنی واسطه جواسیس ایله استخبار ایدرک قورشون ایله اوروب اعدامنه ظفریاب اولملریله ارتق قلعه محاصره سنی ترک ایله قره حصارده مشتانشین اولق اوزرد اول طرفه کیتیلر مؤخرأ دلی حسن بقیه عمرینی غزا و جهادده کچریمک شرطیله استیمان ایتکله دفع فتنه ضمننده عهدده سنه بوسنه بکلر بکیلکی توجیه اولنه رق سکز اون بیک قدر عجیب الهیکل حشرات ایله انواع تخریبات و مظالم اجرا ایدرک کایبولیدن کچوب منصبی جانبیه روانه اولدی

اولبهار حلولنده عسا کر عثمانیه بلغرادده مجتمع اولمغله صدراعظم یمشجی حسن پاشا بیک اون برسنه سی محرمنده کچن ییل ایادی دشمنه کرفتار اولان استونی بلغرادی استرداد ایچون سوق سمند عزیمت و سکز اون کون محاصره ایله آورده قبضه دولت ایدرک بودینه واصل واردلستان غارتنه کتمک نیتیه یشته جانبیه مرتحل اولدی سرحد امراسی و بودین خلقی استرغون قلعه سی ایادی دشمنه کرفتار اوله لی بودین سرحد اولمشدرو نیچه اردوسی استرغونده مهیا ایدوکنندن معسکرهایون اردلستانه توجه ایتدکده کلوب بودینی محاصره ایدوچکلری درکاردر دیمشکر ایکن صدر مشارالیه عنود بر ارنبود اولدیغندن حواله سمع اعتبار ایلدی ایسه ده برقاج مرحله کیدر کتمز نیچه لولرک یشته بی ضبط و بودینی محاصره ایلدکلری اخبار اواندقده جان باشنه صچرایوب سرعت سیر ایله عودت

ایلدی و پشته نك استرداد ایچون طویلر وضع ایدرك دو كمكه باشلادی بو وجهله پشته جانب اسلامیاندن و بودین نیچه لولر طرفدن دو كمكه ایکن معسکر هایونده قات ذخائر نمایان اولغله واردو خاتی بودیندن ذخیره لئمه كمكه باشلادیغنه و بوا یسه وخامت انجامی موجب اوله جغه مبنی بین الارکان مذا کره مصاحت اولندقدده ویریلان قرار موجب نیچه ترقی ایله بیک نفر یکچیری و بعد اداء الحدمه سواری بلوکلرینه الحاق اولنق شرطیله بیک نفر قول اوغلی یازیلوب روم ایلی بکک بکیسی لالا محمد پاشا ایله بودین محافظه سنه وضع و تعیین اولندقدن صکره صدراعظم مشتای بلغراد عطف لجام ایلدی نیچه لولر بر مدت دها محاصره یه دوام ایتدیلر ایسه ده قدر تیاب تسخیر اوله میه جقلرینی استدلال ایدوب موسم شتا دخی تقرب ایتمه که رجعه مجبور اولدیلر و کوتورده مدکاری بعض طوب و مهماتلری اغتنام اولندی .

صدراعظم بلغراد بعد الوصول استونی بلغراد فتحی مکافات اوله رق سواری او جاقلری نفراتنه ایکیش و پیاده او جاقلری نفراتنه بر راقچه ترقی احسان ایدوب قبوقوللرینی استانبوله وامرایی مشتالرینه ارسال ولالا محمد پاشایه وزارت ثالثه براتی تسیاریدرك روم ایلی بکک بکیکنی قیوجی مراد پاشایه توجیه ایلدی .

یکچیری طائفه سی مدیران دولته تعریض وسوء اداره لری حقنده گفتگویه مجاسرت ایتلریله قائم مقام بولنان ساعتچی حسن پاشا و شیخ الاسلام خواجه زاده محمد افندی و یکچیری اغاسی علی اغا معزول اولوب کوزلجه محمود پاشا قائم مقام و صدراعظمک مقدماتی ایتدیردیکی صنع الله افندی ثانیاً شیخ الاسلام و بوستانچی باشی دلی فرهاد یکچیری اغاسی اولمشیدی اشبو بیک اون بر سنه سی رجبنک یکرمی اوچنچی کونی سپاه زوربارلی دیوان هایونده اظهار شقاوت و شهریار انامی ایاق دیوانه دعوت ایتلریله بالضروره باب السعاده پیشگاهنه تخت هایون قوریلوب پادشاه حضرتلری عرض دیدار ایتدیلر متعینان سپاهدن حسین خلیفه و بویراز عثمان و کاتب جزمی ایلوو کلوب (پادشاهم اناطولیده جلالی اشقیاسی کوندن کونه تکثر و مظالم و تعدیاتلری تزايد ایتمه که سفرده بولنان طوائف عسکریه نك خانمانلرینی خراب ایلدیلر کوندریلان سر عسکرلرک و باخصوص طوائشی خسرو پاشانک عدم لیاقتلری ناموس دولته کسرینه سبب اولدی بوکا دخی باعث قائم مقام سابق ساعتچی حسن پاشا و وزرادن طرنتچی حسن پاشا و قپواغاسی غضنفر اغا و دارالسعاده اغاسی عثمان اغا اولغله بونلرک جزالری ترتیب اولنق مطلوبدر) دیهرك الحاح و ابرام ایلدکلرندن پاشالر موقع قتله کلشیکن تبریه ذمت و یکچیریلر دخی شفاعت ایتلریله قورتیلوب مذکور اغالر قنطره سفندن امرار اولندی .

طوائف عسکریه نك غلیانی صدر اعظمك مسموعی وعدوی جانی اولان صنع الله
افندی نك مشیخت و محمود پاشانك قائممقاملق مسندلرینه ارتقالری وانلرك اثر تحریکی
اوله رق غضنفر اغا وقعه سنك ظهوری و کندو حقتده دخی سوء تصمیاتلری معلومی
اولیجق لالا محمد پاشایی سردارلق ایله کندو مقامنه اقامه ایدرك سبکبار بلغراددن الغار
ایله شعبان شریفك یکر می بشنجی کیجه سی استانبوله واصل و طوغریجه سرای پادشاهی یه
داخل اولوب مظهر التفات جهاندار ی اولدی ایرتسی کونی قائممقام محمود پاشا صدر
مشارالیهك قتلی ایچون فتوی الوب طائفه سپاهك مطلوبلری دخی بومرکزده اولدیغنی
عرض ایلدی ایسه ده پادشاه حضرتلری مساعدده ایتماملریله شیخ الاسلام ایله قائممقام نتیجه
حالی تفرس ایدرك فرار واشقیای سپاه دخی عقد جمعیت ایله آت میداننده قرار ایلدیلر
طائفه یکیچریان صدر اعظمك مجلوی اولق حسیله صدر مشارالیه اغا قپوسنه عزیمت
ووزرا و علمایی و ترسانه و طوپخانه عسکرلرینی دعوت ایدوب انلرك اجتماعیه کسب قوت
و باخصوص علی رؤس الاشهاد قرائت اولنان خط هایونده صدر اعظمه معاونت واشقیانك
تنکیلنه غیرت اولنسی امر و فرمان بیورلمغله تجدید اقبال و سطوت ایلدی بناءً علیه بلوک
اغاری جمعیت سپاهه کوندریلوب اسم و رسملری معین اولان شقیارک تسلیمی تکلیف
اولندقدده اول امرده مخالفت و تجلد اظهار ایلدیلر ایسه ده متعاقباً خوف تأدیب ایله پراکنده
ویریشان اولملریله صنادید اشقیا برقاچ کون ایچنده اله کچدکجه قتل و افنا اولندی اناطولی
قاضی عسکری ابوالمیا من مصطفی افندی صدر اعظمك علیه نه اولنلردن و قتانی امضا
اینداردن اولدیغنی حالدده عدم وقوف ایله افندی مشارالیهی مسند فتوایه سوق و اصعاد
ایدوب صکرده دن واقف حال اولدقدده طریق عفو و اعماضه سالک اولدی سردار لالا محمد
پاشا طور ناجی باشی معیتله کوندریلان سکز اون بیک قدر یکیچری عسکریه بوسنه
بکدر بکیسی جلالی دلی حسن پاشانك ورودلرینه مترقباً بلغرادده آرام ایتمکده ایسه ده
وقت سفر تنك اولدیغندن حرکتیه قیام و اوسك کوپریسی جوارینه نصب خیام ایلدکده
عساکر مرقومه و متعاقباً دلی حسن پاشا اون بیک قدر جلالی سواریسيله معسکر هایونه
وارد اولوب منتخبی اولان درتیوز قدر آدملرینی سوار ی بلوکلرینه قید ایتمك اوزره
سرداردن التماس ایتمکده سردار مشارالیه هر قدر کچشدیرمکه اقدام ایلدی ایسه ده
بروجهله قابل اوله مدیغندن ضروری ابراز مساعدده ایتدکدن صکره فك رابطه خیام
وبیک اون برسنه سی اوائلنده بودین جانبیه سوق سمند اقدام قلندی .

قریم خانی غاز یکرای خان سردار اسبق ساپورجی محمد پاشانك قتلندن منفعل

اولدیغندن اولوقتدنبرو بالذات سفره کلیوب هر سینه اون بش یکر می بیک تاتار عسکری کوندر مکده اولدیغی خالد سلامت کرای و محمد کرای و شاهین کرای نام برادرلری خان مشارالیه دن روکردان اوله رق جلالی دلی حسن جمعیتنه داخل و جلالی مزبورک بوسنه والیکلیه روم ایلی جانبنه کچمسی صورت پذیر اولدقدن عفو هایونه نائل اولدقلرندن حان مشارالیه شاید حقمده اغبرار پادشاهی حاصل اولمش ایسه بونلردن بری قریم خانلرغه نصب اولنور و اهمه سیله سنه سابقه او ائرنده یعنی صدراعظم یمشچی حسن پاشانک اردوی هایونله بلغرادده عودت ایلدیکی زمانده واصل معسکر هایون اولوب محافظه سرحدات ایچون پچویده مشانشین اولمشیدی بودفعه سردار لالا محمد پاشا خان مشارالیه برلکده سفره کونورمکه چوق غیرت ایلدی ایسه ده بزم جلالی طائفه سیله اجتماعز قابل اوله مز اعتذار یله جانب قریمه عطف عنان مراجعت ایلدی

عسکر اسلام بودینه و نمچه اردوسی پشتیه واصل اولوب قارشو قارشویه رکز خیام اولدقدن صکره پشته جانبنه مرور اولتمق تصمیم یله کویری انشاسنه مباشرت و ختامه رسیده اولمق سزین یدی سکز بیک جلالی و اوچ درت بیک قدر یکچیری و سائر عسکر قایق لریله امرار اولوب کوپرینک محافظه سی ایچون استحکام انشاسی سپارش اولمشیکن جلالی طائفه سی بزانا طولیده بو قدر غوغا ایتدک و نیجه ممالک تخریب و غارت ایلدک نه متریس قازدق و نه سیت دزدک دیهرک اچیقندن دشمن اردوسی اوزرینه هجوم ایدوب خیلدیجه جلادت اظهار ایلدیلر ایسه دخی ایش اسکی بیلدکلرینه توافق ایلدیکندن و کویری دخی تمام اولماق حسد یله اعانه اولنه مدیغندن بودین جانبنه مرور ایده بیلان افراد جزو یه دن ماعداسی تلف و هبا اولدی برقاق کون مرورنده سکز بیک قدر فدایی نیمچه لو بودین جانبنه کچوب متصدی حرب و قتال اولدقلرندن مقدار کلیسی علف شیرشمشیر و برطاقی دخی طونه یه دو کیلوب غریقاً تلف اولدیغی مثللو مؤخر آواقع اولان هجوملری دخی موجب انهزام و حرمانلری اولدی و وقعه سابقه نک نظیره سی ظهوره کلیدی بوندن صکره بر مدت ده طرفین موقعلرنده آرام و موسم شتاک حلولی جهتیله بیک اون ایکی سنه سی ربیع الاولنده روم ایلی والیسی تریاکی حسن پاشا بودین محافظه سنه بال تعیین موکب اسلام جانب بلغرادده و نیمچه لولر دخی ممالک تری طرفه عطف زمام ایلدیلر.

جلالی حسن پاشا روم ایلی طرفه کچورلمش ایسه ده پاشای مزبور دن آیریلان و طرف طرف حادث و پیدا اولان جلالیلر کوندن کونه کسب جمعیت و جسامت ایتدکده اولملریله تشکیل و تدبیرلری ایچون اولا و زرادن نوح پاشا و ثانیاً نوح پاشا سر عسکر تعیین اولمشیکن

موفق او انه میوب صدر اعظم یمشجی حسن پاشا دخی ایکی طرفک امور یله تقیدایلیک ضمنتده استانبولده قالدیغی حالده اغراض شخصیه سنک اجرایی قیدینه دوشهرک وزرا و امرادن منفوری اولنلری قتل و اعدام ایلدیکنه و یکیچریلرک حمایه سیله نائل استقلال اولمقدن ناشی مغلوب امتنانلری اولدیغندن یکیچری طائفه سی کرک استانبولده و کرک اردوی همایونده پک زیاده یوزه چیقوب اداره لری کسب مشکلات ایتدیکندن ماعدا طوائف عسکریه ایله اعتصامی جانب ساطتته خوش کلدیکنه بناء بیک اون ایکی سنه سی ربیع الآخرنده معزول و برفاچ کون صکره مقتول اولوب مقدما ساجدارلقدن مصر و الیکله چقان یاوز علی پاشا صدر صدارته انتخاب و دعوت اولندی .

نقض عهد شاه عجم

حکمران ایران اولان شاه عباس عصر مراد خان ثالثه دولت علیه ایله عقد مصالحه ایتدکن صکره امور مختلفه دولتی تنظیم و اوز بکلر انه کچن ممالک موروثه سی مع زیاده استرداد ایله قوت و قدرتی تمیم ایتمکله مقدا جانب سلطنت سنییه ترک ایلدیکی اذربایجان و شروان الکارینک ضبطنه فرصت بین ایدی نیچه سفرینک تمادسی و باخصوص اناتولیده جلالی اشقیاسنک ظهوری آرادیغی زمانی ارائه و نتیجه لولرک ترغیب و تشویقیله حاصل اولان اتحادلری دخی شاهک ارزوسنی اجرایه ابراز مساعده ایلدیکندن و تبریز محافظه سند بولان ویرلی قوی دنیلان اوچ درتیک قدر یکیچری نفراتی وایلری بولان زنجیر قران علی پاشایه تغلب ایدرک اهالییه ایتدکلری جور و اذا قالمقدن بشقه پاشای قالدیروب بعض اگرادی تربیه نامیله غارته کوتوردکلری شاه مشارالیهک مسموعی اولدیغندن اونبشیک سواری ایله بروجه ایلغاریدی کونده اصفهاندن تبریزه واصل اولدی .

علی پاشا برایکی بیک کشی ایله انای عودتنده شاهه راست کاهرک وقوع بولان محاربه ده اثبات شعار مردانکی ایتشلر ایسه عجملرک کثرتی موجب غلبه لری اولمغله اکثر عسکر و امرا شهیداً عازم ملک جاودانی اولوب علی پاشا اسیر و شهر تبریز گرفتار دام تسخیر اولمسیله برابر شاه مشارالیهک روانی محاصره یه شتاب ایلدیکی خبری دردلته وصول بولدی بونی متعاقب پادشاه زمان سلطان محمد خان حضرتلری بیک اون ایکی سنه سی شهر رجی و اسطنده اوتوزیدی یاشنده و سلطنتلرینک اونجی سالنده وفات ایلدی .

سلطنت سلطان احمد خان اول

سلطان احمد خان اول جالس تخت پدر اولدی شهریار مغفور عابد و زاهد برپادشاه

کثیرالمحمد اولوب فقط قوه مدبره سی مرتبه احتیاجدن دون ووالد لری صفة سلطانه تعظیم و توقیری حددن افزون اولمغله عزل و نصب و کلا وحل و عقد مصالح سلطنت مشار الیهانک مسلم کف غیر کافیه سی اولدیغندن رواج ارتشا فوق العاده شهرت ما ایدی .

جلوس احمدخان و قوعی کونی قپودان دریا جغاله زاده سنان پاشا دونمای هایون ایله اقدکزدن عودت و تقبیل دامن پادشاه جدید ایله تجدید مزیت ایلدیکی مثللو بش التی کون صکره صدر اعظم یاوز علی پاشا دخی واصل اولدی جلوس بخششی صدر اعظمک مستصحی اولان مصر خزینه سندن اعطا اولمق مصمم اولدیغی حالده خزینه مزبور نک قاره دن کلدیکی جهته ورودی بش اون کونه محتاج اولدیغندن یالکیز ایچ خزینه دن یدییوز بیک التون اخراج و قانون دولت وجهله طوائف عسکریه یه تقسیم اولندی

صدر اعظم نمچه طرفه و جغاله زاده عجم اوزرینه سردار نصب اولنوب بش اون بیک یکچیری ایله سلحدار و علوخیان یسار و غربای یسار بلوکلری جغاله زاده معیته و قصور طوائف عسکریه صدر اعظم اردوسنه مأمور و ترفیق قینوب صدر مشار الیه بیک اون اوچ سنه سی محرمنده جانب انکروسه تحریک طوغ و علم ایلدی لکن بلغراده وصولی متعاقب مرتحل دار اخرت اولمغله مهر صدارت سنه سابقه ده سردار بولنان لالا محمد پاشایه ارسال بیورلدی

صدر جدید ابتدای سفردن یعنی اون ایکی سنه دنبرو محاربه و محافظه خدمتلرنده مستخدم و درایت و شهامتی مسلم اولدیغندن تدارکات قویه ایله بودین جانبیه عزیمت ایدوب وصولندن مقدم پشته ده بولنان نمچه لور فرار ایتمکین اولحوالیده بولنان جان قورتران و خطوان و واج پانقه لری نی ایدی اعدادن تخلص و تعمیر و ترمیم لری نی تمیم ایتدکن صکره استرغون قلعه سی محاصره ایلدی ایسه ده نمچه لور استرغونک قارشو سنده واقع جکردان نام استحکام جوارینه اردو و طونه نه ری اوزرینه کوپری قوروب نوبنو قلعه یه عسکر و مهمات وضعیله تحکیم و ترصین ایلدکلرندن و روز قاسم دخی تقرب ایتدیکنندن برآیدن متجاوز و قوعبولان محاصره و محاربه نتیجه بخش مطالب اولمغله صدر مشار الیه سرحدات اسلامیة نک امر محافظه لری نی بالا کمال بودینه و اندن بلغراده عودت ایدوب بش اون کون مرورنده خاکبای شاهانه یه یوز سورمک و مصالح مهمه یی شفاهاً عرض ایلک ایچون جانب استانبوله تحریک توشن استعجال و رمضان شریف ایچنده تقبیل دامن سلطانی ایله تخصیل شرف و اقبال ایلدی .

شاه عجم روانی محاصره یه عازم اولدقده والیسی بولنان شریف پاشا جوارده بولنان

نخجوان قلعه سنی ترك ايتدير درك ايچنده بولان عساكر عثمانیه بی جلب ایتمله روانده الی بیک قدر عسکر تجمع ایتشیدی بولنرله امر مدافعه به قیام ایلدی ایسه ده استانبولدن سردار تعیین اولان چغاله زاده نك ورودی اوچ بش آیه محتاج اولدیغنه وجوارده بولانان ولایة دخی جلالی غائله سندن ناشی قدرتیساب اعانه اوله مدقلرینه مبنی یدی آی محصور اولدقدن صکرده بالضروره تسلیم حصار ایلدی اذربایجان اهالیسی ایچنده شیعیت ناسس ایش بولنقدن ناشی انلرك اعانه سیله شاه مشارالیهك قوت و جمعیتی کوندن کونه متزاید اوله رق اولحوالیده بولانان موافقی کاملاً زیر حکمنه المغله صوقوالی محمد پاشا مرحومك فصل سابقده بیان اولانان ملاحظات ومطالعاتی تمامیه ظهوره کلدی ومقدما چکیلان بونجه امکلهر هبا اولدی .

سردار ایران چغاله زاده سنان پاشا بیک اون اوچ سنه سی محرمی واسطنده اسکداردن حرکت ایدوب راست کلدیکی جلالی سرکردلرینک کیمنی قتل وتدمیر وکیمنی تلطف وتأمین ایله جنود عثمانیه بی توفیر ایدرك ارضرومه وانندن قارصه واصل اولدقده جنکه دعوتی متضمن ایران شاهنه نامه لر کوندردی ایسه ده شاه مشارالیه مقابله دن کریزان وروانه طوغری روان اولدیغندن سردار اکرم دخی ارقه سی صرد پویان اولدی شاه عجمك مقصدی عساكر عثمانیه بی اتعابه منحصر ومقابله دن محتنب اولدیغنه ومقدما قلعه روانی تخریب واولحوالی بی اهالیدن تخلیه ایش ایدوکنه بناءً سردار مشارالیه نخجوانه منصرف وزمام تدیری قره باغده قشلامعه منعطف اولدیغنی حالد معیتنده بولانان امرا وطوائف عسکریه ممالك عثمانیه به عودت خصوصنده همزمان اتفاق اولدیلر سردار اکرم هرچندکه قره باغك شتاسی خفت وما کولات ومشروباتی کثرت اوزره در جمعیتیزی طاغتمیوب بوسنه اوراده مشتانشین اولور ایسهك عجم شاهنی بریرده قصدیروب طوتمق اغلب مأمولدر دیدی ایسه ده کارکر تأثیر اولیوب وموسم شتاك حلولی جهتیله بعد ازین تبریزی محاصره دخی نتیجه بخش اولمز دیو غلو ایلدکارندن بالضروره نهرارسی مرور ایله تبریزه قریب محالردن وانه لدی الوصول امرا وطوائف عسکریه بی مناسب مشالره ارسل وکندوسی وانده اقامتی اختیار ایلدی وامرادن بعضلرینک سردار اولانلرك مشتانشین اولسی خلاف معتاد ومغایر احتیاطدر دیدکارینه قولاق ویرمدی لکن عساكر عثمانیه طاغیلوب سردارک وانده مقیم اولدیغنی شاه عجم استماع ایتدکده وانی محاصره به شتاب ایلدیکنندن سردار مشارالیه ناچار وان کواندن قایق ایله عادالجوازه وآنندن دخی ارضرومه عزیمت وشاه دخی وانی المغه عدم استطاعتی درك ایله عودت ایلدی .

صدر اعظم لالا محمد پاشا بیک اون درت سنه سی محرمنده اردوی هایون ایله استانبولدن حرکت ایدوب بلغراد وبعده اوسک جوارینه واصل اولدقده جهت توجه تعیین اولنق اوزره عقد مجلس مشاوره ایلدی بعضیلری استرغون تسخیرینه کیدلمک صورتی ترجیح ایلدیلر ایسهده اکثر امرا قییره ایله ویانه بیننده اولان وئروت و معموریتلری مشهور بولنان مملکتلرک غارت ایدلمسی تنسیب ایتلملیله بوکاقرار ویریلوب یکیکچری اغاسی نفراتیله ایلرویه کوندرلمش اولدیغی حالد اردو قاضیسی بولنان ولدان زاده احمد افندی به قرار مجلسی تسجیل و اعلام ایلمک خصوصی طرف سردار اکرمدین تکلیف اولندقده قاضی مومی الیه اصحاب لیاقت و حیتدن برذات اولدیغندن جواب صادقانه جرأت ایدوب (برطاقم حطام دنیا ارزو کشرینک اقوالنه فریفته اوله رق بوقدر اغر عسکر ایله چاپوله کتمک خطای فاحشدر زیرا دها قاسمه سکسان کون اولوب امر غارت ایسه یکر می اوتوز کونده حاصل اولور و طوائف عسکریه دسترس اولدقلری اموال غنایمی مأمورینه ایصال ایچون طاغیلور اولوقت دشمن استونی بلغراد ویاخود بودینی محاصره ایلدکده کیملر ایله جواب ویررسکمز باخصوص پادشاه حضرتلری استرغونک فتحی مراد مخصوصمدر دیدیکنی افاده بیورمش ایدکمز بوکا تشبث ایلدیکمز حالد بعد المحاصره فتحی میسر اولسه دخی معذور اولورسکمز) دیملکه بوکلام مستقیمانه صدر اعظمی خواب غفلتدن بیدار ویکیکچری اردوسنی عودت ایتدیره رک استرغون جانبنه عطف لجام اقتدار ایلدی .

مقدما پایا طرفندن نیچه لولره اعانه یه کوندریلوب بعض یلقه لر محافظه سنه وضع اولنان ایتالیا لوردن اوچیک قدر ایتالیان ابراهیم پاشا صدارتنده مأمور محافظه سی اولدقلری قلعه لری جانب سلطنت سنیه یه تسلیم وعلوفه معینه ایله خدمت دولت علیه داخل اولمشلر ایدی بونلرک واسطه سیله بوکره دخی استرغون ماحقاتندن اولوب امر محافظه لری کذلک ایتالیا لره مودوع اولان استحکامات مرقوملر طرفندن جانب دولته تقدیم قلندی و بونلر دخی عطایا وعلوفه معینه ایله خدمت دولته قبول اولندی .

قلعه استرغون برآیدن زیاده محاصره و تضییق اولندقدن صکره استیجان ایله فتح و تسخیر اولنغله صدر اعظم فوق العاده مسرور اولدی زیرا مقدما ایدی اعتدایه کرفتار اولدقده کندوسی محافظ بولندیغندن ینه کندو معرفتیه استرداد اولمنسی تمی ایتمکده ایدی حتی مقدما ویره شرائطی مذاکره ایدن و خدمت کتباتبته بولنان یچویلی ابراهیم افندی بی کوندروب استرداد شرائطی دخی ینه انکله مذاکره ایتدرمش اولدیغی و بعد

ازین اولدیکمه غم یم دیدیکنی مومی الیه ابراهیم افندی رایت ایدر .
 سلطان سلیمان زماندنبرو تابعیت دولت ایله نائل آسایش اولان اردل قومی ابتدای
 سفرده قریفته مکرو آل و متصدیٰ دعوای استقلال اولوب انواع خسارته گرفتار اولدقدن
 صکره بالاخره نیمچه لولره محکوم اولمشلر ایدی نیمچه خلق ایسه کرک حجار و کرک اردل
 اهالیسنه پک زیاده ظلم و حقارت ایده کلرلیله مبتلا اولدقلری ذلت و اذیت جالمرینه طاق
 دیدیکندن نهایت عقد جمعیت و حجار بکزاده لرندن بوچقابی نام بکزاده کندولرینه قرال
 نصب اولنق اوزره کافی السابق طرف دولت علیه عرض تابعیت ایتلریله سنه سابقه ده
 اقتضا ایدن شروط و قیود مذاکره و تتمیم و جانب پادشاهیدن اصدار واحسان اولنان نامه
 هایون و مرصع التون تاج و قلیج و خفتان صدر اعظم واسطه سیله تسلیم اواندقدن ماعدا
 یکریمی بیک قدر عساکر متنوعه عثمانیه ایله دخی بازوی اقتدارلری تحکیم قلندی بناء
 علیه صدر اعظم استرغون محاصره سیله مشغول ایکن قرال مشارالیه اردل ایچنده بولنان
 نیمچه اردولریله برقاج دفعه محاربه و جمله سنده استحصال غلبه ایتمکله وراد و سائر اردل
 قلعه لرینی تخلیص ایلدکن صکره وقوع بولان التماسه مبنی بودین بکدر بکیسی بکتاش پاشا
 عساکر جدیده ایله اعانهیه مأمور ایدیلرک مجارستانک قلاع مشهوره سندن اولان ایوار
 قلعه سی دخی نیمچه لولرک ایدی تسلط لرندن انتزاع اولندی قلعه مرقومه ذاتاً اردل
 حکومتک خارجنده اولدیغندن طوغریدن طوغری به جانب سلطنت سنده دن ضبط
 اولنق تصور قلنمش ایسه ده قرال مشارالیه اردل حکومته الحاق خصوصنده نیاز
 و الحاح ایلدیکنه و تطییی ایسه ملتزم بولندیغنه مبنی اسعاف التماسه مساعدۀ سنیه ارزانی
 بیورلدی .

شرق سرداری اولان چغاله زاده سنان پاشا موسم شتایی ارضرومده امرار و تدارکات
 حربیه به صرف اقتدار ایدوب بیک اون درت سنه سی اول بهارنده معیتته مأمور اولان
 امرا و عساکر ایله تبریزه طوغری حرکت و سلماس حوالیسنه مواصلت ایدرک عجم
 شاه ایله اردلرنده ایکی اوچ ساعتک مسافه قالدقده ارضروم بکدر بکیسی سفر پاشا اون
 یدی نفر میر میران و میرلوی کندیوسنه اویدیروب بلارخصت جانب دشمنه ایلغار ایتمکله
 سردار مشارالیه عودتلری ایچون اسطار اوامر ایلدیکی حالدۀ کارکر تأثیر اولمدی شاه
 مشارالیه ایسه عسکرینی اوچ فرقه به تقسیم و متعاقباً سوق ایش ایدو کندن سفر پاشا
 طاقی درجنک اول برنجی فرقه بی تارمارو فرقه ثانیه بی التجایه انبار ایدوب انلر ایله
 دخی مطارحه کار و زاره مسارعت و جمله سنی شاه اردوسنه ارجاعه غیرت ایتلریله بوقدر

فوز و ظفر ایله قناعت لازمہدن ایکن تہور ناججا ایله اردوی شاہہ دخی هجوم و اخشاہہ قدر جنک ایلدیلر شاہ عجم ابتدای خالدہ معسکر عثمانی عسکردن خالی اولمق زعمیلہ درت بش بیک سواری کوندرمش ایدو کندن سردار اکرمک یانندہ بولسان جیوش موظفہ عثمانیہ بونلری دفع ایدوب انجق حین عودت لرنندہ کرکی کبی زدہ لشمش و یورلمش اولان سفر پاشا عسکرینہ بالتصادف آغاز محاربه اولمغله امرانک بعضیلری دشمنی سوکوب اردویہ عودت ایدہ بیلدیلر ایسہدہ سفر پاشا و برقاج بکلر بکی و میرلوا مقتول و مأور اولدی بووقعہ عسا کر عثمانیہ موجب دہشت اولدینی خالدہ اخشامدن صکرہ اکراد بکلری عجم باصدی غلغلہ سیلہ پراکنندہ و پریشان و صنوف عسکرینہ دن پک چوغی دخی انلر ایله کریزان اولوب مؤخرأ بوشایعہ نک بی اصل و خدعہ دشمن اولدینی ظاہر اولمشیکن سردار اکرمک یانندہ ایکی اوچییک قدر یکیکچری و سپاہ ضابطان و نفراتندن بشقہ کیمسہ قالمدیغندن بالضرورہ مهمات و عسکری دودلرہ ارکاب و وانہ طوغری شتاب ایلدی شاہ عباس اردی ہمایونک عودتی کنبدوسنی طوتمق ایچون ترتیب اولشمش دسیسہ یہ حمل ایله بر مقدار ثانی اختیار ایتدکن صکرہ اردو کاهہ واصل و نقل اولنہ میان بعض اشیای خسیسہ یہ نائل اولدی .

(استطراد) دولت علیہ نک عسا کر موظفہ و منتظمہ سندن اولوب اوائلہ میرمیران و میرلوار معیتندہ خدمات عظیمہ یہ موفق اولان و مقدار و کمیتلری فصل سابقہدہ مسطور بولسان تیمارلو سپاہیسنک انحلال قانون و انتظاملری سبیلہ سورت و عددلرینہ ضعف و نقصان طریان ایلدیکندن بروقتدنبرو بکلر بکی و میرلوار لونڈ و سکیان نامیلہ دائرہ لرنندہ برطاقم حشرات استخدام ایدرلر ایدی بونلر دخی جلالیلرک برنوعی و بلکہ منبعی اولوب چونکہ برایکیوز نفرہ پیشوا اولان سکیان بلوکباشیلری قپوسز قالدینی و وقت حالی مساعد کوردیکی آندہ جلالی اولور و یا اولملارہ التحاق برلہ تخریب ممالک و غارت اموال عباداللہ ایله امرار ایام ایلر ایدی کہ بو عصرده ظہور ایدن جلالیلرک پیشواشی اولان قرہ یازیجی دخی ولایہ بلوکباشیلغندن آزمشدر کرک بو محاربه دہ و کرک سنہ سابقہدہ بودینان ہشتیہ عسکر امرار اولندقدہ قیریلان جیوش اسلامیہ بونلردن اولوب عسا کر موظفہ عثمانیہدن اولان ضایعات اقل قلیل ایدوکی روایت کردہ اکثر مورخیندر .

چقالہ زادہ مغموم و مکدر وانہ و آندن دیار بکرہ رجعت عقبندہ مرتحل دار آخرت اولمغله ارنق امرای عثمانیہ شروان و شماخی طرف لرنندہ بایدار اولہ مدیغندن اولحوالی دخی شاہ عجمک حکمنہ داخل اولدی .

جلالی اوزرینه سرعسکر تعین اولنان نصوح پاشا بولوادین قربنده طویل نام شقی ایله محاربه ایدرک منہزم و سبکبار استانبوله عازم اولوب بالذات پادشاه حضرتلرینک اناطولی جانبہ عزیمتاری مقتضیدر دیو شفاہا حضور هایونده عرض مافی الضمیر ایلدیکندن سلطان احمد خان حضرتلری بروسیہ عزیمت بیوروب یمشجی حسن پاشا وقعه سندبرو سرسری کزمکده اولان درت بیک قدر سپاہ و ساحدار چالقلرینک یعنی مطرودلرینک جرایم سابقہلری عفو و وظائف مقطوعہلری ابقا و ایفا اولتہرق نصفی نصوح پاشا و نصف دیگرى وزرادن داود پاشا معیتہ بالتعین جلالی تسلطنک رفع وازالہ سنہ مأمور واعزام بیورلدی و متعاقباً آستانہ علیہ عودت هایون واقع اولدی صدر اعظم لالا محمد پاشا استرغون فتحیلہ بکام اولدقدن و ویشغراد و پولاتہ و پسپریم کچی پانقہلری روم ایلی بکلیر بکیسی تریاکی حسن پاشا و بوسنہ دیر میرانی خسرو پاشا معرفتلیله تسخیر ایتدیر کدن صکرہ بلغرادہ عودت ایتشیدی ایران مادہسی و جلالی احوالی کسب مشکلات و اهمیت ایتک حسیلہ استانبوله دعوت اولنوب لدی الوصول عقد مجلس مشورت اولندقدہ وزیر رابع بولنان و قیوجی مراد پاشا نامیلہ مشہور انام اولان پیر صاحب شمشیرک نمچہ اوزرینہ و نصوح پاشانک ایران جانبہ سردار تعیینیلہ صدر مشارالیهک مرکز دولتمده اقامت ایلمسی قرار اشوب مساعدہ پادشاهی دخی ارزان بیورلمشیکن چغاله زاده وفاتندہ بوستانجی باشیلقدن قیودان اولان وذات شاهانہیہ فوق العادہ تقرب حاصل ایلان درویش پاشا شوقیلہ صدر اعظمک بالذات ایران اوزرینہ حرکتی ایچون اکید و شدید خط هایونلر صادر اولدقدن بشقہ بعض تویجات و تحقیرات دخی واقع اولدیغندن صدر مشارالیه بغایت متأثر و متکدر اولہرق بالاخرہ منزل و برقاق کون مرورندہ رحمت حقہ موصول اولغله مشارالیه درویش پاشا بیک اون بش سنہسی اوائلندہ صدر صدارتہ اعتلا و تقرب پادشاهیدن مستفید اولمق امنیہ سیلہ سانی زمانندہ حیدر پاشا صحرا سنده تہیہ اولنان اردوی هایونی دلی فرہاد پاشا نامندہ برنو ظہورہ اعطا و اناطولی جانبہ اسرا ایلدی انجق پاشای مزبورک حرکات مجنونانہسی جہتیلہ قونیہیہ وارمق سزین معیتہ مأمور اولان عسکر متفرق و پربشان اولدیغندن علت سبیب ایله صدر مشارالیه متهم و طمع و غرضدن عبارت اولان افعال سیئہسی دخی منتشر اولغله سنہ مزبورہ شعبانندہ حضور هایونده مقتول و مقام صدارتہ نمچہ اوزرندہ سردار بولنان قیوجی مراد پاشا موصول اولدی .

اکری قلعهسی اردل ایله مجارستان بالابینندہ واقع اولوب ممالک اسلامیه اوزاق

اولدیغنه واسترغون قلعهسی ایسه طونه کنارنده وبودینک اوست جانبنده ایدوکنندن الده بولندقچه بودینک تحت امنیت کاملده قالمیه جنی بدیهی ایدوکنه مبنی ابراهیم پاشا صدارتتده مذکور قلعه لمبادلله اولنق شرطیله عقد مصالحه اولنسی مذاکره اولدینگی حالده نیمچهلور راضی اولمامشلا ایکن اردل قومنک سلطنت سنییه تجدید تبعیت ایلمری اوزرینه بالضروره اظهار موافقته مجبور اولدیلر ایسه ده جانب دولت علیه دن بلا بدل استرغون قلعهسی طلب اولنغله ینه مصلحت تسویه پذیر اوله مامش اولدینگی حالده مؤخرآ استرغون قلعهسی دخی حرباً تسخیر اولندیغندن مصالحیه مانع قالمیوب فقط صدر عصر بولسان لالا محمد پاشا برکره حوزه حکومت اسلامیه کیرن قلعه لرك یعنی یانق قلعه سیله فیلک وسائر پلنقه لرك جانب دولت علیه تسلیمی وعموماً مجار قومنک پوچقای قرال زیر حکمنده بولنسی اساس مصالحه اتخاذ ایدرک بووجهله مذاکره صلح اولنمقده ایکن کندوسی استانبوله دعوت اولنغله ختام مصلحت مراد پاشایه حواله اولنشییدی .

عقد مصالحه نیمچه

ایران واناطولی احوالنک تنظیمی ایچون نیمچه مصالحه سنک بر آن اول بتورلمسی اقتضای حالدن کورندیکنه مبنی اساس مذکور دن فراغت اولنهرق بودین میر میرانی علی پاشا وقاضیسی هابل افندی نیمچه مرخصلریله استرغون ایله قومران بیننده واقع زیدود نام محله قایقار ایچنده بالاجتماع بدل صلح اولق اوزره نیمچهلور طرفندن ایکوز بیک غروش اعطا و اوچ سنه مرورندن صکره هر سنه هدیه مناسبه غیر معینه تقدیم قانمق شرطیله اون یدی ماده ویکرمی سنه مدت اوزرینه امر صلحی مذاکره وتنظیم ایلدیلر اون بش سنه تمتد اولان اشبو محاربه نك نتیجه سنده غالیت ومغلوبیت ومنافع وضایعاتدن طرفینه عائد اولان احوال بروجه آتی ایراد اولنور : اولاً سلطنه سنییه نك مرکز سلطنتی شویله طورسون اس الحركات عسکریه سی اولان بلغراد بیله معرکه کاه اولان مواقعه ایکوز ساعتدن متجاوز وویانه نك مسافه سی ایسه بوندن پک چوق ناقص اولق حسیله سوق عسکر ومهمات خصوصاتنده دولت علیه جه مشکلات برقاچ مرتبه افزون ایکن اوائل سفرده سنان پاشا زاده محمد پاشانک زیر اداره سنده بولنان برسر عسکر اردوسنک پریشانلغندن بشقه عساکر عثمانیه میدان محاربه سی انهمزامنه کرتار اولمیوب بالکس یانق واکری وقیره محاربه لرند نیمچهلورک اوچ عدد جسم اردولری بالکلیه قهر وتدمیر وكافه طوب وجهه خانه ومهمات خیامیه لری ضبط وتسخیر اولنشد .

نایاً برم تاریخلرده یانق تعبیر اواتان راب قلعه سیله استرغون واستونی بلغراد وپشته

قلعه‌لری برطاقم پلنقه‌لر بالدفعات طرفیندن ضبط واسترداد اولمش ایسه ده نتیجه حالد سلطنت سینه حدود قدیمه‌سندن اصلاً ضایعاته مبتلا اولمدقن فضله اگری و قنیزه و ایوار قلعه و سنجاقلرینی قلمرو حکومتته الحاق ومنشأ محاربه اولان بوسنه ایالتی دخی بهکه و بنالوقه طرفلرندن خلیجه توسیع ایشدر ثالثاً بومحاربه دن صکره افلاق و بغداد امارتلرنده مخالفت وعصیان اقتداری بالکلیه زائل ومملکتین مزبورده ایالات سائرده صره‌سنه داخل اولمغه دیوان هایون ترجمانلغی کی خدمات دولت علیه ده مستخدم اولان روم ماتی اکابرندن ویوده‌لر نصب وتعیین اولمغه باشلانمشدر

ضایعات بحثنه کلنجه اولا سلطان سلیمان زماندنبرو نمچه‌لورک سنوی اوتوز بیک التون ویرکو ویرملری مشروط ایکن هدیة غیر معینه‌یه منقلب اولدی ثانیاً هر نقدر سلطنت سینه بوسفرده غائب ایلدیکی نفوس وامواله مقابل کیتلو اسرا واموال غنایمه دسترس اولق حبسیله ملت اسلامیة‌نک ضایعاتی بومنافع جبر ایده بیلور ایسه ده سفر مزبور جلالیلرک ظهوریله اناطولینک خرابیسی استلزام ایلدی ثالثاً عجم شاهی دولت علیه‌نک نمچه‌لور ایله اوغراشمقده اولسنی فرصت اتخاذا ایدرک اذریحان وشروان الکالرینی استرداده قدرتیاب اولدی

سلطان احمد خان حضرتلرینک زاده طبع شاهانه‌لری اولان صالح تاریخی دخی مواد مشروحه‌یی مؤید اولدیغندن ثبت وترقیم قلمشدر .

بونجه بیلدر سرحدده ارسال ایلدم ❀ کرچه کوردم هر برینک خدمتی اعلا درر برزمان آسوده اولوب عسکره ایره نظام ❀ کیمسه‌یه قالمز کچر چون بیلورم دنیا درر مائل اولدم نیجه بیللر ایره سرحدده سکون ❀ رزمی بزم ایتسونلر انده نیجه برغوغا درر طوتدی راه کعبه‌یی خار مغیلان عدو ❀ انی اول پولدن کیدرمک دولت عظمادرر هم جلالیدن قرمان و سیواس اولسون خلاص ❀ خارجی خذی دخی لازم چو بر معنادرر رای صائب فکر ناقبده وزیر بی نظیر ❀ بولدم اما بوکار اوزره که مستشادرر عاقبت هاتف مراد پاشا ایچون ایدوب خطاب ❀ دیدی کوندر سرحدده اول عاقل ودانادرر خدمتکده حاصل ایشدر سنک ریش سفید ❀ بو مرادک اول مراده کرواره دنیا درر بوسرور اوزره انی سرحدده ارسال ایلدم ❀ سعی ایدوبدر خدمتمده هر نه کیم اولادرر بختیا باش اکدیرن قطع خراجیه دشمنی ❀ اولدی تاریخ حالیا جهد مراد پاشادرر

۱۰۱۵

اردل قرالی اولان اشتوان پوچقایی حقنده نمچه‌لورک عداوت و خصومتلری مرتبه کالده اولوب لکن حرباً برشیئه مقتدر اوله مدقلرندن علی روایة بعض وسائط ایله

تسمینه ظفریاب اولملریله مشارالیهک وصیتی اوزرینه همشیره سی دامادی اولان و قدیم مجار قراللری نسلدن بولان همون باطوری نام بکیزاده اتفاق امرای قوم ایله مقام قرالی یه انتخاب اولندیغنه و مقدا قرال متوفایه اعطا اولنان عهدنامه هایونده دخی مزبورک ولی عهدلکی مسطور ایدوکنه مبنی جانب سلطنت سنیه دن مشارالیهک قرالغی صدیق و نامه و تشریفات هایون ایله توقیر قلندی صدراعظم امر صاحی اتمام و بدل صاح اولان ایکوز بیك غروش ایله وارد اولان نمچه ایلیچینسی مستصحباً دارالسلطنه جانبه خرام ایدوب بیك اون الی سه سی اواخر محرمنده استانبوله واصل و ربیع الاولنده اناتولی احوالی تنظیم ایچون صحرای اسکداره مرتحل اولدی .

استیصال اشقیای جلالیان

چغاله زاده ایران اوزرینه سردار اولدقدده یوردلق و او جاقلق وجهله کلیس سنجاغنه متصرف اولان جانپولاد زاده حسین بکه حلب ایالتی توجیه ایتشدی سردار مشارالیه منهنماً وانه عودت ایدر ایکن مزبور حسین پاشا درتیک قدر منتظم عسکر ایله ملاقات ایسی عقبنده هنگام محاربه یه یتشمامک تهمتیله مقتول اولدیغندن حلب متسلمی اولان برادر زادسی علی بك رفع رایت عصیان ایلدیکنه بناء دفع غائله سی ایچون ایالت حلب میر مزبوره توجیه اولندیسه دخی تحصیل اطمینان ایدمه دیکندن واریاب عشیرت و عصیتدن و اصحاب ثروت و اقتداردن اولملریله عساکر موظفه عثمانیه یه تقایدا قرق بیك قدر سواری و پیاده جیوش منتظمه تدارک ایدرک شام و حص طر فلرینه اطاله دست تغابه متجاسر اولدیغندن صدر اعظم قلندر اوغلی و قره سعید و طویل کبی اوچر بشر بیك اشقیایله اناتولی یی تخریب ایلکده اولان جلالیلره عطف نکاه ایتیه رک اول امرده جانپولاد اوغلی جمعیتک طاغدمسی مقصدیله حابه طوغری عازم اولدی انای راهده و باخصوص قونیه ده اله کچردیکی اوفق تفک جلالی اشقیاسنی انداخته حفره انعدام ایتد کدنصکره حلب جوارنده وقوع بولان محاربه عظیمه ده منصور و مظفر اوله رق سواد اشقیایی قهر و تدمیر ایلدی بو محاربه ده روم ایلی و ایسی تریا کی حسن پاشا فوق العاده اظهار شجاعت و غیرت ایدوب خاتمه زیب دفتر خدمات اولغله پیرلکنه بناء و طلب واستدعاسنه ابتناء خواص وزارت ایله تقاعد احسان و جانپولاد اوغلی علی پاشا بعدالانهمزام فرار کنان درگاه پادشاهی یه دخیل دوشدیکندن عفو هایونه مظهر و طمشوار ایالتیه موقر قلندی اشبو بیك اون الی سنه سی خالانده قریم خانی اولان غازی کرای مطعوناً مرتحل

دار آخرت اولدقده امراسی پدری وصیتیدر دیرك اوغلی تخمشکرای مسندخانی به اصعاد ایله کیفیتی طرف شاهانه به عرض ایلدیلر ایسه ده بلا توجیه قاعد و سادۀ حکومت اولسی طرف سلطنت سنیه به کران کلدیکندن برمدت جلالی دلی حسن پاشا ایله کزوب بعده عفو هایونه نائل و اول زماندنبرو استانبولده مقیم اولان مرحوم مشارالیهک برادری سلامت کرای منصب خانی به واصل اولدی

صدر اعظم یکپیچری اوجاغنی معیتنده توقیف و طوائف عسکریه بی و بکر بکیاری مناسب موقعلره تقسیم ایدوب کندوسی حلبده مشتانشین اولمشیدی طرف پادشاهیدن معسکر هایونه کوندورلمسی لازمکلان خزینه دفتردار اتمکچی زاده احمد پاشایه تودیع و تقویه بازوی اقتداری ایچون روم ایلی والیلکی دخی علاوۀ مأموریتی قیلنوب ارسال اولندی ایسه ده پاشای مشارالیه ارباب حرب و قتالدن اولمدیغندن جلالی خوفیه یولی صاپدیروب انقره قلعه سنه داخل وایلرویه حرکت ایده بیلیمک احتمالی اولمدیغنی سمع سرداره واصل اولوب باخصوص بروسه و مغنيسا شهرلرینی واولحوالیده اولان سائر قصبات وقرانی یغما و تاراج ایدن قلندر اوغلی نوبت استیصال کندولرینه رسیده اولدیغنی درك ایله ضنادید جلالیانی رفاقتنه دعوت ایلسیله اوتوزبیک قدرشقی تحت امرنده مجتمع اوله رق خزینه بی اختلاس ایتیمک سوداسنده اولدقلری دخی استخبار اولندیغنه مبنی صدر اعظم عسا کر عثمانیه نك اجتماعنه باقیه رق و اواخر خمسینده حلبدن حرکت ایلدی جلالی سر کرده لرندن بعضیلری سردار اکرم ایله مقابله بی تجویز ایتیموب اناطولینک اوزاق یرلرینه جکلمکی تنسیب ایلدیلر ایسه ده برطاقی اردوی هایونده عسکرک قلتنی درپیش ایدرك محاربه به جرأت ایتدیلر بناء علیه کوکسن ییلاسنده مقاتله شدیده وقوعیه یکریمی بیک قدر کشتنی سردادۀ وادی عدم اولوب بقیۀ السیوف اولان اشقیا قلندر اوغلی ایله عجمستانه طوغری فرار ایلدکلرندن صدر اعظم تعقیبلری ایچون امرا و عسکر تعیین ایتدکن ماعدا کندوسی طقسان یاشنده برپیر ایکن اشقیانک تکرار بریرده مجتمع اوله ماملری قصدیه بالذات بش کون بش کیجه ایاغار ویتشدیکی اجلا فی قنطرۀ سیفدن امرار ایدرك انحق بر ایکیبیک قدر شقی حدود ایرانه داخل وبعدا زین نام و نشانلری صحائف روز کاردن زائل اولدی

مقدمای بغدادده بلو کباشلیق خدمتنده مستخدم اولان طویل اوغلی محمد نام شقی بالتدریج کسب قوت و مکنت ایدرك بغدادی ضبط ایلدیکندن تأدیب و تنکیلی ایچون وزرادن نصوح پاشا کوندردیلکی حالده موفق اوله میوب منهزما عودت ایتمشیدی صدر اعظم ایالت مزبورده بی رها مشتاسنده اولان چغاله زاده سنان پاشانک اوغلی محمود پاشایه توجیه و ارسال ایتمکه پاشای مشارالیه تدابیر حکیمانه ایله بغداد عسکرینی طرفنه جلب

ایدرك غائبی سهولتله دفع ایدوب صاعد و سادۀ حکومت اولدینی خبر مسرت اثری صدر صاحب تدبیرك مستزاد منظومۀ موفقیت واجلالی اولمغله رکاب هایونه دعوتله تلطف اولندیغندن بیک اون یدی سنه سی رمضانده استانبوله کلوب التفات پادشاهییه مظهر اولمشدر .

آیدین محصلی اولوب باشنده اوچ بش بیک لوند مجتمع اولان یوسف پاشا مقدما خواجه سلطانییه مکتوب کوندروب بکا وزارت احسان اولنور ایسه جلالی اشقیاسنک قهر و تنکیلی تعهد ایدرم دیمکله استدعاسنه مساعدۀ اولمش و پادشاه حضرتلری بروسه نی تشریف بیوردقلرنده رکاب هایونه دعوت قلنمش اولدینی حالدۀ حد ذاتنده جلالی سیرت وانلر ایله متحدالمزاج اولمغله نه اجابت ونه ده اشقیا اوزرینه حرکت ایلشدی برده ایچ ایل متصرفی اولان موصلی چاوش ید ضبطنده بولسان التی یدی قطعه قلعه نك متانتته و بولندیغنی مواقعك صرباغنه کوندهرك اوامر دولتی اصغا ایتمکده بولندیغندن بونلرك حالی اوزره براغلمسی ازسرنو جلالی جمعیتلرینك حدوث وظهورینی ایجاب ایدهجکی اشکار اولدیغنه مبنی صدر اعظم ظاهرا ایران اوزرینه کتمک شایعه سیله اسکدار محراسنه نصب سرادقات اجلال ایدوب وعد وعیدی متضمن مکتوب ارسالیله پاشای مزبوری اردوی هایوته دعوت و موصلی چاوشك اعمال لطائف الحیل ایله قتل و تدمیری ایچون قونیه والیسی ذوالفقار پاشایه ارسال تعلیمات ایلدی یوسف پاشا عدم اجابته جسارت ایده میوب باخصوص جلالیک صفتنی کندو اوزرینه قوندردیغندن بالضروره واصل معسکر هایون اولدقده صدر اعظم پک زیاده توقیر واحترام ومنصبه علاوة مغنیا سنجاغنی دخی توجیه و براتی اعطا ایتمکله اوهامنی ازاله ایدوب موصلی چاوشك نتیجه حالته مترقباً امرار وقت ایتمکده ایدی ذوالفقار پاشا مزبور چاوشی تأمین وقونیه یه جلب ایدرك فرصتی دوشوروب قتل و سرقطوعنی ارسال ایتمکله صدر اعظم دخی یوسف پاشای ازاله ایلدی پادشاه حضرتلری صدراعظمك ایران اوزرینه حرکتنی امر واولبابده ابرام ایلدکجه صدر مشارالیه مزبورلرك احوالی برطرف اولمقسزین حرکت موجب تجدید شقاوت اولور دیو اعتذار ایتمکده اولدیغندن حضور هایونه واروب پادشاهم بلاکلفه ایکی دشمن قوینك حقندن کلندی وارتق ایران اوزرینه کتمک مانع قالمدی لکن بوسنه موسم سفر کذار ایش اولدیغندن ان شاءالله تعالی سنه آتیده جانب شرقه عزیمت اولنور وبوسنه کی سفرمز دخی اسکدار سفری اولسون دیهرك بسط مقدمات معقوله ایتمکله مساعدۀ هایون ارزانی بیورلدی و صدر اعظم دخی ارکان دولت وطوائف

عسکریه ایله بیک اون سکز سنه سی شعباننده استانبوله نقل ایلدی .
قریم خانی اولان سلامت کرای بیک اون طقوز سنه سی ربیع الاولنده عازم ملک
جاودانی و قالغای بولانان جانبک کرای خان نائل منصب خانی اولدی خان مغفور بالدفعات
روس وله مملکتلرینی نهب و غارت و تحصیل ظفر و غالییت ایلشدر ،

سنه مزبورده اوائلنده صدر اعظم اسکداره کچوب تنظیم مهمات و تمیم لوازمات
ایتدکن صکره حرکت و اواسط شعبانده ارضرومه مواصلت ایدوب شاد عجمک تبریز
حوالیسندده اولدینی استخبار اولمغله اولجانبه توجیه موکب عثمانی ایدرک تبریزه وصول
بولدی ایسه ده عجم شاهی تبریزی تخلیه و تخریب و سرخاب نام جبال شاهقه یه صعود و تحصن
ایش اولدیغندن و اذربایجانک اعمار محافظه سیله اوغراشماق بیهوده اوله جفی امثالی دلالیه
معلوم اوله رق موسم شتا دخی تقرب ایلدیکندن اردوی هایون دیاربکر مشتاسنه عودت
ایلدی چونکه شاهان صفویه نك تا چالدران محاربه سندبرو اتخاذایتدکری قاعده عساکر
عثمانیه یی قوتلیجه کوردکجه مقابله دن اجتناب و مواقع توجهنی تخلیه ایدرک صعب المرور
محالرده ارام ایلك واردوی هایونک عودت و یاخود تفرقی وقوعنده فرصت دوشوروب
برشینه نائل اوله بیلمک صورتنه منحصر و دولت علیه نك مطالعاتی ایسه ممالک ایرانده
مذهب شیعی تأسس ایش بولندیغنه بمبئی حکومت صفویه منززل اولمقدجه ممالک عجمک
ضبط والده طومانی ممکن اوله میه جغندن بیسهوده تخریب ممالک و ازعاج اهالی ایله
اوغراشماق یالکیز خاندان صفویه نك شوکت و عصیتنی محو و ازاله ایلك مرکزنده
دائر ایدی بناء علیه بالدفعات میدان حربه دعوتی متضمن مکتوبلر کوندرلدی ایسه ده شاه
مشارالیه اورالره یناشمدی .

عقد مصالحه ایران

صدر اعظم اسکداردن حرکت ایدیلدنبرو شاه عجم نامه وایاچیلر کوندروب سلطان
سلیمان حدودی اوزرینه عقد صلح اولمق رجاسنده و سلطنت سینه دخی فرهاد پاشا
صاحی موجبجه تبریز و روان و شروان الکالرینک تسایمی دعواسنده اولدینی حلاله بوکرم
دیاربکر مشتاسنه وارد اولان نامه شاهیده طلب اولنان مملکتلرک ویرکوسی اولمق اوزره
محصولندن سنوی ایکیوز یوک حریر و سائر اشیا تقدیم اولمق شرطله عقد مصالحه اولمق
استدعاسی تکریر اولندیغندن صدر اعظم اغفال قصدیه صورت مماشات ارائه و کیفیتی
رکاب هایونه عرض ایدوب بیک یکر می سه نه سی اوائلنده دیاربکر صحرا سنه چیمشیدی

متعاقبا مرتحل دار آخرت و دیار بکر و ایسی نصوح پاشا نائل مسند صدارت اولوب
استراحت عسا کر منصوره نیتله التماس شاهه مساعده و عقد مصالحه اولندی صدر جدید
عسا کر مجتمعه به اذن انصراف اعطا و هدیة موعوده ایله عجم ایلچیسی چقنجه به قدر یدی
سکیز ای دیار بکرده آرام ایدوب بعده اشیای مزبوره ایله ایاجی پی مستصحا رکاب
هایونه واصل اولدی.

نمچه سفری ختامند نصکره مملکتین امارت لرینه مأمور اولنلرک جانب سلطنت سنییه
اطاعت و انقیاد لری درجه مطلوبه ده اولدیغندن رکاب هایون خدماتنده بولنان روم ملتی
اکابرندن افلاق و بغدادنه ویوده لر نصب و معیت لرینه اهل اسلامدن دیوان افندیسی و یکیچری
ضابطانندن بچلی اغاسی ویدی سکیز یوز قدر بچلی نفری تعیین اولنهرق سیواسدن معزول
کتانچی عمر پاشا مباشرتیه ارسال و مقرر امارت لرینه اقعاد اولنمشیدی مقدا بغداد بکی
اولان ارمیه نك زوجہ سی دومنه له پرنسسلرندن اولوب لهستانده کلی املاکی و ثروتی اولمغله
کبرای روسدن دامادی اولان قورسقی نام بکیزاده معرفتیه روس وله خلقندن اوتوز قرق
بیك عسکر جمع و بغدادنه هجوم ایدرک طرف دولتدن منصوب اولان استفان بکی فراره
مجبور ایلدیکندن تریاکی حسن پاشا کتبخدا لغندن نشأت ایدوب بوسنه بکلیر بکیملکندن
معزول اولان اسکندر پاشانک معیتنه طونه حوالیسندن عسا کر کافیه ترتیب و تعیینیه
بیك یگر می ایکی سنه سی اولجانبه اعزام اولندی پاشای مشارالیه بغداد ایچنده مزبور دنك
عسکر یله لیدی المقابله نائل فوز و ظفر اوله رق دومنه ایله دامادینی اسیر و رکاب هایونه
تسیر ایلکله استفان بك مقام امارتده کسب استقرار ایلدی.

اردل قرالغی مقامنده بولنان و باتوری نامیه مشهور حکمدار سلاله سندن اولان
باتوری غابور که دلی قرال نامیه معروف قدر غایت متهور و ظالم اولدیغندن امرای اردلک
اکثریسی اطاعتندن خروج و نمچه لولره میل ایلشای ایدی مظالم و تعدیاتندن رکاب هایونه
رفع رقعۀ اشتکا اولنمغله مقدا یمشچی حسن پاشا زماننده طرف دولت علیه دخالت ایتش اولان
وسالاه مزبور ددن بولنان بتلن غابور اردل قرالی نصب اولنهرق اسکندر پاشا و قالغای
سلطان و افلاق و بغداد و یوده لری قرال معزولک ازاله سیله قرل جدیدک نصبنه مأمور
اولملریله جمله سی طمشوارده مجتمع اوله رق تیمور قپو نام محلدن اردلستانه داخل اولدقلرنده
معزول مزبور وارات قلعه سنه تحصن ایلدیکنه مبنی قرال منصوب مرکز امارت اولان
اردل باغرا ندده تخت حکومته اصعاد اولندقدن صکره قرال معزول ذکر اولنان قلعه دن
چیقوب فرار صد دنده اعدام اولندی و طمشوار ملحقانندن ایکن سفر سابقده اردل

حکومتك زیراداره سنه كچمش اولان لیوود ویاوود نام قلعه لر کافی السابق طرف دولت علیه دن ضبط قلندی

نمچه لولرك اردلستان حدودینه تعرض ایتك تشبثاتنده اولدقلری قرال جدید طرفندن انها اولنمش ایسه ده انجق بواوانده نمچه معاهدات سابقه سی اون ایکی ماده علاوه سیله توثیق و تحکیم اولنمش و اردلستان حدودینه تجاوز قلنماسی دخی جمله شرائطدن بولنمش اولدیغندن بونك احتمالی اولمدیغی جواباً اشعار و مجدداً اردل حکومتیه اعطا اولسان عهد نامه هایونده دخی نمچه لولر ایله بعض مقاولات اجرا سنه رخصت ویریلوب فقط اردل ممالکندن كرك له و بغدادنه و كرك نمچه لولره قلعه صائلماسی درج و تسطیر قلندی

قزاق اشقیاسی شایقه تعبیر اولنور کوچك قایقلر ایله اوزی نهرندن چیقوب سینوب شهرینی تخریب و غارت ایلدكلری نیکبولی بککری بککسی و طونه سفینه لری قوماندانی شقشقی ابراهیم پاشانك مسموعی اولدقده اوزی بوغازینی بکلیوب اشقیای مزبور دنك عودتنده برآ و بحراً اوزرلرینه هجوم ایله الدقلری اموال و اهالی بی براقدر دقندن بشقه مقدار کلیسی تدمیر و بقیه سنی اسیر ایلدی لکن له دولتنك اراق اراق بغدادنه تعرض ایلدی و قزاق اشقیاسنه ارائه رخصتله قره دکنر ساحلارینی غارت ایتدیرمی موجب غضب پادشاهی اولدیغندن اسکندر پاشا له اوزرینه سردار تعیین اولندی پاشای مشارالیه بوسنه و روم ایلی ایالتلری عسکر یله حرکت واردل قرالی و مملکتین و یوده لری حسب المأموریه معسکر عثمانی یه مواصلت ایدوب طورله نهری کنارنده نصب سرادقات عظمتله نهر مزبور ك قارشو طرفنده بولسان له اردو سیله محاربه یه حاضر لنمقده ایکن لهلولر عقد مصالحه یه طلبکار اولدقلرندن بر صورتله اردل و افلاق و بغدادنه تعرض اولنماق و قزاق اشقیاسنك قره دکنر چیقملرینه مانع اولق وركاب هایونه وقریم خانه ویریه کلان ویرکو وهدایا وقت وزمانیه تقدیم قلنمق شرطلریله بیك یکر می القی سنه سی رمضانده عقد معاهده قلندی .

ظهور سفر ایران دیکربار

عقب مصالحه ده وارد اولان ایران ایلچیسنه ترفیقاً نامه هایون ایصاله مأمور اولان انجیلی مصطفی چاوشدن ایکی سنه یه قریب خبر وهدیه مقننه دن اثر ظهور ایلدیکنه مبنی ایران اوزرینه تکرار اعلان سفر اولنهرق نصوح پاشا قتلندن صکره وزیر اعظم اولان اوکوز محمد پاشا اردوی هایون ایله حلبه کوندریلوب اوراده مشتانشین اولمشیدی اگرچه مؤخرأ بورون قاسم نام عجم ایلچیسیله هدیة مشروطه نك و انجیلی چاوشك وانه واصل

اولدقلری خبر کلدی ایسه ده فسح عزیمته رخصت بیورلمدیغندن بیک یکر می بش سنه سی اولبهارنده حرکت وروان قلعه سنک محاصره سنه مباشرت اولندی ایسه ده بیوک طویلر استصحابنده قصور اولندیغندن اوچ آیدن متجاوز و قوعبولان محاربات نتیجه بخش مراد اولماغله صدر مشارالیه ارضرومه عودت خلانده سوء حرکت تهمتیه معزول و مقام صدارته سنین سابقه ده آقدکزده پک چوق قورصان کیلری فتح و تسخیر ایتیش و طرابلس غریبه علم افراز تغلب اولان سفر دایی بی اعدام ایش اولان قبودان خلیل پاشا موصول اولدی .

بیک یکر می التی سنه سی صدر جدید ایران سفری ایچون استانبولدن حرکت ایدوب قریم خانی جانیک کرای دخی رفاقت سرداره مأمور قلمش اولدیغندن خان مشارالیه ک ورودینه مترقباً موکب عثمانی دیاربکرده مشتانشین اولدی .

سلطنت سلطان مصطفی خان اول

اون دردنجی پادشاه عثمانی اولوب اون درت یاشنده جلوس ایتیش اولان سلطان احمد خان اول حضرتلری اون درت سنه سلطنت سوردکن صکره بیک یکر می التی سنه سی ذی القعدة سنک یکر می ایکنجی کونی مرئجل دار آخرت اولماغله بنا و انشاسنه موفق اولدقلری جامع معروفلری جوارنده اولان تره لرینه دفن قلندیلر .

شهریار مشارالیه ترك منهیات خصوصنده وزهد و صلاحده اسلاف عظاملرینه غالب و علی الدوام مادات و علما و فقرانک جلب خاطر لرینه راغب اولوب اهالی حرمینه و علما و منزویانه و باخصوص بروسه و ادرنه یه تشریف لرنده مطلع اولدقلری فقرایه بذل و ایشار بیوردقلری عطایا فوق ما یتصوردر حرمین شریفنک تعمیر و تزیناتی امرنده دخی پک چوق مال خرج و صرف ایدوب حتی پدرلری سلطان محمدک الی بیک التونه اشترا ایلدکلری شبچراغ نام الماسی ایکیوز یکر می یدی قطعه یاقوت و سائر ذی قیمت احجار ایله برالتون لوحه اوزرینه وضع ایتدیردرک وجه کریم جناب نبوی نشانه سی اولمق اوزره تقدیم ایش و باشنه طاقدیغنی صورغوجه قدم شریف رسم جلیلی ترسیم وزاده طبع شاهانه لری اولان اشبو قطعه بی تحریر و ترقیم ایتدیرمشلردر .

نوله جانم کبی باشنده کوتورسم دائم * قدیمی رسم درر حضرت شاه رسالک

کل کلزار نبوت او قدم صاحبدر * بختیا طورمه یوزین سور قدیمینه اوکلک

بختی تخلص بیوردرلر ایدیکه جلوس هایونلرینه دخی تاریخ واقع اولمشدر پادشاه

مشارالیه حضرتلرینک جمله محاسنندن بریسی دخی وراثت تحت دولت حقنده ترتیب اصول وقانون ایلمسیدر چونکه سلطان مراد اولک قوصوده محاربه سی عقبنده شهادتی وقوعنه مبنی یلدریم بایزید خان جلوس ایدوب دفع فتنه موهومه قصدیله برادری یعقوب چلبی پی ازاله ایلدیکندن صکرده لری بوبدعت سیئه تأسس ایلمشیدی یلدریم خان و سلطان بایزید ثانی شهزاده لری مثللو منصب وعسکر صاحبی اولوبده مقاتلاته جرأت ایدنلرک دفع غائله لری امر ضروری دیناسه بیله بوغدر عظیم سلطان سایم ثانی و سلطان مراد ثالثک سرای هایونده تک وتنها پیغوله نشین انزوا اولان معصوملرینه قدر سرایت ایلدیکندن عموم خلقه داغ درون اولمسنه مبنی اذهان انامی تسلیه ضمنتده نیجه افسانه لر ترتیب اولمشدرکه حالا السنه عوامده دوران ایدر .

شهریار مشار الیه حضرتلری برادرلری سلطان مصطفی یه تعدی ایتیوب یالکز شهزادگانک طشره مناصبه کوندرلمسی قاعده جاریه سنی الفا وارسال حیه وتولید ذریات ایتلمرینی منع ایله تحت سلطنتی اکبر شهزادگانه تخصیص ایتکله وصیت وترتیبلرینه توفیقاً برادرلری مشارالیه سلطان مصطفی تحت سلطنته اجلاس اولندی .

سلطنت سلطان عثمان ثانی

سلطان مصطفی خان اولک قوه میزه سی مفقود وحل وعقده عدم لیاقتی مشهود اولدیغندن بیك یکر می یدی سنه سی غره ربیع الاثنده اتفاق ارکان دولت ایله خامت سلطنت دوش بی اقتدارندن نزع واکبر شهزادگان احمد حانی اولان سلطان عثمان ثانی یه الباس قلندی .

بیك یکر می یدی سنه سی جهادی الاولیسنده صدر اعظم دیار بکردن حرکت ایدرک واندۀ قریم خانی جانبیک کرای خان ایله لدی الملاقات تبریزه واصل اولدقلرنده والیسی اولان قارچغای خان مملکتی تخلیه واهالیسنی اردبیل طوغری سوق ایلمش اولدیغنی تحقیق اولمغله مشارالیه جانبیک کرای خان بونلرک غارتی سوداسنه دوشدی دفتردار باقی پاشا وسائر کار آزموده اولان امرا اوتوز قرق ساعتک مسافه یه قدر ایاغار ایتک مخالف حزم واحتیاطدر زیراً مقاتله لازم کلور ایسه عسکرک یورغون بولمسی برفالنی موجب اولور دیدکلری حالدۀ کارکر تأثیر اولمدیغندن ناچار صدر اعظم برقچ بکلر بکی ترفیق ایدرک ارائه رخصت ایتکله ایکی کون ایکی کیجه ایاغار ایله اردبیله قریب سراو نام صحراده ایرانیلره یتشدیلر ایسه ده قارچغای خان بونلرک صورت هجوملرینی تحقیق ایلمش اولدیغندن

عسکرینک اکثریسی پوصولره قویمشیدی جیوش عثمانیه بلا انتظام وایلروسی ارقه سندن بی خبر محاربه یه مباشرت ایلدکلرنده پوصولرده اولان ایرانیلر بونلری اورتیه الدقلرندن و ذاتاً دخی یورغون بولندقلرندن قریم خانی و بعض بکلر بکیلر کوچ حال ایله اردوی هایونه عودته قدرتیاب اولوب ماعداسی مقتول و مأسور اولدی بونک اوزرینه معسکر هایونده عقد مجلس مشورت اولنوب چغاله زاده وقعسی منللو بر حادثه فجیعه ظهورندن احترازاً اظهار جلادت وایلرویه طوغری حرکت اولنق قرار پذیر اولمغله بر قاج کون کیدیلوب معرکه گاه اولان سراو صحراسنه نصب خیام آرام قلندی .

شاه عباس صلح نیازیه ایلچی و مکتوب کوندر مکدن خالی اولیوب بوکره اردبیلی وحقی شاهان صفویه نك مرقدلرنده اولان مجوهراتی بیله رفع و تخلیه اینش اولدینی استخبار اولندیغنه و ایران سفرلری تعب بلا فائده دن عبارت ایدوکی بوکره دخی تحقق ایلدیکنه مبنی نصوص پاشا زماننده عقد اولنان شروط موجبنه تجدید مصالحه یه موافقت اولندی و شاه طرفندن صدراعظمه و سائر وزرا و امرا یه کلیتو ذخائر و فوا که ارسال و طرف هایونه دخی هدیه مشروطه ایله برابر درت رأس فیل تقدیم قلندی .

بعده توقاده عودت خلانده صدر اعظم سکتة عزله کرفتار و قائم مقام بولنان صدر سابق محمد پاشا ثانیاً مهر هایونه کامکار اولمشدر .

بومصالحه حکمنجه دولت علیه اذربایجان و شروان الکالریخی الندن چیقاردی ایسه ده ویریلان عهدنامه هایونده ام المؤمنین حضرت صدیقه یه و اصحاب کریم و ائمه مجتهدین حضراتنه طعن اولنماق و جانب سلطنت سنییه تبعیتله وایه دار اولان شمشال و سائر حاکمان طاغستانه تعرض قلنماق و روسیه لولرک بحر حزر کنارنده انشا ایتدکلری ترک قلعه سنک قلع و قمع خصوصنه تثبث قلندقدده عسا کر ایران طرفندن مداخله و قوعبولماق شرطلریله حدود و سنوره دائر و سائر قیود لازمه درج و تسطیر قلنمشدر .

سلطنت سنییه نك آقدک زده ساحلدار و صاحب معامله اولان دولتلردن انکلترة و فرانسه و نیچه و ونديک دولتلرندن ماعداسیله مصالحه سی اولماغله اسپانیا و ایتالیا لولر طرفندن ترتیب و تجهیز اولنان سفاین حرییه و باخصوص مالطه اطه سی قورصانلری دائماً سفن اسلامیه بی نهب و غارتله مشغول اولدقلرینه و افریقا اهالیسی و بلکه بتون ملت اسلامیه اسپانیوللرک اندلس لولر حقنده متجاسر اولدقلری حرکات ظالمانه دن طولایي خصم قویلری بولندیغنه مبنی دولت علیه دخی مالطه و اسپانیا قورصانلرینه مقابل جزایر وتونس و طرابلس اوجاقلریخی احداث ایلدیکندن بونلر بیننده علی الدوام محاربات بحریه

ویکدیگری ساحلرینی غارت ویغما جاری اولمسیله برابر هر سنه دخی دونمای هایون آقدکزه
 چیقاریلوب ایالتا واسپانیاساحل وجزیره لر ی غارت ایتدیر یله رک اسرا و اموال غنائم اخذ یله
 طائفه عسکریه اغنا و مصر ایله استانبول بیننده امد و شد ایدن سفن اسلامییه پی ضبط
 واستیلایه فرصت بین اولان قورصانلرک دفع و تنکیلنه اعتنا قیلنور ایدی بنابرین طرفینک
 اللرنده یکدیگرندن التمش کلیتلو اسرا بولمغله صاحب قدرت اولنلری اعطای فدییه ایله
 تخلیص نفس ایدر لر و قدرت و سامانی اولیانلر بعضا مذکور او جا قیرجه و یاخود دولتجه
 مبادله اسرا دن مستفید اولور لر ایسه ده اکثر اوقاتده کملرده کورک چکمک خدمتیه
 بولنور لر ایدی اوروپا اهالیسندن غشیر نام کمنه اسلام اسیرلرینی بولندقلری یرلردن صاتون
 آلوب و لیلرینه بیع ایلمک تجارتیه کسب ثروت و ملت اسلامییه من جهة خدمت ایلدیکندن
 نقشه جزیره سنی دوقهلق نامیه التزام ایدوب نیچه مصالحه سنده دخی مستخدم اولمغله
 دولتجه تحصیل شهرت و نام ایلشیدی مؤخرأ بغداد و یوده لغنه طالب و بذل اموال ایله
 نائل مطالب اولوب ایکی سنه صکره عزلی واقع اولدقده لهولردن استغاثه ایله قرق الی
 بیک قدر عسکر جمع ایدرک اعلان عصیان ایلدی

دفتردار مشهور آتمکچی زاده احمد پاشا مشرف فوت اولدقده اوقافی تنظیم ایلدکن
 صکره یوزیوک اچه که عصر من حسابنه کوره تقریباً قرق بیک لیرای عثمانی ایدر افراز
 و دائماً اوزی نهرندن چیقوب قره دکز ساحلرینی غارت ایدن قزاق اشقیاسنک دفع
 مضرتلری ضمنتده اوزی قلعه سنک بناسنه صرف اولنخی وصیت ایلدیکندن قلعه مرقومه
 بنا و بندر و اقبکرممان و بوجاق سنجاقلری الحاقیه اوزی ایالتی تشکیل اولنه رق اسکندر
 پاشای غازییه توجیه قلمشیدی عاصی من بوزکوله اردوسنک تدمیری ایچون پاشای مشارالیه
 سر عسکر تعیین و قلغای سلطان ایله سلسیره بکلر بکیسی معیتنه ترفیق اولمغله بیک یکر می
 طقوز سنه سی نهر پروت قریبنده ترتیب صفوف حرب و قتال و اون سکز کون نأثره
 کارزار اشغال اولندی

لهولرده یارای مقاومت قالمدیغندن ناشی عودته مباشرت ایدوب لکن هجوم تاتاردن
 محافظه ایچون ارقلرینه عربیه لرینی دیزه رک کیدر لر و جیوش تاتار و عساکر جراردخی تعقیب
 ایدر لر ایدی بو حال ایله برقاچ کون ایچنده کچید باشی نام محله واصل اولدقلرنده طغیان
 نهر لهولره مانع مرور اولوب ذاتاً دخی حاللری پک پریشان ایدوکنه بناء نهر من بوزی بوزه رک
 کچن اوچ بش یوز لهلودن ماعداسی قنطره شمشیردن مرور ایلدی و بغدادنه فرار ایدن

عاصی غشبری دخی اهالی بغداد تبریه ذمت قصدیه قتل ایلدکارندن یکیدن ویوده نصب واقعا دیله مصلحت ختام پذیر اولدی

قیودان دریا بولنان کوزلجه علی پاشا اقدک زده فتوحات عظیمه یه نائل اولوب تسخیر ایلدی کی الی قطعه قالیون ایله در سعادت عودت و خا کبای پادشاهی یه اوموزلرنده برر کیسه غروش یعنی ریال ایله ایکوز اسیر تقدیمه مسارعت ایدرک مظهر الطاف هایون اولمغله صدر اعظم محمد پاشا استرقاب بلیه سیله النان کیلر تحت معاهده ده اولان فرانجه ووندیک سفینه لریدر دیه رک اعتراض وایلچیلری دخی دعوا یه اغرا ایلدی ایسه ده کارکر اولمدقندن بشقه عزلی استلزام ایتمکله قیودان مشارالیه صدر صدارته اعتلا ایلدی لیکن برقاج آی مرورنده فوت اولدیغندن بوستانجی باشلیقدن وزارت رابعه ایله اخراج اولنش اولان حسین پاشا مسند نشین صدارت عظمای اولدی

عزیمت سلطان عثمان بسفرله

لهولرک برقاج کره در بغداد اراضیسنه وقوعبولان تجاوز و تعرضلری و سلطان عثمان خان حضرتلری اجداد عالی نژادلری و تیره سی اوزره بالذات سفره کتمک طالب برپادشاه نوجوان ایدوکی جهتله موکب هایونلری لوازمک استحضارینی امر ایلدیلر بین الوکلا منعقد اولان مجالس مشورتده له دولتی پادشاه عالیجاهک اختیار کلفه حرکتیه دکر خصماندن اولمدیغی و سنه سابقه ده اسکندر پاشادن یدکاری سله قهر و تدمیر مرتبه کفایه ده کورنمیوبده بر درجه دها تربیه لری مراد پادشاهی ایسه وزران بریسینک مأموریتیه مطلوب حاصل اوله جنی بیان اولندی ایسه ده سلطان عثمان حضرتلری بالذات عزیمت خصوصنده اصرار ایتمکله بیک اوتوز سنه سی واسطنده استانبولدن تحریک رکاب شوکت و ایساحقیده قوریلان جسر دن طونه نهری مرور اوله رق خوتین قلعه سی جوارینه مواصلت بیورلدی له اردوسی قلعه مذکور دنک قربنده واستحکام ایچنده بولمغله هر طرفدن محاصره و مقاتله یه اغاز اولمشیه برابر ولایه اطرافک و باخصوص قریم خانی جانبک کرای خان ایله اردل قرالی بتان غابورک و مملکتین ویوده لرینک التحاقیه موکب هایونده پک کلیتو جمعیت حاصل اولدیغندن طرف طرف سوق غارتکران ایله لهستان سرتاسر تاراج ویغما اولنوب یالکیز یوز بیک نفر دن زیاده اسیر اخراج قلنمشدر فقط اداره امور حربیه دارالسعاده اغاسی سایان اغانک ید استبدادنده اولدیغندن برایدن متجاوز مدته دشمن اردوسی اوزرینه وقوعبولان یوروشلر نتیجه پذیرا و ملیوب موسم شتا دخی تقرب ایتمکده بولندیغندن

لهولورك افلاق ويوده سي واسطه سيله عرض واسترحام ايتمكده بولندقلرى مصالحه خصوصه مساعدۀ سنيه ارزاني بيورلمغله مقتول غشبر ويوده نك لهولوره تسليم ايلديكي خوتين قلعه سي جانب دولت عليه يه رد اولتمق شرطيله بروجه معاهده سابقه ترك محاربه اولنهرق موكب هايون بيك اوتوز برسنه سي اوائلنده دارالسلطنته السنيه واصل اولدى

وقعة مشهوره عثمان خان شهيد

سلطان عثمان خان حضرتلرى له سفرنده مظفريت كامليه نائل اوله مديغنى طوائف عسكريه نك غير تسزلكنه حمل ايله منفعل اولديغندن دارالسعادة اغاسى وخواجه عمر افندى وحرم اغالرى سوقيله عربستانه كيدوب فارسان عربدن عسكر ترتيب وانلر ايله يكيچرى وسپاه طائفه سنى تاديب ايتك قيدينه دوشديكنه وخوتين سفرنده حسين پاشا اوزرينه صدر اعظم اولان دلاور پاشا دخى اداره امور دولتن غافل ساده دل بر آدم اولديغندن بودرد جانكاهك ايدفاعنه چاره بولدمديغنه بناء پادشاه حضرتلرى حجه كتك شايعه سيله استحضار لوازمه مباشرت ايدوب اركان دولت هر نقدر منعه چالشديلر ايسه ده مفيد اولدى

نهایت سنه مزبوره رجبك سكرنجى كوفى سپاه زوربارلى سراى هايونده مجتمع اولوب پادشاهى بومقوله افكار مضربه سوق ايدن صدر اعظم ودارالسعادة اغاسى وخواجه عمر افندى ايدوكندن بولرك قتلى مطلوب بمزدر ديهرك ولوله ساز اولمقده وصدور عظام تسكين فته ايجون مزبورلرك فدا ايدلمسنى پادشاهه نصيحت ايلدكجه اظهار غضب وعناد بيورلمقده ايكن سلطان مصطفى يي ايسترز ديو بر اوازه ظهور ايتمكله طوغانجى باشى دلى دروېش رهنالغى ايله مشاراليهى چيقاروب علمايى اجراى رسم بيعته اجبار ايلديلر بوخبر سلطان عثمانه واصل اولدقده صدر اعظم ايله دارالسعادة اغاسى عسكركه تسليم ايلديكندن پاره پاره ايلريله برابر ايش ايشدن كچمش بولنديغنه مبنى سلطان مصطفى يي الوب يكيچرى قشله لرى وسطنده واقع اورته جامعه كوتورديلر سلطان عثمان اول كيجه يكيچريلره دخالت قصديه صدر اعظم نصب ايلديكي حسين پاشانك تدبيرى وجهله اغا قپوسنه عزيمت ايتدى ايسه ده يكيچرى طائفه سى حسين پاشايى وكندولرينه نصيحته اغاز ايدن يكيچرى اغاسى اعدام وسلطان عثمانى دخى اورته جامعه ايصال ايلديلر سلطان مصطفى طرفندن صدر اعظم نصب اولنان داود پاشا خائى عثمان خان بر كشته اقبالى بر چارشو عربيه سنه قويوب يدى قله يه كوتوردكدن صكره كندوسى ومعلوم الاسامى برقاج

عونه خونه سی مباشر تلریله شهید ایلدی سلطان عثمان اون درت یاشنده پادشاه اولوب غرور جوانی و سؤقرین القا آتی ایله نامناسب ایشلره جرأت و باخصوص کیجه لری قوله چیقوب میخاه لر باصه رق طوائف عسکر یه دن بولدیغنی اعدام ایده کلدیکنه و طریق علمیه رجالک ارپه لقلرینی رفع ایلدیکنه مبنی هر طرفدن مظهر دشنام و نفرت اولمغله درت سنه دن متجاوز سلطنت سورد کدن صکره بو فلاکته مبتلا اولدی و خوتین سفرینه عزیمت ایلدکاری ائاده بی جرم و کناه قتل ایلدیکی برادری سلطان محمدک بدعاسنه اوغرا دی

سلطنت ثانیة مصطفی خان اول

سلطان مصطفی نک اداره امور سلطنته مجرب اولان اقتدار سزلانی جهتیله طائفه عسکر یه فوق العاده یوزه چیقار ق تا صدارت عظمادن مناصب صغیره یه قدر عزل و نصب خصوصنی وسائر اموری یدتغلبلرینه الدیلر ایسه ده خیانت ولی نعمت ایله هر جانبدن مظهر لعن و طعن اولدقلرندن برایکی دفعه صدر اعظم داود پاشایه هجوم و بز سلطان عثمانی امانت ویرمشیدک نیچون قتل اولندی دیو غوغایه اغاز ایدرک بالاخره یکر می سکز کون مرورنده خائن مزبورک عزلی وقوعندن صکره ایوب سمتده مختفی اولدیغنی محلدن چیقاریلوب بالتصادف شهید مشارالیهی بندردیکی عربه ایله یدی قله یه ارسال و اخناق ارلندیغنی مثللو مباشر قتل اولان سائر خائنلر دخی اعدام اولمش و فقط دلی درویش مقدجه طمشوار میر میرانغیله کتمش و اوراده آتدن دوشوب کبرمشدر

سلطنت سلطان مراد خان رابع

سلطان مصطفی نک اون بش آی قدر متمد اولان اشبو سلطنت ثانیه سی اوانی انواع شورش و اختلال ایله مرور ایدوب داود پاشادن صکره مره حسین پاشا و لفککلی مصطفی پاشا و کورجی محمد پاشا و تکرار مره حسین پاشا متصدی امور صدارت و بالاخره کما نکش علی پاشا نائل مهر وزارت اولمغله اصلاح عالم برپادشاه عاقل و قاهره محتاج ایدوکنی درپیش ایدرک اتفاق ارکان دولت ایله بیسک اوتوز ایکی سنه سی ذی القعدة سنک اون دردنجی کونی اکبر شهزادگان احمد خانی اولان سلطان مراد خان رابع حضر تلرینی تحت عالیبخت عثمانی یه اجلاس ایلدیلر

سلطان مصطفی ینه مسکن قدیمه عودت ایدوب اون التی سنه صکره مرتحل دار آخرت اولمشدر سلطان احمد حضر تلرینک ارتحال لرندن برو درت بش سنه ایچنده اوچ دفعه جلوس بخششی ویرلدیکه هربری عصر من حسابنه کوره تقریباً برملیون لیرای عثمانی یه بالغ اولور

ایلدی بوسبیلله وباخصوص سلطان مصطفیٰ نك والدیسی بقای مسند فرزند زعمیلله بغاۃ عسکره پك چوق التون اعطا ایش اولدیغندن خزینة هایونه ضعف کادیکنه مبنی سلطان مراد حضرتلرینك تصمیم جلوسلرنده بخشش طلب اولنماق اوزره طوائف عسکریه ایله مقاوله اولنش ایکن نقض قراره ابتدار وطلب عطیه ایله ارکان دولتی یزار ایلدکلرندن بالضروره مقطوعاً برر مقدارشی اعطاسیله اسکات اولندیلر

استیلای شاه عجم بشهر بغداد

بغداد والیسی یوسف پاشا تسامح ولایه سابقه ایله بغدادده کسب قوت واقتدار ایدن عسا کر سرکرده لرنده بکر صوباشینك قتل واعدامنه تثبث ایلدی ایسده عکس قضیه ظهوریله پاشای مشارالیه وادی عدمه عائد وبکر صوباشی مسند حکومته صاعد اولدیغی خبری عصر مصطفیٰ خاتیده وارد اولدقده دیاربکر والیسی حافظ پاشا سرعسکر تعیین وارسال اولمشیدی مشارالیه معیتنه مأمور عسا کر ایله بغداده واصل اولوب محاربه ومحاصره یه آغاز ایشیکن بکر صوباشینك استعانه واستحسانه مبنی شاه عجمك كلك اوزره ایدوکی زبانکندار ودرود بغدادده شاه نامه خطبه قرائت وسکه ضرب اولنغه مباشرت قلنه جفی استخبار اولنغه حافظ پاشا غائله عظیمه حدوثندن احترازاً ایالت بغدادی بکر صوباشی یه توجیه ایدرك دفع مبانیت ایلدی بکر صوباشی دخی وظیفه تشکری ایفا وفقط تحصیل اطمینان ایچون حافظ پاشانك عودتی رجا ایتمکله سرعسکر مشارالیه دیاربکره رجعت ایلدیکنی متعاقب شاه عباس عسا کر وافیله جوار بغداده رهبت بخشای ورود اولدی بکر صوباشی مظهر عفو ولطف پادشاهی اولدیغی اشعار وتقذیم هدایا ایله عرض اعتذار ایلدکده شاه مشارالیه اظهار غضب ونخوت وبغدادی محاصره یه مباشرت ایدوب لکن محاربه ایله واصل امل اولق مشکل وبلکه ناقابل اولدیغی تیقن ایلدیکندن بغداد حکومتی وعد ایله بکر صوباشینك اوغلی محمدی جلب واقناع ایلدیکنه مبنی مزبور محمد بر کیجه مأمور محافظه سی اولدیغی قیوی آچوب عجملری ایچرویه المسی جهتیله دارالسلام بغداد کرفتار ایادی سرخسران اولدی شاه مشارالیه سنیلر حقنده انواع جور واهانتیه آغاز ایدوب بکر صوباشی بی دخی درلو اشکنجه لر ایله اعدام وبش اون کون صکره اوغلی مزبور محمدی دخی گنام ایلدی

ابازه پاشانك عصیانی

عثمان خان شهید ووقعه سندن صکره قپوقولی عسکرینك کسب اشتداد ایدن ادبسر لکلری

اطرافده بولنان ارقداش لرینه دخی سرایت ایلدیکندن ارضرومده بولنان نوبتجی یکیکچریلری والی ولایت اولان ابازه پاشایه رعونت اظهار ایده کلر یله پاشای مشارالیه عتو و طغیان لرینه طاقت کتوره مدیکندن برتقریبله مزبورلری قلعه دن چیقاروب اکثریسی اعدام ایلدی لکن بوماده دولتجه معفو طوتلسه بیله اوجاقلونک الحاح و ابرامیه مظهر موأخذه اوله جغنی بیلدیکندن عثمان خان شهیدک اخذ ناری شایعه ابله فریبانه سیله رایت کش عصیان اولوب جمع ایده بیلدیکی اوتوز بیک قدر اوباش واجلاف ایله راست کلدیکی یکیکچری و درگاه عالی سپاهیلرینی قتل و افنا ایدرک سیواسه طوغری یوریدی و مرعش و قره حصار شرقی و سیواس و الیرلی اولان قلاون یوسف پاشا و مرتضی پاشا و طیار پاشایی و سائر برطاقم امرایی خواه ناخواه کندوسنه التحاقه اجبار ایدوب مؤخرأ یوسف پاشایی مرتضی پاشانک صنیعه سیله اعدام ایلدی

صدراعظم کانکش علی پاشا جلوس مراد خانیه باعث اولق مزیتله کسب اقبال و استقلال ایدوب لکن طمع بلاسیله هدف سهام انام اولدیغندن مقتولا عازم ملک جاودانی وقائد الجیش شهدای وزرای مراد خان اولوب خاتم وکالت ایله دیوان هایون و زراسندن چرکس محمد پاشا کامکار و ابازه پاشا فتنه سنک دفعنه سردار عسکر جرار اولمغله بیک اوتوز درت سنه سی اوائلنده اسکداردن حرکت و قیصریه قربنده عسکر جلالی ایله ترتیب بزم رزمه مباشرت ایدوب یکیکچری طائفه سی ازوقت ظرفنده خصم جانلری اولان ابازه پاشا سکیانلرندن اون بیک قدر شقیی نشانه تفنک انعدام و بالضروره ابازه پاشایه عرض تابعیت ایدن مرتضی پاشا و طیار پاشا دخالت کنان جانب اردوی هایونه عطف زمام ایتلمر یله ابازه پاشا منهزما ارضرومه فراره مجبور اولدی صدراعظم اردوی هایون ایله ارضرومه ایکی مرحله قالدقده ابازه پاشا عفو جرایم رجاسیله دامنکیر استرحام اولدیغندن دفع مشغله امور داخلیه قصیدیه مظهر عفو عالی اولوب ارضروم قلعه سنه ایکیدیک نفر یکیکچری وضع اولنه رق بغداد سفری مهماتی استحضاری ایچون صدر مشارالیه توقاد طرفلرینه عودت ایلدی. مقدمات سلامت کرای خانک قالغایی ایکن فرار ایدوب استانبولده و مؤخرأ ردوسده توقیف اولنان محمد کرای عصر مصطفی خانیده صدراعظم مره حسین پاشا سوقیله جانبک کرای اوزرینه قریم خان نصیب اولمشیدی سلطان عثمان زماننده دارالسعادة اغالغندن معزول اولان مصطفی اغا مصره کیدرایکن ردوسده مشارالیه محمد کرای ایله کورشده کده سایقه رنجش ایله خان مزبور اغای مرقومه بعض مرتبه توبیخ و دشنامه اغازایلش اولسیله سلطان مراد خان حضر تلمری جلوسنده مصطفی اغا تکرار دارالسعادة اغالغی ایله بکام اولدقده

احداثه قیام و محمد کرای مسند خاییدن عزل ایله ثانیاً جانبیک کرای خانی نصب ایتدیره رک تحصیل مرام ایدوب لکن خان جدیدی اجلاس ایلمک مأموریتنه تعیین اولان قپودان رجب پاشا ووزرادن ابراهیم پاشا کفهدن ایکی مرحله ایلرولده کده معزول محمد کرای وقرنداشی شاهینکرای عسا کر کلیه ایله قارشولیوب وقوعبولان محاربه ده عسا کر عثمانیه منهزم و ابراهیم پاشا ایله خیلی عسکر منعدم اولمغله قپودان پاشا و جانبیک کرای کوچ حال ایله دونمایه وطائفه تاتار غالبانه کفته یه داخل اولدیلر ارتق بونک اوزرینه قپودان پاشا طرفدن محمد کرایه ابقا فرمانی و خلعت خسروانی ارسال اولنهرق ید اختلاسندده اولان کفه قلعه سنی و هنکام محاربه ده الدینی طویلر واسیر ایتدیکی جنود عثمانیه تخلص ایدیلهرک دونمای هایون استانبوله عودت ایلدی و بو او یغونسزلغه باعث اولان دارالسعاده اغاسی مصطفی اغا کدرندن فوت اولدی .

صدر اعظم چرکس محمد پاشا سفر بغداد تدارکاتیه مشغول ایکن مرتحل دار عقبا اولدیغندن خاتم صدارت دیاربکر والیسی حافظ احمد پاشایه احسان واعطا اولمغله مشارالیه هیئت اردوی هایونی دیاربکره جلب وتنظیم مهمات ایلد کدنصکره جانب بغداد عطف زمام و بیك اوتوز بش سنه سی اوائلنده پیرامن زوراده نصب سرادقات احتشام ایلدی .

سفر بغداد

کورجستان ملکی طهمورس خان اوزرینه شاه عجم اوتوز بیك قدر عسکر سوق ایدوب ایکن برطار بوغازده کورجیلر مذکور عجملری وقوماندانلری اولان قارجغای خان و امیر کونه خانی تدبیر واستیصال ویدی بیك قدر رؤس مقطوعه ایله یکر می نفر زنده ایرانی پی اردوی هایونه ارسال ایلد کدرندن سردار مشارالیه بر مقدار عسکر اعزامیله طهمورس خانه اغانه ایدوب اولجانبیدن عجملری تضییق وتخفیف و کندوسی دخی زهاب بوغازندن ممالک ایرانه دخول ایله غارات وتخریب ایتمک و ذکر اولنان بوغازی طوتوب عسا کرایرانی بغداد طرفه کچیر مامک و بو جهتله بغدادی بر اقدیر مق قیدینه دوشدیکنه و هیولای مطالعاتنه صورت بخش وثوق وامنیت اولدیغنه مبنی بیوک طویلر ولوازمات قلعه کیری استصحابنده قصور وغفلت ایلشیدی موصله لدی الوصول عقد اولنان مجلس عمومیده بالجمله وزرا و امرا وطوائف عسکریه ضابطانی بغداد محاصره سنه عزیمتی رأی وتنسیب ایلد کدرندن منوی ضمیرینی اظهار واجرایه قادر اوله مدی حتی مجلس مشورتده بغدادک انختارلری جیمده در دیدیکی شایع اولدیغندن بغداد پیشگاهنه نزول اولندیغی کون قلعه دن طوپ وتفنک انداختیله

مدافعه‌یه اغازولندقدمه سپاه زورباری آلا بغدادك اختارلرینی دیهرك استهزایه جرأت
ایتدیلر موجود اولان بر قاج قطعه كوچك طوپ امر محاصره‌یه کافی اولماق حسیله
استانبولدن وبصره قلعه‌سندن بال یمز طوپلر جلب اولنوب یدی سکز آی حرب و قتاله
اهتمام قلندی ایسه‌ده شاه عباس التمش بیك قدر کزیده سپاه ایله نهر دجله کنارینه نصب
خیام آرام ونوبنو محصورینه امداد واعانه ایله تلفاتلرینی آتام ایده‌کلیکندن بشقه جابجا
اردوی هایونه دخی هجوم وصولت ایتمکه شاهد فتح و ظفر ایننه قدرده جلوه کر اولمدی
لکن شاه مشارالیه دخی سلطنت عثمانیه‌نک بروجهله بغداددن واز کچمیه جکنی درك ایتمکه
تسلیم بغدادی اساس مصالحه ایدرك بعض شرائط ایله عقد معاهده‌یه راضی اولوب اقتضای
مصاحبت بالمخابره قرارلاشمق اوزره ایکن سپاه زورباری قحط وغلا وتعفن هواسبیلریله
عودت خصوصنده اصرار و صدر اعظم حقنده بی ادبانه حرکت باغیانه اظهار ایتلریله نقلنه
امکان مساعد اولیان بیوک طوپلر زیر آب و ترابده ستر اوله‌رق بالضروره عودت اولندی
حافظ پاشا عدم موفقیتندن طولای معزول و صدر اسبق خلیل پاشا بیك اوتوزالتی سنه‌سی
ربیع الاولنده مقام صدارته موصول اوله‌رق اردوی هایون جانبنه راهی اولغله حلبده
تنظیم مهمات سفریه ایله مشغول اولدی .

ظهور سفر نمچه

اردل قرالی بتلن غابور ایله نمچه‌لور بیتنده محاربه اکسک اولیوب بعضاً دخی امرای
سرحد اسلام طرفندن قرال مشارالیه اعانه اولندیغندن دولت علیه ایله اوستریا دولتی
بیتنده منعقد اولان مصالحه قرین اختلال اولغله نمچه‌لورلك اللی بیك عسکردن مرتب
براردوایله متهای حدود عثمانیه اولان استرغون جوارینه کلدکاری بودین والیسی مرتضی
پاشانک مسموعی اولدقدمه سرحدات اسلامیه عسکرینی جمع و قرال مشارالیهی دخی جلب
ایدرك دفع دشمن ایچون اولجانبه حرکت ایلدی نمچه‌لورلاستحکام التنده اولدقلری حالده
بر آی قدر محاصره اولنوب قلت زاد و امتداد مقاتلات سبیلریله جیوش دشمنک نصفندن
زیاده‌سی رهرو وادی عدم اولوب بقیه‌سی فراره مجبور اولدی بونک اوزرینه امر حربک
علوکر اشتداد اولماسی طرفیندن التزام اولندیغندن بیك اوتوزالتی سنه‌سی رجب‌نده پاشای
مشارالیه معرفتیه مصالحه تجدید و بکرمی بش سنه مدتله تحدید قلندی .

صدر اعظم حلیل پاشا بغداد سفری نیتیه حلبدن حرکت و دیار بکره مواصلت ایلد کده
ایرانیلرك اخسخه‌نی محاصره ایلدکلرینی بالاستخبار ارضروم والیسی ابازه پاشایی سر عسکر

نصب ایدوب معیتہ بر قاج بکربی تعیین ایلدیکندن ابازہ پاشا دخی ارضروم صحراسنہ اردو قوروب معیتی مأمور لرینک ورودینہ مترقب ایکن صدر مشارالیه خدمت سرعسکری بی وشلنک حسین پاشایہ تقویض و تحویل ایلدیکنه و ابازہ پاشا ایسه وقعہ سابقہ دن طولایی طرف دولتدن مستشعر اولمغله بوماده بتون بتون سلب امنیتنی موجب اولدیغنه مبنی دفعہ ثانیہ اوله رق رفاقتنده بولنان یکیکچریلری قتل و اعدام و مشارالیه حسین پاشایی دخی کنام ایلدیکی استماع اولندی بنابرین تقدیم اهم قاعده سنجہ اردوی هایون ارضرومہ دوندیریلوب بر آئی قدر ابازہ پاشا محاصره اولنش ایسه ده تسخیر قلعه ممکن اوله مدیغندن و موسم شتا دخی تقرب ایلدیکندن صدر مشارالیه توقاده عودت حلالنده عدم موفقیتدن ناشی بیک اوتوزیدی سنه سی رجبندہ مهر وکالتدن جدا و سلحدارلقدن یکیکچری اغالیله چیقوب بغداد سفرندن صکره معزول و متعاقبا قبه وزارتنه موصول اولان بوسنه لی خسرو پاشا نائل مسند صدارت عظما اولدی ابازہ پاشا خلیل پاشانک سلحدار لغندن نشأت ایتمش اولدیغندن مشارالیهک صدارتی ابازہ پاشانک استمالت و حسن استخداننه مبتنی ایکن عکس قضیه ظهوره کلدی .

قریم خانک تبدیلی

قریم خانی محمد کرای وقعہ سابقہ دن صکره اوامردولته چندان التفات ایتدیکندن بشقه اطرافه تعرضه باشلا دیغنه و ازان جمله اوزی قیرنده متوطن اولان امرای تاتاردن قاتمر میرزا اوزرینه برادری شاهینکرای کوندروب میرزای مزبورک خانمانتی تخریب و تنکیل ایتدیردیکنه مبنی نائره عتو و طغیاننه سد اولمق مطالعه سیله قاتمر میرزایه سلستره ایالتی توجیه و عسا کروافیه ایله بازوی اقتداری تحکیم اولنشیدی خان مشارالیه تکرار مزبور شاهینکرای یکرمی بیک قدر تاتار ایله ارسال ایتمکله طونه نهرینی مرور و دوبریجه اوہ سنده قاتمر میرزا ایله آهنگ جنک و شرور ایتمش ایسه ده انہزام فاحش ایله منہزم و عسکرینک اکثریسی منعدم اوله رق قوت و سطوتلرینه خلل تطریق ایلدی بونک اوزرینه جانبک کرای خان بوکره دخی قریم خانغیله اجلال و دونمای هایون ایله کفیه ارسال اولنوب طوائف تاتار دخی تلقی بالقبول ایللریله بلا محاربه تحت قریمه جالس اولدی دونمای هایون عودتندن صکره محمد کرای باشنه جمع ایلدیکی نوغای و قزاق اشقیاسیله تکرار جانبک کرای اوزرینه هجوم ایلش ایسه ده وقوعه بولان مقاتله ده مقتول و برادری شاهینکرای فراره مجبور اولوب بش التي سنه سرسری کردکدن صکره بالضروره طرف دولته دخالت ایلدکده ردوسده اقامه قلنمش و مؤخرآ قتل اولنشدر مشهور غزل مصنع اشبو شاهینکرایکدر .

صدر اعظم خسرو پاشا ابازہ پاشا غائلہ سنک دفعی ضمنندہ جانب ارضرومہ تحریک طوغ و علم ایدوب ترجان صحرا سنہ واصل اولدقده ابازہ پاشانک وقوعبولان استمدادینہ مبنی اون بش بیک قدر ایران عسکر یلہ شمس خانک ارضرومہ کیرمک اوزرہ اولدیغنی استخبار ایتمکله قارص بکار بکیسی سفر پاشایی کوندروب بالمحاربه عسا کر مزبورہ بی تدمیر و شمس خانی اسیر ایتدیردکن و قرق کون محاصره ایله ابازہ پاشایی استیمانه اجبار وارضروم قلعه سنی بالتعمیر عسا کر وافیہ وضع ایلدکن صکرہ ابازہ پاشایی مستصحبابیک اوتوز سکز سنہ سی اوائلندہ استانبولہ واصل و انواع التفات سلطانی یه نائل اولدی ابازہ پاشا دخی مظهر عفو و صفح پادشاهی واولا بوسنہ ومؤخر اوزی ایالتلریلہ قرین الطاف شهنشاهی بیورلدی .

سفر صدر اعظم خسرو پاشا بایران

سنہ مزبورہ وواخرندہ صدر مشارالیه جانب ایرانہ سوق موکب عظمت ایدوب اناطولینک مواقع عدیدہ سنده حادث اولان جلالی اشقیاسی بقیہ سنی کشتہ تیغ سیاست ایدرک موصلہ وصولندہ قرق اوچ سنہ فرمان فرمای ایران اولدقدن صکرہ وفات ایدن شاه عباسک یرینہ حکمران ایران زمین اولان حفیدی شاه صفینک همدانده اولدیغنی و قرق بیک قدر کزیده سپاہ عجم ایله زینل خانی محافظہ حدود ایچون ارسال ایلدیکی استخبار اولنمغله صدر اعظم دخی حلب بکار بکیسی نوغای پاشایی سرعسکر نصب و معیتہ برقاج بکار بکی و اوچ بیک یکچیری ایله قول کتخداسی مصطفی اغایی ترفیق ایدرک مقابله یه اعزام ایلدی اغای مومی الیه بغداد فتخنده صدر اعظم اولان مشهور قرہ مصطفی پاشادر مهربان قلعه سی جوارندہ واقع اولان مقاتلہ شیدده اوتوز بیکہ قریب عجم قتل و تدمیر اولنوب بقیہ السیوف زینل خان ایله درکاه شاهہ واصل اولدقده خان مزبور شمشر سیاسته کرفتار و شاه دخی عازم سمت فرار اولدی .

صدر اعظم بلا مزاحم کشور ایرانہ داخل اولوب همدان ودرکزین و نهاوند و سائرمدن وقرایی تخریب و یغما ایتدیروب شاه عباسک بغدادی استیلاسنده متصدی اولدیغنی قتل و غارتہ بروجه اتم اجرای مجازات ایلدکن صکرہ تختکاه شاهان اولان اعفهانہ طوغری هجوم اولنمق تقرر ایتمشیکن وارد اولان خط هایون قطعی المفاد موجبنجه مقصد اقصى اولان بغداد جانبنه مراجعت قلندی لکن عسکرہ یورغلق و مهماته نقصانیت طریان ایلش اولدیغندن قرق کون قدر امر محاصره یه اہتمام اولندی ایسده شہد مطلب اینہ

توفیقده عرض دیدار ایلدیکندن عودته قرار ویریلوب فقط بودفعه قوه بازوی همت ایله طویلر و مهمات سائرده کاملاً استصحاب اولندی ایرتسی سنه ماردین صحراسی مرکز اردوی هایون اولوب اکمال مهمات و ورود جیوش تاتار ایچون بش الی آی اقامت اولندقدن صکره سفر بغداد زمانی مرور ایتشدردنیلهرک بیک قرق برسنه سی اوائلنده یینه دیاربکره عودت قلنمغله بوحال خسرو پاشانک عزله و رکاب هایونده وزیر ثانی بولنان صدر اسبق حافظ پاشانک صدارتنه سبب اولوب فقط خسرو پاشانک ولوله شهرتی طنین انداز مسامع یار و اغیار اولدیغندن طوائف عسکریه بزسندن غیری سردار استه میژ دیهرک فرمان هایون ایله کلان مأموری پارملق استدیلر ایسه ده خسرو پاشا منعه استعجال و امر پادشاهی یه امثال ایلدی و هیئت موکب هایون دخی استانبوله جلب اولندی سنه مزبورده رجبنده قائممقام رجب پاشا تحریکیله سپاه زوربارلی رفع علم عصیان و سلطان مراد حضرتلرینی ایاق دیوانه چیقاروب حضورنده حافظ پاشانک خونری ریزان ایتلمیله قائممقام رجب پاشا صدر صدارته اعتلا ایلدی

ظهور فتنه سپاه درآستانه

شیخ الاسلام یحیی افندی دخی خسرو پاشا خلافکیرلرندن بولندیغندن تستر واختفایه مجبور اولوب روم ایلی قاضی عسکری اخی زاده حسین افندی مسند مشیخت اسلامییه حائز اولدی پادشاه حضرتلری بو فتنه لره وقوعی خسرو پاشایه عزو ایلدیکندن دیاربکر والیسی نصب ایلدیکی مرتضی پاشا معرفتیه توقادده مقیم اولان مشارالیه خسرو پاشایی قتل ایتدیرمکله بو کیفیتک شیوعی تکرار نأثره فتنه نک اشتعالی استلزام ایدرک زوربار پادشاه حضرتلرینی ایکنجی دفعه ایاق دیوانه چیقمنغه مجبور ایدوب خسرو پاشا کبی عجمستانه ولوله ساز اولان وزیر بی نظیری عزل و قتل ایتدیرنلر و موصلده بوقدر عسکر و مهمات تجمع ایتشیکن تلف واضاعه سنه سبب اولنلر خائن دولتر بونلری بزمه تسلیم و شهزادگان حضراتی ولی نعمت زاده لرمن اولمغله وجودلرینه سوء قصد ایتیه جکنه تأمین ایله دیهرک انواع بی ادبلیکه جرأت ایتلمیله بالضروره برادران پادشاهی اولان سلطان بایزید و سلطان سلیمان و سلطان قاسم و سلطان ابراهیم اشقیایه ارأه و صدراعظم ایله شیخ الاسلام طرفلرندن ابراز کفالت اولنهرق هر تقدیر سرای هایوندن طاغلدیلر ایسه ده صدر اعظم رجب پاشا سوء صنعیه مقرب و مرغوب سلطانی اولان موسی چلبی نام دلبر لطافت منظری وینه بوقیلدن اولوب چند کون مقدم یکیچری اغالغیه چیقان حسن اغایی

ودفتردار مصطفی پاشای قتل و اعدام ایلدیلر روش حاله باقنجه خسرو پاشانک عزل و قتلیه حافظ پاشانک صدارتنده موسی و عیسی چلییلر ذی مدخل اولدیغندن امثال و اخلاقلری نی ترهیا و تأدیباً کرتار فلاکت اولمشلردر

سلطان مرادخان حضرتلری موسی چلینک انعامندن پک زیاده متأسف اولمغه صدر اعظم حقنده اولان غضبنی کتمه قادر اوله میوب هنوز آتش اختلال تمامیه کسب سکونت ایتمکسزین برکون بغته حضورینه جلب ایله کل بقالم طوپال زوربا باشی ابدستک وارمی دیو خطاب ایلدکده رجب پاشا هر قدر تبریه ذمه چالشدی ایسه ده مشر اولمیوب در حال قتل و اعدام ایتدیردیلر زیراً وقعه کونلرنده سلطان مراد ایاق دیوانه چیقماق اوزره ایکن رجب پاشا پادشاهم ابدست الوب اوله چیقین دیدیکنی برنوع اخافیه حمل ایتمشیدی مهر صدارت قبه هایون وزراسندن محمد پاشایه اعطا واشقیانک تأدیب و تربیه لری اسبابنک استحصاله چاره جو اولمسی بروجه اکید تنبیه و فرمان بیورلدی

فصل سابق تکمله سنده بیان اولندیغی وجهله سلطان سلیمان عصرنده سفرلر واقع اولدجه سواری اوجاقلرندن یعنی سپاه و سلحدار و علوفجیان یمین و یسار و غربای یمین و یسار بلوکلرندن اوچیوز نفر ملازم یازیلوب بارگاه هایون محافظه سی خدمتی بعدالایفا بعض مأموریتلر و یریلور ایکن مؤخرأ طائفة مرقومه نك عتو و طغیانلری مزدداد اولق حسبیه سفر اولسون اولسون هر سنه بر ایکیبک کشتی ملازم یازیلورق بالجمله مقاطعات میریه و جبات جزیه و اوقاف سلاطینه مستولی اولدقلرندن طشره لرده ایتدکلری ظلم و تعدی قالمیوب امور ولاته و حکام شرعیه و طائفه قدر تجاوز و تعدی ایدر اولمشلر ایدی صدر جدید بونلرک کسر سورت و قدرتلری ضمننده یکچیری ضابطانی بسط مقدمات معقوله ایله جانب سلطنت سنییه جلب و اماله ایتمکله بعدازین سلطان سلیمان قانونندن خارج خدمت و یرلیه جکی اعلان اولنوب بونک اوزرینه سپاه طائفه سی عقد جمعیت شقاوت ایتدیلر ایسه ده یکچیریلرک صولت و هجوملریله پراکنده و پریشان اولدیلر بعده کلخانه میداننده واقع سنان پاشا قصرنده کافه وزرا و علما و اوجاقلر اغاری و ضابطانی حاضر اولدقلری حالده بر دیوان عمومی عقد اولنوب پادشاه حضرتلری زوربارلرک متجاسر اولدقلری شقاوتی و طشره لرده متصدی اولدقلری مظالمی تعداد ایله بونلرک تأدیب و تربیه لرنده اختیار تهاون اولنور ایسه ممالکک خرابیتی و خزینه نك فقدانی استلزام ایده جکنی اورده زبان مقال ایتدکده یکچیری ضابطانی پادشاهمزک رضاسنه مخالف حال و حرکتده بولنان اشقیانک قهر و تنکیله صرف مقدور ایدر ز دیملریله سپاه ضابطلری دخی ایچلرنده بولنان ارباب

جانیته صحابت ایتمه جککرینی تعهده مجبور اولدیلر بنابرین حضور هایونده قرار
 ماده تسجیل و جمله سنه یمین ایتدیریلوب همان اولسکون فتنه لرده اوك ایاق
 اولنلردن اون بش یکر می قدر شقی اعدام اولندی بوندن صکره کرك صدر اعظم و کرك
 ضابطان عسکریه شقاوت مستمره اصحابک ازاله لرینه دوام وبا خصوص سلطان مراد حضر تلی
 بالذات تبدیل کزوب راست کلدیکی زور بالری وتوتون یساغی بهانه سیله پک چوق
 اشخاصی قتل و اعدام ایتمکه مهابت سلطانی بر درجه یه واردیکه اوچ بش کشی بریرده
 اوتوروب مصاحبت ایتمکه خوف ایدر اولدیلر مؤخرآ پادشاه حضر تلی بروسه یه واورادن
 ازنیقه عازم اوله رق یوللرک تنظیم اولنمامسی تهمتیله ازنیق قاضیسنی صلب ایلدیکنه مبنی
 بین العلما بعض مرتبه قیل وقال حادث اولدیغندن شیخ الاسلام حسین افندی والد
 سلطانه تذکره تحریر وبومثالو افعال قبیحه یه مصدر اولمالری ضمننده پادشاه نصیحت
 ایلرینی تذکر ایتمکه مشارالیه اها دخی بوتدکره بی طرف هایونه ارسال ایلدی شیخ الاسلام
 مشارالیه مک مقدمه شهزادگانه کفیل اولسی جانب سلطنته برنوع نظارت حکمی متضمن
 اولق واهمه سی جایگیر ضمیر سلطانی اولدیغی حالده بوماده نک وقوعی دخی منضم اولدیغندن
 سرعت سیر ایله استانبوله وصوللری عقبنده شیخ الاسلام مشارالیه قبریسه نفی ایچون
 کمی به بندیروب کوندردکلرندن صکره ارقه سندن بوستانجی باشی مشهور دوجه بی اعزام
 ایله باروتخانه جوارنده شهدشهادتی اشراب ایتدیردیلر وحافظ پاشا وقعه سنده مجبور اختفا
 اولان شیخ الاسلام سابق یحی افندی ثانی لابس فروه بیضای مشیخت اسلامیه اولدی
 ایرانیلرک وان اوزرینه هجوم ایلدکلری استخبار اولندیغنه بناء بیك قرق اوچ سنه سی
 اوائلنده صدر اعظم سپاه کش اسلام اولوب اثنای طریقده دیار بکر والیسی مرتضی پاشا
 وارضروم بکر بکیسی خلیل پاشانک سیف سطوتلریله دشمنک دفع وتنکیل قلندیغی
 خبری وارد اولدیغندن صدر مشارالیه بغداد سفری مهماتی تدارک وتنظیم ایتک ایچون
 جانب حلبه مطیهران عزیمت اولدی .

ظهور سفرله وتجدید مصالحه

اوزی و سلستره والیسی اولان مشهور ابازه پاشا غزا وجهاد ایله سیئات سابقه سنه
 کفارت ایتک مطالعه ایمانه سیله تحت ایالتنده بولسان طوائف عسکریه بی معیتنه جلب
 وافلاق وبغدان ویودملرینی دخی بیوردیلر تحریریه سفره مأمور ایدوب جمعیت عظیمه
 ایله طورله نهرینی مرور وقمانجه اطرافنی سرتاسر تخریب ویغما ایدرک اسرا واموال
 کثیره اخذیه عودت ایلدیکندن بو کیفیت له دولتیله منعقد اولان صاچی رخنه دار ایدوب

لهلولر دخی تعرضاته باشلادقلرینه مبنی پادشاه حضر تلمری بالذات اولجانبه تصمیم سفر ایدرک ادرنه یه وصول لرندد اعتداری متضمن له طرفندن نامه وارد اولدیغندن جنک ویاصلح خصوصی دیار بکردن جاب اولنان مرتضی پاشایه حواله وروم ایلی و بوسنه و سلاستره ایالاتی عسکرندن و سائر ددن التمشیک قدر عسکر ترتیب و ترفیق اولنه رق اعزام قلنمغله جناب پادشاهی استانبوله عودت بیوردیلر پاشای مشارالیه کشور افلاقه لدی الوصول لهلولرک استرحاملرینی مشمول نظر مساعدده و صلاح سابقی تجدید ایدوب بعدالاستیذان معیتده مجتمع طوائف عسکریه یه رخصت اعطا و کندوسی رکاب هایون جانبه عودت ایلدی

عنایت سلطان مراد خان رابع بسفر روان

سلطان مراد حضر تلمری بغداد سفرینه حاضر لنمقدد ایکن ایتدکاری استخاره حکمنه توقیفاً روان تسخیرینه تحویل نیت ایلدکلرندن بیک قرق درت سنه سی اواخرنده ترفیع رابت عظمت و اقتدار ایدوب هر مرحله ده اشقیای عسکریه دن اله کچلمری و طورجلالیده اولان بککلر بکیلری و ظلم و تعدیلرندن شکایت اولنان حکام و امرایی بلالمان قتل و اعدام ایدرک ارضرومه واصل اولدی عساکر مجتمعه اکیوز بیکی متجاوز اولوب حتی ارضرومه کیریله جکی کون ترتیب اولنان الایده کذرگاه پادشاهینک طرفینه دیزیلان عسکر اوچر صرد اولدینی حالده مرحلتین بینی استیعاب ایتمش اولمغله الی بیک قدری ارضرومه بالتوقیف ماعداسیله یکرمی بش قطعه بال یمز و یوز قطعه شاهی طوپ استصحاب اولنه رق کشور ایران کذار و برهفته محاربه ایله قلعه روان ادخال قبضه اقتدار قلندی مراد پادشاهی سرحد ایرانده مشتانشین اولوب اولبهارده اصفهان طوغری هجوم اولنق مرکزنده ایدیسده عساکر کلیه یی اورالرده باندردمق مشکل اوله جغندن بشقه پادشاهک ایاقلرنده نقریس عاتی دخی ظهور ایلدیکنندن عودته قرار ویرلدی .

شاه عجم عادت اسلافی اوزره قطه اذربایجانی تخلیه ایله کندوسی صعب المرور طاغله چیقمش اولمسایله اون بیک قدر عسکر ایله مرتضی پاشا روان قلعه سی محافظه سنه وضع اولندقدن سکره بهستان و خوی و مرند و تبریز شهرلری تخریب اولنه رق پادشاه حضر تلمری استانبوله و صدر اعظم مشتای دیار بکره عودت ایلدی روان خانی اولان امیرکون اوغلی طرف هایونه دخالت ایلدیکنسه مبنی حلب والیلکی احسان قلندی ایسه ده قوانین عثمانیه اوزره اجرای حکومتمده عجمی اولدیغندن استانبوله جلب اولنوب روم ایلی حصارینک اوست طرفنده واقع فریدونک باغچه سی و کاغذخانه

جوارنده چفتلك ووزرات خاصلرى اعطا اولمغله بش التى سنه قدر مرفهاً امرار وقت ايدوب مؤخرآ تبريك جلوس ابراهيم خانى به كلان عجم ايلچيسنك دسايس والتاسيله ازاله اولمشدر

قيش اورته سنده عجم شاهى روانى محاصره ايلديكى صدر اعظمك مسموعى اولدقده سبكار ديار بگردن ارضرومه ايلغار ايلدى ايسه ده شدت شتادن ناشى امداده قدرتياب اوله مديغندن وروان محافظه سنده بولنان مرتضى پاشادخى اثنای محاصره ده مرتحل داربقا اولديغندن قلعه روان گرفتار دست ايرانيان اولديغى مسموع پادشاهى اولدقده اول امرده صدر اعظمه اسمالتى متضمن خط هايون كوندردلى لكن روانك فتحي عقبنده ميرميراندن برمناسي محافظ نصب اوانوب مرضى پاشانك عساكر مرتبه ايله قارصده اوطورمسي ووقوع بوله جق تعرضاتك خارجدن منعه اقدام وايجابى وجهله امداده اهتمام ايلسى لازمه خالدن وقواعد حربه اقتضاسندن اولديغى صدر مشاراليه افاده اولمشيكن علت رقابت ودفع مزاحم قصديه مرتضى پاشايى روان قلعه سنه وضع ايلسى بو وقعه نك حدوثه سبب اولمق اوزره طرف هايونه القا اولمسي جهتيه بيك قرق التى رمضانده معزول وقائمقام بيرام پاشا صدر صدارته موصول اوله رق بعدالعيد اردوى هايون جانبه عزيمت ايلدى

قتل خان قريم عنايتكراى خان

روان سفرينه عزيمت هايون ائناسنده قريم خانى جانبك كراى خان سفره مأمور قلنمش ايسه ده عليل واختيار اولديغندن بحثله استعفا ايلديكندن حكومت قريم مشهور غازى كرايك اوغلى اولوب ياسوليدم مقيم اولان عنايت كرايه ارزاني بيورلمشيدى مشاراليه قريمه لى الوصول جمع ايلديكى عسكرى قالغايلىق ونورالدينك منصبلرينه تعيين ايتديكى برادرلى حسامكراى وسعادتكراى سلطانلره ترفيقاً اوزى قيرنده متوطن اولان نوغاي امرا سندن قاتمر ميرزا قيله لرى اوزرينه سوق وقاتمر ميرزا مغاير مصالحه ممالك لهى تاراج ايدم كلكديكندن بز عجم اوزرينه كيدر ايسك لهلولر قريمه هجوم ايدرلر ديوعذ ربارد اظهار ايلدى ميرزاى مزبور دخى خان مشاراليهك اطاعت پادشاهيدن روگردان اولديغى حكايه ايله مقاتله اذن طلب ايلدكده مساعدده اولميوب كندوسى استانبوله جلب اولنديغندن مذكور سلطانلر قاتمر ميرزا قيله لرغى تخریب ويغما ايلدكلرندن صكره كللى قلعه سنى محاصره ايله ميرزاى مزبورك اورايه وضع ايلديكى عيال واموالنى جبراً

اخذ ایتدیلر خان مشارالیه دخی کفه بکلیسی ابراهیم پاشا دن مقدا طرف دولته شکایتنامه کوندروب هنوز جواب المقسزین کفهی محاصره واهالی دفع صائل قصدیه پاشای مومی الیه ایله قاضی بلدی بی تسلیم ایلدکلرندد ایکسینی دخی اعدام ایلدی وشیخ الاسلام یحیی افندی یه مکتوب تحریریه قاتمر میرزایی طلب وویرلمدیکی حالدده استانبوله قدر هجوم ایلیه جکئی اشراب ایله خلاف اداب عبودیت برطاقم کلمات متعظمانه درج ایتدی بونک اوزرینه دواتجه چاره دوشنلمکده و ذکر اولنان سلطانلر قبائل نوغای قریمه کوتورمک ایله اشتغال ایتکده ایکن طائفه نوغای برکیجه بغته مذکور سلطانلری باصوب ایکسینی دخی اعدام و عساکر مجتمعه لرینی پریشان وکنام ایلدکلری خبری وارد اولدیغنه بناء سلامت کرای خان زاده بهادر کرای حکومت دشت قبیجاق ایله تجیل و بحر اقریمه تسیر قلنمغله خان معزول بارگاه پادشاهی یه جبین فرسا اولدقده قاتمر میرزا ایله حضور همایونده مواجهه و محاکمه اولنسی عقببنده هدف تیغ سیاست و جنازده سی این ملوک اوزره بالمله ارکان دولت مباشرتیه یحیی افندی تربه سی جوارنده غنوده بستر رحمت قلندی

قاتمر میرزا اکرچه خوتین سفرنده و محاربات سائرده ابراز خدمات مبروره ایش و اوزی و سلسله ایالتلری احسانیه بندگان دولت سالدکنه ادخال قلنمش ایسه ده محمد کرای و عنایت کرای کبی ایکی خدیو بنامک انعدامنه سبب اولدیغنه و منظور نظر دولت اولدقجه نوغای طائفه سی قریم خانلرینه اطاعت ایتیه جکلری و خانلر دخی طرف دولتن امین اوله میه جفی بدیهی ایدوکنه مبنی ازاله سی لازم کلش اولدیغی حالدده کندوسنه قره حصار صاحب سنجاغی توجیه اولنوب پابربکاب عزیمت ایکن اوغلی اسکدارده بر آدم قتل ایلدیکندن بو وسیله ایله اوغلی و کندوسی اعدام قیانبوب قریم خاننه دخی طوائف نوغای تلطیف و تألیف ایله مشاجره سابقه نک ازاله سنه اعتنا ایلسی ضمننده فرمان عالی اصدار قلندی لکن خان مقتولک متجاسر اولدیغی جنایاتک هر بریسی کندوسنک تدبیر و تنکیلی مستلزم اولدیغی میدانده ایکن خلقی مدافعه و یاخود بعض اسلافی مثللو فرار قیدنده اولیوب طوغریجه سلطان مراد کبی پادشاه قهارک استانه دخالت و التیجا ایلسی غریب کورینور و روایات و حادثات مبسوطه خصمانسک اثر تصنیبی اولسی و تبریه ذمت امیدیه کلوب اکا دخی مقتدر اوله مامش بولنسی خاطره کاور العلم عندالله

عزیمت سلطان مراد خان بسفر بغداد

سلطان مراد خان حضر تلری بغداد سفری نیتمه بیک قرق یدی سنه سی ذی الحجه سنده

اسکد اردن حرکت ایدوب قونیه جوارنده صدر اعظم اردوسيله ملاقات ایلدکن صکره بیره جک اوزرندن صوب مقصوده ره پیا اولدی و صدر اعظم بیرام پاشا متوجه سمت آخرت اولغله مهر صدارت دیاربکر والیسی طیار پاشایه احسان بیورلدی بیک قرق سکنز سنه سی رجی اوائلده بیرامن بغداده نصب سرادقات اجلال اولنوب هر طرفدن امر محاصره و تضییقه اهتمام اولندیغی حالد شاه عجم قصر شیرین نام محله اقامت و مقابله موکب هایوندن بجانب اوزره ایدی برآیدن متجاوز آتش حرب و قتال کرما کرم اشتعال اولوب بالاخره محصور لر استیانه مجبور و بغداد محافظه سی اغورینه فدای نفس ایدن اوتوز بیک قدر سپاه کزیده ایرانیانک اوج یوز نفر دن ماعداسی مقتول و مقهور اولدی و انانی هجومده صدر اعظم رتبه شهادته نائل اولغله قبودان قره مصطفی پاشا صدر صدارته اعتلا ایلدی پادشاه حضرتلری اشتداد علت نقریس سببیه منحرف المزاج اولدقلرندن امر صاحب و حربی عهده صدر اعظمی به تودیع ایدوب کندولری متوجه دارالسلطنه اولملریله قرق طقوز سنه سی صفر نده مکمل آلائی مظفریت ایله استانبوله داخل اولدیلر

انقباد مصالحه در میان دولت عثمانیه و دولت ایرانیه

صدر اعظم بغداد محافظه سی ایچون ایجاب ایدن عسکر و مهماتی ترتیب و تکمیل ایتدکن صکره عساکر عثمانیه ایله ایران ممالکنه طوغری عزیمت ایتمش ابدده طاب صاحب نیازیه شاه جانبدن ایلیچیلر وارد اولدیغنه ویدی سنه دنبرو جیوش اسلامیه ایران سرحدلر نده امرار اوقات ایدرک حصول آسایشه احتیاجلری درکار بولندیغنه مبنی الان صرعی اولان حدود اوزرینه عقد مصالحه امضازن موافقت اولغله بعد اتمام المصلحه جانب دارالسلطنه عودت ایدوب سنه مزبوره رمضانده واصل رکاب هایون اولدی سلطان مراد خان رابع حضرتلرینک روان سفر ندنبرو مبتلا اولدقلری علت نقریس یوما فیوما کسب اشتداد و مألوف بولندقلری عیش و عشرت دخی علتیه امداد ایتمکه بیک قرق طقوز سنه سی شوالنده اوتوز بریاشنده و سلطنتک اون یدنجی ییلنده عازم ملک جاودانی اولوب پدر جنت مقرلری سلطان احمد خان تره سنه دفن اولندی

پادشاه مشارالیه حضرتلری اعظم سلاطین عثمانیه دن اولوب یاوز سلطان سلیم خان وادیسنده بر شهریار قهار و خونخوار ایدیسده معارف و معلوما تجه سلطان سلیم مرتبه سنه رسیده اولدیغندن دولتک قوه شبایه سی دخی زائل اولمش ایدوکندن فتوحات خصوصنده

اول درجهیه واصل اوله مدی ابتدای جلوسنده زوربالرك عتو و طغیانى سد چندان اولمق حسبيله اون سنه قدر زیر بار تغلب لر نده امرار زمان ایدوب تربیه لرینه موفق اولدقدن صکره کیف مایشا اجرای حکومت و بالذات اداره مهم سلطنت ایلدیلر فقط سفك دماده افراطلری و خصوصیه سلطان بایزید و سلطان سلیمان و سلطان قاسم نامنده اوچ نفر برادر لرینه و اهمه استرقاب ايله شربت شهادت نوش ایتدیرملری قصر عمر لرینه سبب معنوی اولدینی روایت اولنور

سلطنت سلطان ابراهیم خان

محفوظ صون صمدانی اولان اک کوچک برادرلری سلطان ابرهیم خان حضر تلی بالانحصار وارث اورنک عثمانی بولندیغندن جالس تحت سلطنت اولوب طوائف عسکریه اعطاسی قانون دولتن اولان جلوس هایون بخششی دفعه اعطاقلندی زیرا سلطان مراد مرحوم نقود کلیه جمع و ادخار ایش ایدوکنندن اصلا تدارک غائله سی چکلمدی صدر اعظم قره مصطفی پاشا بالاستقلال مقام صدارتده پایدار اولوب تصحیح سکه و تنظیم امور دولت خصوص لرینه صرف مساعی ایدوب حتی عنایتکرای زماننده حادث اولان اختلال داخلی سببيله ازاق قلعه سی اطراف قبال تاتاردن تهی قالدیغندن قلعه مرقومه مسقو و قزاق طائفه سنک ایدی استیلاسنه دوشمشیدی فتح و تخلیصی ضمننده قبودان دریا دلی حسین پاشا و فرمان فرمای قریم اولان بهادر کرای خان ارسال اولمش ایسه دهه موفق اوله مدقلرندن صدر مشارالیه دیوان هایون و زراسندن سلطان زاده محمد پاشایی سردار ایدرك اعزام ایتکله هیت هجوم جیوش عثمانیه قزاقلره دهشت فرما اوله رق قلعه مرقومه یی تخلیه و تخریب برله فرار ایتدکلرینه مبنی تعمیر و تحصینی اکال و عسا کر مستحفظه سی ترتیب و استکمالی قلندقدن صکره سردار مشارالیه رکاب هایون جانبنه عودت ایلدی

خان مشارالیه ازاقدن علیلا عودت وقریمده اختیار سفر اخرت ایتکله مسندخانی برادری اولان محمد کرایه ارزانی بیورلدی

سلطان ابراهیم خان برادری سلطان مرادک خوف قهریه کوشه عزائده برک حزان دیده کبی لرزان ایکن نائل تحت سلطنت اولدقده بولندیغنی حال اضطرارک بردن بره بر سعادت کامرانی و شوکت جهانبانی به تحولی جهتیه زمام عقل و شعوری ربوده لذا نذ هوا و هوس اولوب لکن صدر اعظمک مهابت علو قدر و منزلتی بر مدت مانع انعال نابجاسی اولمشیکن شعبده افسونکری ايله کسب تقرب ایدن جنجی خواجهک و صدر

اعظمك استقلالی مانع منافع ذاتیه لری اولان سو قرینلرك و خصوصیه طائفه نسا مستوایلرینك ترغیب و تشویق لریله صدر مشارالیهك ازاله سی ذهن هایونلرنده جولان ایتمهک باشلادی حتی برکون صدر اعظم دیوان هایونده رؤیت مصالح مهمه ایله مشغول و پادشاه حضرتلری قفسدن استماع امور ایدر ایکن چاغروب کتخدای قادین ایچون امر ایلدیکم اودون حالا ویرلماش سبی ندر دیدکده صدر مشارالیه درشتکو بر آدم اولدیغندن (بکا مهم سلطنتدن و سرحدات خاقانی احوالندن برشی صور میوبده بومثلو التزام مالایلزم ایش سوال بیورمکنز و بونك ایچون دیوان هایوندن جلب ایلدکیز غریب و شان سلطنتکزه ناجسباندن) دیمشیدی طرفینك بومقوله اطوار واقوالی بالاخره صدر مشارالیهك زوال دولتی مستلزم اولغله بیك الی اوچ سنه سی مقتول و سلطان زاده محمد پاشا که جوان قیوجی باشی نامیله مشهوردر مسند صدارته موصول اولدی

ظهور سفر کرید و فتح قلعه حانیه

سلطان احمد خان اول حضرتلری زماندنبرو کرید جزیره سنك فتح و تسخیری منوی ضمیر دولت ایدوکی مروی اولوب نعیاده دخی سلطان مراد مرحومك بغداددن عودتلرندن صکره و نذکلولرك بعض اسلام تجار سفینه لری غصب و نابید ایده کلدکری نه مبنی اظهار غیض و غضبه عظیم دونما تدارکنه اشتغال ایلدکری و و نذکلولر جابندن عرض اعتذار و تقدیم هدایا و مبالغ اولندجه استنکاف ایتمکده اولدق لری بیان اولغله بو دخی روایت سابقه یی تأیید ایدر بو اوانده ایسه دولت علیه غوائل خارجه دن وارسته اولدیغنه و دارالسعاده اغالغندن معزولاً مصره عزیمت ایدن سنبل اغای انشای راهده آقدکیز قورصانلری شهید و اموال کثیره سی اخذ ایدرک کریدده فروخت و آتلیرینك برقاچ رأسنی والی ولایته اهدا ایلدکری کسب اشتهار ایلدیکنه بناء کرید سفری تصمیم اولوب ساجدارلقدن قبوداناقله تکریم و پادشاه حضرتلرینك ایکی بحق یاشنده اولان کریمه لرینك عقدیله تفخیم اونان یوسف پاشایه عساکر بریه سرعسکرلکی دخی علاوه اولنه رق و روم ایلی و اناتولی الویه مناسبه سندن یکریمی اوتوز سنجاغک زعما و ارباب تیماری آلات پیادکی ایله و قپو قولی عساکری اوجاقلرندن دخی ایجابی قدر جیوش موظفه قول کتخداسی مراد اغا و بعض بلوک اغالریله ترتیب و ترفیق قلنه رق ایکی یوزدن متجاوز سفن حربیه و نقلیه ایله بیك الی بش سنه سی اول بهارنده مالطه سفری نام و اشاعه سیله آقدکیزه اخراج و ارسال قلندی بر موجب قانون سواحل و اطهر میرلوالری

چکدیریلریله غرب اوجاقلری سفن حربیهلری و معسردن مرتب اولان ذخائر و لوازم
دوئمای هایونه التحاق ایلدکن صکره کرید جزیره سنده واقع حانیه قلعه سی جوارینه
لدی الوصول عسکر و بیوک طویلر و مهمات مقتضیه قارديه اخراج والی کون قدر محاربه
و محاصره ایله قلعه مرقومه استیانا جانب اسلامیانه تسلیم اولنوب اون بیک قدر مستحفظ
وندکلودن بقیته السیوف اولان ایکی بیک نفری قندییه عازم اولدی سردارغازی قلعه نك خراب
اولان یرلرینی تعمیر و مهمات کافیله صنوف عسکریه دن اون ایکی بیک نفر مستحفظ
ترتیب و وضع ایلیه رک وروم ایلی بکک بکیسی حسن پاشایی خدمت محافظه به تعیین
ایدرک دوئمای هایون ایله منصوراً و مظفراً استانبوله عودت ایلدی

صدر اعظم محمد پاشا قپودان مشارالیه ک اقبال و استقلالانی چکه مدیکندن پادشاه
حضر تلمینه (ا کرچه یوسف پاشا قوالکز حانیه قلعه سی فتح ایتدی لکن برطاقم حربی
وندکلویه امان اعطا ایدرک مال و اشیا لریله صالیووردی و پادشاهمزد ایکی قطعه مرمر
ستوندن بشقه نه هدیه و مال غنا کتوردی بودخی مجرد طمع خامی و خفیا وندکلوردن
آلدیغی اموال کثیره ثمره سیدر) دیو غمز و سمایت و قپودان مشارالیه دخی صدر اعظم
حقنده التزام مذمت ایتمکله بالاخره صدر مشارالیه معزول و دفتر دار صالح پاشا مقام
صدارته موصول اولدی ایسه ده ماله دائر اولان القآت ضمیر هایونده جایگیر اولدیغندن
برکون یوسف پاشایه انواع مؤاخذه و تکدیر اجرا بیورلدقندن صکره (همان کریده کیت
و بقیه قلاعی فتح ایت) دیملریله پاشای مشارالیه دخی (شمدی اربعین ایچنده اولدیغمزدن
سفر دریا قابل اولمز و ایتدی کیم خدمتک نه قدری بلندیکه آتیسنه براءت استهلال اولسون)
دیو درشتانه جوابه تصدی ایلدی کندن آتش تهور سلطانی علو افروز اوله رق در حال قتل
و اعدام ایتدیروب بر ساعت مرورنده اظهارندم و پشیانی بیوردیلر

صدر سابق محمد پاشا کریده سردار و بودین و الیکندن معزول مشهور دلی حسین
پاشا حانیه محافظی نصب اولنوب انحق مشارالیه محمد پاشا جزیره مرقومه یه وصولی متعاقب
مرتحل دار آخرت اولمقله خدمت سرداری مشارالیه حسین پاشایه تفویض قلندی

بوندن صکره کرید جزیره سی دولت علیه نك تعایم خانه حربیسی حکمنه کیروب
هر سنه عسکر و مهمات ارساله اقدام اولنور و وندکلوردخی وار قوتی بازویه کتوره رک
تجهیز ایلدکاری جسم دوئمالر ایله آقدکز بوغازینی ابلو قه ایدوب کریده مهمات و عسکر
ارسالنه مانع اولمق خصوصنه چالیشورلر ایدی مشارالیه حسین پاشانک اون بش سنه قدر
سردار لغنده اظهار ایلدیکی شجاعت و جلادت و موفق اولدیغی حروب و مسغازی زیور

صحایف مفصلات تواریخدر ازان جمله سردار مرحوم سوده قلعه سنی محاصره یه تشبث ایدوب لکن بوقاعه سوده لیاننک اغزنده وبر جزیره صغیره اوزرنده کائن و متانت و رصانی حد کالده ایدو کندن یوروش ایله ضبطنه امکان ودور دراز محاصره دن بشقه چاره اولدیغنه ویا لکنز بونکله اضاعه وقت قائماق مطالعه سنه مبنی چند قطعه بال یمز طوب و مقدار کافی عسکری امر محاصره ده ابقا ایدوب سپاه کزیده ایله رسمو قلعه سنک تسخیرینه عزیمت وبر آیدن متجاوز محاصره و مقاتله ایله بیک الی الی سنه سی ذی القعدة سنک غره سنده استیانا اوردده قبضه جلادت ایلدی

سلطان ابراهیم خان حضرتلری عات سودایه مبتلا اولدقلری جهته کوندزلری تختروان ایله درون شهرده کیجه مشعله لر ایله سرای هایونک ایچنده کشت کذار و دائما جنک وجغانه ولعیات شعبده بازانه ایله امرار اوقات ایلرلر ایدی بناء علیه کذرگاهلرنده موجب مزاحمه اولماق ایچون استانبول ایچنده عربیه استعمانی منع بیورمش اولدقلرندن بیک الی یدی سنه سی شعباننک اون یدنجی کونی اوقونق قصصیده داود پاشا سمتده ساکن ارباب عزایمندن برخواجهنک خانه سنه کیدرایکن ازقضا برعربیه تصادف ایتلریله غضب و تهورلری فوران ایدرک درخال صدر اعظم صالح پاشایی خواجهنک اوینه جلب وقوی ایلله اخناق ایتدیروب هزار پاره نامیله زبازرد مؤرخین اولان دفتردار احمد پاشایی مقام صدارته نصب و تعیین بیوردیلر

صدر اسبق سلطان زاده محمد پاشا مرحوم سانی قره مصطفی پاشانک حالندن عبرت بین اولمغله پادشاه صاف نهاد حضرتلرینه فوق العاده مدهنه یه مبادرت و طرف هایونکزدن هر نه صادر اولورایسه محض خیر و اثر الهامدر دیهرک محافظه نفسنه حصر همت ایتمکله پادشاه حضرتلرینک تزايد حرکات مضرانه سنه قوت بخش اولمشیکن مؤخرآ یوسف پاشا و صالح پاشانک و سائر وزرا و میر میرانک نقله غیر صالح اسباب ضعیفه و نامشروعیه ایله اعدام و افنا اولدقلری منظور انام اولدقده هرکس خائف و ترسان و انجام کاره نکران اولدیلر برطاقم اسافل و اراذل ایسه بواحوالدن استفادیه شتاب و پرستاران حرم سلطنته و شکریاره و ویوده قزی کبی کیجهلری مصل سویلیه رک پادشاهی اکلندر مکده اولان مکاره لره بذل اموال ایله انتساب ایدوب هیچ بروجهله لیاقت و استحقاقلری اولمیان مناصب رفیعه علمییه و سیفیه دسترس اولملریله بازار ارتشا مثلی مسموع و مشهود اولمیان درجه یه واردی صدراعظم دخی بوجهلدن اولدیغندن علی الدوام پادشاهه و حرم هایون متفدانه نقود و هدیه تقدیم ایدوب مناصب دولت رشود علیه ایله ویریلور و بازارلق

اولنان مبالغ حقوق ثابته مثللو تحصیل قیلنور اولدی حالبوکه کرید جزیره سنده وهرسک حدودنده وندکلور ايله آتش حرب و قتال کرما کرم اشغال اولوب باخصوص وندیک دونماسی آقدکز بوغازینی ابلوقه ایلشیدی

سلطنت سلطان محمد خان رابع

بوجه تیرله هیجا افکار عامه ارتقمده ایکن پادشاه حضرتلری شام وایلکنی قادینلردن بریسنه توجیه ایدوب مسلم ايله اداره ایتدیرمک و اغنیایی مصادره ایتک و اختراع کرده لری اولان قباچه تعیر اولنور مرصع دکمه لو سمور کورکلردن بالجمله وزرا و صدور علما و امرای عسکرینه نک بردانه تقدیم ایللرینی امر ایتک مثللو حرکات منکره یی تزئید ایلدیکنه منی بیک الی سکز سنه سی رجب شریفنک یدنجی کونی طوائف عسکریه ضابطانی و شیخ الاسلام عبدالرحیم افندی بالجمله علما و ارکان دولت فاتح جامع شریفنده عقد جمعیت ایدوب ظاهر تبدیل صدارت و باطنا خلع خلعت سلطنت خصوصنه قرار ویردیلر بوخبر برکیجه اول صدر اعظم احمد پاشانک مسموعی اولدیغندن تبدیلا فرار ایتمکه طلب جمهور ايله خدمت صدارت عظمای دفتر دارلقدن معزولا مولویخانه قپوسی جوارنده معتکف کنج انزوا اولان صوفی محمدپاشایه توجیه اولنوب بعده صدر سابق اختفا ایلدیکی محله در دست اولنه رق اعدام قلندی

ایرتسی کونی ارکان دولت طوائف عسکریه ايله سرای هایونه عزیمت ایدوب بیوک شهزاده اولان سلطان محمد خان رابع حضرتلری یدی یاشنده اولدینی حالده تخت سلطنته اجلاس ایلدیلر پادشاه مخلوع اولاجس اولنش ایسه ده یکرمی کون مرورنده عبدالرحیم افندینک فتوای موجب بنجه شیرین مذاق شهد شهادت اولمشدر و بوبابده پادشاه معصومدن النان خط هایون نه مقوله احکامی حاوی اولدینی کندوسنک فهم ایدمیه چکی تشبیهات ايله محرر ایدی صورت خط هایون « بدرم ابراهیم خان بعض هوادارلری امداد ايله ایقاظ فتنه ایتک اوزرددر دفع محذور ضرر عام ملاحظه سیله باغ عالمدن مضر عدمه تحریک قدم ایتسی اهم اولمشدر ایمدی فرمان متحتم الاذعان موجب بنجه نقطه وجودی مرکز شهوددن نابود اولوب خار و ازاری دامن ملکدن ازاله اولنه » تم

پادشاه مرحومک سنی اوتوزی متجاوز و مدت سلطنتی طقوز سنه یه قریبدر مقدمات یک فاحش صورته قاضی عسکرلک مرتبه لرینی احراز ایدن ملقب مصاح الدین افندی و جنجی خواجه نامیه زبازد انام اولان حسین افندی مقتول و جزای سزالرینه موصول اولدیلر قره چلی زاده عبدالعزیز افندی بو وقعه یی تاریخ مشهورنده بیان ایلدیکی

صرده ولی نعمتمز اولان سلطنت عثمانیه بویه برخدمت خیرهده بولندقد دیو
افتخار ایدر

پادشاه نوجاه عادت اجدات کراملری اوزره حضرت خالد تره شریفه سنده تقلید
سیف ایدوب مرتب ومنتظم آلائی ایله سرای هایونه عودت ایلدیلر وسنه آتیتهده اوچ
نفر کوچک برادرلریله برابر سنت اولندیلر

سلطان مراد مرحومک شمشیر سیاستیله مدصر ومقهور اولان سپاه طائفه سی تبدل
سلطنت وقوعنی کانون عتو وطغیانلرینک یکی باشند شعله فروز اولمسنه مدار اتخاذ
ایدوب طشره لرده متوطن اولملری استانبوله وارد وبر موجب قانون سرای هایون
ایله غلظه و ابراهیم پاشا سرایلری اغالرنندن برایکی بیک قدر کسان سپاه وسلاحدار بلوکلرینه
چراغ اولندیغنه مبنی جمعیتلری متزاید اولمغله بعض زوربا باشیلرینک تحریک وتشویقیله
سلطان احمد جامعنده عقد جمعیت ایدوب صدر اعظم ایله شیخ الاسلام قتله پادشاه
مغفوردن اولملریله ایکیسنک دخی اعدامنی طلب ایدرز دهرک منوی ضمیرلرینی پوشیده
حیل ایله استتار وعوام ناسی جلب ایچون طرف سلطنته صداقت اظهار ایلدیلر صدر
اعظم یکیکچری ضابطانیله متفق اولدیغندن انلره دخالت ایدوب باخصوص سفارتله جمعیتگاه
سپاهه کوندریلان بریکیکچری چورباچیسینی صدر اعظمک صنیعه سیله سپاه قیافتنده
اولان اشخاص طرفندن پاره لندیکنندن یکیکچریلرک غضب وتهورلری هیجان ایدرک
علی العموم هجومله اشقیای سپاهی تأدیب وتنکیل و اوچیوزه قربت نفوسی قتل
وتدمیر ایلدیلر

کرید سفری ظهورندنبرو وندکلور برطرفدن مدافعه ومحاربه یه قیام وبرجانبندن
دخی تحصیل مصالحیه اقدام ایده کلدکلرندن ایلیچیلری بک اوغلنده اوطورور و طرف
سلطنت سنیه دن دخی سکوت ومساعده وانور ایدی بواوانده جمهور جانبندن ایلیچی یه
تعلیمات کلدیکی لدی الاستخباردردست ایتدیریلرک ترجمه اولندقدده ایکی سنه دنبرو بوغازی
ابلوقه ایدن دونمالرینک ضعف حالندن بحثله عثمانلی دونماسنک برمدت تأخیرینه چالشمسی
وبوبابده متنفذان عصره نقدر پاره اعطا ایدر ایسه قبول اولنه جعی مندرج اولدیغندن
ایلیچی مزبور روم ایلی حصارنده حبس اولتوب بروجه مسارعت قبودان دریا وینیق
احمد پاشا یتش سکسان پاره سفن حریه وکریده کوندرملک ایچون عجبی اوغلانلرنندن
یکیکچری یازیلان اوچ بیک قدر عسکر ومهمات ایله آقدکزه اعزام قیلدی سفن اسلامیه
وندیک کیلری اوزرینه آتش افشان اوله رق بوغازدن چیقوب وندکلور اکرچه مانع

خروج اوله مدیلر ایسه ده اکمال لوازمات ایچون از میر جوارنده واقع فوجیه لیمانه واصل و داخل اولدقلری متعاقب دونمای دشمن لیمان اغزینه رسیده اوله رق متصدی حرب و قتال اولملریله طرفیندن اوچر بشرکی تلف و بشیوز قدر جیوش اسلامیه شهید اولدقدن صکره یکدیگرندن آریلوب سفن اسلامیه شکسته و بسته ردوسده بالتجمع کریده کیتدیله و مهمات عسکری سردار غازییه ایصال ایتدیله

صدر اعظم صوفی محمدپاشا امور مختلفه دولتک تصحیحیه مباشرت و اسرافات و انلافاتی متضمن اولان شیلری لغو و ابطاله مبادرت ایدرک و بیوک والده سلطانک و متنفذان اندرون هایونک خزینهیه مضر و مغایر قانون اولان رجا و شفاعتلیری رد ایله رک بلا استحقاق نائل واردات اولان اشخاصک وظائف و معیناتلیری تنقیح ایتشیدی لکن بو مثللو منافع عامهیه طوقینانلرک و تصحیح و مصالح دعواسنده بولنانلرک بغایت عفت و استقامت اوزره حرکت ایتلمی لازمه دن و سائرلرندن صدور ایدن افعال منکره نك بو مثللولردن اونده بری مشاهده اولنسه خلقک طعن و تشنیعی مرتبه غلویه واصل اوله جفی مجربا بدن ایکن صدر مشارالیه پیرانه سرجمع ماله و تشید بنیان خان و کاشانهیه مباشرت ایتمکه هدف دشنام انام اولدی یکیکچری اغاسی مراد اغا و صنادید یکیکچریانندن مصاح الدین اغا و بکتاش اغا و قره چاوش مصطفی اغا و قول کتخداسی چلبی محمد اغا صدر مشارالیهک متفقلرندن اولدقلری حالده امر حکومت قبول اشتراک ایدمه مامک سببیه بینلری بوزیلوب باخصوص بیوک والده سی سلطان طرفندن مومی الیه مراد اغا صدارتله تبشیر اولمغله صدراعظمک عزل و تنکیانه بهانه جو ایدیلر صدر مشارالیه دخی بونلرک حرکاتندن سوء قصدلرینی استدلال و جانب سلطنتدن علایم مؤاخذه استشعار ایلدیکنه مبنی اکثریا دیوان هایونه و ارمامقده ایکن محاربه بحریه و تلفات واقعه مسموعی اولدقده بو وسیله ایله خصمانسک دفعنه چاره بولمق امیدیه مصالحتی اعظام و حضور هایونده عقد مجلس ایتدیرمکه قیام ایلدی بیک الی طقوزسنه سی اوائل جمادی الاولیسنده سلطان محمدخان تخت اوزرنده و بیوک والده سلطان پای تختده او طوروب ابتدای مزرا کراتده پادشاه حضرتلری ایچون دونمایه اهتمام ایلدک دیو صدراعظمی مظهر عتاب و سن وزیر آدمیسی دکسن و یرمهرمی الفاظیه خطاب بیورلمغله بو حال نا کهظه و ر صدر مشارالیهی برمدت دمسته و لال و بالاخره حضارک سرفرو پرده مطاوعت اولدقلرندن قضیه تحت اتفاقده اولدیغنی استدلال ایدوب مهر هایونی تسلیم ایلدی ذات شاهانه مهر هایونی برمدت النده طوتمغله برابر ارباب مجلسی کوزدن کچر دکن صکره یکیکچری اغاسی مراد اغایه کل مهری آل سنی وزیر

ایلدیم بیوردیلر یکیچری اغالغی دخی قره چاوش مصطفی اغایه توجیه اولندی صدر سابق و کتخداسی اغازاده و دفتر دار نصب ایلدیکی سامی محمد افندی اولا حبس اولنوب بعده کندوسی منقاسی اولان مالغرده و مومی الیها استانبولده اعدام قلمشدر بر مدت مرورنده قتله ابراهیم خانیدن معدود اولان شیخ الاسلام عبدالرحیم افندی دخی عزل واجلا اولنوب بهایی افندی مسند مشیخت اسلامییه اعتلا ایلدی سپاه طائفه سنک اصحاب اقتدارندن اولوب علاقه کلیه سی سبیلله نیکده ده ساکن اولان کورجی عبدالنبی سلطان احمدجامعنده مقتول اولان یولداش لرینک انتقامنی آلق سوداسیله باشنه یدی سکزیبک حشرات جمع و قطاع طریق کروهندن قاطرجی اوغلانی دخی معیتنه جلب ایدوب اسکداره طوغری کلیمده اولدینی استماع اولندیغنه و ازمد حوالیسنده مدافعه سنه تشبث اولندی ایسه دخی ممکن اوله مدیغنه مبنی صدر اعظم مراد پاشا بالجمله قیو قولی او جاقلریله اسکداره کچوب مال تپه جوارنده وقوع بولان مقاتله ده اشقیا منهزم و کورجی نبی دائرة وجوددن منعده اولوب قاطرجی اوغلی اولا فرار و مؤخر طرف دولته دخالت ایلکله عفو هایونه مظهر و میرلوالق منصیلله موقر اولدی غرائبندر که مومی الیه بعدازین صداقت و استقامت اوزره خدمات دولت علیه ده قطع اعتبار و مراتب ایدوب یکرمی سنه قدر زمان مرورندن صکره روم ایلی بکار بکیسی ایکن کوپرلی زاده فاضل احمد پاشا معیتله قندیه قلعه سی محاصره سی هنکامنده حائز رتبه شهادت و سیئات سابقه سنک ایفای کفارتیه و اصل سر منزل رحمت اولمشدر کزیده سردار اولان غازی حسین پاشا ایکی سنه دنبر و قندیه قلعه سنی محاصره ایتیمده اولدینی حالد قلعه نك متاتی و استانبولک قاریشقلانی سبیلله لایقیله عسکر و مهمات کوندریله مامسی پرده کش شاهد امید اولدی لیکن پاشای غازی قندیه جوارنده عنادیه نامیله بر قلعه بنا و دروننه جامع شریف و مهمات انبارلری و عسکر قشله لری انشا ایدوب اردوگاهده دخی حمام و سائر ابنیه یا بدرمقله بعدازین سردار و عسکر اسلام اوراده اقامت و تضییق دشمنه بذل و سع قدرت ایلشدر

صنادید یکیچریانندن اولان سالف الذکر اغالردن اولوب مزاج شهر و دهره واقف و امور عظیمه تمشیته لیاقتله متصف اولان قوجه مصلاح الدین اغا فوت اولغله دیگر اغالر کوندن کونه ازیدوب امور دولته و التزامات خزینه یه وضع ید استیلا ایتدکلرندن بشقه استانبولک حوایج ضروریه سندن اولان ات واکمک و سائر دی فرونلر و دکانلر کشادیلله ید واحد صورتنده اداره یه اقدام و جمع اموال خصوصلرینه نصب نفس اهتمام ایتلریله بو

ایشلردن طولای صدر اعظم مراد پاشا ایله بوزشدیلر بناءً علیه صدر مشارالیه نتیجه احوالی تفکر ایدرک استعفا و بودین ایاتی رجا ایتمکه مسؤلی قرین قبول و بیک التمش سنه سی شعباننده صدارت عظمایه ملک احمد پاشا موصول اولدی

ازمیرده مقیم انکلیز قونسلوسی بردهوا ضمننده حضور شرعه دعوت اولندقدہ اجابت ایتدیکی قاضی افندی طرفندن شیخ الاسلام بهایی افندی به اشعار اولنغله مشارالیه انکلیز ایلچیسینی جلب و مؤخذہ وایلچی دخی اوج بیک اچقه لکدن زیاده اولان دعوالرک کنار محکمه لرنده رؤیت اولنماسی مقتضای عهددن اولدیغنی معرض جوابده افاده ایتسی اوزرینه شیخ الاسلام مشارالیه افیون کیفیله ایلچی پی حبس ایلدیکی مسموع ارکان دولت اولدقدہ انکلتره دولتی سلطنت سینه نک دوست قدیمی اولوب خصوصیه وندکلورله اغانه ایلدکن بشقه سفن نقلیه ایجاریله دولت علیه به معاونت ایتمکه اولسنه نظراً ایلچیلری حقنده بووجهله معامله تحقیریه اجرایی مغایر رضای دولت بولندیغنی درمیان و صورت ترضیه ده بهایی افندی عزل ونفی اولنهرق اقدجه پایه مشیخت ایله توقیر اولان قره چلی زاده عبدالعزیز افندی مقام فتوایه ارتقا ایله مسرور الجنان قلندی

یکچیری اوجانی ارکانی اولان اغالر امور دولته و واردات خزینه به بسط ید استیلا ایلدکلرندن علوفه اعطاسی کسب مشکلات ایتدیکنه مبنی دفتردار وقت بولنان امیر پاشا خزینه به کلان صاغم اچهلری زیوفه تبدیل واصنافه توزیع ایتدیروب بهر یوز اون سکز اچقه مقابلنده برر التون المق و بو التونلری دخی ایکیشریالیه تحویل ایدرک حاصل اوله حق ایکوز قرق بیک قره غروش یعنی ریال ایله علوفه پی ادا ایتک اوزره برتدیر تخیل ایدوب اغالر دخی بوصورتی تحسین وتنسیب ایتلریله اجراسنه تشبث اولندقدہ اصناف طائفه سی بوظلم صریحک اجراسنه مقتدر اوله میه جقلریغنی بیان ایله صدر اعظمه عرض شکایت ایلدیلر ایسه ده مظهر شتم و تبعید اولدکلرندن بیک التمش برسنه سی رمضان شریفی اوائلنده سکز اون بیک قدر اصناف اشهلری بالتجمع شیخ الاسلام عزیز افندی پی خانه سندن قالدیروب جمعیت عظیمه ایله حضور هایونه ایصال ایتدیلر پادشاه حضر تلری ایاق دیوانه چیقوب احواله مطلع اولدقدن صکره مظالم

مزبور نک الغاسی ضمننده خط هایون اصدار واعطا ایتدکلری حالده جمعیتک سوز باشیلری شماروب اعوات مرقومه نک ازاله لری ایچون رخصت طلبنه آغاز ایلدیلر اگرچه صنادید یکچریان متغلبه لرینک تدمیر وتنکیللری مطلوب دولت ایدیسه ده بویله اصناف درندیسیله انلرک کسر سطوتلرینه جسارت اولنه مدیغندن یارین اقتضاسنه باقیلور دینلرک

خالق طاغیدیلوب مهر هایون دخی ملک احمد پاشادان اخذ ایله قبه وزراسندن سیاوش پاشایه اعطا قلندی ویکچیریلر ایرتسی کونی طرف طرف قول کزوب تکرار عقد جمعیه میدان ویرمدیلر

ظهور فتنه وشهادت بیوک والده سلطان وتدمیر صنادید یکچیریان

پادشاهک بیوک والدهسیله اصل والدلری بیننده بالطبع رقابت ومباينت حاصل اولمغله طرفینک حرم اغالری وسائر توابعاتی دخی یکدیگره خصم قوی اولدقلرینه وبیوک والدهنک صنادید یکچیریان ایله اتفاق واتحادی بولندیغنه مبنی دفع مزاحم قصدیله یکچیری اغاسیله قول کتخداسنه وبکتاش اغایه خبر کوندروب کوچک والده سلطان حرم اغالردن اوزون سلیمان اغا واسماعیل اغا وعلی اغا سزله تصمیم عقوبت ایتکده درلر مزبورلرک دفعیله تقید ایتدیکنر حالده حقکنزده وخیم اولور دیوتحریرک ایلدیکندن وانلر ایسه ذاتاً طرف سلطنتدن متوحش اولدقلردن رمضان شریفک اون دردنجی کونی اغا قبوسنده عقد جمعیت وشیشخ الاسلام ایله قاضیعیسکرلری جلبه مسارعت ایدوب ذکر اولنان حرم اغالرینک دفع ورفعلری خصوصنی خاکپای هایونه عرض ایتک ایچون صدراعظمه ارسال خبر ایلدیلر بوخبر مزبور حرم اغالرینک مسموعلری اولدقده اندورن هایون اغوانی وبوستانجی وقیوجی نفراتی جمع ایدوب بیوک والده پادشاه معسومی ازاله وکچک برادری سلطان سلیمانی اجلاس ایتدیرمک ایچون یکچیری اغاسی ایله قول کتخداسنی وبکتاش اغای دعوت ایتکله شمعی سرایی باصاقلر ولی نعمتکزی افنا ایده جکک دیرک عروق حمیت وشفقترلرینی تحریک ایتلریله جمله سی محافظه وجود پادشاهی ایچون نطق بند اتفاق واتحاد اولدقلردن مزبور سلیمان اغا برایکی یوز قدر عونایتله بیوک والدهنک دائره سنه هجوم ایدوب مشارالیهایی شهید وپادشاه حضرتلرینه سوء قصد خصوصنده متفق اولملرینه حکم ایتدکاری بوستانجی باشی وخاص اوده باشی بی و سائر بش اون کشی بی اعدام ایلدیلر بونک اوزرینه صدر اعظم و دیوان هایون وزیرلری ومعزولین علما سرای پادشاهی به دعوت وعقد انجمن مشورت اولنه رق اتفاق ارا ایله سنجاغ شریف چیقاریلوب دلالر واسطه سیله اعلان قلندی اهالی شهر چند روز مقدم حادث اولان وقعه وسپاه طائفه سی سلطان احمد میداننده مسبوق اولان مقاتله سبیلریله یکچیری اغاسی وقول کتخداسی وبکتاش اغانک خصم قویلری اولوب یکچیری ضابطان ونفراتندن منصف واهل عرض اولنلر دخی مزبورلرک حرکات واقعه وظلم وتعذیلرندن بیزار اولدقلرینه مبنی جمله سی

سنجاغ شریف الته اجابت ایتمکله سرای هایون میدانلریله ایاصوفیه و سلطان احمد حوالیسی عسکرایله مالامال اولدی و مسند مشیخت شیخ الاسلام اسبق ابوسعید افندی یه وروم ایلی قاضی عسکر لکی معزولین صدوردن حنفی افندی یه وانا طولی خواجه زاده مسعود افندی یه توجیه قلندی بناءً علی ذلك جمعیت شقاوت طبعیتله متزلزل و مندرس اولمغین یکیکچری اغاسنه طمشوار و قول کتخداسنه بوسنه و بکتاش اغایه بروسه توجیه و علی العجله چیمالری تنبیه اولندقدن صکره اوچی دخی دردست اولنه رق اعدام قلندی شیخ الاسلام سابق عبدالعزیز افندی اولاق ساقزه نفی وبعده بروسه یه کتوریلوب اقامه اولمش ویدی سکنز سنه دهامعمر اولدینی حالده استانبوله کلمسینه مساعده قاننامشدر مشارایله فاضل زمانه و منشیء یکانه اولوب مشهور اولان تاریخ بلیغنه بروسه ده ذیل تحریر و برائت ذمت ایچون ایمان اکیده درج و تسطیر ایلمش ایسه ده فی الاصل عربده جو و سلطان ابراهیم وقعسه سی متهملرندن بولندیغندن فریاد و فغانی مسموع صماخ دولت اولدی کرک والده مرحومه نک و کرک مقتول اولان اغارک بونجه زماندنبرو جمع وادخار ایتدکلری مبالغ کلیه خزینئه هایونه نقل اولمغله مصارفات دولته خلیجه معاونت ایلدی

مقتوللرک یدتغلبلرنده بولسان زمام مداخله و استیلا بوکره حرم اغالری و سرای هایون خلقی اللرینه کچمکه و صدر اعظم سیاوش پاشا دلخواهلری اوزره حرکت ایدمه مامکله اوچ آی مرورنده عزل اولنوب دیوان هایون و زراسندن پیرفروت کورجی محمد پاشا مسند صدارته کتورلدی اگرچه مشارایله یدی بحق آیدن عبارت اولان مدت وزارتنده سرای خلقی استدکلری کبی الوب صائدیلر ایسه ده امورمالیه رؤیت اولنه مامق و علوفه و یریه مامک حالسه کلدیکنندن متفذان اندرون انجام کاری ملاحظه و نفسلرینی مخاطره دن وقایه مقصدیله مصر والیکندن معزولا استانبوله کلان ترخونجی احمد پاشایی بیك التمش ایکی سنه سی رجبنده صدر صدارته اقعداد ایتدیردیلر لکن مشارایله اصلا مدارا و مماشات بلمز غایت مستقیم برذات اولدیغندن اسرافاتی قطع و واردات خزینئه یه ال اوزادانلرک دست طمعلرینی رفع خصوصنده فوق الامکان التزام صداقت ایتمکله بیچاره یی خلع و اجلاس افتراسیله متهم ایدرک بیك التمش اوچ سنه سی ربیع الاخرنده اعدام و قبودان دریا بولنان درویش پاشانک صدر اعظم نصب اولمنسه دسترس اولدیلر صدر جدید بغداد سفرنده نائل وزارت اولمش قدامدن واصحاب تمول و اقتداردن معتدل و مزایا شناس برذات اولمغله ایکی سنه یه قریب متمد اولان زمان صدراتنده هم اندرون خلقی و هم مهمام دولتی حسن اداریه موفق اوله رق خوشبجه بروقت کچوردی

شویله که وندکولر پک کلیتلو سفن حربیه استحضار ایدرک بوغازی ابلوقه ایده کلد-
 کلرندن کریده عسکر ومهمات ارسالی خصوصنده انواع تلفات ومشکلات واقع اولمقده
 اولدینگی حالده صدر اسبق مراد پاشایی قبودان نصب ومهمات مقتضیه بی مکمل صورتده
 تدارک ایلمکله بیک التمش درت سنه سنده اخراج اولنان دونما وندیک کیلرینه غلبه ایدرک
 کریده عساکر وفیره ومهمات لازمه نقل اولندی وباشباقی قولی مورده لی مصطفی اغایی
 دفتردار واداره امور مالیه بی مستقلا عهد سنده تحمیل ایدوب مومی الیه اگرچه سنین
 آتیه وارداتی صائمق قپوسنی اجدی ایسه ده علوفه اعطاسنده مشکلات کوسترمدی صدر
 مشارالیه سنه مزبورده اواخرنده مرتحل داراخرت اولدقده صوابدید ارکان دولت اوزره
 مهر صدارت حلب والیسی ابشیر پاشایه کوندردلی حالبوکه مشارالیه مقدا اوجاق اغالر-
 ینک زمان استیلا وتغلبلرنده اناطولیده بولنان سپاه نفراتنی باشنه جمع ایله دار السلطنه یه
 طوغری قادمه جنبان طغیان اولمشیکن اغلرک زوالی موجب عودتی اولمشیدی بویله بر
 تهمت سابقه ایله متهم بولندینگی حالده صدر صدارته انتخابی سوء قصده مبتنی اولمق واعمه سیله
 سپاه زور بالری بقیه سندن وسائر ددن یکرمی بیک قدر عسکر طوپلیوب هزار تکلف
 وبطائله اوچ درت آیده استانبوله دهشت بخشای ورود اولدی مورده لی دفتردار وموقوفاتی
 محمد افندی وسلطان کتخداسی غده محمد افندی مثلوعلیهنده قولا وفعلأ حرکاته جرأت
 ایدنلری قتل واعدام وسنین آتیه وارداتی درعهده ایدن ملتزمینک ویردکلی آقچلری
 ضبط ایله احاله لرینی فسخ ایدوب انحق برابر کتوردیکی اشخاصی مناصب ومأموریت
 ایله تطیب ایلمک خارج حوصله دائرۀ دولت اولدیغندن حریفلر صدر مشارالیه اظهار
 عداوت ایتمکده اولدقلمری حالده قبودان مراد پاشا دخی آتش فتنه یه مروحه جنبان
 اولمغله محافظۀ نفس امیدیه استحصاب ایلدیک ی سپاه زور بالری رفع علم شقاوت ومشار
 الیهی قتل ایتدیرنجیه قدر صرف نقدینه غیرت ایدوب مشارالیه مراد پاشا ثانیاً متکابرای
 صدارت عظاما اولدی .

بوصورتله مراد پاشا اگرچه نائل امنیه وامید اولدی ایسه ده طائفۀ عسکریه نک
 عتو وطغیانلری باشدن اشدیغندن سکمز اون بیک قدر اشراری اوجاقلره الحاقه مجبور
 وبوجهتله علوفۀ عسکریه رادۀ سابقه سندن صدمرحله موفور اولدیغنه وطرف سلطنته
 وارکان دولته احوال مشکله بی بیان ایتدکجه تحریک ایلدیکک فتنه نک چارده سنی ینه سن
 مطالعه ایله زمیننده معامله لر مشاهده ایلدیکنه مبنی بوکره دخی صدارتدن استعفا وشام

والیلکنی استدعایه مجبور اوله رق خدمت صدارت ارمنی سلیمان پاشا نامنده بزیر عاجزه
توجیه قلندی و صدر سابق شامه عزیمت ایتدیکی حالدده حمصده فوت اولدی .

وقعه و قواقیه

بجاره اختیار شرکای دولت و غارتگران مقرینک قهر و غلبه لری التنده طقسان طقوز
کون حامل مهر و کالت اوله رق الامان صداسنی ایصال مقام بالا ایتمکله عزل و مهر
هایون کرید سرداری بولنان غازی حسین پاشایه ارسال قلندی ایسه دهه برایکی کون
مرورنده (وقعه و قواقیه) نامیله زبازرد مورخین اولان اختلال عظیم دهشت انداز
وقوع اولدیغندن ینه تبدل صدارت واقع اولمشدر شویله که کرک کریدده ا کمال مدت
مشروطه ایله استبدالا عودت ایدن و کرک استانبولده بولنان طوائف عسکریه یه سلیمان
پاشانک عزلندن اولجه ویریلان علوفه کاملاً مغشوش و زیوف آقچه اولدیغندن بین الاهالی
اعتباردن ساقط اولمغله و مقرینک التزامات و مقاطعانه اولان تسلطلری حد کماله واصل
اوله رق اموال خزینه ید تغلبلرندده محو اوله کلمکله ارکان دولندن بعضیلرینک تعلیم و القا
آتیله قیو قوی اوجاقلرینک کافه سی متحداً عقد جمعیت ایدرک عرض حالمز واردر دیو
پادشاه حضر تلرینی الای کوشکنه چیقاردیلر سپاه طائفه سی عقلا سندن و معارفندان
بر قاج سوز صاحب لری ایلرو کلوب ذات هایونه فصیح و بلیغ دعار ایتدکارندن صکره
پادشاهم بر طاقم خونه دولت واردر که الاری التنده بولنان ملتزم لره سنین آتیله مقاطعات
و وارداتی وقت احاله سندن مقدم الیویروب بدلنی دخی نصف بهاسیله شوندن بوندن
طوبلادقلری خزینه سرکیلری و زیوف آقچه ایله قیایتمقده و اموال خزینه میوه ناریسیده
کبی خام ایکن تلف اولمقده اولمسیله کرید جزیره سندن مشغول حرب و قتال اولان
و بوراده بولنان قوللرک علوقه یوزی کورمز اولدیلر دیدیلر و بو کره بیک بلایله ویردکاری
آقچه دخی بودر دیو ارئه ایتدیلر و خونه مرقومه نک ظلم و تعدیلری ممالک محروسه یی
استیعاب ایتمشیکن وکلای دولت شرلرندن خوفله واقع حالی عرضه جسارت ایدم مدکلرندن
ناشی بالضروره بو وجهله کسستاخغه جسارت قلندی ایسه دهه قبیح ظاهر بسی حسن
عاقبتنه نظراً معذور و دامن عفو ایله مستور بیورلمق مرجودر دیوبت بعده اندرون
و بیروندن اوتوز قدر آدمک اسامیسی مسطور اولان دفتری ابراز و بونلرک قتل و ازاله لری
موجب صلاح دولت اولمغله مظهر سیف سیاست اولملرینی استدعا ایلدیلر طوائف عسکره
یه نک و بلکه بالجمله ارکان دولتک بوبابده آفاقلری محسوس اولدیغندن دلخواه جمهوره

مساعدده اولنمقدن بشقه چاره قالدیغنه بناء دارالسعاده اغاسی وخواجه بلال اغا ووالدباش اغاسی وخاص اوطة باشی وملکی اوسته وزوجی شعبان خلیفه و سائرلری برقاچ کون ایچنده اله کجکجه قتل واعدام و سلطان احمد میداننده اولان چنار اغاجنه اویران قلمغله سبب تسمیه وقعه اولمشدر

بو اوانده قائممقام سورنازن مصطفی پاشا مسند صدارتی و ممك زاده مقام مشیختی دردست ایتمشدر ایکن عسکری طائفه سنك اعتراضلرینه بناء اون اوچ ساعت مرورنده سلسیره والیسی اولان صدر اسبق سیاوش پاشا ثانی صدر اعظم و بعض عملیات خفیه یه ابتناء خواجه زاده افندی شیخ الاسلام نصب اولندیلر

صدر مشارالیه محمومأ در سعادتیه وصولندن برای صکره دفتر دار محمد پاشا کبی برفاضل وادیی مجرد استرقاب بلا سیله قتل ایتدیردیکی کیجه فوت اولغله مهر هایون شام والیسی بونی اگری محمد پاشایه ارسال قلندی

شیخ الاسلام مسعود افندی اطولی قاضی عسکری ایکن حق کویلك ایله شهرت بولوب وقعه و قواقیه ده تعیین جمهور ایله مقام مشیخته واصل اولمشیدی بغایت متعظم و تند خو اولدیغندن ماعدا کافه امور دولت کف استقلاله رام و مرجع خاص و عام اولمق سودا سیله زباندرا زلفی مرتبه افراطیه ایصال ایلدیکندن بیچاره یه خلع واجلاس تهمتی اسناد اولنه رق دیار بکزه نفی نامیله بروسه یه کوندریلوب اوراده اعدام قلندی و مقام مشیخت صدور دن حنفی افندی یه توجیه بیورلدی

صدارت کوپرلی محمد پاشا

دولت علیه اختلالات داخلیه ایله بحران حالنده ایکن بوسنه اخراج اولنان دونمای هایون دخی وقوعبولان محاربه ده مبتلای هزیمت کامله اولغله وندکلورلر بوزجه اطه ولنی جزیره لرینی استیلا ایلدیلر بناء علیه دار السلطنه عثمانیه محصور حکمنده قالدیغندن ارکان دولت دمبسته خیرت اولدقلری حالد شام طرابایسی توجیه اولنوب خرج راه تدارکی ایچون تك وپو ایتمکده اولان کوپرلی محمد پاشا والده کتخداسی معمار قاسم اغانك سوق و تعریفیله بيك التمش التی سنه سی ذی القعدة سنك یکر می بشنجی جمعه کونی شرائط استقلالیه ایله حامل مهر صدارت و متکفل اصلاح امور دولت اولدی

وندکلورلک مرام و مقصودلری بوزجه اطه ولنی جزیره لرینی تملك ایتمک اولیوب مجرد استانبولی تضییق ایله کرید جزیره سی و هییچ اولمز ایسه محاسره دائمیه تحتنده

بولنان قندیه قلعه سنی خراجی نامیله مقدار معین بر مبلغ اعطاسنی دخی دائما عرض واستدعا
ایتمکده ایدیلر لکن دولت علیه بوقدر غوائل داخلیه سیله برابر قندیه قلعه سی تسلیم اولند قجه صلحک
امکانی اولمدیغنی بیان ایله هر سنه دونما وعسکر و مهمات ارسالنده اظهار ثبات و متانت ایدر ایدی
شول درجه یه قدر که بر کون حضور هایونده عقد اولنان مجلس عمومیده لوازمات سفریه
ایچون مقتضی اولان اقیچه نك فقدانی در میان اولند قدده والده سلطان حضرتلری شوکرید
جزیره سنك کاملاً فتحه غیرت اولنسون بن کافه مجوهرات و سیم وزره متعلق اوانی
وادوآمی دخی اعطا وفدا ایدرم بیور مشلردر .

بوسنه و هر سك طرفلرنده و کرید جزیره سنده محاربه یه دوام اولنقدده ایسه ده بوغازده
بولنان و ندیک دونماسنی دفع ایتمک و بوزجه اطه و لمنی یی تخلیص ایله استانبولی محاصره
بحریه دن قورتارمق اهم امور دن اولمغله صدر اعظم دونمای هایونك تنظیم واکالنه اقدام
ایتمکله برابر کافه جیوش عثمانیه اوجاقلرینی بالاستصحاب بوغازه عزیمتی قرارلشدیردی
واسرافات و اتلافاتك قطع و تنقیحه اعتنا ایله خلیجه مصارف تنقیص ایلدی لکن بونك
منافع و فوائدی ایلروده کوریله جکنه و شمیدی ایسه مصارف سفریه ایچون اچه لازم
اولدیغنه مبنی طرف هایوندن باسند اوجییک کیسه استقراض ایدرك استحضار لوازمات
حربیه یه چالشمقدده ایکن سپاه طائفه سنندن بر طاقم خذله صدر مشارالیه علیه اعلاى
لوای شقاوت ایتمشله ایسه ده آتش فساد لهیب افروز اشتداد اولمقسزین یکیچری ضابطانی
معرفتیله مواقع مفسدتلری باصیلوب برقاچوز نفوس خبیثه ازاله اولنمغله کانون طغیان
منطقی واون بش یکر می سنه دنبرو وقت وقت میدانه چیقان قاضی زاده لیلر غوغای
معلومی دخی بعض اوك ایاق اولنلرك نفی و اجلاسيله مندفع اولدی .

دفع و تنکیل دونمای و ندیک و فتح بوزجه اطه و لمنی

صدر جلادت کستر بیك التمش یدی سنه سی شعباننده بحر سفید بوغازی جانبیه
سوق موکب ظفر اثر ایدوب دونمای هایون دخی واصل اولمغله و ندیک کیلریله محاربه یه
مباشرت اولندقدده یکیچری طائفه سی بندکاری سفینه لری باشند قاره ایدوب ساحلره
دو کملریله و سغاین سائر دخی اوتیه و برویه صاوشمغله دونمای هایونده یننه علایم
پیشانی ظهورده کلدی صدر مشارالیه بو حالی مشاهده ایله منسلب الشعور اوله رق پیشرو
فراریان اولان التیوز قدر یکیچری یی قتل و اعدام و ساحلره لنگر انداز اولان سفن
اسلامیه یی و باخصوص باشدارده تعبیر قلنان پاشا کیسنی کزند دوشمندن صیانت ایچون

مناسب موقعلره عظیم طویلر وضع و تعییسه سنه اهتمام ایلدی شجاعت و درایتله مذکور و کور
 قپودان نامیله مشهور اولوب سنه سابقه ده دونمای هایونی پریشان و بوزجه اطه و لمنی بی
 ضبط ایله اکتساب شهرت و شان ایدن و ندیک امرالی بوکره دخی نائل اولدینی غالبته
 مغرورا باشدارده و سائر اسلام کیلرینی بسته زنجیر تسخیر ایتک سودا ایله هجوم ایدرک
 واصل امید اولمغه تقرب ایتشیکن قره محمد نام برطوپچی غاز بسنک اتدینی طوپک کله سی
 امرال مزبورک سوار اولدینی کینک جبه خانه سنه تصادف ایتمکله مذکور کی ایله یدکی
 اولان قالیون و ایچلرنده بولانان ایکیدین متجاوز ضابطان و عسا کر منتخبه ایله یابرهوا
 اولدیغندن سفن سائر دشنم مبتلای دهشت عظیمه اوله رق فرار ایلدیلر بونک اوزرینه
 صدر مشارالیه سجده شکری ادا ایلدکن و خدمت و شجاعتی سبقت ایدنلره مکافات
 و خلاقی حرکتده بولانلره ترتیب مجازات ایتدکن صکره بش التی بیک قدر عسکر
 امرالیه بوزجه اطه سی و متعاقبا دونمای هایون ایله قپودان طوپال محمد پاشایی کوندره رک
 لمنی جزیره سی استردادده موفق اولمغه منصورا و مظفرا ادرنه ده رکاب هایونه واصل
 و انواع الثفات سلطانی یه نائل اولدی غرائبندر که یکچیری اغالغندن متقاعد قره حسن
 زاده حسین اغا و قعه لرده طرف سلطنته متمخص بولوب رأی و تدبیری دخی موافق
 تقدیر دوشمکله مؤتمن دولت و مستشار سلطنت مزیتنی حائز اولمشیدی بواوانده
 صدراعظمک امرای و عسکریدن پک چوق آدملری قتل و اعدام ایلدیکنی استماع ایتدکه
 شیخ الاسلام افندی یه خبر کوندروب کوپریانک حرکات و مشوارینه نظرا مظفرا عودت
 ایدر ایسه جمله من حقنده موجب وخامت اوله جفی کور نمکده اولدیغندن لزوم عزل
 و تبدیلی ضمننده مابین هایونه تذکره یازسونلر بن دخی لازم کلان تبلیغاتی اجرا ایدرم
 دیدی شیخ الاسلام افندی اکرچه حال بویله ایسه ده صدر مشارالیه و ندیک دونماسی
 دفعه موفق اولوب بوزجه اطه یی فتح ایتک ایله مشغول اولمغه عزل و تبدیلی دولته مضر
 اولور دیو جواب و یردیکي حالد اغای مومی الیه تکرار پیام اصرار ایصال ایتدیکنه مبنی
 بالضروره شیخ الاسلام افندی والده سلطانیه تذکره تحریرینه شروع ایتسنی متعاقب
 کتخداسی کلوب قولاغنه قره حسن زاده نک فجئه وفاتی اخبار ایلدیکندن ماده
 برطرف و صدر مشارالیهک مظهر توفیق اوله جغه براءة الاستهلال اولدی
 مقدا اردل قرالی اولان بتان غابور فوت اولدقده اوغلی صندالی قرالیه اقعاد
 اولنش ایسه ده عدم رشد و کفایتی سببیه حسن ادره ده مقتدر اوله مدیغندن امرای مجاردن
 راقوقچی اوغلی اواخر سلطنت مراد خانیده حکومت اردلی در دست ایلدی لکن

اولوقت مومی اليهك قرالغی جانب ساطنت سنيه دن تصديق اولنماغله بعض محاربات جريان ايتمشيكن عصر ابراهيم خانیده عرض ايتديكي كالای اطاعت وفرمانبری منظور نظر سلطانی اولوب اردل قرالغی احسانيله مظهر اکرام اولمش وکنندوسی بهادر و جنک جوهر آدم اولديغندن دائما نمچه وله دولتلیله محاربه ايله امرار وقت ایتکده بولمیشیدی پادشاه حضرت تلیزینک بوکره ادرنه یه تشریفلری جهتیله رسم قدیم عثمانی اوزره افلاق وبغدان ویوده لری استفان وقسطنطین بکدر ايله قرال مشارالیه رکاب هایونه دعوت اولندقلرنده دولت علیهک مشاغل واقعه سندن استفاد ایتک ملاحظه سنه بناءیکدیگریله اتحادلرینه مغرورا بعض اعذار واهیه سرد ایدرک امتثال فرمان ایلدیلر بنا برین افلاق ویوده لگی منجنه وبغدان ویوده لگی ولیقه نام بکدره توجیه و دیوان هایونده خلعت واسکوف کیدیر یلهرک تلطیف اولندقدن صکره مقام امارتلیزیه اقعدا لری خصوصی سلسیره والیسی فضلی پاشایه حواله قلندی معزول ویوده لر بالاتفاق تدارکات ادوات حرب قتال ايله مدافعه ایچون اردو قوروب تحصن ایتشار ایهده مأمور اولان عسکر تاتار مملکتینی غارت قویلدقلرندن و فضلی پاشا دخی مرتب معیتی اولان جیوش عثمانیه ايله طونه یی مرور ایلدیکندن پابرچای استقرار اوله میوب ممالک اردله فرار ایتلریله منصوب اولان ویوده لر محل امارتلیزیه اقعاد قلندی

سفر اردل وفتح ینوه

ذکر اولنان فراریلرک رکاب هایونه اعزامی وکنندوسنک دخی تجدید حکومت ایچون سده سنیه پرویمال ایلیسی راقوقچی اوغلنه تکرار امر و اشعار اولندقدن ینه اعذار واهیه سردیله اطاعت امردن نکول ایتسنه مبنی صدر اعظم کوپرلی محمد پاشا اردل اوزرینه سردار نصب اولنه رق بیک التمش سکر سنه سی رمضانده اولجانبه توجیه لوای سطوت ایلدی

ممالک اردلک قبوسی مقامنده اولان ینوه قلعه سی ودار الاماره حکومت اولان اردل باغراد ی فتح و تسخیر وراقوقچی اوغلی هواداران ی اولنلر قتل و تدمیر اولندقدن صکره نمچه حدودنده واقع اولوب قرال مشارالیهک تحصن ایلدیکی قلعه یه سوق و موکب جلادت اولنق تصمیم اولنمشیکن آتیده بیان اولنه جق ابازه حسن پاشا جمعیتی بروسه یه طوغری تقرب ایلدیکنه مبنی وارد اولان خط هایونه امتثالا صدر اعظم عودته مجبور اولدیغندن واهالی اردلک دخی عرض اطاعتلری جهتیله یغما گران تاتاردن محافظه لری

زمانی کلمش ایدوکندن راقوقچی اوغلنک دفتر داری اولان بارچقای اقوش نام بک زاده یه اردل قرالغی احسان و خلعت و طبوز و قوقه اعطاسیله تتمیم مراسم اشرفیات اولندیغی مثللو اردل قرالغنک ویرکوی قدیمی اون بش بیک التون ایکن بوکره قرق بیکه ابلاغ و بدل مصرف اوله رق رکاب هایونه بیک کیسه اچیه تقدیمی دخی شرط قلمشدر قرال جدیدی محافظه و ممالک اردلی محارسه ضمننده طمشوار بکاربکیسی علی پاشا ینوده تمکین و بودین والیسی کنعان پاشا عنوان سرعسکری ایله تکریم اوله رق صدر اعظم سرعت ایله رکاب هایونه مراجعت ایلدی

تدمیر جمعیت آبازه پاشا

ابنای سپاهیاندن ابازه حسن اغا مقدما حیدر اوغلی نامنده صاحب جمعیت برشتقی پی طوتوب استانبوله کتور مکه مقابله خدمتده ترکن اغالغی یعنی کلیم سنجاغی کندوسنه توجیه اولندیغندن کوندن کونه ثروت و قدرتی ازدیاد بولوب اوجاق اغالینک زمان تغلب واستیلارنده ابشیر پاشا ایله متحدا مزبور اغالر علیه علم افراز طغیان اولمش و اغالک تدمیر و تنکیلی بونلرک آتش فته لرینی تسکینه سبب اوله رق مؤخره دخی مزبور ابازه حسن اغایه حلب والیسی احسان قلمشیدی بوکره اردل سفیرینه کلمی امر اولدقدده صدر اعظمک سابقه اولان شقاوتکارانک و ظلمه امرانک قتل و اعداملری خصوصنده اولان شدتی درپیش نظر مطالعه ایدرک خوفه دوشدیکندن شام والیسی طیار اوغلی احمد پاشایی و اناطولی والیسی جان میرزا پاشا و معزول و منصوب اون بش قدر امرا ایله عقد اتفاق و صدر اعظمک سیف سطوتندن فرار ایدن سپاه اشقیایی دخی بونلره التحاق اتمکله اوتوز بیک قدر کشتنی اولدقلری حالد قونیه یه طوغری توجه و صدر اعظمندن منساب الامنیه اولدقلرندن بحثله طیار اوغلی احمد پاشا خدمت صدارتده استخدام اولنور ایسه سفره کیده جکلرینی و بوکا مساعده بیورلمدیغی تقدیرجه روم ایله کچمک احتماللری اولدیغنی مسین رکاب هایونه عرض محضر تقدیم ایلدیلر سرای خلقتنده و مأمورین دولت ایچنده کوپرینک استقلال و سطوتندن خوفناک پک چوق آدم بولمغله ماده بی اعظام و ترویج مقصد اشقیایه اهتمام ایتدیلر ایسه ده پادشاه حضرتلری صدر اعظمک محافظه جاه و اعتباری خصوصنده فوق العاده ثبات کوستر دکلرندن عرض محضره جوابا کوندریلان خط هایونده وزیر اعظم اردل سفیریه مشغول اولدیغنه مبنی تبدیل صدارت زمانی دکلدر اکر روم ایله کچمک خوف اتمکده ایسه کنز جمعیتکزی

طاغیدوب منصب‌ریکزه رجعت و یاخود بغداد محافظه‌سنة عزیمت ایدک دیو امر و فرمان بیورلدی مع مافیه صدر اعظمک دخی عودتی تعجیل اولندیغندن اردوی هایون سرعت سیر ایله ادرنده رکاب هایونه مواصلت و متعاقبا پادشاه حضرت تلیله برابر استانبوله عزیمت ایدوب صدر مشارالیه اسکدار محراسنه نصب خیام آرام ایلدی ابازه جمعیتی ترویج مرآمدن مایوس اولدقلرندن قوه جبریه ایله شاهد مقصودی دراغوش ایتک خلیاسیله بروسه طرفلرینه طوغری قادمه جنبان هجوم اولدقلرند بروسه محافظه‌سنة مأمور اولان قائم مقام سابق کنعان پاشا دخی خوف قهر وزیر اعظم ایله اشقیایه التحاق ایلدیکندن عتو و طغیان کسب اشتداد ایلدی ایسه ده دفع و تنکیلاری ایچون سردار تعیین اولنان دیار بکر والیسی مرتضی پاشانک خبر قرب وصولی جمعیت اشقیانک عودتی استلزام ایلدی سردار مشارالیه ایله اشقیایه بیننده وقوع بولان محاربه ده اگرچه موکب سرداریده نوعما هزیمت واقع اولدی ایسه ده نشر اولنان فرمانلر و ابازه پاشا ایله متفقلرینک واجب الازاله باغی اولدقلرینی متضمن ویریلان فتوای شریف قوتیله زیر حکم و تغلبلرند بولنان فلاغ مأمورین دولت دست تحفظلرینه کچمش و سردار مشارالیه دخی جمعیت عسکریه‌سنی بالتظیم حابه داخل اولمش ایدوکنندن جمعیت اشقیایه میدانده قالب هر جانبدن مرجوم وزاد و ذخیره‌لری معدوم اولمق حسیله قوت و قدرتلری کوندن کونه ضعفه مبدل اولدی بناء علی ذلک تسایم اولمق صورتند مرتضی پاشایی بالاغفال حابه کیروب بغته قلعه‌یی ضبط ایتکی بیلرند ترتیب ایتمشلر ایسه ده سردار مشارالیه واقف احوال اولدیغندن دها رنگین حیل و تشبثات خفیه ایله مزبورلری اغفال ایدرک دام انتقامه دوشردی و شهر حله کیردکلری کیجه جمله‌سنی قتل و تدمیر ورؤس مقطوعه‌لرینی استانبوله تسیر ایلدی سابقا افلاق و یوده‌سی اولوب اردلستانه فرار ایدن قسطنطین بک بر تقریبه مملکت بغدادنه مستولی اولدیغندن و افلاق و یوده‌سی منجنه بک که کنجلیکی اوانده کنعان پاشا دائر سنده تربیه اولنه‌رق لسان عربی و فارسی تحصیل ایش و کنج بک نامیله کسب شهرت ایتشیدی اودخی طرف دولته عصیان ایلدیکندن اوزرلرینه عسکر تاتار سوقیله جمعیتلری پریشان ایدیلوب افلاق و یوده‌لنی قسطنطین بکک بغدادنی استیلا سنده طرف دولته دخالت ایدن ولیقه بکه و بغداد و یوده‌لنی مقدما یکرمی سنه قدر بغداد و یوده‌لغنده بولنوب صداقت و عبودیتی تجربه قلنمش اولان و یوده‌نک اوغانه احسان اولنه‌رق مقام امارتلرینه اقعاد قلندیلر

اردل قرالغندن مهجور اولان را قوقجی اوغلی جمع ایده‌بلدیکی عسکر ایله اردلستانی

استیلايه عازم اولدی ایسه ده بودین والیسی سیدی احمد پاشانک سیف شهابتیه منہزم و منعہم اولدقدن صکرہ نمچه لولر امرای مجاردن کیانوشه عسا کر وافرہ ترفیقہ اقدار وارسال ایلدکارینه و عسا کر عثمانیه دخی مشتایه چکلہش بولندیغنه مبنی مزبور کیانوش اردلستانی ضبط و طرف سلطنت سنیه دن منصوب اولان قرال اقوشی اعدام ایلدیکی خبری واصل در دولت اولدقدہ قیودان کوسه علی پاشا سردار تعیین و تسیار قلندی سردار مشارالیه بیگ یتیم برسنه سنه حصون اردلن وراد قلعه سنی فتح و تسخیر و ایرتسی سنه مزبور کیانوشی دخی قتل و تدمیر ایتمکله ایاقی میخال نام بک زاده پی انتخاب اہالی ایلہ مقام قرالی یہ اقعہ ایلدی مومی الیه ایاقی میخال جانب دولت علیہ دن نصب اولنان اردل قرالارینک خاتمہ سی اولوب ویانہ محاصرہ سنہ قدر یکرمی سنہ دن متجاوز زمان مسند حکومتمہ پایدار اولمش و او اراقی قرالغی فراغت ایلشد

وفات کوپرلی محمد پاشا و صدارت فاضل احمد پاشا

نمچه لولرک ممالک اردلہ تسلط و بعض قلاعنی ضبط و تملک ایللری بین الدولتین مازعات و مباحثاتی مستلزم اولمغله پادشاه حضرتلری ادرنہ یہ نهضت و بعد الوصول صدر اعظم کوپرلی محمد پاشا بیگ یتیم ایکی سنہ سی ربیع الاولندہ اختیار سفر آخرت ایتمکله وصیتی موجبہ رکاہ هایون قائم مقامی بولنان اوغلی فاضل احمد پاشا متکاپرای صدارت عظما اولدی مرحوم مشار الیه اصحاب لیاقت و درایتدن قوی العزم کرک باران دیدہ اولمغله شقاوتکاران عسکریہ و اعادی خارجیہ یی شمشیر سطوتیہ تأدیب و ترہیب و امور مختلفہ دولتی تنظیم و ترتیب ایتدی ایسه ده پک چوق و زرا و امرای قتل و افنا ایلدی هله کرید سرداری غازی حسین پاشا کی نامدار و امکدار بریر شجاعت سمیری و سیدی احمد پاشا مثللو بہادر و دلیری استرقاب بلایه سیلہ اعدام ایلسی صفحہ محاسنی لکہ دار ایتشد

ظہور سفر نمچه و فتح ایواز

نمچه لولرک اردل قلاغندن قطع ید و قنیرہ قلعه سی جوارندہ خلاف عہد بناوزرین وار نامیلہ مسما ایلدکاری یکی قلعه یی ہدم ایللری نمچه ایلچیسنہ افادہ و برسنہ دن متجاوز بویابده مذاکرہ و مخابرہ اولندیغنی حالده موافقتلری استحصا لقلہ مدیغنه مبنی عقد اولنان مجلس مشورتده نمچه اوزرینہ اعلان سفر اولمسی قرار پذیر اولمغله صدر اعظم

فاضل احمد پاشا سردار اکرم نصب و تعیین اولنه رقی بیک یتیمش اوچ سنه سی رمضانده
 بالجمله جیوش عثمانیه ایله جانب باغراده عطف عنان ایلدی اردوی هایون ایله استصحاب
 اولنان نمچه قیو کتخداسی و مقدما اردل سر عسکری علی پاشایه و مؤخر معسکرهایونه
 کلان ایکی نفر ایلیچیلر بلغراده حضور صدر اعظمییه قبول اولنوب ذکر اولنان یکی
 قلعه نیک تخریب واردل قلاغنیک تخلیه سیله سلطان سلیمان معاهده سننده ویرلمسی مشروط
 اولان اوتوز بیک التون ویرکو ویاخود مراد پاشا صاخنده اعطاسی مقرر اولان ایکیموز
 بیک غروشک تأدیه سی تعهد اولندیغی حالدیه تجدید معاهده اولنه جغنی افاده اولندقدیه
 تخریب و تخلیه ماده لرینی درعهده ایدوب ویرکو اعطاسنده مخالفت اظهار ویرمقدار هدیه
 دینلور ایسه چاره سی بولنه بیله جگنی تذکار ایتلمه یله برابر استانبولده ایکن سبقت ایدن
 مذاکرانده ویرکو لقر دیسی اولمندیغی درمیان ایلدیلر صدر اعظم دخی دولت علیه حضور
 و اسایش اوزره بولندیغی حالدیه بوقدر کلفت و مصرف اختیار یله بورالره کلند کدن صکره
 البته بو ماده قبول اولمق اقتضا ایدر دیو جواب ویردی و بوجه تله مصلحت تسویه
 اولنه مدیغندن مذکور ایلیچیلر بودینده بالتوقیف صدر مشارالیه اردوی هایون ایله
 استرغونه دوغری حرکت ایلدی نمچه لولر مطالب دولت علیه یه تمامیه موافقت والی
 التیمش سنه دنیرو متروک اولان ویرکو مسئله سنی دخی هدیه نامیه قرارلشدیرمغه ابراز
 ملایمت ایلدکارینه نظراً او یوشلوق خصوصنده موانع کلیه قانامش ایسه ده فاضل احمد
 پاشا مبدأ صدارتنده مع الفتوحات شانلو بر معاهده عقدینه دسترس اولغی التزام ایلدیکنندن
 جنگ و حرب طرفی اختیار ایلدی

اورته بحار قلاغندن اولوب بیک اون ایکی تاریخننده فتح واردلستانه الحاق اولنان
 ایوار قلاعه سی مؤخر نمچه لولر انه کچمش واستحکامات جسیمه ایله تحصین قلمشیدی
 انک ازسرنو تسخیری خصوصنه قرار ویرلدیکنه مبنی استرغوندن طونه اوزرینه کوپری
 انشاسنه ابتدار وقارشو طرفک محافظه سی ایچون اون بیک قدر عسکر امرار
 اولنغله ایوارده بولنان جنرال سکز بیک عسکر انتخاب و عساکر مفرزه اسلامیه یی
 باصمغه شتاب ایلدی ایسه ده وقوع بولان محاربه ده عسکر دشمنک ثائنندن زیاده سی
 مقتول و مأسور اولدی و متعاقباً کوپرینک انشا آتی آتام قانمغله صدر اعظم بالجمله اردوی
 هایون خاقیه قارشو جانبه مرور ایلدی مشهور جنرال مونته قوقولی معیتنده بولنان
 اردو ایله قلعه مرقومه یی محارسه ایچون کیشیکن جنود اسلامیه نیک حملات و هجوملری سببیه
 عودته مجبور اولدیغندن بر ای قدر عراض و عمیق محاصره ایله قلاعه ایوار بند کمند تسخیر
 گرفتار اولوب اطرافنده بولنان پلنقه لری دخی کیمی ضبط و کیمیسی تخریب و ممالک اعدا

پازده خيول يغما قلندقدن صكره مشتای باغرا ده عودت اولندی واردوی هایون معیتند بولنان اردل قرالی و مملکتین ویوده لری محل امارت لرینه کتمکه مآذون اولدی لر و موسم شتا منقضیه اولمق سزین نمچه لولرک قنیرنه قلعه سنی محاصره ایتمک لری استماع اولمغله صدر اعظم بیك یتش درت سنه سی رمضاننده باغرا ددن حرکت و هنوز عسا کر اسلامیه کاملا مجتمع اولمده یغندن موجود اولان اوتوز بیك قدر عسکر ایله جانب اعدایه توجیه وجهه عزیمت ایدوب قلعه مرقومه یه تقرب اولندقدن جیوش دشمن ترك محاصره ایله فراره اغازایتملریله دراوا و مور و انهر لر یك ملتقا سنده بنا اولنان و باعث حرب اولان مواددن بریسی بولنان یكی قلعه نك محاصره سنه ابتدار قلندی نمچه اردوسی نهرک قارشو طرفنده ارام و قلعه مرقومه یه تمديد ایلدکاری کوری واسطه سیله نوبنو اعانه یه اهتمام ایلدکاری حالدده زور بازوی عسا کر اسلامیه ایله عنوة فتح و تسخیر و طوب و مهمات لری اخذ اولندقدن صكره تخریب اولندی بو ائناده اردوی هایونده بولنان نمچه قبو کتخداسنه عقد صلح ایچون رخصت کامله کلدیکی جهتله عقد مجلس مکالمه اولنوب نمچه لو یندنه بولنان اردل قلاعی ردو تسلیم اولنق و هدم اولنان یكی قلعه فیما بعد اعمار اولنماق و رکاب هایونه عقد صلح عقببنده ایکیوز بیك غروش قیمتلو هدیه تقدیم ایدلک شرط لری و شرائط متفرعه سائر و یکر می سنه مدت ایله بیك یتش بش سنه سی محرمی اوائلنده و مجلس مذاکره عقد اولندیغی کون همان بر قاج ساعت طرفنده تنظیم مصاحبت اولنوب طرفین مرخص لری ترقیم اولنان معاهده نامه یی امضا ایلدی لر لیکن طرف پادشاهیدن حربك بتورلمسی تعجیل و جانب سردار اکر می یه خطوط هایون ایله توصیه و تأکید قلعه قدده اولدیغندن سند مزبور طرف ایمپراطوریدن تصدیق اولنمق سزین ترك حرب اولنسه ایشی اوزاده جقلری و بوجهتله مطلوب اولان سرعت ختام سفر حاصل اولمیه جنی منفهم اولدیغنه مبنی عهد نامه مذکور ایمپراطور جانبندن امضا و صدر اعظم طرفنه ایصال اولندقجه ترك حرب اولنماسی دخی مقاوله اولندی بنا برین صدر مشارالیه رابه نهرینی کچوب یانق قلعه سنی محاصره ایتمک خصوصنی تصمیم ایدرک کچیدیری بولمق ایچون نهرک بر طرفندن و جنرال مونته قوقوللی دخی مانع مرور اولمق قصدیله دیگر جانبندن کتمکده اولدقلری حالدده انجق درت سواری یان یانه کچه بیله جک مرتبه ده کوچک برکچید محلی بولنوب خفیفجه بر پیاده کویرسی انشاسیله قارشویه اون بیك قدر عسکر امرار اولنهرق درجنک اول نمچه لولر اورمانلر ایچنه چکلمکه مجبور اولمشلر ایکن بردن بره نهرک طغیانی سببیه جسر مذکور منهدم اولدیغندن دشمن بو حالدن مستفید و عسا کر

اسلامیه دخی ورود امداددن نامید اوله رق اردوی هایون جانبیه کجه بیلان اوچ درت بیک کشیدن ماعداسی مقتولا و مغروقا و اصل درجه شهادت اولدی

عقد مصالحه نمچه

جیوش اسلامیه نك موجودینه نظراً ضایعات واقعه جزئیات قیامندن ایسه ده نهر مزبورك طغیانی و نمچه لولرك امر محافظه ده اولان اقدامی مانع مرور اولدیغندن پلاطینه کولی اطرافی و شمیدی به قدر اسلام اتی ایغنی باصمیان ممالك اعدا تخریب و یغما اوله رق سکتواره واصل و بر قاج کون صکره ایوار طرفنده نمچه لولرك تجمع و تعرضلری استماع اولمغله موکب هایون تکرار استرغوندن طونه نهرینی عبورایله ایوار آلتنه وارد اوله رق جنرال مونته قوقوللینك زیر قومانداسنده بولنان اردو اوزرینه هجومه حاضر لمقده ایکن نمچه ایمپراطوری طرفندن صلحنامه معهود امضا و ارسال اولمغین شلك طویلری انداختیله باریشق اعلان اولندی و سرحدات اسلامیه نك امر محافظه لری بالتنظیم سردار اکرم جانب باغرا ده مراجعت و موسم شتایی اوراده امرار ایتد کدن صکره وارد اولان نمچه ایله چیسيله هدیه معهوده نی مستصحباً ادر نه ده رکاب هایونه مواصلت ایلدی

بیک الی بر تاریخنده قریم خانی نصب اولنان محمد کرای الی درت سنه سی شعباننده معزول و جنبی خواجه نك سوق و تعریفیله برادری اسلام کرای ثانی مقام خانی به موصول اولوب روس وله مملکتلرینی بالدفعات بازده خیول یغما و مقرر اولان ویرکو و هدایایی مع زیاده تحصیل و استیفایه موفق اولدقدن صکره بیک التمش درت شعباننده واصل رحمت رحانی اولمغین مشارایله محمد کرای ثانی سلطنت قریم ایله اجمال اولمشیدی بودفعه سفره مأمور ایکن کلیوب یکرمی بیک قدر عسا کر تاتار ایله اوغانی کوندر میسی موجب انحراف دولت اولدیغی حالد نوغای تاتارلرندن بعض قبیله لر سلاستره اطرافنده توطن ایتک استدعاسنه اغاز ایدرك مظهر مساعدده هایون اولدقلرینی تحقیق ایلد کده ذکر اولنان قبیله لری قتل و غارت ایله راه عزیمت لرینی سد ایلدیکندن امارت قریم بیک یتش التی سنه سنده عادل کرایه توجیه و دونمای هایون ایله کفه به ارسال قلندی

خان معزول اگرچه مدافعه به تشبث ایتدی ایسه ده مقتدر اوله میه جغنی تیقن ایتمکله طاغستانه فرار و اون سنه قدر اوراده قرار ایدوب بعده مقعد صدقه خرام ایشدر

عزیمت صدر اعظم فاضل احمد پاشا بجزیره کرید

نمچه واردل غائله لری دلخواه دولت اوزره قرین تمام اولوب امور داخلیه دخی یولنه

کیرمش اولدیغندن ارتق کزید سفرینه نتیجه ویرلک زمانی حلول ایلدیکنه مبنی صدر اعظم
 فاضل احمد پاشا سردار اکرم نصب اولنه رق بالجمله جیوش عثمانیه اوجاقلری ايله بیک یتیش
 یدی سنه سی موره جزیره سنه طوغرو عطف زمام وسواحل مناسبه دن قرق اللی قطعه
 دوئمای هایون سفینه لر ايله درت دفعه ده حانیه قلعه سنه نقل موکب اسلام ایلدی یکر می
 اوج سنه دنبرو کزید جزیره سی عسا کر عثمانیه نک تعلیم کاه فنون حربیه سی حکمنده
 اولقله هر طرفی حوزه حکومت سلطنت سنیه ده داخل اولوب یالکز قنیه قلعه سیله صوده
 لیمانی اغرنده وقیز قلعه سی مثللو بر قیا اوزرنده واقع صوده قلعه سی وندکلور النده قالمش
 ایسه ده انلر دخی محاصره دائمه تحتنده ایدی اسپانیا وایتالیا طرفلرندن بقیه اهل صلیب
 وادیسنده علی الدوام طاقم طاقم فداییلر کلوب اعانه ایتمکده اولدقلری حالدده بودفعه سردار
 اکرمک عسا کر وفیره ايله کزید جزیره سنه مروری وندکلوری دوچار خوف وتلاش
 ایلدیکندن بر طرفدن جانب سلطنته ایلاچی ارسالیله قنیه قلعه سی ویرکوسی اوله رق سنوی
 یکر می بش بیک التون اعطا اولنق اوزره نائل مصالحه اوله بیلملری ایچون خاکپای
 هایونه ووکلا ومتنفذان عصره مبالغ کلیه عرض ایتکه مسارعت و بر جانیدن دخی اوروپانک
 اعانه وامدادینه دسترس اولق قصدیه هر درلو تشبثات وفداکارلغه مبادرت ایلدکلرینه مبنی
 سردار مشارالیه کوندریلان خط هایونلرنده فتح قنیه دهامتد اوله جق اولور ایسه
 عسکر ومهمات ارسالنده اولان مشکلات متزاید وسکنه ممالک اسلامیه نک بو خصوصدن
 طولای کرفتار اولدقلری تعب ومشقت متکثر اوله جغندن بحثله وندیک ایلاچیسنک مطابی
 تلمیح وتوضیح اولنغه باشلادی لکن صدر مشارالیه بو بابده اظهار متانت وحیت ایدرک
 قلعه محصوره نک فتحی قوه قریبه یه کلدیکنی ووندکلورک مال وقالنه اعتبار اولنمامسنی کندو
 قلمیه ویک مؤثر صورتده طرف پادشاهی یه اشعار ایلدیکندن ماعدا شیخ الاسلام افندی
 وقائمقام پاشا ومصاحب مصطفی پاشا وسلحدار اغایه وخواجه شهر یاری وانی افندی یه
 مکتوبلر تحریر ایدوب دشمنک سرمست سکر مکرری اولمقدن تحذیر وعسا کر اسلامیه
 اغورنده بو قدر مشقت وتلفات اختیار ایدرک شاهد مقصودی دراغوش ایتک تقرب
 ایتشیکن تکلیف کف ید موجب وخامت اوله جغنی اخطار وتذکر ایتمکله دوام حربیه قرار
 ویریلوب ایلاچی مزبور طرد قلندی

فرانسه دولتی سلطنت سنیه ايله مصالح ومعاهد اولدینی حالدده وندکلورک مواعید
 کثیره سنه طیانهدقلرندن کویا دولتک رضاسی یوق ایسه ده هالینک اعانه سنه پرده کش ممانعت
 اولنه مامش اولق صورتنده فرانسه قرانک عم زاده سی اولان پرنس قومانداسنده اوله رق

اون بش بیک قدر فدایی عسکری مالطه و پاپا کیلریله برابر التمش قدر سفن حربیه به تحمیل و قندیه قلعه سنه توصل اولمغله عسا کر مزبوره کمال نخوت و غرور ایله قلعه دن چیقوب جیوش اسلامیه اوزرینه هجوم ایتدکلرنده پرنس مزبور ایله ایکیک قدری قنطره سیفدن امرار اولنوب بقیه سی رجعت قهقری به مبتلا اولدقلری مثللو سفن حربیه دخی ساحله بولنان اسلام طایبه لرینی طوپه طوتمش لر ایهده برشیئه قادر اوله مدقلرندن بشقه طقسان قطعه طوپی حامل اولان بر کیر قالیونلری اغراق و ماعداسی دخی رخنه دار ایدلمکله بقیه سی بقیه السیوف اولان فرانسلری الوب مملکت لرینه عودت ایتدیلر

فتح قندیه و عقد مصالحه و ندیک

بیک یتیم یدی ذی القعدة سندن سکسان سنه سی جمادی الثانیه سنه قدر ایکی بیجی سنه قدر پیرامن قلعه ده آتش حرب و قتال کرما کرم اشتعال اولوب و ندکلورده طاب و طاقت قالمش و هر جانبدن مایوس اولمش اولدقلرندن قندیه قلعه سنی تسلیم ایله عقد مصالحه به اظهار طلب ایدلکرینه بناء حلب و الیسی ابراهیم پاشا و قول کتخداسی ذوالفقار اغا و دیوان هایون ترجمانی بناپوط بک مأمور اوله رق قندیه قلعه سی کافه طوپ و مهماتیله جانب دولت علیه تسلیم اولمق و صوده قلعه سیله مفرز بر جزیره صغیره ده واقع اسپرلوقه بلنقه سی و عصر ابراهیم خانیده و ندکلورک یداستیلارینه کچن کلید سی یعنی بهکه قلعه سی و ندکلو اللرنده قالمق و آقد کزده اسلام سفینه سی ضایع اولور ایسه و ندیک طرفندن تضمین ایدلمک شرطلری و شرائط سائر ایله عقد معاهده اولندی و قندیه قلعه سنک تعمیرات و لوازمات مقتضیه سی تتمیم قلندقدن صکره سردار اکرم ادرنده رکاب هایونه واصل و انواع التفات خسروانی به نائل اولدی .

قریم خانی عادل کرای شیرین بکری حقنده ظلم و غدره اجتسار ایتمکله رکاب هایونه وقوعبولان شکایاته مبنی مسند حکومتدن تنزیل و بیک سکسان برسنه سی او اخرنده رزمی بهادر کرای مرحومک اوغلی سلیم کرای تخت قریم ایله تجیل اولندی .

عزیمت هایون بسفرله و فتح قانیچه و عقد مصالحه

له دولتی توابعاتندن صاری قامش قزاغی خطمانی رکاب هایونه دخالت ایدرک بندکان دولت سالکنه قبول و طبل و علم احسانیه واصل مسؤل قلندیغی حالد لهلولرک خطمان مرقوم اوزرینه هجوم ایللری باعث انفساخ صالح صلاح عد اولنه رق بیک سکسان ایکی سنه سی او اخرنده بالجمله ارکان سلطنت و عسا کر دولت ایله پادشاه حضرتلری بالذات علم

افراز جهاد اولوب بودلیا ایالتک مقری اولان قانچه قلعہ سی جوارنده بولسان بلنقلر فتح و تسخیر وله ممالکی سرتاسر غارت ویوز بیکدن زیاده اسیر اخذ و اخراجیله جیوش عثمانیه دلیر نعمت مظفریت قلندیغنه مبنی له حکومتی بالضروره طالب استیان اولدیغندن قبائل تاتاردن اولوب خیلی وقتدنبرو لهستانده قالمش اولان ابقه تاتارلردن دارالاسلامه چقمغه عزیمت ایدنلره ممانعت اولنماق و بودلیا ایاتی کافه ملحقاتیله طرف دولت علیه ده قالمق و اقرانیا قطعہ سی سالف الذکر صاری قامش خطمانی درشنقویه تسلیم اولنهرق بروجه له تعرض ایدلماک و قریم خانسه ویریه کلان مقننات و هدیادن ماعداد رکاب هایونه سنوی یکریمی ایکی بیک التون تقدیم قلنمق شرطلرینک علاوه سیله معاهده سابقه تجدید اولنوب پادشاه غازی دارالسطه جانبیه عودت بیوردیلر لکن لهلولرک مؤخره نقض عهد ایله خوتین جانبیه هجوملری استخبار اولندیغندن جیوش عثمانیه ایکی سنه دهه لهستانی پامال سمند غارت ایتمکله چارناچار اجرای شرائط صالح سابق اختیار ایلدیلر

وفات فاضل احمد پاشا

بیک سکسان یدی سنه سی اواسطنده ادرنه یه عزیمت هایون وقوع بولدقده صدراعظم فاضل احمد پاشا اثنای راهده ارتحال داربقا ایدوب کوپرلی مرحومک ولد مغویسی اولمغه فاضل احمد پاشا ایله برلکده نشو و نما و فاضل مشارالیهک مدت صدارتنده رکاب هایون قائممقاملغنده استیخدا قلمش اولان مرزیفونی قره مصطفی پاشا صدر صدارته اعتلا ایلدی مرحوم مشارالیه یکریمی سکز یاشنده حائز مسند صدارت وان الی سنه تنسیق ساز مصالح دولت و ملت اولهرق فتوحات عظیمه یه نائل وزمان صدارتنده کوکبه سلطنت قاهره عصر سلیمانیده اولان رونق و شوکت مرتبه سنه واصل اولمشدر علم فقه و فلسفیاتده یکانه و اخلاق حمیده ایله فرید زمانه اولوب فقط استعمال مسکراته ابتلاسی کنج یاشنده موجب وفاتی اولدی .

سفر جهرین و عقد مصاحله روسیه

لهلولرک پنجه تحکملرندن تخلص و تفریق اولسان قزاق خطمانی درشنقو مؤخره مسقولره تحویل تبعیت و اوقرانیا ممالکنک دارالاماره سی اولان جهرین قلعہ سی تسلیمه مبادرت ایتمکله قریم خانی سایم کرای خان ایله وزرادن سردار آعین قلزان ابراهیم پاشا قلعہ مرقومه نک فتحنه اقدام و غیرت ایلدیلر ایسه ده قدرتیاب تسخیر اوله مدقلرندن بوتهمت ایله ایکسی دخی معزول و مسند خانی به مراد کرای موصول اولوب ایرتسی

سنه یعنی بیک طقسان تاریخنده پادشاه حضرتلری بالذات اختیار کلفت سفر و طونه نهرینه لدی الوصول صدر اعظم قره مصطفی پاشایی خدمت سرداری ایله موقر ایدرک ارسال ایلدی قلعه مرقومه اوزی نهرینه منصب اولان تاحمه صوبی کنارنده واقع اولوب طونه نهرینه یوز الی ساعتدن زیاده اوزاق و ممالک عثمانیه ایله منقطع الالتصاق اولسنه مبنی بعض ارکان دولت نظرنده بوقدر کلفته و اختیار مصارف و مشقته دگری اولماق مطالعه سی دوران ایتکده ایدیسه ده صدر مشارالیه مقام صدارتده پایدار اوله بیلیمسی خدمات فاخره ابرازینه وابسته کوردیکندن بوبابده فوق الغایه اقدام واعتنا ایدر ایدی (استطراد) سلطان مراد خان اول عصرنده قاضی عسکر لکدن منصب وزارت عتلا ایدن و خیرالدین پاشا نامیه امامه سبحة صدارت اولان چاندرلو قره خلیل که بنیان دولت عثمانیه نک تشیدی حقنده خدمات مبروره ابرازینه موفق اولان ذات عالیقدر در برکون خداوندکار مشارالیه معرض تعلیمده نوقت سفرایمک لازمدر دیو سؤال ایتکله پادشاه مرحوم دخی احتیاج قوی اولدینی و غلبه دخی امید قوی تحتنده بولندینی حالد سفر اختیار اولنور دیدکده پاشای مشارالیه واقعا بویله در لکن برشرطی دها واردر که اودخی سفرك ضمننده دولته منفعت متحقق اولقدر کلامیه خاتمه زیب نصایح اولمشدر واقعا قره مصطفی پاشانک اشبو جهرین سفری شرائط مشروحه احکامنه بالکلیه منافی ایدی .

هرنه حال ایسه معسکر هایون قلعه مرقومه پیشگاهنه واصل اولمسیله برابر قرق الی بیک کشیدن مرکب برمسقواردوسی دخی گلش و قلعه یه یکر می بیک قدر عسکر وضع ایش اولدینی حالد زور بازوی هجوم موحدین ایله قلعه مرقومه غنوه تسخیر و ایچنده بولنانلر کاملاً تدمیر اولندی و بویکیفیت خارج قلعه ده بولنان مسقولولرک مشهودی اولدقده درحال فراره شتابان اولدقلرندن بر مقدار تعقیب و بعده عودت اولنهرق قلعه نک محافظه سننده عسرت درکار و دولت علیه جه لزومی اولدینی آشکار اولق حسبیه بالتخریب صدر مشارالیه اردوی هایون ایله مراجعت و سلستره درکاب هایونه مواصالت ایلدی ایرتسی سنه ینه سفره حاضر لمقده ایکن روسیه لوجانبندن ایلچی کلوب صاحبه طلبکار اولمغه اوزی نهرینک صاغ طرفی دولت علیه و وصول جهتی روسیه لویه عائد اولق اوزره تنظیم صلح و صلاح قلندی .

یدی قطعه جسیم فرانسه قالیونلری خصملری اولان طرابلس غرب کیلرینک ساقز لپاننده اولدقلرینی خبر المغله کلوب سفن مذکوره ایله قلعه یه طویلر انداخت ایدرک خیلوجه خسارت ایتدکلری معروض در دولت اولدقده صدر اعظم فرانسه ایلچیسی

جلب ایله تضییق و تهدید و بویخصوصدن طولانی ترضیه و تضمین ویرلمدیکی صورتده ممالک محروسه ده بولنان فرانسه تبحار و تبعه سنک تحت توقیفه اله جغنی بسط و تمهید ایتکله ایلچی مزبور بالضروره مطالب دولت علیه نک اجراسنی درعهده و سند اعطا ایدرک تخلیص کریبان ایلدی و برقاج آی مرورنده فرانسه قرالی طرفندن اعتذاری و بوایشه متجاسر اولنرک قویاً تأدیب قلندقلرینی متضمن نامه مخصوص ایله التمش بیک ریال قیمتده هدیه تقدیم اولندی .

ظهور سفر نمچه

اورته مجار حاکمی وامراسی بهر سینه و یانه یه کیدوب ایمپراطور ایله ملاقات اتمک قاعده قدیمه اقتضاسندن اولغله تقریباً بیک سکسان تاریخ هجریسنده واقع اولان ملاقاتده قاتولیک مذهبنی قبول ایتما لری اوزرینه اورته مجار حاکمیه بعض امرا ایمپراطور طرفندن قتل و اعدام اولمش و حاکم مقتولک اوغلی اولان توکلی امره ارتق اورته مجارستانده اقامت ایدهمیوب قبیله و توابعاتیه ممالک سلطنت سینه دن اگری ایالتی اراضیسنه کچرک اوراده اقامت و نمچه لولرک غدر و ظلملرندن تحصیل امنیت ایلشیدی مزبور توکلی امره باباسنک انتقامنی المق و نمچه لولر اله کچن حکومتی قورنارمق مقصدیه هر بار دولت علیه عرض اخلاص و مطاوعت و ملک موروثنک استرداد یابنده استدعای مرحمت ایتکدن خالی دکل ایسه ده فاضل احمد پاشا مرحوم کندو ایله منعقد اولان نمچه مصالحه سنک انفساخنی موجب و یک چوق دماء بشریه نک ریزان اولسنی مستوجب اوله جق بویه برایشه مباشرتی تجویز ایلدیکنندن کچشدر مکده اولدینی حالد صدر وقت بولنان قره مصطفی پاشا اشتهاد ذاتیسی احکامند نمیدر یوخسه بعض تاریخلرک بیانی وجهله توکلی امره جانبندن عرض و تقدیم اولنان مبالغ کلیه طمعند نمیدر هر نصل ایسه مزبوری واصل مطلب ایلک التزام مالایلزمی اختیار و بودین والیسنی اولحوالیده اولان سرحدات امرا و عسکر یسنه سردار ایدرک توکلی امره ایله معاً ارسال ایتکله اورته مجار ممالکینی کاملاً ضبط و تسخیر ایتدیروب سنوی رکاب هایونه قرق بیک التون تقدیم اولنق شرطیه مشارالیهی قرال نصب و تشریفات لازمه ایله عهدنامه هایون اعطا ایتدیردی حتی قرال مشار الیهک وارد اولان نامه لرنده « معین آل عثمانم اطاعت اوزره یم امره قرال اورته مجارم که تامم توکلی امره » امضای منظومی مسطور اولدینی مشهور و کندوسی دخی اردوی هایونلر معیتده چوق خدمتلرده بولنوب قرص قرالی نامیه مذکور اولمشدر

دولت علیه‌نک سطوت و شوکتی حد کالده اولمق حسابیه قوجه براقایم قرال مشارالیه ضبط ایتدیرلمشیکن نتیجه‌لور مدافعه‌یه جسارت ایده‌مدکلرندن فضل احمد پاشا صلح‌نک مدتی منقضیه اولمق اوزره اولدیغنی وسیله عد ایدرک ایلچی ارسالیله تجدید معاهده‌یه طلبکار اولدیلر .

اورته مجار قرالغنی دخی نتیجه‌لویه تصدیق ایتدیرمک ممکناتدن ایدیسده صدر اعظم نتیجه اوزرینه سفر کشادینی التزام و رایه وقعه‌سی سلطنت سنیه‌نک شهنامه مظفریتنه لکه براقدیغندن انک ازاله‌سی لازمدر دهرک ذات هاپونه عرض مرام ایتمکله تحصیل رخصت سنیه ایلدکدن صکره نتیجه ایلچیسینی یکچیچری اغاسی بولسان وزیر مصطفی پاشایه جلب ایتدیروب تجدید مصاحبه یانق قلعه‌سنک طرف دولت علیه‌یه تسلیمنه وابسته اولدیغنی افتده ایتدیردی ایلچی مومی‌ایه بوتکلیفدن نتیجه مرادی تفرس ایدرک قلعه انسوب ویرنامک محاربه‌سز اولور و بتر ایشلردن دکلردیو جواب ویردیکنه مبنی امر سفر تقرر ایتمکله بیک طقسان درت سنه‌سی اوائلنده پادشاه زمان سلطان محمد خان حضرت‌تلی جانب بلغراد سوق موکب عظمت ایدوب اورادن صدر اعظمی یانق قلعه‌سنک فتح و تسخیرینه سردار تعیین و تسیار بیوردیلر .

صدر اعظم ویانه‌یی تسخیر و اورته مجار قرالی توکلی امره‌یی قرال نصب واقعا دایمکی ذهننده قرارلشدیرمش اولدیغندن بودینده عقد اولنان مجلس مشورتمه پیش توجه‌مزمده اولان یانق و قومران قلعه‌لرینی ضبط ایتمک ایچون اوغراشمقدن ایسه طوغریجه ویانه‌یه کیدوب تسخیر اولنسه بونلر طبیعتیه تسلیم اولورلر دیوایراد مافی الضمیر ایتدکده بودین والیسی ابراهیم پاشا واردل قرالی ایاقی میخال اولا یانق قلعه‌سی فتح اولنوب بعده ویانه اوزرینه کیدنکی سوق ایلدیلر ایسه‌ده صدر مشاوریه قرار داد ضمیرندن واز کچما مکله ویانه‌یه کیدنک مخصوصی تقرر ایلدی ویانق آلتنه لدی الوصول محافظ قلعه بولنان جنراله تسلیم حصار ایلمسی ضمننده خبر کوندرلمسنه جوابا سزک اقصابی مراد کز ویانه اولمغله انی فتحه موفق اولور ایسه کز بلاجنک وجدال تسلیم قلعه ایدرم اکر یانغی محاصره ایلرایسه کز المدن کادیکی مرتبه مدافعه ایده‌جکم جهته بیهوده ایشکزدن قالورسکزدیمکله بودخی صدر مشارالیه‌ک مطالعاتنه موافق کورندیکندن اردوی هاپون بلا توقف ویانه اوزرینه توجه ایلدی .

محاصره ویانه و وقوع هزیمت

نتیجه امپراطوری ویانه محافظه‌سنی معتمد جنرال‌لره تودیع و کندوسی پراغه شهرینه

عزیمت ایدوب اطرافدن استمداد و تنظیم اجناد ایلده مشغول اوله رق اردوی هایون دخی ایکی آی قدر ویانه بی محاصره ایلدیکی حالدده یکر می درتیک له و اوتوز بش بیک نیمچه عسکر یله قرق بیک مقداری جیوش سائرده و معاونه دن مرکب براردو له قرالینک قومانداسی التنده اوله رق امداده کلوب بیک طقسان درت سنه سی رمضانک یکر منجی کونی وقوع اولان مقاتله عظیمه ده عسکر اسلام مبتلای انهزام اولغله بالجه طوب و مهمات و چادر لر گرفتار دست اعدا اولدی .

عصر احمد خان ثالثده سلحدار لقدن چراغ اولان فندقلیلی محمد اغابوتاری بخلرده اندرون هایونده بولغله وقعه ده حاضر بولنا نلرک ومؤخر ا تحت استنطاقه النالرک افاد اتندن مطلع اولدیغی اسباب انهزامی تاریخ مشهورنده شو وجهله بسط و ایراد ایدر که اول بوسفرده اردوی هایونده مجتمع اولان عسکر هیچ بروقتده کورلمدک درجه ده کثرت اوزره اولدیغنه و ممالک عثمانیه دن خلیجه تباعد قلندیغنه مبنی مدت محاصره برماشی تجاوز ایتدکن صکره ذخیره و مهماتده مضایقه حاصل اولغله باشلادی و کیدرک عسکره یورغناقی و فتور عارض اولدی ثانیاً دشمن عسکرینک تقریبی استماع اولندقدده عقد مجلس مشاوره اولوب اکثر ارکان وامرا محاصره نی ترک و مترسلرده اولان طوپلری بالاستصحاب کافه جود اسلامیه ایلده مدافعه دشمنه کیدیلوب بعده اقتضای حاله کوره حرکت اولمنسی تصویب ایشار ایکن صدر اعظم ترک محاصره نی تجویز ایتما مکه کوچک طوپلر و خفیف عسکر ایلده مقابله قلندی و بعد الانهزام اردوی هایون مرکزنده دخی پایدار اولسه مدی ثالثاً دشمن طونه نه رینی چکمک اوزره اولدیغی استخبار اولندقدده و منع مرور لری ایچون قریم خانی مراد کرای خان عساکر تاتار ایلده اعزام قلندیغی حالدده مشارالیه صدر اعظم دن دلکیر بولمنسه بناء اوزاقدن دشمنک مرورینی تماشا ایدوب اصلاً ممانعت قیدنده اولمدی رابعاً ابتدای محاصره دن برآی مرور ایتدکن صکره هر نوقت اولسه هجوم ایلده طفر مقرر ایکن مضمون اولان اموال کشرینک یغمایه کیتامسیچون صدر اعظم قلعه نک استیانا تسخیرینی التزام ایلدی دیو بیان تحقیقات ایدر .

لکن صدر مشارالیه هر نقدر جمع ماله تهالک ایلده مشهور ایدیسده درایت و لیاقتی دخی مسلم اولدیغندن اردوی هایونی باصمق ایچون تدارکات عظیمه بی استماع ایدوب طورر ایکن فوت فرصت ایلمسی و قریم خاننک صدر اعظمه مغیر اولسی جهتیه عمومه عائد او یله برخیا نته جسارت ایتسی مستبعد کورینور و مفتریات جمله سندن ظن اولنور صدر اعظم اطرافه پریشان اولان عسکرک اجتماعی ایچون اوچ کون یالق قلعه سی

التندہ اقامت ایتد کدن صکره بودینه واصل اولوب و یانه محاصره سی مذ اکره سند و خلاف رأیده بولنان ابراهیم پاشانک جنک کونی پیشرو منہزمین اولدیغنی غرضه حمل ایله قتل و قریم خانن عزل ایدوب تاتار اردو سنده بولنان حاجی کرای منصب خانن ایله ابجال ایلدی له قرالینک یکر می بیگ قدر عسکرایله استرغون اوزرینه کلدیکی استماع اولنمغله براقچ بککری بکی ایله بر مقدار عسکر کوندریلوب وقوع بولان محاربه ده قرال مشارالیه بوزلمش ایسه ده ایکی کون مرورنده تکرار قوه جسیمه ایله عودت ایدوب بوکره عساکر اسلامیه تاب اور مقاومت اوله مدیغندن قلعه مرقومه گرفتار دست دشمن اولدی .

خبر انہزام بلغرادده پادشاه حضر تلمینک مسموعی اولدقده اردوی هایونک و رودینه انتظار ایتیمه رک کمال تهور و انفعال ایله حرکت وادرنه یه مواصات ایلمسنی متعاقب صدر مشارالیهک خصم قویلری بولنان دارالسعاده اغاسی یوسف اغا وفاضل احمد پاشا کتخذالغندن میراخور اول اولوب ذات شاهانه یه تقرب تام حاصل ایدن صاری سلیمان اغا قائم مقام بولنان قره ابراهیم پاشایی که صدر اعظمک کتخذالغندن رکاب قائم مقامی نصب اولنمشیدی وعد صدارت ایله افسندیسنه اختیار خیانته میل ایتدیروب اوچی بردن کانون غمز و نفاق اشغال برله صدر مشارالیهی اعدام ایتدیردیلر و مشارالیه ابراهیم پاشا صدر صدارته و سایان اغا رکاب هایون قائم مقاملغنه اعتلا ایلدی مقتول مشارالیهک خطیائی منکر دکل ایسه ده قدرت و لیاقت صاحبی و حیثیتی برادرم اولدیغندن ابقا اولنسه تلافی مافاتہ مظهریتی مأمول قوی ایدوکی اتفاق کرده مورخیندر .

نقض عهد و ندیک

وندیکلورک بوسنه حدودنده بعض تجاوزلری وقوعنه مبنی ایلیچیلری قبل السفر تضییق و تهدید اولندقده بشیوز کیسه اچہ جریمه تقدیمیه پنجه مؤأخذہ دن تخلیص کریبان ایتمشلر ایدی بوبابده صدر مقتولک خا کپای هایونه تقدیم ایتدیکی تقریرنده شمدیلک بواجہنک اخذیله اغماض عین اولنوب نمچه محاربه سی بتد کدن صکره و ندیکلورل حقنده دخی ترتیب مجازات اولنسی مسطور و اوزرینه بوجهله اجرایی ایچون خط هایون صحیفه زیب صدور اولدیغندن بوکاغد و یانه انہزامنده نمچه لورک انه کچوب و ندکلورله ارأه اولنمغله انلرک دخی نقض عهدینه سر رشته اولدی بنابرین تجهیز ایلدکری دونما ایله موره جزیره سنه هجوم و اول امرده ایاموره قلعه سنی استیلا ایلدیلر .

قره ابراهیم پاشا نیل صدارت ایله کامروا اولدی ایسه ده نمچه وله ووندیک دولتلیله

محاربه قبولی اچلدیغندن ایشک وخامت عاقبتندن اندیشه یه دوشمه کله بالذات سفره کتمکدن اجتناب وهرجانبه سرعسکر ارسالله کندوسنک پادشاه یاننده بولنسی استصواب ایدوب بورائی خواه ناخواه طرف شاهانه یه قبول ایتدیردی و خان اسبق سیم کرای خلمت حکومت قریم ایله تجیل وله طرفنه تسیر ایدوب نمچه سرعسکرلکنی اردوی هایونده بولن ان یکیچری اغاسی تکفور طاغلی مصطفی پاشایه وموره سرعسکرلکنی یکیچری اغالغندن متقاعد خلیل پاشایه تحمیل وتفویض ایلدی اگرچه هرطرفه عسکر ومهمات ارسالنده اقدام وغیرتی مشهود ایدیسه ده حرکات حربیه یی تحصیل استقلاله الت ایدرک اون بش سنده نبرو وزیر ثانی وداماد سلطانی اولان مصاحب مصطفی پاشای قبودانقله وقائم مقام سلیمان پاشای بابا طاغی سرعسکرلکیله قرب پادشاهیدن تبعید وجزئیجه مغیر اولدینی کسان برر صورتله تنکیل وتهدیده قیام ایله مظهر دشنام نام اولدی سردار مصطفی پاشا مدافعه هجوم دشمنه موفق اوله مدینی مثللو ایرتسی سنه سرعسکر نصب اولن ابراهیم پاشا دخی استرغون جوارنده بوزلدیغندن هر برینک فتحی برشهریار نامدار ویا بر سردار ظفر شهماره باعث اشتهار اولان قلاع متینه انسداد طرق اعانه دن ناشی ذخیره سزلکدن قولای قولای گرفتار کند استیلا ومورده اولان حرکات عسکریه دخی کوندن کونه فنا اولغه باشلادیغنه مبنی پادشاه حضرتلری صدر اعظمک بالذات سفره کتمسی خصوصنه اصرار ایلدیکندن تمارض وتنظیم اموردن کف ید ایشکله بالضروره طقسان یدی سنه سی محرمنده عزل وسلیمان پاشا صدر اعظم وسردار اکرم نصب اولنه رق بودینه طوغری سوق سمند اعتزام ایلدی ومعزول مشارالیه حجه کتمک ایچون ماذون اولمشیکن مؤخرأ نفی وقتل قلندی .

هزیمت عسکر اسلام وظهور فتنه در اردوی هایون

سنه سابقه ده نمچه لولر بودینی محاصره ایدوب لکن قدرتیاب تسخیر اوله مامشرا یکن بوسنه تکرار محاصره یه آغاز ایلدکارینه صدر اعظم تخلیصنه جهد وغیرت ایلدیکی حالده موفق اوله مدیغنه مبنی قلعه مرقومه دست اعدایه گرفتار اولدینی مثللو ایرتسی سنه دخی عسکر اسلام اوسک جوارنده مبتلای کسروانهزام اولغه اردوی هایونده اختلال حادث اولوب ظاهراً صدر مشارالیهک بعض حرکات نابجاسی موقع بحثه وضع اولندی وبوسبیله مشارالیه سلیمان پاشا استانبوله فراره مجبور اولمشیه اتفاق عامه ایله بوسنه والیسی سیاوش پاشا اردوی هایون قائم مقاملغنه انتخاب قلندی .

وقوع تبدل سلطنت

پادشاه زمان سلطان محمد خان حضرتلری اوان شبابندبرو مبتلا اولدیغی صیدوشکار ایشنی مرتبه افراطه ایصال و سلطنت سینه نك بویله بر مضایقه و بحرانی حالنده کل یوم کشت دشت و کپسار ایله اشتغال ایده کلدیکندن کافه انام علنا طعن و تشذیه قیام و کرسی شیخلری غیابا ووجاها فصل و مذمتی التزام ایتمیشلر ایدی شیخ الاسلام چتالجه لی علی افندیك و خانی انقرملی محمد افندیك بوکیدشك عاقبتی وخیم اوله جنی حقنده اولان اخطارلری بروجله تأثیر ایتماش ایکن اردوی هایونده واقع اولان اختلال خبری واصل اولدقد تدارك مافته قیام ایلدی ایسه ده فائده ویرمدی حضور هایونده عقد اولنان مجلس مشورتده قائم مقام رجب پاشا اردوخلقنك تأدیب و تربیه لرینی تعهد ایله صدارته طلبکار اولدیغی حالد ارباب اختلال ایله سرا متفق و بلکه مشوق اولنلر دلخواه سپاهه مساعده کوستریله رك بالسهموله غائله نك اندفاعنی سوق ایتمریله و پادشاه حضرتلری دخی بوصورتی اختیار ایتمکله مهر هایون سیاوش پاشایه احسان واولبابده اصدار اولنان خط هایونده صوفیه ویاخود فلبده مشتانشین اولملری امر و فرمان بیورلدی واستانبولده مختفی اولان سلیمان پاشا اله کتیریلوب تألیف قلوب عسکریه ایچون قتل و سر مقطوعی اردوی هایونه فرستاده قلندی مشارالیه سیاوش پاشا کوپرلی مرحومك هم کوله سی وهم دامادی اولمق حسبیه موجب تهوین مصلحت اولور ظننه مبنی کوپرلی زاده فاضل مصطفی پاشا مقام قائم مقامی به اقعاد اولنوب حالبوکه فاضل مشارالیه قره مصطفی پاشا صدارتنده رتبه وزارتله تکریم اولنمشیکن صدر مشارالیهك قتلندن صکره برقاچ مرتبه تحقیراته گرفتار اولدیغندن قائم مقاملی ایچون حضور هایونه کیردکده پادشاه حضرتلری باباک وقرنداشك صدارتلرنده يك راحت ایتمشیدم و سکاچوق جورواذا ایلدم دیواعتدار وشو غائله نك اندفاعنه غیرت ایلدیکی حالد هروجله نائل مکافات ایده جکلرینی تذکار بیوردقلرینی اولوقت خاص اوطه اغالرندن اولان فندقلیلی محمد اغا تاریخ مشهورنده روایت ایدر و خفیا سیاوش پاشایه تأیید صدارتی ولوندات سر چشمه سی اولان یکن عثمان بکه رتبه وزارت ایله کریمه لری خدیجه سلطانك تزویجی وعد ایلدیله ایسه ده بونلرک هیچ بریسی افکار عامه نك جریاننه سد اوله مدی .

اردو خلایق وارد اولان خط هایونلره اصلا التفات ایتمه رك ویریده توقف و آرام ایله میه رك سلوری به واصل اولدقلرنده استانبوله دخولدن مقدم تبدیل سلطنت خصوصی

باعرض محضر اعلام واستدعا ایتلریله بیک طقسان طقوز سنه سی محرمنک ایکنجی کونی قائمقام پاشانک دعوتنامه لری اوزرینه باجمله علما وارکان دوات ایاصوفیه جامعده بالاجتماع مزبور عرض محضر قرائت اولندقدن صکره اتفاق عامه ایله سرای همایونه کیدیلوب سلطان محمدک کوچک برادرلری سلطان سلیمان ثانی تخت عثمانی به اجلاس قانندی پادشاه مخلوع یدی یاشنده جالس اورنک ساهانی وقرق بیحق سنه حکم فرمای ملک عثمانی اولوب بعدالخلع بش سنه قدر گوشه نشین انزوا اولدقدن صکره ادرنده وقت ایتمش وانعشی استانبوله کوندریلوب بغچه قپوسنده واقع والدلری تربه سنه دفن ایتدیرلمشدر

باب ثالث تکمله سی

اشبو باب ثالث حاوی اولدنی زمانکه بیک اوچ سنه سندن بیک طقسان سکن سنه سی غایتنه قدر طقسان بش ییلق وقوعاتدن عبارتدر مدت مزبوره سلطنت سنیه نک اوان سن وقوفی ایسه ده اوائلنده انحطاط خفی وواخرنده انحطاط جلی احکامی سرزده ظهور اولمشدر چونکه بوعصرده دولت علیه اوروپاچه ضایعات ملکیه به گرفتار اولیوب بلکه کرید وایواروقیژده وبودایا واورانیایالتلرینی حوزه حکومتدخال ایله توسیع دائره سلطنت ایتمشکن آتیده تفصیل اوله جنی وجهله اداره ملکیه ونظامات عسکریه ومالیه سی قرین اختلال اولد یغندن هر بریسنده درلودرلوفنالتلر ظهور ایلدی ازان جمله غرب او جاقلری برنوع جمهوریت حانی اکتساب ایدرک اگرچه اسفار بحر به ده موجود اولان کیلریله کلوب خدمتده بوانورلر ایدیه ده طرف دولتدن والی کوندرملک وامور اداره لرینه مداخله ایدمک قابل اولیوب حل وقوعنده دای تعیر ایتدکاری ضابطانک انتخابیه مسند امارته اقعاد اولنان آدمه پاشالق وتصدیق امارت امر عالیسی کوندریلوب اولدی بو او جاقلرک طرف دولت علیه معین ویرکولری اولیوب فقط ایکی اوچ سنه ده برکره خاکپای همایونه هدیه تقدیم ایدرلر وجانب سلطنت سنیه دن طوپ وکهرجله وباروت کبی لوازمات حربیه احسان قانور ایدی مصرده دخی یرلی قوی نامیله عسا کر موظفه اوله رق اولاد ترکدن مرکب اولان یکیکچری وسپاه وسایحدار نفرانک قاعده نظامیه لرینه واستبداللرینه اعتنا اولنمدیغندن مرور زمان ایله یرلی حکمنی اکتساب وجیوش منتظمه هیئت وقوتی ضایع ایتلریله کوله من بکلری تغلب وتفرد ومصر والیلرینک حکومتی بر امر رسمی درجه سنه تنزل ایلدی امرای مزبوره ارسالیه نامیله جانب دولت علیه به کوندریله جک ویرکوی و حجازه مرتب اولان ذخاثری ووالی به معین اولان عواندای ترتیب وارسال ایله مصالح حکومتی کیف

مایشاء اجرا میداد و اولدیله اداره کیهلرینه مانع اولمق صد دنده بولنان والیلری مقام حکومتدن
تغزبل و درلومفتریات ایله طرف دولته عرض محضر تقدیم ایدوب دولت دخی حقیقت حالی بیلور
ایسه ده بالضروره اغماض عین ایدرک دیکروالی انتخاب وارسال ایدرایدی بنابرین مصرده نفوذ
حکومت تناقص ایلسیله بحر احمر سواحلنه لایقیله باقیله مدیغندن ایالت یمن آل مظهر
اماملری زیر حکمنه کیردی و حبش ایالتی سواکن و مصوع اسکهلرینه منحصر قالدی
ینه اسباب مسروده یه وصیق صیق تبدل ولاته مبنی بغداد والیلرینک دخی اسکی قوت
وسطوتلری زائل اولدیغندن لحسا و قطیف طرفلرینه عربان مستولی اولدی

برقاچ کره حادث اولان جلالی اشقیاسی سببیه و ایران سفرلری تقریبیه
نفوس کلیه تلف و ضایع اوله رق اناطولینک معموریت سابقه سی تدنی ایلدی
دولتک عنفوان شبابندن قوه نشو و نما سی اداره جه اولور اولماز او یغونسز لقلرک آتار
مضره سی محو و ازاله ایدر ایکن قوای ملکه شیب و هرم عارض اولدقه جزوی خطالر
بیوک یاردر آچغه سبب اوله کلدیکی جهته بو عصرک خواصندن اولمق اوزره اداره امور
دولت اهل و اربابی اله کچدکجه هیبت و عظمتی دهشت بخشای یارواغیار و سبکمه غزناک
یدبی اقتدارینه دوشدکجه انواع مضایقه و مشکلاته گرفتار اولمغه باشلادی بوقضیه کوپرلی
مرحوم ایله اوغلی فاضل احمد پاشانک یکر می سندهن متجاوز اولان صدارت لرنده
تمامیه مرکز ثبوت و اصل اولمشدر چونکه جلالی وقعه لری عثمان خان شهید حادثه سندن
صکره اون بش سنه تمتد اولان شورش و اختلال و محمد خان رابع جلوسندن کوپرلی
صدارتنه قدر مرور ایدن سکمز سنه قدر زمانده مشاهده اولنان فتن متابعه و کلانک
عدم اهلیت و لیاقتندن منبعث اولدیغی «الاشیاء تنکشف باضدادها» قاعده سیله معلوم اولمشیکن
اختلالات سابقه یی بیلنلر ازالوب بیلنلر ایسه آسیاب دولتی دوندرمک هرکس ایچون
ممکندر ذهابه نه دوشدک لرینه و کویا عاقبت اندیش چکان نوظهور لر کوپرلیلرک اقبال و استقلال
بر زمان ده پایدار اولور ایسه شرکت سلطنت مرتبه سنه رسیده اولور دیو خاطر هایونه
بروهم بر اقدقلرینه مبنی ویانه انهزامندن صکره کوپرلی خانداننه بربغض و عداوت میدانه
چیقدی و قره ابراهیم پاشا و صاری سلیمان پاشا کبی او خاندانک پرورده نعمت لری اولان
اچقلربیلله علیه لرینه قیام ایدوب کوپرلی اوغلی فاضل مصطفی پاشا و عموجه زاده حسین
پاشا و سایر کوپرلی متعلقاتی قرب دولتدن تبعید و اداره مهم امور قائم مقام رجب پاشا
وامثالی مثللو بیشعور لرک اله تسلیم اولندی و در عقب نتیجه و خیمه سی ظاهر اولدی
مفصلات تواریخک افادتندن استدلال اولندیغنه کوره کرک کوپرلی مرحومک و کرک

فاضل احمد پاشانك استقلالاری درجه کماله اولمسیله برابر لازمه عبودیت وتعظیمده اصلا قصورلری اولمدیغی اشکار اولوب حتی قانجه سفرینه کیدیلور ایکن حرم هایون عربیه سی چامورک کثرتندن ناشی برمنزلده وقتیه یتشه مدیکی فاضل احمد پاشانك مشموعی اولدقده اویله بر وزیر ذیشان چادرینه اینش ایکن درحال عربیه نك اولدیغی محله عودت وکندو بندیکی آتی آربه یه قوشدیروب هزار کلفت ومشقت ایله منزاکاهه کتورمسی فرط عبودیت وتعظیمنه دایلدی فقط اولوقتلر ایله عصر من بیننده اکیوز سنه دن متجاوز مدت مرور ایلمش اولدیغندن حکم زمان لایقیله بیانه من ایسه ده فاضل مشارالیهك صدارتنده اصاغه اولنوب الآن طوپخانه عامرده موجود اولان برجسم طوپك اوزرندده برلوحه دروننده پادشاه زمانك نامی ودیگر لوحه ده مشارالیه فاضل احمد پاشانك اسمی منقش ایدوکی کورلمشدر

بوعصرک اواخرنده وندکلوردن کرید ونمچه لوردن ایوار ولهلوردن قانجه یعنی بودلیا ومسقولردن اوقرانیا ایالتلری ضبط وتسخیر اولمغله اوروپاجه دولت علیه ایله محدود اولان اشبو درت دولت یکیدن زخم دیده ومانند اذدرهای دم بریده اولدقلرینه نظر آجزوی فرصت بولدقلری انده بالاتفاق علم افراز هجوم اوله جقلری بدیهیاتدن اولدیغندن فتوحات مزبورده یی هضم ایدنجه قدر تألیف وتخویف بیننده برمعامله حکیمانه اتخاذ اولنمق فرائض حالیه دن ایکن قره مصطفی پاشانك تحصیل استقلال وتقریر اقبال قصدیه واقع اولان سعی واقدامنه مبنی بیک طقسان درت سنه سننده بلا ایجاب نمچه اوزرینه اعلان سفر اولنوب ویانه انهمرامی واقع اولدقدن صکره نمچه لولر محارستانه ولهلور بودلیا ایالته ووندکلورل موره یه وروسیه لولر ازاق طرفلرینه تجاوز ایلمریله اون بش سنه تمتد اولان اشبو محاربات عظیمه نك حاصل ایتدیکی نتایج انشاء الله تعالی باب آتیده تفصیل وایراد اولنور

احوال ارکان دولت واداره امور سلطنت

مره بعد آخری اجمال وتفصیل قلندیغی وجهله دیوشرمه چوجقلرینك کزیده ومتناسبلری سرای هایونلره اخذ اولنوب تربیه وتلقین شرائط اسلامیه اولدقدن صکره افرادی سپاه وسلحدار وعلوخیان یمین ویسار وغربای یمین ویسار دینیلان سواری

بلوکلرینه چیقاریلور و سرای هایونده قطع مراتب ایلیانلری ذکر اولنان بلوکلرک اغاقلرله و یاخود اوزنکی اغاقلری تعبیر قلنان میر علملک و میراخورلق و قوجیلر کتخدالغی و قوجی باشلق مأموریتلریله چراغ اولنوب بعده میرلوالق و میرمیرانلق ایله طشرهیه کوندریلورایدی بوجهته ادا ب خدمت سلطنت و اداره امور دولت خصوصلرینی تعلیم ایتدکن و طشره لرده و سردارلر معیتنده احوال ملکیه و حربیهیه دخی کسب و قوف ایلدکن صکره خدماتی نظر تحسینه لایق و قدره دخی موافق اولور ایسه رتبه وزارت نائل اولورلر ایکن مؤخراناز و نعیم ایچنده پرورده اولان وزرا و کبار زادهلر و شهر سایه پرورلرندن طرف و تقریبی بولنلر سرای هایونه انه گلکله بولردن سلحدار و چوقدار و رکابدار و میراخور شهریارلر مثلاً منظور نظر التفات پادشاهی اولنلر دفعه وزارتله بکام اولمغه باشلادی

مستغنی تعریف اولدینی اوزره دولت علیهده درت طریق اولوب انک برنجیسی ملکیه درکه اربابی نوجهله ترقی ایلدکاری ذکر اولندی ایکنجیسی طریق علمیه درکه مدرسلک مرتبه سنه نائل اولنلر اوز بش یگرمی سنه طلابه افده و افاضه ایله ایفای وظیفه ایلدکن صکره الویه معلومه مولویتلرینه بعده استانبول قاضیلغنه و اناتولی و روم ایلی صدارتلرینه و نهایت مسند مشیخته ارتقا ایدرلر ایدی اوچنجیسی قلمیه رجالی اولوب بولردخی خواجهکانلق تعبیر اولنان قلم ضابطلرینه و مناصب معلومه قلمیهیه مأمور اوله رق منتهای طریقلری نشانجیلق و دفتردارلق و رئیسک و دفتر امینلکی و شق ثانی و ثالث دفتردارلقلریدرکه مناصب مذکورده مناصب سته تعبیر اولنور دردنجیسی طریق سیفیه درکه کرک پیاده و کرک سواری او جاقلرینک ضابطانی اصول مرعیهلری و جهله کسب ترقی ایدوب فقط سردارلق و قوماندانلق مرتبهلری میرمیران و وزیرایه تفویض اولنه کلشیدی

وجه مشروح اوزره قاعده نک اساسی بوزلدیغندن فرعی دخی مختل اولمغه نشانجیلق منصبی اکثریا او مثلاً نو ظهور وزیرایه احسان اولنه کلدیکنندن بشقه یکیکچری اغاقلندن دفتردار و نشانجیلقندن قبودان پاشانصب اولنور اولدی و دفتردارلره دخی وزارت و یرملک قاعده حکمنه کیرمکله ارباب سیف و قلم یکدیگری مناصبنه ارتقا ایدیه بیللمک قپوسی آچلدی طشره والیک و بکلر بکیلکلری وزرا کتخدالقلرنده بولنانلره و ملتزم لکده کسب ثروت و یسار ایدنلره توجیه اولنوب مع مافیه وزرا دخی تکثر ایلدیکنندن روم ایلی و بودین و اناتولی و مصر و بغداد و شام کبی مناصب جسیمه وزیرایه تفویض و جزئی سبیلرله بکلر

بکلیله دخی وزارت احسان اولنق قاعده سی ظهور وکون بکون ترقی ایلدی فی الاصل منصب وزارت طرف پادشاهیدن رخصت کامله یی متضمن اولمغله وزرای عظام فرمان یازمغه و طغرا چکمکه مأذون اولدینی حالدده وجه مشروح اوزره طشرده بولنان وزرانک کثرتنه مبنی بومأذونیتک الغاسی لازم کلدیکنندن سلطان ابراهیم عصرنده کانکش قره مصطفی پاشا صدر اعظم ایکن طشرده بولنان وزرایه امر کوندروب فرمان یازمقدن و طغرا چکمکدن منع ایش اولسنه مبنی بوماده ارضروم والیسی بولنان نصوح پاشا زاده حسین پاشانک عصیاننه سبب اولمشدر

دولت سننی الدقچه مصالح جاریه معاملاتنده اولان ساده لک دخی زائل اوله رق برطاقم قیودات و تدقیقاته احتیاج حاصل اولدیغندن درلودرلو قلملر ایجاد قلمسیله مناصب خواجکان دخی مزاید ایلدیکه توارنخ متأخرده اولان توجیهات دفترلرنده مسطوردر بکلربیکی ومیرلوارلک وظیفه مأموریتلری حوزه حکومتی تسلط اشقیادن محارسه وزیر اداره سنده قلعه و ارایسه انلری محافظه ایتمک وعشائر قبائلی تحت فرمانبریده بولندیرمق ومحلول اولان تیمار وزعامتلری اهل واربابنه توجیه ایتدیرمک وسفره مأمور اولدقدده زیر لوانسندده بولنان دیرلک اصحابی جمع ایله تعیین اولنان محله عزیمت ایتمک قضیه لرینه منحصر اولوب مواد حقوقیه ایله شهر وقصبه لری معاملات خصوصیه لری حکام شرعشریفه وجزبه ومقاطعات وسائر مراتب میریه نک جبایت وتحصیلی دفتردار ومحصل اموال اولنلره عائد وظائفندن ایکن امرایه مدار تعیش اولان خاصلرک اکثریسی وقتاً بوقه رفع والغا اولنهرق مقاطعات میریه یه الحاق اولنمغله امرانک تعیشی بادهوا وارداته وانسته اولدی

واقعا قوانین دولت قرین اغتشاش اولدقچه بکلربیکی ومیرلوارلر درلودرلو مکارهه میل ایله اموال وفیریه دسترس اوله کلوب خاصلر بالتدریج معاطعاته الحاق قلندی ایسه ده بوصورت مظالم وتعدياته رخصت رسمیه معناسنی اشراب ایلدی بناءً علی ذلك والی ومیرلوارلر حضریه وسفریه نامیه اهالی یه عینی وبدلی ویرکولر طرح وتوزیع ایتمکله ومحلول اولان زعامت وتیمارلری هرکیم زیاده رشوت ویرر ایسه اکا عرض ایلمکه وحوزه حکومتنده بولنان اغنیایی برر سبب تصنیع ایدرک مصادریه قویلدیلر مع مافیه حد معروفي تجاوز ایدنلر وانصافی بتون بتون الدن براقانلر حقنده اهالی جمعیت ایدوب مملکتندن چیقارمق ویا پارملق ویا خود رکاب هایونه اشتکا ایدرک دیوان هایونده بالمحاکمه تأدیب ایتدیرمک مخاطراتی دخی وارد وجاری اولدیغندن هر حالده

بونلری دخی درپیش نظر مطالعه ایٹک وزرا و امرا ایچون اهم مهامدن ایدی برده اوائل دولته بکلی بکی و میرلوارک منصب و اقتدارلرینه کوره اوچر بشر یوز قدر دائره مخصوصه لری خالق وار ایدیسه ده اصل قوه عسکریه لری محول عهده لری بولنان ایالات والویه ده اولان زعما و ارباب تیمارک اجتماعندن حاصل اولور ایکن احوال عسکریه بختده ایراد اولنه جنی وجهله انلرک نظام و کیمته خالی طریان ایلدیکنه مبنی بکلی بکی و میرلوار لوند و سکیان نامیله ایکیش و اوچر بیک و مواخذة دولتن خوف اوزره اولنلری ده زیاده حشرات جمع و استیخدام و اهالینک باشنه بلا ایدر اولدیلر بوسیله یوزر و ایکیش یوز سکیان ولوندی جامع پک چوق بلوکباشیلر حادث اولوب وزرا و امرا خدمت لرنده امرار وقت ایدر لر و قپوسز قالدقلری هنکامده بر محله انتساب ایدنجه قدر کویدن کویه دولاشوب کندولرینی اهالی یه بسلتدیر لرلر ایدیکه وقتاً بوقت ظهور ایدن جلالیلرک منبع منشائی بونلر در .

چغاله زاده سنان پاشا و قنیه محافظی تریا کی حسن پاشا و استرغون فاتحی لالا محمد پاشا و صدر اعظم بوسنه لی خسرو پاشا و کانکاش قره مصطفی پاشا و حانیه فاتحی یوسف پاشا و کرید سرداری دلی حسن پاشا و کوپرلی محمد پاشا و اوغلی فاضل احمد پاشا و مرزیفونی قره مصطفی پاشا بوعصده ابراز خدمات عظیمه و نائل فتوحات فاخره اولان وزرای بنامنددر

احوال عسکریه

جیوش عثمانیه نك علوفه یومیه ایله موظف اولان صنفی یکیکچری و سپاه و سلحدار و علوفچیان و غربای یمین و یسار و جبه جی و طوپچی و ترسانه اوجاقلرندن عبارت اولوب بونلرک مقدار نفوسی و علوفه لری باب سابق تکمله سنده بیان اولمش و سپاه طائفه سنک خدمت نامیله التزامیجاغه الیشوب خلاف قانون اناطولینک هر طرفه منتشر اوله رق شوراده بوراده توطن ایلدکاری ایراد قانمشیدی بوجهتله نائل ثروت و اقتدار اولان صناید سپاه ظاهراً علوفه و معناً التزام المق ایچون سنده بر کره استانبوله کلوب ایاجی خانی و سائر خانلرده اقامت و انواع فتن و شقاوته مباشرت ایده کلر یله وقایع فجیعہ لری وقوعات صرمه سنده توضیح قلنمش اولدیغندن تکرارینه حاجت یوقدر سلطان مراد رابع مرحومک واسطه سلطنته قدر هر استدکاری زوربالغی اجرا ایده کلدکلری حالده خاقان مشار الیه حضرتلری یکیکچری اوجاغنی قوله الوب انلرک سطوتیله اشقیای

سپاهی بوجه اتم تأدیب و تربیه به اهتمام ایلدیکندن برطاقی قنطره شمشیردن گذار و بر طاقی دخی خوف سیاست ایله ممالک بعیده به فرار ایتمکه شهریار مشارالیه حضرتلری اوتوز بیکی تجاوز ایتمش اولان والی بلوک خلقی تعبیر قلنان ابنای سپاهیانی بش الی بیک راده لرینه تنزیل و کسر رفعت و حیثیتلریله تحقیر و تذلیل ایلدی سلطان ابراهیم وقعه سندن صکره و کوپرلی محمد پاشا صدارتنده براقچ دفعه ده علم افراز تغاب اولدیلر ایسه ده ینه یکچریلرک مدافعه لرله تنکیل و تدمیر قلندقلرندن بعدازین کانون عتو و طغیا نلری منطقی اولدی

یکچیری طائفه سی جانبندن دولت علیه به اولدرجه ده ضرر ترتب ایتیموب چونکه جابجا واقع اولان بنی و طغیانلری سپاهی لرک تحریکی و بعض وکلای دولتک اثر تشویقی اولدیغندن قطع نظر دیگر اوجاقلره نسبتله ضابطانی مکمل و ادارملری تحت انضباطده ایدو - کندن تغاب و تسلطلری ممتد اولیموب آز وقتده دائره اطاعته دخول ایده کملشدر در سپاه طائفه سی نظر اعتباردن ساقط اولدقده یکچریلر بارگاه سلطنتک حارس صداقت کستری و جیوش عثمانیه نک عمده شجاعت رهبری مزیتنی حائز اولوب جبه جی و طوپچی و ترسانه اوجاقلری ایسه هر حالده یکچریلره پیرو اولمق مجبوریتنده ایدیلر

طوائف عسکریه نک تزايد و تدنسی خصوصی دخی شو وجهله واقع اولمشدرکه بیک تاریخنندن صکره واقع اولان نمچه و ایران سفرلری سببیه هر سنه یکیدن عسکر یازیله کلدیکندن ماعدا بیک اوتوز برده حادث اولان عثمان خان شهید وقعه سندن صکره اون سنه قدر شورش احوال ممتد و اداره دولت برهمزده هرج مرج اولمغله سپاه اشقیاسی ولدش نامیله اولاد واقربالرینی و صدر اعظم و سردار اکرم اولنلر دخی توابعات و منسوباتلرینی جیوش عثمانیه سلکینه ادخال ایلدکلرندن وظیفه یومیه ایله موظف اولان عساکر دولت یوز بیک نفری تجاوز ایتدی و علوفه لرینک تدارک و اعطاسی فتحی مشکل برمعما حکمنه کیردی مؤخرأ سلطان مراد رابع حضرتلری بغاة عسکریه نک تأدیب و تنکیلنه موفق اولدقده هیچ کیمسه نک عسکره ادخال قلنه مامسنه فوق الغایه اقدام و اعتنا ایتمکه کافه اوجاقلر خلقنی اللی اللی بش بیک مرتبه سنه قدر تنزیل ایلدی

حتی یکچیری کاتبی عثمان افندی به هیئت متسکرده بر آدم کوندروب یوز التون رشوت عرضیه یکچیری یازلمسنی طلب ایتدیردی عثمان افندی دفعه اولاده حریفی رد ایتمشیکن تکرار کلوب (نم صدر اعظم دائره سنده بر بیلدیکم واردر انک واسطه سیله نائل مطلب اوله جغم بو التونلری آلامقله قالیرسک) دیمکه مبتلای دام طمع اوله رق مبلغ مزبو-

ری اخذ و حریفی دفتر عسکری به قید ایلدیک خاقان مشارالیه واصل اولدینی آنده
دفتری عثمان افندی بی حضورینه جلب ایدوب انکار و تأویله دخی مجال و محل اولماغله
بیچاره کشته شمشیر سیاست اولدی پادشاه مرحومک سپاه طائفه سنه غیظ و غضبی و
مقدارلرینک تزیاید ایده مامسی خصوصنه اعتنایی بغایت زیاده اولدیغندن یکچیریلردن
وسائر بندکاندن فوق العاده خدمت ابرازایدنلر قاعده اسلاف اوزره سپاه بلوکلرینه الحاق
ایله تلطیف اولنق لازم کلدجک و عرض اولندجک صورت آخرله مکافات ایدرلر ایدی
سلطان ابراهیم وقعه سندن صکره طائفه عسکریه نک عتو و طغیانلری یکی باشند شرر
افشان اولوب سلطان مراد رابع زماندنبرو اولان چالقلر یعنی مقطوع العلوفه مطرودلر
تکرار اوجاقلره قبول اولندیغنه و کرید سفرلری دخی هر سنه یکیدن عسکر یازلمسنى
استلزام ایلدیکنه مبنی افراد عسکریه کوندن کونه چوغالمقده ایکن ویانه انهرامندن صکره
دفعه اوتوز بیک یکچیری و اون بیک سپاه تصحیح بدرگاه قلنمغله بیک طقسان طقوز
سنه سنده واقع جلوس سایان خان ثانیده کرک بارگاه دولته و کرک سرحداته یتمش بیک
اوجیوز طقسان درت نفر یکچیرنی وان ایکی بیک یوزاللی اوج نفر جبهه جی و بش بیک سکسان
درت نفر طوبجی و التیوز یتمش التی نفر طوپ عربه جیسی و تقریباً اون بش بیک مقداری
سپاه و سلاحدار و علوفچیان و غربای یمین و یسار نفراتی موجود بولندی واکرچه سلطان
محمد خلعی خصوصنده اکثر ارکان دولت و امرای عسکریه متفقلرایسه ده آتش فسادینه
سپاه اوجاغندن علوانکیز اولدی .

مقدملری سرای هایونلرده و عجمی اوغلانلری قشله سنده تربیه اولنان دیوشرمه
چوجقلری اوقات معینه لرنده و یاخود لزوم کورندجک قبیوه چیمه تعمیریه سواری و پیاده
اوجاقلرینه چیمه کلدکاری حالد صکره لری بوقانون دخی بشقه براصوله تحول ایلدی
شویله که مثلاً قیثره قلعه سی فتح اولندقد اولاجوارنده واقع الویه دن برقاچ سنجاق
الحاقیه ایالت اتحاد و بکلربی نصب واقعاد اولنور و ثانیاً اراضی مفتوحه تحملی درجه ده
تیمار و زعامته تقسیم و مستحقینه تفویض قلنهرق انلردخی خدمت محافظه ایله مکلف اولور
ایدی ثالثاً جبهه جی و طوبجی و یکچیری اوله رق ایکی بیک یرلی قولی و تعمیر اخیره قلعه
یماغی ترتیب قلنوب علوفه لری اوجاقلق تخصیص قلنان اراضی معینه واردات عشریه سندن
ویاخود جزیه و مکرمه مثلورسومات حاصلاتندن تعیین و حواله اولنور اولدی رابعا اگر
صالح منعقد اولیوبده قلعه یه تسلط دشمن و قوعی ملحوظ ایسه علوفه قدیمه لرینه اوچر
بشراجه ترقی اعطاسیله و برسنه خدمت محافظه ده بولنق شرطیه اسکیکچیریلردن برایکی

بيك ترقيلو يازيلور وخامسا كذلك برسنه خدمت محافظه ده بولنق وبعده سواری ویا خود پیاده
 اوجاقلرینه الحاق قلنمق شرطی و قول اوغلی تعبیریه ایجابی مقدار نفرات دخی مجدداً
 علاوه جیوش عثمانیه قلنورایدی کرید محاربه سی هنگامده دخی هر سینه کوندریلان
 عسکروجه مشروح اوزره یاترقیلو ویا خود یکیدن یازیلان نفرات اولوب ضابطان عسکریه ایسه
 عجمی اوغلانندن زیاده حال و بورجکی و چورجکی مثلوشخنه شهر تأدییه تذلیل اولنش اصناف مقوله
 لریخی یازده کلدکلرندن عجمی اوغلانلری دفعاتله عرض شکایت و عسکره چیقماق بزم حقمنز
 ایکن ضابطلریمز برطاقم اجلافک بشر اوزرغروشنی الهرق بزدن زیاده اناردن عسکر
 یازیورلر دیواعلام حاله مباشرت ایتشلر ایسه ده دم فساد عروق دولتک هرجهته یول
 بولمش ایدوکنندن ایشی قانون قدیمه ارجاع امواتی احیاقدر کسب مشکلات ایلدی
 بوجهته عسا کر عثمانیه هم کوندن کونه تکثروهمده ایچنه اصناف واتباعی گروهی قارشمش
 وقشله نشین اولمق قاعده سی برطرف اولمشدر بناء علیه هرکس کاروکسیله مشغول
 وقشله لرده یالکز اوطه باشی واشیجی اوسته ومتولی و یازیجی وباش قره قوللقجی وقوللقجیلر
 وقوللق تعبیرقلان قره غولخانه لرده دخی بر مقدار نفرات ایله چورباچیلر مقیم اولور اولدی
 وکیدرک جبهه جی و طویجی اوجاقلری دخی بورنکه کیردی و دیوشر مه المق و عجمی اوغلانلری
 قشله سنده تربیه قلنمق اصولی بالکلیه مضمحل و مندرس اولمق لازم کلدی

بالاده مسطور اولان تصحیح بدرکاه تعبیرینک منشی و تفسیری دخی شو و جهله بیان
 اولنورکه اناتولی و روم ایلیده واقع شهرلرده بولسان یرلی قولی نفراتنک فی الاصل
 مقدار نفوسی و علوفه لری معین و محدود ایکن صکرملری شهر اشبهلری امتیازات عسکریه
 ایله طغره فروش و بلکه حرکات هوا و هو سارنده سر است اولمق مقصده یله بلا علوفه
 یکچیری یازیلوب منسوب اولدقلری اورتنه نک نشانی قوللرینه و بجاقلرینه دو کدیرلر
 وعصر منزه طلاحنه کوره عسا کر ردیفه حکمنده بولنورلر ایدی سفرلر واقع اولدجه
 طرف طرف اوجاق ضابطانندن طور ناجی باشیلر اعزام اولنه رق بایراقلراچیلوب اومثلو
 نفرات طاقم اردوی هایونه کتوریلور و تصحیح بدرکاه یعنی یوقامه لری اجرا
 اولنه رق اولوقت علوفه یه نائل و کوتوک دینیلان اصل دفتر عسکریه داخل اولورلر ایدی
 ایالات عسکری اولان زعماء و ارباب تیمار کابرا عن کابرمملکتلرینک خاندان و اوجاق زاده لرندن
 اولوب دیرلکلری حاصلاتندن ماعدا املاک و عقار صاحبی ذی قدرت و ارباب توابع و حشمت
 آدملر اولملریله بولنرک ثروت و داراتلری منظور نظر دولت اولدجه عطایای دولتدن استفاده لری
 استکثار اولمنغه باشلا دیغندن عصر محمد خان ثالثه زعامت و تیمارلرینک اساس معاملات

اولان آنچه اعتباریله و بدل تیمار نامیله جابجا ویرکو استحصال قلمدیغندن بشقه کله و جبخانه مثللو اردولر مهمات حربیه سنک نقلی بونلره تحمیل و بعض قلعه لره وضع اولنق ایچون ینه آنچه اعتباریله ذخائر عینیه تحصیل قلمور اولدی و جانلیجه تیمارلر محلول اولدجه مقاطعات میریهیه تبدیل اولمغه و بعضیلری دخی بالتفریق اوچ بش کشییه توجیه قلمغه باشلانلدی مع مافیه محلول اولان تیمار وزعامتلی هر کیم زیاده رشوت عرض ایدر ایسه بکربکیلر انلره توجیه ایتدیرمکی عادت و سفره کیدمک لازم کلدکده ذی قدرلرندن رشوت اخذیله سفردن عفو ایتمکی اصول اتخاذا ایتلریله و قتیه دولت علیه نک پک منتظم و مکمل اولان و جبهه لولریله برابر یوز بیک نفردن متجاوز بولسان تیمارلو سوارینه ضعف و قدرتسزلک طاری اولدیغندن سفره کلنلری اسکینه نسبتله پک آزونلر دخی ایشه یرامزایدی و زرا و وکلا توابعاتندن افندیلرینک قوه نفوذیه لری ایله تیمار وزعامته نائل اولمش پک چوق اشخاص وار ایدیکه متبوعلرینه استناداً سفره کتمک تکلفندن وارسته اولدقلرندن ماعدا دیرلکلری داخلنده بولنان اهالی بی دست ملتزمیتنه تسلیم ایدرک انواع جور و جفایه و تخریب بلاد و فقرایه باعث و بادی اولمقده ایدیلر دولت علیه نک برده افنجی عسکری و ارایدیکه بونلر مملکتلرنده ساکن اولوب بر جانبه سفر ظهورنده بکلری معیتده تجمع ایدرک ممالک دشمنی غارت و تخریب ایدرلر و کندولری خفیف سواری اولدقلری جهته قاعه وارد و اوزرینه و ارمیوب فرار و صحرالرده بولدقلری دشمن توابع و حیواناتی اسیر و اغتنام ایلهرک انکله تعیش ایلرلر ایدی لکن مرور زمان و تکثر اساحه آتش فشان اصول حربیه بی بشقه رنکه قویمش ایدو کندن اولکی درجه ده مستفید اوله مدقلرینه واسکی بطش و شدت دخی زائل اولدیغنه مبنی بالطبع مندرس اولدیلر و تحت امکانده اولان غارت و تخریب ایشلرنده قریم خانلرینک کتوردکلری و یا کوندردکلری تاتار سوارینی استخدام اولنور اولدی

احوال بحریه

قبرس فتحندن صکرمه و ندکلور ایله عقد اولنان مصالحه کرید سفری ظهورینه دکن التمش سنه دن زیاده ممتد اولمغه سلطان بایزید عصرندن برواحداث اولنان بیوک کمیلر و قالیونلره لزوم قلمدیغندن انلر العا اولنه رق دو نهای هایون چکدیری انواعنه منحصر قالمشیدی قبودان پاشا ل ذکر اولنان چکدیری کمیلریله هر سنه آقدکزه چیقار و امرا کمیلری دخی التحاق ایدرک اسپانیا و ایتالیا قورصانلرینک دفع و تنکیلرینه و عسکری طائفه سنی مفتنم

ایتمک ایچون دول غیر متعاهده ساحل و جزیرملرینک یغما و غارتنه اعتنا ایله اکتفا قنلور
ایدی کرید سفری حادث اولدقدن صکره وندکلورلر آقدکز بوغازینی عظیم قالیونلر ایله
ابلوقه ایدیه کلرلیله دولت علیه دخی قالیونلر انشا ایدرک مقابلهیه مبادرت ایدوب اگرچه
دنیای هایون بر قاج دفعه مبتلای کسر وانهزام اولدی ایسهده وندکلورده دخی تاب
وطاقت قالدیغنه وباخصوص کویریلی مرحوم بوغاز محاربه سنده غیرت و شجاعتله
موصوف اولان وندیک امرانی بندیکی کمی ایله برابر سوخته قومارغ توفیق ایلدیکنه بناء
دشمنک اقدام اقدامه تزلزل طاری اولدی برده آقدکز بوغازنده فاتح مرحومک اثری
اولان ایکی قطعه قلعہ معلومه دن بشقه تابوغازک اغزنده مؤخرأ ایکی قلعہ ده انشا اولنمغله
وندکلورلر ارتق بوغازی ابلوقه ایتمکه قدر تباب اوله مدیلر بناء علی ذلک فاضل احمد پاشا
مرحوم سواحل و جزائر عثمانیه میرلوالری معیتند قرق قطعه چکدیری ترتیب وترسانه ده
دخی ینه بونوعدن اون بش کمی تجهیز ایدرک ینه قالیونلری ایکنجی دفعه اوله رق الفای
ایلدی قالیونلر یلکن وچکدیری انواعی کورک ایله استعمال اولنق حسیله چکدیریلر اولوقتک
واپوری حکمنده اولدیغندن قالیونلره رو برو مقابله ایدیه مزملر ایدیه ده قالیونلر دخی انلرک
سیر وحرکتی منعه قادر اوله مز ایدی و بوجهته کرید سفری ختام بولنجهیه قدر نقل
عسکرو مهمات خصوصنده مشکلات چکلمدی لکن ویانه انهزامنی متعاقب وندکلورلر مورایه
هجوم ایلدکلرندن ینه قالیونلر انشاسی تصویب والیش و قرق بشر ذراع طولنده دفعه
اون قطعه قالیون انشا اولنمغله بوندن صکره ترسانه نک عسکر و مصرفجه احوالی
بتون بتون کسب تغیر و جسامت ایلدیکه تفصیلاتی انشاء الله تعالی فصل آتی تکمله سنده
بیان و ایراد اولور

احوال امور مالیه

سلطان مراد ثالث مرحوم ایچ خزینه ده کلیتو مبالغ جمع وادخار ایلش اولدیغندن
بیکی تاریخندن صکره واقع اولان نمچه سفرلرند برکونه مضایقه مالیه حادث اولدیغی
منللو سلطان احمد اولک مدت سلطنتی کاملاً نمچه و ایران و جلالی سفرلریله مرور ایتش
ایکن مصارف لازمه تسویه اولندقدن بشقه شهریار مشار الیهک نام نامیلرینه منسوب
جامع شریفی مع تمات بنا و انشا بیورملری خزینه دولتک عدم مضایقه سنی اثباته
کافیدر انجیق بیکی یکریمی التي تاریخنده سلطان مصطفی و اوچ ای مرونده سلطان
عثمان و درت سنه کذراننده ینه سلطان مصطفی و برسنه صکره سلطان مراد رابع جالس

سریر سلطنت اولوب بوجهته بش سنه مدته درت دفعه جلوس بخششی اعطا اولمقله برابر سلطان مصطفی والدهسی اشقیایی تملطیف واوغلانی تأیید ایتک مطالعه سیله خزان عثمانیه بی بغاه عسکریه یه ابدال واسراف ایلدیکندن نقود مدخره بالکلیه رهین تلف اولدیغنه مبنی سلطان مرادک جلوس بخششی بعض تجار و متمولیندن استدانه وسلاطین ماضیه زمانندن قالمه سیم وزردن مصنوع ادواته ضرب سکه اولنه رق ایفا قلندی هر جلوس انعامی تقریباً اوچر یوز میلیون اچقه یعنی درت میلیون ریال درجه سنده ایدیکه نسبت نیات اشاعیده توضیح قنور سلطان مراد حضر تتری غارتکر واردات دولت اولان اشقیای عسکریه بی تأدیب وتنکیل ایلدکدن صکره امور مالیه دخی یولنه کیرمکه ایچ خزینه یه نقود کثیره ایله مالامال اولدی سلطان ابراهیم جلوسنده صدر اعظم بولنان کانکش قره مصطفی پاشا امور دولته کاینغی نظام ویروب واردات ومصارفاتی قارشولشدیرمش اولمقله کرک وظائف عسکریه وکرک مصارفات مهمه ده جاری اولان حواله و سرکی اعطاسنی الفا و جمله سنی وقت وزمانیله نقداً اعطا ایلدیکی حالده بهر درکلی ریال سکسان اچقه اعتباریله التیبیک کیسه لک نقود ارتیروب اندرون خزینه سنه تسلیم ایلشدی صدر مشار الیه ک قلندن صکره مصارف تکثیر و وارداتک مجرای صحیحی تغیر اولمقله کوندن کونه مضایقه مالیه حادث اولمقله باشلایوب باخصوص سلطان محمد رابعک جلوسنی متعاقب طوائف عسکریه یه زروه عتو و طغیان عروج ایلدکارینه مبنی بر طرفدن عسکرک مقدار و علوفه لری نزاید ایدرک و بر طرفدن اموال خزینه شونک بونک دست تغلب و تسلطنه کیره رک مصارفات مهمه رؤیت اولنه من و علوفه و یریه من اولدی بنابرین صدر اعظم ملک احمد پاشا توجیه مناصب مقابلنده اسلافک آله کلدیکی رشوتلری قبول ایتیبوب خزینه یه ایراد قید ایتکی یا حسن تدبیر عبد ایلدیکندن و یا خود بشقه چاره تدارکندن عاجز ایدو کندن اصولی وقاعده اتخاذا ایلدی و بعض سبک مغز و مغشوش الطبع اولان دفتر دارلر دخی خزینه یه کلان نقودی صرافلره اعطا و مقابلنده زیوف اچقه استیفا ایدرک بونک فضله سنی فائده ظن ایتدیلر و بوتصرفات سببیه نیجه نیجه فتنه حادث اولوب انواع ترذیلات و تذلیلاته کرفتار اولدیلر بومثلوتدایر فاسده و ارای کاسده امور مالیه بی کوندن کونه فنا لشدیروب تا کویری بی محمد پاشا مرحومک صدارتنه قدر تمتد اولدیغی حالده مشارالیه مصارفات زائدی قطع و واردات خزینه بی مجرای صحیحنه وضع ایلدی چونکه سلطان مراد ثالث مرحوم تصوفه مائل و خنکار شیخی نامیله عصرنده کسب اقبال واشتهار ایدن شیخ شجاعک ولایتته قائل اولدیفندن کرک مومی

اليه و كرك بومثلولره اوقاف سلاطين و كرك وساثر اموال اميريهدن دعا كو وظيفه لري
تخصيص ايدوب كيدرك بواصول كسب وسعت وجسامت ايتمكه دائره سلطنته وباخصوص
حرم اغالرينه و حرم سراي پادشاهي متفذه لرينه كسب تعلق ايدن برطاقم قلاش و مغربي به
كليتلو وظائف تعيين اولمشدي حتى بوزجه آطه محافظه سنه مأمور اولان غزاتك
علوفه لري اوجاقلق وجهله اولحوالي مملحه لرندن مرتب و محول اولوب مؤخرآ بو
اوجاقلقك وارداتندن دخی برطاقم مفت خوارانه دعا وظيفه لري تخصيص قلنمش اولديغندن
انلرك مزاحمه سيله علوفه غزات تسويه اولنه مامق درجه سنه كلديكندن بوكيفيت
مستحفظلرك طاغلمسنه واطه نك كرفتار دست اعدا اولسنه بادي اولديغي مرويدر كوپريلي
مرحوم بونلري تنقيح ايدر ايكن شيخ سالم نامنده بر مغربينك كرك و اوقاف وساثره دن
يومي بيك اچه قدر دعا كوي وظيفه سي اولديغي كورد كده نصفی قطع ايلسكه شيخ مزبور
بروات هايوني يره آتوب بونلري بكا پادشاه ويردي سن نصل قطع ايدر سن ديهرك بي
ادبانه اوضاعه متجاسر اولديغندن درحال اعدام ايلدي قبرس جزيره سنده واقع لفقوشه
قلعه سنك يرلي اغالغه يعني عساكر مستحفظه ضابطلكنه مخصوص اولان زعامت صادر
اولان تصحيح امر عاليسي موجبجه ماوضع لهندن اخراج و دعا كويلق وجهله شيخ
مزبوره توجيه قلنمش اولديغي قيود خاقانیده منظور فقير اولمشدر كه اداره امور دولته
حاصل اولان اغتشاشك درجه سي بوندن استدلال اولنق لازم كلور ويانه انهرامنه دكين
اوتوز سنه دن متجاوز زمانده مشكلات ماليه بالكليه برطرف اوليشكن مؤخرآ ينه
شرزده ظهور اولغه باشلا ديكه تفصيلاتي ان شاء الله تعالى فصل آتي تكمله سنده ايراد اولنور
اورخان غازي زماندنبرو دولت عليه نك قطع ايتديرديكي نقود اچه به منحصر
اولوب فاتح عصرنده مجار آلتوني وزن وعيارنده التون و بيك تاريخندن صكره اولنق يعني
اون اچه لك ودها صكره لري پاره قطع ايتديرلسكه باشلانمش ايسه ده اساس معاملات اچه
اعتباريله اولديغنه واوروپادن ممالك عثمانيه ايدخال اولنان اشيا ساعت وچوقه وشكر مثللو
برقاچ نوع امتعه دن عبارت بولنديغنه مبني اخراجنه مساعده اولنان ذخائر وساثر محصولات
ادخالاتدن پك زياده اولغله ممالك عثمانيه ده كليتلو يالديز و مجار آلتوني واسدي ديدكلري
ديركلي ريال ايله قره قوش تعبير قلنان قوشلي ريال بولنور و جانب دولتن بونلرك منع
تداوله اهميت و يرلمديكندن اچه نك وزن وعياري تغير ايلدكجه غروش والتونك فياتي
ترقي ايدر ايدى حتى بيك اون تاريخنده التون ايكوز يكرمي اچه به چيقمش ايكن
صدر اعظم يمشجي حسن پاشا جديد وخالص العيار اچه قطع ايتديرمكه التون يوزيكرمي

وغروش سکسان اچیه تنزل ایلدی بیک الی تاریخنده کآنکش قره مصطفی پاشا دخی
سکه اموریخی تصحیح ایدوب التون ایکیوز الی وغروش یوز یکرمی بش اچیه
جیقمش بولندیغی حالده التون یوزالتمشه وغروش سکسان اچیه ومصر پاره سنک بهری
ایکی اچیه تنزل قلندی وبوماده حدذاتنده امور ممدوحه دن ایکن برغروشه اون برقیه
لم النور ایدی شمدی سکز قیه النور اولدی دیواعتراضات واقع اولمشدر بوندنصکره
مسکوکاتده تغیرات کثیره حادث اولدیغی مثللو بوعصره قدر دولت عثمانیه التونلری هیچ
بوزلیوب مجار التونی وزن وعیارنده اولدیغی حالده بودخی مشکلات مالیه حسبیله تغیر
اولندیغندن مقیاس صحیح اتخاذ اولنان یالیز و مجار التونلرینک وغروش دنیلان ریالک
فیائی ترقی ایده ایده بیک یوز تاریخنلرنده یالیز آلتونی اوچیوز وغرش یوزیکرمی اچیه
طوغری فیرلادی طقسان سنه ظرفنده التون ایله کموش بیننده حاصل اولان تفاوت دخی
بوفیأتلردن استدلال اولنق اقتضا ایدر

بیک التمش درت تاریخنده تنظیم قلنمش اولان موازنه دفتریکه ترخونجی لایحه سی
دیمکه مشهوردر انک منطوقنجه سلطنت سینه نک اون درتیک بشیوز اوچ کیسه وارداتی
واون آلتی بیک درتیوز کیسه مصارفاتی بولندیغندن بیک طقوز یوز کیسه اچینی اولدیغی
وبر بحق سنه ک واردات تداخلده بولندیغی محرر و واردات و مصارفاتک مفرداتی وطوائف
عسکریه نک مقدار و کیتلری مندرج ایسه ده تعبیرات عتیقه ایله یازلمش اولسنه مبنی تمامیه
حل مشکلات اولنق قابل دکلدر فقط اشبو موازنه ده مسطور اولان ایراد ومصرف
طوغریدن طوغری به خزینه به ادخال وخزینه دن اخراج اولنان اموال اولوب بونک
خارجنده وحواله وتقسیم صورتنده دها پک چوق واردات و مصارفات وار ایدیکه عصره
مزرده تنظیم اولنقده اولان موازنه دفترلرینه تطبیقاً و قیاساً بیان وتذکیر قلندیغی حالده
ایضاح ماده اولنمش اولور شویله که اولامصر ارسالیه سیله اردل وافلاق وبغدان ودوبره
وندیک مثللو ممالک ممتازه ویرکولری ومعادن حاصلاتی واموال غنائیم ومخلفات وزرا
وامرا طوغریجه ایخ خزینه به وضع اولنه کلمکه مذکور موازنه دفترندن خارجدر ثانیاً
کک سرای هایون وکک طوائف عسکریه تعیناتی ایچون النان اوندهلق اغنائی وعیناً
استیصال قلنان پرنج وسائره دخی داخل دکلدر ثالثاً بالجمله وزرا ورجال وکته وطشرمه ده
بولنان والی ومیرلوارک خاص وزعامت وخرج ومخصصات معینه لری اولدیغندن وطریق
عامیه رجالتک دخی خرج موایقندن واردات مقررهلریله صدور وموالی معزوللرینک
ارپه لقلری بولندیغندن خزینه دولتدن بونلره معاش اعطا قلنماغله خزینه برطاقم

وارداتی بوضورتله انلره تقسیم وحواله ایش دیمک اولور برده اول عصرده عوارض و بدل نزول نامیله ممالک محروسه اهالیسنه برویرکو طرح اولنور ایسه ده زمانمزده جاری اچمه فیاتنه نسبتله تقریباً الی آلتمش بیک کیسه راده سنده اولوب شمدی ایسه اموال ویرکو التیوز بیک کیسه دن متجاوز اولسنه نظراً اولوقت خزینئه دولته وارد اولان مذکور الی التمش بیک کیسه مک فضله سی اولق لازم کلان بشیوز بوقدر بیک کیسه حضریه وسفریه نامیله والی ومیرلوا وویوده لره وشهر وقصبه لر اهالیسنک تعمیر واناشانه مجبور اولدقلری کوپری وطریق مثللو شیلرک ومنزل بارکیری وسائر بونک کبی مصارف بلدییه نک تسویه سنه مخصوص ومعین حکمنده ایدوکندن هر مملکتده بوضورتله توزیع وتحصیل قانور ایدی رابعاً قلاع خاقانیده بولنان مستحفظ و بیوک شهرلرده اولان یرلی قوی نفراتنک علوفه لری اوجاقلقلرندن مرتب ومحول اولغله بودخی خارج ازموازنه درخامسا ممالک محروسه نک هر طرفنده متمکن ومتوطن اولان زعما وارباب تیماردیرلکلرینک حاصلات عشریه سیله متعیش اولدقلرندن کلیتو عساکر سواریدن عبارت اولان اوپله بر قوه جسیمه ایچون جانب خزینهن بر اچمه ویرلیوب بالعکس مضایقه مالیه زمانلرنده بدل تیمار نامیله برویرکو دخی النور ایدی کذلک یورتلق و اوجاقلق اصحابی اولان امرا حدود خاقانی محافظه سی خدمتی ادا ایدرک طرف دولتدن برشی المیوب دیرلکلری حاصلاتیه کچنورلر ایدی سادساترسانه عامره مصارفی اولان بیک التیوز کیسه نک طقوز یوز بوقدر کیسه سی جانب خزینهن اعطا وماعداسی ترسانه اوجاقلقلرندن استیفا قلنه کلدیکی سالف الذکر بیک التمش درت سنه سی موازنه سنده مسطوردرر سابعا سلاطین ماضیه ووزرا وامرا وسائر اصحاب خیرات کرک استانبولده وکرک ممالک دولت علیه نک هر جانبنده پک چوق جوامع ومدارس ومکاتب وکوپری وخان وحمام مثللو ابنیه خیریه ولایمه انشا وصولر اجرا ایدرک هم بلاد وقصباتی اعمار وتزین وهمده انتشار علوم وفنون ضمننده مدرس وخواجه وطلبه علوم وخدمه وقفه وظیفه نقديه وعینیه ترتیب وتعیین ایدوب حتی مکتب چوجقلرینه بیله قیامه تعمیر اولنور البسه وسائر تخصیص ایشلردر وبعض مهم طریق وجسرلرک تطهیر وتمیری ایچون جوارنده بولنان کویلر تکالیف عرفیه دن معاف طوتغله انلر دخی دائماً وظیفه لرینی اجرا ایدرلر ایدی بنابرین عصرمن موازنه لرده مرقم اولان اوقاف ومعارف ونافعه تخصیصاتلرینه دخی محل المیوب امور مذکوره بوجهله رؤیت قلنه کلشدر

دولتک امور مالیه سی بومرکزده وارکان سلطنتک ثروت واقدارلری دخی مشهود

اولان انارلریله معلوم اولی الابصار اولدیغندن اولبابده تطویل مقاله حاجت اولیوب فقط بالاده بالمناسبه ایراد اولنان مخالقات یعنی مصادرات مادهسیله اوقاف حقنده بعض مرتبه تفصیلات درج و تسطیر اولنسی فائدهدن غیر خالی و اتیان اوله حق مقالاتک محاکمه سی ارباب مطالعه و دانشک محول عهده کفایتلرندر

وزرای عظامک واردات مناصبرلی غیر مقرر اولمق حسابیه استقرار مناصبه نائل و حسن اداره مصالح ذاتیه سنه قادر اولنلر کسب ثروت و سامان اید کلدکلرنده و دائرة وزارت لدی الاقتضا قوللائق اوزره کوچک براردو حکمنده بولندیغندن حین ارتحاللرنده نقود موجوده ایله بعض ذی قیمت اشیا و اسلحه و حیوانات و چادر کبی مهمات سفریه جانب میریدن قبض اولنوب ورثه سنه املاک و عقار و سائردهن کچنه جکلری درجه دده اموال ترک اولنور و مدار تعیش براقیان وزرا و امرانک اولادلرینه طرف دولتدن معاش اعطا قلنور ایدی حتی کوپرلی اوغلی فاضل احمد پاشانک و فائنده بیک کیسه قدر نقودی خزینه هایونه اخذ اولنوب اموال و املاک کلیه سی ارتا برادری فاضل مصطفی بک ایله همشیره لرینه انتقال ایشدر کذلک مرزیفونی قره مصطفی پاشا مغضوباً مقتول اولدینی و بالجمله نقود اشیاسی میریه قبض اولندیغنی حالد اوغلی علی بک که صکرده لری مقتول زاده علی پاشا نامیه کسب اشتهار ایشدر دیوان یولنده اولان مدرسه و متفرعاتی پدرینک عقب اعدامنده انشا ایتدیروب بونلرک ایسه قدر مصرف و ثروته موقوف ایدوکی محتاج بیان دکلد و دها بک چوق وزرا زاده لر بابلرندن قالان اموال و املاک ایله صرفها اوقات گذار اولمشلردر که هر برینک اتیان موجب تفصیل اوله جغندن ترک قلنمش و ظن اولندیغنی کبی هر وزیرک و فائنده کافه اموال و املاکی مصادره اولنمق و عیال و اولادی سوقاقلره اتنق واقع اولماشدر برده حد معروفی تجاوز ایله جمع مال ایدن اصحاب اقبال و متنفذان اکثریا مبتلای مؤاخذه و مصادره اولمشلر ایسه ده دقت اولندیغنی حالد هر بریسی برسبب و لزوم تحتنده در ازان جمله سلطان ابراهیمه کسب تقرب ایدن مشهور جنجی خواجه نک اوچیک ایکی یوز کیسه لک نقود و اشیاسی مصادره اولمشدر که عصر من حسابجه یوز بیک کیسه اچه دیمکدر خواجه مزبور بوقدر مبالغی اوچ بش سنه ظرفنده وزرا و امرانک تقدیمه مجبور اولدقلری رشوتلر ایله اوقاف سلاطین و سائردهن بلا استحقاق تخصیص ایتدردیکی وظائف و طرف پادشاهیدن الدینی عطایادن جمع و ادخار ایش ایدوکی میدانده اولمسنه نظراً بونلری بالاسترداد امور مهمه دولته صرف ایلک عدل و ظلمدن قنغیسنه شبیه اولدیغنی ارباب انصافک مطالعه بیطرفانه سنه براغلدی شوقدر

واركه اساس ماده وجه مشروح اوزره اولدینی حالده كیدرك سؤ استعمالاته منقلب اولوب مأمورین و ملتزمیندن و بلکه دیوات ایشنه قاریشمیوب کندو تجارت وزراعتیه کسب ثروت و سامان ایدن اغنیادن وفات ایدنلرك اموالی برر نام و وسیله ایله مصادره اولمغه باشلانلدیغندن بوقاعده نك نه درجه لره قدر واردینی اشاء الله تعالی فصل آتی تکمله سنده توضیح قلنور

اوقاف بختنده دخی شو وجهله تسطیر مافی الضمیر اولنور كه هر عصر ك ارکانی اسلافه عز و تهمت و زمانلرنده واقع اولان فالق لرك سبیتنی انلرك اداره لرینه اسناد ایله کندولری تبریه ذمت ایلک امور طبعیه دن اولوب فقط بزم عصر من خلقی بوبابده پك ایلرویه کیدر لر بونك سبی دخی اسعد افندی مرحومك وقعه خیریه یی متضمن اولان اس ظفر نام تاریخنده طائفه عسکریه یی واکا متفرع اداره سابقه یی پك زیاده فصل ومذمتله برک یاننه بش قاتارق ودرلو شعبه لر ومضحکات علاوه ایدرك جابجا واقع اولان افعال ردیه یی علی الدوام جریان ایدرمش کبی کوسترمسیدر كه متأخرین بوکا تمامی تمامنه اعتقاد ایدر لر حالبوکه تاریخ من بورك یکیکچر یلرك الغاسی اوزرینه طائفه مرقومه حقنده هر کسك نفرتی استلزام ایلک مقصدیه ترتیب و تنظیم قلنمش اولمسندن غفلت ایلر لر واقعا یکیکچر یلرك انحلال عقده نظامات سیئه سیله آثار شقاوتکارانه وحرکات جاهلانله لر ی غیر منکر ودولت علیه نك عسا کر منتظمه تشکیل و ترتینه مجبور ومضطر اولدینی مسام ایسه ده تزدیل وتحقیر اولسان آدم لر بشقه بر قوم اولیوب بزم آبا و اجداد من و اداره لر ی قبیح اولسان وکلا ورجال دولتک ایچنده اخلاق مقدوحه ایله متصف لر ی بولمق طبعی ایسه ده پك چوغی دخی ولی نعمت لر ی اولان سلطنت سنیه اغورینه جان و مال لرینی فدا ایدن اسلافز اولملریله و اخلافزك بزره ایده جکلری اعتراضات دخی درخاطر قلنمق اقتضا ایده جکی جهته بر طاقم خوش آمد کویا نك ریش خندینه وجود ویره رك اسلافه طعن و تشنیع ایلک مناسب دکدر ظن اولنور

بوجهل دن بریسی دخی کویا اسلافک اوقاف ترتیب وتنظیم ایلری مجرد مصادره خوفدن نشأت ایتمش واولاد واحفاد لرینه ایراد براقق مقصدینه مبتنی ایمش دیو تفوه اولنان اقوال بی مألدر چونکه ایچلرنده اویله سی اولسه بیله اکثریتی بوکا مخالف اولدینی ادله آتیه ایله ثابت اولور اوله غرض ایراد براقق اولدینی تقدیرجه خیرات ومبرات انشاسنده اختصار اولنوب عقار ومسقفات تنظیمنده افراط اولمق اقتضا ایدر ایدی حالبوکه مشهود من اولان بونجه ابنیه جسمه خیریه دن ماعدا اصحاب خیراتک وقفیه لرینی

مطالعه ایدنلرک معلوملری اولدینی اوزره کوپرلی مرحوم استانبولده وفتح و تسخیرینه موفق اولدینی بوزجه اطه و لنی و یانوه وورات قلعهلرنده و وطن اتخاذا ایلدیکی وزیر کوپرلسنده و کیود و قسطمونو و سائر یرلرده متعدد جوامع و مدارس و مکاتب و خان و حمام یاپدیردقدن بشقه کلیس طرفنده مارین و عابرینک تأمین ایچون قلعهلر بنا ایدوب مستحفظلرینک وظائفی و قفی جانبندن تخصیص ایشدر اوغلی فاضل احمد پاشا دخی قندیه و ایوار و قانیجه قلعهلرنده و بلغراد و سائر مواقع متعدده ده پک چوق جوامع و مدارس و مکاتب و خان و حمام بنا ایش و باخصوص از میرک کسب شرف و معموریت ایلسنه کتوردیکی صو و انشا ایتدیردیکی قرق قدر چشمه و متعدد کوپرلر و وزیر خانی نامیله مشهور جسیم خان و جوارنده واقع چارشو و حماملر سبب اولمشدر فاضل مشارالیهک شهر مذکورده اولان آناری فی زماننا یوز بیک کیسه یه یاپیله میه جنی درکار اولدیغندن همت و مکتتک درجه سی بوندن استدلال قلنمق اقتضا ایده جکی مثللو بو عقار ملکاً و ارثاً برادری فاضل مصطفی پاشایه و همشیره لرینه قالدقده مشارالیه مصطفی پاشا ورثه سائر حصهلرینی بالاشتراق رنداشم بونلری وقف ایتک نیتیه تنظیم ایشیکن تسجیلنه و قفی اوله مامشدر دیه رک وقف ایلمسی علوجنابک مرتبه علیاسیدر سلطان محمد رابعک مقبل و مقبولی اولان مصاحب مصطفی پاشایه تیره و بایندر قضالری خاص تخصیص اولندیغندن و پاشای مشارالیه مقرب پادشاهی بولنمق سببیه متسلملرینک متجاسر اولدقاری مظالم و تعدیاتک منعنه و کلای دولت قادر اوله مدقلمدن مذکور قضالرک خراب اولدینی بعض تاریخلرده مندرج اولوب اگرچه اول عصرک احوالی شمدی حقیه بیلنمک قابل دکل ایسه ده پاشای مشارالیهک بایندر قصبه سنه کتوردیکی صو و سائر آثار خیره سی الان جاری و بونلرک موقوف اولدینی مصرف اولیه بر قصبه و بلکه اوچ بش قضا خلقنک اقتدارندن خارج ایدوکی مشهودی اولنلرک تسلیم کردلری اوله جغندن انغاریه صورتیه اهالی یه یاپدیرلمش اولمق خاطر دسند دخی مستغنی در ثانیاً دارالسعاده اغاسی و قپو اغاسی مثللو وارسته قید انساب اولان پک چوق ذوات دخی کایتلو خیرات و مبرات و مسققات و عقار ترتیب و تنظیم و وقف و تسجیل ایشلردر

حال بو مرکزده و نشر علوم و معارفی موجب و اعمار ممالکی مستلزم بو قدر آثار جسیمه و نافعیه میدانده ایکن فرعی اصله تقدیم ایله سوء ظه ذاهب اولمق لایق انصاف دکلدر

اوقاف مذکورده صرف اولنان مبالغ اکتساب مشروعه مستند اولوب اولماسی

بجسته کلنجه واقعا بونلرک جمله سی طیب اموال دن یا بلشدر دینله من ایسه ده هر نه صورتله ایسه مادامکه جمع وادخار اولنه کلشدر اسراف وسفاخته صرف اولنمقدن ایسه عامه نك مستفید اوله جنی مواد خیریه یه خرج قلنمسی البته مقبول وممدوح اولمق اقتضا ایدر مثلاً وقتنی ادراک ایتدیکمز ذواتدن شیخ الاسلام اسبق مکی زاده عاصم افندی کمال امساک ایله ادخار ایلدیکی مبالغی وبعض اغنیای وزرا تزینات بیهوده یه وحظوظات نفسانیه لرینه صرف ایلدکلی اچه لر یه و قتله اصحاب خیرات طرفندن انشا اولوب مرور زمان ایله خراب اولان ممالک محروسه ده واقع بونجه مهم ومعتنا کوپر یلرک وطریقلرک تعمیر وتسویه سی کبی وعصر مزده وجود ولزومی مستغنی توصیف بولنان خسته خانه لر وعلوم ریاضیه مکتبلری مثللو منفعت ملکیه وملیه یی موجب آثار خیریه یه خرج ایلسه لرهم کندولرینه دلالتی قالور وهمده رحمت ایله یاد اولنلرینه سبب اولور ایدی

فقط استانبول وادرنه وبروسه کبی شهرلرده جامع شریف انشاسنده لزوم واحتیاجک مرتبه سی نظر تدقیقه التمامش وارضی ورسومات وقف ایلك مثللو تقلیل اصحاب سیفی مستلزم شیلره تصدی قلنمشدر چونکه تشکیل دولته خدمت ایدن امرای اسلامیه نك سیف شهامتلیله فتح ایتدکلی محللرده عهده لرینه برر مقدار اراضی تملیک اولنهرق وقف ایتدکلی واقع وبونلره بر دیه جک اولمدیغی بدیهی ایسه ده متأخریندن بعضیلر عقار ومسقفات انشاسنه عدم اعتنا ایله زعامت وتیمار ومقاطعات میریه یه مربوطیتی اولان اراضی یی وحقی کیالیه وقنطاریه وباج بازار کبی رسوماتی بیله یامعجله اعطا احسان صورتیله کندولرینه تملیک ایتدیررک وقف ایدر اولمشلردرکه بونلر وقف صحیح اوله مدقلرندن قانوننامه همایونده تخصیصات قیلندن اولان اوقاف نامیله مذکور ومسطوردر مع مافیه بومثلولرک ایچنده دخی معقول اولنلری واردرکه مثال اولهرق برینی ایرادایده لم دفترخانه خاقانیده محفوظ اولان وقفیه لر دن سلطان احمد خان ثالث اوائل سلطنتنده نائل صدارت عظمی اولان انشته حسن پاشا وقف نامه سی مزایاسندن مستفاد اولدیغی اوزره عزیر سنجاغنده شیخ الحدید دیمکله معروف مقاطعه داخلنده قره مورط نام محل که حرمین شریفین وبالجمله عربستان طرفلرینك ممری ایکن مرور اعوام ایله قراسی بالکلیه خراب ومزارع وانهار ی معطل اولوب مأوای لصوص اولمشیدی دفتردار وقت مقاطعه مزبوریه بشیک غروش قیمت تقدیر ایلش اولدیغی حالده صدر مشارالیه یدی بیک بشیوز غروشه اشترا وعهده سنه تملیک ایتدیرد کدنصکره وقف ایدوب طریقك تأمینی ومقاطعه مزبورده متوطن اهالینك

حصول اسایشی ایچون برقلعه بنا و دروننه برجامع شریف و برچفته حمام و طقسان
 اوجاقلی برخان و برمکتب و بر عمارت و اوتوز عدد دکان و نفرات قلعه و متولی و کاتب و واعظ
 و مؤذنان و قیم ساکن اولق ایچون منازل متعدده انشا ایدوب مقاطعة مزبوره حاصلاتندن
 تسویه اولنق و مارین و عابرینی محافظه ایتک اوزره یومیه اون بشر اقچه علوفه ایله یکریمی
 الی نفر سواری و اوتوز اقچه یومیه ایله بر سواری اغاسی و یکریمی اقچه یومیه ایله بر
 کتخدا و اون یدی اقچه یومیه ایله بر علمدار و اون الی اقچه یومیه ایله بر چاوش تعیین و قلعه
 محافظه سی ایچون دخی اوزر اقچه یومیه ایله اون بش نفر پیاده و اون بش اقچه یومیه
 ایله بردردار و اون ایکیشر اقچه یومیه ایله درت بواب ترتیب ایتدیکی مثللو ذکر اولنان
 جامع و مکتب و عمارتک خدمه سنه وظائف متفاوته و عمارتده طبخ اولنه حق پلاو و زرده دن
 ماعدا ذکر اولنان نفرات و ضابطان و خدمه وقفه هرچفتی ایکوز قرق درهم اولنق
 اوزره یومیه سکسان ایکی چفت فدوله و عمارت لوازماتی ایچون سنوی یوز سکسان بش
 کیل پرنج و درت یوز قرق درت قیه ساده یاغی و اوچ بیک ایکوز قیه لحم غنم و اوچیوز
 قیه غسل و بونلره متناسب اشیای سائره تعیین ایتمش و همشیره لرینه دخی وقف مزبور دن
 اللیشر اقچه وظیفه شرط ایشدر نظر انصاف ایله باقلدینی حالدده بووقفک ترتیبی اعمار
 ممالک و تأمین طرق و نشر علوم مثللو اوچ ماده مهمه و خیریه بی جامع و بو یوزدن تحصیل
 اجر و ثوبات مقصدینه مبتنی اولدینی ظاهر و بوقدر مصارف کلیه ایچنده همشیره لرینه یالکیز
 یومیه اللشر اقچه تخصیص ایللری تأیید مطالعه یه سند باهر اولدینی مثللو مقاطعه نک
 بو یولده وقفه تبدیلی دخی مغفور و معذور طوتیله حق مواددندز .

احوال علوم و معارف و صنایع

بویابک حاوی اولدینی عصرده مقام مشیخه کلان ذوات فخام و صدور عظامک
 اکثری فضائل و کمالات ایله اراسته و باخصوص خواجه سعدالدین افندی خاندانی و زکریا
 افندی و مخدومی یحیی افندی و صنع الله افندی و قره چلبی زاده عزیز افندی و صاحب
 فتاوا عبدالرحیم افندی و چتالجه لی علی افندی مشاهیر فضلالی مشایخ اسلامیه دن اوله رق
 بحق اعلم العلماء مدیحه سنه شایسته بولندقلری آثار لرله ثابت اولدینی کبی ارباب طریقک
 قسم اعظمی و ایه دار فضل و معارف و شاذ قیلندن اوله رق خواجه زاده مسعود افندی
 و ممک زاده مثللو جهله نسبت اولنانلر بیله مباحثه مسائل شرعیه یه قادر و واقف اولدقلری

تبع آثار اید. نلره ظاهر در مع مافیه بونلرك اكثرىسى بالذات طشره لرده حكومت شرعیه ده بولند قلرندن احوال ممالك و اداره مهام دولته كسب وقوف و معلومات ایده ككشردر معمارسان مرحومك يتشديدكى چرا قلردن معمار داود اغا و سلطان احمد جامع شريفك معماری محمد اغا و يكي جامع معماری مشهور قاسم اغا كه كرك استانبولده و كرك مسقط رأسی اولان اولونیه سنجاغنده كلتلو اوقافی و متعدد خیرات و مبراتى واردر انك و بونلر امثالی اصحاب هنرك درجه لياقتلى اشبوفصلك حاوی اولدينى بيك اوج تاريخيله بيك طقسان طقوز سنه سی بیننده بنا و انشا اولنوب الآن موجود اولان جوامع و مدارس و خان و حمام و قلاع و كوپرى و سائر ابنیه جسمیه و متينه ايله ثابت و مبرهندر استانبولده و ممالك محروسه نك مواقع عديده سننده اصنافی معرفتيله هر نوع اسلحه اعمال اولنه ككديكندن بشقه جلد اولده مسطور علوفه خواران دفترنده مندرج اولان اغایان و خدمه ارباب حرف كه طقوز يوز بوقدر كشیدن و سراج و خاص اخور خاقي كه درت بيك اوچيوز كسور نفوسدن عبارتدر بونلر موظفاً دولت قابریقه لرنده مستخدم اولان ارباب هنر و صنایع اولوب على الدوام طوب و تفنك و قلیج و اسلحه سائر و چادر و حیوان طاقی مثللو مهمات سفریه اعماليله مشغول اولورلر و برخیلیسی اردوی هاپونلر رفاقتنده كیدوب انهای راهده اقتضایدن ادوات حربیه یی انشا و تعمیر ایدرلر ایدی حتی سلطان مراد مرحوم روان سفرنده ارضرومده و بغداد سفرنده ماردینده و فاضل احمد پاشا قنده محاصره سی هنكامنده اردوده جسم طوپلر دو كدر مشلر و معمار و مهندسلك مهارتلى محاصره مذكوره ده بزم طرفدن یاییلان لغملرك و نككلولرك لغملرینه تفوقيله ثابت اولمشدر دفتر خاقانیده مقید اولدينى اوزره ادرنه و دیمتوقه و فلبه و سلانیك و اناطولیده واقع اسكيشهرده و بونلرك حوالیسنده اون طقوز قطعه حیوانات اوجاقلی اولوب بو اوجاقلر برطاقم مرعى و چایر و اورمان و قوریلقلری حاوی و ابنیه مقتضیه یی محتوی اولدينى حالده زعمادن برر اوجاق اغاسنك تحت اداره سنه وضع اولنمغه میری دوه واسب واسترلى بورالرده بسنور و دائماً دوللری النوب تكشیرلرینه اعتنا قلنور ایدی برده ممالك محروسه ده یتش سكسان بيك تیمارلو سپاهیسی اولوب بونلر اولاكندو نفسلری ایچون ثانیاً فضله سنی صاتوب تمتع ایلک مقصديه دائماً چقتلكلرنده حیوانات يتشديره كلكلرندن ممالك عثمانیه ده كلتلو حیوان بولنوب خارجه چقارلمغه دخی رخصت ویرلمز و بنا برین سفرلرده كرك سوار یجه و كرك نقلیات خصوصنده اصلاً مضایقه چكلمز ایدی ایران سفرلرینك امتداددن ناشی بغداد و ارضروم طرفلرینه على الدوام عسکر و مهمات

سوق اولمقده اولدیغندن منتظم فالدرملر و جاججا کرپان سرایلر و جسم خانلر انشا اولمشدرکه الان ائرلری باقیدر

احوال خارجیہ

حکمران ایران اولان شاه عباس دولت علیه نك اوستریالولر ایله اولان محاربات متمادیه سندن استفادیه سالک اوله رق بوبابده نیچه ایمپراطوریه بالخباره بیک اون ایکی تاریخنده بغته تفض صلح ایدرک مقدمات تحت حکومت سلطنت سنه یه داخل اولان اذربایجان و شروان الکالریخی استرداد ایتدکدن صکره بکر صوباشی عصیاننده بغدادی دخی غصب ایتیشدی بنا برین دولت علیه ایله ایران بیننده مدت مدیده حرب و قتال دوام ایدوب عاقبت سلطان مراد رابع حضر تلرینک بغدادی استرداد موفق اولملرینه مبنی بیک قرق طقوز سنه سنده تجدید صلح اولندی تعیین و تجدید اولنان حدودکه الان مرعی و معتبردر حدود طبعیه حکمنده اولغله بعدازین دولتینک بونی تغیره چالشمسی بیسهوده اضرار عبادی موجب و بلا فائده اتلاف مال ورجالی مؤدی اوله جنی تجارب عدیده ایله ثابت اولدیغندن صلح مزبور تادولت صفویه نك انقراضه قدر تطرق خللدن وقایه اولمشدر . دولت علیه ایله روسیه دولتی بیننده جهرین سفرینه کلنجهیه قدر طوغریدن طوغری به محاربه واقع اولیوب قریم خانلری جاججا محاربه و مصالحه ایده کلشدر ایکن سفر مزبورک ختامنده روسیه دولتی جانبندن استانبوله ایلچی اعزام اولوب اوزی نهرینک صاغ طرفی دولت علیه به وصول جهتی مسقولره عائذ اولق اوزره عقد صلح اولمش و بیک یوز تاریخنه قدر دوام ایشدر .

له دولتی فرصت بولدجه بغدادنه تعرض ایده کلدیکنندن لهستان بالدفعات پامال خیول اسلامیه اولدقدن صکره اوقرانیا ارضیسنی قورتارمق تشبثنده بولمسی دخی بودلیا ایالتک و قمانجه قلعه سنک فتح و تسخیرینی مستلزم اولغله چارناچار عقد صلحه طلبکار اولدیغندن سنوی یکریمی بیک التون ویرکو ویرمک ولبقه تاتارلرینک ممالک اسلامیه به خروجنه ممانعت ایتمک و قزاق طائفه سنک قره دکره چیقملرینه مانع اولق شرطلریله بودلیا و اوقرانیا ایالتلرینک طرف دولت علیه ده قالمسی تصدیق ایلدی و بومعااهده و یانه محاصره سنه قدر مستمر اولدی .

اوستریا و ونڈیک دولتریه واقع اولان محاربه و عقد اولنان مصلحه لر ایله شرائط

مهمه‌ری متن تاریخچه مسطور اولدیغندن تکرارینه لزوم اولیوب یالکز شوراسی بیان اولنورکه دولتین مشارالیهما کوپرلی اوغلی فاضل احمد پاشانک عقد ایتدیکی مصالحه‌ری اولدرجه‌ده تلقی بالقبول ایشلر و اول مرتبه‌ده انفساخ عهدودن متوحش بولنمشلر ایدی که دولت علیه قانیچه و اوقرانیا سفرلرنده برقاچ سنه له و روسیه دولتریله محارب اولدیغنی حالده انلرله اتفاق و استرداد ضایعاته جسارت ایده‌مامشلردر .

فرانسه دولتی سلطنت سنیه ایله سلطان سلیمان عصرندنبرو معاهد و متفق اولوب فقط بعض اوروپا تاریخلرینک بیانیه کوره کویا درسعائده مقیم فرانسه ایلیچیسکی کوپرلی محمد پاشانک صدارتنده معتاد اولان هدیه‌بی اعطاده مسامحه ایش ایدوکندن کوپرلیلر خانداننک انقراضنه قدر نظر اعتباردن اسقاط اولنش اولوب بزم تاریخلرک ویردیکی معلومات ایسه بونک خلافتنه ملابس و حتی بیک سکسان درت تاریخنده کوپرلی اوغلی فاضل احمد پاشا صدارتنده فرانسه دولتیله مجدداً تجارت معاهده‌سی عقد اولندیغنی و بیک یوز درت تاریخنده کوپرلی اوغلی فاضل مصطفی پاشا صدارتنده قدس شریفده واقع قنامه کلیسه اسنجه فرانسه‌لولره بعض مساعدات اعطا قلندیغنی ادله مسلمه‌دندر فقط کرید سفرنده فرانسزلرک عادتاً دوتما واروو سوقیله وندکلورله اعانه ایلری دولت علیه‌نک اغبرارینی موجب اولدیغندن فرانسه ایلیچیسنک دیوان هایونده اسکمله‌سی قالدیرلیشکن مؤخرأ سلطنت سنیه دول اربعه ایله مشغول حرب و ستیز اولدیغنی حالده فرانسه‌لونک بونلره قفادار اولمامسی دولت علیه‌جه موجب ممنونیت اولوب کافی السابق ایلیچی اسکمله سنک وضع قلندیغنی قندقلیلی تاریخنده مسطوردر

انکلتره دولتیله سلطنت سنیه بیننده اصلاً معادات واقع اولیوب باخصوص کرید سفرلرنده سفن نقلیه ایجاریه من جهة اجرای معاونت ایش اولمنه مبنی بیک سکسان الی تاریخنده معاهدات و مساعدات سابقه‌بی مکمل اوله‌رق تجارت عهد نامه‌سی تنظیم و تعاطی قانمشدر .

تم الجد الثانی و یلیه الجلد الثالث



نتائج الوقف

جلد ثالث

طبعة ثانية

استانبول

باب عالی جاده سنده ۲۰ نومرولی « اخوت » مطبعه سنده
طبع اولنمشدر

۱۳۲۷

بِسْمِ اللَّهِ الرَّحْمَنِ الرَّحِيمِ

باب خامس

(باب خامس بيك طقسان طقوز سنه سنده واقع جلوس سلطان سليمان)

(خان ثانی دن بيك يوز سكسان سكز سنه سنده منعقد قینارجه مصالحه سنه)

(قدر اولان حادثاتی متضمندر)

جلد سابقده بیان اولندیغی اوزره سلطان سلیمان خان ثانی حضرتلری جالس سریر عثمانی اولوب لکن طوائف عسکریه نك عتو و طغیانلری کوندن کونه متزاید اولمغله قائم مقام کوپرلی زاده فاضل مصطفی پاشانك سیل طغیانه سد سیاست چکمک تشبثده اولدیغی اشقیا طرفندن تفرس قلندیغندن شیخ الاسلام دباغ زاده محمد افندی یه کیدوب قائم مقام مشارالیهك قتلنه فتوی طلب ایلدیلر مفتی صاحب صلابت (مصطفی پاشا دشمنه قلعه می ویردی یوخسه عسا کر اسلامیه نك هزیمته می سبب اولدیکه اعدام اولنه اصلاح مزاج دولت ایچون قتلی مشروع اولان اشخاص مضره سزلسکیز) دیو متجلدانه جواب و عتابه جرأت ایتمکله صدر اعظمه کیدوب شیخ الاسلام افندی بی عزل ونفی ایتدیردیلر و مصطفی پاشا صدر اعظمك هم افندی زاده سی وهم قانی اولمسنه مبنی وقوع عبولان شفاعتی اوزرینه مشارالیهك بحر مفید بوزازی محافظانغه طردیله اکتفا ایلدیلر بعد ازین بغاة عسکریه نك تغلب و اموال مقاطعاته تسلطلری صدچندان و صدر اعظم زیر بار غلبه لرنده دمبسته و حیران اولدیغندن یکیکچری اغاسی پیشرو طغیان اولنلرك اعدام و تنکیلنه آغاز ایلدکده اولا اغای مشارالیهی قتل و افنا و بعده صدر اعظمك قوناغنی باصوب اموال و اشیاسنی نهب و یغما و کندوسنی الحاق زمره شهدا ایتدنصکره علنا اموال ادناف و تجاره دخی دست تعرضی دراز ایلدکارینه مبنی دکان صاحب لرندن برسیدبریشیل بیراق آچوب و خلق دخی آردینه دوشوب دادخواهانه سرای هایونه عزیمت ایلدیلر بونك اوزرینه ارکان دولت صوابدیدى ایله سنجاغ شریف اخراج و بوستانجی و طوپنجی

نفراتیلہ اعتضاد اولنوب اولکون واول کیجه اله کچن برخیلی اشقیا قنطره سیاستدن امرار و بو قاریشقلق ارسنده قحط رجال سبیلہ نشانچی بولنان مرعشلی اسماعیل پاشا صدر صدارتله کامکار قلندی .

نمچهلولر سنه سابقهده اردوی هایونک مع الاختلال عودت ایلسندن و مرکز سلطنتده وقوعبولان حادثات فحیعهدن مستفید اولوب استونی بلغراد وایوار واکری قلمه لرینی واردلستانی کمند تسخیره بند ایتدکاری حالدہ اغتشاش امور داخلیه دن و صدر اعظم اسماعیل پاشانک لیاقتسزلکنندن ناشی دشمن اوزرینه حرکت اوانه میوب سردارلق امر عظیمی یکن عثمان پاشا کبی برتوریدی یه تفویض اولندی مرقوم قطاع طریق کروهندن اولوب برقاج سنه دنبرو اناطولی محافظه سیله تقید اولنه مدیغندن جمعیتی تکثیر واعصار سابقهده اولان جلالیلر روشنه سلوک ایلمش ایکن اواخر سلطنت محمد خانیده برتقریب ایله جلب وبککر بکیک و مؤخرآ رتبه وزارت ایله تلطیف اولنوب باشنده بولنان برقاج بیك حشرات ایله روم ایلینه کچورلمش ووقعه سابقهده سرچشمه نامیله اردوی هایونده اصحاب حل وعقددن بولنشیدی بویله بر شخصک اداره امور سپهسالاری ایدمه یه جکی مسلم اولسیله ثمره سوء تدبیر وخیانتی اوله رق نمچهلولر بلغراد قلعه سنه مستولی اولدیغندن مشارالیهک عزایله اخذوکر فتنه تشبث قلندی وعلت سببیت ایله اسماعیل پاشا معزول وتکفور طاغلی مصطفی پاشا صدر صدارته موصول اولدی لکن کمال تلاش و حیرتدن ناشی مؤخرآ مرقومک سرعسکرلکی ابقا اولمشکن قریم خانی سلیم کرایک افادات صنادقانه سیله خائن مرقومک وعونه خونه سی اولوب برر ایالت و امارت ایله عباد اللهه تسلیط ایتدیردیکی چند نفر اشخاصک قتل وتدمیرلری ایچون هر طرفه فتاوا ی شریفه ایله اوامر سلطانیه ارسال اولمغین هربری بربرده اله کچیریلوب اعدام وافنا اولندیلر وطقسان طقوز سنه سی دخی بوغوائل ایله مرور ایلدی .

پادشاه انامک بالذات سفره توجهی موجب تقویه قلوب عسکریه اوله جنی بین الارکان تذکر اولمغله بیك یوز سنه سی سلطان سلیمان خان حضرتلری موکب هایون ایله صوفیه یه قدر کوتوریلوب لکن دارالسعاده اغاسنک سوقیله سرعسکر نصب ومعینه عساکر وافیہ ترتیب اولنان عرب رجب پاشا فی الاصل عربان غوغالریله مألوف برذات اولدیغندن بلغرا ده تقرب ایلدکده اکثر طوپلری وپیاده عسکرینی بر محله توقیف ایدوب سکز اون بیك قدر سواری ایله دشمن اردوسنی باصمق قیدینه دوشمکله وبویله طوپ وتفنکدن عاری وترتیب وتعیه دن بری اولان عسکرک جیوش منتظمه یه تقابلرنده حال

نیه منجر اوله جنی بدیهی بولمغله فنا حالده بوزیلوب اردو محلنده دخی پایدار اوله مدیفنه
مبنی ثمره غلبه اوله رق نمچه لولر نیش واولحوالیده بولنان قلاع و پلانقله لره استیلا ایلدیلر
بو کیفیت ارکان دولته موجب خوف و خشیت اولوب دشمنك بودرجه ده تغلب و تسلطی
میدانده ایکن پادشاهك صوفیه ده اقامتی تجویز اولنمغله اردوی هایون ایله صدر اعظم
صوفیه ده توقیف و پادشاه حضرتلری ادرنه یه رجعت ایتدیرلدی .

صدارت کوپرلی زاده فاضل مصطفی پاشا

دولت علیه نك بودرجه لرده پریشانلغه مبتلا اولمسی مدبر امور اولنلرك كفايتسزلكندن
نشأت ایلدیكى ظاهر و اشكار اولدیغندن ارکان دولت با امر هایون ادرنه ده عقد انجمن
ایدوب بودردك چاره سی ساقز محافظی بولنان کوپرلی اوغلی فاضل مصطفی پاشانك
صدارته کتورلمسینه منوط ایدوکنی بامضبطه عرض ایتلریله موجبنجه مشارالیه جلب و مقام
صدارته اصماد اولنوب صدر سابق معیتنده بولسان اردونك سرعسکرلکی دخی قوجه
خلیل پاشایه تفویض قلندی .

مظفریت سلیم کرای خان

سنه سابقه ده قریم خانی سلیم کرای خان کلیولیده مشتانشین اولوب اول بهارده صوفیه
طرفلرینه کلمك تدارکاتنده ایکن پك جسم برمسقواردوسنك قریم اوزرینه هجوم و تقرب
ایلدیکی خبری واصل اولمسیله بالضروره یاننده بولنان عسکر ایله اولجانبه ایلغار و قریم شبه
جزیره سنك قاره یه محل اتصالی اولان واورقوسى تسمیه قلنان موقعه برقاچ مرحله یرده
دشمن عسکرینه تصادف ایدوب درجنك اول اردونك برطرفندن دخول ایله یکریمی درت
قطعه طوب و بر ایکییک اسیر المش ایسه ده مسقولرك کثرت و بالنبه عساكر تاتارك
قلته مبنی فتوحات کلیه ممکن اوله مدیفندن و بعد ازین روسیه لولر اردولرینك اطرافنی
یکرمی اوتوز صره مهمات عربله لریله تحصین ایدرك حرکت ایده کلدکلرندن چار ناچارخان
مشارالیه رجعت ایدوب اوز قلعه سی تحکیم و بردکزدن بردکزه خندق حفریله امر
مدافعه بی تتم ایدرك ظهور الطاف الهیه یه نکران اولدی حالبوکه مسقواردوسی پك
کلیتو اولوب اوزی نهرندن ایرلدقدن صکره بش اون مرحله یرده صوبوله مامغله و طائفة
تاتار اطرافلرندن ایرلیوب ذخائر و مهمات فرقه لرینی نهب و غارت ایله تضییق دشمنه نصب

نفس اهتمام ایلکله او یله جسم براردو مبتلای مضایقه اولوب اور قلعہ سی مقابلہ کیشیکن
بلا محاربه عودته مجبور اولدی و خان مشارالیه برخیلی مسافه ارقه لرندن کیدوب انواع
خسارات ایصال ایلدیکندن تلفات کثیره یه مبتلا اولدیلر.

نمجه لولر نیشه مستولی اولدقدن صکره اضلال ایلدکلری رعایا انضمامیله کسب جمعیت
واسکوب و پرشته و کوستندیل طرفلرینی ضبط و غارت ایدوب حتی رعایادن قار بوز
نامنده برشتی یه تاج یرینه قالباق و قومان اوده قرالغی نامنی اعطا ایتمش اولملریله مرسوم
اورالرده انواع او هام و خیالات ایله اجرای مانعت ایتکده اولدینی حالده خان غازی مسقو
اردوسنک مدافعه سنه موفق اولدینغی متعاقب صوفیه یه کلوب سرعسکر پاشا ایله بالاجتماع
هرقدر موسم شتاقرب ایتمش ایسه ده اول حوالینک احوالی تصحیح اولغی اهم اموردن
اولدینغی قرارلشدرملریله اسکوب و کوستندیل واکری دره طرفلرنده بولسان دشمن
ومعهود قاربوزقهر و تدمیر و چانیق پلنقه سی محاصره اولنوب الفخ اوزره ایکن نمجه لولرک
اون ایکیبیک عسکر و قرق بش طویدن مرکب براردولری واصل اولغله لدی المحاربه
فرقه مذکوره بوجه استیصال تنکیل و بالجمله طوب و مهماتلری اخذ و تسخیر اولنهرق
بعده مذکور پلنقه لر دخی عنوة فتح اولندی و خان ذیشان مشتانشین اولغی
اوزره ادرنه یه دعوت بیورلدی.

صدر اعظم اول قیش ادرنده تنظیم مهمات و الفای مظالم و محدثات ایله مشغول
اولدی چونکه امتداد سفر ملاسه سیله اهالی اوزرینه برقاج نوع ویرکولر طرح اولمش
و جوق عسکر ایله جوق ایش کوریلور مطالعه سنه مبنی عسا کر موظفه یه کلیتو نفرات
ضم و علاوه قانمشیدی مذکور ویرکولری کاملاً الفا ویکیکچری اوجاغیله سائر اوجاقلر
نفراتی تنقیح ایدرک بیسهوده وظیفه خوار اولان ذرتی مقسوله لرینی اخراج ایلدکدن
ودائرة هایبونده و دوائر سیائرة دولته اولان زواندی قطع ایله امور دولتی یولنه قویدقد
نصکره اوتوزبیک قدر عسا کر موظفه منتخبه ایله بیک یوز برسنه سنده واقع حزیرانده
ترفع رایت ظفر و صوفیه اوزرندن نیشه طوغری سفر ایلدی.

فتح بلغراد

صدر صاحب تدبیر ادرنده قبل الحریکه برقاج بیک سپاه و طوینچی وجهه جیدن و بر
قاج ایالتک زعما و ارباب تیمارندن مرکب و تقریباً اون ایکیبیک کشیدن عبارت برقوة
مفرزه یی جزکس احمد پاشا سرعسکرلکی و مشهور توکلی قرال انضمامیله اردلستانه

سوق و مورد سرعسکری قوجه خلیل پاشای دخی اولونیه استردادینه و مورد تسخیرینه تعیین ایش اولدیغندن نمچه لولر اردلستان محافظه سی قیدینه دوشوب اردوی هایونه قدرتیاب مقابله اوله مدقلرینه مبنی اولا شهر کوی بعده نیش وودین وفتح الاسلام وسمندره قلعه لری زور بازوی مجاهدین ایله استرداد اولنوب بو قدر فتوحات ایله اکتفا و حسب الموسم عودت اولنور ظن و تخمین قلمقده ایکن مجرد صدر مشارالیه ک اقدام و غیرتیه بلغراد قلعه سی دخی سکز کون محاصره ایله عنوة فتح اولندی و برقوة مفرزه ارساله اوسک قلعه سی تحت محاصره یه التمشیکن موسم شتاتک حلولی متریسلمده آرامه مانع اولدیغندن ترك اولنوب عودت حلالنده اطه قلعه سی دخی ضبط و تسخیر قلندی اردلستان طرفه سوق اولنان چرکس احمد پاشا افلاق حدودنده واقع اردل طاغلرندن کمال تکلف و زحمت ایله مرور ایدوب مشهور حیدر جنرال معیتده بولنان ویکرمی بیک قدر عسکردن مرکب اولان نمچه اردوسیله محاربه ایدرک مظهر فوز و ظفر و بر چوق ضابطان و نفرات ایله جنرال مرقوم گرفتار قید اسر اولوب لکن پاشای غازی اثنای حربده الدینی یارندن مرتحل دار آخرت اولغله و اهالی اردل امید اولندیغی وجهله توکللی قراله عرض اطاعت ایتما مکه مؤخرآ و تران جنرال معیتله وارد اولان نمچه اردوسی اوزرینه واریله میوب اوچ آیدن متجاوز ممالک اردلده کشت و کذار اولندقدن صکره یه افلاق ایچندن عودت قلندی و بو عودته سپاه طائفه سنک اصراری اقوای اسباب اولدیغندن علوفه لری قطع و کندولری سلک عسکریدن طرد اولندی

مورد سرعسکری خلیل پاشا اولونیه یی استرداد موفق اولدقدن صکره اولحوالیده بولنان و ندکلورلر اوزرینه هجوم ایلدیکندن و ندکلورلر اضطراره مبتلا اوله رق مقدمجه کریده ارسال و حایه قلعه سی محاصره ایتدیردکلری اردولرینی موردیه جلبه مجبور اولملریله بو ایکی سرعسکرک مظفریتلری هم اردوی هایونک سربسته جه حرکتیه و همده کرید جزیره سنک تجاوز دشمندن خلاصه سبب اولدی

سنه سابقه ده نمچه لولرک نیش و اولحوالی یه استیلالرنده اهالی اسلامیه متفرق و پریشان اولدیغندن رعایانک اشقیاسی اعلان عصیان ایدوب اهل عرض گروهی حرکات عسکریه دن ناشی صعب المرور طاغلر باشنه صعود ایلدکلرندن بلغراد ایله صوفیه اردسنده شاکدن اثر قالماشیدی مؤخرآ صدر غازی نک استیماناً فتحه موفق اولدیغی قلعه لرده بولنان عصاة رعایایی نمچه لولر کندو اللریله دولت علیه نک سیف تأدینه تسام ایده کلدکلرندن رعایا طائفه سی نیه اوغرادقلرینی اکلا دقلرینه و صدر اعظم حضررتلری

اسیراً تاتار و طوائف عسکریه اللرنده بولنان رعایا چو جقلرینی تخلیص و ولیرینه تسلیم
ایتدرد کدن بشقه رعایایه تخملق و حیوانات اعطاسیله لازم کلان اعانه بی اجرا و اسباب
محافظه لرینه اعتنا ایتدیکنه بناءً وطن لرینه عودت و زراعت و صنعت لریه اشتغال ایلر یله
و روم ایلدن قطع امید ایدرک اناطولی و سائر محالره کیدن اهالی اسلامیه دخی
نمجه لولرک طونه دن قارشویه طرد اولملرندن طولای یکیدن حیاته نائل و عودته مائل
اولملریله اولحوالی ازسرنو معموریت یوز طوتدی

مقیم کنج انزوا اولان سلطان محمد رابع حضرت لرینک طرفدارلرندن امام اسبق
قاضی عسکر ابراهیم افندی و علما و رجالدن بعض کسان قاضی قریه سنده عقد جمعیت
خفیه ایدوب پادشاه زمان سلطان سلیمان خان حضرت لری قرق سنه دن متجاوز طائفه نسا
و حرم اغالرندن غیری کیمسه بی کور مامکله انلرک اخلاقیله تخلق ایتمش اولدیغندن دوت
سنه در دولت پادشاهسز کبی قالدی بناءً علیه تکرار سلطان محمدی جلوس ایتدیره لم دیو
مذاکره ایلدکارینه صدر اعظم کسب اطلاع ایله جمله سنی نفی ایلشیدی

لکن سلطان سلیمان علت استسقا ایله مشرف موت و صدر مشارایه دخی منتهی
حرکت ایدو کندن وفات وقوعنده شاید استانبولده بر حادثه ظهوری وارد خاطر
اولمس یله پادشاهک ادرنه یه کوتورلمسی و ارتحانده کوچک برادری سلطان احمد ثانینک
اجلاس قلمسی بین الوکلا قرارلشدیر یلوب پادشاه حضرت لری تخت روان اوله رق و سلطان محمد
ایله شهزادگان ایکوز قدر بوستانچینک تحت محافظه لرنده و عربله رایچنده بولنه رق اردوی
هایون ایله ادرنه یه عزیمت قلندی

سلطنت سلطان احمد خان ثانی

صدر اعظم بیگ یوز ایکی سنه سی رمضانده ادرنه دن فک رابطه آرام و فله
محراسنه نصب سرادقات اسلام ایلد کده سلطان سلیمانک واصل ریاض جنت و سلطان
احمد خان ثانی حضرت لرینک جالس سریر سلطنت اولدینی خبریله مهر جدید سلطانی
وابقای صدارتی متضمن خط هایون واصل اولدی شهریار مرحوم قرق سکنز یاشنده
نائل سلطنت و اوچ سنه سکنز آی لابس فروه خلافت اولوب اللی بر یاشنده وفات
ایتمش و سلطان سلیمان خان قانونی تر به سنه دفن اولمشدر غایت حلیم و سلیم بر پادشاه
تقوی شعار اونغله فتق و رتق امور ارکان سلطنتک ید اداره لرنده ایدی
اردوی هایون بلغراده واصل اولدقده نمجه لولر دخی و رادیندن زمونه طوغری

کلیکده اولملریله نهر صاوه اوزرینه انشا اولنان جسردن زمون یقه سنه مرور اولنوب
موکب اسلامک اطرافه استحکام انشاسیله اقامت وقریم خانک ورودینه انتظار قلمقدمه
ایکن دشمن اردوسی کونده برر ایکیشر ساعت مسافه رجعتیه باشلادیغندن صدر اعظم
دخی تعقیبه مباشرت ایلدی و رادیندن بلغراده قدر طونه نهری سفن اسلامییه نک تحت
محافظة سنده اولمق حسیله نمچه لولر ساحلدن کیده میوب و رادینک اوج درت ساعت
بروسنده و اسلانقمن جوارنده بولنان بوغازدن کچمکه محتاج اولدقلرندن صدر مشارالیه
طونه نهری کناریه عزیزمت و دشمنی سبقت ایدرک مذکور بوغازه قونوب پیشگاهنه
متریس و خندق انشاسیله تحکیم ایلدی

شهادت صدر اعظم فاضل احمد پاشا و انهزام اردوی هایون

لکن میدان محاربه لرنده دشمنک خط رجعتی کسلمک لاجرم اولوم اری اولوب
فوق العاده چالشمارینی مستلزم اولمغله نمچه لولر بو حالی مشاهده ایله چار ناچار طلبکار
حرب و قتال اولدیلر بناء علیه بیک یوز ایکی سنه سی ذی القعدة سنک یکریمی بشنجه
کونی دشمن متریسلر اوزرینه هجوم ایلدکده کلی تلفاتیه کرفتار اوله رق رجعتیه مجبور
اولدی ایسه ده نمچه قوماندانی پرنس پولی اردوی هایونک ارقه طرفنده متریس
اولدیغنی خبر آلمش ایدوکنندن بالجمله سوارسیله صاغ قول اوزرینه شدتلو بر هجوم
دها ایتمکه اناطولی والیسی معیتنده اولان و صاغ قول محافظه سنده بولنان ترکان
سوارسی دشمنک آتشدن اورکوب پریشان اولدقلری صدر مشارالیهک منظوری
اولدقده کندو یاننده بولنان سپاه و سلحدار الایلریله مدافعه یه شتاب ایدرک نمچه لولرک
اوست باشنه چیقمغه آذیر قالمش و آثار غلبه کرکی کبی ظاهر اولمشیکن صدر مشارالیه
قورشون ایله اوریلوب شهید اولمغله و کتخداسی دخی کتیه قادر اولمغله بو کیفیت
عساکر اسلامییه نک روگردانلقلرینه بادی اولدیغندن نمچه لولر پیاده متریسلرینک ارقه
طرفه کچمکه فرصتیاب اولدیلر بونک اوزرینه وزرا و امرا آت اوزرنده مشورت وبعد
ازین جنود اسلامییه نک سمت سلامتیه چیقارلمسنی تنسیب ایلدکلرینه مبنی پیادکانی سواری
ایله محافظه ایدرک بلغراده رجعت و کافه طوب و مهماتی برلرنده ترک ایلدیلر اگرچه
هزیمت طرف اسلامده واقع اولدی ایسه ده نمچه لولر دخی پک زیاده تلفاتیه کرفتار
اولدقلرندن و باخصوص محاربه کونی سفن اسلامییه نمچه کیلری اوزرینه هجوم ایدوب
یدی سکز یوز اسیر و خیلی مهمات و سفینه تسخیر ایلدکلرندن جنود اسلامییه پی تعقیبه

و حتی محل حربده اقامته بيله قدرتياب اوله ميوب سير سريع ايله ورادينه عودت واورادن
طونه يي كچوب ارداستانه عزيمت ايلديلر

صدر شهيد مائل ركوع اولان بنيان دولتي اقامه يه موفق اولوب برقاچ سنه دها
مهمساز مصالح حرب و سفر و تنسيق فرماي مهم و عسكر اولسه تلافی مافات
و اكال ضايعاته مظهر اولسي مأمول قوی اولديني حلاله مشيت الهيه عكسسه متعلق
اولديغدن بو قضای نا كه ظهور ايله واصل رياض جنت و شیرين مذاق شهد شهادت
اولدی

ركاب قائممقامی بولان قاضی علی پاشا مستعجلاً اردوی هایونه كتمك شرطيله
صدر اعظم نصب اولمشيكن (وقت سفر گذران اولدی و اكال مهمات و قته محتاجدر)
ديهرك حلب والیسی قوجه خليل پاشاي سرعسكر نصب ايتديروب كندوسی اجرای
اغراض و نفسانیه و جمع ماله قويلاغه بيك اوچ سنه سی اواسطنده معزول و مقتول
ودياربكر والیسی مرزيفونی حاجی علی پاشا مقام صدارته موصول اولوب بش اون کون
مرورنده موکب هایون ايله باغراده عزيمت ايلدی دشمن هیچ بر طرفدن باش کوستر -
مديكنه و باغراد قلعه سی دخی محتاج تعمیر و تحکیم اولديغنه بناء بوسنه انكله اشتغال
اولنه رق بيوك بر محاربه واقع اولقمسزين عودت اولندقدن صكره صدر مشار اليه
عزلی اراده بيوريلان دفتر دار احمد افنديك ابقاسی خصوصنده پادشاه حضر تليله
مجادله و بالاخره استغفا ايلديكندن ركاب قائممقامی بولان بوزقلی مصطفى پاشا صدر
صدارته اعتلا ايلدی

صدر شهيد زماننده قریم خانی سايم كراي خان حجه كتمك اوزره استغفا و يرينه
سعادت كراي خانك نصبنی سوق والقا ايتمكله مشاراليه حكومت قریم ايله تجيل اولمشیدی
ورادين محاربه سنه يتشمامك تهمتيله معزول و صفا كراي خان تخت قریمه موصول اولدی
ايسه ده مطلوب دوات وجهله حركته موفق اوله مديغندن كرك باران دیده الحاج سليم
كراي خان بيك درت سنه سی صفرنده سلوری قربنده واقع چقتلكندن ادرنه يه جلب
بيوريلوب اوچنجی دفعه لابس فروه خانی اولدی

خان مشاراليهك تصويب و تنسيبي اوزرينه بوسنه اردوی هایونك اردلستان طرفنه
عزيمتی قرارلشد يرلغله صدر اعظم بوزقلی مصطفى پاشا بيك درت سنه سی ذی القعدة سنده
موکب اسلامی مستصحباً روسجفه عزيمت ايتمشيكن نمچه لولرك كمال شدتله باغرا دی
محاصره ايلدكاری خبری وارد اولديغندن بالضروره اردل سفرندن فراغت و باغرا ده

طوغری حرکت اولنوب ایکی اوج مرحله مسافه قالدقده دشمنك ترك محاصره ایله قارشو طرفه مرور ایلدیکی استخبار اولندی و بوسنه دخی بلغرادك تحکیم وترصینی ایله امرار وقت اولنهرق عودت قلندی

بیك بش سنه سی رمضانده صدر اعظم مصطفی پاشا صید وشکار ایله مشغول اولمق تهمتنه بناءً مسند صدارتدن فتاده و دفتردارلقدن طرابلس شام والیسی اولان سرمه لی علی پاشا اولمقام عالییه پانهاده اولوب اواخر سنه مزبورده عازم سفر اولدی نمنجه اردوسی ورادینده تحصن ایتمکله یکریمی ایکی کون محاصره ومقاتله اولنوب کثرت امطار مانع فتح و تسخیر اولمش ایسه ده معسکر دشمنی تحت محاصره یه المق دخی برنوع غلبه وظفر عد ایدیلرک عودت و بیك التی سنه سی ربیع الاخرنده ادرنه یه مواصلت قلندی

سلطنت سلطان مصطفی خان ثانی

وندیک دونماسی ساقز جزیره سنه هجوم ایدوب اسباب محافظه سی ناقص اولمق حبسیله بالضروره استیفاءً تسایم قلعه قلندیخی خبری پادشاهه وارکان دولته پک زیاده سؤ تأثیر ایتمکله نزع و تخلیصی ضمننده اناطولیدن کایتلو عسکر ترتیب و دونمای هایونک مکمللاً چیقارلمسینه اقدام و غیرت اولنوب اخبار ساره ظهورینه انتظار اولنمقده ایکن بیك التی سنه سی جمادی الاخره سنك یکریمی اوچنجی کونی سلطان احمد خان ثانی عازم ملک جاودانی و سلطان محمد رابع مرحومک بیوک شهزاده لری سلطان مصطفی خان ثانی جالس اورنک جهانبانی اولدی

شهریار مغفور الی یاشنده چالس تحت دولت وعینله برادرلری سلطان سلیمان ثانی کبی اوج سنه سکز آی یکریمی بش کون مربع نشین دیهم سلطنت اولمش و سلطان سلیمان خان قانونی تربیه سنه دفن اولنمشدر حدید المشرب و متهور المزاج بر پادشاه ایدی

ساقز استخلاصنه سرعسکر نصب اولنان مصرلی زاده ابراهیم پاشا و قپودان دریا عموجه زاده حسین پاشا دونمای هایون ایله اق دکره عزیمت و وندیک دونماسیله ایکی دفعه مطارحه قرعه حرب و قتاله مباشرت ایدرک دشمن دونماسنک نصفدن زیاده سنی اغراق و احراق ایله نائل فوز وظفر و وندکولر عازم سمت مفر اولملریله ساقزه واریلوب دزخال لیانده وقلعه ده بولنان بیك قدر وندکلوی امیر و چند قطعه سفینه ایله اوتوزدن متجاوز طونج طوپ و کایتلو تفنک وجهه خانه ومهمات سائرهی ضبط و تسخیر ایتدکلری

خبر مسرت اثری جلوس هایوندن اون اون بش کون صکره جه واصل اولمغله شهریار جدیدک مطلع سلطنتنده بومظفریتک وقوعی وساقز جزیره سنک تخلیصی فال خیر عداولندی

سفر اول پادشاه نوجاه

پادشاه نوجاه بالذات علم افراز غزا اولمق عزمنده اولدینی حالد صدر اعظم علی پاشا تأخیر ایتدیرمک ضمننده بعض حرکات مذبحخانه به جرأت ایلک تهمتیه معزول ومقتول ورکاب هایون قائممقامی بولنان الماس محمد پاشا صدر وزارتیه موصول اولسنی متعاقب علم سلطانی تبخترو اهتزازیه اغازایدوب بلغزاده لدی الوصول نمچه لولرک اردلستانده اجتماع ایله طمشواری محاصره نیتنده بولندقلری استماع اولمغله بیکی یدی سنه سی محرمنده طونه اوزرینه تمید اولنان جسردن پانجوه طرفه مرور واولحوالیده واقع پلقه لر ضبط وتسخیر اولندقدن صکره طمشوار محراسنه نصب سرادقات عظمت بیورلدی دشمنک بیوک اردوسی اردلستانده واون ایکی بیکی سواری وبرقاج بیکی پیاده ایله وتران نام جنرال شیش جوارنده اولدینی استخبار اولندیغندن اولاطمشواره قریب لیوه قلعه سنک فتحه عزیمت وعوده قبضه دولت قانوب طمشواری محاصره نیتیه قلعه مرقومه ده ادخار اولنان اوتوز طقوز قطعه طوپ وکلیتلو مهمات و ذخائر اغتنام اولندی بعده وتران جنرال اوزرینه حرکت اولنه رق جنرال مرقومک بولندیغنی موقعک ایکی طرفی بطاقلق وارقه جانبی طاغ اولدیغندن بالذات پادشاه حضرتلری پیشگاه دشمندن وقریم خانی سلیم کرای خان جبل طرفدن هجوم ودشمنی احاطه ایلرلیه جنرال مشارالیه ایله فرقه مزبوره کاملاً قهر وتدمیر وباجمله طوپ ومهماتلری تسخیر قلندی وشیش ولفوش قلعه لری دخی درحال ضبط وتخریب اولندی موسم شتا قریب اولمق حسیله فتوحات مذکوره ایله اکتفا ونیکبولی اوزرندن عودت اولنوب پادشاه غازی کمال فر وشوکت ایله ادرنه به مواصلت واورادن دخی استانبوله عزیمت بیوردیلر

سفر ثانی پادشاه مشارالیه

اولهار حلولنده ساقس پرانی قومانده سننده بولنان نمچه اردوسنک طمشواری محاصره ایلدیکی خبر الندیغندن سلطان مصطفی خان حضرتلری ینه بالذات نهضت و بیکی سکز سنه سی محرمنده بلغزاددن پانجوه جانبیه مرور ایدوب دشمنک کذرکاهی اولان

محللرده انشا ایلدکلی پلانقه ونهر طونه ده بولنان درت قطعه کیر قالینلرینی احراق و تخریب ایله طمشواره تقریرلرندہ نیچه اردوسی محاصره یی ترک ایدرک برطار بوغازده استحکام انشاسیله موکب اسلامی کچورمامکه اقدام ایلش ایسه ده قدرتیاب اوله مدیندن و ایرتسی کون وقوعبولان هجومنده دخی اون بشیک قدر تلفات ویردیکندن بالضروره رجعتہ مجبور اولمغه خلیجه تعقیب و ایصال مضرت اولندقدن صکره طمشواره عودت و خراب اولان محللرینک تعمیرینه مباشرت اولندی و قلعه مرقومه تعمیر و تحکیم و عسکر و مهماتی تنیم اولنهرق بلغراده و اورادن دخی مشتای ادرنه یه عودت بیورلدی

سنه سابقه ده روسیه لولر ازاق قلعه سنی محاصره ایتدکلی حالده فرصتیاب تسخیر اوله مامشلا ایکن بوسنه کال شدتله تکرار محاصره ایلدکلیینه و سلطنت سنیه نک اق دکر و موره و مجارستان و لهستانده اولان مشاغل حربیه سی جهتیله ازاق قلعه سنک اکال اسباب محافظه سنه لایقوله باقیله مدینه مبنی قلعه مزبورہ موسقولونک گرفتار کمند تسخیری اولدی لهلولر برقاج دفعه قانیجه قلعه سنی محاصره ایتمشلا ایسه ده خیت و خسران ایله مجبور رجعت اولدقلری مثللو بوسنه اولکون قلعه سنی محاصره ایدن وندکلور دخی انہزام فاحش ایله منہزم اولدیلر

سفر ثالث هایون و وقعه زانه و شہادت صدر اعظم

اوجنجی دفعه اوله رق سلطان مصطفی خان حضرتلری ترفیع لوای جهاد ایدوب بلغراده لدی الوصول جهت حرکت قرارلشدیرلق اوزره حضور هایونده مجلس مشورت عقد اولمغله ارکان دولت کافی السابق طمشوار طرفنه عزیمتی تنسیب ایتدکلرندہ بلغراد محافظی عموجه زاده حسین پاشا بورایک خلافتده بولنوب (نیچه لولرک عادتی دائما فرصت کوزہ درک یابرصو کچیلور و یاخود قونوب قالقیلور ایکن هجوم ایله تفرقه ویرمک مرکزنده اولدینی بالادفاعات مشاہدہ اولنه کلدیکنہ و پانچوہ دن طمشواره قدر برقاج جسم نهر کچلمک اقتضا ایدہ جکنہ بناء بویله آغر عسکر ایله اولجهتہ حرکتک مخاطره سی درکاردر پادشاهمز بلغراده اقامتله اطرافہ قوہ مفرزہ لر کوندروب ممالک دشمنی تاراج واردولرینی ازعاج ایله اکتفا بیورمدقلری حالده صاوہ نهرندن زمون یقاسنہ کچیلوب و رادین اوزرینه حرکت اولنورایسه دونمای هایون کیلری دخی موکب اسلامک یانندن نقل مهمات ایدر و هروجهله موجب سهولت اولور ان شاء الله تعالی و رادین تسخیر قانندقدن صکره اقتضاسی وجهله حرکت اولنور) دیمش

ایسهده بالجمله وزرا و امرا رأی اولده اصرار ایلدکارندن بیک طقوز سنه سی محرمنده طونه اوزرینه تمدید اولنان جسردن پانجوه طرفه مرور اولندی نمچه اردوسی و رادینک قارشو حدالرنده و طونه به اوزاق صوسز بر فنا محله بولندیغندن اوزرینه هجوم اولنسه فوز و ظفر الطاف الهیهدن مأمول و مسئول ایکن وزرا و امرا صدر اعظمدن ناحشود اولوب موفقیتنی استمدک لرینه مبنی بوفرصتک قاجیرلما سنه بروجهله ارضا اولنه مدقلرندن چارناچار طمشوار طرفه عزیمت و معبر عسکر اسلامده واقع اولوب یدی سکز بیک قدر منتخب دشمن عسکر یله محافظه قلمقده بولنان تتل قلعه سنک تسخیرینه مباشرت قلنهرق درحال جنود دشمن قهر و تدمیر و قلعه مرقومه تخریب قلندی نمچه بیسوک اردوسی گرفتار اولدینی تهلکه دن قورتلقدن صکره آغر آغر معسکر هایونک ارقه سندن کلکه باشلامشیدی شهر صفرك یکر می اوچنجی کونی زانه نام محله نیسه نهری اوزرینه قوریلان کوپریدن دایره هایون پادشاه انام طمشوار یقه سنه مرور ایدوب صدر اعظم و سائر وزرا و امرا قصور عسکر و مهمات و طویلری امرار ایتک مشغولیتنده ایکن بقضاء الله تعالی کوپری منهدم اولغله صدر مشارالیه ایله اناطولی والیسی مصرلی زاده ابراهیم پاشا و طمشوار محافظی جعفر پاشا و فضلی پاشا و یکچیری اغاسی بالطه زاده محمود پاشا و اون قدر بکلی بکی و یوزدن متجاوز یکچیری و سپاه و ساحدار ضابطانی و تیمارلو الای بکلی و بروجه تخمین عسکر اسلامک ثمنی مقداری جیوش موحدین صویک قارشو طرفنده قالدیلر نمچه لولر بو حالی مشاهده ایله هجوم ایدوب انهدام جسر ملا بسه سیله نه معسکر هایون جانبندن قارشوده قلان غزاته اغانه قابل ونهده انلرک طمشوار یقه سنه عبورلری ممکن اولدیغندن دو گوشه دو گوشه جمله سی سرمست سلاف صاف شهادت اولدیلر بوقضای نا که ظهورک و قوعنده تسلیم قاعده فن حرب اقتضاسندن ایکن کاملاً شهید اولنجه یه قدر چالشمیری اسلافک حمیت و غیرتی ارانه ایدن بر میزان صحیح الاعتباردر پادشاه حضرتلری طمشواره واصل اولدقلرنده عموجه زاده حسین پاشایی بلغراددن جلب ایله صدر صدارته اصعاد ایدوب نمچه لولر دخی فنا حلاله زده لشدکاری جهتله اردلستانه رجعت ایلدکارندن طمشوار قلعه سنک اکمال لوازمات یله موکب هایون بلغرا ده واورادن ادرنه یه عودت ایلدی .

نمچه لولر ابتدای سفردن کوپریلی زاده فاضل پاشا صدارته کلنجه سکز سنه علی التماقب نائل مظفریت اولملریله طمشواردن ماعدا بالجمله مجارستان قلعه لرینی و بعده بلغراد و نیشی ضبط و تسخیر ایتشلر ایکن صدر مشارالیه طونه نک بو طرفنده بولسان

قلعه‌لری استرداد و دشمنی قارشو جانبہ طرد و ابعاد ایدوب بوندن صکره و قوعبولان محارباتده ایسه غلبه و ظفر طرفینده متداول اولدیغندن و نمچه‌لولر جابجا فرانسه لولر ایله غوغایه مجبور اوله کلدکلرندن بعدازین ایلرولیه میوب بلکیده عکس قضیه ظهوری ملحوظ اولغله انعقاد صلحه طلبکار ایدیلر و ندکلورلر موره جزیره‌سنه مستولی اولمشلر ایسه‌ده بحرسفیدده بالدفعات دوئلاری مغلوب و منکسر اولوب بوسنه طرفلرنده و موره جهتده واقع اولان محاربات متوالیه‌ده دخی کلیتلو تلفاته کرفتار اولدقلرندن مسوره‌نک تملکیده اکتفا ایلمکه مجبور ایدلدیلر لهلولر اون بش سنه تمتد اولان اشبو محاربه‌ده برقاچ کره قانیجه قلعه‌سنی محاصره ایلمشلر ایکن خیبت و خسراندن غیری برشیته دسترس اوله میوب طوائف تاتار ایسه علی‌الدوام مملکستلرینی نهب و غارات ایده کلدیکسندن متفقلرینک سایه‌سندده صلحاً قانیجه‌نک استرداد ایمنندن بشقه صورتله متسللی دکلر ایدی مسقولولر ازاق قلعه‌سنی ضبط ایله مقصدلرینک مبدائنه واصل اولوب هنوز مقام حکمداری یه نائل اولان دلی پترو اول امرده دولت و عسکرینی تنظیم و بعده منوی ضمیرینی اجرایه قیام ایلمک مطالعه‌سندده بولنمسیله اودخی صلح و صلاحه میل ایلدی دولت علیه‌نک دوام محاربه‌دن عجزی اولیوب هر سنه تجهیز طوائف عسکریه و ترتیب لوازمات سفریه ایتمکده ایدیه‌ده تکالیف شاقه ایله ممالک محروسه اهالیسی مبتلای ضجرت و مضایقه و عمران ممالک کوندن کونه متحول خرابی اولغله و بویله درت دولت ایله محاربه ایتدکجه استرداد ضایعات ممکن اوله میه‌جفی میدانده بولنمغله هم اشبو اتفاق مربع قرین انحلال اولمق و همدہ بر مقدار نفس آلوب اداره ملکیه و عسکریه‌سنه نظام و یرمک ایچون سلطنت سنیه‌نک دخی صلحه احتیاجی اولدیغندن ضایعاتی کوزدن چیقارمش و عقد مصالحه‌یی متمنی بولنمشیدی بناءً علیه بوکره انکلتزه و فلمنک دولتلری طرفندن عرض اولسان توسط دول محاربین جانبندن قبول اولنهرق قارلویچه نام محله اجتماع اولنمق اوزره هر طرفدن مرخصلر تعیین اولنمغله جانب دولت علیه‌دن دخی رئیس الکتاب رامی افندی و دیوان هایون ترجانی اسکرلت زاده پناپوت بک مرخص انتخاب و ارسال قلندی .

سفرک اوچنچی سنه‌سندده سرعسکر اولان ملک ابراهیم پاشا قنیزه قلعه‌سنی بدل صلح اوله رق و یرمک اوزره نمچه‌لولره تکلیف معاهده ایتمشیکن بر نتیجه حاصل اوله مامسی و دولته طانشمقسزین خود بخود بویله بر امر عظیمه جرأت و بر قلعه و یرمکه نیت ایلمسی اسباب قتلندن بریسی اولمشیدی کیتدکجه امور حربیه مشکلاته صارمق حسیله سفرک التبحی سنه‌سندده واقع جلوس سلیمان خان ثانیده دوست اولان دولتلرده جاری اولان

قاعدیه قیاساً رجال دولتن ذوالفقار افندی ظاهراً اخبار جلوس ایچون بروجہ سفارت
نمچہ دولتی نزدینہ ارسال قیلنوب سلطنت سنیہ بووجهله اختیار تنزل ایلمش اولدینی
حالدہ نمچهلورک اوان غلبه مطلقه لری اولدیغندن اوچ سنہ قدر سفیر مومی الیہی گاہ
حبس ایدرک وکاه درلو تحقیرات ایلہ ازعاج ایلیرک الیقویوب بعدہ خارج ازامکان تکالیف
بارده ایلہ اعاده ایلدیلر بوندن صکرہ وقت وقت انکلتره وفلمنک دولتری توسطیلہ رطب
ویابس تکلیفلر وقریم خانی واسطه سیلہ لهلور جانبندن طلب صلحی متضمن استدعالر
واقع اولہ کلش ایسده اکثریسی اغفال مقصدینہ مبتنی اولدیغندن حواله روی التفات
اولنیموب دارالملک مجارستان اولان بودین استرداد اولندقچہ صلح اولنیمہ جنی بیان قلنمقدہ
ایکن بالادہ مسطور اسبابک اجتماعیلہ دول محاربینک جملہ سی بووجهله میل صلح ایلدیلر

عقد صلح وصلاح بادل محاربین

صدر اعظم حسین پاشا اردوی هایون ایلہ ادرنہ دن حرکت وصوفیہ دن مرخصلری
موعد اجتماع اولان قارلویچیه اعزام ایلدکن صکرہ بلغرادہ عزیمت ایدوب هرقدر
امر مصالحہ دردست مذاکرہ ایسده متارکہ عقد اولندیغندن صاوه نہری اوزرندن
زمون طرفہ وطونہ نہرندن یاچوہ یقاسنہ جسرلر تمدید ایتدیروب احوال مکالمہ انتظار
وشاید فسخ مذاکرات اولنور ایسہ متہی هجوم بولندیغنی یار واغیارہ ابراز واشعار
ایلدی مرخصلر بینندہ دور ودراز مذاکرات جریانیلہ بالاخرہ ید استیلارندہ بولنان
اردلستان و مجارستان نمچهلورده وطمشوار ایالتی دولت علیہدہ قالمق شرطیلہ اوستریالور ایلہ
وقایحہ قلعه سی تخلیه وتسليم اولنق اوزرہ حدود قدیمہ موجبنجہ لهلور ایلہ ووندکلورک
ید استیلانده بولنان اینہ بختی سلطنت سنیہ ید قلنمق ومورہ جزیرہ سی وندکلویہ
عائد اولق اساسیلہ انلر ایلہ بیک یوز اون سنہ سی رجبک یکر می التجی کونی صلحنامہ لر
تنظیم ومواد متفرعہ دخی تتمیم وترقیم اولنہرق اون التی سنہ دنبرو رخنہ افکن بنای
سبحانی اولان حرب وقتال مندفع اولدی حسبالموسم مقدمہ اردوی هایون عودت
ایتمش اولدیغندن رئیس مشارالیه عهدنامہ لری مستصحباً ادرنہدہ رکاب هایونہ مواصلت
ایلدی روسیہ مرخصندہ رخصت کاملہ بولنامسنہ مبنی اوچ سنہ عقد متارکہ اولنوب بعدہ
رکاب هایونہ وارد اولان بیوک ایلچیسی معرفتی وازاق قلعه سی مسقولودہ قالمق شرطیلہ
بیک اون اوچ تاریخندہ انلر ایلہ دخی عقد مصالحہ قلنمشدر .

بومحاربہ ساطنت سنیہ نک رجعت نجم کشور کشایسنہ مبدأ اولوب واقعا درت

دولتله اون التی سنه علی الدوام جنک ایلک قولای شی دکل ایسه ده ابتدای سفرده صدر اعظم قره مصطفی پاشاک و اوچنجی سنه سنده سرعسکر ملک ابراهیم پاشاک تهمت انهزام ایله قتل اولملری اخلافلرینک تلاش وعدم جرأتلرینی مستلزم اولدیغندن بوکیفیت اقوای اسباب مغلوبیت اولدینی بی اشتباهدر هر قوماندان فوز و ظفر اولور ایسه انواع منافع والتفات مظهر وعکسی تقدیرنده مقهور و مدمر اوله جفی رتبه بدهسته ایکن شق ثانی بی اختیار ایدر ادم بولنق ممکنیدر اسباب مجبره ناکه مظهرودن ماعدا هزیمت یا نقصان لوازمندن و یا خود مدبر عسکر اولان ذاتک عدم کفایتندن نشأت ایده کلمشدر حالبوکه مصطفی پاشا قتل اولنسه تلافی مافاته قادر اوله جفنده اول عصرک ارباب بصیرتی متفق ایدی مشارالیهامدن ماعدا محاربات واقعه ده واستیلارده دین و دولتلی اغورنده فدای جان ایدن وزرا و امرا یک چوق اولوب یالکیز اوتوزدن متجاوز وزیر دلسیر نعمت شهادت اولمشدر بوسفرک ظهورینه باعث و بادی وقورص قرالی نامیله مشتهر اولان اورته بحار قرالی توکلی امره نک خلی خدماتی سبقت ایش ایسه ده حکم قدر مانع تقیضی اولدی ومذاکرات صلحیه ده نمچه مرخصلی مشارالیهک مقیداً کندولرینه تسلیمی خصوصنده فوق العاده اصرار ایش اولدقلى حلاله سلطنت سنیه عودت حربی اختیار ایدوب بومهمان کشلکی بروجله قبول ایدمیه چکنی قطعاً افاده وتذکار ایتمکه بالضروره نمچه لولر بودعوان فراغت ایلدیلر ومشارالیه اذمید جوارنده جسم چفتلک ومعینات وافیہ احسان اولنهرق بالجمله توابعاتیله اوراده اسکان قلندی .

حسب المصالحه وارد اوله جق بیوک ایلچلرک استانبوله قبول اولنسی مناسب اولدیغندن پادشاه حضر تلری ادرنه دن تحریک رکاب نهضت واستانبوله عودت بیوروب سفر تقریبیه ممالک محروسه اهالیسنه طرح اولنان ویرکولرک رفع والفا وبقایاسی بولنان اوچبیک بوقدر کیسه نک عفوا و محالولندیغنی متضمن فرمانلر نشر و اهالی اوزرینه بار اولاملری ایچون اناطولی وروم ایلی و قونیہ و سیواس والیرینه سنوی یکر میشر یوک اچهلک خاصلر تخصیص قلندی واولوقتک ایلچیلری یک غلبه لکلو کلدکلرندن بودقمه وارد اولان نمچه ایلچیسنه یومیه قرق طاق و اوچ هندی واون قاز و اوتوز کوکرجین و یوز الی اوقه اون واون اوقه میوه و اوتوز اوقه سبزه و اوچ رأس اوکوز و بر بوزاغی واون قیون واللی کیله اربه واون قنطار صمان و اوچ عربیه اولتق و اوتوز چکی اودون و یوز اون اوقه کور و براوقه بهار و یوز الی غروش یومیه خرجلق تخصیص اولندی .

سلطان مصطفی خان حضر تلرینک شهزاده لکلری اوانده خواجه لری اولان مشهور

وانی افندی دامادی فیض الله افندی جلوس سایان خان ثانیده رؤسای عسکریه التماسیه شیخ الاسلام اولوب ازمدتده عزل وودان اصلیمی اولان ارضرومه نفی قلنمش والی سنه دن متجاوز پیغوله نشین عزلت اولمشیدی جلوس هایون وقوعی متعاقب شهریار وفاشعار حضر تلی کتوروب مقام فتوایه اصعاد وفوق العاده حرمت ورعایت بیورملریله برابر مستشار سلطنت ومؤمن دولت اتخاذ ایدرک مصالح مهمه ده رأینه مراجعت ایدرلر و صدر اعظم لره شیخ الاسلام افندینک رضاسندن خارج ایشده بولنماق اوزره تنیه بیورلر ایدی مفتی مشارایه افاضل دهردن ایدیسه ده اولاد وانسابنه مفتون و شان واقباله حریص اولدیغندن ازمدتده درت نفر اولادینی قاضی عسکرلک پایه لریله بهره مند ایتدیکنه قناعت ایتیموب بیوک اوغلانی کندوسندن صکره شیخ الاسلام اولمق اوزره پایه فتوی ایله دخی سربلند ایتدیردی صدر اعظم عموجه زاده حسین پاشا مشارالیهک بودرجه تغلب وتسلطنه طاقت کتوره مدیکنه وبرعلت مذمنه یه دخی مبتلا اولدیغنه مبنی صدارتدن استعفا ایتمکه بیک یوز اون درت سنه سی اوائلنده بغداد والیسی دال طبان مصطفی پاشا صدر صدارته اعتلا ایلدی .

سفر ختامنده قریم خانی سلیم کرای حضر تلی خانلی بیوک اوغلی دولتکرایه فراغ ایلک نیازینه ابتدار ایدوب طرف هایوندن دخی مساعدۀ سنیه ارزان بیورلمشیدی لکن مشارالیه دولتکرای خان قرنداش لریله او یوشه مامغله برمدت انلرله مناقشه وبالاخره جانب دولت علیه یه صورت عصیان ارائه ایدرک قالغای ساطانی عسا کر کلیه ایله بوچاق اراضیسنه کوندرمش اولدیغندن بو کیفیت موجب دهشت اولوب بابا طانغی وسائر ایجاب ایدن یرلره عسا کر وافی و مهمات لازمه کوندرلمسیله برابر سلیم کرای خان حضر تلی تکرار جلب بیوریلهرق دردنجی دفعه سلطنت قریم ایله تجیل اولندی بیچاره دال طبان شیخ الاسلام افندی واولاد وانسابنه قوللق ایتک اوزره هر درلو فداکارلق وتنزلاتی اختیار ایتمکه ایشه ده غلظت طبیعتی سالب امنیت اولدیغندن دفع وجود مفتی الانام ایچون تاتار فتنه سنی تحریک ایتک تهمتیه معزول ومقتول و برایکی ای مقدم ریاستدن نائل وزارت اولان راحی محمد پاشا مقام صدارته موصول اولدی .

اسباب وقعة ادرنه

صدر جدید تدابیر حسنه ایله فتنه تاتاری ازاله ایتمش ایشه ده شیخ الاسلام افندینک

معاملات متحکمانه سی روز بروز ترقی ایله تحمل درجه سنی چهره ک مقام حقوق
 لطف دیدکی به غلبه ایلیکندن تحریک فتنه ایله مفتی مشارالیه ک مدافعه سینه قیام ایلی
 لیکن کانون فساد ترتیبی مرتبه سنده قالمیوب تبدیل سلطنت درجه سینه قدر علو افشان
 و کندوسی دخی اصابت شراره فتنه ایله مبتلای خسران اولدی چونکه شیخ الاسلام
 افندینک مناصب و مراتب علمیه یی اولاد و انسابنه تخصیص ایلسندن ناشی رجال طریق
 منکسر و منفعل و عصر سابقده صوفیه حقنده متجاسرا هانت اولان وانی افندینک دامادی
 بولمق حسبیه شیخ افندیلر دخی خاندانک عدوی قویسی ایدیلر حتی ظهور واقعه آتیده
 وانی افندی مرحومک ایکی نفر اوغلی اون اون بش سنده نبر و بروسه جوارنده پدرلرینک
 احیا کرده سی اولان جامع شریف قربنده واقع چفتلک لرنده ساکن و مصالح دولتن
 مجتنب اولدقلری حالد مومی الیه مای کتوردوب قتل ایتدیردیلر و کویا بو وجهله وانی
 افندیدن اخذ انتقام ایدیلر سلطان مصطفی خان حضرتلری بعد المصالحه استانبوله عودت
 و مؤخر آینه ادرنه یه عزیمت ایدوب پدرلری مثللو صید و شکار ایله اورالرده امرار وقت
 ایتمکده و کریمه لرینی کوپرلی زاده صدر شهید فاضل پاشانک اوغلی نعمان پاشایه و مقتول
 قره مصطفی پاشا زاده علی پاشایه و سلحدارلری چورلیلی علی اغایه نامزد ایدوب ادرنه ده
 سرایلر تنظیم و انشا ایتدیرمکده اولدیغندن یقین و قتلرده استانبوله کلیه جکی ا کلا شلمغله
 بو کیفیت دخی در سعادته بولنان عسکری طائفه سنک و اهالینک اغبرارینی موجب اولمش
 و قضاو قدر استعداد اختلالی تماما استحضار ایتشیدی بنابرین بیک اون بش سنده سی
 ربیع الاولنده اکیوز قدر جبه جی علوفه لرینی طلب بهانه سیله علم افراز عصیان اولدقلرنده
 در حال هر نوع خلقت انضمام و تشویقاتیله جمعیت شقاوت کسب وسعت و جسامت ایدرک
 جمهور انتخابیله قوانوز احمد پاشا صدر اعظم و مفتی اسبق امام محمد افندی شیخ الاسلام
 و قول کتخذالغندن منفصل چالق احمد اغا یکچیری اغاسی اولوب سائر مناصب علمیه
 و سیفیه و مالکیه دخی معزولیندن معلوم الاسامی کسانه تفویض اولندی و رکاب هایونه تقدیم
 اولنان عرض محضرده شیخ الاسلام فیض الله افندی ایله درت نفر اولادینک عزل
 اولنه رق بعض سؤل و جواب ضمننده استانبوله کوندرلمسی و شهریار انامک استانبوله
 تشریف بیورمسی التماس قانندی بو خبر ادرنه ده پادشاه انامه لدی الوصول مفصلات
 تواریخده بیان و توضیح اولندیغی اوزره شیرازه اختلال وعد وعید ایله منتج انحلال
 اولمامغله محاربه یه قرار و یریلوب یکر می بیکدن متجاوز طوائف عسکریه نفراتیله اوچ

بشیدك قدر سیرجی و مشوق كروهی استانبولدن حرکت و پادشاه حضرتلری دخی ركاب هایونده بولنان ارکان دلت و یکیچری و سائر عساکر موظفه ایله حفزه مرحله سینه نهضت ایدوب فریقین بیننده ایکی ساعتك مسافه قالدقده معیت هایونده بولنان عسکر مقدحجه پس پرده خفاده استانبول اردوسنده اولان همجنسلری جانبندن جلب قلمش ایدوکندن بغته جمله سی استانبول معسکرینه دخالت ایتلمیله سلطان مصطفی خان حضرتلری یاننده سرای خلقندن ووزرا توابعاتندن غیری کیمسه قالدیغنه مبنی بالضروره ادرنهیه عودت ایلدی .

سلطنت سلطان احمد خان ثالث

متعاقباً استانبول اردوسی ادرنهیه واصل و بلا افاته وقت سلطان احمد خان ثالث ابن سلطان محمد خان رابع حضرتلرینی سنه مزبورده ربیع الاخرینك اوتنجی کونی تخت سلطنته اجلاس ایله مراد فوادلرینه نائل اولدیلر .

شهریار سابق حضرتلری اوتوز بریاشنده جلوس و طقوز سنهیه قریب پادشاهلق ایدوب خاندن یوز قرق کون مرورنده مرتحل دار آخرت اولمش و یکی جامع تربه سنه دفن اولمشدر متقدمین اجدادی مثللو ایکی دفعه صف مصافده بالذات احراز مشوبات غزا ایلش خوشکوفطین برپادشاه ایدی .

نصب کرده جمهور اولان صدر اعظم و شیخ الاسلام و سائرلری ابقا و یکیچری اغاسی چالق احمد اغایه وزارت اعطا اولوب صدر سابق رامی پاشا ایله بعض ارکان دولت اختفا ایلدیلر و محبوس مفتی سابق فیض الله افندی و بیوک اوغلی فتح الله افندی کال اذا وجفا ایله اعدام و قصورلری قبریسه اجلا قلندی .

پادشاه جدید حضرتلری موکب سلطنت ایله استانبوله مواصلت بیوردقدنصکره یکیچری اغاسی چالق احمد اغانك اطوار تحمل فرسası پاداشی اولان متغلبه دن افزون اولمغله اولانك نفی وازاله سندن بدأ اولوب بعده صدر اعظم و شیخ الاسلام و سائر نصب کرده اشقیا اولان ارباب مناصب برر ایکیشرف نفی و تبعید و کلزار سلطنت خار آزار استیلا لرندن تخلیص قلمغله و متجاسر بغی و طغیان اولمق تشبته مباشرت ایدن خونه دخی قهر و تدمیر اولمغله بیك یوز یکر می اوچ سنه سنه قدر متمد اولان انشته حسن پاشا

وقلايلي احمد پاشا وبالطه جی محمد پاشا وچورلیلی علی پاشا وکوپریلی زاده نعمان پاشا
ایام صدارتلی کال اسایش ایله مرور ایلدی .

سفر مسقو و سرداریؑ بالطه جی محمد پاشا واحوال جنک و صلح

ازاق قلعه سی حسب المعاهده روسیه ده قالمق حبسیله طوغان لیماننده دونما تدارکی
و اورقیوسی خارجنده مواقع متعدده ده قلعه لرا نشاسی ایله قریم حکومتی تحت تهدید و اخافیه
المقده اولدیغندن سلطنت سینه دخی ازاق دکزی بوغازنده واقع یکی قلعه نك بناسنه
اقدام وقوبان نهری ساحانده وسائر ایجاب ایدن یرلرده متعدد استحکاملر انشاسیله مسقولو
جانبندن مشهود اولان سوء نیتك اسباب مدافعه سنه اهتمام ایتمکده اولدیغی حالده مسقو
چاری بیوک پترو ایله اسوچ قرالی مشهور تیمور باش بیننده اتش حرب و قتال کرما کریم
اشتعال اولسی دولت علیه نك پولتیقه سنه موافق گلش حتی من غیر رسم اسوچ قرانه اعانه
ایلسی خفیاً قریم خانه اشعار قلنمشیکن موجب نقض صلح اوله جغی مطالعه سیله مؤخرأ
فرمان کوندریلوب بی طرف طور مسی توصیه وتنبیه اولتمشیدی حکمداران مشارالیهما
بیننده واقع اولان محارباتده های ظفرگاه بریسنك وکاه دیگرینك باشنه قومقده ایدیه ده
هیچ بریسنده لانه ساز استقرار اولدیغی حالده بالاخره رأس حدودده واقع بالطوه نام
محلده وقوعه بولان ماحمه کبراده اسوچ قرالی انهمزام فاحش ایله منہزم و مملکتسته عودت ایچون
مجروحاً سرحداث خاقانیدن بندر ده عازم اولغله مسقولولر تعقیب کنان حدود دوات علیه یی
تجاوزه جسارت و ممالک محروسه اهالیسنه ایصال خسارت ایلدیلر بو کیفیت دولتین بیننده
موجب قیل و قال وعاقبت منتج حرب و قتال اولغله اوتوز بیسک یکچیری واون بیسک
سپاه ویدی بیسک طوپیجی وجبه جی ترتیب وایکنجی دفعه صدارته کلان بالطه جی
محمد پاشا سردار اکرم نصب اولنه رق بیسک یوز یکرمی اوچ سنه سی اوائلنده
طونه یه طوغری حرکت ایلدی وولاة اطرافه موکب هایونه سرعت مواصلتلی
ضمننده اوامر اکیده اصدار وارسال قانیدی معسکر اسلام طونه نه رینی مرور ایتد کدنصکره
پرود صوبی کنارنده بقتة روسیه ایمپراطوری بیوک پترونک تحت قومانداسنده بولسان
اردویه تصادف ایتکله صباحدن اخشامه قدر محاربه وعساکر دشمنی محاصره ایدوب
مسقولولر ایسه کړک حربجه وکړک ذخیره جه پک زیاده مضایقه یه کرفتار اولد قلرندن وقریم
خانی خط رجعتلرینی قطع ایتک حبسیله بروجله عودته دخی مقتدر اوله مدقلرندن چار

ناچار استیمن وهر نه تکلیف اولنور ایسه قبول ایدجکرینی عرض واتیان ایلدیلر بونک اوزرینه اسوچ قرالی وقریم خانی حاضر اولدیغی حالده مذاکره مصالحت اولنوب ازاق قلعه سی کافه طوب و مهماتیله طرف دوات علیه تسلیم و مجدداً انشا اولنان سائر قلعهلر هدم اولنق وقریم خاننه وله حکومتنه تابع اولان قزاقلره مسقولو جانبندن وجهاً من الو. جوه مداخله اولنماق واسوچ قرالنک سالماً مملکتنه مرورینه مانعت قانماق واستانبولده روسیه ایلچیسی اقامت ایتماک شرائطیه تجدید مصالحیه قرار ویریلوب اسوچ قرالنک وقریم خاننک اشبو استیمنی عدم قبول ایله مسقواردوسنی حرباً اسیر ایتک حقهده اولان رائلرینه التفات اولنمدی چونکه دولت علیه جه الک مهم ماده کندوسنه دخیل دوشن اسوچ قرالنی مملکتنه کوندرمک وخلاف عهداورقیوسی خارجنده انشا اولنان استحکاماتی هدم ایتدیرمک ایدی لطف حقه بونلردن فضله اوله رق ازاق قلعه سنک تخایص وقزاقلره عدم مداخله کی حدود اسلامیهدن تباعدی متضمن شرائط قبول ایتدیرلمسیله اکتفا قلندی وشمدی مسقواردوسنی هیئت حاضره سیله طوتمق ممکن اولسه بیله مواد منعقدنک فعله کلمسی تکلیفات ومحاربات عظیمه یی موجب اولور دنیلهرک زبون کشک وادیسنه رخای عنان اولنمدی .

صدر اعظم بالطه جی محمد پاشا کتم ضمیره قادر اولمدیغندن رکاب هایون قائم مقامی بولنان داماد علی پاشا که صکره لری شهید علی پاشا نامیله مشهور اولمشدر انک حقهده دلیکیرلکی متضمن بعض تفوهاتی واقع اولغله علی پاشا مضطرب اولوب صدر مشارالیه بویه مظفراً رکاب هایونه کلور ایسه کندوسی ایچون وخامتی مستلزم اوله جغنی دریش وشیخ الاسلام افندی ایله دارالسماعده اغاسنی دخی افکارینه جاب ایدرک حضورهایونده فصل ومذمت ایتکه وروسیه ایمراطوری بودرجه مغلوب اولمشیکن صالیورلمسی ایمراطور یچه نک خفياً تقدیم ایتدیکی مجوهرات واموال بی پایانک ثمره سیدر دیمکه باشلدیلر لکن پادشاه حضر تلری بویه مظفریت فوق العاده مظهر اولان ذاتک تنکیلی تجویز ایتوب فصل ومذمتلرندن اغماض عین ایتکده اولمسیله مخوف برافتر ترتیب ایدوب (پادشاهم صدراعظم متجاسر اولدیغی قباحتنک طویولدیغنی استماع ایدرک خوف مواخذه ایله ادرنه ده اقامت وامرای عسکریه یی خدمتمز تقدیر اولمدیغندن بشقه حقمزده ترتیب مجازات تصور قانمقده در باشمزک چارده سنه باقم یوللوالقالات ایله تحریک فتنه ایتک اوزره در درحال چاره سی کورلمز ایسه نتیجه سی فنا اولور) دیهرک تخویف وهر بریسی یکدیگری

تصدیق ایتمکه صدر مشارالیه ادرنده علوفه و یرمک ایله مشغول ایکن معزول و یکچراغاسی یوسف پاشا مقام صدارته موصول اولدی مؤخرأ قریم خانی استانبوله جلب اولنوب انک افاداتی دخی صدر سابقک عظیم برفرست فوت ایتدیکنی مشعر اولدیغندن کتخداسی عثمان اغا ایله مکتوبجیسی عمر افندی اعدام اولنوب پاشانک دخی قتلی ضمننده فرمان عالی اصدار قلممشیکن قبل الوصول منقاسی اولان لمنیده وفات ایلشدر مشارالیه بالطه جیلقدن کله ایسهده جهلادن اولیوب فن موسیقی وصنعت کتابتدن بهره دار و اولدجه علم و معارفه انتساب ایله شهر تشعار ایدی یازیچی افندی باش خلیفه سی ایکن سلطان احمدخان حضرتلرینه کسب اختصاص ایلش اولدیغندن جلوس هایونلری وقوعنده دفعه میراخور اولومتعاقباً قبودان دریانصب اولنوب چوق کچمکسزین صدر صدارته اعتلا ایلش وایکنجی صدارتنده بویله بر خدمت عظیمه یه موفق اولشدر .

روسیه ایمپراطوری اجرای شرائط منعقدده تأخرات واسوج قرانک مملکتته عزیمتی خصوصنده مشکلات کوسترمکده اولدیغندن تکرار اختیار سفر اولمغه قرار ویریلوب لکن صدر اعظم یوسف پاشا کوشک طوراً بمقده اولمسیله عزل و نشانجی بولنان سلحدار سایان پاشا نصب اولندقدنصکره روسیه لولر ایفای تعهداتده قصورلرینی اعتراف و اجرای شرائطه ابتدار ایلدکلرندن سفر ماده سی تأخیر اولنوب اسوج قرانک عزیمتی کندوسنه تبلیغ اولندقدده مخالفت ایتمکه و بوحال ایله بندرده اقامتی دخی دولتک ایشنه الویر مامکله جبراً قالدیلوب دیمتوقیه کتورلدی لکن قرال مشارالیه حقنده اختیار اولنان معامله بارده شان سلطنت سنییه غیر لایق ایدوکی جهتله معترض انام اولدیغندن بوایشه سبب اولان صدراعظم و شیخ الاسلام و قریم خانی عزل اولنهرق مقام صدارته ابراهیم پاشا و قریم خانلرینه خان معزولک کوچک برادری قپلان گرای خان اعتلا ایلدی

صدارت شهید علی پاشا

مشارالیه ابراهیم پاشا قالیون قبودانلرندن اولوب اقدک زده خدمات مبروره سی ظهور ایتمش جری وجسور برذات ایسهده امور دولتن بالکلیه غافل اولمغه و داماد علی پاشایی بغته قتل و اعدام ایتمک افکارنده اولدیغی استماع اولمغه صدارتنک یکرمی برنجی کونی اندرون هایونه جلب ایله مهر صدارت استرداد و ساحة هستیدن ابعاد اولنوب بش التی سنه دنیرو وزیر معنوی اولان مشارالیه علی پاشا لابس فروه صدارت عظمای اولدی

صدر جدید علم و فضل ایلہ آراستہ و استقامت و صلاح ایلہ پیراستہ اولوب هله اخذ رشوت ماده سی بغایت منفوری اولدیغندن یکچیچری اغالربنک حین نصبنده صدراعظم لره و ضابطان عسکریه نك یکچیچری اغالربنه ویره کلدکلری هدایای معتاده بی بیلہ رفع و الغا و هر طریقجه اهل و اربابنک انتخابی خصوصنه اعتنا ایدوب عدالت و حقانیتی متضمن کندو قلمیلہ بالجمله ولاته تعلیماتلر ارسال و امور محتله دولتک تصحیح و هیئت سابقه سنه ارجاعی امرنده بذل اقتدار ایلدی حتی حرمین شریفین اوقافی دارالسعاده اغالربنک نظارتنده اولمق حبسیله بر طاقم غاصب و نااهلر امور اوقافه مستولی اولدقلرندن اکثر اوقاف حرمینی اوقاف محاسبه سی نامیلہ تشکیل ایتدیکی هیئت ادارهیه قالدیردوب قطع تناسل ماده نامشروعنک منع و ابطالی ضمنده دخی مصر و الیسنه مؤکد فرمانلر کوندردی لکن بغض و عداوتی قوی و سفک دمایه دخی مائل اولدیغندن تقرب پادشاهی ایلہ کسب اقبال ایتدکن صکره صدراعظم نصب اولنجهیه قدر بش الی سنه مدته مقام و کالتسه کلان وزیرایه راحت و حضور و یرمیوب اولا چورلیلی علی پاشا کبی درت سنه دن متجاوز زمان صدارتنده حسن ادارهیه نائل اولمش و برقچ سفره کفایت ایده جک ذخائر و مهمات جمع و ادخارینه همت ایتمش اولان ذاتی مجرد خصومت ذاتیه اغورنده عزل و نفی ایتدیرمکله قساعت ایتمیوب بریحقی سنه مرورنده قتل ایتدیرمشدر بعده کوپرلی زاده نعمان پاشا اوچ ای صدارتده بولنوب فضل و نجاتنه مبنی یالکز عزل ایلہ قورتلدی و نعمان پاشا فتوحات فوق العادهیه مظهر اولمشیکن مکافات یرینه عزل و نفی ایتدیروب هله قتل فرمانی واصل اولقسزین فوت اولدی مؤخرآ صدارته کلان یوسف پاشا و سلحدار سلیمان پاشا و ابراهیم پاشانک بلاموجب قتللربنه علت مستقله اولوب سائر وزرادن دخی نفوس کثیره اتلاف ایتمشدر حاصل کلام بر صورتله مغیر اولدیغنی اشخاصی مطلقاً قتل ایتدیرنجهیه قدر اوغر اشملق معتادی اولمغله بروجہ آتی موره فتیحی کبی خدمات مبرورهیه موفق اولمشیکن و رادین محاربه سنده شهادتی وقوع بولدقده ارکان دولت مسرور و محاکمه افعالی وابسته یوم النشور اولدی

ظهور سفر و ندیک و سرداری شهید علی پاشا و فتح موره

روسیه مسئله سی ختام بولدقدن واسوج قرانه طرف پادشاهیدن اون بیک التون یول خرجلنی و مرصع بساطلی اتلر و سائر لوازمات اهدا و بر مقدار عسکر دخی ترفیق

اوله رق مملکتی جانبینه اعاده قلندقدن صکره دولتیجه مشغولیت قالدیغندن موره نك تخلیصی دوشونلیکه باشلاندی بو او انده ایسه بوسنه والیسی کوپرلی زاده نعمان پاشا قره طاغ عصاتنك تادیبینه مأمور اولدیغندن طرف طرف تدمیر وتنکیل اولنان عصاتنك بقیه السیوفلری ونديك حكومتنه التجا ایدوب بعض مرتبه مظهر معاونتلی اولملریله واقد کرده برقاچ قطعه اسلام سفینه لری غائب اوله رق مؤخرأ بونلرك ونديك قورصانلری طرفندن طوئش ایدوکی تبین ایلمسیله بیك یوزیکرمی یدی سنه سی اوائلنده پادشاه حضرتلری ادرنه یه عزیمت واورادن صدر مشارالیهی سردار اکرم نصب ایدرك موره استردادینه مأمور ایلدیلر

معسكر اسلام موره جزیره سنه داخل اولدقدن صکره بر آیه وارمق سزین کردوس وانابولی قلعه لری ومتعاقباً متون وقرون وسائر قلاع جزیره کاملاً ضبط وتسخیر ووندیکه معاونت ایدن سرکشان اهالی تنکیل وتدمیر اولندقدن بشقه دونمای هایون قوتیه استندیل وچوقه اطه لری وحانیه وقندیه محافظلری وبوسنه غازیلری معرفتلیله فاضل احمد پاشا صلحنده وندکولر یدنده قلان صوده واسیرلوقه جزیره لری وبهکه سنجاغی مضافاتی فتح واسترداد اولندی

صدراعظم ازوقت ایچنده بو قدر فتوحاته مظهر اولدیغندن دلسته غرور اولملره رکاب هایونه عودتندن صکره سنه آتیهدده قورقه اطه سی ونديك ساحلارینی ضبط وتسخیر ایله بوسنه یه برطریق بحری آچق وبوسنبه مجارستان طرفلرینه حرکتی تسهیل ایلك آرزوسنه دوشوب اسباب سفریه استحضارینه دامن درمیان ایدی

ظهور سفر نتیجه

نتیجه لولر ایسه اشبو ونديك محاربه سنه مباشرت اوله لیدنبرو عرض توسط و اجرای تعریضات ایتکده اولدقلری حالدده موره نك فتحیه اکتفا اولمديغنی وایشك نتیجه سی کندولرینه طوقونه جغنی کوردکارنده وندکاو ایله تفاقر اولدیغندن سنه سابقه ده ایقاع اولنان ضرر تضمین اولنمز ایسه بزده داخل حرب اولمغه مجبور ز دیو اعلان حرب ایده جکلرینی صراحة بیان ایلدیلر اگرچه ایراث اولنان ضرر تضمین اولنسون دیمکدن مراد لری سلطنت سنیه نك ایکوزی مالق قدیمی مایکی اولان وبو کره استرداد اولنان موره پی وندکلویه کیروویردیرمک دیمک اولمديغنی وبونك امکافی بولمیه جغنی معلوم ایسه ده استندیل وچوقه اطه لری قوتاروب

صالح ایتدیرمک ایستلرایدی لیکن صدراعظم اصلا اورالرہ یناشمیوب نمچه ووندکلوایله مقدا عقد اولنان مصالحلر یکدیگرینه مربوط وعهدنامه لر بوقیدایله مشروط اولمدیغندن نمچه لولرک بودعوایه حقلری یوقدر دیوایراد دلائل ایله الزام قیدینه دوشدی وموره فتحیله اکتفا اولنوب ماده نك طاتلی باغلامسنى سوق ایدن ارکان دواته چین جبین اظهاریله اخافیه باشلادی دولتر بینده جریان ایدن معاملات قوت وقدرته مستند اولوب ادله قویه وملزمه نك اصلا فائده سی اولمدیغندن تکیون ایدن احوال منتج حرب و قتال اولغله بیك یوزیکرمی سکر سنه سی اوائلنده صدرمشار الیه اردوی هایون ایله باغراده طوغری نهضت وقورقه اطه سنك تسخیری ضمنده دیاربکر بکلبکیسی قره مصطفی پاشای سرعسکر نصب ایدرک دونمایدن هایون ایله قپودان پاشای معیتنه بالتعین اولجانبه اعزام ایلدی

سنه مزبورہ شعباننك واسطنده ورادین قلعه سی محاصره اولنق نیایله باغرا ددن زمون طرفه مرور اولنوب قلعه مرقومیه تقرب اولندقدہ عساکر طرفین طلیعه لری بینده شدتلو بر محاربه واقع اوله رق ایکی بیك قدر دشمن عسکر یله بر جنرال قتل وتدمیر وبریسی دخی اسیر قلندی

اولکون علی العموم نمچه اردوسی اوزرینه هجوم اولنق تصور قلنمش ایسه ده هنوز عسکر اسلامک ارقه سی التمدیغندن وطوپلر ایله مهمات حریبه کاملاً واصل اولمدیغندن جسارت اولنه مدی واقعا نواقص عسکر و مهمات ایله بالترتیب هجوم اولنق مخاطره لو ایدیسه ده دشمنک عسکری دخی تجمع ایتماش بولندیغی جهتله بو تأخیردن نمچه لولر ده ازیاده مستفید اولدیلر و کیرودن کلیمده اولان امداد لریله برلشدیلر

شهادت صدراعظم علی پاشا وانهزام موکب هایون

ایرتسی کون معسکر هایونک پاشکا هنه متریس لر قازیلوب اطراف دخی مهمات عربهلری دیزیلرک تحصین قلندی ده ا ایرتسی کون وقت صبحده نمچه لولر صول قول ویکچری متریس لری اوزرینه ساخته بر حرکت کومستروب صاغ قول متریس لرینه شدتله هجوم ایلدیلر بومتریس لر ده بولنان پیاده ارنود عسکری پایدار اوله میوب ارقلرنده بولنان اناطولی سوارسیسی دخی والی و قوماندانلری بولنان تورک احمد پاشانک شهادتی سببیله رجعت ایلدکلری صدر اعظم علی پاشانک منظوری اولدقدہ یاننده بولنان سپاه و سلحدار سواریلری

و کندی دأثره سی خاقیه بالذات مدافعه دشمنه شتاب ایتدیکی حالده النندن قورشون ایله اوریلوب شهید اولغله بو کیفیت جنود اسلامیه نك پریشانانغه و دشمنك اردوی همایون دروننه فرصتیاب و نوج اولملرینه باعث اولدی

یکچریلر کندی اوزرلرینه کلان دشمن عسکری پریشان و تعقیب ایدرک دشمنك برقاج طایبه و خلیجه طویلرینی ضبط ایتشلر ایکن صدراعظمك شهادتی و صاغ قولدن اعدانك اردوی همایون دروننه کیردیکنی ادراک ایله انلر دخی بالضروره رجعت ایلرله کافه خیام و طویلر و سائر مهمات یرلرنده ترك اولنهرق اولکون اقشامه قدر طاقم باغراده واصل اولدیلر و نجه لولر دخی بوغلبه ایله اکتفا ایدوب تعقیب ایلدیلر خبر هزیمت رکاب همایونه واصل اولدقده صدارت و سردارلق بلغراد محافظی خلیل پاشایه توجیه اولنوب قورقه جزیره سنی محاصره ایدن عسکر کیر و الندی و اوستریالولر بعدالغلبه طونه یی کچوب طمشوار قلعه سنی محاصره یه اعتنا و اوچ آی قدر حرب و قتال و قوغندن صکره بروجه استیمان استیلا ایلدیلر

ایرتسی سنه که بیک یوزیکرمی طقوزتاریخیدر نجه لولر باغرا دی محاصره ایتکله صدراعظم خلیل پاشا ادرنده رکاب همایوندن مفارقت و مستصحب معیتی بولنان عسا کر کلیه ایله جانب بلغرا ده سوق توسن مسارعت ایدوب لکن دشمن استحكامات جسیمه ایله اردوسنی تحصین ایتش بولندیغندن واقع اولان محاربه ده عسکر اسلام مبتلای کسر وانهزام اولغله بوبوز غنلق دخی بلغرادك ایادی اعدایه کرفتار اولسنی مستلزم اولدی بونك اوزرینه صدر مشار الیه معزول و ناشنجی بولنان محمد پاشا صدر صدارته موصول اولوب اردوی همایونی ادرنه یه کتوردی

صدارت نوشهرلی داماد ابراهیم پاشا

مشهور نوشهرلی ابراهیم پاشا که پادشاه حضرتلری شهزاده ایکن بالطه جی بولندیغندن برتقریبله کسب تمخص ایدوب جلوس همایوندن صکره جه دارالسعاده اغاسی یازیجیلغی منصبه تعیین اولمش و خلیجه کسب تعین ایتشیدی چورلیلی علی پاشا صدارتنده عزل و اخراج و بعض مرتبه ازعاج اولنوب وورادین و قه سنده موقوفاتجیلق منصبیه اردوی همایونده بولندیغندن خبرانهزامی متضمن تنظیم اولنان عرض محضر مومی الیه واسطه سیله تقدیم قلعه غله حضور همایونه واصل اولدقده تجدید برات عبودیت ایدوب اولا میراخورو متعاقباً

رکاب همایون قائم مقامی نصب او اندی مشارالیه اولدجه او قور یازار واصحاب معارف و کماله اعتبار والتفات ایدر نبض کیر و مزاج آشنا سخی و بازل و ذوق و هوایه مائل بر رندقلاش اولمقله کوندن کونه تقرب و اقبالی تزیاید ایدرک دامادلق شرفه دخی مظهر اولدی

عقد مصالحه

اوصاف مبسوطه حکمنجه بر آن اول حربک اندفاعیه دنیادن کام المق نخبه آمالی ایدوکنه مبنی قائم مقام اولور اولمز انکلتزه وسائر دول سفارتلرینه مراجعت ایله استحصال مصالحه دامن در میان اولمشیکن بوتشبتی جنود اسلامیه نک موجب فتوری اولمق اوزره اتهم اولندیغندن بالضروره دست کش فراغ اولدی لکن باغراد انهرامی ترقیدار اولان استدراجنه خدمت ایتمکله او توز سنه سی او ائانده صدر صدارته اعتلا ایدوب متبئی حرکت اولان اردوی همایونی بالاستصحاب صوفیه طوغری عزیمت ایلدی انکلتزه و فلمنک دولت لرینک توسطی قرار اشیدیرلش و مورود نهرندن حدود قطعیله طمشوار و باغراد ایالت لرینک نجه لویه ترکنه و چوقمه اطهر لیه و ندیک کورفرزنده واقع بعض محالرک و ندکلویه ردینه اظهار موافقت اولمش اولدیغندن بیک یوز او توز سنه سی رمضان او ائانده (پوزرو فجه صاحی) نامیله مشهور اولان عهد نامه دمه مندرج شرائط موجبنجه دولتین مشارالیهما ایله تجدید مسالمت قلندی.

صدر اعظم ابراهیم پاشا هر نصل اولور ایسه اولسون شمیدیلک عقد صلح اولنهرق عسکره نظام ویرلدکن و لوازمات سفریه استحضار قلندقدن و کمره استرداد ضایعاته مباشرت قلنمق سوزیه مسامع دواتی طنین انداز ایدوب حتی مجبوریته صالحیه بی متضمن بر طاقم دلائل و آتی ایچون درلو تسلیت و ماخلویایی حاوی بر لایحه قلمه الیر مشدرکه وقعه نویس اسعد افندی مرحوم بالمناصبه بولایحه بی تاریخه درج ایشدر و روش افاده سنه باقلنجه بر اجنبی ضابطی جانبندن یازلمش و هیئت دولتی قاندرمق مقصودینه مبنی ترتیب قانمش اولمسی تخمین اولنور.

ختم مصالحه دن صکره صدر اعظم عسکر اسلام ایله ادرنه یه عودت و اورادن دخی پادشاه حضر تلریله برابر استانبوله مواصلت ایدوب محلول اولان علوفه عسکریه نک خزینه مانده ایدلمسنه اعتنا ایدرک ایکی اوچ سنه ظرفنده اون بیک کیسه قدر تنقیص مصارفاته موفق اولدیکه عصر من حسابنه کوره اوچ درت یوز بیک کیسه دیمک اولور

لیکن بوباردلر ایله تنظیم لوازم حربیه و ترتیب مقتضیات مالکیه خصوصاً لرنده نصب نفس اهتمام ایلمک فرائض حالیه دن ایکن بلغراده بدل و دین و نیش قلعه لرینک مجدداً انشاسندن غیر برشی کورلیوب همت و مساعیسی کاغد خانه و بوغاز ایچی مسیره لرینک اعمار و تسویه سنه و سور هایونلر تنظیمه و نویناد و میر آباد و باغ فرح و سائر بومثللو ناملر ایله کندوسنک و عونانتک بنا و انشا ایلدک لری قوناق و یالیرده موسم شتاده حلوا صحبتلری و ایام بهارده لاله چراغلری ترتیب ایدرک شعرا و ندما و ارباب ذوق و طرب ایله امرار ایام ایلمک ماده لرینه منحصر و مصروف ایدی .

ایش اتی سنه قدر حال بومنوال اوزره جریان ایدوب هر نقدر خلق ذوق و شوقه طامش ایهده بوکیدش عاقبت بر نتیجه و خیمه تولید ایده جکی میدانده اولدیغندن و صدر اعظمک بودرجه سفاهت و هوایه انهما کی هیئت دولته سرایت ایلدیکندن بختله قدح و مذمتی زبازد انام اولمغه باشلادی و دولتیجه موجب شرف و شان اوله بیله جک و بقای جاه و اقباله خدمت ایده جک بعض نمایشلره احتیاج حاصل اولدی .

ظهور سفر ایران

بناءً علیه بروقتدنبری دولت صفویه یه اعلان عصیان ایش اولان افغانلیر بو اوانده یعنی بیك یوز اوتوز بش سنه سنده اصفهانی استیلا و دوات شاهانی محو و افنا ایش اولدقلرندن داغستان طرفلرنده بولنان امرای اهل سنت جانب دولت علیه عرض تبعیت ایلمر یله ایچلرندن داودخان نامنده برنامداره شروان خانلغی توجیه و تفلیس طرفلرینه دخی سوق عسکر اولنهرق ضبط اولنوب اورایه دخی دادیانلردن شهنواز نامنده برخان نصب قلندی لیکن مسقولولر بحر حزر اطرافنه یایش و دربندوبا کو قاعه لرینی تسخیر ایش بولنملر یله بوندن طولانی سلطنت سنیه ایله روسیه دولتی بیننده مخالفت ظهور ایدوب جریان ایدن قیل و قال موجب حرب و قتال اولمق درجه سنه واصل اوله رق اعلان سفره قرار ویرلمشیکن فرانسه ایایچیسى توسط یله بحر حزر سواحلی و مذکور دربندوبا کو قلعه لری و داغستانک برطاقم یرلری روسیه لوده قالمق و شروان خانی شماخیده اقامت ایدوب جانب دولت علیه دن ایجاب ایتدیجکه اولحوالی یه عسکر و سرعسکر کوندرلماک شرطلریله عقد مصالحه اولندی داغستان خلق حکومت شیعه دن قورتلوق صد دنده مملکتلرندن برقم اعظمک و اهالیسندن پک چوق اهل سنتک جانب دولت علیه دن رسماً روسیه یه ترك قلندیغنی بالمشاهده گرفتاراندوه

وحیرت وبالاخره بوقیفت ابراهیم پاشانك فلا کتته صوری ومعنوی اقوای اسباب و علت اولمشدر بوندن صکره مرکز اجتماعلری طاغلمش اولان ولایة صفویه اوزرلرینه ارضروم وبغداد جانبلرندن اردولر سوق اولنه رق همدان و کرمان شاهان وروان وکنجه و تبریز شهرلری ضبط ایتدیرلدی سلطنت سنیه ایچون بوایشلر موجب شان ومفخرت اولیوب بلکه زبون کشک کبی بر حرکت ناروا اولدیغی ویهود و سفک دماء مسلمینی مستلزم بولندیغی حالد ابراهیم پاشا طاقی بونلری اعظام ایدرک شهر آیینلر اجراسیله وشعرا طرفلرندن قصائد وتاریخلر انشاسیله خلک کوزینی بویامغه وبویله فتوحات جسیمه مسبق الوقوعیدر دیمکه قویلدیلر و کوندن کونه سفاهت وهوالرینه اب وتاب و یروب ازتدیلر . اصفهانده مربع نشین حکومت اولان اشرف شاه افغانی استانبوله ایلمچی کوندروب کندوسی دولت صفویه مقامنه قائم اولدیغندن بخله جانب سلطنت سنیه دن ضبط اولنان یرلرک ردینی طلب ایتمش ایسه ده مساعدده اولمیدیغندن بغداد والیسی و همدان سرعسکری بولنان احمد پاشانك اوزرینه هجوم ایدوب واقع اولان محاربه ده طائفه اکرادک خیانتیله سرعسکر مشار الیه منهزم اولدی . لکن ایرتسی سنه که بیک یوز قرق تاریخدر تدارکات جسیمه ایله اصفهان طوغری حرکت اولمغله و اصفهان محاصره سنده بر تقریبیله چیقوب صاووشمش اولان شاه حسینک اوغنی طهماسب شاهک باشنه امرا وایلات ایراندن خیلی آدم تجمع ایدرک افغانیلری صقیشدیرمقده بولمغله اشرف شاه هر نصل اولور ایسه اولسون دولت علیه ایله او یوشمغه مجبور اولدیغندن ممالک مفتوحه حکومت سلطنت سنیه ده قالمق اوزره سرعسکر مشار الیه واسطه سیله عقد مصالحه ایدلدی .

افشار عشیرتنک رئیس اولان نادر علی که صکره لرلی نادر شاه نامیله کسب اشتہار ایلشدرکیاست وشجاعتی جامع قوی العزم و بطش شدید صاحبی بر آدم اولدیغندن کشور ایرانک پریشانلغندن استفادیه عازم اولوب فقط مضمحل درونی ستر ایله شهزاده طهماسبک خدمتی اختیار وقاعدۀ اعجام اوزره کندوسی طهماسب قولیخان لقبیله لقب ایدرک قبیلہ سی خلقندن وشهزادۀ مشار الیهک باشنه طویلانان اعجامدن مرکب براردو ایله افغانیلر اوزرینه هجوم ایلدی ووقوعبولان محارباتده نائل فوز وظفر اولمغله اصفهان وسائر ممالک ایرانک تخلیصنه موفق اولدی .

بعده جانب دولت علیه دن ضبط اولنان ممالکک ردینی طهماسب شاه استدعا ایتمکله شروان وتفلیس وروان ایالتلری حکومت سلطنت سنیه ده قالمق اوزره تبریز و کرمان شاهان

وهمدان ایالتلرینک ردینه موافقت و تخلیه‌سینه مباشرت قلنمش اولدینی حالده نادر علی بونلر ایله قانع اولیوب معامله خصمانه‌یه مباشرت ایلدیکنه و مذکور نادر علینک ظهور و خروجی مدهش کورندیکنه منی ابراهیم پاشا ایشک فوالشدیغنی اکلا یوب سفر آچدیغنه نادم اولمش ایسه ده خلقتک کندو حقنده نفرتی و قولایلقله کوز بویامق قابل اولمادیغنی بالاستدلال پادشاه حضرتلریله معاً ایران اوزرینه حرکت اولمق تصمیمیله اسکداره اردو قوردرتدی لکن بو حرکت مزاج پادشاهی‌یه موافق اولمادیغندن سلطان احمد خان حضرتلری اظهار تعامل ایتمکده ایکن ترکی موجب فتنه و فساد اوله جنی تبین ایلمسیله بالضروره اسکدارده معسکر هایونده منصوب اوطاغه نقل شهر یاری و قوعبولدی .

ظهور وقعه پاترونه

ابراهیم پاشا بعد ازین حرکت هایون سوزینی اغزینه المیوب گاه اردوی هایونله کندوسی کتمک و گاه سرعسکر کوندرمک شایعه لریله امرار زمان ایتمکده اولدینی حالده بیک یوز قرق اوچ سنه سی ربیع الاولی اواسطنده بفته مشهوره ظهور ایلدی . چونکه ابراهیم پاشانک هم کندوسی و همده اوغلی کنج محمد پاشا و یکنلری علی پاشا و مصطفی پاشا پادشاهک دامادی و کندوسنک بیوک دامادی اولان قیامق مصطفی پاشا قبودان و کوچک دامادی محمد پاشا روم ایلی بکلر بکیلیکی پایه سیله کتخدای صدر عالی اولدب قصور ارکان دولت دخی دائرده سی خاقی حکمنده اولدیغندن بو قدر اقباله و منافع دولتی کندوسنه و توابعاته حصر ایتمکده هیچ کیمسه لر تحمل ایده میوب احساندیده لری بیله زوال دولتی متمنی ایدیلر باخصوص حلوا محبتلرینک و لاله چراغلرینک تحتند بر طاقم فجشیات مروی و ابراهیم پاشانک کاغذخانه ده قادینلره التون اتوب یاشمقلرینک ایچنه دوشرمکده اولان مہارتی مرئی ایدی حتی استانبول قاضیمی زلالی حسن افندیکنک صاحبہ حسن و جمال اولان زوجه‌سینه حیل مصنعه ایله تعرض ایلمسی استعدادده تام ایله مستعد اولان قتیل فتنه‌نک اشتغالنه سبب اولدی دیوالسنه ناسده برفقره طویل الذیل جریان ایدر بنسابرین سلطان بایزید حمای خدمه‌سندن مصلی و پاترونه نامنده ایکی نفر ارنبود اون یدی کشیدن مرکب اولان عونله لریله رفع علم شقاوت ایلملرینی متعاقب قوه استعداد دائره عصیان در حال توسیع ایتمکله یکیکچری قشله لری وسطنده واقع ات میدانی مجمع عسکر اولوب قاعده جاریه لری اوزره قشله لرده اولان قزغانلری اخراج ایلدیلر زیرا قزغان چیقارمق عصیان و مخالفتک

تأسس ایلدیکنی متضمن علامت معروفه ایدی بوخبر سمع دولته واصل اولدوقده پادشاه حضرتلری اسکداردن استانبول سراینه امرار اولنوب ارکان دولت عقد جمعیت ایلدیلر سنجاغ شریف اخراجیله تنکیل اشقیایه تشبث اولندی ایسه ده ابراهیم پاشا طاقنه اولان نفرت عامه سببیه تأثیری اوله مدینی مثللو طائفه عسکریه نیک مطلوبلری اولان صدراعظم ابراهیم پاشا و قپودان مصطفی پاشا و محمد کتخدانک ازاله لری و شیخ الاسلام عبده افندی نیک عزل و نفیله دخی ایش فساد تسکین اوله ماغلله سلطان احمد خان حضرتلری تخت سلطنتی برادر زاده لری سلطان محمود خان اول حضرتلرینه تسلیمه مجبور اولدی خاقان سابق مشارالیه بیک سکسان درت سنه سنده تولد و بیک یوز اون بش سنه سنده جلوس ایدوب اشبو قرق اوچ سنه سی ربیع الاولنک اون بشنچی کونی خلع اولمش و قرق طقوز تاریخنده وفات ایدرک یکی جامع تر به سنده پدرلری یاننه دفن قلنمشدر

نعیمه مرحومک ادرنه وقعه سنی متضمن قلمه الدینی رساله مخصوصه ده مشارالیه سلطان احمد خان حضرتلری شهزاده ایکن برادرلری سلطان مصطفی خانه معرض نصیحتده (فیض اه افندی به بوقدر نفوذ و اقبال و یرمکز چندان مناسب دکلدر) دیدکلری مسطوردر حالبوکه کندوسی ابراهیم پاشایه فوق العاده یوز و یروب صادر اولان خط هایونلرده کی التفات و تکریماتی مسبوق اولیان درجه ده اولغله (من غیر اخاد بذب لم یئت حتی یعمله) حدیث شریفنک ماصدقی اولمش و صدر اعظمک سوء احوالنه دائر بیوک شهزاده سی سلطان سلیمانک و شیخ الاسلام عبدالله افندی نیک افادات صحیحه لرینی قبول ایتدکن ماعدا ابراهیم پاشایه (شیخ الاسلام افندی سنک حقنده فنا شیر سویلیور) دیمش اولمسيله پاشای مشارالیه ارباب جفر و نجومک اخبار مجربه لری اقتضاسنجه ده زمان اقبالز چوقدر دیوجواب و یروب شیخ الاسلام افندی به دخی تزئید تلطیفات ایله مجازات طریقنی اختیار ایلشدر

مشارالیه ابراهیم پاشا زاده کنج محمد پاشانک ابراهیم بک نامنده معمریندن براوغلی اولوب بیک ایک یوز او توز تاریخنندن صکره لره قدر برحیات اولمش و چراغان ساحل سراینک یاننده پدرمانده اولان یالیسنده اقامت ایدوب جدیدنک فضله اوقافیه تعیش ایدر ایشکه مشهور حالت افندی نیک اقبالی دخی انک توصیه سیله حاصل اولدینی مرویدر زیر سلطان محمود خان ثانی چراغانه کیتدکجه خفیاً ملاقات ایدر ایش میرمومی الیهک احباسندن اولوب شیخ الحرم ایکن وفات ایدن زیور پاشا نقل ایدر ایدیکه سلطان مصطفی خان ثالث زماننده

ابراهیم بك اندرون هایون اغواتندن بولمغله سلطان مصطفى مرحوم کندوسنه خطاب ایدوب (سنگ جدهك بك قلاش بر حریف ایدی پدرمه متمادیا طور به طور به التونلر کتوروب تقدیم ایدر و پدرم دخی انشته كزك النی تقیل ایدك دیوبزه امرایلر ایدی) دیرایمش

سلطنت سلطان محمود خان اول

سلطان محمود خان اول حضر تلرینك جلوسیه تالاظم فتن کسب سکونت ایتمش ایسه ده مصلی و باطرونه که ارنبود طائفه سندن بریسی قهوه جی و بریسی سرنوبت ایکن انای فته ده پیشوای شقاوت اولملریله سیل مداخله و تسلطلری باشدن آشوب حتی قریم خانلغیه مملکتین و یوده لقلریخی بیله منتخبلرینه توجیه ایتدیرمشلر و کندولری قول کتخدالنی وروم ایلی وایلکی مثللو مناصب رفیعیه کمند انداز اولمشلر ایدی بناء علیه ترتیب جزالرنده استعجال اولنمق اقتضا ایلدیکندن ایران مسئله سی مشاوره اولنمق بهانه سیله روان کوشکنده عقد مجلس اولنوب مقدمه حاضرلنش اولان بوسه تانجی بهادرلر واسطه سیله مزبور موصلی و باطرونه و عونلری اعدام و اشقیا التماسیه اناطولی قاضیه سگری نصب اولنان زلالی حسن افندی و دلی ابراهیم مثللو نراجلو کمنام قلندی برقاچ کون مرورنده اخذ انتقام اسوداسیله خذله اشقیا علم افراز عصیان اولمشلر ایسه ده سنجاغ شریف چیقاریلوب اصدقای صنادید عسکریه و اتفاق ارکان دولت ایله تأدیب و تربیه لری کاینیغی اجرا و کانون عتو و طغیانلری اطفا اولندی

احوال محاربه ایران

طهماسب شاهك اعتماد الدوله سی و سبب تسلطن واستقلال اولان نادر علی خانکه قاعدۀ اعجام اوزره طهماسب قولى خان لقبه تلقب ایتمشیدی بقیۀ افغانیانی تنکیل ایلک ایچون قندهار جانبنه عزیمت و شاه مشارالیه دخی استخلاص ملک موروث مقصدیه همدانه طوغری تحریک رکاب نهضت ایدوب لکن بغداد وایسی احمد پاشا ایله ترتیب ساز اولدینی بزم رزمده منکسر و مغلوب اولمغله و تبریز شهری دخی تکرار جانب دولت علیه دن صبط قلمغله بالضروره استدعای صلحه ابتدار ایلدیکنه مبنی تبریز و همداه ایالتلری شاه مشارالیه ترك قلمق و روان و شروان ایالتلری طرف دولت علیه ده قالمق اوزره عقد معاهده اولندی نادر علی خان شرائط مصالحیه کسب اطلاع ایلدکده مضمر درونی اولان ایران حکمدارلنك تحصیلنه بونی

وسيله اتخاذ ايدوب ممالك قديمه صفويه كاملاً تخليص قلمقسين عقد مصالحه بي تقيح
وعلاً طعن وتشنيع ايدرك سرعت سير ايله اصفهانه وارد وشاهی خلع ايله شیر خواره
بولنان اوغلنی تخت سلطنته بالاجلاس کندوسی شاه وکیلی نامیله مقام حکمرانی به
متساعد اولدی بعده جمعیت کثیره ايله عراقه هجوم بغدادی محاصره ایلدیکی
خبری مسامع دولته واصل اولدقده ارضروم والیسی صدر سابق طوپاک عثمان پاشا
سرعسکر نصب ومعیته جنود وفیره ترتیب وتسییر قلمغله سرعسکر مشارالیه بیک یوز
قرق التی سنه سی صفر نده بغداده قریب محله محاربه ایدوب عسکر ایران منهزم وپریشان
ونادر علی خان دخی مجروحاً همدانه کریزان اولمسیله عساکر عثمانیه بغداده داخل وبلیه
محاصره زائل اولدی لکن بغداد والیسی احمد پاشا سرعسکر عثمان پاشادن امین اوله مدیغندن
قلت ذخائر عذر یله استئقال ایلدیکنه بناءً سرعسکر مشارالیه بالضروره معیتده بولنان
امرایه اذن انصراف ویروب کندوسیدخی عساکر قلیله ايله عودت ایلدی نادر علی
خان بوزلمغله وجریحه آلمقلمفتور اولور واقدام وغیرتدن کیرو طورور آدم اولمدیغندن
سرعسکر مشارالیه کراکوک طرفلرنده اولدیغنی خبر الدقده جمع ایده بیلدیکی سواری ايله
عساکر عثمانیه به یتشددی دشمنک بوجهله بغته ظهوری وسرعسکر پاشانک خسته
وتختروان ايله ره پیا بولمنسی جهتلرله ترتیب صف و قتاله میدان وامکان قالمدیغندن جیوش
عثمانیه پریشان وسرعسکر مشارالیه دخی شهیداً عازم سوی جنان اولدی ایرتسی سنه
سرعسکر نصب اولنان کوپرلی زاده عبدالله پاشا دخی روان جوارنده واقع اولان صف
مصافده منهزم وبودخی شهیداً داراخرته عازم اولمغله مضافات ایراندن ضبط وتسخیر
اولنان ممالك كاملاً ایادی اعجامه انتقال ایلدی مشارالیه نادر علی خان برقاج سنه دنبرو صیدینه
چالشدیغنی های سلطنتی دام تسخیره رام ایتک زمانی حلول ایلش ایدوکنی درک وتیقن
ایتکله مغان صحرا سنده بر عالی دیوان ترتیب وبالجمله امرا وصنادید اعجامی جمع ایدوب شو
وجهله خطابه آغاز ایلدیکه: دولت ایران محو وپریشان اولمشیکن ثمره تدایرو غالیتمله
اسکی حاله عودت واستیلا دیده اولان ممالك تکرار سلطنت عجمه تجدید مربوطیت
ایلدی بعدازین وطنه رجعت واستراحت ایلک آرزو سنده بولندیغندن اداره امور دولت
ایچون سلاله صفویه دن ویاخود سائر دن بر حکمدار صاحب لیاقت انتخاب ایلمکزی
توصیه ایلرم.

بولك اوزرينه حضارك جمله سی بک زبان اوله رق سندن غیری شاه قبول ایلز دیو ولوله ساز اولدیلر مشارالیه دخی تأکیداً للمقال برقاچ کون تأخیر مصلحت وبالاطراف مطالعه کیفیت ایلملرینی تنبیه ایدوب مؤخر آینه آرزوی سابقلرینی تکرار ایلدکلر نده بئم دخی سزه ایکی تکلیفم وارد برنجیسی بعد ازین سلاله صفویه دن کیمسسه بیعت ایلیه جککزه وایکنجیسی مذهب روافضی ترک ایده جککزه بی تأمین ایله ملیسکز دیمنه مبنی جمله سی بوشر طر اوزرینه عهد و میثاق ایتملریله مشارالیه کمال طنطنه ودارات ایله جالس سریر شاهی اولدی بوندن صکره جانب دولت علیه ایاجیلر کوندروب شاهان صفویه زمانده اولان حدود اوزرینه تجدید معاهده اولمنسی طلب و فقط انار غالبیتی خاقه کوسترمک ایچون سالک اولدینی مذهب جعفری طرف دولت علیه دن تصدیق و حرم شریفه مذاهب اربعه ارکانی مثللو بر رکن تخصیص اولمنسی و حجاج ایران ایله امیرالحاج نصب وارسالنه مساعدیه بیورلمسی شرطلرینی دخی علاوه ایلدی سلطنت سنیه ایران محاربه لرندن اوصامش و بر نتیجه مفیده بی منتج اولیه جغنی بوکره دخی تجربه ایلش ایدو کندن حدود قدیمه ایله تجدید صلحه اظهار موافقت ایدوب انحق مذهب جعفرینک تصدیق و امیرالحاجک شام طریقله اعزامی ماده لری شرعاً و ملکاً جائز اوله میه جغنی بیان و افهام و بو ماده لر ایچون طرفیندن مکرراً علما و سفرا بعث و اعزام قلندی ایسه ده صلحه رابطه ویریه میوب نادر شاه دخی هند طرفلرینه رهمیای صولت اولمغله درت بش سنه قدر متارکه حالنده قالندی

ظهور سفر روسیه و نقض عهد نمچه

روسیه لولر ممالک ایران دن ضبط ایتدکلری دربند قلعه سیله مواقع سائره بی کاملاً نادر شاه رد و اعاده و بوکا مقابل دولت علیه علیه نه اتفاقی و بعض مواد تجارتی حاوی عقد معاهده ایلملریله قریم و بسارابیه حقنده اولان نیت و آرزولرینی قوه دن فعله کتورمک ایچون بیک یوز قرق سکز سنه سی اواخرنده نقض عهد ایدرک بریسی ازاق قلعه سی و دیگر قریم و اوچنجیسی اوزی اوزرینه اوچ بیوک اردو سوق ایلدیلر بو خبر در دولت واصل اولدقده در حال صدر اعظم بولان سلحدار محمد پاشا سردار اکرم نصب و تعیین اوله رق اردوی همایونه طونه یه طوغری عزیمت و بابا طاغی صحرا سنه موصلت ایلدکده نمچه لولر طرفندن اصلاح ذات البینه توسط صورتیله اغفالات وقوعه مبنی مذاکرات

و مجاوبات ایلہ برقاچ آی اصرار وقت اولنوب نهایت متوسط کورینان نمچهلولر بلاشرم و حیابغة اظهار عداوت و طرف طرف ممالک اسلامیہ هجومه مبادرت ایلدیلر سردار اکرم مشارالیه مقدمه ساجدار اقدن دفعة صدرتله چیقمش عجمی واحوال دوتدن بی خبر اولمق حسیله فتق و رتق مصالح وزیر کتخداسی عثمان خالصا افدینک ید استبدادنده ایدی موکب همایون باباطاغی مشتاسنده اولدینی خالده نمچهلولر ایلہ مکالمه اولنور ایکن اوزی و بندر وودین سرعسکرلری طرفدن مهمات حریبه طلب اولندجه و مسقولولرک هجومی و نمچهلولرک حاضر لنقدمه بولندقلری اخبار قلندجه کتخدای مشارالیه تنظیم مصالحه پی مقرر بیلهرک بهوده مال میری اتلاف اولنمه محل یوقدر قریباً ختام مصلحتله اردوی همایون دخی عودت ایدم جکدر مالنده جوابلر ویرمکدیکنه مبنی عکس قضیه ظهورنده صدر مشارالیه معزول و کتخدای مزبور دخی مقتول اولوب بندر سرعسکری محسن زاده عبده پاشانائل صدارت عظمای اولدی

روش حاله باقلنجه بیچاره عثمان کتخدا غایت متصرف و صادق غافل بر ذات اولوب اموال میریه پی صیانت ایدمیم دیر ایکن هم دولتک وهم کندوسنک باشنی بلایه اوغراتدینی اکلایلور بروجه محرور اسباب مدافعه نک مکمل بولنماسی ازاق و اوزی و قلوبرون قلعه لرینک ایادی دشمنه کرفتار اولسنی مستلزم اولدی قریمه هجوم ایدن مسقولولر اگرچه درون جزیره یه پای اندازتعدی اوله بلدیلر ايسه ده اهالی قریم عیال و اولادلرینی صعب المرور طاغلره چیقاروب محصولات ارضیه لرینی دخی کندو اللریله یاقش و دشمن عسکرینک اطرافدن ایرلیوب علی الدوام اضرار و تعجیزه نصب نفس اهتمام ایلش اولدقلرندن کرک قلت ذخائر سبیلله و کرک اهالی مزبور نک تسلطلری ثمرسیله یکریمی بیکدن زیاده مسقو عسکری تلف اولدیغندن و کفه یه دخی فوج فوج عساکر عثمانیه ورود ایتکده بولندیغندن چار ناچار رجعته مجبور اولدیلر ومدن و امصاری احراق و تخریب ایدرک کلدکلری یولدن عودت ایلدیلر

مع مافیہ بهادران ناتار عقبگیرلکده بک زیاده غیرت و اقدام ایللریله نتیجه هجوم روسیه لولرک تلفات کثیره سندن و قریمک خرابیسندن غیری برشی مفید اولدی

نمچهلولر دخی نیش و بوسنه وودین جهتلرینه اوچ قول اردو سوق ایدوب فرقه اولی نیشک تسخیرینه مقتدر اولدی ايسه ده مفصلات تواریخده مسطور اولدینی اوزره

بوسنه اوزرینه کلان و بیوک اردولری حکمنده بولنان فرقه جسیمه یی بوسنه والیسی صدر اسبق حکیم زاده علی پاشا کندو دائرہ سی خلقی وایالت بوسنه نک زعما وارباب تیماری وکوکالی عسکری ایله قارشولیوب لدی المحاربه انهزام فاحش ایله منهزم ایلش وودین جهتیه هجوم ایدن دشمنیده و دین سر عسکری عوض محمد پاشا تدمیر و تنکیله موفق اولمش اولمغله وروم ایلی والیکیه نیش استخلاصنه تعیین اولنان کوپرلی زاده صدر شهید مصطفی پاشانک اوغلی احمد پاشا دخی موفقیت آبا واجدادینه تردیفاً قلعه مرقومه نک فتح واستردادینه ظفر بولمغله درجنک اول نمچه لولر هر طرفده مظهر قهر و نکال اولدیلر

سنه سابقه ده موسم شتانک حلولیه اردوی هایون استانبوله عودت ایلد کده صدر اعظم عبدالله پاشا معزول و یکن محمد پاشا مقام صدارته موصول اولمشیدی سفرک اوچنجی سنه سی یعنی بیک یوز الی او اخرنده صوفیه جانبیه طوغری عزیمت ایلدی روسیه لولر بوسنه دخی قریم و بندر جهتلرینه ایکی اردو سوق ایتمکله برنجی فرقه اور قلعه سنی ضبط ایدوب کچن سنه کی کبی درون جزیره کرمک فکرنده ایکن قریم خانی منکلی کرای خان ایله کفه سر عسکری محمد پاشا مجتمعا قارشولیوب برقاج کون محاربات و مقاتلات وقوعدن صکره اعاده دشمنه موفق اولدقلری مثلاً فرقه ثانیه یی دخی بندر سر عسکری نعمان پاشا طورله کنارنده مدافعه وارجاع ایلش واشبو ایکی فرقه نک کرک محارباتده و کرک عقبگیرلر جانبندن ایقاع اولنان اضرارده کلیتاً تلفاتلری واقع اولدیغنه و بوجهتله مقدا استیلا ایلدکلری اوزی و قلوبون قلعه لرینی محافظیه قدرتلری قالمدیغندن بالتخلیه فرار ایتمش ایدوکارینه بناء سر عسکر مشارالیه جانبندن مذکور قلعه لره درحال جیوش اسلامیه ارسال و ادخال و اسباب حفظ و حراستلری استکمال قلندی

ودین سر عسکری عوض محمد پاشا طونه نک قارشو طرفه کچوب مهاده و خرشوه جانبلرنده بولنان نمچه اردولرینی منهزم و پیریشان ایلش اولمسيله موکب هایون بلا مانع طونه نهری دروننده بولنان و نمچه لولر جانبندن استحكامات قویه ایله تحکیم و ترصین قلمش اولان اطه قلعه سنک محاصره سنه مباشرت ایدوب محاربات شدید و قوعیله فتح و تسخیر قلندی و اردوی هایون بر سابق مشتانشین اولق اوزره استانبوله عودت ایلدی

روسیه لولر ایله باب محاربه کشاد اولمنسی متعاقب اصلاح ذات البین ایچون انکتره وفامنکلور عرض توسط ایتمشلر ايسه ده مسقولر جانبندن قبول اولنمیوب نمچه لولرک

توسطی اختیار اولمیشیدی انلرک حقانیت واستقامت لرینک درجه سی معلوم انام و عنایت باری
ایله دولت علیه نك غایاتی نمایان اولدقدن صکره فرانسه ایلیچسی اظهار توسط ایتمه
باشلادی واطه قلعه سنک فتحی عقبیده ارتق دولت علیه تمامیه ا کمال ناموسه و دشمنلرینی
قهر و تدبیره موفق اولمش اولدیغندن بحثله صلحه مساعدده ایلمسینی تکریر و موافقت اولمیشینی
حالده بالضروره کندولری دخی حربه داخل اولمق مجبوریتنده بولنه جقلرینی علی طریق
الاخلافه تذیل ایلکه اغازایلدی وکلای دولت عصر سابق واسبقده ایکی دفعه واقع اولان
نمچه محاربه لرندن دولت علیه ترتب ایدن مضراتی درپیش مطالعه ایتمه کله کوزلری قورقش
اولدیغندن اشبو سفرك هیئت سابقه اوزره مبدل صلح اولسنه قائل اولدقلری حالده سنه
سابقده واقع اولان مظفریتلر و باخصوص اطه قلعه سنک فتحی مثللو موفقیت فاخره
ونمچه لولرک صراحة وقوع بولان طاب واستدعالری اوزرینه عقد صلح اولمسنی جانه منت
بیالورلر و سوق و ترغیب ایدرلرایدی لکن صدراعظم بولنان یکن محمدپاشا غیور و غیر
مفتور برذات اولدیغندن بلغرادک تخلیصیه نمچه لولرک طونه نك قارشو جانبیه طرد و ابعادلری
خصوصنه نصب نفس اهتمام و بوبابده سینۀ صداقتی هدف سهام مخاطرات و دشنام ایدرک
دوام حربه مجاسرت واطه قلعه سنک تسخیری ایچون اختیار اولنان بو قدر تعب و تلفات
مجرد بلغرادک فتحنه یول بولمق و نهراً نقل مهمات و ذخائر اولنه بیلمک مقصودینه مبتنی
ایکن بلا حصول مطالب عقد معاهده موجب اضاعۀ وقت و فرصت دردیهرک عرض افکار
غیرت و حمیه جرأت ایتمه کله فرانسه ایلیچسی لیت و لعل ایله آویدیلوب اردوی هایونک
اکمال لوازمه اقدام اولتور ایدی موسم حرکت تقرینده بغتۀ صدر مشارالیه مزول
وودین سرعسکری عوض محمدپاشا مقام صدارته موصول اولدی ایسه ده صدر سابقک
طوتدینی طریقک تغییرینه زمان و امکان قالمدیغندن بالضروره موکب هایون قائممقام شهلا
احمدپاشا ایله بیک الی بر سنه سی اواخرنده استانبولدن اخراج وادرنده صدر جدید
تسلیم اولندی

نمچه لولر بوسنه قوه عسکریه لرینی جهات عدیده یه تفریق ایتوب مجتمعاً بلغرادک
محافظه سی طریقنده قوالانمغی قرارلشدیرمش اولملریله یتش سکسان بیک کشیدن عبارت
جسیم بر آوستریا اردوسی بلغرادک ایکی ساعت خارجنده استحکام ایچنه کیروب
عساکر اسلامیه نك ورو دینه مترقب اولمشلر ایدی موکب هایونک درت بش

ساعتك محله ورودینی خبر آید قلرندن شبخون ایلک قصدیله استحکامدن چیقداقلری صدر اعظمك تحقیق کرده سی اولغین اول کیجه که بیک یوز الی ایکی سنه سی ربیع الاولنک اون بشنجی کیجه سیدر دشمندن اول بازارجق بوغازینی طوتمق ایچون اولاروم ایلی والیسی علی پاشا و متعاقباً یکچیچری نفراتی و سائر طوائف عسکریه طاقم طاقم سوق اولنوب صدر اعظم دخی کیجه ساعت بشده حرکت ایلدی فرقه اولی دها شفق سوکسزین ذکر اولان بوغازه واصل و قارشو جانبیدن دشمن الیلری دخی ظاهر اولغله اعمال اسلحه به مباشرت قائمیدی و پیدرپی طرفینک عسکرلری یتشمکله کیتدکجه اتش حرب و قتال کسب اشتداد ایلدی حاصل کلام ایرتسی کون اخشامه قدر اون یدی ساعت جنکه دوام اولنوب خیلولیت ظلمت شام ترک مکافجه بی استلزام ایلدی ایسه ده وزرا و امرا و صنوف عسکریه بولندقلری پرلرده آرام و محافظه مواقع مهمه به اعتنا و اقدام ایلدیلر .

انسانای محاربه ده اوستریا قوماندانی اولان پرنس والس یاره لنوب معیتده بولان اردونک ثانی مرتبه سی دخی تلف اولغله بالکلیه منهزم و پریشان اولق درجه سنه کلشیکن اخشامه قریب یکرمی بیک قدر امداد ایله برجنرال یتشه رک و درحال قوماندانی الهه الهرق وقت شاه قدر طیانمش ایسه ده بعد ازین قدرتیاب مدافعه اوله میه جغنی اکلا دیغندن کیجه قراناغنده رجعت واکثر مهماتلرینی ترک ایدرک و یوللرده دوکدک عودت ایلدی و مقدما انشا ایتدکلری استحکاملرده طورده مدقلرندن بشقه بلغرادده دخی آرام ایدمه میوب مدود اولان کوپریلردن قارشو جانبه فرار ایلدیلر .

بناء علیه موکب هایون بازارجق صحراسندن حرکت و بلغرادک محاصره سنه مسارعت ایدوب نیچه لولر ایسه منهزم اولان اردولرینک رجعتی ائلا خاطره کتورم دکلرندن ناشی بلغرادک تحکیمه چندان اعتنا ایتماش اولمیرله قلعه مرقومه نک ویره ایله تسلیم اولمشی مذاکرتی ضمننده اردوی هایون ارکانی بش التی کون اغفال ولوازمات مدافعه بی استکمال ایلدکدن صکره جنک و حربه مباشرت ایلدیلر .

مقدما عرض توسط ایدن فرانسه ایاجیسی اردوی هایون جانبندن دعوت اولنوب نیشه ورودنده نتیجه حرب تعین ایدنجه قدر اوراده توقیف قلنمشیدی عون حق ایله دشمنک بیوک اردوسی تدمیر و باغراد قاعه سی محاصره ایدلمش اولدیغندن ایاجی مومی الیه مسکر پادشاهی به جلب اولنوب برطرفدن جنک و حربه اقدام و بر جانبندن سلطنت سنیه نک

شاننه موافق صلحدن امتناع ایتیه جکی ایلچی مومی الیه واسطه سیله افهام اولنور ایدی .

فتح بلغراد و عقد مصالحه

بو ورتله ایام محاصره قرق کونه تقرب ایلدیکی حالدده بلغراد و صربستان و جاسار افلاقی دینسلان یرلر و ایرشوه اراضیسی جانب دولت علیه یه ترك و تسلیم قلمق شرطی و شرائط سائرله عقد مصالحه قرارلشدیریلوب بیک یوز الی ایکی سنه سی جمادی الاولیسی اواخرنده تمسکله مبادله قلندی و بش کون صکره جیوش اسلامیه بلغراد داخل اولدی .
قوریر نامیه فرانسه ایاجیسنک یاننده بولان مسقو مأمورینک عقد صلحه مأموریت و مأذونیتی اولدینی افاده اولسدیغندن انک ایله دخی عقد مجلس مذاکره قیازوب ازاق قلعه سی هدم و اراضی قدیمه سیله دولتین بیننده حد فاصل اعتبار اولنق و قبار طایلر سابقی مثلوهیچ برطرفه تابع اولیوب باشلو باشلرینه قالمق و روسیه لولر ازاق دکنزنده جنک سفینه سی انشا ایتماک شرائطی و حدود قدیمه اعتباریله انلرایله دخی تنظیم مصالحه اولندی .

یتیم سگسان بیک کشیلک برمسقو اردوسی خوتین جوارنده رونما اولمغله بنسدر سرعسکری تحت قومانداسنده اولان عساکر اسلامیه ایله مدافعه سنه مباشرت و برقاچ کون اعمال ادوات حرب و جنک ایله کرکی کبی تضییقه همت ایتمشیکن اوزو والیسی کنج علی پاشا قبوسی خلقی و معیتنده بولان بیک قدر بوستانجی نفراتیه خلاف امر سرعسکری هجومه ابتدار و درجنک اول دشمنک بوستانجی نفراتی احاطه ایلدیکنی مشاهده ایلدکده بچاره لری تخلیصه غیرت ایتک شویله طورسون اوزی به طوغری فرار ایتمکله بو کیفیت جیوش اسلامیه نك رجعتنه بادی و خوتین قلعه سنک گرفتار ید دشمن اولسنی مؤدی اولدینی خبری موکب هایونک عودتی انناسنده وارد اولدی و عقد صلح اولنق حسیله هر نقدر بووقعه نك موجب تلاش اولماسی لازم کلور ایسه ده احتیاطاً لزومی مقدار امرا و عسکرار سال قانه رق اردوی هایون استانبوله عودت ایلدی .

محاربات نادر شاه

درت سنه قدر کمال آسودکی ایله امرا و وقت اولنمقده ایکن هند طرفلرنده

غلبات کثیره و اموال و فیریه دسترس اولان نادر شاه اولخوالیجه ایشنی بتوردکن
 و جمعیت و اقتدارینی تزید ایلدکن صکره بیک یوزاللی الی سنه سی بعتہ عراقه مهاجمه
 نمای ورود اولوب کرکوکی ضبط و بغدادی محاصره ایلدیکی خبری در دولته واصل اولدقده
 صدراسبق شهلا احمد پاشا شرق سرعسکری نصب و ممیتنه صنوف عسکریه دن جیوش
 وافیه ترتیب اولندیغندن ماعدا صدراعظم بولان اغا حسن پاشانک دخی اردوی همیونله
 عراقه طوغری حرکتی اسبابنه تثبث اولمشیکن شاه مشار الیهک بالذات موصل قلعہ سی
 اوزرینه هجومنده محافظی بولان عبدالجلیل زاده حسین پاشانک مدافعه دایرانه و تدابیر
 حیثکارانه سیله هزیمت کامله یه کرتار والی بیک قدر مقتول براغهرق رهروادی ادبار
 اولدینی پیام مسرتی توارد ایلدی بروجہ محرر اضر و مده احمد پاشا اردوسی اجتماع
 ایتمکده اولق حسیله شاه مشار الیهک عراقده پایدار اوله مامسی طیبی اولدینی حالده کمال
 نخوت و غرورندن ناشی اضطراب حافی اخفا و مقدماته سبب شاه محاربه سنده ضبط
 و بغداده نقل اولان اون بش یکریمی قطعه طوپ کندوسنه تسلیم اولنور ایسه بغداد
 اوزرندن رفع بار ثقلت ایدم جکفی والی ولایت اولان احمد پاشایه انها ایلدیکنه مبنی
 شرو و مضررتندن عباد الیهک تخلصی مطالعه سیله مسؤلنه مساعدده اولندی و القوب ازربایجان
 طرفه طوغری عزیمت ایلدی

سرعسکر احمد پاشا معیتنده بولان امرا و صنوف عسکریه یی مستصحباً الی یدی
 سنه سی اوائلنده قارصه واصل و نادر شاهک دخی عساکر کلیه ایلکده ایدوکنه کسب
 اطلاع ایله جوار قلعده اردوسی استحکام التنه الهرق مترقب ظهور دشمن اولمشیدی
 شاه مشار الیهک ورودیله برابر محاربه یه مباشرت وایکی آی قدر اعمال ادوات حرب
 و جنکه مبادرت اولنوب بعده شهر رمضان شریفک حلولنی شاه مشار الیه وسیله ترک حرب ایدرک عودت
 ایلدی اگرچه طرفینده غالبیت و مغلوبیت تعین ایتمامش ایسه ده احمد پاشانک میدان محاربه سنه
 جرأت ایدم مامسی نزد دولته قرین پسند اولما غله خدمت سرعسکری صدراسبق یکن
 محمد پاشایه تفویض قلندی ابرتسی ییل که بیک یوز الی سکر سنه سیدر سرعسکر جدید
 روان ایله قارص بیتنده نادر شاهی محاصره و اوچ درت کون تضییق ایدوب حتی شاه
 مشار الیه اقبالنک غایتہ واستدراجنک نهایتہ واصل اولدینی قفوه ایله اظهار اضطرابه
 مضطر اولمشیکن بحکمة تعالی سرعسکر مشار الیه درجنک اول علت حما ایله محموم

و کتدکجه مشد اولمغین بو کیفیت موکب سر عسکری نک اجزای متممه سندن بولان لوندات طائفه سنک عتو و طغیانلرینه بادی و مضمر درونلری اولان غارتک اجراسنه سبب عادی اولمغله اشقیای مرقومه نک عجم باصدی غلغله سیله طوائف عسکریه یی پیچتابه گرفتار و مقتدر اولدقلری مرتبه ده اردوی هایونی یغما ایدرک فرار ایللری عسا کر سائر نک دخی انهمزانی مستلزم و بو وقعه نا که ظهورک اندوه و آلامیله ایرتسی کون سر عسکر مشارایه دخی سمت عقبایه عازم اولدی .

عقد مصالحه عجم

نادر شاه تنگنای اضطرابدن خلاص اولمسیله برابر من غیر مأمول اگر چه بویله بر غلبه یه دخی مظهر اولدی لکن جانب سلطنت سنده دن تدارکات حربیه یه اقدام قلمسنه و حکیم اوغلی علی پاشا مجدداً سر عسکر نصب اولمسنه نظراً مطالب سابقه سی بو کره دخی قبول ایتدیرمه جگنی و بین العجم اسکی شان و رونق قالمدیغنی استدلال ایله طالب مصالحه اولدیغندن سلطان مراد رابع حدودی اساسیله بیک الی طقوز سنه سی او اسطنده عقد صالح اولندی و جوق کچمکسزک بعض امراسی خیانتیله شاه مشارایه کشته تیغ فنا اولوب کشور ایران ازسرنو شورش و اختلال ایله مالا مال اولمش ایسه ده جانب سلطنت سنده دن مداخله و تعرض اولندی .

بوندن صکره سلطان محمود خان حضرتلرینک بقیه ایام سلطنتی کمال شان و عظمتله مرور ایدوب بیک یوز التمش سکنز سنه سی صفر نده جمعه سالامغندن عودت و تیمور قبودن سرایه دخول ایدرایکن آت اوزرنده ارتحال دار بقا بیوردیلر نور عثمانیه جامع شریفنک اتمامی قوه قریبه یه کتورمش و تربه مخصوصه دخی بنا ایش اولدقلری حالده جانشینلری اولان برادرلری سلطان عثمان خان ثالث حضرتلری جامع مذکور ی تملک ایدنمک عزیمتله مرحوم مشارالیه ی تربیه دفن ایتدیرمیوب یکی جامع تربه سنه کوندرمش و جامع شریفی کندو نامنه تخصیص ایش ایسه ده سلطان مصطفی خان ثالث حضرتلری دخی انی یکی جامع تربه سنه دفن ایتدیرمکله نور عثمانیه تربه سی خالی قالمشدر .

خاقان مغفور سلطان محمود خان حضرتلری اوتوز بش یاشنده جالس سریر سلطنت ویکرمی بش سنه حکم فرمای ممالک دوات اولوب هنگام سلطنتلری دولتک اوان انحطاطیه

تصادف ایتمشیکن مدت دولترنده ضایعات ملکیه واقع اولدیغندن ماعدا بلغراد وسمندره واطه قلعه لرله صربستانی نیچه لوردن استرداده موفق اولمشدر ثبات اقوال و افعال ایله موصوف و فن موسیقی و لعب شطرنج ایله مألوف برپادشاه اولوب مهتاب کیجه لرنده سیر دریایه بغایت مائل ایدیلر یکریمی سنه قدر مستشار مؤتمنلری اولان دارالسعاده اغای حاجی بشیر اغا مرجع امام اولوب هر طرفدن تقدیم اولسان نقود و هدایای اغور هایونه فدا و فضله سیله استانبول و ازمیر و سائر یرلرده مبرات کثیره و انبیه جسیمه انشا اولمشدر حتی اولوقتلرده دفتردار اولان عاطف افندی مرحومک مصارف ذاتیه دفترلرنده هر آی اغای مشارالیه بیکر التون تقدیم اولنه کلدیکی مشهود فقیر اولمشدر اغای مشارالیه خلف اولان حافظ بشیر اغا سانی کبی حسن اداره و اعتدال معامله یه قادر اوله میوب باخصوص توابعانندن اولان مشهور سلیمان ارخای عنان ایتمکه و مزبور دخی اطوار مغروران و افعال ملعونانه بی مرتبه کماله ایصال ایتمکه سوبسو کفتکو حدوتنه باعث و طوائف عسکریه نک و قعنه و قواقیه کبی بر حال ظهوره کتورملری اماراتی حادث اولدیغندن در حال اغای مشارالیه ایله مزبور سلیمان و امثاللری قتل و اعدام و منسوباتلری دخی نفی و اجلا قلندی اواخر سلطنتلرنده واقع اولان اشبو حادثه مدهشدهن بشقه احوال ردیه ظاهر اولماشدر .

سلطنت سلطان عثمان خان ثالث

پادشاه مرحومک برادری اولان سلطان عثمان خان ثالث حضرتلری الی سکزیاشنده جالس سریر سلطنت اولوب کرک برادرلری مرحومک و کرک کندوسنک اولادی اولماغله و بوقدر مدت حرمسرای پادشاهیده تنها نشین اولدیغندن مزاجلرینه تهو و طبیعتلرینه تغیر کلمکه دائماعزل و نصب و کلا ایله مشغول اولوب بونک دخی سبی شهزادکانه سوء قصد عزمنده بولتمسندن منبعث ایدوکی مشهور ایدی حتی حکیم اوغلی علی پاشایه برکون کمال غضبه (بن شمدی سنی عزل ایدرو حمالر کتخداسی علی اوسته یی وزیر ایدینورم) دیدکده (اوت یاپار سکز لکن حمال علی پاشا اولور حکیم اوغلی علی پاشا اوله مز) دیدیکی منقولدر بو حالله بناء اوله مسبوق الخدمه غازی بروزیری اوچ آیه وار مقسزین عزل ایدوب قتل ایلک نیتیه قیز قوله سنه حبس ایتمشیکن والده سلطان شفاعتیه خلاص اولمشدر مشارالیه

سلطان عثمان خان حضرت تلی اوج سندن ایکی کون نقصان سلطنت سورد کدن صکره بیک یوز
یتیمش بر صفر نده مرتحل دار اخرت اولمغله سلطان احمد خان ثالث بیوک شهزاده تلی
سلطان مصطفی خان ثالث حضرت تلی زیب آرای دیهیم عثمانی اولدیلر .

سلطنت سلطان مصطفی خان ثالث

پادشاه نوجاه حضرت تلی عقل و درایت ایله متصف و کمال تصرف و امساک ایله متخاق اولد قلدن
خزائن کثیره جمع و ادخار ایتک و فنون مغیباته بغایت رغبت و اعتماد تلی بولمق و طالع لرینی
سعد و هروجه له غلبه یه مساعد کورمک جه تلیله و یتیمش سکسان سنه دنبرو روسیه لولرک
ممالک اسلامیة حقنده اولان سوء نیتلری آن بان تجسم ایده کلمسیله مسقولو اوزرینه اعلان
حرب ایتکی تصمیم ایدر لر ایدی لکن صدر اعظم بولنان راغب پاشا بر فاضل حکمت بین
و فیلسوف رند آیین اولدیغدن عساکر افرنجیه نک کسب ایلدیکی انتظامی و بالعکس جیوش
عثمانیه نک حاصل ایتدیکی اغتشاش و عدم انضاطی مقایسه ایدرک تین ایدن نتیجه بی تعبیرات
حکیمانه ایله عرض و افاده ایتکده و بعض مشاغل ارانه سیله کچشدیر مکده ایدی فقط
بوابده اقتضا ایدن اسباب مدافعه بی استحضر ایلدکجه هر نقدر سرفردن اجتناب اولنسه
و طریق مسالته کیدلسه اکمال لوازم ایلد کدن و وقت وزمانی بولدقن صکره خصمک اجرای
تصمیماتدن کیرو طور میه جفی بدیهی اولدینی حالد راغب پاشانک تجدید نظامات عسکریه
و تنظیم لوازم حربیه خصوص لرینه اعتنا ایتیه رک یالکز کندو وقتک خوشبجه کچمسنه
حصر همت ایلمسی یا بالکلیه امید سز لکندن و یا خود ملحوظ اولان مخاطرات خوفندن ناشی
اولوب سنجه دخی ماین ستین و سبعین بولمسی بوکامضم اولمش دنیله بیلور ایسه ده علی
کلا التقدیرین مشار الیه موجب نقیصه عدا اولنسه بمجادر

ظهور سفر روسیه

بیک یوز یتیمش بش سنه سنده زوجنی اعدام ایله نائل تخت ایمپراطوری اولان مشهوره
قترینه فتوحات فاخره و اجراءات نافعه ایله روس ملتک حسن توجهنی قزانمغه محتاج
اولدیغدن له امورینه مداخله ایتکده و مسقو دولتک تاتارستان و ترکستان حقنده اولان

نیت استیلا کاریسنگ قوه دن فعله چقارلمسی اسبابنه تشبث ایلدی له بکزاده لرندن برقاچ
کشی عرض محضر لر ايله استانبوله کلوب روسیه لونک خلاف عهدنامه اوله رق له دواقی
امورینه مداخله ولهستانه عسکر ادخال ایلمسی غصب مقصدینه مبتنی ایدوکنی وبوندن
صکره دولت علیه ممالکنه اطاله دست تعدی ایدوچکنی ادله قویه ايله سرد واتیان
وسلطنت سنیه روسیه نک کسر تسلطنه همت ایدر ایسه شکرانه لطف اوله رق بودلیا ایالتی
دولت علیه ترک واهدا ایدوچکلرینی بیان ایلدیلر برطرفدن فرانسه ایلچیسی دخی
کندو بولتیقه لری ایجابجه حربه تشویق ومسقولولرک نیت وتصمیملرینی ایصال مرتبه
تحقیق ایتمکله بوبابده ارکان دولت عقد انجمن مشورت ایدوب کشاد سفر پادشاهک
مطلوبی اولدیغنی بیانلر کسب تقرب واقبال ایلک مقصدیله مزاج هایونه تبعیت واطهار
صلابت ايله امرحربی تسهیل ولزومنی تصویب وتذکیر ایدوب بعضیلری دخی روسیه لو
دولت علیه ايله حربی اختیار ایتز ومعسکر هایون طونه یه وارمقسزین لهستانی تخلیه
ایدر وبودلیا ایالتی کبی کثیرالمنافع برملکت قولایاقله کشور دولت علیه ملحق اولوردیدیلر
صدراعظم بولنان محسن زاده محمد پاشا پدریله اسکی سفرلرده بولنش ومدت مدیده
اوزی وخوتین محافظالقلندرده استخدام اولنش اولدیغندن احوال سفر وسرحدات واقف
ودشمنک قوت وسطوته مطلع اولمق حسبیه لازم کلان محاررده ذخیره ادخار اولنمقسزین
وحدودده بولنان قلاعک تحصین وتحکیمنه اعتناقلنمقسزین دفعه اعلان حرب اولنمک
خلافنده بولندیغندن ناشی معزول واناطولی والیسی سلحدار حمزه پاشا مستد وکالت
عظمی یه موصول اولدی شیخ الاسلام ولی الدین افندی صدر سابقله هم افکار اولدیغنی
حالد بحکمته تعالی اوکونلرده فوت اولمغه حرب طرفلورلرندن پیری زاده عثمان ملامقام مشیخته
اعتلا ایلدی صدر جدیدک استانبوله وصولندن برهفته مرورنده حضور هایونده مشورت
عمومیه عقد اولنوب کشاد حربیه قرار ویرلمسنبنی بیک یوزسکسان ایکی سنه سی وواخرنده
روسیه ایلچیسی باب عالی یه جلب ايله لهستاندن مسقوعسکرینک اخراجی وله امورینه مداخله دن
بالکلیه کف یدایلری دولت علیه نک مطلوب قطیسی ایدوکی بیان ولهلو فرقه لری تعقیب
انساننده مسقوعسکرینک بالظوه نام محله تجاوز وایصال خسارت ایتمش اولملری
جهتیه واقع اولان ضررک تضمینی درمیان اولندقدده ایچی مومی الیه بوبابده دولتندن
تعلیمات جلب ایلک ایچون طلب مهلت ایش ایسه ده بودخی بهوده اضاعه وقتی موجب

اولوردنیلهرك ایلچی مومی الیه یدی قلهیه حبس اولندی زیرا اولعصرک حکمنجه تاتار و سائرهدن روسیه ممالکینده خلیججه تجار بوانه کلدیکنه مبنی انلرک سلامته بلاداسلامیهیه خروجنه قدر الده رهن بولمق مقتضی ایدی حمزه پاشانک شعورنده اختلال مشاهده اولندیغندن مدت صدارتی برآیه وارمق سزین منفصل ورئیسلیکدن ربه وزارتله نشانچی نصب اولنان یاغلقچی زاده امین پاشا صدارت و سردار اکرم ملک مقامنه واصل اولوب بیک یوزسکسان ایکی سنه سی ذی الحجه سنه ده جیوش عثمانیه یی مستحصباً طونه یه طوغری عزیمت ایلدی

کافه مورخین سلطان مصطفی نک بوسفری آچسندن طولای اعتراض و محسن زاده نک اکر مطلقاً باب حرب کشاد اولنه جق ایسه باری سرحداتک ذخائر و سائر لوازمی استکمال اولمق ایچون برسنه قدر مخایره ایله امرار وقت اولنسون دیدوکنی ایراد ایدرلر واقعا بوصورت موافق نفس الامر ایدیه ده الی التمش سنه دبر و مسقولولر ممالک تاتار ولهی ضبط ایلمک ایچون حاضر لمقده و امپراطور یچه اولان قترینه دخی قوه دن فعله چیقارمق عزمنده اولدینی نزد دولته مجزوم اولوب حتی عاطف افندی کتابخانه سنده بررساله منظور فقیر اولمش درکه مالی مسقولولرک ازاق دکزنده وقوبان و اوزی نهرلری جوارلرنده متشبث اولدقلری تدارکات جسیمه یی واسباب مدافعه سی توجه الیه استحضار واستکمال قلنمغه محتاج ایدوکنی متضمن اولوب سلطان محمود اول زماننده قلمه التمش اولدینی نمایاندر ایش بومرکزده اولدینی حالده کرک قریم حوالیسنه و کرک اوزی و بندر قلعه لرینه و باخصوص ساحلدن اوتوز قرق ساعت ایچروده بولنان خوتین قلعه سنه استحکام ویرلمک واسباب مدافعه استکمال قلنمق شویله طورسون لایقيله ذخائر و مهمات حربیه و عساکر مستحفظه بیله وضع اولنما مشیکن هر نه صورته مامشات اولنسه البته برقاج سنه ظرفنده کانون حرب و قتال شررافشان اولمق مقرر ایدی غایتی سلطان مصطفی نک تشبثاتی تعجیل حربی مؤدی اولدی موکب همایون طونه یی عبور ایله بندره عزیمت و صکره خان تپه سنه عودت ایدوب مسقولولو دخی طورله نهرینی بالمرور خوتین قلعه سی محاصره ایلمش ایه ده مولدوانجی علی پاشا و قریم خانی دولتکرای خان عسا کر کلیه ایله ارسال و مسقولولر عودته اجبار اولندیغندن طورله یی قارشویه کچوب ممدود اولان کوپر یلرینی رفع ایلدیلر سردار اکرم امین پاشا پیمانه پیمان کلیاً قیریلوب

دو کلمکسزین مصلحتہ بر نتیجہ ویرملک امیدیاہ روسیہ ایلاچیسنی معاً استصحاب ایتیشیکن انعکاس کائس تخیل ایله دم بسته وسوق اولنان جیوش کلیہ یه کافی ذخیرہ ادخال قلمدیغندن اداره جه اولان عسرت وانظباطجه کوریلان نواقص المیلہ خستہ اولدیغندن استغفای متضمن بعض تعبیرات ایله تقدیم معروضات ایلشیدی بناءً علیہ سکسان اوچ سنه سی ربیع الاخرینک طقوزنجی کونی معزول ومقام صدارتہ مولدوانجی علی پاشا موصول اولدی

اردوی همایوندن قاجوب کلان طوائف عسکریه طفره فروشلی امین پاشانک بطائندن شکایت واکر عسکره رخصت ویرسه روسیه پی مضمحل ایدر ایدک دیرک سترعیوب فراره مباشرت ایلر یله احوال عالمدن بیخبر سرای اغوانی بیننده بو کفتکو کسب اهمیت ایدرک طوائف عسکریه پی تلطیف مقصدیله بیچاره امین پاشا کشته تیغ قضا اولدی

مولدوانجی علی پاشا خوتینده اعمال عسکر ایله مشغول ایکن موسم حریفده نائل صدارت اولوب شتانک تقریبندن ناشی مسقولونک طرد ودفعی موفقیتیه اکتفا ومشتایه عودت خیرلی اوله جنی اصحاب اراجانبندن القا اولنسی اوزرینه کندوسی دخی بوصورثی تصویب ایلش ایسه ده خوتین صحراننده التمش یتمش بیک قدر عسا کر مجتمع وبلا محاربه رجعت ایاسه سالفنک تهمتیه متهم اوله جنی بدیهی اولدیغندن بالضروره طورله نهری اوزرینه کوپری قوردیروب قارشو طرفه اصرار عسکر ایلدی اولحوالیده بولنان روسیه فرقه لری کرکی کی تضیق اولنوب حتی بو خبرلرک شیوعندن ناشی پترسبورغده قترینه علیهنه اختلال اماره لری ظهوره کلمشیکن بحکمته تعالی برقاچ کون ممتد اولان باران سببیه طورله نهری طاشوب کوپری پی شکست ایلدیکندن قارشوده بولنان عسکرک برمقداری تدارک اولنه بیلان قایقلا ایله برویه النوب ماعداسی ومهمات کلیه محو وپریشان اولدی بو کیفیتک وقوعی وشتانک حلولی سببیلر یله طوائف عسکریه طاقم طاقم فراره باشلادقلرینه وفقدان ذخائر ومهماتدن ناشی خوتین قلعه سنه وضع عسکر ومحافظ ایلک ممکن اولمدیغنه مبنی قلعه مرقومه بلاجنک وجدال ترک اولنه رق هزار اندوه والم ایله صدر اعظم خان تپه سنده اولان اردوی همایونه واورادن دخی مشتا اتخاذ اولنان باباطاغنه رجعت ایلدی مسقولولر خوتین قلعه سنی ضبطدن صکره بغداد وافلاق ایچنه یاییلوب فقط اوزی وبندر قلعه لری اوزرینه هجوملرنده مغلوب ومنکسر اوله رق چکیلوب کیتدیلر .

انهزام اردوی همایون

صدر اعظم مولدوانجی علی پاشا درت آیدن زیاده جه مسند صدارتده بولنوب خوتین

قلعه سنك تركي تهمتيله سنه مزبوره شعباننده معزول و عوض پاشا زاده خليل پاشا صدره
 صدارته اعتلا ايدرك بابا طاعی مشتاسنده بولنان معسكر هايونه داخل اولدى اولهار
 حلوننده قريم خانى ايله بغداد سرعسكرى عبدی پاشا ياش استخلاصى نيتيله حرکت
 و درجنك اول خان تپه سنده بولنان روسيه فرقه سنك طرد و تنكيسنه مباشرت ايدوب
 لکن دشمن استحکام التده بوانديغندن ظفرميسر اولماغله و روسيه قوماندانى رومانچوف
 اطرافنده بولنان عسکرى جمع ايدرك يکرمى يکرمى بشيك کشيدن مرکب
 براردوايله کلکده ايدوکى استخبار قلنمغه موکب هايونندن استمداده باشلاديلر
 بناءً عليه يکيچرى اغاسى قيو قيران محمد پاشا بالجمله يکيچرى نفرا تيله اعزام
 و قرتال صحراسنه امرار قلندى لکن دشمن بونلرک اجتماعنه ميدان و يرميوب بغته
 عبدی پاشا اردوسنى باصوب پریشان ايلديکندن يکيچرى اغاسى بوانديغنى برده توقف
 وبالذات صدر اعظمک و رودى لزومنى اشعار ايلدى بوسنه طونه نهري فوق العاده طاشديغندن
 جسرا ناسانه مقتدر اولنه مامسيله صدر اعظم اردوسنك قارشويه نقلی مشکل و مخاطره لى
 اولديغنى درکار ايسه ده قارشوده بولنان او قدر جيوش اسلاميه بي حال اضطرابده ترك ايتمک
 دخی قابل اولمديغندن بيک يوز سکسان درت سنه سى ربيع الاخرى اوائلنده اجيق تعبير
 اولنور مراکب نهريه ايله ايساچيدن قرتال جانبنه عبور اولندى روسيه قوماندانى عبدی
 پاشا عسکرى تعقيب ايله مشغول ايکن کندو قوتنك اوچ بش مثلى اولان صدر اعظم
 اردوسنه تصادف ايدوب ارقه سنده دخی جنود تاتار ايله قريم خانى موجود اولمسيله عينيله
 بالظه جى محمد پاشا وقعه سى کجى بر حال خطرنا که گرفتار اولديغنى مشاهده ايلدکده مأیوسانه
 هجومدن غيرى چاره قالمديغنى مطالعه ايدرك متفرقاً کلکده اولان عسکرىنك جمعنه
 مسارعت ايلدى اردوى هايون بلا افاته وقت متصدى حرب و قتال اولسه مستقولولرک
 اجماع عسکر و ترتيب و تعبيه وقت بوله ميه جقلى ميدانده ايکن متريس قازمق عزيميله
 اولکون و کيجه امرار و دشمنک محتاج اولديغنى وقته روى مساعدده اظهار اولنمغه ايرتسى
 کون وقوع بولان محاربه ده انتظام عسکر دشمن کثرت جيوش اسلاميه غالب کله رک بالجمله
 طوب و مهمات نصيب اعدا اولدى صدر اعظم بعض ارکان دولت و پياده عسکريه
 مراکب نهريه را کباً طولچى طرفنه مرور ايدوب اکثر وزرا و يکيچرى اغاسى قيو
 قيران محمد پاشا و رئيس افندى و سوارى عسکرى اوزى و بندر و يركوى طرفلرينه

طوغری منتشر ومؤخرآ طاقم طاقم مشتا اتخاذ اولنان بابا طاغنه واصل اولدیلر .

احتراق دونمای هایون

بوسنهك وقوعات مدهشه سندن بریدخی دونمای هایونك احتراقی ماده سیدر شویله که بدایت حربیده روسیه لونك آق دکره دونما سوق ایتك تدارکاتنده بولندیغی فرانسه لولر طرفسندن اخبار اولندقدده امکانی اولوب اولماق حقهده تردد اولنمقدده ایدی مسقولولر ایسه بحر بالطقدن سوق ایلدکری برقاچ قطعه سفن حربیه لرینی انکلتزه وفلمنك ووندکلوردن اشتر ایلدکری سفاین واستیجار ایلدکری ضابطان ونفرات بحریه ایله تقویه ایلدکدن صکره موره صولرنده کورینوب مانیه اهاالیسندن وسائر مستعد فساد اولان محللر اشقیاسندن برطاقم رعایای بالاضلال اعلان عصیان ایتدیردیلر بناءً علیه صدر اسبق محسن زاده محمد پاشا درحال موره سرعسکری نصب اولنهرق ارسال قلمغله وقوعبولان محارباتده جمعیت اشقیا تأدیب وتدمیر وشورش جزیره ازاله قلندی قبودان دریا بولنان حسام الدین پاشا دخی دونمای هایونی بالاستصحاب بحر سفیده عزیمت ایلدی دشمن دونماسیله لدی التلاقی ایکی دفعه محاربه اولوب قبودانه هایون اولان جزایرلی حسن بک سوار اولدیغی قالیون مسقولولرک قبودانه سسنه چاتوب تسخیر ایتك صددنده ایکن اتش ظهوریله ایکسی دخی محترق اولدی و طرفین دونمالری یکدیگرندن ایریلوب سفن اسلامیه چشمه لیمانه دخول ایلدی برقاچ کون صکره که بیک یوز سکسان درت سفرینك عشر اخیردر روسیه دونماسی لیمان اغزینیه کلوب برطرفدن طوب انداختیله عساکر اسلامیه بی اشغال وبرجانبدن تدارک ایلدکری اتش کیلرینی دونمای هایون اوزرینه سوق وایصال ایتمکله وسفن اسلامیه قاعده سزوغایت صیق اولهرق لنکرانداز اولمش بولنمغله تحریک وتفریقه میدان وامکان بولمادیغندن جمله سی سوخته اتش خسران وقبودان پاشا ایله اجلی کلیان جیوش موحدین ساحل نجاته پویان اولدیلر بویام فجیع واصل سامعه دولت اولدقدده مشارالیه حسن بك بالوزاره قبودانلق وبوغاز سرعسکرلکی ایله چناق قلعه سنده اقامه واحوال سفریه برطرف اولدجه یه دکی سفن تجاریهك لیمانلردن خروج ایتاماسی لازم کلنلره تنیه واشاعه قلندی روسیه لولر لمنی قلعه سنی محاصره وتضییق ایدرك ضبط ایتك درجه سنده ایکن قبودان مشارالیه تدارک ایلدیکی نقلیه سفینه لرله جزیرهك جهت

اخراسنه عسکر دوکوب دشمنی قهر و تدمیر و برقاج قطعه طوپلری تسخیر و جزیره یی اعدادن تطهیر ایتمکه بو کیفیت فی الجمله موجب تشفی درون و مستلزم توجه هایون اولوب بعد ازین القاب و مناشیرده مشارالیهک نامی غازی اضافه سیله معنون قانمسی حقند فرمان پادشاهی صادر اولدی سنه آتیه ده روسیه امیرالی استانکوی جزیره سنه دخی عسکر دوکوش ایسه دینه هزیمت فاحشه و تلفات کثیره یه گرفتار اولدی و اول اوانده مصرده علم افراز عصیان اولان بولوت قبان علی بکله اتحاد و مصری حکومت سلطنت سنیه دن تفریقہ تشبث ایلش اولدینی حالدہ آز مدت ظرفده یکدیگرندن سلب امنیت ایلرله بوبابده دخی نائل مطلب اوله مدی حاصل کلام مسقولولرک اشبو غلبه بحریه لری اقد کزده سلطنت سنیه یه خلیجه یاردر اچغه قابلیتلی ایکن جناب حق امیرال علیکسینک رابطه سزاغنی سبب خلق ایدرک امت مرحومه یی مضرات ملحوظه دن امین ایلدی .

صدراعظم خلیل پاشانک قرتال انہزامی سبیلہ رونق و اعتباری زائل اولدیغندن سکسان درت سنه سی شعبانده معزول و قره طاغ عصاتنک تأدیب و تربیه سی موفقیله نائل شهرت اولان بوسنه والیسی سلحدار محمد پاشا مقام صدارت و سرداری یه موصول اولغله بابا طاغنده مشتانشین اولان اردوی هایونه مواصلت ایلدی لکن سردار اکرمک طونه یی قارشو کچمامسی و طرف طرف سرعسکرلر تعینله تنکیل دشمن خصوصالرینه اعتنا ایلسی غایت خفی اوله رق باخط هایون امر و تنبیه بیورلمش اولدیغندن بیک یوز سکسان بش سنه سی اوائلنه تصادف ایدن فصل ربیعده ممالک اسلامیه نک هر جانبدن فوج فوج وارد اولان جیوش موحدین و دین سرعسکری محسن زاده محمد پاشا و افلاق سرعسکری عزت احمد پاشا و اوزی سرعسکری شاهین علی پاشا معیتلرینه و طونه ساحلارنده بولنان وزرا و امرا رفاقتلرینه تقسیم و ارسال قلمندی بناء علیه اوائل موسم صیفده اوزیده و طونه بوینده واقع اولان محارباتده اهل اسلام منصور و مظفر اولمش ویرکوی قلعه سی استرداد و مسقولولرک بش اون قطعه طوپلری ضبط قلممش ایسه ده موسم حریفده جیوش اسلامیه نک مملکتلرینه رجعتلری سبیلہ دشمن طونه یی بو طرفه کچوب ایساجچی و طولچی ساحللرینه استیلا ایلشیدی بابا طاغی صحراسنده خیمه زن اقامت اولان اردوی هایونک اطرافه استحکام یایلق و شاید بغته دشمن ظهور ایدر ایسه مدافعه قلمنق کبی اسباب احتیاطیه یه تشبث اولمادیغنی مسقولولرک جمله تحقیقاتندن اولمق حسبیلہ التي بیک کشیدن عبارت بردشمن فرقه سی موکب هایون اوزرینه صولت ایتدکده معسکر اسلامده اعدای وارده .

نك برقاچ مثلی عسکر موجود ایکن احتیاط سزلق وعدم اداره بلیه لریله مقاومت اولنه میوب سردار اکرم وبالجمله ارکان اردوی هایون فرار کنسان بازار جغه عزیمت واکثر طوب و مهماتی اعدایه ترك ایلدیلر .

ودین سر عسکری محسن زاده محمد پاشا قافات جانبه کچوب طونه ساحلیله یرکوی یه طوغری کلش واولحوالیده بولنان وزرا وامرألك التحاقیله معیتده اوتوز بیك قدر عسکر تجمع ایتیشیدی مشارالیه مزاج جیوش واحوال دشمنه واقف ارباب حزم واحتیاطدن اولمغه صنوف عسکر یه نك و نمایش جمعیه فریفته اولان وزرا ورؤسانك دشمن اوزرینه کتمك حقنده اولان خواهش لرینه اعتماد والتفات ایتیه رك یکچیری طائفه سنه خطاباً سز حسب القانون پیاده عسکر ایکن شمدی جمله کز اسب سوار اولدیغ کزدن وترتیب صفوف حریبه ده ایسه پیاده یه احتیاج درکار ایدو کندن اگر اتلری کزی ترك ایدر ایسه کز شمدی حرکت ایدرم دیه رك اجرای نصیح وپنده اغاز ایلش ایسه ده تأثیری کور یله مدیکی وبر ایکی ای مقدم روسجق سر عسکری محمد پاشانك دشمن اوزرینه حرکتده عدم مسارعی بین العسکر خیانتته حمل قلنه رق کشته سیف غدر قلندیغی جهت لره بالضروره بگرشده بولنان دشمن فرقه سنی طرد ایلک اوزره حرکته قرار ویر یله رك کزیده عسکر عزت احمد پاشا ودیگر احمد پاشا معیت لریله ایلرویه سوق وارسال اولنوب سر عسکر پاشا دخی قوه الظهر اولق اوزره بقیه جنود ایله یرکوی صحرا سنده ارام ایلکده ایکن عسا کر مرسوله درجنك اول منهزم وپریشان وفرار یلرک ورودی سر عسکر اردوسنك دخی آن واحده طاغلمسنه بادی اولدیغندن چار ناچار سر عسکر مشارا لیه دخی روسجق جانبه مرور ایلدی .

استیلا ی قریم

بوسنه نك حادثات مکدره سندن بریسی دخی قریم استیلا سی اولوب تفصیلی شو وجهله در که کچن سنه برروس اردوسی اورقوسی جوارینه رهبت بخشای وصول اولدقده قریم سر عسکری سلحدار ابراهیم پاشا معیتده بولنان جنود عثمانیه ایله موکب خانیه التحاق ایدرک مدافعه دشمنه صرف یارای قدرت ایللریله مستولولر رجعته مجبور اولمشلر ایدی بناء علیه روسیه لولر طریق مکرو اغفاله سلوک ایله بعض سلاطین وامرای تاتاره (سز سلاله جنکیزیه دن بر حکومت مستقله اولدیغ کز حالد برمدتن برو آل عثمانک تحت حکم واداره سنه

دخول ایلدیککز حسیله حقکرده درلو درلو معاملات تحقیریه اجرا و عاداتا کنسودو
ممکتلری والیلری مثللو عزل و نصبکره ابتدار ایده یورلر اکر بزملة اتفاق و عهد و میثاق
ایدر ایسه کز استقلال قدیمکزر استرداد و ازسرنو تأسیسنه متعهد اولورز) دهرک سبکمغزان
قومی اضلال ایللریله سرعسکر مشارالیهک تدارک لوازمات حالنده ابراز مشکلات و قاعده
یکجهتی و معانتکاریده اظهارنفاق ایلدکزرینه مبنی سرعسکر مشارالیه مشتانشین اولدینی کفهدن
حرکته قادر اوله مدینی حالده بیوک برمسقو اردوسی بیک یوز سکسان بش سنه سی اوائلنده
قریم جزیره سنک قاره یه محل اتصال و مدخل و مخرجی اولان اور بوغازی جوارینه وارد
اولدی اور قلعه سنک جانب سلطنت عثمانیه دن محافظه سنه مأمور اولان طوپچی سردن
کچدی لری محاربه دشمن ايله مشغول ایکن مجلوبین تاتار قلعه قیولرینی آچوب دشمنی ایچرویه
الدیلر بوندن صکره قریم خاننک یاننده بولنان جمع اندک شمار ايله وقوعبولان مهاجماتی
نتیجه پذیر اولماغله خان مشارالیه عودت و ساحلدن برکمی به بنوب استانبوله عزیمت ایلدی
مسقو اردوسی قول قول اوله رق درون جزیره پای انداز تعدی اولغله ساحلده بولنان
اهالی سفینه لر ايله ممالک اسلامیه یه فرار و مقتدر اوله میانلر عیال و اولادلرینی صعب المرور
طاغیر باشلرینه چیقاروب انجام کاره انتظار ایلدیلر سرعسکر ابراهیم پاشا بو حالک ظهوریله
دمبسته حیرت ایکن امرای تاتاردن اوربکی کلوب مسقولو ايله اولان معاهده خفیه لرینی
اظهار ایتمکله بو کیفیت دخی جنود عثمانیه نک پریشانلغنه بادی و سرعسکر مشارالیهک
اسیر اولسنی مؤدی اولدی .

صدراعظم سلحدار محمد پاشا اطعمه نفیسه والیسه فاخریه مبتلا اولوب مهمام سرداری
شویله طورسون خود بخود اموردائرده سی اداره یه بیله مقتدر دکل ایکن حکم قضا صدارتی
اقتضا ایتشیدی اردوی هایونک پریشانلغی و وقوعات سائر نک انضمامی اسبابیله بیک یوز
سکسان بش سنه سی شعباننده عزل اوله رق مهر صدارت محسن زاده محمد پاشایه ارسال
قلندی و غرائبدن اوله رق مشارالیهک منزهماً روسیغه و رودینک ایرتسی کونی وصول
بولدی صدر جدید موکب هایونی شمعی یه جلب ایدوب اوراسنی مشتا واس الحركات
اتخاذ ایلش واستحکامات قویه ايله تحصیل ایتش اولغله بعد ازین یوز سنه قدر اوراسی
مرکز عسکری اولدینی مشارالیهک درایت و کالنه بر دلیل علیدر .

عقد متارکه وعدم حصول مصالحه

بوسنه نک اواخرنده یعنی موسم شتاده پروسیالورک توسطیله عقد متارکه اولوب سنه

اتیه اوائلنده دولت علیه مرخصلری یکیشهرلی عثمان افندی ایله یسنجی زاده و روسیه مرخصلری ارلوف و ابروشقوف بکرشده لدی الاجتماع روسیه لولر اولامصارفات سفریه نک تضمینی ثانیاً طائفه تاتارک سربستلکی ثالثاً یکی قلعه و کرش لیماننک کندولرینه ترکی و قاپرون قلعه سنک هدمی رابعاً روسیه لویه التجا ایدن بغداد و یوده سی لیغورک علی طریق الورائه بغداد امارتنه نصبی خامساً سیر سفاین تجاریه و کرجی اسراسنک منع بیع اوشراسی مثللو برطاقم موادی درمیان ایلدیلر عثمان افندی اچقه ایله ایشی تسویه ایلک قیدینه دوشوب سربستی تاتار و ترک قلاع ماده لرینه یناشمق قاضیعسکرلر جانبدن کندوسنک برورطه عظیمه یه القاسنی مؤدی اوله جغنی مطالعه ایلدیکنه وارلوف دخی امپراطوریمچهنک قدیماً منظور نظر اقتضاحی اولدیغنی حالده هنکام غیوبتنده کندوسنه بعض شریک ورقیلر پیدا اولدیغنی استماع ایدرک قرار و آرامه صبری قالماسیله برابر ایشک دخی نتیجه پذیر اولسندن امید منقطع اولدیغنه مبنی عروس صاجی دراغوش ایدهمیه رک طرفین یکدیگرندن مفارقت ایلدیلر .

صدراعظم صلحک انعقادینه و هیچ اولمز ایسه مذاکراتک تمدیدیه تنظیم مهمات و ترفیه عسکر حصوانه مترقب ایکن بوجهله ایشک قیرلسندن بغایت منفعل اولمغله روسیه فلدمار شالی ایله بالمخبره سنه آتیه نوروزینه قدر تکرار عقد متارکه اولنه رق رئیس الکتاب بولسان عبدالرزاق افندی جانب دولت علیه دن و سالف الذکر ابروشقوف روسیه دولتی طرفندن مرخص تعیین وینه بکرشده ترتیب مجلس مذاکره قلندی اول امرده مواد متفرعه قرارلشدیرلقدن و تضمین سفر طی اولندقدن صکره استقلال تاتار و ترک قلاع ماده لری موقع تذکره قونیلوب مسقولولرک اساس مطلوبلری ایسه بونلر ایدوکندن بوبابده مباحث کثیره جریان ایلدی شویله که روسیه مرخصی (تاتار طائفه سی دولت علیه یه مربوط اولدجه حمایه یه مغروراً ممالکمزده هجومدن کیر و طور مامقده اولملریله استقلاللرینی طلبدن مقصدمن بومحدورک ازاله سی اولوب یکی قلعه و کرش لیماننک یدمزده اولسنی طلب دخی سفاین تجاریه مزک بحر آزاقه سربستی مرور و عبوری ارزوسنه مبتیدر) دیو چوجقلرک بیله قانع اوله میه جغنی اقوال بیالده ثبات و دولت علیه مرخصی دخی استقلال تاتار اجتماع خلیفتین قضیه سنی منتج اوله جغنی جوابیله مدافعه ایلش ایسه ده بونلر تصدیق اولندجه صلحک امکانی بولنه میه جغنی تعین ایتدیگندن چار ناچار تاتار قومی و حکمدارلری مستقل اولوب فقط اهالی قریمک انتخاب ایله جکلری خانلره طرف سلطنت سینه دن تشریفات

کوند رملک و خطبه لرده کافی السابق نام پادشاهی یاد اولنمق وقاضی عسکر افندی طرفندن قریم قاضی عسکرینه بلا بدل مراسله اعطاسیله احکام شرعیه اجراسنه مأذون ایدلمک و قریم قلاغنده دولت علیه عسکری بولنماق شرائطیله سربستی تاتاره و طمان قارشوسنده واقع جزیره صغیریه ایستر ایسه دولت علیه برقلعه بنا ایدوب ایچنه مستحفظ قویمق اوزره یکی قلعه و کرش لیماننک روسیه دولته ترکی خصوصلرینه قرار ویریلرک مرخص افندی طرفندن جانب سردار اکرمی یه اشعار کیفیت قلندی انک اوزرینه اردوی هایونده موجود وزرا وارکان ضابطان عسکریه مواجهه سنده مواد مبسوطه اوراقی قرائت وایشک زیر وبالاسی بالا طرف مطالعه و تدقیق اولندقدده احوال حربیه و مشوار عسکری یه نظراً فیما بعد دوام سفرده فائده غیر ملحوظ و بوندن اهون شرائطه دسترس اولنهمیه جنی محسوس اولمق حسبیه مواد مرقومه نك قبولی حقه ده اتحاد آرا حاصل اولدیغی حالد صدر اعظم غایت موسوس و متوهم اولدیغندن ایشی قطع ایتیموب رأی هایونه تعلیق ایدرک عرض و تاختیص ایلدی و بونک سببی دخی کویا سلطان مصطفی خان حضرتلری انعقاد مصالحه یه طالب کورینور ایسه ده اردوی هایونجه قطع و تنظیم اولنسی ارزوسنده و مظهر تعریض اولور ایسه یاپانلره تحمیل مسئولیت ایدرک هر بریسی برر جنبه نفی و تبعید ایله خلقتک لسانندن تخلص کریبان ایلک عزمنده بولندیغنی قاضی عسکرلردن بریسی عبدالرزاق افندی یه اخبار و بوسوزک پادشاهک اغزندن استماع قانندیغنی بالواسطه تذکار ایلمسیله افندی مشارالیهک وسائر اردو ارکاننک موجب توحش لری اولمسی قضیه سی ایدیکه بر بوش بوغازلق سلطنت سینه نك نه درجه ده ازدیاد خسارینی مؤدی اولدیغنی وقوعات اتیه دن معلوم اولور رکاب هایونده عقد اولنان مجالس عدیده ده مواد مذکوره موقع بحث و مذاکره قونلدقدده لوازمات حربیه واسباب غلبه دن غافل و یالکیز کثرت عسکر موجب فوز و ظفر اولور اعتقادنده بولنان جاهلر اردو خلقتک عن مشاهده مجزوملری اولان مجبوریتی تفکر ایتیه رک شرائط مزبور بروجله قابل التجویز اولمیه جغندن بجمله بویله لکله ایش بتمز و دشمن برایو قلیج یمدکجه دلخواه اوزره مصالحه یه رغبت ایتمز دیوب وارد اولان قرارنامه یی اعدانک قبول ایتیه جکی درجه ده تعدیل و طرف سردار اکرمی یه توصیل ایلدیلر بنساء علی ذلک شهباز خون افشان حرب و قتال هوای وغاده تکرار طیرانه اقبال ایتمکه طرفین اردولری حرکات حربیه یه مباشرت ایلدیلر .

سکسان یدی سنه سی اوائنده روسیه فلدمار شالی رومانجوف بالذات سلستره اوزرینه

قادمه جنبان صولات اولوب اوراده بولان واردوی هایوندن سوق اولنان جیوش اسلامیه ایله بش اون کون علی الدوام ایقاد نأرء جنك ایدرك بالاخره تلفات کنیرهیه مبتلاومکسوراً طونه یی قارشویه کچمکه مجبور اولدی و حین مرور لرنده کوپری قیرملغه پک بیوک بر مخاطره یه گرفتار اولمشیکن طرف اسلامدن کسب اطلاع اولنه مامسی بیوک بر فرصتی ضایع ایلدی .

بوندن صکره روسیه لولر دوبریجه ده بولان قوتلرینی تکثیر و بازار جق سر عسکری نعمان پاشا اردوسنه هجوم ایدرك ایکی دفعه بوز مشلر ایسه ده موکب صدراعظمیدن پیدرپی عسکرو مهمات ارسالله مدافعه یه اقدام اولندیغنه و وارنه یی محاصره ایدن دشمن فرقه سی دخی منهزماً رجعت ایلدیکنه مبنی اورالرده پایدار اوله میوب عودته مضطر اولدیلر .

قریم خلقنک بعضیلری مسقولونک فریفته مکر و آلی اوله رق اولکی سنه عقد معاهده ایله دشمنی ملکتلرینه ادخال ایملر ایکن روش حالدن وخامت عاقبتی استبدال و طرف دولت علیه دن استعانه واستمداده اغاز ایلمرله اسبق قریم خانی دولتکرای خان استانبوله جلب وقریمک تخلیصی حقنده اولان مطالعه سی سؤال اولندی انک سوق و تعریفی اوزرینه جانیک محصلی حاجی علی بک معرفتیه اولحوالیدن یکریمی بیسک قدر پیاده عسکری بالترتیب لوازم و مهماتلری تنظیم و محصل مومی الیه دخی رتبه وزارت احسان اوله رق خان مشارالیه مرافقه و سفینه لره ارکاباً قریم جانبنه ارسال قانددیلر بونلر سواحل قریمه واصل اولدقده طوائف تاتاردن کلیتی ادم تجمع ایدرك جزیره نک تخلیصی قوه قریبه یه کتور مشلر ایسه ده سنه اتیه اوائلنده بالضروره عقد مصالحه یه مجبوریت الوردیکندن ثمره نافعہ اقتطافه میدان قالمدی .

بوسنه نک ایام صیفی وقوعات مبسوطه ایله کذار ایلدیکندن شمنی صحرا سنده خیمه زن آرام اولان موکب هایون درون قصبه یه نقل ایله مشتانشین اولدی .

سلطنت سلطان عبدالحمید خان اول

بیسک یوز یکریمی طقوز تاریخنده متولد و یتیمش بر سنه سی صفر نده جالس دیهیم عثمانی اولان پادشاه زمان سلطان مصطفی خان ثالث حضرتلری اشبو سکسان یدی سنه سی ذی القعدة سنک سکزنجی کونی منزولاً مرتحل دار آخرت اولمغه برادرلری سلطان عبدالحمید خان ابن احمد خان ثالث حضرتلری زیب آرای تخت خلافت اولدیلر .

خاقان مغفور بالذات اداره امور سلطنت ایدن پادشاهلردن اولوب غایت متصرف

وسفاهتدن مجتنب اولمغله نقود کثیره ادخار ایتمش ایسه ده سبیتی کندیسنه عزو اولنان روسیه سفری اغورنده صرف واستهلاک ایتشدر مع مافیه ایازمه ولاله لی جامع لرینی بنا وزلزله دن منهدم اولان فاتح جامع شریفنک یالکیز شادروان حولیسنی ابقا واصل جامع شریفی مجدداً انشایدوب یکی خان ولغه قپوسنک خارجنده واقع ریختم وانبیه سائره مثللو اناره دخی موفق اولمشلردر .

مقاتلات واقعه نك ا کثریسنده ا کرچه روسیه لولر مظهر غلبه اولمقده ایسه لرده بش التی سنه در متمد اولان محاربات کرک عسکرو کرک اداره لر نیجه انواع مشکلاتی مستلزم وباخصوص مسقوه طرفلرنده ظهور ایدن بوهاجیف نمانده برخارجینک کوندن کونه جمعیتی متزاید ودائرة فسادى متوسع اولمقده ایدو کندن ومرام اصلیلری اولان قریم تسخیری مقدماتی استحصال ایلش بولندقلرندن انعقاد صلحه خواهش کر ایلدیلر انجق اطرافده غوغا ایتمک وطونه ساحلرنده اولان قلاعی تسخیر ایللمکه سلطنت سنییه ی صلحه اجبار قابل اوله میسه جغنی تفرس ایتلریله هیچ برجانیه باقیوب طوغریجه موکب هایونی محاصره وتضییق ایدرک واصل آمال اولمق تدارکنه شروع ایلدیلر بناءً علی ذلک اشبو سکسان سکز سنه سی اول بهارنده مرکز اردوی هایون اولان شمنی یه طوغری حرکت ایتدکلری واصل مسامع ارکان دولت اولدقده دهاعسا کر اسلامیه تمامیه مجتمع اولمقیقندن دشمنک بوحرکت نا کهظهوری موجب تلاش اولوب نه حال ایسه اله بولنان صنوف عسکریه دن برقوه مفروزه ترتیب وپیاده سی یکیکچری اغاسی یکن محمد پاشا وسواریسی رئیس الکتاب عبدالرزاق باهرافندی معیتنه ویریلهرک لاجل المدافعه بعث وتسریب اولندی ایسه ده سکز اون ساعت مسافه ده واقع قوزلیجه جوارنده واقع اولان محاربه ده منهزم ورجعت قهقری ایله اردوی هایونه عازم اولدقلرندن مسقولولر بلا حائل شمنی پیشگاهنه ورود ومعسکر اسلامی محاصره وتضییقه بذل مجهود ایلدیلر .

ایکی سنه دنبرو انشاسنه بذل قدرت اولنان شمنی استحكاماتی ایچنده وکاه طشریه چیقارق اون بش کون قدر محاربه اولوب اکرچه دشمنک صولت وهجومی دفع اولمقده ایدی لکن اردوی هایونک بووجهله محصوریتی ومسقولولری تهدید ایده جک خارجده برقوه احتیاطیه بولنمامسی جهتیله امتداد محصوریت اردو ارکاننه باعث خوف ودهشت اولدیغنه وفلدمارشال طرفندن طلب صالحی ولاجل المذاکره مرخص ارسالنی متضمن مکاتیب توارد ایلدیکنه مبنی کتخدای صدر عالی احمد رسمی افندی مرخص اول وغلوی

عسکر ایله فراره مجبور اولان عبدالرزاق افندی اوزرینه رئیس نصب اولتان ابراهیم منیب افندی مرخص ثانی تعیین اولنه رق بالارسال قینارجه مصالحه سی نامیله مشهور اولان و آتیده عیناً صورتی ترقیم قلطان صلحنامه احکام مضره سی چار ناچار قبول و تعاطی سندات اولنه رق الی سنه دینروشر افشان اولان آتش حرب و قتال زیر رماد مصالحه ده تستر ایلدی برقاچ کون صکره اردوی هایون استانبول جانبیه عودت وائثنای راهده صدر اعظم محسن زاده محمدپاشا ارتحال ایتمکله رکاب هایونده قائم مقام بولتان عزت محمد پاشا صدر صدارته اعتلا ایلدی

قینارجه عهد نامه سی

اولکی ماده

ایکی دولت بیننده سبقت ایدن هر درلو معادات و مخصوصه شمیدین الی الابد محو و ازاله اولنوب کرکالات حربیه و کرک سائر تقریب ایله طرفیندن عمل و تبادر و اجرا اولتان ضرر و تعدیات نسیان مؤبدی ایله فراموش اولنوب بوبابده وجوه ایله و اصلاً بروقتده اخذانته مقام اولنیه دشمنلک یرینه برا و بحرا مؤبد و قوی و تغیردن منزله مصالحه یه رعایت و حراست اولنه کرک طرف هایونمدن و کرک اخلاف و امجادم طرفلرندن و کذلک روسیه پادشاهی مشارالیه و اخلافی بینلرنده تمهید اولتان اتفاق ایله صافی و مؤبد و تغیردن بری موالات حفظ و حراست اولنوب اشبو ماده لر کمال دقت و اهتمام ایله اجرا و معتبر قلنه لر و ایکی دولت و املاک و ممالکی و رعایا و اهالی طرفین میانه لرنده اشبو موالات ماده سی بویله رعایت اولنه که فیابعد جانیندن برینک علیه نه سر او علانیه بردرلو عمل بغض و اضرار اولنیه و تجدید اولتان موالات و مصافات مقتضاسنجه بلااستثنا ایکی طرفه هر نه کونه تهمت ایدن جمله رعایا لرک طرفیندن نسیاً منسیاً جرایملری کلیاً عفو اولنوب چکدری و سائر محسوسده بولنانلری آزاد و سیللری تخلیه و منفی و مکث ایتدیریلان کسانه عودته رخصت و یریلوب مقدما کامیاب اولدقلری هر درلو پایه و اموال لری مصالحه دن صکره رد و ارجاع اولنوب و سائر لریکه هر نه عقوبته مستحق اولدیلر ایه دخی حققرینه اصلاً برعلت و بهانه ایله تعرض و زیان و ضرر و تأذیب اولنیه لر و آخر لر طرفندن مزبورونه بردرلو ضرر و زیان و تعرض اولنقی تجویز اولنوب اضرار و تعرضلرینه قصدا یدنلر تأذیب اولنه لر و مرسوموندن هر بری زیر حمایت و محافظه قوانین و ولایتلرینک عادت لری اوزره سائر هم و لایبتلرینه قیاساً معاشرت ایده لر

ایکنجی ماده

اشبو عهدنامه مبارکه نک انعقادی و تصدیقنامه لک مبادله سندن صکر ایکی دولتک رعایا سندن بعضیلری آخر برتیمت وعدم اطاعت و یاخود خیانت ایدوب دولتینک برینه اختفا و یاخود التجا قصدنده اولور ایسه دولت علیه مدد دین اسلامی قبول و روسیه دولتنده تنصر ایدنلردن ماعدا اصلا بریهانه ابله قبول و حمایت اولنموب در عقب رد و یاخود هیچ اولماز ایسه التجا ایلدک لری دولتک ممالک سندن طرد اولنه لر که بومثللو یرامزلرک سببی ايله ایکی دولت بیننه مورث برودت و یاخود باعث بحث عبث اولور اصلا بر معنی واقع اولیه کذلک طرفین رعایا سندن اولوب کرک اهل اسلام و کرک خرسیتیان زمره سندن برکسنه بردرلو تقصیرات ایدوب هر نه ملاحظه ايله بر دولتدن اول بر دولته التجا ایدر لر ایسه بومثللو لر طاب اولند قجه بلا تأخیر رد اولنه لر

اوچنجی ماده

قریم و بوجاق و قوبان و بدیسان و جانبویاق و یدیکجکول قبائل و طوائف تاتار و بالجله بای حال بلا استثنا دولتین طرفندن سربسیت و بغیر تعلق مستقل و جوهله اجنبی بر دولته تابع اولماق اوزره اعتراف و قبول اولنه لر و طوائف تاتار بالجله رأی و اتفاق لریله آل جنکیز صویندن انتخاب و نصب اولنان کندو خانلری مستقل اولان تحت حکومتلرنده اولمغله و بر زمانده دول اخردن بر دولته و هیچ بر ماده یه محاسبه و بر مامک شرط یله عتیق قانون و عادت لری اوزره مرقوم لره حکم و کرک خان مومی الیهک انتخاب و نصبی خصوص صنده و کرک امور مخصوصه و درونی و امور دولتری نه دائر بردرلو دولت علیه مزله روسیه دولتی مداخله ایلوب حکومت خارجی و دولتری نه دائر بر مستقل دولت سائر مستقل دول کندو کندوله مملکت لری تحکیم ایدر لر کی و جناب باریدن غیری کسنه یه تابع اولماق اوزره طائفه مرقومه اعتراف و قبول ولیکن مذهبلری اهل اسلام دن اولوب ذات معدلت سمات شهریارانه م امام المؤمنین و خلیفه الموحدين اولدیغنه بناء طائفه مرقومه عقد اولنان سربسیت دولت مملکت لری نه خلل کتور میسه رک امور مذهبی لری طرف همایونم خلقنه شریعت اسلامیة مقتضاسی نه تنظیم ایدر لر و روسیه دولته تخصیص اولنان کرش و یکی قلعه اراضیسی ولیمالرندن ماعدا قریم و قوبان جانب لرنده واقع استیلا اولنان قصبه و قلاع و مساکن و اراضی و بردا و قونسکی و وی و اوزی صوی و نهر لری نک اق صو و طور له نهر لری نک بیسنده اولان جمیع

اراضی له مملکتی حدودینه وارانجه طوائف مرقومه به استرداد واوزی قاعه سی قدیمی الکاسیله کالاول دولت علیه مک تحت تصرفنده باقی قاله و مصالحه عهدنامه سنک مبادله سندن صکره ممالک تاتاریه دن روسیه دولتی جمله عسکرینی اخراج ایلسنه تعهدایده قریم جزیره سنک وقوبان و طمان جزیره سنده واقع قلاع و قصبه و مساکن و سائرلری حقنده جزوی و کلی هر درلو استحقاقندن دولت علیه مزک کذلک کف یدینه تعهدایده و محل مرقومه فیما بعد محافظ عسکری و یاخود بشقه عسکر ارسال ایلیه ممالک مذکورده بی طوائف تاتاره بووجه اوزره دولت علیه مز استرداد ایدوب و کمسنیه تابع اولمقسزین حکومت دواتلرینه روسیه دولتی مرقوملرک حقیقه مستقلا تحت حکومتلرنده و سربسیت مطلقه وجه معمول به اوزره ایلدیکی کبی کذلک دولت علیه مز تعهدایده که قصبه و قلاع و اراضی و مسکن مذکورلرنده فیما بعد محافظ عسکری و یاخود بشقه برنوع عسکر و سکیان و یاخود عسکر زمرد سندن هر نه اسمده و نه کونه ایسه بعث و تسیر ایلیوب جمله طوائف مرقومه به روسیه دولتی طرفندن ترک اوانان سربسیتی و کمسنیه تابع اولمقسزین استقلالاری اوزره دوات علیه مز دخی ترک ایده

دردنجی ماده

جمله دوله مخصوص اولان استحقاق اصلیبی مقتضاسنجه کندو مملکتنده مناسب کوره جک نظامی اجرا ایتک هر دولته جائز اولغله ایکی دولته رخصت کامله نامحصوره ویریلور که کندو مملکتلرنده و حدودلرنده مناسب کوردکاری یرلرده قلاع و شهرلر و قصبات و ابنیه و مساکن بنا و عتیق قلاع و شهر و قصبات و سائرلری تعمیر و تجدید ایدلر

بشنجی ماده

اشبو مصالحه مبارکه نک انمقادیله تجدید موالات و مصافات همجواری میسر اولدقدن صکره روسیه دولتی جانبندن پایه ثانیه یعنی اونوپیاتو تعبیر اولنوب اورته الجیبی و یاخود مرخص الجیبی نصیبله دولت علیه مزده علی الدوام بر روسیه الجیبی اقامت ایدوب زیاده معتبر اولان دولک الجیلری حقنده ایفا اولنان مراسم اعتبار و رعایت مومی الیه روسیه الجیبسک رتبه سنه دخی دولت علیه مز جانبندن ایفا اولانه عموما رسم عامه و قوغنده المان امپراطورینک الجیبی پایه رفیع و یاخود صغیره ده اولدیفی تقدیرده در عقب ندر لآنک بیوک الجیبسندن صکره تعقیب ایلیه ندر لآنک بیوک الجیبی بولنماز ایسه و ندیك بیوک الجیبسندن صکره تعقیب ایلیه

التنجی ماده

دولت علیه روسیه الجیسنک بالفعل خدمتنده بولنانلردن برکسنه سرقه وتهمت عظیمه ویاخود شایسته تعزیر بر فعل ناشایسته ایتد کدنصکر بعدالتقریر اشیای سرقه الجی طرفندن بیان اولنه جق وجه اوزره تماما استرداد اولنه و حال سکرنده دین محمدی بی قبول ایتک سوداسنده اولنر دین محمدیده قبول اولنمیوب رفع سکرندن صکره حال اصلیلرینه رجعت ایدوب عقللری باشلرینه کلد کدن صکره اقرار و اعتراف لری الجی طرفندن کوند ریله جک ادمک مواجهه سنده دخی و بعض بیغرض مسلمانلرک قارشو سنده بیان ایتدیریلوب بویله قبول اولنه لر

یدنجی ماده

دولت علیه من تعهد ایدرکه خرسیتان دیانتک حقنه وکنیسالرینه قویا صیانت ایده وروسیه دولتک الجیلرینه رخصت ویره که هر احتیاجده کرک اون دردننجی مادهده ذکر اولنوب محروسه قسطنطنیهده بیان اولنان کنیسای مذکوره وکرک خدمه سنک صیانتیه ابراز تفهیمات متنوعه ایله وایاچی مومی الیهک برکونه عروضی دولت علیه مک دوست صافی و همجواری اولان دولته متعلق ادم معتمدی طرفندن عرض و تبلیغ اولنمغله دولت علیه من طرفندن قبول ایللرینی دولت علیه من تعهد ایدر

سکزننجی ماده

روسیه دولتک کرک رهایین زمره سندن وکرک سائر رعایا سندن اولناره تماما رخصت ویریه که قدس شریف و شایسته زیارت اولان سائر محللره سیاحت ایدر بو گونه یولجی و سیاحلردن کرک قدس شریفده وکرک سائر محللرده اثنای طریقده دخی بر درلو جزیه و خراج و ویرکو و اصلا بر تکلیف طاب اولنیه سائر دولک رعایالرینه ویریلان فرمانار و یول امرلری مرسومونه دخی وجه لایقی اوزره ادا اولنه و مادامکه دولت علیه من اراضی سنده اقامت ایدر کندولرینه بر درلو دخل و تعرض اولنمیوب قوت احکام شریعت مقتضاسنجه تماما حمایت و صیانت اولنه لر

طقوزنجی ماده

محروسه قسطنطنیهده مقیم روسیه الجیلرینک خدمتنده بولنان ترجمانلر هر نه ماتدن

اولورایسه اولسون دولت امورینه خدمت ایلدکلرینه بناءً خدمتلی ایکی دولته راجع اولمغله کال مروت ایله معامله و اعتبار اولنه لرو مخدوملری طرفندن کندولرینه سپارش اولنان مواد ایچون شایسته مؤاخذه اولق جائز اولیه

اوننجی ماده

اشبو مصالحه مبارکه امضا اولنوب طرفین عسکرلرینک سردارلری طرفلرندن لازم اولان تنبیهات اقتضا ایدن محلله ایصال اولنجه اول اراقده اکر بر محله بر درلو فعل مخاصمه حدوث ایدر ایسه ایراث تعرض اولنق اوزره عد اولنمیوب بو تقریب ایله واقع اوله جق فتوحات واستیلارل دخی معدوم الظهور اولق اوزره معتبر طوتلیوب بویه واقعه دن برکمنه فائده مند اولیه

اون برنجی ماده

منفعت دولتین ایچون ممالکنی ترشح ایدن جمله دریالرنده ایکی دولته متعلق کمی و تجار سفاینه بغیر ممانعت سربسیت اوزره کشت و کذار ایللری عقد و تمهید اولنوب واسکله لرینه و هر محله مطابقاً سائر دولتلك اجرا ایتدکلری تجارتلرنده کامیاب اولدقلری وجه اوزره اشبوروسیه کیلری تجار و سفاینه دخی دولت علیه جانبدن رخصت و یریه قره دکزدن اق دکزه واق دکزدن قره دکزه و عامه سواحل و قیلرینک لیمانلرنده مارالذ کر دریالر اتصالده اولان ممر و بوغازلرنده مکث ایدلر و اشبو ماده یه دائر بالاده ایضاح اولندیغی اوزره دولت علیه مزك ممالککنده امر تجارتیه دائر بعینه فرانجه و انکلتره مثالو دوست احب اولوب زیاده مساعده بیوریلان مسالمت و معافیاتیه تجارت میاه مثالو برا تجارت ایتک روسیه دولتک رعایالرینه دولت علیه من جانبدن رخصت و یریلوب برمنوال محرر نهر طونه ده دخی کشت و کذار ایدلر کرک امر تجارت و کرک روسیه تجارینک حقنده اشبو ماده ده لفظ بلفظ تحریر اولندیغی کبی هر درلو احتیاج ظهورنده مارالذ کر ایکی ملتک و سائر لرك شروطلری مرعی و معتبر طوتیه ملل مزبورون و یردکلری رسومات مشاکله سنی و عینی ادا ایتدکلرندن صکره روسیه تاجرلری هر درلو امتعه مقوله سنی نقل و اخراج ایدوب قره دکز و سائر دریالرک سواحل و لیمانلرینه و محروسه قسطنطنیه یه وارملری جائز اوله وجه مشروح اوزره بالاستثنا عموماً صولرینک امر تجارت و سیر سفائن ماده سنی طرفین رعایالرینه تجویز برله کندو تاجرلرینه ایکی دولت جانبدن رخصت و یریلورکه رؤیت مصالح و اداره تجارتلرینه لازم اولان مدته طرفین ممالککنده اقامت ایدلر بوبابده

طرفیندن تعهد اولنور که دوست اولان سائر دولتلرک رعایالرینه ارزانی قلنان سربسیت و مسالمت روسیه تجارینه دخی ارزانی قلنه و حراست نظام ماده سی جمله کیفیتده مواد الزمدن اولغله روسیه دولتی طرفندن لازم کوریه جک عامه مواعده قونسلسلر و قونسلس وکیللرینک تعیننه دولت علیه من جانبندن رخصت ویریلوب دوست اولان سائر دولک قونسلسلری اعتبار اولندقلری کبی مرقوملر دخی معتبر طوتیلهرق واشبو قونسلس و قونسلس وکیللرینه رخصت ویریه که براتلو تعبیر اولنور برات پادشاهانه ایله مسلم ترجمانلر معتبرنده طوتوب انکلتره و فرانجه و سائر ماتلرک خدمتلرنده بولان امثاللری کامیاب اولدقلری معافیاته بونلر دخی نائل و کامیاب اوله ار و روسیه دولتنک دوست احبی اولان ملل امتیازات و معافیاتی ایله برا و بحرا روسیه ممالکینده تجارت ایتمه و رسوم معتاده بی ادا ایتدکنصکره دولت علیه رعایالرینه روسیه دولتی جانبندن رخصت ویریلوب و سیر دریا اناسنده قضایه دوچار اولان سفاینه طرفیندن وجوهله اعانت و بو کونه قضاار ظهورنده دوست احب اولان ملل حقنده اجرا اولنان مظاهرت ایله معاونت اولنلر کندولرینه لازم اشیانرخ جاری ایله کندولرینه الیویریه

اون ایکنجی ماده

افریقه لیلر ایله یعنی طرابلس غرب و تونس و جزایر غرب اوجاقلریله روسیه دولتی عقد شرائط تجارتیه رغبت ایتدکلری حالده دولت علیه من تعهد ایدر که دولت روسیه نیک بو کونه رغبتی پذیرای حصوله کندی اعتبار و رخصتی بذل و شامل ایده عهدات مرسومه حفظ و حراست اولنمق امرنده دخی مارالذکر اوجاقلرک حقنده دولت علیه من ضامن اوله

اون اوچنجی ماده

جمله سندات و مکاتیب عامه ده و هر خصوصده تماما روسیه لولرک ایمپراطور یچه سی لقب معتبرینه دائر دولت علیه من جانبندن ترکی لسان ایله تماما روسیه لولرک پادشاهی تعبیری استعمال اوله

اون درنجی ماده

دول سائر هیه قیاسا کلیسای مخصوصه دن ماعدا غلطه طرفنده بک اوغلی نام محله نیک یولنده طریق عامده روسیه دولتی برکنیسا بنا ایتدیرمک جائز اوله اشبو کنیسا کنیسای

عوام اولوب دوسو غره کنیساسی تعیریله تسمیه والی الابد روسیه دولتنک الجیسی صیانتنده
اولوب هر درلو تعرض و مداخله دن امین وبری حراست اولنه

اون بشنجی ماده

ایکی دواتک حدودلری تعیین و تحدید اولندقلری نظام مقتضاسنجه طرفین رعابالزینه
موجب مباحثه و باعث نزاع جسم اوله حق بر ماده اولمدیغی اکر چه ملاحظه دن بعید اولوب
لکن عوارض غیر مأموله دن ظهوری محتمل اولان اسباب مضرت و زیانلرک دفعنه ایکی
دولت بالاتفاق قرار ویرمشلر در که بوکونه نسنه لارک ظهورنده رأس حدودده اولان حاکم
ظهوره کلان ماده بی تفتیش و یاخود مخصوصات تعیین اولنان مأمورلرک معرفتیه تفحص
ایده لر بوکونه مأمورلرک کی ماده بی تفتیش ایتدکن صکره بلاتأخیر حق اولان شخصک
حقنی احقاق ایده لر و پاک تعهد اولنور که اشبو عهدنامه مبارکه انعقادیه مجدداً تمهید اولنان
موالات و حسن نظام ماده سی بوکونه قضایانک ظهوریه اصلاً تغیر اولنیه

اون التنجی ماده

جمله بوجاق مملکتی افکرمان وکالی و اسمعیل قلعه لر یله سائر قصبات و قرادرو نلرنده
موجود بولنان عامه اشیا یله روسیه دولتی طرفندن دولت علیه مه رد اولنوب و بندر قلعه سنی
دخی دولت علیه مه رد ایدر و كذلك افلاق و بغداد مملکتلرینی جمله قلاع و شهرلر و قصبات
و قرالری درونلرنده موجود بولنان جمله اشیا لر یله كذلك دولت علیه مه رد ایدر دولت
علیه م دخی اتی الی بیان شرائط ایله ممالک مرقومه بی قبول ایدوب اشبو شرائطی تماماً و کاملاً
محافظه و حراست ایلسنی وعد معمول به ایله تعهد ایله اولاشبو ایکی و یوده لقلرک اها الیسی
هر نه پایه و کیفیات و حال و اسم و عیاندن ایسه لر بلااستثنا حقلرنده تماماً و کاملاً نسیا منسبا
عفو اولنوب هر درلو تهمتلری و یاخود دولت علیه مک امورینه مخالف حرکت ایلدکلرینه
اسناد و مظنه اولنان جمله اعماللری الی الابد فراموش اولنوب اولکی ماده نک مضمونی
اوزره منصب و پایه لری و املاک سابقه لری مجدداً حاللری تکمیل اولنوب اشبو محاربه دن
مقدم مالک اولدقلری املاکلرینه اعاده اولنه لر ثانیاً کالاول خرسیان دیانتی و جوهله سر بست
اولوب اجراسنه بر درلو ممانعت اولنوب کنیسالرک مجدداً بناسنه و عتیقلرینک تعمیرینه
ممانعت اولنیه ثالثاً از قدیم مناسترلرینه و سائر شخصه متعلق اولوب بعده بغیر حق کندولردن
اخذ اولنوب ابرائیل و خوتین و سائر لرلرک دائره سنده موجود بولنان اراضی و املاک که
الان رعایا اسمیه تسمیه اولنور مر سومونه استرداد اولنه لر رابعا ره این زمهره سنه مناسب اولان

امتیاز ایله اعتبار اولنه خامسا ترك وطن ایدوب آخر محالره وارمق رغبتنده اولان خاندانلر اشیا لریله نقل ایتمه سربسیت اوزره مآذون اوله لر واشبو خاندانلره کندو مصالحنك تنظیمی ایچون وقت کافیری اولمق ایچون سربسیت اوزره وطنلرندن نقل ایلملرینه برسنه مدت امهال اولنوب اشبو مدت مهلت تصدیقنامه مبارکه نك مبادله سی تاریخندن معدود و محسوب اولنه سادسا عشیق محاسبه لر ایچون هر نه کونه ایسه کرك نقود اچقه و کرك سائر طریق ایله بر سنه تحصیل اولمیه سابعا اشبو محاربه نك تماما مدتی ایچون بر درلو تکلیف و یاخود اخر بر درلو طلب اولنموب محاربه امتدادنده پازده اولدقلری مضرات و تخریبات متعدده لرینه نظرا مرسومونه بوندن صکره دخی ایکی سنه لك مهلت ویریلوب اشبو مهلت مبادله تصدیقنامه هایون تاریخندن عد اولنه تامنا اشبو مهلت مرورایتدیکندن صکره دولت علیه من تعهد ایدر که جزیه لرینك اچقه سنی تعینه مروت کلیه ایله معامله و حیز امکان رتبه سنده سخاوت جلیله سنی حراست ایده ایکی سنه ده بر کره مبعوثلرینك وساطتیه جزیه لری ادا اولنه و تعیین اولنان اشبو جزیه لرینك تماما اداسندن صکره اصلا بر پاشا و یاخود حاکم و هر کیم اولورسه اولسون مرسومانه اصلا بر وقتده تعرض ایتموب آخر بر درلو ویرکو و یاخود تکلیف هر نه کونه اسم و بهانه ایله کندولرندن طلب اولنموب جد اجدد سلطان محمد خان رابع زمان سعادتلرنده متمتع اولدقلری امتیازات ایله کامیاب اوله لر تاسعا مللک امورلرینی رؤیت ایدن قبو کتخدالرینك یرنده اشبو ویوده لقلرک بکلرینه دخی رخصت ویریه که دولت علیه ده هر برینك طرفندن روم مذهبنده خرسیان اولمق اوزره مصلحت گذارلر تعیین ایله لر که اشبو مملکته متوقف اولان مصالحنی رؤیت ایده لر دولت علیه جانبندن دخی حققرینه کمال مروت ایله معامله اولنوب حال عاجزانه لرنده قواعد ملل استحقاقه مستحق اولوب یعنی هر درلو تعرضدن امین وبری اولمق اوزره اعتبار اولنه لر عاشر دولت علیه جانبندن روسیه ایمپراطورلنك ایلچیلرینه رخصت و موافقت ویریلور که اشبو ایکی ویوده لقلرک اقتضاسنه کوره صیانت و مساعدده اولنلرینه مذا کره ایده لر دولتیه لایق اولان اعتبار دوستانه مقتضاسنجه ایلچیلرینك عرض ایتدکلری کلماتلرینه رعایت ایلسنه دولت علیه من تعهد ایدر

اون یدنجی ماده

الان روسیه دولتینك زیر ضبطنده بولنان اق دکنز اطهارینی روسیه دولتی دولت علیه مزه استرداد ایدر دولت علیه دخی تعهد ایدر که اولکی ماده سنده مصرح اولان

هردرلو قباحتلرك و دولت عليه مك امورينه مخالف اولمق مظنه سيله اجرا اولنان عامه افعالك نسيا ومنسيا عفو كلای ايله محو و عفو اولمق ماده سنی جزایر مذكوره نك اهالیسی حقنده دخی کمال استقامت ايله رعایت ایدر ثانیاً خرسیان دیانتیه اصلاً ادنی بر تعرض ايله ایصال تضییق اولنمیوب کلیسارک تعمیر و تجدیدینه وجوهله ممانعت اولنیه مارالذکر کلیسالرینه خدمت ایدن اشخاص اصلاً بر تقریب ايله تعرض و مداخله اولنیه ثالثاً اشبو محاربه سببی ايله کندولرینه ایراث اولنان تکدیرات و تخریبات سببی ايله روسیه دولتنك زیر حکومتده بولندقلری تاریخده و بوندن صکره ایکی سنه مدتیه دکن اشبو جزایر مرقومه نك دولت عليه مه استردادی تاریخندن عد اولمق کرکدر دولت عليهم جانبندن جزایر مذکوره اهالیسندن اصلاً بردرلو رسم سنوی تحصیل اولنیه رابعاً ترك وطن ایدوب آخر محارره وارمق رغبتنده اولنلر تماماً مال و اشیالرله نقل ایتك اوزره دولت عليهم جانبندن مرقومونه رخصت و یریلوب و تنظیم مصالحلرینه وقت کافی اولمق ایچون اشبو تصدیقنامه مبارکه نك مبادله اولنه حق تاریخندن برسنه مهلت مدتی کندولرینه امهال اولنه خامسا روسیه دونماسنك عودور جمعتمده که انشاالله تعالی اشبو تصدیقنامه مبارکه نك مبادله سندن صکره اوچ آی مدتده واقع اولمق کرکدر برسنه به احتیاجی واقع اولور ایسه دولت عليهم جانبندن وسع امکان مرتبه سنده مظاهرت اولنه

اون سگزنجی ماده

اوزی صوبی بوغازنده واقع قلهرون حصاری نهر مزبورک صول طرفی ساحلنده کفایت ایده جک اراضی ايله واق صو ايله اوزی صوبی بیننده واقع صحرای خالیه نك معارضه دن عاری مستقلاً علی الدوام روسیه دولتنك تحت تصرفنده قاله

اون طقوزنجی ماده

قریم جزیره سنده واقع یکی قلعه قلمه سی و کرش لیمانلری درونلرنده موجود بولنان ايله و اراضیلرله بحر سیاه دن باشلیوب طولاً کرشك عتیق حدودلرینه و اوده رق بوخاجه نام محله و ارنجه و بوخاجه محلندن خط مستقیم ايله بالادن ازاق دکزینیه و ارنجه معارضه دن عاری مستقلاً علی الدوام روسیه دولتنك تحت تصرفنده قاله .

یکرمنجی ماده

میلاد عیساننك بیك یدیوز سنه سی یعنی تاریخ هجرت نبوینك بیك یوز اون اوچ

سنه سی تولستوی نام حاکمی ایله آجو محافظی حسن پاشا بینه عقد و تمهید اولنان سندات مفهومنده بیان اولندیغی اوزره ازاق قلعہ سی اولکه و حدودیله الی الابد روسیه دولته تخصیص اولنه .

﴿ یکریمی برنجی ماده ﴾

ایکی قبارطه لر یعنی بیوک قبارطه و کوچک قبارطه تاتار طائفه سیله واقع جواریتلرندن ناشی قریم خانلریله تعلقلری اولمغه روسیه دولته تخصیص اولنلری ماده سی قریم خانلرینک و مشورتنک و تاتار باشلرینک اراده سنه احاله اولنه .

﴿ یکریمی ایکنجی ماده ﴾

ایکی دولت بیننده انعقادی وقوعبولان جمله عهد نامه و شرائط سابقه یی و بلغراد قلعہ سنده واقع عهد نامه یی و اندن صکره وجوده کلان عامه شرائطی محو و ازاله والی الابد فراموش ایتمک ایکی دولت میانه سنده بالانفاق قرار و یریلوب شویله که مرسوم عهداتک حقنه فیابعد بردرلو داعیه مقوله سنی بنا ایتمه لر ولکن میلاد حضرت عیسانک بیک یدی یوز سنه سنده تولستونام حاکمی ایله آجو قلعہ سنک حسن پاشا نام محافظی ازاق اولکه سی حدودی و قوبان سنورینک تعیین و تحدیدینه دائر شرائط اشبو استنادن بری اولوب کالاول بلا تغییر باقی قاله .

﴿ یکریمی اوچنجی ماده ﴾

کورچی و مکرمل حوالیسنده واقع بغداد جق و کوتایسی و شهریان قلعہ لریکه روسیه عسکری طرفندن ضبط اولنشلردر قدیم دبرو متعلق اولدقلری اصل صاحب لرینه متوقف اولمق اوزره روسیه دولتی طرفندن قبول اولنوب شویله که اگر تحقیقات قدیمه دن برویا خود مدت مدیده دن مقدم دولت علیه م قلاع مذکوره یه مالک اولمش ایسه دولت علیه مه راجع اولمق اوزره قبول اولنوب اشبو تصدیق نامه مبارکه نک مبادلہ سندن صکره وقت معهودده روسیه عسکری قلعہ مذکوره یی تخلیه ایلیه دولت علیه مدخی کندو طرفندن تعهد ایدرکه اولکی ماده نک مضمونی مقتضاسنجه حوالی مزبورده اشبو محاربه امتدادنده دولت علیه مک علیه نه مرنه منوال اوزره حرکت ایتمش اولنلری نسیامنسیا عفو ایلیه و وجه معمول به

اوزره والی الابد اوغلان وقز ویرکوسندن وهرکونه جزیه سائر طلبندن ابا و کفید
ایدر اوتهدنبرو متعلقری اولنلردن ماعداطوائف مذکوره اراسنده کندو رعایای اولق
اوزره فرد واحدك حقنه داعیه ایتامکه دولت علیه تعهدایدر و کورجی و مکریلر طرفندن
اوتهدنبرو ضبط اولنان اراضی و سائر مستحکم یرلری تکرار مرسومونك حکومت و محافظه
مطلقه لرینه ترك ایلده و دیانت مناسرت و کنیسالری حقنه بردرلو تعرض و تضییق ایتیموب عتیق
اولنلرك تعمیرینه و جدیدلرك بناسنه ممانعت اولنیه و چلدر پاشاسی و سائر سرکرده و ضابطان
طرفندن بردرلو داعیه تختنده اموال لرینی اضاعت ایلده تعرض اولنلرینی دولت علیه منع
ایله و طوائف مزبور دولت علیه مك رعایاسندن اوغله روسیه دولتی اصلا مرسومونه
مداخله ایتیموب تعرض ایلده .

✽ یکریمی دردنجی ماده ✽

بعدالامضا و تصدیق المواد درعقب نهر طونه نك صاغ طرفنده موجود بولنان جمله
روسیه عسکری عودت و رجعت متوجه اولوب امضا تاریخندن برآی ظرفنده طونه نك
صول قیسنه مرور ایدلر مزبور تماما طونه نك صول قیسنه کچدکن صکره حرسوه
حصاری بوشال دیلوب عسکر اسلامه تسلیم اولنه و بعده افلاق و بوجاق مملکت لرینك
تخلیه سنبردن و آن واحده مبادرت اولنوب اشبو تخلیه ماده سنی ایکی آی مهلت تعیین اولنور
و جمله روسیه عسکری مملکتین مزبور تیندن چکدکلرندن صکره برطرفدن یرکوکی
قلعه سنی و بعده ارائیلی و طرف دیگردن اسمعیل قصبه سنی کلی و اقدکرمان قلعه لريله روسیه
عسکری ترك ایدوب عساکر سائر لرینه ملحق اولغه متوجه اولدقدن صکره عساکر
اسلامیه قلاع مذکورده یی ترك ایدلر اشبو ایکی مملکتك تماما تخلیه سنی اوچ آی مدت
توقیت اولنور بالاده ذکر اولنان کیفیتدن صکره روسیه عسکری بغداد مملکتی ترك
ایدوب نهر طورله نك صول طرفنه مرور ایدجکدر بوتقریب ایلده مارالذکر مواضع و ممالک
تخلیه سی ایکی دولتك مسالمت و مصالحه مؤبده لرینك امضاسندن صکره بش آی ظرفنده
واقع اولوب جمله روسیه عسکری نهر طورله نك صول قیسنه مرور ایلدکده اول زمان
خوتین و بندر قلعه لری عساکر اسلامیه تسلیم اولنور انجق مجرد بوشروط ایلده کهینه
وقت مزبورده قلهرون حصاری تصریح اولنان اراضی مصالحه مؤبده نك اون سکزنجی
ماده سنده ایضاح اولدیننی اوزره آق صو ایلده اوزی صوی بیننده واقع صحرای خالیه نك

زاويه سيئه الى الابد معارضه دن برى روسيه دولته تسليم اولنه وآق دكز اطه لرينه دائر
 روسيه دونماسنك مصالحى وتنظيمات درونيه لرينه قابل اولديغى سرعته جزاير مذكورده اول
 حواليده بولنان روسيه عسكرى طرفدن كالاول معارضه دن برى دولت عليه مك ضبطنه
 رد اولنلر چونكه بعد مسافه سببى ايله قابل دكلدر كه توقيت وقت اولنه ودولت عليهم
 تعهد ايدر كه دوست بردوات اولديغى جهته دونماي مذكورده نك استعجال عزيمتى ملاحظه سيئه
 دولت عليهم ايفاي لوازمه اعانت ايدوب وسع وامكان مرتبه ده اقتضا ايدن نسنه لرى
 ويريلوب اولبايده دولت عليه مه رد اولنان مملكتلرده مادامكه روسيه عسكرى موجود بولنور
 ايسه اشبو مملكتلرك حكومتى ونظامى روسيه لونك ضبطنده بولنديغى اوزره قالوب جمله
 روسيه عسكرينك كلياً خروج لرى وقتنه دكين دولت عليهم جانبندن ممالك مذكورده نك
 حكومته مداخله اولنيه وبومملكتلرده بولنان روسيه عسكرينك اقتطاف مأكولات وتدارك
 لوازم سائر سنه الان عمل اولنديغى اوزره كذلك تماماً خروج لرينه دكين عمل اولنه وروسيه
 عسكرينك باش سر عسكرى بوبابده مخصوصا تعيين اولنان دولت عليه مك مأمور لرينه
 ممالك مزبورده نك هر برى تخايه اولنديغى خبر ايتدجكه دولت عليه مك عسكر لرى رد اولنان
 اشبو قاعه لره اياق باصميوب بالنفس دولت عليهم دخى رد اولنان اشبو مملكتلرنده كندو
 حكومتى ادخال ايتيه قلاع وقصباتده موجود اولان روسيه لونك ذخيره ومهماتى مرادلرى
 اوزره روسيه عسكرى طرفدن تخايه اولنوب دولت عليه مه رد اولنان قلعه لرده مجرد
 بواننده موجود بولنان دولت عليهم طويلر ينى ترك ايدلر ودولت عليه مه رد اولنان عامه
 ولايتلرك اهالىسى هر نه جنس وحال وكيفيتدن ايسه لركه روسيه دولتك خدمتده مستخدم
 اولمشلردر عقد اولنان مهلت سنويه ده اهل وعيال واموال لرى برله روسيه عسكرى ايله
 معا چكيلوب نقل ايتك رغبتنده اولنلر منع اولنميوب شروط مذكورده مقتضاسنجه كرك
 اولزمان وكرك تماماً برسنه مدتده وجوه له منع اولنماسنه دولت عليهم تعهد ايده .

﴿ يكرمى بشنجى ماده ﴾

كرك اناث وكرك ذكور جنسندن اولان بالجمله اسراي محاربه وسائر اسيرلر هر نه پايه
 ورتبه دن ايسه لر ايكي دولتك اراضيلرنده بولندجقه روسيه دولتنده حسن ارادت لريله تنصر
 ايدن مسلمين ودولت عليه مده حسن ارادت لريله دين محمدى ي قبول ايدن خريستيانلردن
 ماعدا بالجمله اشبو عهدنامه مباركده نك تصديقنامه لرى مبادله سندن صكره در عقب واحلا

بردرلو بهانه ایله طرفیندن بلاعوض وبغیر ثمن آزاد واسترداد وتسلیم اولنه لر کذلک گرفتار بند استرقاق اولان بالجمله خرسیانلریغنی لهلو وبغدانلو وافلاقلو ومورده لو واهالی جزایر وکورجیلر وسائر بالجمله وبلا استثناء بلا ثمن وغیر عوض آزاد اولنه لر کذلک اشبو مصالحه مبارکه نیک انعقادندن صکره برتقریب ایله گرفتار بند استرقاق اولان روسیه رعایالری دولت علیه مده بولندجه رد وتسلیم اولنه لر وکذلک دولت علیه مک رعایالری حقنده بعینه بومعامله متشابهه اوزره حرکت ایتمکه روسیه تعهد ایدر .

﴿ یکریمی التنجی ماده ﴾

اشبو ماده لر امضا اولندیغی خبری قریمه واوزی به رسیده اولدیغی کبی در عقب قریمه اولان روسیه سرعسکری اوزی محافظیله مخابره ایدوب اشبو امضا تارینخندن ایکی آی ظرفنده معتمد آدم لر کوندریله رکه قلهرون حصارینی مارالذکر اون سکزننجی ماده ده تصریح اولنان صحرا لر ایله تسایم وتسلم قبول ایدم لر واشبو معتمد ادم لری ملاقاتلری کونشدن ایکی آی ظرفنده مارالذکر ماده یی تکمیل ایدم لر که شویله که بای حال اشبو عهد نامه امضا اولندیغی کوندن درت آی مدته وقابل ایسه مدت اقلده ماده مشروح ختام پذیر اولوب کایا اجرا اولنه ومأموریتلری تکمیل اولندیغی صدراعظم جانبنه وفلد مارشال طرفنه بلا تأخیر اخبار ایدم لر .

﴿ یکریمی یدنجی ماده ﴾

بومصالحه مبارکه یی وموالات ومصارفات یی بین الدولتین زیاده تأکید ایله تمهید وتقویه ضمننده طرفین رضاسیله توقیت اولنه جق میقاتده اشبو مصالحه خیریه یی تصدیقا تصدیقنامه لر ایله فوق العاده بیوک ایلاچیلر بعث وتسمیر وایکی ایلاچیلر رأس حدودده معامله متشابهه ایله مقابله اولنوب دولت علیه مک غندنده زیاده معتبر اولان اوروپا دولتنک ایلاچیلری حقلرنده رعایت اولنان رسم معتاد اوزره مومی الیهما دخی مرعی قلنوب دلالت صفوت جانین اوزره ایلاچیان مومی الیهما وساطتیله شان دولترینه لایق هدایا ارسال اولنه .

﴿ یکریمی سکزننجی ماده ﴾

دولت علیه م مرخصلری مومی الیهما توقیمی رسمی احمد ورئیس الکتاب ابراهیم منیب دام مجدها ودولت روسیه نک لغونتا جنرالی پرنج ربنین ختمت عواقبه بالخیر طرفلرندن

اشبو مصالحة مؤبدہ نك ماده لری امضا اواندقدن صكره صدر اعظم و روسیه دولتك فلد
 مارشالك تنیهاتی ایصالیه برا و بحرا کلیتاً و سائر یرلرده واقع عساكر جانبین میانہ لرنده
 هر درلو معامله خصمانه منع اولنق لازم كلكله در عقب صدر اعظم و فلد مارشال جانب لرندن
 اق دكز و قره دكز و قریم قارشوسنده واقع دونمایه و مواضع سائر محاربه یه اولاقلر
 كوندریلور كه بعد انعقاد المصالحه هر یرده معادات و مقاتلات دفع اولنه و بر كونه اولاقلر
 صدر اعظمك و جنرال فلد مارشالك تنیه نامه لریله مصون و مأمون اوله لر كه روسیه اولاغی
 روسیه سر عسكری طرفه تسابق ایدر ایسه اشبو روسیه سر عسكریك و ساطیله صدر
 اعظمك تنیه نامه سنی دولت علیه سر عسكرینه تسیر ایایه و صدر اعظمك اولاغی تبادر
 و تقادم ایدر ایسه سر عسكردولت عایه و ساطیله فلد مارشالك تنیه نامه سنی روسیه سر عسكرینه
 بعث و تسیر ایلیه و عقد اولن ان مصالحه مباركه نك عقود و عهدی تمهیدی كرك طرف
 هایون خسروانه مدن و كرك روسیه پادشاهی مشارالیه طرفندن صدر اعظم و دولت روسیه
 فلد مارشالی پترو قونته رومانچوفه تفویض و احاله اولنغله عهد نامه ده مسطور اولان مصالحه
 مؤبدہ نك جمله ماده لری ایکی سنك حضور و مواجیه لرنده عقد اولنش كبی صدر اعظم
 و فلد مارشال جانب لرندن دولتین طرف لرندن كندولره و یریلان رخصت كامله مقتضاسنجه
 مواد مذکورہ بی امضا و خاتم لریله تصدیق ایدوب اشبو مواد مفهومنده عقد و تمهید و وعد
 اولنان ماده لر قویا و بلا تغییر مرعی و دقتله اجرا اولنوب خلافه اصلاً بر نسنه عمل اولنمیوب
 فرد واحده دخی ایتدیرلیه و بعینه مطابق المعنی صورت لری امضا و خاتم لریله تقریر و تصدیق
 اولنوب صدر اعظمك سندی ترکی و اطلیان لسانیه فلد مارشالك سندی روسیه و اطلیان
 لسانیه دولتین جانب لرنندن كندولره و یریلان رخصت نامه لر دخی مرخص لر طرف لرنندن
 و دولت علیه جانبندن اولق اوزره فلد مارشاله ایصال و موادك امضاسندن صكره بش
 كون و یا خود قابل اولور ایسه مدت اقلده دخی مبادله اولنوب صدر اعظمك سنداتی
 تسلیم ایتدك لری انده فلد مارشال قونته رومانچوفك سند لرینی اخذ ایده لر .

خاتمه

ایمدی فیما بعد مواد مرقومه اوزره تجدید و تمهید اولنان صلح و صلاح رافع الحرب
 و الكفاح مقرر و معتبر طویلوب شیمه کریمه شهریاران صداقت معتاد و قاعده مرعیه تاجداران

وفا اعتیاد اوزره عهد و میثاق و تماماً تصدیق ایدرزکه کړك ذکر اولنان یکر می سکړ موادك شروط و قیودینه و صاحب صلاحك موافق و عهدینه و کړك دیگر ایکی قطعه اعطا اولنان نشان هایونمده محرر و مسطور مادیتك شروط طریقه کال رعایت اولنوب مادامکه اولجانبیدن دخی مرخصری طرفدن تأیید و تصدیق اولنان موادك خلافه وضع و حرکت صادر اولیه طرف هایون پادشاهانه مزدن و اخلاف نصفت انصافزدن و کلای عالیمقام و میرمیران صاحب الاحتشام و امراء ذوی الاحترام و عموماً عساكر نصرت ارتسائمز و بالجمله عبودیتمز ایله شرفیاب اولان طوائف خدامدن بر فرد خلافه متعلق وضع و حرکت ایلیه .

تمت تمام

خاتمه عهدنامه ده مذکور ایکی ماده دن بریسی مصارف حربیه تضمینیدر که دولت عالیله اوج تقسیط ایله هر سنه بشر بیک کیسه اچیه ویرلک اوزره اوج سنه ظرفنده روسیه لویه اون بش بیک کیسه اچیه تأدیه ایتکی تعهد ایتمشدر ایکنجیسی آق دکر اطه لرینک سرعت تخایه سیدر که ذکر اولنان عهدنامه نك اون یدنجی ماده سننده اق دکرده بولنان روسیه دوتناسك اوج آی مدته چکله سی مشروط ایسه ده ممکن مرتبه بران اقدام حرکت ایتسنی روسیه دولتی تعهد ایلشدر .

دردنجی بابك تکمله سی

اشبو دردنجی بابك حاوی اولدینی زمان سلطنت سنیه نك انحطاط جلیسی اوانی اولمغله ضایعات مادیه و معنویه سی کون بکون تزايد و ترقی ایلشدر فقط شوراسی دخی فراموش اولناملیدر که دولت عثمانیه نك ابتدای ظهورندن التمش سنه صکره اوروپا قلعه سنه تجاوز قلنمش اولدینی حالد بیک یوز اون تاریخنده واقع قارلویجه معاهده سنه کانجه یه قدر اوچیوز الی سنه قدر مدته سلطنت سنیه مغلوبانه عقد مصالحه یه مضطر اولمیوب علی الدوام علم افراز غالبیت اولمغله بویله بر فیوضات طویله دکه بردولنده واقع اولدینی احوال دوله کسب وقوف ایدنلرک مسلمیدر مقتضای احکام کونیه ایله معاهده مزبوره طممشواردن ماعدا کاملاً مجارستانی حکومت دولت علیه دن اخراج ایلدیکی مثللو موره جزیره سنی وندکولره بودلیایاتنی لهلولره ازا ق طرفلرینی روسیه لولره ترك و تسلیم ایلکله دفعه بوقدر ممالك الدن چیقدی اگرچه اون ایکی سنه مرورنده بالطه جی محمد پاشا نك غایبه مشهوره سیله مسقولو انه کچن لرل ودرت سنه صکره شهید علی پاشا همتیله موره جزیره سی مع

زیاده استرداد اولمش ایسه ده بونشئه غالبیت دوام ایتمیوب و رادین انهمزامنك تعاقب خماریه
مبدل حزن و ملال اولدی و نمچه لولر طمشوار و باغراد ایالتلرینی استیلا ایلدیلر مؤخرآ
ابراهیم پاشانك شان سلطنته غیر جسبان اوله رق اچدینی ایران سفری دخی اتلاف مال
ورجال و تخریب ممالك اسلامیه دن بشقه برشیئ مقید اولدقدن ماعدا ممالك طاغستانی
مسقولولر ایله مقاسمه یه تشبث ایلمسی سلطنت سنیه نك احوالیده بولنان اهل اسلام نظرنده کی
اعتماد و اعتبارینی ضایع ایلدی بیک یوزاللی تاریخنده ظهور ایدن روسیه و نمچه محاربه لرینك
برنجی سنه سنده مسقولولر اوزی و نمچه لولر نیش قاعه لرینی استیلا ایللری موجب دهشت
اولمشیکن ایرتسی سنه مذکور قلعه لر استرداد اولدقدن بشقه اطه قاعه سی فتح و تسخیر
اولندیغندن و بوندن اول ایکی دفعه واقع اولان نمچه محاربه لرنده سلطنت سنیه ضایعات
عظیمه یه گرفتار اولمق حسبیله ارکان دولتك نمچه محاربه سندن کوزلری قورقش ایدو کندن
هیئت سابقه اوزره صاحبی غنیمت اتخاذا ایدو کلدکاری حالدیه مجرد صدر اعظم بولنان یکن
محمد پاشا مرحومك اقدام و همیله سفره دوام و باغراد قلعه سنك فتحه اقدام اولندی
و لطف حقله بومقصد دخی حایل اولدقدن صکره صلحه نظام ویرلدی .

اوستریالولرك طونه نك بو طرفنده تمکن و استملاکری سلطنت سنیه یه باعث انسلاک
اسایش و امنیت اولمشیکن بو وجهله بلغراد ایالتك استرداد و نمچه لولرك طونه نك قارشو
جانبه طرد و ابغادی دولت علیه نظرنده شمیدی یه قدر واقع اولان کافه ضایعات کیرو
النمشجه سنه موجب ممنونیت و باعث فخر و مباهات اولوب جهان کیرك و کشور کشالك
خاطرلری دخی بالکلیه متروک و حال حاضرک دوام و بقا سندن بشقه امید و امال طریقلری
غیر مسلوک اولمغله اوتوز سنه قدر عائله حرب و قتال دن اجتناب ایله امرار زمان اولندی
انجق (حاضر اول جنکه اکر ایستر ایسک صلح و صلاح) قاعده کلیه سنه اعتنا و دقت اولنه .
ماسیله سکسان ایکی سفرنده دولت علیه نك اولانجه نظامات عکریه سی دخی پریشان
وازمایش حرب و قتال ایدن وزرا و امینك منقرض اولمش ایدو کی میدانه چیقدی قینارجه
معاهده سی مسقولولرك ممالك سلطنت سنیه حقنده اولان سوء قصدلری دستکاهنی قورمش
و تارپود استیلا یی حاضر لمش اولدینی ارکان دولتك مشهود و معلومی اولمغله بعد ازین روسیه
تعرضات و تجاوزات سندن قورتلق پک کوچ اوله جنی مطالعاتیله خیر خواهان سلطنت گرفتار
اندوه و ملال اولمشدر .

احوال ملکیه

فصل سابقه بیان اولندیغی اوزره غرب اوجاقلرک باشلو باشلرینه برر اداره اولوب طرف دولت علیه دن والی کوندریله من ایسه ده جاجارکاب هایونه وارکان دولته هدییه تقدیم ایدرلر و قبودان پاشالری مرجع بیلورلر ایدی کوپرلی مرحوم بونلری مؤاخذه به ابتدار و سلطنت سنیه نك سزك کبی عاصیلرک قوللغنه احتیاجی یوقدر دیو شدت اظهار ایدوب سواحل عثمانیه محافظلرینه فرمانلر اصداریله غرب اوجاقلری کملرینک مذافعه اولملرینی و حتی حاجیلرینک بیله سواحل مصریه ده قبول قانناملرینی توصیه و تنبیه ایلمسیله اوجاقلر خلقی بومعامله دن و باخصوص اناطولی ساحلرندن عسکر یازمق ماده سی کبی منبع عصییتلری اولان شیدن مهجور اولملرندن بغایت توحش ایدرک دامن استرحامه صارلایلر و جانب سلطنت سنیه دن کوندریله جک والیرله اطاعت ایده جکلرینه تعهد ایلدیلر بناء علیه ذکر اولنان اوجاقلرله بکلر بکیلر کوندردلای ایسه ده ایشک ارقه سی ارا نلدیغندن از وقت ظرفنده ینه اسکی حاله مبدل اولدی بوندن صکره طرابلسده قره مانلی و تونسده منمنلی اوغلی خاندانلری تأسس ایدوب قره مانلی سلاله سندن اک صکره والی بولنان علی پاشا اواخر سلطنت محمود خان ثانیده استانبوله جلب و طرابلسه جانب دولتدن والی نصب اولمش و منمنلی اوغلی خاندانی الحاله هذه تونسده اجرای حکومت ایتیمکده بولمشدر جزایرده بویله بر سلاله تأسس ایده میوب الحکم لمن غلب قاعده سی اوزره دایی تعبیر ایتدکلری صنادید اوجاقدن مقتدر اولنلر فرصت بولدقجه والی بی عزل و مسند حکومته متصاعد اوله کلورلر ایدی احوال عسکریه بختنده ایراد اولنه جنی وجهله مصرده بولنان یکیکچری و سائر طوائف عسکریه موظفه نك قوت و سطوتلری زائل اولدقجه امرای چرا کسه نك تغاب و تسلطلری ارتدیغندن والی بولنانلرک اجرای حکومت ایده بیلمسی انلرک انضمام رأی و رضالرینه موقوف اولدی بو کوله من بکلرینک عصییتلری دولت چرا کسه زماندنبرو تمتد اولوب چونکه یاوز سلطان سلیم خان حضرتلری مصری فتح ایتدکده استیمان ایدن امرایه مناصب مصریه دن شیخ البلدک و امیرالحاجلک و لسان عصر من اوزره مدیرلک و قائممقاملق مقامنه قائم اولان کاشفلک کبی برطاقم مراتب و مأموریت تخصیص و احسان ایتمشدی بولنلر عادت قدیمه لری وجهله نوبنو چرکس کوله لری اشترا و دائره لرنده تربیه ایدرلر و قابلیتیدجه چقانلری کاشفلک و سائره مثللو مأموریتلر ایله چراغ ایتمکله ترقی ایده ایده سالك امرایه داخل اولورلر ایدی لکن امرای مرقومه برقاچ فرقه اولوب

یکدیگر بکریله مخصوصه لری دخی اکسک اولدیغندن فرقه مغلوبه سعید ایچنه فرار ووقت فرصته انتظار ایدوب وقتا که مناصبده بولنان امرانک یاظلم و تعدیلری سببیه خلقک نفرتی زماننده ویاخود میل اسایش واستراحت ایله بظالترین وقوعنده دائره لری خلقی وجمع ایدیه بیلدکلری عربان عسکر یله مصره هجوم و متصدی حرب و قتال اولور لر ایدی والی بولنانلر اقتضای وقت و حاله کوره یا مناصبده اولان امرایه معاون ویاخود بیطرف کبی بولنوب اگر هجوم ایدنلر نائل فوز و ظفر اولور لر ایسه انلر مصره داخل و مخالف لری فراره مجبور اوله جقلرندن اولخالده والی دخی امرای غالبیه مناصب مذبوریه توجیه و خلعتلر اکسا ایدوب طرف دواته دخی فرار یلرک خبائتندن و فرقه غالبه نک خدمات دولته حسن سلوکه تعهد و علمای مصری کفیل ارئه ایلدکلرندن بمحله عرض محضر تقدیم ایدر لر ایدی بعضاً دخی اتفاق امرایله والی بولنانلر مقام حکومتدن تنزیل و بر طاقم اسباب و اعذار واهییه متضمن جانب دولته عرض محضر تقدیم اولنوب اگرچه بولنرک تزویراتی نزد دولته معلوم ایسه ده تأدیپ و تربیه لرنده حکیمانه حرکت و تکلفات عظیمه اختیارندن بجانبت اولنه کلمه یکیدن والی نصب و ارسال قیلنور ایدی

حتی روسیه سفری هنگامنده رئیس امرای بولنان بولوت قان علی بک روسیه دونماسی امیرالی ایله اتحاد ایدرک علناً عصیان و تبدیل خطبه درجه سنه قدر اجتناسار ایتیش وایکی اوچ سنه مصره والی کوندر یله میوب خلیجه باعث تشویش اولمشیکن کندو چراغی اولان امرادن ابو الذهب محمد بکک همت و سطوتیه مغلوب و مقتول اولدی و غائله طغیانندن دولت و ملت قورتلدی عصر احمد خان ثالث و محمود خان اولده اوتوز سنه یه قریب بغداد وایلدکنده بولنش و قوت و ثروتی مشهور افاق اولمش اولان حسن پاشا زاده احمد پاشا بک چون کوله اشترا ایدوب بولنردن کسب لیاقت و قابلیت ایدنلری کرک دائره حکومتده و کرک ملحققات ایالتده استخدام ایتیمکه بغدادده دخی برکوله من حکومتی تحث ایلدی مشارالیهک و فائتندن صکره جانب دولتن والی کوندرلش ایسه ده پایدار اولامانغله ایالت بغداد مذکور کوله منلردن تحصیل نفوذ و اقتدار ایدنلره توجیه اولنغنه باشلیوب تا محمود خان ثانی اواخر سلطنتنده والی بولنان داود پاشادن تخلیص اولنجه یه قدر کوله من حکومتی دوام ایلشدر مشارالیه احمد پاشا اگرچه مطیع و منقاد اولوب حتی حکیم اوغلی علی پاشا ایله بینلرنده خصومت قویه واقع اولدیغندن قرق الی تاریخنده بغداددن عزل ورقه ایالتنه نقل ایلدکده مشارالیه احمد پاشا اطاعت و منصبی جانبنه عزیمت ایدوب

مؤخرأ کوپرلی زاده عبدالله پاشا انهمز امده شرق سرعسکری نصب اولمشیدی طالعی
 مساعد برذات اولمغله هنگام سرعسکریسی نادرشاهک هند طرفلرینه هجومی اوانته تصادف
 ایدرک مخاطرات حربیه دن امین وایرتسی سنه ینه بغداد والیدکنی تحصیل ایله کامیین
 اولدی بوندن صکره وفاته قدر حکومت دارالسلامده مسند نشین استیقلال وایکنجی
 دفعه نادر شاهک بغدادی محاصره سنده مدافعه حکیمانه ایله نزد دولتده حائز اعتبار و اقبال
 اولمشدر نادر شاه احمد پاشا ایچون پک عقل و درایت اصحابندن برآمددر زیرا بنمله
 دولت عثمانیه بی و دولت عثمانیه ایله بی اخافه ایدوب کندوسی راحت و اسایش ایله امرار
 وقت ایدر دیدیکی منقولدر پاشای مشارالیهک یالکیز بیک اکیوز کوله وایج اغایی اولوب
 بالمله دائرہ سی خالق اون بیک کشی یه بالغ اولدینی عنقه ثقه ایله مروی اولسنه نظراً
 اطاعت و انقیادیه برابر شویلجه بغداددن عزل اولنو ویرمسی دخی پک قولای شی
 اولمدینی استدلال اولنور و بوقضیه مشارالیهک کوله سی و دامادی اولوب کندوسندن صکره
 والی اولان سلیمان پاشانک عزلی واقع اولمشیکن فعلاء اجراسی قابل اوله میوب استغفای
 قصور و استدعای مرحمت ایلسنه بنا ایدیلرک ایفا قلنمش اولمسیله مؤیددر بوبابده سلطان
 محمود خان اول حضر تلرینک مفصل برقطعه خط هایونلری صادر اولمشدر که عینیه و اصف
 تاریخنده مسطوردر

بوعصرک و اخرینه طوغری اناطولیده دره بکلری وروم ایلنده اعیانلر حادث اولوب
 سلطان محمود خان ثانینک واسط سلطنتنه قدر پایدار اولمشدر که بونلرک روش اداره لری
 و اسباب نشئت و حدودلری بمنه تعالی باب آتی تکمله سنده ایراد و تفصیل اولنور

احوال ارکان دولت

کوپرلی صدارتندنبرو استانبولده چوقلق وزرا بواندیرلما سی قاعده اتخاذ و کیدرک
 تأیید و تشید اولمغله قبه وزارت ی بالکلیه متروک اولدینی مثللو دفتر دارلره وزارت ویرملک
 اصولی دخی الغا قلندیغندن استانبولده وزرادن یالکیز صدر اعظم و قپودان پاشا و نادراً
 سلطان قوجه لرندن توقیی پاشا بولنور و ارکان دولت دنیلان ذوات مشارالیه هم ایله شیخ
 الاسلام افندی و قاضیه سکرلر و استانبول قاضیسندن و وزیر کتخدایی و دفتر دار و رئیس
 افندی دن عبارت ایدی اگرچه فی الاصل وزیر کتخدالری مقام صدارتده بولنان ذواتک
 خدمه مخصوصه لرندن ایدیهده صکره لری عظمای رجال دولتدن انتخاب اولنه کلمسیله
 بالمله مناصب خواجکان و اغوانک مافوقنده طوتمشدر مع مافیه دیوان هایون مناصبند

ممدود اولما قله بعض مراسم و تشریفات و توقیعك و دفتر دار لقلر و ریاست و دفتر امانتدن عبارت اولان مناصب مستهیه داخل اولدیغی حالده شیخ الاسلامره ولی النعم علم اولدیغی مثللو علی الاطلاق اغا افندمر تعبیری دخی وزیر کتخداسی دیمك ایدی ایکنجی درجه اعتبار اولنان مناصب چاوش باشلیق و ضربخانه و مطبخ عامره و شهر و ترسانه و كرك امانتلی کبی مأموریتلر اولوب بونلر قپوجی باشلره و خواجكانه توجیه اولنور و بیوک و کوچك میراخور لقلر و قپوجیلر کتخدائی و بلوك اغا لقلری و طویجی و جبهجی باشلیق قپوجی باشلره تفویض قلنور ایدی میر علمك فی الاصل مناصب مذکورده مثللو مستحق اولنلره و یریلور ایکن صکرده لری قپوجی باشلرك اك اسکیسنه مخصوص اولمش و بالمله قپوجی باشلرك ضابط و رئیس اولق حیثیتی اکتساب ایلمشدر نشانچیلق و دفتر امانتی مناوبه صورتیه و شق ثانی و ثالث دفتر دارلقلرینك ایشلری بك خفیف و نوادر حکمنده قالمقلا بومأموریتلر قید حیات و جهله عظمای رجاله توجیه اولنور و باش محاسبه و بیوک روزنامه و اناطولی محاسبه سی و سائر قلم خواجها لقلرندن عبارت اولوب مناوبه مناصبی دینلان مأموریتلر برسنه لك اولق اوزره معزول قلان رجال و خواجكانه احاله قیلنور ایدی مفصلات توارینخده واسکی تقویم و قایع نسخهلرنده مسطور اولدیغی اوزره هر سنه عقیب عید فطرده توجیهات عمومیه اجرا اولنوب بالمله وزرا و رجال و امرای عسکریه و قپوجی باشی و خواجكان منصبلری ابقاء و یا مجدداً توجیه و سالف الذکر مناوبه مناصبك باش محاسبه و بیوک روزنامه و اناطولی محاسبه سی مثللو بیوک لری کتخدا و دفتر دار و رئیس معزوللرینه و کوچکلری خواجكانه تفویض اولنوب بونلردن دخی محروم قالانلره عطیه سنیه احسان اولنور ایدی .

قپوجی باشلیق و خواجكانلق رتبه لرینی حائر اولانلر اوتوزر قرقر کشیدن عبارت اولوب حتی صدراعظم داماد ابراهیم پاشا کندوسنك دیوان افندیسنی خواجكانلق رتبه سیله بكام ایتك اوزره عرض ایلدكده سلطان احمد خان حضرتلری خواجكانك دفترینی طلب و یکر می عدده بالغ اولدیغی معاینه ایدرك استكشار و اداره لری مشكل اولور جوابیه شمديلك تأخیرینی اراده بیوردقلری منقولدر .

ذکر اولنان مناوبه منصبلری قلم خواجها لکلری دیمك اولوب اگرچه هر قلمك خدمت مخصوصه لری و ارایسه ده کیسه دار و ممیزلری معرفت لریله اداره اولنمقلا منصب صاحبی خانه سنده اوطورر و کیسه دار افندی تمهیر و صبح اولنه حق اوراقی کوتوروپ ایجابی

مؤخرأ کوپرلی زاده عبدالله پاشا انهمز امده شرق سرعسکری نصب اولمشیدی طالی مساعد بر ذات اولمغله هنکام سرعسکریسی نادرشاهک هند طرفلرینه هجومی اواننه تصادف ایدرک مخاطرات حربیه دن امین وایرتسی سنه ینه بغداد والیدکنی تحصیل ایله کامین اولدی بوندن صکره وفاتنه قدر حکومت دارالسلامده مسند نشین استیقلال وایکنجی دفعه نادر شاهک بغدادی محاصره سنده مدافعه حکیمانه ایله نزد دولتده حائز اعتبار و اقبال اولمشدر نادر شاه احمد پاشا ایچون پک عقل و درایت اصحابندن برآمددر زیرا بنمله دولت عثمانیه بی و دولت عثمانیه ایله بنی اخافه ایدوب کندوسی راحت و اسایش ایله اصرار وقت ایدر دیدیکی منقولدر پاشای مشارالیهک یالکمز بیک ایکوز کوله وایج اغای اولوب بالمله دائرهمسی خلقی اون بیک کشی یه بالغ اولدینی عنقه ثقاته ایله مروی اولسنه نظراً اطاعت و انقیادیه برابر شویلهجه بغداددن عزل اولتوویرمسی دخی پک قولای شی اولمدینی استدلال اولنور و بوقضیه مشارالیهک کوله سی و دامادی اولوب کندوسندن صکره والی اولان سلیمان پاشانک عزلی واقع اولمشیکن فعلاء اجراسی قابل اوله میوب استغفای قصور و استدعای مرحمت ایلسنه بنا ایدیلهرک ایفا قلنمش اولسیله مؤیددر بوبابده سلطان محمود خان اول حضرتلرینک مفصل برقطه خط هایونلری صادر اولمشدر که عینیه و اصف تاریخنده مسطوردر

بوعصرک و اواخرینه طوغری اناطولیده دره بکلری و روم ایلنده اعیانلر حادث اولوب سلطان محمود خان ثانینک واسطه سلطنتنه قدر پایدار اولمشدر که بونلرک روش اداره لری و اسباب نشئت و حدوثلری بمنه تعالی باب اتی تکمله سنده ایراد و تفصیل اولنور

احوال ارکان دولت

کوپرلی صدارتندبرو استانبولده چوقلق وزرا بولندیرلهمسی قاعده اتخاذ و کیدرک تأیید و تشید اولمغله قبه وزارت ی بالکلیه متروک اولدینی مثللو دفتردارلره وزارت ویرلمک اصولی دخی الغا قلندیغندن استانبولده وزرادن یالکمز صدر اعظم و قپودان پاشا و نادراً سلطان قوجه لرندن توقیی پاشا بولنور و ارکان دولت دنیلان ذوات مشارالیهم ایله شیخ الاسلام افندی و قاضی مسکرلر و استانبول قاضیسندن و وزیر کتخدای و دفتردار و رئیس افندی دن عبارت ایدی اگرچه فی الاصل وزیر کتخدای مقام صدارتده بولنان ذواتک خدمه مخصوصه لرندن ایدیهده صکره لری عظمای رجال دولتن انتخاب اولنه کلسیله بالمله مناصب خواجهکان و اغوانک مافوقنده طوتلشدر مع مافیه دیوان هایون مناصبده

معدود اولیامقله بعض مراسم و تشریفات و توقیعک و دفتردارقلر و ریاست و دفتر امانتدن عبارت اولان مناصب مستهیه داخل اولدیغی حالده شیخ الاسلامره ولی النعم علم اولدیغی مثللو علی الاطلاق اغا افندمز تعبیری دخی وزیر کتخداسی دیمک ایدی ایکنجی درجه اعتبار اولنان مناصب چاوش باشلیق و ضربخانه و مطبخ عامره و شهر و ترسانه و کمرک امانتلی کبی مأموریتلر اولوب بونلر قپوجی باشلره و خواجکانه توجیه اولنور و بیوک و کوچک میراخورقلر و قپوجیلر کتخدانی و بلوک اغالقلری و طویجی و جبهجی باشلیق قپوجی باشلره تفویض قلنور ایدی میرعلمک فی الاصل مناصب مذکورہ مثللو مستحق اولنلره و یریلور ایکن صکرملری قپوجی باشیلرک اک اسکیسنه مخصوص اولمش و بالجله قپوجی باشیلرک ضابط و رئیس اولق حیثیتی اکتساب ایلمشدر نشانجیاق و دفتر امانتی مناوبه صورتیلر و شق ثانی و ثالث دفتردارقلرینک ایشلری بک خفیف و نوادر حکمنده قالمقله بومأموریتلر قید حیات و جهله عظمای رجاله توجیه اولنور و باش محاسبه و بیوک روزنامجه و اناطولی محاسبه سی و سائر قلم خواجه قلرندن عبارت اولوب مناوبه مناصبی دینلان مأموریتلر برسنهک اولق اوزره معزول قلان رجال و خواجکانه احاله قیلنور ایدی مفصلات توارینخده واسکی تقویم و قایع نسخهلرنده مسطور اولدیغی اوزره هر سنه عقیب عید فطرده توجیهات عمومیه اجرا اولنوب بالجله وزرا و رجال و امرای عسکریه و قپوجی باشی و خواجکان منصبلری ابقاء و یا مجدداً توجیه و سالف الذکر مناوبه مناصبک باش محاسبه و بیوک روزنامجه و اناطولی محاسبه سی مثللو بیوکلی کتخدا و دفتردار و رئیس معزوللرینه و کوچکلری خواجکانه تفویض اولنوب بونلردن دخی محروم قالانلره عطیه سنیه احسان اولنور ایدی .

قپوجی باشلیق و خواجکانلق رتبه لرینی حائز اولانلر اوتوزر قرقر کشیدن عبارت اولوب حتی صدراعظم داماد ابراهیم پاشا کندوسنک دیوان افندیسی خواجکانلق رتبه سیله بکام ایتک اوزره عرض ایلدکده سلطان احمد خان حضرتلری خواجکانک دفترینی طلب و یکریمی عدده بالغ اولدیغی معاینه ایدرک استکشار و اداره لری مشکل اولور جوابیلر شمدیلک تأخیرینی اراده بیوردقلری منقولدر.

ذکر اولنان مناوبه منصبلری قلم خواجه لکلری دیمک اولوب اگرچه هر قلمک خدمت مخصوصه لری و ارایسه ده کیسه دار و ممیزلری معرفتلیله اداره اولنمقله منصب صاحبی خانه سنده اوطورر و کیسه دار افندی تمهیر و صح اولنه جق اوراقی کوتور و پ ایجابی

اجرا ایتدیر ایدی هر قلمده مصالح جاریه دن خرج التیق و حصه اعتباریله منصب صاحبنه و کیسه داره و میز لره و موجود علمایه علی مراتبهم تقسیم قانمق قاعده مرعیه دن اولدیغندن اشبو مناوبه منصبلرینه نائل اولنلرک بوجهلله کچنر یلمسی اصول عصریه دن ایدی باش محاسبه دینلان قلم خزینه دولتک بالجلله قوانین و نظاماتنک و کافه قیوداتک مرکزی واک اهمیتلی بر موقع اولدیغندن کیسه دارلنی اکثریا دفتر دالغه مخرج اوله کلمشدر .

طریق علمیه رجالی فی الاصل مدت مدیده مقام حکومتده پایدار اوله کلمشدر ایکن کیدرک شیخ الاسلامق ایله نقیب الاشرافلمقدن ماعداسی مناصب موقتهیه منقلب اولمغه معلوم و معروف اولان ترتیب قدم ایله برر سنهک اولمق اوزره تفویض اولنور و بعضاً دخی تمید قیلنور ایدی مع مافیه خنکار امامانی و حکیم باشلیق واردو قاضیلنی کبی خدمات ممتازده بولنلر و فضائل مادر زاده مالک اولان مخادیم قاعده مرعیه نک خارجنده اوله رق طقرات محیانه ایله یکدیگره تقدم و شیوخ طریقک یکرمی اوتوز سنهده واره مدقلمری مراتبه از مدته ترقی ایده کلور لر ایدی .

فصول سابقهده بیان اولدیننی وجهله وزرا و میر میران و میرلوارلرک منصبلرینه مخصوص اولان خاصلر درجه درجه الفا و مقاطعات میریهیه الحاق قیلنوب بیک یوز اون تاریخننده واقع قارلویجه مصالحه سندن صکره بعض ولاته مجدد آخاصلر تخصیص واهالی مملکت اون بش سنه تمتد اولان محاربه سببیه تکالیف متنوعه تحتنده ازلمش اولدیغندن اشبو خاصلر وارداتیه کچنوب ظلم و جور دن اجتناب ایلمری تنیه قلمشیدی لکن بودخی دوام ایده مامکله یالکز صدارت و قیودانلق و نشانچاغه مخصوص برر مقدار خاص قالب رجال دولته تخصیص اولنان زعامت لر دخی قید حیاته منقاب و ایراد حکمنه متحول اولدیغنه و حاصل اولان منافعلری بو عصره کوره ادارهیه کافی اولمدیغنه مبنی کرک استانبولده و کرک طشره لرده بولنان ارباب مناصبه صور عیدیه ایله واردات معینه تشکل ایلدیکه بوجه آتی بیان اولنور اوله مقدمه قبربس و مؤخر آیدین سنجاقلرندن مقام صدارته مخصوص اولان خاصلر سنوی درت بشیوز کیسهیه قدر ملتزمینه الزام اولنه کلدیکی و فاتح و سلطان سلیم و سلیمانیه و قفلرینک اداره لری صدر اعظم لره محول ایدو کندن بعد المصارف بوندن دخی بر ایکیوز کیسه منافع حاصل اولدینی اداره ایدنلردن منقولدر .

نایا وزرا توجیهاتنده و با خصوص افلاق و بغداد و بوده لقلری تبدلنده صدر اعظمه

وزیر کتخداسنه و مکتوبچی و تشریفاتی افندیله و دائره صدارت خدمه سنه عوائد مصر و بغداد و حلب و شام و الیرندن هدایای معتاده مرتب اولغله بعض اسکی تشریفات دفترلرنده کورلدیکی اوزره بونلردن عصر من حسابجه مقام صدارتده بولنانلره سنوی یکر می بیک کیسه مقداری واردات معینه حاصل و ارتکاب و ارتشایه میانه کوره منافع غیر مشروعه به دخی واصل اولورایدی صدر اعظم و کبرادائرلرنده توابعاته ایلق و یرمک عادت اولیوب انجق دائره صدارت اوچ بشیوز کشیدن مرتب اولدیغندن ماعدا آمدچی و مکتوبچی و تشریفاتی و کتخدا کاتبی قلملری خلفاسنه کیلار صدر اعظمیدن تعینات و یرله کلدیگندن مطبخ مصارفاتی کلیتلو شیئه بالغ اولور و عیدیه و نوروزیه مثللورکاب هایونه تقدیم اولنان هدایای معتاده دن بشقه صدر اعظملر سرای هایونه کیتدجه و باب فتویه و ترسانه و حریقله عزیمت ایلدجه و تبسیدله چقدجه آوچ آوچ التون و یرمک معتاد ایدوکنندن صدراعظملرک بعض مسرجه لری حین عزللرنده مدیون چیقارلرایدی .

شیخ الاسلاملره و صدور و عظمای موالی به ارپه لق نامیله برر ایکیشر قضانک حکومت شرعیه سی محول و اورالره نائب کوندروب حاصلات واقعه نیک برمقداری نابلره و قصوری ارپه لق صاحب لرینه عائد اولق اصول جاریه ایجابندن اولدیغندن مقام مشیخته بولنانلر اشبو ارپه لقلردن مستفید اولدقلرندن بشقه مناصب علمییه توجیهاتنده بوغچه بها نامیله معیناتلری و دائره لری خلقنک عوائداتی اولمسیله و قدیم سلطان بایزید مدرسه سی مدرسلکی و اوقافی اداره سی دخی مقام فتواده اولانلره مخصوص بولتمسیله منافع عظیمیه دسترس اولورلر و بالفعل قاضیه مسکر و استانبول قاضیسی بولنانلره کذلک ارپه لقلردن و کندولرینه مخصوص حکومت شرعیه خرجلرندن مبالغ و فیره حصول بولور ایدیکه یقین و قتلره قدر روم ایلی قاضیه مسکرلرینه سنوی اوچ درتیک و اناطولی قاضیه مسکرلرینه بیک بشیوز ایکیک کیسه راده لرنده و منافع حاصل اولدینی اغزلرندن استماع اولتورایدی .

قبودانلق منصبه کلیولی سنجاغیله بوغچه اطه و لنی جزیره لری منضم اولدینی منللو قبودان پاشالرک بالجله اطه لره و تونس و طرابلس و جزایر او جاقلرینه بر نوع نظارتی بولندیغندن مقاطعات میریه فضلہ سندن و عوائدات و هدایای رسمیه سندن خلیجه مبالغ حاصل اولور و مصارفات ضروریه سنه بلغا مبالغ کفایت ایدر ایدی وزیر کتخدالرینک صدر اعظملرک وارداتی صره سنده بیان اولنان عوائداتدن و دفتر دارلرک الزام اولنان مقاطعات میریه قلمیه و خرجلرندن و رئیس افندیلرک اذن سفینه و سائر مواد متنوعه

حقنده صادر اولان فرمان خرجلرندن معین اولان وارداتلری کایتلو شیئه بالغ اولوب
حتی برایکی سنه بومنصلرده بولنان وتلف وسرف مثللو صفات مدخوله دن بری اولانلر
بعدازین مضایقه جکمز دیرلرایدی .

تیمار وزعامت توجیهاتی الفااولنجهیه قدر دفترخانهك توجیهات مرقومه ومرافعات
ومحاکمات ضمیمه اخراج ائدیریلان قیودات خرجنده شهریه ایکی یوز اللی کیسهیه
قریب حاصلاتی اولوب دفرامینی وکیسه دارینك وسائر ضابطان وکتابه سنك بوندن خصص
معینهلری وارایدی وکتابهیه مخصوص زعامتلمنحل واخلره توجیه اولندقدده ایلك سنه لکی
دفتر امینلرینه عائد ایدی ترسانه وضرابخانه امینلرینك ترسانه وضرابخانهیه مربوط اوجاقلق
ومقاطعات ومعادن اداره لرندن خرج وقلمیهلری ومناصب سائرهنك دخی معاملات
مأموریتارندن خرجلری وارایدی دولتك اساساً اوچ قلمی اولوب بونلرك برنجیسی
دیوان هایون ایکنجیسی خزینئه عامره اوچنجیسی دفترخانه خاقانی کتبه سی اولمغله اشبو
قلملره مخصوص ایکی اوچیوز قدر زعامت اولوب آمدی ومکتوبی قلملری ودوائر
سائرده وقتاً بوقت ترتیب وتشکیل قلنان قلملر مأموریت عد اولورایدی وبوجهتله او
قلملره مخصوص زعامت یوغیددی حاصل کلام کافئه ارکان دولت ومأمورین وکتابه وخدمه
وجه مشروع اوزره معین ومرتب اولان عوائد وخرچ ورسوم معتاده ایله تعیش ایدوب
فقط وزرا وکبرادن تقاعد ایدیلان ونادراً استانبول جوارنده واکثریا بروسه وکلیبولی
وتکفورطاغی مثللو محللرده اقامه اولنان ذواته کمرکلردن بشریوزبیکرغروش درجه سنده
ماهیه وبعض علیل واختیار کتبه ومحتاجینه کمرکلردن تقاعد علوفه سی نامیله برر مقدار
شی احسان اولورایدی ارکان دولتك ثروت وسامانلری ایسه تحصیل علوم ومعارف
وتسهیل خواجه انام ایچون بنا وانشا ایلدکلری حیرات ومبرات ایله قیاسیله متبیین اولوب
ایچلرندن ازقضا یاخود بالاقضائی ومصادره اولنان ویا حریق وسائره مثللو بلایای
کونییه کرفتار اولناره کلی اعانه لر ایدرلر ایدی حتی سلطان محمود خان ثانی عصرنده
کتبخدالقدن منفصل بولنان هادی افندینك قوناقی کافئه اشیاسیله محترق اولدقددهرطرفدن
وارد اولان اعانات ایله قوناق یاپلدقدن ولوازمات بیتیه تدارك اولندقدن صکره ایکیوز
اللی کیسه مقداری فضله قالدینی وبعض تکلیفسز احباسنك معرض لطیفه ده بو حریق
سزمه ایکیوز اللی کیسهیه اولدی دیو توریه ایلدکلری منقولدر .

قوجی باشلر ایکسی علی طریق المناوبه سرای هایونده واقع اورته قپوده نوبت بکلمك

و جمعه سلاماقلرنده وایام رسمیهده جمله سی رکاب هایونده بولنق اوزره مأمور اولوب بولنک ما-وننده برطاقم صلاحوراغالر دخی وارایدیکه بولنردخی رکاب هایون خدامندن معدود و رسم کونلرنده ذات شاهانه نك آتلیینه بینوب تعلیم کنان عرض حمشت ودارات ایدرلرایدی دیوان هایون قلمیله آمدی و مکتوبی و کتخدای کاتبی و دفتر دار مکتوبجیسی او طه لری کتبه سنك بعض متحیزانه خواجکانق رتبه سی توجیه اولنق اوصولاً مجاز اولمغله بولنره مناوبه منصبلرندن مناسبه توجیه قلندیفی مثللو ذکر اولنان قپوجی باشی و صلاحور اغالر و دیوان هایون خدامندن اولوب متفرقه تعبیر قانان و کدکلوزعامت صاحب لری بولنان زعما و منصبسز قلان خواجکان تحصیل اموال میریه و تحقیقات امور معظمه و مصادره مخلفات وزرا و اغنیا و سوق عسکر و بعض وزرای بر منصبدن دیگر منصبه و یا خود منفایه کوتورمک و یا قتل ایلمک مثللو خدمات موقهده استخدام اولنورلر وایشنك درجه سنه کوره منتفع اولورلر ایدی .

بیك تاریخنندن صکره وزرا تکثر ایلدیکنندن میرمیران منصبی اولان ایالات وزرایه توجیه اولنه کلمکله بکلر بکیلرک اکثری بالطبع میرلوالق منزله سنه تنزل ایدرک عهده لرینه برر سنجاق تفویض قیلنور ایدی کیدرک وزرا بر درجه دها تزیاید ایلدیکنسه مبنی ایالات داخلنده بولنان سنجاقلردن بعضیلری و یا خود برایکیسی برلشدیریلهرک وزرایه توجیه قلنق و افلاق و بغداد داخلنده بولنان خونین و بندر و سائر سرحد قلاعی محافظلری بولنان وزرا و امرانك مدار تعیشلری اولق اوزره روم ایلی و اناطولیدن الحاقاً مناسب سنجاقلر تفویض اولنق اصولدن اولدی زیرا او مثللو سرحدات محافظلرینك حوزه حکومتلری ضیق و حاصلاتلری قایل اولمغله و قاعده قدیمه اوزره خاص تعیینی دخی متروک بولنمغله بوجهله اقدار اولملری ضروریاتدن ایدی بر سنجاقدن مقاطعات میریه کثرت اوزره اولوبده زعامت و تیمار و اراضی موقوفه از بولنور ایسه ولایه ایچون اول سنجاق نمدار اولوب عکسی تقدیرنده بی حاصل اعتبار اولنور ایدی چونکه زعامت و تیمار داخلنده بولنان اراضی بی صاحب دیرلک بولنانلر و اراضی موقوفه بی متوالیر تعشیر ایدم کلمکله بولنردن وایلره منفعت عائد اولمیوب مقاطعات میریه ایسه بدلات مقیده لرله ولایه الزام قیلنور و انلردخی ضایعیه ملتزمینه الزام و منافع و فیره استحصال ایدرلر ایدی مع مافییه بر

سنجاقدہ سکسان یوز مقاطعه وار ایسہ والی بولنانلر انک بش اون عددینی ارکان دولت واندرون رجانک طلب وشفاعتلری اوزرینہ بدل مقیدہ ویاخود جزئی ضایم ایلہ منتسینہ ویرمکہ مجبور اولدینی مثللو بش اوننی دخی مملکت وجوہ واشرافنہ ویرمقدارینی دخی دائرہ لری متحرانہ ویرر و ماعداسنی دکریلہ طالبلرینہ احالہ ایدر ایدی

ولایہ و متصرفین محول عہد لری بولنان سنجاقلرک ملحق قضالرینہ دائرہ لری کدکلورلدن ویاخود محللری خاندانلرلدن ویرودہ لر نصب و تعیین والحقافہ عہدہ سندہ بشقہ سنجاقل وار ایسہ اکا دخی مسلم ارسالیلہ ادارہ ایتدیردیکی مثللو محافظ قلاع بولنان و سفیرر اولان و بالاقضا سرحدات خاقانیہ دہ اقامہ اولنان وزرا و امرا کنیک مسلم نصیلہ منصب لری اولان الویہ بی ادارہ ایتدیرلر و منصبی حاصلاتندن برمقدارینی مسلمہ ترک ایدوب قصورینی اخذ ایلرلر ایدی بیک ایکوز اوتوز طقوز تاریخنہ و دین و نیکبولی سنجاقلری والیسی اولان سنکلی ابراہیم پاشانک اولوقت کتخداسی بولنان کمرچی صالح پاشا مرحوم نیکبولی سنجاغی مقاطعاتی بک منفعتی اولدیغندن بعد الحرج والمصارف والیہ اوچیک کیسہ منفعت قالور ایدی دیو روایت ایدردی

وینہ اواخر سلطنت محمود خان ثانیدہ الویہ ثلاثہ یعنی یانیہ و ترحالہ و سلانیک والیسی اولان سرکاتبی مصطفی نوری پاشا مرحوم دن بالمشافہہ استماع اولنمشدرکہ سلانیک و ترحالہ مسلملری بولنان میرمیرانلرہ یکریمی بشریک غروش ماهیہ ویرر و دربندان محافظہ لرنده بولنان ارنود سرکرده لرلہ معامہ دائرہ سی خلقی درتیک کشیہ بالغ اولور ایکن بالجلہ معاشات و مصارفاتی تسویہ اولندقدن صکرہ کندوسنہ سنوی اون بیک کیسہ دن متجاوز منفعت قالور ایمش و بو حاصلاتک اکثریسی ترحالہ سنجاغندن اولوب سلانیک و یانیہ سنجاقلری بالنسبہ نمادار اولدیغنی و مملکتلر توزیعمانہ کرک عینا و کرک بدلا کندوسی و دائرہ سی ایچون برپارہ وضع ایتدیرمدیکنی و المدیغنی مرحوم مشارالیه افادہ و توثیق ایدر ایدی وینہ اواخر سلطنت محمود خان ثانیدہ پارس سفیری اولان احمد فتحی پاشا مرحومہ ایدین سنجاغی توجیہ اولنمغلہ الوقت فریقاندن بولنان سر عسکر اسبق نامق پاشا حضر تلری یکریمی بشریک غروش ماهیہ ایلہ دولتجه مسلم نصب اولنمشیدی برمدت مرورندہ سفیر مشارالیه

موقتاً استانبوله واورادن منصبی اولان ایدینه کلمه کده سنجاغک منافع مقاطعاتی کاملاً کندوسنه عائد اولمق وقبوالتی حاصلاتی وسائر طایرات ایله کچندکدن ماعدا ماهیه یکریمی بشیک غروش دها کندوسنه ویزلمک اوزره مشارالیه نامق پاشایه تکلیف ایدوب اودخی بوصورتی قبول ایلدیکندن اقباسندن احمد افندی نامنده برآدمی مسلم نصب ایتیش و او سنه درتیک کیسه قدر منافع حاصل اولدیغی ثابت اولمش اولغله سلطان محمود خان حضرتلری اولوقت مقاطعات ناظری بولنان نافذ پاشایه اعلام ایتدیردک نصفی فتحی پاشایه ویروب نصف دیگرینی خزینیه الیرمشدرکه بوقضیه فتحی پاشا ایله نافذ پاشا بینده از لان عداوتک منشئدرکه بومثاللری ایراددن مقصد عاجزانهم نمدار سنجاقلره والی و متصرف اولنلرک منافع عظیمه به دسترس اوله کلدکلرینی واهالی اوزرینه طرح اولنان ویرکولره کندولری ایچون پاره ضم ایتدیرمکه احتیاجلری اولدیغنی بیاندن عبارت اولوب لکن طریزون وکردستان وارضروم سنجاقلری مثللو مقاطعات میریه منافعندن عاری اولان سنجاقلرک والی و متصرفلری بولنان وزرا و میر میرانک دائره لرینه کفایت ایدمک ذخائر وسائر ااهالی اوزرینه طرح اولنان ویرکویه علاوه استحصال اولنور و طایرات تعبیرقلنان وارداتکه قبوالتی حاصلاتی یعنی تحصیلیه وارباب جنایتدن الثان جریمه وویوده لرک وامرای اکراد وعشایرک تقدیم ایدمکدکلری ویرکوی مقطوع وهدایای معتاده و بعض رسوم متفرقه دن عبارتدر ولاتک مصارف نقدیه لری بونلر ایله تسویه قیلنور ایدی حاصل کلام هر ایالت والویه نک والی و متصرفه عائد اولان حاصلاتی وقتاً بوقت تأسس ایدوب هیچ بریسی دیگرینه تمامیه توافقی ایتمز ایدی

وسط الحال اولان بروزیرک دائره سنی دخی تعریف ایدمکله میر میران و متسلم وویوده لرک دائره لری و متصرفلری بوندن قیاس اولنه بیلنسون اولاکتخدا و دیوان افندیسی و مکتوبچی و کتخدا و خزینیه کاتبلری و امام و حرم کتخداسی مثللو متحیزاندن بشقه اوله رق هر وزیرک ایچ اغالرندن یکریمی درت کدکلیدی بولنمق تعامل اقتضاسندن و بونلرک جمله سنک رئیس وضابطی سلحدار اگا اولمق اصول مرعیه ایجابندن اولوب سلحدارلر دائماً پاشانک یاننده بولنور و سلام اغاسی و قپوجیلر کتخداسی تشریفاتجیلق وظیفه سنی ایفا ایدرلر ایدی بونلردن صکره خزینیه دار و مهرداد و دوتدار و خفتان اغاسی و چوقدار اگا و ایچ اوغلان باش جاوشی و چاشور اغالریکه وزرانک اک زیاده محرمی اولوب اکثریا کوله لرندن و گروه شباندندر دها صکره وکیل خرج و انختار اغاسی و سنجقدار و طوغچی

باشی و توتونچی باشی و ابریقدار اغا و کیلارجی باشی و معجون اغاسی و مقرمه‌چی باشی و سفره‌چی باشی و میراخور و سجاده‌چی باشی و بشکیر اغاسی و قهوه‌چی باشی صاحب کدک اولوب هر بریسنگ دخی اوچریمانی بولندیغندن بو جماعت سکسان یوز کشی‌یه ودها زیاده‌یه بالغ اولورایدی ثانیاً قواص و تاتار و مهترخانه طاقی و ساییس و عکام و مشعله‌چی و اشچی و سرایداری کبی تتمه دائره دخی لاقول یوز الی آدمه بالغ اوله کلمشدر صکره‌لری وزرا دائره‌لرنده قواص صنفی تکثر ایتمش ایسه‌ده فی الاصل بونلر درت یا الی کشیدن عبارت اولوب قوس طاشرلر و پاشالرك یاننده یاور مثللو بولنورلر ایدی بر درجه‌یه قدرمنز لخانه‌لر قدیم اولدینی حالده منتظم پوسته‌لر ترتیب اولنماش اولدیغندن كرك استانبوله و كرك جوارده بولان ولایه و امرايه ایصال اولنه‌جق محررات تاتارلر واسطه‌سیله کوندرملك اصول جاریه‌دن ایدوکنندن هر وزیرك دائره‌سینده برتاتار اغاسی و برتاتار اوپه باشیسی تحت اداره‌لرنده اوله‌رق قرق الی تاتار بولنمق مقتضی اولوب بو خدمتی فی الاصل فرسرانلق ایله مشتهر اولان تاتار قومی ایفا ایده کلمشدر ایکن مؤخرأ هر درلو کسان بو صنفه داخل اولغله اسم جنسی اسم نوعه منقلب اوله‌رق جمله‌سینه تاتار دینلمشدر وزرانك اوچر و میرمیرانلرك ایکیشر طوغنی اولدینی مثللو وزرانك طقوز قات یعنی طقوز طاول و طقوز سورنا و طقوز بوری و طقوز دومبه‌لك و میرمیرانلرك یدیشرقات مهترخانه‌لری اولوب کونده ایکی نوبت یعنی ایکسندی و یاتسو عقبنده چالنور و بر محلدن دیگر محله عزیزمتمده طوغلرك بریسی برکون اول قونا قجی ایله کوندریلور و دیگرلری پاشانك اوکنده چکیلور ایدیکه بونلرك هیئت و کیفیتلری رسم کتابلرنده مصوردر

ثالثاً کدکلو ایچ اغالرینگ ظوبو تعبیر اولنور اوچر بشر خدمتکارلری و قوغوش و اشاقلری و ساییسلری اولغله بونلر دخی سکسان یوز کشی‌یه بالغ اولور و بر آدم دفعه ایچ اغاسی اوله‌میوب اولانظوبو اولق و بعد التریبه ایچ اغالری سلکینه ادخال قلمق قانون تعامیلری اقتضاسندن اولغله اغالردن بریسی ظوبوسنی چراغ ایده‌جک اولدینی حالده لازم کلانات واسلحه و البسه‌ی اعطا و برضیافت ترتیب ایدوب خزینه اوپه‌سینده کدکلو اغالر حضورنده دعا اوله‌رق و باشنه قاقو کیدریله‌رك سلک اغواته ادخال قنور ایدی حتی وزرا و امرا کوله‌لرنده بیله بوقاعده اجرا اولندقجه ایچ اغاسی قاوغنی کیمک قابل دکل ایدی کذلک ایچ اغالردن بریسنگ سرقت و سائره مثللو جنایت عظیمه‌سی ظهور ایله کده‌ینه بالاجتماع باشندن قاوغنی النوب سلک اغواتدن اخراج اولندقدن صکره تربیه‌سی و یریلور

وبوکا اصطلاحاً لرنجه کجه کلاه ایدلدی دینلور ایدیکه فیما بعد او آدم هیچ بر دأئرده ایج اغالنی ایده میوب صنعت اخره سلوک ایلکه مجبوردر

رابعاً وزرا دأئرلرنده بر تفنگچی باشی و بردلی باشی بولنوب بونلرک رفاقتنده یوزر یوز الیشیر نفر عسکر بولنور ایدیکه تفنگچی طاقی پیاده ودلی گروهی سواریدر ارضروم و دیاربکر و موصل و بغداد و شام و حلب مثللو ایالتلر و الیرینک اوچر بشر تفنگچی باشی ودلی باشیمی بولنق مقتضی اولمغله ایچلرندن برینه سرچشمه اطلاق اوانوب بیکباشی حکمنده و دیگر تفنگچی باشی ودلی باشیلر یوزباشی مقامنده طوتیلور ودلی باشیلر معیتلرنده ملازم کبی اولان ضابطه کوکلی اغاسی دینلور ایدی فی الاصل وزرا میرمیران دأئرلرنده الیشیر التیشیر کشیدن عبارت اوله رق اونریکر میشر بیراق لوند و بوکا متناسب صاری سکیان استخدام اولنور ایکن وقت وقت بونلردن جلالیلر ظهور ایتک و سائر وجهله مضرتلری کورلمک حسیله بیک یوز تاریخندن صکره لری لغو و ذکر اولنان تفنگچی ودلی طائفه لری احداث اولمغه باشلدی برمدت مرورنده بونلرک دخی انتظام و انضباطلرینه و هن و خلل طاری اولدیغندن قیوسزدلی باشیلر زیرایتلرنده اولان حشرات ایله کویدن کویه کزوب اهالی په انواع ظلم و تعدی په جسارت ایدرلر و بالضروره وزرا و امرا بونلری یانلرینه الوب مضرتلرینک دفعنه مجبور اولورلر ایدی مع مافیه سابقارده اولان جلالیلر کبی تجمع ایدرک طرف دولته عصیان و طغیانلری واقع اولماش واسم صحیحلری پیشدار معانسه اوله رق دلیل عسکری اولدینی خالد بالتحریف دلی تعبیری زبازد اولمشدر بوطائفه (قالاقلریمز امیر المؤمنین حضرت عمر رضی الله عنک چیزمه سنک قونجغیدر و او جاعمز مشارالیه افتدمزه منسوبدر) دیرلر ایدی بونلری بغداد و الیسی مشهور احمد پاشانک باباسی حسن پاشاییک یوز اوتوز بش تاریخارنده و ایران سفرلری هنکامنده بر درجه دها تنظیم ایش اولمسنه نظراً بو اعتقادک وضعی غالباً ایرانیلره شدت خصوصتلرینی استلزام ایلک مقصدینه مبتنی اولمسی ظن اوانور

ایج اغالری ملحقات ایالات والویه په مباشرلک ایله کیدوب درجه لرینه کوره خدمت مباشریه اله کلدکلرندن و متسلم و و یوده لر جانبدن دخی عوائد معتاده لری اولدیغندن بونلره ماهیه ویرلمک عادت اولیوب وزرا و امر یالکز دأئرلری خلقتک دیگر صنفارینه برر مقدار معاش اعطا ایدرلر ایدی بناءً علیه اولوقتک مصارفاتی عصر من حسابنه اصلاً نسبت قبول ایلز

بوفصلك حاوی اولدینی زمانده مخرج وزارت تنوع ایدوب اولاختکار سلحدارلرندن
ومیراخور وبوستانچی باشی کبی سرای هایون منسوباتندن اولنلره ثانیاً وزیر کتخداسی
ودفتردار ورئیس مثللو عظمای رجاله وبعضاً یکیچری اغالرینه وقبوجی باشیلره ثالثاً شام
وموصل خاندانلرندن عظم زاده وعبدالجلیل زاده لر مثللو طشره اکا برینه رتبه وزارت
احسان اوانه کلوب وزرا کتخدا وسلحداروخزینهدارلرندن ودلی باشیلرندن محاربه لرده
اظهار شجاعت وایاقت ایدنلره قبوجی باشیلیق ومیرمیرانلق ووزارت ویرملک دخی معتاد
حکمنه کیرمشیدی چونکه عامه نك نظرنده لازمه وزارت شجاعت وجلادت وفن
فروست وسلاحشورلقده مهارت خصلتارینه منحصر اولوب علم وعرفان داخل دائره
حساب اولمديغندنا کثروزرا وامرا جاهل وامی اولملریله مبالغ ادرا کلرینه کوره حکومت
ایدرلر وبعضیلرینه ارباب لیاقت وقابلیتدن دولتجه کتخدا نصب اولنور ایدی مع
مافیہ کوپرلی اوغلی صدر اسبق فاضل احمد پاشا وبرادری صدر شهید فاضل مصطفی
پاشا وانك اوغللری صدر اسبق نعمان پاشا وعبدالله پاشا واسعد پاشا ونعمان پاشانك اوغلی
قائم مقام حافظ احمد پاشا وعبدالله پاشا زاده عبدالرحمن پاشا عصرلرینك فضلا سندن اولدقلری
مثللو صدر اسبق شهید علی پاشا وحکیم اوغلی علی پاشا ودفتردار عزت علی پاشا وعصر
محمود خان اول وعثمان خان ثالثده ریاست ودفتردارلق و وزیر کتخدالرندن نائل رتبه
وزارت اولان پیرمصطفی پاشا ومشهور راغب پاشا وراقم محمد پاشا ونائلی عبدالله پاشا ویکرمی
سکنز چلبی زاده سعید پاشا وطوپال عثمان پاشا زاده احمد پاشا وعظم زاده خاندانندن
وسائرهدن بعضیلری اصحاب علم وکمالدن ایدیلر

سلطان سلیمان مرحوم د نصکره سلطان محمد ثالث اکری محاربه سنده وسلطان عثمان
ثانی له سفرنده وسلطان مراد رابع روان وبغداد فتحلرنده وسلطان محمد رابع قانیجه
محاصره سنده وسلطان مصطفی خان ثانی اوج سنه متوالیاً نمچه محاربه لرنده بالذات علم
افراز غزا وجهاد اولوب بونلردن بشقه وقوعبولان محاربات عدیدیه صدر اعظم لرسردار
اکرم نصب اولنهرق اعزام قلنمق قاعده سی تأسس ایتمشیدی لکن سردار اکرم لر
نفوذ تام ودولتک قوه اجراییه سی حائز اولمغله ترسانه وضربخانه وکمرک امینی مثللو
ایشلری مطلقا درسعادته بولمغه منحصر اولنلردن ماعدا کافه ارباب مناصب وطوائف
عسکریه اوجاقلری واغالری وحقی وزرای عظام قبو کتخدالری بیله اردی هایونله عزیمت
ایدوب استانبولده کتخدا ودفتردار ورئیس وسائر اهل مناصبک وکیللری قالور

وبالجملة توجیهات و تشریفات موکب هایونجه اجرا قیلنور ایدی ولایه و متصرفین دخی دائره لری خلقی و تحت لوالرنده بولنان زعما و ارباب تیمار ایله معسکر پادشاهی به کلوب طرف طرف قلاع خاقانی محافظه لرینه و سرعسکرلر معیتلرینه تعیین اولنهرق ایفای وظیفه ایدرلر و منصبلرینی بر اقدقلری متسلملری واسطه سیله اداره ایتدیرلر ایدی

— احوال عسکریه —

فصول سابقه ده بیان اولندیغی اوزره دوشیرمه چو جتلرینک سرای هایونلرنده و عجمی اوغلانلری قشله لرنده تربیه کورمک و بعدد عسا کر موظفه سلکینه ادخال اولنق و علی الدوام قشله نشین اولوب صنعت اخری ایله متوغل اولماق قاعده لری متروک اولمغله ایجاب ایتدجکه بورجکی و جمال و مناو منلو اصحاب سو قدن یکچیری یازیلوب لازمکلان محله کوندریلور و ختام سفرده هرکس کار و کسبیه مشغول اولور ایدی بیک طقسان درت سنه سنده حادث اولوب بیک یوز اون سنه سنه قدر متمد اولان سفر مشهورده درت دولت ایله محاربه جریان ایده کادیکندن هر سنه کلیتلو عسکر یازلمغله جیوش موظفه نک عددی و علوفه لرینک مقداری فوق العاده تزیاید ایلدیکندن عقد مصالحه دن اون ایکی سنه صکره وقوع بولان روسیه محاربه سنه قدر محمولات عسکریه خزینه مانده ایدلدی ذکر اولنان روسیه و متعاقباً واقع اولان موره و نجه محاربه لری دخی بیک یوز اوتوز بر سنه سنده ختامه رسیده اولوب ابراهیم پاشانک اوان سفیهانه سی ظهور ایتکله وقوع بولان علوفه محمولاتی مستمر آ خزینه مانده ایدیلهرک تنقیص عسا کر موظفه ده دوام اولنور و هر سنه نمقدار مبالغ خزینه یه قالمش ایسه ایشکذارلق و صداقت شعارلق معرضنده اولوقتک و قایعنامه سی اولان راشد تاریخنه درج قیلنور ایدی مؤخرأ واقع اولان ایران سفرلرنده اکثریا زعما و ارباب تیمار و وزرا و امرا دائره لری و عشایر عسکرلری استیخدام اولندیغندن و عصر محمود خان اولده حدوث ایدن نجه و مسقو سفرلری دخی ایکی اوچ سنه ده ختام پذیر اولدیغندن چوقلق عسا کر موظفه تحریر قلمدی اگرچه بوجه مسطور اصناف و سائرده دن ایجاب ایتدجکه یکچیری یازیلوب اقتضایدن محله اعزام قلمق قاعده دن ایدیه ده بو حواله دخی لاجرم یکچیری و سائر عسا کر موظفه اوجاقلری افرادینه داخل اولمق و بونلره مخصوص علوفه یه تملک ایلک بر دفعه اولسون سفر ویرمکله حاصل اولدیغندن نفرات عسکریه شداپد سفریه و احوال حربیه یه اولدجه واقف و مألوف ایدیلر موره

سفری عقبیده و علی روایة بیک یوزاللی اوچ سنه سی خلالنده علوفه تعیر اولنان معاشات
 عسکرینه نک بیع و شراسنه مساعدده اولمغله بیک تاریخدنبرو انتظام و انضباطلری بوزلمش
 اولان جیوش عثمانیه نک اولانجه قانون و قاعده لری دخی مختل و پریشان اولدی چونکه
 چوق وقت حکمکسزین علوفه عسکرینه نک اکثریسی اتباع و اصناف مقوله لری طرفندن
 اشترا اولنهرق عادتاً ایراد حکمنه کیردی بناء علیه عسکرلک بشقه و علوفه خوار اولمق
 بشقه شی اولوب یکچیریلک دعواسیله طفره فروش اولان بورجکی و حمال کبی اشخاصک
 بازولرنده اولان نشانلردن ماعدانہ تعلیم و تربیه جهتدن ونده و وظیفه و علوفه یوزندن
 یکچیریلکه اصلاً تعلقلری یوغیدی لفظاً و معناً یکچیچی دنیله بیله جک کسان هر
 اورته نک قشله سنده اوسته و او طه باشی و بایراقدر و متولی و امام و قره قوللقجیلر مثالو
 بش التیوز قدر ضابطان و نفراتدن و قوللقلرده بولنان برر چورباجی ایله قوللق نفراتندن
 و حربه جی و موجی اطلاق اولنوب اغا قپوسنده بولنان بر ایکوز قدر کساندن عبارت
 ایدیکه بونلرک جمله سی انجق ایکینیک کشی یه بالغ اوله بیلیر ایدی

اوجاقلو بیننده یکچیچی اغالرینه قرق بیک قول اغاسی دنیلوب واقعا یکچیچریلک
 دعواسنده بولنان اشخاص قرق بیکدن چوق زیاده ایسه ده شرائط عسکرینه دن بی بهره
 ایدیلر بیک یوزاللی اوچ سنه سنده واقع بانغراد مصالحه سندن بیک یوز سکسان ایکی
 سفرینه قدر اوتوز سنه یه قریب محاربه ظهور ایتمک حسبله یکیدن عسکر یازلمدیغندن
 علوفه عسکرینه نک قسم اعظمی محلول اولمق لازمکلور ایکن بیع و شرامساعده سی بوکا
 مانع اولدی برده بیع و شراماده سی یالکیز اشخاص بیننده جریانه منحصر اولیوب یکچیچی
 اغالری دخی محلول اولان علوفه نک بر مقدارینی خزینه مانده ایدلمک ایچون طرف دولته
 اراثة و بر مقدارینی فروخت و بر ازینی دخی شوکا بوکا اعطا ایدرلر ایدی مثلاً هر علوفه
 اعطاسنده بشیک اچه محلول ظهور ایدرایسه بونک ایکینیک بشیوزینی دولته کوستروب
 ایکی بیکنی صاتار و بشیوزینی دخی کندو ادملرینه و بعض اوجاق یولداش لرینه و اندرون
 رجالی و ارکان دولت توابعاتی جانبندن رجا و التماس اولنان اشخاصه اوچر بشر اچه اولهرق
 تقسیم ایدرلر ایدی بومثللو اتباعی کروهنک عهدلرنده بولنان علوفه یه قبولی علوفه سی
 و ایرادجیلرک علوفه لرینه اوتراق علوفه سی اطلاق اولنه کلشدر حمال و بورجکی و مناو
 کبی اشخاصک همشهریلری کلده کده در حال کل یولداشم سنی یکچیچی یازلم دیو حریفی
 منسوب اولدقلری اورته نک قشله سنده کوتوروب قوللرینه اورته نک نشانی دوکدورلر

والله صفة تذکره سی ویررلر ایدیکه بوتذکره نك مالی (بزکه یکچریلر حاجی بکشتاش ولی پیرمز وارنلر واولیالر دستگیرمزدر قیرملقله بتیز بریمز اکسیلور ایسه بیکمز حادث اولور) یوللو برطالم مقالاتدن صکره فلانجه ادم اورته مزه کینک براقدی واولانمز دخوله طالب اولدی بزده اوجاغ عامر نك دفترینه قید ایدوب یدینه اشبو صفة تذکره سی ویررلر مضمونی حاوی اولوب اوسته واطه باشی طرفلرندن تمهیر قیلنور وجمعه سالملرلرند وعلوفه کونلرند قره قوللقجیلر بو مقوله اشخاصی جمع ویکچریلک قیافتنه وضع ایدوب ایفای مأموریت ایتدیررلر ایدی

علوفه سنوی درت تقسیط ایله ایفا اولنوب محرم و صفر و ربیع الاول آیلرینه مخصوص اولانه نفرو زننده مصر علوفه سی دنیلور و ربیع الاخر ایله جمادیه معین بولانلره رجیح و شهرور ثلثه مشهوریه عائد اولانه رشن وبقیه شهرور ثلثه ایچون لند علوفه سی اطلاق قیلنور که هر عربی آینک اشارات مخصوصه لری اولان حروفک ترکیباتیدر ابراهیم پاشادورندن سکسان ایکی سفرینه کلنجهیه قدر مجموع علوفه نك مقدار سنویسی تقریباً اون اون ایکییک کیسه راده لرند دوران ایده کلکده ایکن فصل اتی اواننده بر مقدار تزیاید ایدرک نهایت الغاسی و قتلرند یکر می بیک کیسهیه طوغری بالغ اولمشدر صورت تقسیم حقه ده معلومات اجمالیه حاصل اولق ایچون بیک اکیوز یکر می سنه سی مصر مواجبنده اعطا اولنان مبالغه صورت توزیع و تقسیم متضمن در دست ایدیلان بر قطعه دفتر عیناً ترقیم قلندی

❖ دفتر اجمال مواجب دراستانه عالیہ در قسط واحد ❖

کیسه دیوانی

یکچریان درگاه عالی	۱۹۹۶
ابنای سپاهیان	۰۳۳۴
ابنای سلحداران	۰۳۰۸
علو فجیان یمین و یسار و غربای یمین و یسار	۰۰۵۸
جبه جیان	۰۲۷۱
	۲۹۶۷
طوبجیان	۰۴۵۲
عربجیان	۰۱۷۹
خبره جیان	۰۰۳۰

لغمجیان	۰۰۰۵
خدم ترسانه عامره	۰۰۱۳
	۳۶۴۶
لوندات قانونها	۰۰۲۳
اندرون همایون اغالری	۰۰۲۴
اغایان متقاعدین	۰۰۰۱
مشاهره خواران	۰۰۳۱
چاوشان دیوان عالی	۰۰۱۴
	۳۷۳۹
بوابان سرای همایون	۰۰۱۰
خدام مطبخ عامره	۰۰۰۸
خدام اصطبل عامره	۰۰۱۳
بوستانیان خاصه	۰۰۴۰
بوستانیان بغچه ادرنه	۰۰۱۱
	۳۸۲۱
تبرداران	۰۰۰۴
مہتران خیم خاصه	۰۰۰۹
طبل و علم	۰۰۰۳
اهل حرف خاصه	۰۰۰۱
خیاطین خاصه	۰۰۰۱
	۳۸۳۹
پیکان خاصه	۰۰۰۴
خزینہ داران بیرون	۰۰۰۱
اطبای خاصه	۰۰۰۱
شرقا	۰۰۰۵
	۳۸۵۰

کیسه رومی التمش بیک اچہ اولدیغندن تمام بشیوز غروش ایدرایسده کیسه دیوانی
اللی بیک اچہ ایدوکنندن درتیوز اون اتی غروش کسور پاره ایدر بناء علیه عصر من
حسابنه کوره بالاده محرر مبالغ تقریباً یکرمی بر بیک کیسه به بالغ اولور

عالمه حقیقه جفی کون عقد دیوان اولنوب صدر اعظم وارکان دولات قبه التندم حاضر
وپادشاه عالم دخی نشیمنگاه معلومدن ناظر اولوب هراوجانک عالمه مقیدسی مشین
کیسه لر ایچنده اولدیغی حالد بشقه بشقه ایرلدقن ماعدا یکیچری اوجانک هراورته سه
ویرله جک کیسه لر دخی تفریق اولنور قره قوللقجیلر یکیچری بک دعواسنده بولنان
حمال واصناف مقوله لرندن صاحب یال وبال اولان برایکی بیک کشی بی اخشامدن قشله لر
جمع واطعام واکسا ایدوب ایرتسی کونی هراورته نک نفراتی ضابطله طاقم طاقم سرای
هایونده واقع اورته قویه کلوب طوررلر مطبخ عامره دن مقدار کفایه چور باو پلا ووزرده
حاضر لنوب باب السعاده پیشگاهنه وضع وقبه التندم بولنان قول کتخداسی وقت معینی
حلولنده لابس اولدیغی اونیفورمه نک اتکیلہ اشارت ایلدکده اورته قبوده منتظر اولان
یکیچریلر شتاب تام ایله سکیردوب اطعمه مذکورہ بی اخذ وساحه سرای هایونده اکل
ایدرلر ودرحال ذبح قرا بین اولنور زیرابعض مطالب اظهار یله اطعمه بی المدقیری وقوع بولمشدر
مصاحبت طعام قرین ختام اولدقن صکره ینہ جملہ نفرات اورته قویه چکیلوب طوررلر
بعده ضابطانندن مأمور مخصوص بلند اواز ایله برنجینک اغابوکی دیو چاغردقده درحال
اوبلوکک نفراتی سکیردوب کیسه لری دردوش ایدرک قشله لر ینہ کوتورورلر صرده سیله
ایکنجی و اوچنجی تالتمش دردنجی به قدر دعوت واعطای عالمه اولنوب التمش بشنجی به
کلدکده دعوتہ اجابت ظاهر اولماغله اوچ کره تکرار اولنور اوچنجی دفعه ده یوقدردیو
جواب ویرلدکده چاغیران ضابط طرفندن یوق اولسون دنیاوب التمش التنجی به کچر
وبووجهله اتمام توزیعات اولنور خلق بیننده مشهور اولدیغنه کورده شهزادکاندن بریسی
التمش بشنجی بلوکک قشله سنه فرار ایتدکده حمایه ایتیوب تسلیم ایلدکلرندن شهزاده اعدام
اولتمش وبعده بلوکک دخی سرحداته نفی قیلنوب قشله سی قیادلمش اولمغله بو وجهله تذکیر
وقعه اولنور ایش بو خصوصه دائر تاریخلرده برروایتہ تصادف اولتمش ایسده سلطان
محمد ثالث اعدام ایلدیکی شهزاده سی سلطان محمودک واقعه سی بوماده به منشأ اولدیغی بعض
سیاق وسباق قرینه سیله استدلال قنور

قشله لرده سرکی فرشیله نفراتہ ونفرات نامنه اولان ایرادجیلرہ توزیع مبالغ اولدیغی

صره ده طاس پاره سی نامیله یوزده اوچ بش غروش اخذ واورته صندیغنه وضع ایدرلر که دبوی دیمکدر اورته بر محله مأمور اولور ایسه لوازمات راهلرینی وقشله لرینک تزییناتی وضابطانک کش جبراستلرینی وایام رسمیه ده نفراته الباس ایلدکلری البسه یی بویاره لر ایله تنظیم و تسویه ایلرلر پادشاهان عظام حضراتی برنجی بلوکه منسوب واورادن علوفه خوار اولملریله اخراج مواجب قلندیغنک ایرتسی کونی یکیکچری اغاسی قیافتده وقرنا دخی حربه جی هیئتنده اوله رق تبدیلاً برنجینک قشله سینه عزیمت و دائره مخصوصه سنده که شهرزاده باشند و واقع عثمان بابا تر به سنک اوستی ایمش اوراده بر مقدار استراحت ایدوب علوفه معینه سی رسم معهود اوزره ایفا واستیفا اولنور

سپاه و سلحدار و علوخیان یمین و یسار و غربای یمین و یسار او جاقلریکه علوفه یومیه ایله موظف اولان جیوش عثمانیه نک سوارسی اولوب علی طریق التغلب جمله سینه درگاه عالی سپاهیلری دینلور و ایالات عسکری اولان تیمارلو سیاهیسنک غیریدر بونلرک علوفه لری باب عالیده واقع دیوان یرنده صدر اعظم و دفتر دار افندی و سائر ارکان دیوان و مذکور او جاقلرک اغا و کاتب و چاوشلری حاضر اولدینی حالده سرکی فرشیه ایکی اوچ کون اعطا اولنوب بقیه سی اغالرینک قوناقلرینه نقل واوراده توزیع قلنور و تانیخلرده دور واقع اولدی و صدر اعظمه خط هایون و کورک و خنجر کلدی دیو محرر اولان ماده بودر یعنی عسا کر دولتک علوفه سی تماماً اعطا اولدیغندن ناشی صدر اعظم نائل تشریفات اولور طوپیجی جبهه جی خبره جی قالیونجی بوسه تانجی و سائر او جاقلر نفراتنک علوفه لری طوپدن اعطا اولمغله قشله لرنده تقسیم و توزیع ایدرلر .

سپاه طائفه سی فی الاصل سرای هایونلرده تربیه کوردکن صکره بلوکلره چراغ اوانه کش و بوجهتله مراتب عسکریه نک برنجی درجه سنده بولمشیکن فصول سابقه ده بیان اولنان اسباب ایله نظام و انتظاملرینه خلل کلدیکندن متجاسر اولدقلری طغیان و عصیانلرندن ناشی نظر اعتباردن اسقاط اولندقلرینه و ذاناقشله و قره غولخانه لری بولنماق حسیه له وقت حضرده اصلاً خدمتلری اولدیغنه بناءً یکیکچری او جاغندن زیاده مختل و پریشان و علوفه لری ایرادجیلره منتقل اولمغله استانبولده بش اون سپاه چاوشی و او جاق کتخدالری مثللو ضابطلرندن غیری کیمسه کورلمز ایدی حتی علوفه اعطا اولنور ایکن تدارک ایده بلدکلری شرمه قایله یدآید اخذ علوفه ایدوب ایرتسی کونی تبدیل جامه ایله ینه کلورلر و قصورلرینک اسامیسی او قوندقده چاوشلری مرد غریب دیو جواب و یروب کویا غریبته بولندیغنی افاده ایلرلر ایدی .

طوپچی و جبّه جی و خبره جی و لغمچی او جاقلرینک طوپلری و عربهلری سیلوب و سپورمک و حاجا تعلیم ایلک مثللو وقت حضرده دخی خدمتلری و قشاهلری جوارنده اولان و حدود معینهلری داخنده بولسان محلارک محافظه سنه مأموریتلری و متعدد قرده غولخانهلری اولمغله و بونلرک ایچنده اصناف وار ایسه ده وقت معینده خدمتی باشنده بولمغه مجبوریتلرندن ناشی علوفهلری ایرادجیلره انتقال ایلامکله یکچریلره نسبتله حال انتظامده ایدیلر باخصوص عصر محمود خان اولده طوپچی باشلیق خدمتده بولان اوروپالو مهتدی احمد پاشا اولوقه کوره بو او جاقلری تنظیم ایدوب حتی بوسنه اهالیسندن اولق شرطیه یوزر کشیدن عبارت اوج بلوک خبره جی ترتیب ایدوب هر بلوکه بر یوز باشی و ایکی اللی باشی و اون نفر اون باشی تخصیص و وظائف یومیه و خدمات لازمه لرینی و قدیماً خبره جیلره مخصوص اولان زعامت و تیمارلر محلول اولدقه بونلرک امکدارانه ویرلمسنی تخصیص ایلمشدر ابتدای احداثدنبرو دولت علیه نک دونماسی چکدیری تعبیر اولنور و کورک ایله یورورسفن متنوعه دن عبارت ایکن کرید سفرلری هنکامنده یاکنن ایله یوریمکده اولان قالیونلر ایجاد اولنوب لکن لایقیه استعمانی بیلور ملاح یتشدیریه مدیکندن چوقاق فائده لری کورلماسنه مبنی فاضل احمد پاشا صدارتنده رفع والفا و قدیماً اوله کلدیکی وجهله ترسانه عامرده و جزیرلر میرلوالری معیتده قرق عدد امرای دریا چکدیریلری ترتیب قلمشیدی قره مصطفی پاشا و یانه سفرینه حرکت ایتمک اوزره ایکن مؤخرأ و ندیکلورلرک اوزرینه هجومی دخی تصمیم ایلدیکندن مجدداً الی قطعه قالیون انشاسنه تشبث ایایوب و یانه سفری ایسه له و وندیک و روسیه لورلر انضمامیه جسامت و اون بش سنه قدر امتداد کسب ایلمسیه قالیونلرک تکثیری ایجاب ایلدی و شهید علی پاشانک مورد سفرنده دخی استعمال اولنوب بالدفعات و ندکلورله غلبه چالندی .

بوندن صکره قالیونلر انشاسنه مداومت اولندی ایسه ده بیک یوز اوتوز تاریخنندن سکسان ایکی سنه سنده واقع اولان مسقو سفرینه قدر اللی سنه دن متجاوز محاربه بحریه واقع اولماغله قپودان پاشالر هر سنه دونمای هایون ایله اطه لر ارده سنده کزینوب درجه انصافلرینه کوره جزائر و سواحل خلقنی تجریم ایدرک عودت ایدرلر و برقاج خرسز کمیزی طوته بیلورلر ایسه فتوحات بحریه دن عد ایلرلر ایدی .

موجب دفترنده محرر ترسانه خلقنک اوتوز الی کیسه علوفهلری عصر من حسابنه کوره شهریه قرق بیک غروش راده لرنده اولوب ما وضع لهنه نسبتله جزئیاتدن کورندیکنه

مبنی بوبابده تفصیلات ویرمک لازم کلمشدر اولاً ترسانه عمله سنک اجاره نامیله معروف اولان اجرتلری وامرا و قبودانلرک وسائر ضابطان سفن حربیه سنک سالیه و مخصوصات تعینیه لری ترسانه خزینه سنندن اعطا اولنور ایدی ثانیاً فصول سابقه ده بیان اولندیغی اوزره مسلم و یورک نامیله اناطولی و روم ایلیده اللی بیک قدر آدم اولوب بونلره جانب دولتن برر چفتلک یعنی سکسان یوزر دوئم اراضی اعطا قلمش وزراعتلرینک اعشار شرعیه سی دخی بدل خدمت اوله رق کندولرینه ترک یعنی تمبیر اخرله عشردن معاف و مسلم طوتمش اولدقلرندن سفرلر وقوعنده نوبت ایله بشده بری یعنی اون بیکی سفره کیدوب تسویه طریق و حفر خندق کبی ایشلری رؤیت ایدرلر ایکن مؤخرأ بونلرک خدمت اصلیه لری ترک و الغا و کندولری دریا قلمنه الحاق قنده رق هر سنه بشده بری دونمای هایونده ایفای خدمت ایتمه مأمور ایدلمشلر ایسه ده سائر صنوف عسکریه کبی بونلرک دخی احوالری تغیر ایدرک عادتاً زراع اهالیدن فرقلری و اجرای خدمات عسکریه یه قابیلری قالدیغندن نوبتلیارندن هر ییل برر بدل النوب ترسانه خزینه سنه ایراد قید اولنق و سواحل ممالکده قالیونجی بیراقلری اچیلوب جمع اولنسان سکیز اون بیک کشی روز خضرده کیلره ادخال و اقدکزه اخراج اولنوب روز قاسمده کیلر ترسانه یه کتورمک و بیراق عسکریه رخصت ویرمک اصول اتخاذا قانندی بناءً علیه علوفه مسطوره کدکای قالیونجی دینسلان و دائماً ترسانه عامره ده موجود بولنان یلککنجی و طوپنجی اوستهاری و پاشا چاوشی و ترسانه باشاغاسی و چاوشلری مثللوبیک قدر آدمک علوفه لری ایدی اوئلده طوپ استعمالی بک ایلروله مامش اولدیغندن محاربات بحریده برایکی نوبت طوپ اتلدقد نصره دشمن کیلرینه صاریلوب رانپه یعنی اقدارمه اولنق جاری اولغله دونمایه وضع اولنه کلان کرک یکیکچری و کرکینه اوجله دن اولان بیراق عسکرلری اولدقجه ایشه رایه کلدکاری حالده مؤخرأ اسلحه ناریه استعمالی کسب و سمت ایلدیکنه و بیراق عسکرلری ایسه فن دریا و طوپ استعمالندن و تعلیم و تعلمدن بی بهره ایدوکلرینه مبنی تیمور المق و طوپ صالیه ایلمک مثللو خدمات حمایه دن بشقه برایشه یرامن ایدی ایشه بوسبیلره چشمه لیماننده روسیه لوار بر قالیونه اتش القا ایلدکلرنده بالجمله کیلارده بولنان عسکر دگزه دوکیلوب ساحله جان اتدیلر و دونمای هایون کاملاً محترق اولدی .

شمعدانی زاده تاریخننده دیرکه مصر و سائر ممالک محروسه ساحلرینه ایشار برطاقم سنن تجاریه وار ایدیکه بونلرک قبودان و طائفه لری کمرک رسمندن معاف اولوب محاربات

بحریه واقع اولدقجه دونمای هایونده ایفای خدمت حریبه ایله مکلف ایدیار عصر محمود خان اولده کمرچی بولسان اسحق اغابونلرک معافیتنی الفا ایتدیرمکه دونمای هایونک ابروی حکمنده بولسان وسیر دریاجه مهارتاری اولان برایکییک کشینک انقراضنه سبب وبروجه محرر الی سنه قدر محاربه بحریه نیک عدم وقوعندن ناشی کرک ضابطان وکرک نفرات بحریه نیک الفت حریبه لری مندرس اولمسیله چشمه وقعه مؤله سی حادث ودوات علیه نیک تزايد اضطرارنه باعث اولدی دیو اظهار حیف وتأسف ایدر .

سرای وقصر هایونلر بوستانجیاری خدمت مخصوصه لریله برابر کیدرک برنوع عسکری اوجاغی هیئتنه کیرمکه سرای هایونک وداود پاشا ورامی چفتاکی وکاغد خانه وفنار بیچه وقواق سرایی حوالیلرینک وعموماً بوغزایچنک ضابطه وخراسقی بوستانجی باشی بولنا ناره محول اولدیغندن مواقع مذکوره ایله چنکل کوینده وکوچک صو وچوقلی وبیوک دره وبالطه لیانی وقوری چشمه مثللو یرلرده برر بوستانجی اوجاغی وبرر اوسته ومقدار کافی نفرات وار ایدی بوستانجی باشیلر یالی کوشکنده واقع دائره مخصوصه سنده اقامت وایام رسمیه ده ذات شاهانه نیک بندیکی قایغک دومنی قوالانمق ایله تمیز ایدوب کیجه وکوندوز ایجاب ایتدکجه جسیم صندالر ایله حوزده اداره سنی کشت وکذار ایدرایدی سرای هایونده اوج درت یوز بوستانجی اولدینی مثللو ذکر اولان مواقعده دخی براوقدر ضابطان ونفرات بولمغله مواجب دفترنده محرر اولان علوفه بونلرک مخصوصاتی اولوب مع مافیه ملازم صورتنده اوجاغه یازلمش ایکی اوچییک کشی وار ایدیکه قایقچیلق وبغچوانلق کبی کار و صنعتلر ایله مشغول ایسه لرده اقتضاسی حالده درعقب منسوب اولدقلری محللرده مجتمع اولورلر ایدی مواجب دفترنده اوج کیسه اچقه ایله مقید اولان خدمه طبل وعلم سکسان یوز کشیدن متجاوز اولوب مبلغ مزبورک ایسه حساب عصره کوره شهریه سی اوچییک غروش راده لرنده اولمغله بو قدر ادمک اول مقدار وظیفه ایله تعیشی ممکن اوله میه جفی بدیهی ایسه ده بیرام کونلرنده وولادت هایونلرده وتوجیهاتلر وقوعنده ضرب طبل مسرت ایدرک ذات شاهانه طرفندن ووزرا ووکلا وخواجکان دیوان هایون جانب لرندن عطایای معتاده اخذ ایده کملریله مبالغ وفیره یه دسترس اولورلر ایدی .

سرحداتده وبلاد جسیمه ده بولنان ویرلی قولی تعبیر اولنان یکچیری اوجاقلری فی الاصل عسا کر منتظمه وموظفه دن معدود ایکن مرور زمان بونلرک دخی نظام وانتظاملرینی پریشان ایتمکه علوفه لری قارشولفی اولان اوجاقلقلری وممینات مرتبه لری متقذان مملکت وضابطان

نامنه اولان متغلبه لره مأكل اولدی و ممالك محروسه نك هر طرفنده پازولری و بالديرلری نشانلر ايله مملو حد و حساب به گلز يکيچري موجود ايسه ده بونلر وظیفه معينه و تربيه عسکريه دن عاری برطاقم عارسزدن و بروجه سربستی چاققلىق ايتك اورزسنده بولنان بالديرى چبالاقلردن عبارت اولديغى مثللو سرحداتك احوالى نو عما ديكرلرندن اهنونجه وضابطانى و بعض مرتبه نفراتى يکيچري اوجاغى طرفدن نصب وارسال قنور ايسه ده شام و حلب و بروسه و کوتاهيه مثللو محملرك یرلى اغاقلرى و بعض قلاع دزدارقلرى سراى هايونده افناى عمر ايدوب تقاعده کسب استحقاق ايدن پير و عمل مانده اغواته چراقلق اوله رق توجيه اولور ايدى ارتق نفرات و انضباطك درجه سى بوندن استدلال اولنسون ايشته بومثللو عسکردن هر سنه قاليونجى بير اقلرى اچلديغى کي سفرلر ظهورنده طور ناجى باشى و سردن کچدى اغلرى مثللو ضابطان عسکريه طرف طرف مباشر تعيين اوله رق و فتاواى شريفه و فضائل جهادی مبین ايات و احاديث جليله ايله معنون فرمانلر اصدار قانه رق يکيچري بير اقلرى اچيلور و تجمع ايدن عساكر اسلاميه طاقم طاقم اردوى هايونلره سوق قنور ايدى .

بيك تاريخلرينه کنگه يه قدر سلطنت سنیه ارباب زعامت و تيمار و بونلرک جبه لولرى اوله رق ات و اساعه سى مکمل و فن فرس رانیده ماهر سکسان يوز بيک سوارى يه مالک ايکن بوقوت دخی عدد جه ربعى و ايشه يرامق اعتبار به عشرين درجه سنه تنزل ايلدى و بوتنزلک اسبابى متنوع اولوب برنجيسى جسيم و نمادار زعامت و تيمارلر محلول اولدجه جانب ميريدن ضبط اوله رق مقاطعات ميريه سالکنه ادخال قلمسيدر ايکنجيسى برطاقم زعامت و تيمارلر سراى هايون اغواتنه چراقلق اوله رق توجيه اولتمق و سندر اعظم و عظمای دولتك کندو خدمتکارلرينه اومثللو اصحاب سيفه مخصوص اولان ديرلکلى احسان ايده بيلمک قاعده سنك حدوتيدر چونکه قيود خاقانیده توقيعى قلملريه تصحيح اولنش پك چوق قيد کورلمکده درکه فلان ذاتك عهده سنده بولنان فلانجه زعامتك مقاطعاته تحويلى التماس اولنوب هر نقدر بومثللو ديرلکلك مقاطعه يه تبديلى اصحاب سيفك تناقصنى موجب اوله جنى جهتله ممنوعيت قويه تحتده ايسه ده مومى اليه امکدار دولت وشايان عاطفت ايدوکندن امثال اولماق اوزره اسعاف مسئولى خصوصنه بالاستيدان اراده سنیه صادر اولدى و بوجهله تصحيح قاندى ديو محرر و بعضلرنده دخی فلانجه و فلانجه تيمار بى حاصل اولوب در عهده سنه طالب بولنديغندن مقاطعه يه بالتحويل صدر اعظم و ياقائم مقام پاشا سلحدارى

و یامهر داری فلانجهیه احسان بیورلمسینه بالاستیدان اراده سینه تعلق ایلدی دیو مسطوردر اوچنجیسی برتیمار و یازعامت محلول اولدقده ولایه والای بککری استحقاقه نظر ایتیموب هرکیم زیاده رشوت ویررایسه اکا عرض ایدرلر وتوجیه ایتدیرلر ایدی دردنجیسی سپد تیماری نامیله برطاقم تیمار وار ایدیکه کویا تغلب ادوار ایله بونلرک نملاری پک زیاده تناقص ایلدیکندن کیمسه طالب اولمامغله براتی سپده قونلش دیمک معناسینه اولوب حالبوکه بونلرک ایچنده حاصلاتلی و بش اون طالبلی تیمارلر اولدینی حالده ولایه والای بککریسینه ماکل اولق ایچون سپد تیماری دنیلش و بعضیسینه اسم بی مسما اوله رق برات دخی تنظیم ایتدیرلمشدر بشنجیسی ارباب زعامت و تیمارک برجانسه مأموریتلری ظهورنده ولایه والای بککری بونلرک اغنیاسندن پاره لر الهرق برعذر واهی اسناد ایدوب ضعفاسنی سفره کوتورملریدر ایشه بوسیلر معلم ومنتظم بیوک برسواری قوتنک سگته دار اولمسنی مستلزم اولدی وفصول سابقه ده بیان اولدینی اوزره بونلره ذاتاً جانب دولتدن نه علوفه ونه ده تعیین ویرلمدیکندن وبروجه محرر اردولر کلان زعما وارباب تیمار ضعفا و فقرا کروهی اولدیغندن بیچاره لر رجال و کبار دائره لرنده ساییسک کبی خدمات سفیله پی اختیاره مضطر اولورلر ایدی

صنوف جیوش عثمانیه غبطه فرمای ملوک اعصار ایکن درجه درجه بالاده بیان اولنان صورغیر منتظمیه منقلب اولمسیله برابر سلطنت سینه نک ابتدای ظهورندنبرو غیرمسبوق اوله رق اوتوز سنه قدر محاربه دولیه منقطع اولدیغندن احوال سفریه ایله عسکرک الفقی متقرض اولدینی حالده بیک یوز سکسان ایکی سنه سننده روسیه سفری ظهور ایلدی ومو کب هایونده وسر عسکرلر ومحافظلری معیتنده بلا مبالغه اوچ یوز بیک قدر آدم تجمع ایتدی لکن نه چاره که نظام وانضباطدن حصه مند اولدقلرندن شجاعت مادرزادلری منتج فائده اوله میوب موسم حریفک دخولی زمانلرنده مأذوناً وغیر مأذوناً مملکتلرینه عوده مضطر اولملریله سفرک ایلک سنه سی اخرنده خوتین قلعه سی اکیوز نفر مسقولویه ترک قلنق عاری اختیار اولندی

قهوه خانه عقلاسی بیننده بزم عسکری ایاغی طوزیله جنکه سورمک لازمدر زیرا دشمن بوندن بغایت توحش ایده کلدیکندن مکالمات ایله امرار وقت ایتک وبالضروره عسکره فتور کلوب طاغلقدن صکره هجوم ایلک قاعده حیله کاریسیدر دیو دوران ایدن مالایعنی سرای اغالرینه و احوال حربیه دن یخبر متفذان عصره مدار اقدام و حرکت اولمغله

سفرک ایکنجی سنه سی اول صیفده اردوی هایون هیئت مجتمعه سیله طونه بی کجوب قرتال
 صحرانده دشمن ایله لدی التقابل انهزام فاحش ایله منهزم اولدیغندن بویله عسکر ایله
 مسقوه غلبه ممکن اوله میه جفی کاردانان دولته معلوم اولدی و میریلو نامیله یعنی ایلقله
 ارنودلقدن وقیرجه ایلردن وانا طوایدن جمع و جلب اولنان نفرات عادتاً نفیر عام حکمنده
 اولدیغندن اصلاً ایشه یرامیه جقلری تین ایلدی بناء علیه موکب هایون ارکانی عساکر
 موظفه و جاقلرینک اصلاح احوالیه عساکر منتظمه هیئته کتورلمکدن بشقه چارده اولمدینی
 درپیش ملاحظه ایدرلر ایدیسده انشاء الله تعالی فصل اتیده ایراد اولنه جفی وجهله بوماده
 سلطان احمدخان ثالث زماندنبرومنوی ضمیر دولت اولدینی حالد موقع اجرایه کتوریله -
 میوب سفر اثناسنده ایشه بروجهله قابل اوله میه جفی درکار ایدوکنندن چار ناچار اله
 بولنان عسکر ایله اداره امور ایدرک نهایت قینارجه مصالحه سنی نتیجه ویردی اناطولی
 وروم ایلیدن بیراق بیراق وارد اولان جیوش اسلامیه موکب هایونده تجمع و تکثرایتدجه
 اون اون بشر اچمه علوفه ایله سر عسکرلر معینته اوچر بشر بیک دال قلیج یازیلوب کوند-
 ریلور و بش اون کوند نصکره بوزیلوب کلورلر وینه دیگر محله دال قلیج یازیلورلر ایدیکه
 برسنه ده بر آدمک ایکی اوچ کرده دال قلیج یازیلوب علوفه یومیه نائل اولدینی واقع اولمشدر
 بویله دال قلیج یازیلورق و یاخود برقلعه محافظه سنه مأمور اوله رق علوفه یومیه تخصیص
 اولنان نفراته مهور تعبیر اولنور برر کاغد ویرلر ایدیکه علوفه نک سنیدر اردوده بو
 کاغدلری اشترا ایدر کارجیلری اولغله بهر اچمه سنی طوتدیره بلدیکنه یعنی سکزر اونر
 اون بشر غروشه صاتون الوب ایرادجیلره بیع ایدرلر ایدی مع مافیه شوراسیدخی
 معلوم اولما ایدرکه سفر خصوصنده اولان انقطاع الفت یالکنز طوائف عسکریه یه منحصر
 اولمیوب تدارکات حربیه و اعمال عسکریه ده ارکان دولته دخی عجمیلک طاری اولدینی
 جهتله عسکرک کثرتی التزامله برابر مقتضی اولان ذخائر و مهماتی کاینجی تدارک ایلدکلرندن
 همان بر ایکی آی ظرفنده ذخیره قاتی حادث اولدی و قلعه لرده بولنان اسکی و کوفلنمش
 حیوانی توزیع ایتکه مجبور اولدیلر بوندن و نظافته دقت اولنه مدیغندن درلو درلو عال
 ساریه ظهور ایتسیله و یاردهلو و خسته لر ایچون لزومی درجه ده خسته خانه و اطبا استحضار
 اولنماق حسیله شهدای حربیه نک برقاچ مثلی آدم باقمسزلقدن تاف اولدی بناء علی ذلک هر سنه
 مقتضای احکام اسلامیه و مبتغای غیرت ملیه ایله کایتلو عسکر تجمع ایدر ایدیسده اوائل صیفده
 برایش کوریه بیلور ایشه کوریلوب اسباب مسروده دنناشی برقاچ ای مرورنده عودته مجبور

و مضطرب اولور لر ایدی واشبو روسیه سفر نده قلعه محاصره سی موهوم و میدان محاربه لر ی واقع اوله جنی مقتضای حال و موقع ایکن صحرا طویلرندن زیاده جسم طویلر کو توروب بییه وده اختیار کلفت و مشقت و بالاخره دشمنه ترك ایله عدم و قوفلرینی اثبات ایلدیلر .

احوال مالیه

ویانه انهمز امدن صکره و نديک وله و روسیه دولتری نمچه لور ایله بالاتفاق اعلان حرب ایلرینه مبنی محاربه کسب جسامت و تشعب ایدرک اون بش سنه قدر دخی امتداد ایلرینه هر ییل یکر میشر اوتوزربیک عسکر یازلق لازم کلدیکندن بونلرک علوفه لر ی و مصارفات سائر حربه خزینة دواتی افنا ایلکله درلو درلو ویرکولر ایجاد واحداث اولدیغندن ماعدا زروسیمه متعلق خزینة دولته بولان ووکلا و اغنیاده اولان اشیا برقاچ کره علی طریق الاعانه جمع اوله رق سکه ضرب اولندی و عصر سلیمان خان ثانیده برقیه باقردن سکز یوز منقر قطع ایتدیریلوب اولاهرا و جی بر اچیه و مؤخرأ ایکسی بر اچیه رایج ایله تداوله چیقاردی لکن کیدرک باقر چوغالمله اعتباردن ساقط اولوب تجار و اهالی بو یوزدن پک متضرر اولدیغندن طبیعتیه رفع و الغا و بونک مرتب و مؤسسی اولان صاحب عیار فرنک مصطفی مصادره و اعدام قلندی کوپر یلی زاده صدر شهید فاضل مصطفی پاشا مرحوم بالاستحقاق علوفه عسکر یه بدسترس اولنلری تنقیح و مصارف زانده نی طی ایدوب اهالی بلاد اسلامیه یه موجب پراشانی اولان تکلیفات ظلمیه یی ابطال و الغا ایتش و مصالح خزینة یی انتظام صحیح تحتنه المشیکن شهادتی وقوعندن صکره خلفلری کافی السابق تجدید مظالم ایتدکن بشقه زمان عفو و الغایه عائد اولان ویرکوی مبطله یی بیله بقایادر دیرک تحصیله قیام ایلدیلر سلطان مصطفی خان ثانینک طبیعتی مصادره طرفه مائل اولدیغندن وزرای سالفه توابع و منتسبانندن شهرت ثروته مشتهر اولنلری و حتی برقاچ سنه مقدم دارالسعاده اغلغندن و خزینة دارلقدن چراغ و متقاعد امصره اعزام قلنان اغلرک زنکینلرینی بیله مصادره ایدرک امور سفریه یه صرف ایلدی هر نه حال ایسه بیک یوز اون سنه سنده عقد معاهده اوله رق مصارف فوق العاده حربه منقطع اولدیغندن و مره بعداخری ذکر اولندیغنی اوزره دولته مصارفات جسمیه یی اولق لازم کلان وزرا و امرا و مأمورین و سوار ی عسکر ی و قلاع و سرحدات نفقاتی معاشلری تیمار و زعامت و اوجاقلق و سائر مخصصات معینه لرندن مرتب اولوب خزینة دولتن ویریلان قبو قولی مواجبلی و بعض مصارفات متفرقه بالنسبه جزئیاتدن ایدوکنندن مضایقه مالیه در حال بر طرف اولدی بوندن صکره واقع اولان روسیه و و نديک و نمجه سفرلری برر ایکیشر سنه ده مندفع اولدیغنه و ایران محاربه لر ی دخی اوروپا سفرلری کبی مصارفات کلیه یی مستلزم اولدیغنه مبنی خزینة دولت کوندن کونه مالامال اولغه باشلادی باخصوص داماد ابراهیم پاشا عصر نده تقلیل وظائف عسکر یه یه پک زیاده اعتنا قلتمغله برابر طربزون حوالیسنده و اناطولینک سائر محالرنده

بولنان کموش معدنلری فوق العاده ایشلمکله منافع عظیمه حاصل اولور ایدی حتی ثقلیه تکلفندن قورتلیق ایچون کشمخانهده وروانده مسکوکات قطع ایتدیرلمشدر

عصر مزبورک ثروتنه مقیاس اولق اوزره ایراد اولنور که ابراهیم پاشا علی الدوام ذات شانیه و حرمسرای سلطنت کبراسنه وقرنای پاشاهییه نقود بیشمار و مجوهرات قیمتمدار عرض و تقدیم ایده کلدیکی ونوشهر اسمیه اعمار ایتدیکی مسقط رأسنده واستانبولده مصارفات عظیمهیی مستلزم ابنیه خیریه انشا ایتدیردیکی وشعرا وندما و مقربینه آوج اوج التون صاحب سفاقت اوغرنده دخی مال بیکران خرج ایلدیکی حالدیه حین قتلندایکی بیسک دوت یوز کیسه سی وکتخداسی بولنان محمدپاشا نهاب غیروهاب اولدیغندن یکریمی اوچ بیسک اوچ یوز طقوز کیسه لک مدخرومدفون نقدی چقمش و اندرون هایون خزینه سنه وضع اولنمشدر مبالغ مزبوره استانبول التونی یوز اون پاره اولق حسابیه معتبر اولدیغندن شمیدیکی حسابیه کوره بر بحق ملیون لیرا درجه لرینه رسیده اولور برده اوائل سلطنت محمود خان اولده نادرشاهک بغته بغدادی محاصره ایلدیکی خبری استانبوله واصل اولدقدیه تلاش عظیمی موجب اوله رق در حال مذاقعه سی ایچون ترتیب اولنان عسکر و مهماته صرف اولنق اوزره اندرون هایون خزینه سنندن کذلک حساب عصره کوره بر ملیون لیرایه قریب مبالغ اخراج و لازم کلان مواقعه ارسال قلمشدر که بودخی وسعت خزینه یه بردیلدر سلطان مصطفی خان ثالث حضر تلی غایت متصرف و جمع نقوده مهالک اولدیغندن واردات دواتک فضلہ سنی پیدرپی اندرون هایون خزینه سنه اله کلدکدن بشقه سلاطین ماضیه دن قاله زروسیمه متعلق خلیجه اوانی پی سکه قطع ایتدیردیکی وحتی بعض کتب نفیسه پی بیله ال التندن صا تیدیردینی مرویدر بناء علیه موجودی اوزرینه نقود وفیره ضم وادخار ایش ايسه ده بالاخره روسیه سفری اوغرنده صرف واستهلاك ایلدی حاصل کلام بیسک یوز اون سنه سنده واقع اولان معاهده عمومیه دن تاسکسان ایکی سفرینه کلنجه یه قدر خزینه دواتده مضایقه مشاهده اولنمیوب دائماً نقود کاپیه ایله مالامال ایدی

ایراد و مصرفک مفرداتی بختنه کلنجه دواتک وارداتی مقاطعات میریه اعشارندن ورسومات متفرقه و جزیه شرعیه حاصلاتندن و مملکتین و مصر و بغداد مثللو بعض محالک مقطوعات عینه و نقدیه لرندن و مخلفات ظهوراتندن عبارت اولمغله بونلرک تفصیلاتلری بوجه آئی ایضاح اولنور فصول سابقه ده بیان اولندیغنی اوزره خاص هایون ایچون تفریق اولنمش بر خیلی اراضی و ارایدیکه اعشاری جانب میری یه عائد ایدی صکره لری درجه درجه وزرا و امرا خاصلری رفع و الغا و خواص هایونه الحاق اولندیغنی کبی نمالوجه زعامت و تیمارلر دخی محلول اولدجه اخره توجیه اولنمیوب کذلک جانب میریدن ضبط و الزام اولمغه باشلانق حسابیه جمله سنه مقاطعات میریه اطلاق قلینر ایدی بووجهله مقاطعات میریه کسب جسامت و کثرت ایتدکدن بشقه وقت وقت بیوک شهرلرده قنطاریه وکیالیه و باج بازار

وقره کمرکاری و رسوم مسکرات مثللو بر طاقم رسومات احداث اولنگله بونلر دخی مقاطعات میریه جمله سنه ادخال قانندی بیک یوز اون تاریخنندن صکره جه اداره امورمالیه مأمورلرندن بعضیلری ماترملر بومقاطعاتی بر نهایت ایکی سنه لك اوله رق درعهده ایده کلدکلرندن اعمارینه اعتنا ایلیوب یالکمز کندو زمانلری حاصلاتنک ازدیادینه دقت واهالییه ظلم واعتسافه جرأت ایده یورلر بدلات معینه لری سنه بسنه خزینه یه تسلیم قلمق واول امرده بر مقدار معجله دخی التیق اوزره قید حیا ب شرطیه تفویض اولنسه هم اعمار مملکتی و همده تدنی مظامی موجب اولور دیو ایراد مطالعات ایلدکلرینه مبنی بو صورت قرین قبول اولوب مقاطعات میریه نک بر جزئی اولوجهله تفویض قلندی و بونلره مالکانه مقاطعاتی نامی ویریلوب جانب میریده قلانلره کافی السابق مقاطعات میریه دینلدی مقاطعات میریه نک بعضیلری خزینه دن ملتزملره و بعضیلری ولایه و میرلوالره الزام اولندیغی مثللو مالکانه مقاطعاتی اصحابنک کمیسی کندوسی اداره ایدر و کمیسی الزام ایلر ایدی بونلرک قلمیه تعبیر اولنان بدل قدیملری غروش حسابی اوزرینه موضوع اولدیغندن کیدرک ترقیات فیئات مسکوکات حسبیه جزئیات حکمنده قالدیغنه مبنی اصحابی منافع عظیمه یه واصل و محلولاتی بالمزایده صاتیلوب سنوی خزینه یه دخی خلیجه واردات حاصل اولور ایدی اشبو مالکانه مقاطعاتی هم صاغام و همده ترقیدار اولدیغندن و کوندن کونه کسب اعتبار ایلدیکنندن رجال دولت واغنیای ملت کندولرینه و عیال و اولادلرینه بوندن ایراد پیدا ایدرلر و بعض ذی نفوذ اولنلر اداره سنیه استیصال ایدرک و قفلرینه تخصیص ایلرلر ایدیکه بوصورت انقطاع محلولاتی مستلزم و خزینه دولته مضر اولدیغندن او مثللو متنفذانک اندراس نفوذلری هنکامنده هیئت اصلیه سنه ارجاع اولندیغی دخی یک چوق واقع اولمشدر سلطان مصطفی خان ثالث حضر تلرینک اوائل سلطنتلرنده اسهام ایجاد اولندی شویله که استانبول کمرکنندن و یا خود واردات سائر دن مثلاً سنوی بشر کیسه فائضو یوز قام سهم چیقاریلوب سکزر اوزر سنه لکنه طابولرینه و میریدن الاجقلو بولنان بعض بنا امینلرینه توجیه واعطا اولنگله اگرچه قارشولغی اولان محل سنوی بش یوز کیسه فائض ویرر ایدی لکن بونک بیع وشراسی مجاز اولدیغندن و فراغی وقوعنده بر سنه لك فائضی خرج فراغ اوله رق خزینه دولته ویرلمک مشروط ایدوکنندن بوخر جدن و واقع اولان محلولاتی معجله سنه خزینه نک ویردیکی فائضدن چوق زیاده واردات حاصل اولور ایدی اشبو اسهام مقاطعاتک بر نوعی ایسه ده قارشولغنک اداره سی ید دولنده اولمق وهر قاج غروش طوتر ایسه طواتسون اصحاب اسهامه براتلرنده مقید اولان فائض سنوی اعطا قلمق حسبیه مقاطعات مثللو ترقیدار اولدیغندن رجال و کبار و متنفذان عنندنه معتبر اولیوب اکثریا بونی عجزه نسوان وضعفای ناس الورلر و بعض ایتامه الیویرلر ایدی فقط ایتام اسهامنک شروط مخصوصه سی ایجابجه متصرفی حین طفولیتنده فوت اولور ایسه ورثه سی محروم قالمز ایدی

ممالك عثمانیه فتح اولدقجه متمکن اولان اهل ذمتہ جزیه تخصیص اولوب لکن هریرده نسبت متساویهده جاری اولدیغندن و دائماً فیات مسکوکات تنزل ایدمکدیکندن جابجا ویریلان فتاوی شریفه موجبجه ضم اولنور ایدی نهایت کوپرلی زاده مصطفی پاشا صدارتنده جزیه امورینک تنظیم و تقریرینه تشبث اولنورق اعلا و اوسط و ادنا اعتباریه اوچ درجه ترتیب و کتب فقهیهده مسطور اولان حکم شرعییه توقیفاً اعلاسی قرق سکز و اوسطی یکرمی درت و ادناسی اون ایکی درهم کمش اولمق اوزره تخصیص اولوب اول عصرده شریفی تعبیر اولنان التون اون ایکی درهم کمشه مساوی ایدوکنرن اعلا جزیه دن درت اوسطدن ایکی ادناسدن برالتون البقی و ممالك محروسه نیک هریرنده بووجهله استیفای اولمق اوزره نظامه ربط اولنشیدی بعض غوائل سببیه بونظام یالکیز خطه مصریهده اجرا اولنه مامش اولدیغندن عصر محمود خان اولدهدنتر امینی علی افندی مأمور وارسال ایدیلهرک اوراددخی بالاجرا ایکی یوز قرق بیک عدد جزیه اوراقی توزیع قنمشدر انجق صکره لری اشبو جزیه ویرکوسی ینه فیات مسکوکات حسابیه جریان ایلدیکی جهتله وقت وقت ضمیم و تنزیلات و قوعبولهرق بیک ایکوز یتمش ایکی سنه سنده بدل عسکرییه تحویل اولندیغی زمانده اعلاسی التمش اوسطی اوتوز ادناسی اون بش غروش ایدی جزیه مالی غیر مسلمه ذکورینک کافه سنه مخصوص بر ویرکو ايسهده عمومأ مأمورین روحانیه و حد بلوغه واصل اولمیان صبیان مستثنا و خدمات دولته بولنش نیجه فامایالر و کاروکسبدن قالمش اختیارلر بروات هایون ووزرا و امرا بیورلدیلرله معفو اولدقلری منالو بعض جزیره و مواقع مهمه جزیره لری دخی مقطوعه مربوط و بعضیلری کلیا معاف ایدیلر هر قضانک جزیه اوراقی خزینته مالیهده تنظیم و بونجه لر ایچنه وضع اولنهرق تمهیر قلندقدن صکره جزیه دارلره تسلیم محالرینه بالایصال شهر محرم دخولنده محکمهده مهری فک و بر ایکی ایدم توزیع و جبات اولمق قانون موضوعی اقتضاسدن ایدوکندن محرم کلینجه جزیه بونجه سی اچیلمز و وقت معینک خارجنده تبعه دن جزیه طلب قلنمز ایدی بعض اوراق و دفاتر مزایاسدن استفهام و بواشلرده بولنش اولان قدماتی مأموریندن استماع قلندیغنه نظراً جزیه حاصلاتی عصر من حسابنه کوره تقریباً بر ملیون ایکوز بیک لیرا راده لرنده اولوب بو حسابنه باقلنجه ممالك عثمانیهده اون ایکی ملیون نفوذ غیر مسلمه بولنسی و بونک نصفی اناثه و نصف دیکرینک ثانی دخی چوجق و معاف طاقنه چیقارلدیغی حالده درت مایون نفوسدن جزیه اناثه کلمسی استدلال اولنور مبالغ حاصله نیک اکثریسی سرحدات قلاعی مستحقظلرینک علوفه لرینه و سائر بعض مصارفات مهمه یه محول و بعضیلرندن دخی سهم ترتیب و فروخت قانمش اولمغله بولردن فضله قلان مبالغ خزینته دولته کاور ایدی مقطوعه مربوط ایانتلرکه تعبیر اخرله میریلوایالات دنیلور و برنجیسی مصر در بونک بالجمله حاصلاتی مصر خزینهنده تجمع ایدرک بعده محل صر فلرینه تقسیم وارسال قانه

کشمدر شویله که حضرت عمر رضی الله عنه زمانندنبرو حرمین اهالیسنه سنوی سکنز
 بیک اردب ذخیره مرتب و مخصوص اولدیغندن ومؤخرأ سلاطین عثمانیه حضرتان طرفلرندن
 دخی برر مقدار ذخیره و نقود وقف و ضم ایدلمش ایدوکنندن اولا بونلر کوندریلور ایدی
 ایدی تانیا کیلار هایونه عیناً ایصال اوانسه کلان قهوه و شکر و پرنج و سائر
 مثللو مرتبات عینه دن بشقه التي یوز بیک التون ارسالیه تقدیم قلمق اصول
 قدیمه اقتضاسندن اولوب عصر من حسابنه کوره التمشیک کیسه راده سنده اولدینی حالده
 صکرملری درلو درلو التونلر قطع اولتمق و وزن و عیارلرنجه دخی تغیرات جزئییه واقع اولمق
 حسبیه قیمت حقیقه بر مقدار تدنی ایدوب بعضاً دخی متغلبه امرا اسباب متنوعه ایله
 عرض معذرت و نقصان کوندرمکه محاسرت ایدرلر ایدی نائنا مصرده بولنان یکیجری
 و سواری بلوکلری نفرات و ضابطانک علوفه مینه لری اعطا و رابعا والی ولایت و مصر
 ارباب مناصبک معینات و مخصوصاتلری تسویه اوانور ایدی ایکنجیسی بغداد اولوب بونک
 اداره سی دخی مصره شبیه ایسه ده بعضی ماحقاتنک اراضیسی تیماروزعامت اوله رق طوائف
 عسکریه یه مفوض ایدوکنندن بالطبع وارداتی و طرف دواته تقدیم اولنان ارسالیه سی مصره
 نسبتله دون ایدی بصره ایالتی قدیمدنبرو حاکملری بولنان ابن علیان خاندانه توجیه
 اولنه کلمشکن عصر محمدخان رابعده مندرس اولمغله جانب دولت عالییه دن والی کوندرلمکه
 باشلادی لیکن کیدرک حکومه ضعف طاری و عربانک عتو و طغیانی مترقی اوله رقا ضعاف
 ضعف حکومت مقصدیه نه رشطک سد لرنی تخریب و بوجاهله حکومتی اضرار و تعجیز
 ایده کلدکلرندن یک چوق اراضی منبته معطل و حیادت هوا عفونت و وخامته مبدل اولمسنه
 مبنی بصره ایالتنک ثروت و معموریتی کوندن کونه زائل اولدی بناء علیه بصره ایالتی
 بعضاً بغداد والیرینه الحاقاً توجیه و بعضاً وزرا و میر میرانلره تفویض قلمور ایدی کذلک
 عربانک تغلب و تسلطندن ناشی لحسا و قطیف طرفلرندده حکومت دوات بتون بتون متزلزل
 اولدی چلدیر ایالتی بارتبه وزارت خاندان قدیملرینه توجیه اولنه کلدیکی مثللو وان وسائر کردستان
 جانبلرندده بولنان اکثر سنجاقلر یورداق و او جاقاق و جهله امرای اکراده مفوض اولوب بونلرک
 دخی خزینه دواته و اولحو الیده بولنان ولاته مقطوع ویر کولری و هدیه متادملری و ارایدی
 افلاق و بغداد امارتلرینک و دوبره و ندیک جمهوریتنک بدل جزیه نامیله ویرکوی
 مقطوعملری اولوب قینارجه عهدنامه سندن صکره افلاق ویرکوسی اتیوز اون طقوز کیسه
 و رکابیه و عیدیه نامیله و یوده لک تقدیمی معتاد اولان ویرکوی دخی ایک یوز التمش کیسه یه
 و بغدادنک ویرکوسی یوز اتوز التي و رکابیه و عیدیه سی ایک یوز بش کیسه یه قطع اولنمشدر
 دوبره و ندیک جمهوریتنک ویرکوسی سنویسی یکرمی بشیک قره غروش یعنی الی بیک
 فیلوری اولوب اوچ سنه ده بر کره جمهور طرفندن کوندریلان مخصوص ایاجی واسطه سیله
 و معتاد اولان تشریفاتک اجراسیله دیوان هایونده تقدیم اولنور ایدی

حاصلات مخافاتکه مصادرات دخی بونک داخنده در فصول سابقه ده بیان اولندی
اوزره اولدجه بر صورت معقوله ده ایکن کیدرک سوء استعمالاته منقلب اولمغه تفصیلاتی
بنه تعالی فصل اتی تکمله سنده ایرادورفع والغاسی کیفیتله منظومه عدالت مستزاد قلنمق
اوزره تأخیر قلندی

دواتک باشلوجه وارداتی بالاده محرر شیلر اولوب بعضیلری دخی مصارفاتک بیانی
صره سنده تسلطیر اولنمق لازم کلکله مصرف بختنه نقل کلام اولوب دواتر سلطنتک
برنجیسی دائرة هایون اولدیغندن بروجه اجمال توضیحه عطف زمام قلندی اولاً حرم
هایون خلقی دائماً حرمسرای سلطنتده مقیم وشهره چیقوب کزملری کلیاً ممنوع اولدیغی
مثلاً اندرون اغلری دخی - لاملق و بنش رسملرندن بشقه سرایدن طشریه چیمقدقلرینه
مبنی بالطبع مبتلای تاف و سرف اولمقدقلرندن اتیده بیار اولنه جق معیناتلریله تعیش ایدرلر
وخزیننه هایوندن ایاق نامیله هیچ کیمسه یه پاره ویرلمز ایدی تانیاً مطبخ عامره نک
ات واکمی تعینات میریه اداره سندن و پرنچ وشکر وقهوه مثلاً شیلرک اکثریسی مصر
وقبله اوجاقلرندن مراتب اولمغه لوازمات سائر جزئیات حکمنده اولوب حتی بیانی صد دنده
اولدیغمز تاریخلردن سکسان یوزسنه صکره که اواخر عهد محمود خان تانیدر ترقی فیئات
مسکوکات بش اتی مثله بالغ اولمشیکن مطبخ امینی صالح پاشا مر حومک دفترلرینی کوردم شهریه سی
الی التمش بیک ورمضانلرده سکسان طقسان بیک غروش درجه لرند مصارفاتی متضمن ایدی
ثالثاً استانبول جوارنده و چتالجه ده اصطبل عامریه مربوط کایتلو چایرلر اولدیغندن
بونلر دائرة هایون حیواناتنه کفایت ایتدکدن وبر مقداری دخی رجال و کباره توزیع
واحسان قلندقدن صکره فضله سی ایجار والزام اولنور وحاصلات واقعه لری اصطبل عامره
مصارفاتی تسویه ایدر ایدی رابعا ذات شاهانه یه و دارالسعاده اغاسی و سلحدار اغایله
اندرون رجالی تعبیر اوانان متحیزانه شام و حلب و مصر و بغداد مثلاً محالرولاتی طرفلرندن
ات وشال واقشه وقریم خانلری وارضروم و بوسنه وروم ایلی والیلری جانبلرندن کورک
وکوله وجاریه وسائرلری طرفندن دخی مناسب هدایا تقدیم اولنور و بوکبی شیلرک خارجدن
مبايعه سنه حاجت قالمز ایدی باخصوص کرک اوروپا و کرک اسیا دولتلری طرفلرندن وارد
اولان ایاجیلر حکمدارلری جانبندن هدیه کتورمک عادات عصریه دن اولدیغندن اقشه
فرنکیه و کورک و مجوهراته متعلق یک ذی قیمت شیلر کلور ایدی که الان خزیننه هایونده
بعضیلری موجوددر اندرون اغالرینک مخصص اولان علوفلری رقتیله مرتبه کفایه ده
ایکن اچهنک قیمت حقیقیه سی تنزل ایده ایده جزئیات حکمنده قالمش ایسه ده صکره لری
اغواتک اکثریسی وزرا و کبار زاده لرندن ترکیب ایده کلدیکندن غنا و ثروتلرندن ضعفاسی
دخی متمتع اولورلر و سرای هایوندن نائل مراتب اولان وزرا و کبرا منشاء فیضلری
اولان دائره لرده معینات مقتضیه ترتیب ووقف ایتمش اولملریله بونلردن دخی استفاده ایدرلر ایدی

نظامات عسکریه مختل و دیوشمره اصولی متروک اولدقدن صکره سرای اغالردن
طوائف عسکریه اوجاقلرینک اغالقلرینه و یاخود نفراتی سلکینه چیقماق قاعدهسی دخی
منقرض اولمغه باب تفیض اولمغه بر درجهیه قدر مسدود اولوب فقط سلحدار و خزینه
کتخداسی مثللو بعض اکابر اندرون نائل وزارت و بعض ارباب علم و معارفدن بولنانلری
دخی مدرسلک و خواجکاناق و قوجی باشیاق توجیهیله برابر چراغ اولور و حالرینه
مناسب خدمات دواتده استخداقل نورلرایدی اشبو اغالردن سرای هایونجه و اصل مراتب
اولنلری استانبول و ادرنه و بروسهده واقع سلاطین عظام و وزرا تولیت و کتابتلری و درجه
ثانیه و ثالثهده بولنان اغوات و سائر خدمه مخصوصه پادشاهی طشره یرلی اغالقلری و بعض
قلاع دزدارقلری و اصناف کتخدالقلری و سرای هایون چراقلغه مخصوص زعامت
و تیمارلرایله علی مراتبهم حصه مند نعم تقاعدی اولورلرایدی

عصر مزده جاری اولان بودجه قاعدهسنه قیاساً مصارفات دولتک ایکنجی قسمی
داخلیه مصرفی اولوب انجق مقدمه تکملهده بیان اولندیغی اوزره کړک استانبولده و کړک
طشره لره بولنان بالمله وزرا و علما و مأمورینک معینات مخصوصه لری اولمق حسابیله
سلطنت سنیه بونلره معاش اعطاسندن مستغنی اولدیغندن ذکر اولنان مصارفات ابنیه میریه
تعمیراتندن و مأموریت مخصوصه ایله بعض خدماته اعزام اولنان بندکانه و یریلان خرچراهلردن
و اوروپا و آسیا حکمدارلری جانبندن کلان ایاجیلر ایچون عادت عصریه موجبجه اعطا
اولنه کلان تعینات مصارفاتندن و اسارتدن قورتیش و یاخود برقلعه محافظه سنده اولوب
منصبی و ارداتی اخراجانه کفایت ایدمه یان وزرا و امرایه و در دولته کلان بعض سادات و علمایه
و یریلان عطایای سنیه دن عبارت اولوب سلطان سایم خان ثالث عصرنده هرای عرض اولنان
مصارفات مزبور و دفترلرینک یکونلری سکز طقوز یوز نهایت بیک کیسه راده لرند و اولدیغی کورلمشدر
مصارفاتک اوچنجی قسمی مخصصات عسکریه اولوب بونک جمع و استحصاری اهم
امور دواتندن ایدیکه تأخیری نیجه دفعه وقوع شورش و اختلالی مستلزم اولمشدر بناء علیه
علوفه اعطاسی عقبنده صدراعظم و دفتردار افندی تشریفات پادشاهی یه نائل و دیگر علوفه
زمانه قدر حضور و اسایشه واصل اولورلرایدی جیوش عثمانیه صنوف عیدده اوزرینه
مراتب ایسهده من جهة المعایش ایکی نوعه منقسم اولوب برنجیسی طوغریدن طوغری یه
خزینه دولتن و وظیفه خوار اولان درگاه عالی یکیکچریلری و سپاه و سلحدار و علوخیان
یمین و یسار و غربای یمین و یسار و طوینجی و جبه جی و قالینجی و بوستانیان و سائر بندکاندرکه
علوفه لرینک کمیت و کیفیتی یوقار و ده توضیح قلندی دیگر صنفی زعامت و تیماره تصرفله
موظف و اشکنجی یعنی سیار اولان زعما و اصحاب تیمار ایله مستحفظ تیمارینه متصرف
بولنان و یاخود اوجاقلق تعبیر اولنان اقطاع و جزیه و ملحه مثللو رسوماتدن علوفه لری

محول اولان قلاع و سرحدات اسلامیة بحفاظت ویرلونیفراتی اولوب بونلرک قواعد و نظاماتی دخی مرة بعداخری تسطیر اولمشدر

یکچیری بلوکلرینه و ترسانه و طوپخانه و سائر صنوف عسکریه اوجاقلرینه و سرای هایونه مرتب اولان ات واکمک و برنج و سائر طرف میریدن اعطا اولنور ایسهده بونلر ایچون خزینه دولت بیوک و بالکیده هیچ مصرف اختیار اتمز ایدی چونکه روم ایلیده بولنان اغنامک عدد اغنام رسمی نامیه هر سنه اونده بری انه کلدیکندن بوندن ایکی اوجیوز بیک قیون عیناً النوب ماعداسی بدلاً استیفا و طاقم طاقم سوق اولنه رق میری تعیناتی بونکله اداره قانون و حتی فضله سی اها لیک تموین اختیار مجی مقصدیه استانبول قصاب اصنافه توزیع اولنور ایدی ممالک محروسهده برآ و بحر آ نقل اولنان ذخائر دن کمرک الخیوب بوکا مقابل اق دکر و قره دکر ساحلارنده اولان قضالردن و بعض ذخیره یتاغی بولنان مواقعدن مبايعه ذخیره سی نامیه وهر کیلی یکرمی پاره فیئات ایله هر قضانک درجه ثروت و جسمامنه کوره الیشیر و بوزریک کیلی ذخیره مرتب و مخصوص اولغله موسمنده هر طرفه مبايعه جیلر کوندر یلوب ذخائر مرتبه جلب و جمع اولنه رق استانبوله کوندر یلور و دوائر میریه بونکله اداره اولندقدن بشقه فضله سی استانبول اتمکچی اصنافه فروخت ایدیلور ایدی و بعض قضالر ذخائرینک نقانده صعوبت مشاهده اولندیغی و یاخود مراتب مخصوصه فضله لو کورندیکی تقدیرده بدلاً استحصال قنور ایدیکه مثلاً کوتاهی سنجاغی قضالرینک ایدکوز بیک کیله مبايعه ذخیره سی مرتبی اولدیغی و رایج ذخیره یوز پاره راده سنده بولندیغی حالده یکرمی پاره سی فیئات مقطوعه یه بالمحسوب سکسان پاره دن بدلی اولمق لازم کلان درتیوز بیک غروش نقداً استحصال اولنور ایدی قابه و حوالیسنده واقع چاتسکات یعنی برنج ترلاری دولتک مالی اولوب هر سنه ملتزمینه احاله اونه کلکله بدل التزامک لزومی مقداری عیناً و ماعداسی بدلاً استحصال و دوائر میریه اعطا اولنور و طوائف عسکریه البسه و مفروشات ایچون بکلک تعبیر اولنان بر نوع عبا و قالیچه و اسامیه و شارکوبی و سائر مواقع متعددده اعمال ایتدیر یلور ایدی حاصل کلام مراتب مذکوره ایچون ویریلان ائمان مقطوعه بدلاً استحصال قلنان مبالغدن و فضله سندن اصنافه صاتیلان اشیانک منافعدن حاصل اولور ایدی .

ترسانه و طوپخانه ایچون مقتضی اولان کراسته اقدکر و قره دکر ساحلارنده اولان کراسته کش قضالردن و کندر و بدیر یاغی و بز و کهر جیله مصر و جانبیک و قونییه سنجاقلردن و باقر و فورشون و تیمور مثالو اشیا دخی معدنلردن مرتب و مخصوص اولغله هر سنه مأورلر کوندر یلوب ترتیبی وجهله جمع و استحصال اولنور و بونلرک فیئات مقطوعه لری بک جزئی اولدیغندن باد هوا کی کلور ایدی بیک لشمش درت تاریخنده یازاش اولان ترخونجی لایحه سنده ترسانه عامر دنک سنوی بیک التیوز درت کیسه مصارفاتی اولوب بونلرک التیوز کسور کیسه سی اوجاقلردن یعنی ترسانه یه مخصوص وارداتدن و طقوز یوز بوقدر کیسه سی

خزینۀ مایه دن اعطا قانمقده ایدوکی محرر اولوب لیکن تاریخ مزبور کزید سفراری اوانه وهرسنه کلیتو دوئما حیقارلق مجبوریتی زمانه تصادف ایدر بناء علیه ایام حضرده هر نقدر قبودان پاشالر دوئما ایله اق دکره حیقمق معتاد ایسه ده محاربه و قتلینه نسبتله ترسانه مصارفاتی اهون اولدیغندن خزینۀ مایه دن چوقلق اعانه یه محتاج اولمز ایدی

فصل سابقده بر درجه یه قدر تفصیل قلندیغی وجهله سلاطین عظام ووزرا وامرا وسائر اصحاب خیرات ممالک عثمانیه نک هر جهتنده ولزومندن فضله دنیه جک درجه ده جامع ومدرسه ومکتب وتکیه وچشمه وکوپری وقالدیرم وحمام مثللو خیرات ومبرات انشا واعمار ابتدکرنندن ماعدا محوف دربندارده ومواقع مقتضیه ده قلعه لر وخانلر یایدیروب مداین وقصبات اهالیسنی احتیاجات ضروریه دن وارسته وارباب سیر سفری تسهیلات وامنیته پیوسته ایشلرایدی لیکن افسادات دهریه ایله خیرات ومبراتک تعمیر وانتظامی ایچون تخصیص اولنمش اولان واردات وقفیه نک بعضیلری متولی ویاخود متغلبۀ زمانه نک ما نکلی وبعضیلری دخی اسباب سائر مایله مندرس اولدیغندن واردات تعمیریه دن معرا اولان طرق وجسور ومجرای اب مثللو شیلر مملکتجه تعمیر ومصارفات واقعیه لری توزاع دفترلرنده ادخال واهالیدن استحصال قلنور ایدی وبعض جسم کوپریرلرک ومهم طریقلرک جوارلرنده بولان قرا اهالیسی تکالیف دیوانیه دن معاف وعلی الدوام بونلرک تعمیر وتنظیمیه مکلف ایدیلر حکمت حکومه واقف اولان ولایه وحکام باعث معموریت وثروت اولان شیلرک اجراسنه اهتمام ایدوب اگرچه بونلرک ابتدای اعمالاننده اهالی بارکران خدمات عمومیه ده فی الجمله گرفتار تعب ومشقت اولورلر ایسه ده ایلروسنده استفاده ایدرلر وبقای اثار ایله ابقای نام ایلرلر ایدی ازان جمله مشهور راغب پاشا مرحوم بولاوادین ایله ایساقلی بیننده اولان طولاکوچ وعرضا برحق ساعت بطاقلنی املا وتسویه وجسر وقالدیرملرینی تعمیر وکوبلک بوغازینی رمضان اوغلی یایلاسنندن دربنده کلنجه اون ذراع عرضنده طریق کشادیه تنظیمه وانطاکیه ایله حلب بیننده جسر جدید وبرقله ودربند انشاسنه موفق اولمش ومحسن زاده مرحوم تبدیل منصب سببیه انشای عزیمتده قجانیق بوغازنده واقع ایکی اوچیوز زراع طولنده برجسیم قیانک ایچندن طونل یایدیروب مارین وعابرینک مبتلا اوله کلدکلری مشقت وتلفاتی ازاله ایلشدر بوتفصیلاتدن مقصد عصر مزده معارف ونافعه تخصیصاتی ناملریله مشهود اولان مصارف دخی صورت مشروحه اوزره رؤیت اولنوب خزینۀ دولتن اخراجاتی مستلزم اولدیغنی بیاندر والحاصل دولته مقتضی اولان ما کولات عسکریه وادوات حربیه ولوازمات ملکیه ممالک عثمانیه نک مواقع مناسبه سنندن مرتب ومخصص اولدیغی مثللو بالجمله وکلا ومأمورین وحکام ووزرا وامرا ومستحفظین قلاع وبقاع ویرلی قولی تعبیر قلنان معظمات بلاد ضابطان ونفرائنک وارباب زعامت وتیمار دینلان سواری عساکرینک جهت معیشتلری محالرنده تفصیل قلندیغی وجهله مرتب ومنقسم اولمغله خزینۀ

دولت درگاه عالی یکپچری و سپاهپلری علوفه سیله مصارفات متفرقه اوله رق سنوی برایکی
ملیون لیرا قدر مصارفاته محتاج ایدی .

فصول سابقه ده توضیح اولندیغی اوزره عصر اورخان غازیده اوچی بر درهم اولمق
اوزره اچقه قطع اولنوب سلطان سلیمان زمانه قدر چوقلق تغییرات کورمامش ایکن مصارفات
دولت تکثر ایتک و معاملات میریه اچقه اعتباری اوزرینه جریان ایتک حسبیه مخصصات
عسکریه دن برنوع تنزیلات اجرایی ضمننده اچقه نک وزن و عیاری تنقیص اولنه اولنه
بیك تاریخلرندن صکره لری بر درهم کشدن اون اچقه و بائکه دها زیاده قطع اولنمغه
باشلانندیغی مثالو اوج اچقه اعتبارنده پاره و اون اچقه لك كمش سکه ضرب اولنوب بیك
یوز تاریخندن صکره طقسان اچقه اعتبارنده ویدی درهم وزننده زولته نامیله برنوع سکه
دها احداث اولندی و رفته رفته تنقیص قیمت حقیقه اولنمغه برابر کیدرک قرق پاره یعنی
یوز یکرمی اچقه رایج ایله غروش وایکی غروشلق و یوز پاره لك كمش سکه لر قطع اولندیکه
سلطان مصطفی خان ثالث غروشلری الی درهم وزننده والی بر عیارنده در بناء علیه
اسدی غروش وقاره غروش تعبیر اولنان درکلی وقوشلی ریلارک فیثاتی طبیعتله اوچیوز
اچقه یه طوغرو والتونلرک فیثاتی دخی بونستله ترقی ایدی .

فاتح زماننده یالیز التونی وزن و عیارنده و فلوری نامیله التون قطع اولنمغه باشلا یوب
بر طرفه ضارب النضر صاحب العز والنصر فی البر والبحر یازیلوب بر طرفه دخی پادشاه
عصرک اسمی و محل ضربی و تاریخ یازیلور ایدی سلطان سایم ثانی سلطنتنده بر طرفه
سلطان البرین و خاقان البحرین السلطان ابن السلطان و دیگر طرفه اسم پادشاهی ایله محل
ضربی و تاریخ یازلمغه باشلانندی و بوجهله رسمی تبدیل و اسمی شرافتی نامنه تحویل اولندی
ایسه ده وزن و عیاری تغییر قلنما مشیدی یوز سنه قدر دهابویه جه دوام اولندقدن صکره
عصر محمد خان رابعه التونک دخی وزن و عیاری تنزل ایدرک فقط كمش مسکوکاتی کبی
ایکی اوج مثلی راده سنده واردیر لیوب یوزده اون درجه سنده تناقص حاصل اولدی سلطان
احمد ثالث زماننده یالیز التونی وزن و عیارنده اولمق اوزره فنیدی التونی نامی و بر طرفی
طغرای هایون و دیگر طرفی ضرب فی اسلامبول نقشیله برنوع التون قطع اولندیغی مثالو
شریفی تعبیر قلنان قدیم التونلرک دخی ضربنده دوام قلنه رق زر محبوب نامی و استانبول
التونی شهرتیه مشهور اولمشدر بونلرک نصفیه و ربعیه لری وایکیسی و اوچی و دردی بریده
بیوکلری دخی اولوب عصر محمود خان اولده استانبول التونی یوز پاردیه کچدیکی وقت
فندی التونی یوزاون پاردیه و استانبول یوز اون پاردیه اولدیغی زمانده فنیدی اوج غروشه
تداول ایدر ایدی و شهریار مشارالیه عهدنده بر یحق درهم وزننده ویکرمی اوج عیارنده
محمودیه نامیله بشقه نوع بر التون ده قطع اولمش ایسه ده مسکوکات ذهبیه ده اساس فنیدی
و استانبول التونلری ایدی .

احوال خارجیہ

ویانہ انہزامندن صکرہ سلطنت سنیہ نمچہ ولہ ووندیک وروسیدہ دولتریلہ اوغراشمقدہ
ایکن فرانسه لولر دخی برقاچ دفعہ نمچہ دولتیله ایقاع حربہ مباشرت ایلتریلہ من جهة
سلطنت سنیہ ایلہ متفق حکمنده اولوب انکلتراہ لولر بیطرفانی اختیار ایلشیر ایدی اوستریالولر
ایران دولتی ممالک عثمانیہ بہ تجاوز ایتدیرمکہ صرف وسع و مکنت ایلدکاری حالده دوات
صفویہ نک حرب و قتال دن ازادہ سر اولدینی اوان پیرسنہ تصادف ایلدیکندن الی سنہ دن
برو منعقد اولان مصالحہ نک فسخنہ و دماء مسامینک اسالہ سنہ جواز داده اولمدی .

سلطان احمد ثالث زمانندہ سردار اکرم بالطہ جی محمدپاشا روسیہ اوزرینہ علم افراز
صولت اولدقدہ لہ و اوستریا و ووندیک دولتری بیطرف قالدقلمی مثللو مورہ فتحندن
صکرہ سردار اکرم شہید علی پاشا قورقہ جزیرہ سنی تسخیرہ نصب نفس اہتمام ایلدکدہ
بوندن مقصد نمچہ اوزرینہ تسہیل حرکات سفیریہ اولدینی جہتلہ بالضرورہ اوستریالولر
اعلان حربہ مجبور اولوب بووقعہ دہ دخی روسیہ ولہ دولتری حربہ اشتراک ایلدیلر .

بیکی یوز اوتوز بش سنہ سی افغانیلر اصفہانہ مستولی و دولت صفویہ مندرس اولمغلہ
صدر وقت بولنان داماد ابراہیم پاشا سلطنت سنیہ نک غرباً اولان ضایعاتی شرقاً قزاق
فکری و شاہان صفویان ایلہ منعقد اولان مصالحہ نک بالطبع زائل اولدینی سررشتہ سیلہ
مرکز اجتماعلری طاغلمش اولان امرای اعجام اوزرینہ سوق عسکر ایتدیردی سنی .

المذہب اولان طاغستان اہالیسی دخی حکومت شیعہ دن تخلص کریبان ایلک اوزرہ زیر جناح
دولت علیہ یہ صیغتمق ہوسنہ مسارعت ایلدیلر لکن روسیہ ایلر ممالک ایران دن حصہ مند
اختلاس اولمق اوزرہ حرکت و بوخصوصدن طولانی دولت علیہ اوزرینہ اعلان حرب
درجہ لرینہ قدر اظہار شدت ایلدکاریہ مبنی طاغستان روسیہ لولردہ و تفلیس و روان
ایالتلری سلطنت عثمانیہ دہ قالمق اوزرہ عقد معاہدہ اولمغلہ بیچارہ طاغستانیلر ابراہیم
پاشانک بو ظلم و غدرینی مشاہدہ ایلہ یا غموردن قاچارایکن طولویہ طوتلدقلمی اکلا یوب
باشلری قایغیسنہ دوشدیلر و بونک شامتی ابراہیم پاشا اقبالنک برکشتہ اولسنی مستلزم اولدی
مؤخرآ ایرانندہ تسلطن ایدن نادر شاہ دولت علیہ علیہنہ مسقو دولتیله عقد معاہدہ
ایتمککہ بیک یوز قرق سکز سنہ سی روسیہ لولر ممالک عثمانیہ بہ هجوم ایدوب فقط نادرشاہ
قندہار و ہندستان طرفلرندہ مشغول حرب و ستیز بواند یغندن مسقو لولرہ معاونت ایدہ مدی
نمچہ لولر دولت علیہ ایلہ روسیہ دولتی اراسنہ کیروب بارشدیرمق حیل مقد و خانہ سیلہ بر
مدت امرار ایام و بغتہ نقض عہدہ قیام ایلدیلر بوسفر دہ و ندکلور حربہ اشتراک ایلدکاری
مثللو لہ دولتی دخی مسقورلک کندی حقلمندہ اولان نیات و افکارینی تفرس ایتککہ اول
طرفہ اعانہ شویلہ طورسون دولت علیہ ایلہ عقد اتفاقہ تشبث ایلدکاری حالہ کمال خوف
و تلاشلرندن بوکا دخی موفق اولہ مدیلر فرانسه لولر عرض توسط ایتککہ برابر بالاخرہ

روسیه و نمجه دولتریله اشترا که مجبور اوله جقلریخی علی طریق الاخافه صراحة بیان ایشلر ایکن دولت علیه بلغرادك فتحه قدر اظهار ثبات و تجلد ایلدی و نهایت فرانسه مرخصی و مأمور لرینك اقدام و اهتمامیله امر مصالحه نتیجه پذیر اولدی .

روسیه امپراطور یچه سی قترینه اوائل سلطنتنده انکلتزه دولته ارائه روی التفات و مساعدده و فرانسه لولره عکسینه معامله ایده کلدیکندن سلطان مصطفی خان مرحومك مسقو سفریخی احق حقنده اولان اصرار و تهالکینی درسماتده بولنان فرانسه الجیسی تقویه و تشدید و برطاقم دلائل و ادله موهمه سردیله حصول منافی توثیق و تأیید ایدرك اعلان سفره سبب قوی اولدی .

نمجه لولر ایله روسیه علیه نه تجاویزی و تحفظی عقد معاهده رسمیه اولوب مقابلنده بغداد مضافاتندن غالچیا تعبیر اولنان اراضی اوستریا دولته هبه و تمليك و مصارف سفریه اوله رق تقریباً اون ملیون قرانق قدر اعانه نقیه دخی اعطا اولمشیدی . آثار هزیمت و مغلوبیت جیوش عثمانیه جانبنده رونما اولدقده نمجه لولر سالک سمت تانی اولوب مؤخرأ روسیه و پروسیا دولتری بیننده له ممالکینك مقاسمه سی قرار ایشدیرلق اوزره ایکن نمجه لولرك دخی حصه مند احتلاس اولسنه مساعدده اولنه جنی قترینه طرفندن تلمیح اولمغله تجارت ایکی طرفلی اولمق ایچون نمجه لولر درعقب نبیدیل روش و حرکت و ثبات قدم و ایفای تعهد مثللو ملاحظات مردانه کیدن کف نظر رغبت ایلدیلر .

انکلتزه و ونديك دولتری اقدکزه وارد اولان روسیه دو نمانسه ضابطان و نفرات اعطاسیله ولوازمات حربیه بیعیله معاونت ایشلر ایشده بو صورتی اجرتله آدم طومق و تجارت یولنده اخذ و اعطا ایلک رنکنده ابراز و ارائه ایتدیلر .

ایران دولتی نادرشاهك قتل و اضمحلالندن صکره طوائف ملوک هیئته کیروب ذکر اولنان روسیه محاربه سی اوائلنده امرای اعجام یکدیگریله محاربه و مقاتله قیام اوزره اولدقلرندن دولت علیه نك مغلوبیتدن استفاده و قتلری یوغیدی .

✽ احوال علوم و معارف ✽

اوائل دولت عثمانیه دن بروضهور ایدن فضلا و اصحاب کمال تاریخ و طبقات کتابلرنده مسطور و آثار قلمیه لری متداول و مشهور اولوب فنون حکمیه و تنظیم مصالح دولیه خصوصلرنده اولان مهارتلی دخی اثر دن مؤثره انتقال قاعده سیله معلومدر .

شویله که از مدت ایچنده بویله بر عظیم الهیکل دولت تشکیل ایلک و عسا کر منتظمه و دو نمانه ترتیب ایتک و باروتك ظهوریخی متعاقب طوب و تفنك و خبره اعمال و ایجاد قلنمق و ویانه و بغداد مثللو ممالک بعیده یه جسیم اردولر سوق ایده بیامك و قوه بحریه ارسالیله آفریقا ساحلریخی تسحیر ایتدیرمك و سوبشده سفن حربیه انشا ایتدیردرك هندستانه طوغری اعزام و جزیره العرب ساحلریخی ضبط ایتدیرمك و او عصرلره کوره موجب

انتظام و مستلزم محاسن عدیده اولان قوانین مهمه وضع و تأسیس ایلك فنون حکمیه و سیاسیه مهارتیه متوقف ایدوکنندن اسلافك فضل و کمالی اشبو موافقتلرندن استدلال اولنق لازمدر لیکن بیک تاریخندن صـ کردلری علمای اسلامیهك معلوماتلری علوم شرعیه و فنون ادبیه منحصراً و کلاً دخی اکثری جادل اولغله اداره پرکار دوات مرکزینی غائب ایتمهک باشلیدی . کیدرک اشبو مرتبهده دخی قالدیهوب بابا و ددهلرینك فضل و کماله تعظیماً هنگام صـ باونلرند مدرسلک رتبهسی توجیه اولنان مخادیمی سلسله طریقی منصب علمیهك زروء عالیاسنه قدر چکه کلدیکندن تحصیل علم و کالاته احتیاج قالدیغنه و بعض وزرا و اکابر دخی طریقی علمیهك من جهةالمواخذة خفته و بلا استحقاق قطع مراتب ایلکه آلت اولدیغنه نظر ایدرک شائبه حائلرندضعف و عجز مشاهده ایلدکاری اولدلرینی طریقی علمیه به ادخل و مدرسلک رؤسی استحصالیله بهره دار ایتدکارینه مبنی طریقی علمیه یکی به منقسم اولوب بریسی مخادیمدن و دیگرى نائل مراتب اولان درس خواجهلرندن مرکب ایدی . لیکن مخادیم هنگام صـ باوتده و درس خواجهلری مسن اولدلری حالد طریقه داخل اوله کلرلیله قاضیهسکرلک درجهلرند مخادیم صنفی اکثر و بونلردن تحصیل عام و کمال ایدلری ایکی صورته موقر اولوب بی بهره فضل و عرفان اوللرینه علمای طریقی و علمای رسمیه اطلاق اولورایدی . دولت علیهك خصائص جمیله سندن اولدینی اوزره وزرا و امرا مواد حقوقیه به وضع ید استیلادن ممنوع اولدیغندن امر حکومتی اجرا ایجون حکام شرعیه طریقی ترتیب و تشکیل قائمش اولدینی حالد وضع اصایی تغییر ایتسیله و باخصوص نااهل اولان قاضیهسکرلر قاضیلک منصبلرینی چراقاق صورتهلر دائرلری امکدارانه توجیه اید کلرلیله صنف موالیده نااهلر حادث و طریقی قضا جهلای اغوات ایله مالا مال اولدی کرک منصب و کرک اربهلق درعهده ایدن نأبلر ایسه ماتزم نوعندن بواندقلرندن بالطبع تزیید واردادن بشقه شیء عطف نظر ایلرلرایدی . بناءً علیه ممالک محروسهده اجرای حکومت ایدن قاضی و نأبلرک علم و معارف ایله متحلی و اخلاق مدوحه ایله متصف بوانالری نوادر حکمنه کیردی . و بوجهتلرله حکام شرعیهك اسکی رونق و اعتباری و حققرنده دولتك و خالقك وثوق و اعتمادی قالدی . وزرا و امرا و متسامین و و یوده لر او مثللو جاهل و ظالم قاضی و نأبلری یا هدیه و پاره اعطاسیله و یا خود حکومت ظامیهلرندن اغماض عین ایله محجوب ایدرک ایستدکاری کی اعلاملر الورلر و کندی او یغونسزلقلرینك سترینه و منفعتلرینك جابنه آلت ایدرلرایدی . قاضیلرک تعدیاتی حقنده یک چوق حکایات متداول اولوب اگرچه بعضیلری مضحکات جمیله سندن ایسه ده مرحوم صالح پاشا درامه متسامی ایکن برحاکم کلوب ابتدای ملاقانده سزده استانبولدن هدیه کتورمک لازم ایدی . لیکن بن مهرمی هدیه کتوردم دیو چیقاروب او کنه وضع ایلدیکنی یعنی نصل اعلام ایسترایسه کز اعطاسنده ترددا یتمام مألنی اشرا ب ایتدیکنی مرحوم مشارالیه حکایت ایدرایدی .

اوائل دولته گرمیانی یعقوب و شیخی نامیه مشهور اولان مولانا سنان و شفا صاحبی حاجی پاشا و حاجی سلطان محمدك حکیم باشیسی کورد اورن و یاوز سله ان سلیمك حکیم باشیسی اخى چلبی کبی حذاق اطبا و کال رئیس و سیدی رئیس و پیری رئیس مثللو هیئت و هندسه خواجه لری و معمار ایاس و معمار کمال الدین و معمار سنان کبی ارباب هنر ظهور ایتمش و علوم ریاضیه تعلیم و تعلم اولنوب باخصوص سلطان سایان خان حضرتلری مستقل طب و هندسه و هیئت مدرسه لری و تیمارخانه لری انشا و اعمار ایتدیرمش ایسه ده بو علملر تحریات و تحقیقات ایله اور و پاده استکمال اولدقجه بزده کیر و لیدیکندن بو باده اجنبی استخدا منه مجبوریت حاصل اولدی . معمار سنان قولندن معمار داود اغا و سلطان احمد جامعی معماری محمد اغا و یکی جامع معماری قاسم اغا متأخرین هنرمندان اولوب اشبو قاسم اغا میخانه لری انشاسنه رخصت و یرمك تهمتیه قبل اولدقدن صکره جامع مذکورى معمار مصطفى اغا نامنده بر ذاتا کمال ایلدی . و بعد ازین دولتیجه معمار اغا لى منصبی و معمار خلیفه لری و ارایسه ده بو مثللو اینیه جسیمه انشاسی ارمنی و روم قلفه لری نه منتقل اولدی . بناء علی ذلک نور عثمانیه و لاله لى بیامعلری سیمون قلفه ودها صکره انشا قانان ابنیه جسیمه بی چراغی اولان قومیا نوس قلفه بناء ایلشدیر .

متأخرین علماده اگرچه علوم حکمیه و فنون ریاضیه یه واقف ذاتلر ظهور ایلش ایسه ده موقعلری نامحل و الات و ادواتجه دخی عدم استطاعتلری مقرر اولدیغندن معلوماتلرینک ماوضع الهی اقتطاف ممکن اوله میوب فقط لاینن لساننه واقف اولان کاتب چاپی فن جغرافیادن جهاننمای و فنون حریرییه متعلق بعض رسائل و تاریخ یازمش و داماد ابراهیم پاشا صدارتنده ابن خلدون مقدمه سی و سائر کتب تواریخ و نظامات عسکریه بی متضمن کتابلر ترجمه و تألیف قانمشدیر . فی الاصل اور و پالو اولوب اهتدا ایدن متفرقه ابراهیم افندیکنک همتیه صنعت طبع و تمثیل دخی احداث اولنوب خلیجه کتاب باصلدی . لکن سلطان مراد ثالث عصرنده بر اجنبی ترجمه حروف ایله کتاب طبع ایتمك و کمرک رسومندن معاف طوئق اوزره رخصت استدعا ایدوب مساعدیه بی حاوی فرمان و یرلمش اولدیغندن طقوز یوز طقسان الی تاریخنده و اسف تاریخی هجمنده بر کتاب باصمش و فرمان عالی مذکورى دخی دیباجه سنه عیناً یازمش اولغله بر نسخه بی شیخ الاسلام اسبق حسام افندی مرحومده منظور فقیر اولوب فقط اسمی و قننی فندن اولدیغنی خاطرده قالمدی دیمك ایسترم که فن طبع اشبو ابراهیم افندیکن یوز الی سنه اول ترکستانده حاصل اولمش ایسه ده ایلر ولیه مامشدیر .

فی الاصل فرانسه لى اولوب دونمای هایونده طوبخ بلیق خدمتنده قوللانش و مؤخرآ شرف اسلام ایله مشرف اوله رق کرچک داود اسمیه تسمیه قانمش اولان داود اغا بیك یوز اوتوزا یکی سنه سنه حریق طوبله لری نی ایجاده موفق اولغله یومی یوز اچقه وظیفه ایله

طلومبه جی باشی نصب اولنوب معیتنه ضابطان و نفراتیه طلومبه جی اوجاغی ترتیب و تنظیم قلمه شد که بودخی جمله ترقیاتدندر .

دولت علیه بیک یوزالی بر سنه سنده واقع بلغراد معااهده سنه کلتجه به قدر علی الدوام سفر بر حالنده بولنوب جاجامسطبه نشین حضرت اولدیی مدت اوز سنه بی تجاوز ایتماکله سوق الجیش و تعیمه الجیش قلری امرای عثمانیه به صنعت مألوفه حکمنده ایدی کوپرلی زاده صدر شهید فاضل مصطفی پاشا مر حومک بلغراد محاصره سنده اردوی هایونک وضعیتنی و ترتیب اولنان موازیلری متضمن تنظیم ایندیر مش اولدینی خریطه مؤخر آله کچمش اولدیغندن فن حربیه و قوف و معلوما تلرینک ادله قویه سندن اولدینی ارکان حربیه دائره سنک جمله افاداتدندر سردارا کرملرک متأخرینی اکثریا سلحدار لقدن و مأمورین ملکیه و قامیه دن نشأت ایتش بولند قلری حالده واقع اولان موفقیتلری غریب کورینور لکن بروجه محرر امرای عسکریه وارکان دولتک فرقه غالبه سی مکرراً اردولرده بولمش و سوق عسکر و ترتیب لوازمات سفر خصوصاً صرلنده تبحر به لری سبقت ایتش اولدیغندن و باخصوص سرحد امراسی احوال دشمنی و طرق و معابرک وضعیت و کیفیتلری پک اعلا بیلدکلرندن عقد اولنان مجلسلرک مذاکرانی ثمره نافع حاصل ایدر و سردارا کرملردخی عقل و درایتلری مرتبه سنجه مستفید اولورلر ایدی طوب و خبره دوکمک و تفنک و قنچ و اسلحه سائر و باروت و کله و قورشون مثلوشیلری اعمال ایتک و کمی و قلاع تعمیر و انشا ایتک و حیوان طاقملری و چادر کبی مهمات سفریه تنظیم ایتدیرمک خصوصاً صرلنده چوقلق اجانبه احتیاج اولیوب علمی و عملی بو ایشلرک اهل واربانی بولنور ایدی حتی عصر احمد خان نائنده علی اوسته نامنده برهنر مند سکیان قطار تقاضنده قالیون تیمورلری یا پیش و اولوقته دکیان اجنیلردن النان تیمورلردن استغنا حصواته موفق اولمشدر فصول سابقه ده ذکر اولدینی اوزره روم ایلی و اناتولیده و باخصوص ادرنه جوارنده متعدد دوه و سائر حیوانات مرعا و مشتلاری اولوب کلیتو میری حیواناتی یتشدریلور و اوردی هایونلرک نقلیاتی خدماتنده قوللانیلور ایدی بولنر دخی درجه درجه ندنی ایتدیکی مثللو بیک یوز الی ایکی سنه سندن سکیان ایکی سفرینه کلنجه به قدر ممتد اولان ایام حضرت اس اساس حرکات عسکریه اولان اشبو حیوان یتشدرمه قاعده سنی دخی محو و افنا ایتمکله مرعا و مشتلرک بعضی شوکا بوکاتمایک اولنه رق اراضی موقوفه عدادینه داخل و بعضیلری متفندان عمال ید غضبیه گرفتار اولدیغندن سکیان ایکی سفرنده اهالی حیواناتی جمع و جاب اولنه رق قوللانیق اقتضا ایلدی حالبوکه جسم اردولرک نقلیاتی او مثللو غیر منتظم مکاری حیواناتیه ایفا و لائق مشکل اولق حسبیه بو خصوصه پک زیاده ضرورت چکلدی ودها صکره کی سفرلرده بو مضایقه کیتدکجه مشدو جیوش اسلامیه نک پریشانلغنه سبب قوی اولدی بالجمله قلاع خاقانیه ده و بابا طاغی و صوفیه مثللو مواقعده جسم انبارلر و کلیتو ذخائر مدخره بولنوب هر سنه برثانی استبدال اولنق و بوجهته له اوچ سنه ده تجدد ایتک اصول دولندن

ایکدن بودخی مختل ومشوش اولدیغی کبی کرک موکب صدر اعظمینک و کرک قوه مفروزه اولان سرعسکرلر اردولرینک رجال دولتدن مقدم ومقتدر نزول امینلری وقصاب باشیلری واهل واربابندن ساربان باشیلری اولوب اردولرک لوازمات ونقلیاتنی ترتیب واستحضار ایلک قاعده قدیمه سی دخی کاینجی اسرا اولنه مدیغندن سکسان ایکی سفیرینک برنجی سنه سنده ذخیره مضایقه سی حادث وعسا کر اسلامیه نک تلفات وپریشانلغه باعث اولدی برده عسا کر عثمانیه تمه سنندن اوله رق علوفه یومیه ایله موظف اصحاب حرف ضابطان ونفرائی واریدیکه کمیت ومقدار عاوفه لری فصلل سابقده محرر موجب دفترنده مسطوردر بونلراروی هایونلر ایله برابر کیدروائشای راهده ومکرزلرده طوب وتفنک وسائر اسلحه وحیوان وچادر طاقملری مثللو لوازمات سفریه یی اعمال وتعمیر ایدرلر ایدی مرور زمان ایله بونلرک دخی قاعده ورابطه لری خلل پذیر اولمغه اردولر خروجنده استانبولک هر نوع اصنافدن خلیجه اجلاف تجمع ایدرک کیدرلرو مکرزلرده چادر و براقه لر دن بربر وقهوه جی و مناو و ترزی دکانلری وفروز وکچمدن حماملریاپوب عظیم بر بازار یزی تشکیل ایلرلر ایدی ذاتاً عسکر دنیلان یکیچری نفرائنک اکثریسی بورجکی وحمال و مناو مقوله لرندن مرکب اولمغه وعلوفه وانتظامدن عاری بونلر ایله بونلر دخی اصنافه قاریشوب کارو کسبله مشغول ودشمن ظهور نده آلات وادواتلرینک استخلاصی قیدینه دوشوب ارباب حربک تلاش وفتمورینی مستلزم اولورلر ایدی وقیله غایت منتظم ولوازمات حربیه ونقلیه لری مکمل اولان وبالاتعب اوچر بشریوز ساعتک مسافه لر دسوق قلنان عثمانلی اردولری ایشته بو حاله کیردی وغلبه وظفردن محروم اولدی . بوقنا قللرک اس اساسی خدمات مخصوصه یه معین اولان خاص وزعامت وتیمار مثللو اقطاعاتک ایفای خدمته غیر مقتدر عجزیه وسبب اخری ایله نا اهللره توجیهی وعلوفه عسکریه نک ایراد حکمنه کیروب ارباب حربک بالضروره نظام سنر واطاعت سنر لکه مجبور اولملری قضیه لری اولوب بونلر دخی بالتدریج اوچ درتیوز سنه ده حاصل اولمش شیلر اولمغه کرک مدبران دولتک وکرک طوائف عسکریه نک بو خصوصلرده اولان قباحتلری اوقدر مدت طویله ده کلوب کچن اسلافه تقسیم اولنسه هر بریسنه یک جزئی تهمت اصابت ایدر اصل سبب مرور زماندرکه هر شیی افساد ایلر اکرچه سلطان مراد رابع وقویجی مراد پاشا وکوپریایلر اولدقچه تنظیم امور دولت ایلدیلر لکن اساسی اولمدیغندن وجودلریله قائم اولوب کندولرندن صکره ایشینه اسکی یوله عودت ایلدی وان شاء الله تعالی فصل اتیده بیان اولنه جنی وجهله خلیل حمید پاشا وشیش الاسلام حمیدی زاده امور مأموره لرینی اصلاحه تشبیلری یولنده قربان اولدیلر وساططان سلیم رجالی وعلمدار پاشا ایله همدست اتفاق اولان ارکان دولت بتون قنطره خطر دواغرا دیلر بونلرک نتیجه احوال لرینی کورنلر فدا کار اتمدن اجتناب ونفسلرینی مهیا کیه القا ایلمکدن اتقا ایدرلر ایدی نهایت ثمره اقدام واقداری اوله رق سلطان محمودخان ثانی حضرتلری اصلاح مزاج دولته موفق اولدی .

نتائج الوقف

جلد رابع

ترجمی دفعہ اولہرق اخوت مطبعہ سندھ طبع اولنشد

س ۱۳۲۷ نہ



افادۀ مخصوصه

بيك اوچ يوزيدى سنه سنده اوقاف هايون ناظرى ايكن داربقايه ارتحال ايدن مصطفى نوري پاشا طقسان اوچدن طقسان سكر سنه سنه قدر دفتر خاقانى نظارتنده بواندينى سرده (تاريخ الوقوعات) عنوانيله بر تاريخ عثمانى طبع ايتدرمكه باشلامش ايدى. و بواشرى اساساً دوت جلد اوزرينه ترتيب ايتمش اولدينى حالده بونك انجق اوچ جلدنى پيدربى نشر ايدى بيلوب دردنجيسنك نشرى بى بعض اسبابدن طولايى تاخير ايش ويا تصادف غريب ياخود اثر اهميت اولق اوزرده بر جمعه كوني آكسزىن وقوع بولان وفتندن بردهفته اول قاين برادري بولان پدرم داخليله ناظرى اسبق سعيد افندى يه خطاباً (برادر اكر بن اوله جك اولورسه م تاريخمك دردنجى جلدنى بر زمان مساعدده طبع ايتديرى كز) بولنده و شهود محضر نده وصيتده بولنش ايدى.

مصطفى پاشانك وفتندن پدرمك ارتحالده قدر ون سكر سنه گذران اولمش ايكن مع التأسف اواسباب زائل اولماش و بىء عليه (زمان مساعد) حاول ايتامش ايدى. پدرم ايسه شوموفقيتسز اكنندن ناشى تأسفلر ايدرك اشته سبك وصيتنى دائماً تذكار و بركون كايده امكان بولورسه بو وصيتك يرينه كتيرلمسنى بو عاجزه امر و اخطار ايدر ايدى.


في الحقيقه بردهده اشته سبك وصيتنى ايفايه مقتدر اولمقسزىن بوندن بر سنه اول مرتحل دار آخرت اولدى. فقط لله الحمد والمنه بوندن بش آى اول نسيم حرى ، طلوع آفتاب مشروطيته برابر وزان اولمغه باشلايجه نيجه آثار مستحضر دنك بر نهال شتاديدى كى صار غيلرندن چيقارلمغه باشلامسى و بوفىض ايله ساحه مطبوعات بك آزوقت ايچنده يوزلرجه مؤلفات مرغوبه ايله زينت اب اولمى اشته دن پدره و پذردهن بو عاجزه مدوروصيت احكامنك اجر اسنه بر سائق مؤثر اولمغه جلد رابع مذكور كرده باطفه تعالى طبع و نشرينه ابتدار قلمشدر.

برده اترك اقسام نائى اوايه سى اساساً آز مقدارده طبع ايتديرلمش اولوب مع مافيه

نسخ منتشره سی دخی بالاخره بعض کارگذارلرک آماج دانه انتفاعی اونغاه هیچ
 بریزده آانوب صاتیلمز اولمش وعمومک استفاده سی تأمین ایدر یولده محرر بولنان
 بودکرلی اثر اسباب معروضه دن طولای بسبتون اورتهدن قالمش ایدوکی جهته اوچ
 اولکی جلدلرکده بوکره یکیدن طبعی - مؤلفک اودای متبایقه سنک اخطارینه وشو صورت
 مشارالیهک نامنک خیر و رحمتله یاد ایدلسنه وسیله اوله جغنه بناء - مناسب کورلمشدر .
 شوراسنی ده علاوه ایده یکه (نتایج الوقوعات) کرجه درت جلد در فقط مندرجاتی اعتباریاه
 آتی بابه منقسمدرکه برنجیسی ابتدای ظهور آل عثماندن سکر یوز درت تاریخنده کی
 تیمور وقعه سنه قدر اولان یوز بش سنه لک وقوعاتی ، ایکنجیسی ییلدیرم بایزیدخانک
 وفاتندن سلطان بایزید خان ثانینک ترک سلطنت ایتدیکی تاریخه قدر تقریباً یوز اون اوچ
 سنه لک احوالی ، اوچنجیسی سکر یوز اون سکر سنه سنده واقع یاوز سلطان سلیمک
 جلوسندن بیک اوچ تاریخنده سلطان مراد ثالثک وفاتنه دکن سکسان بش ییلاق حادثاتی .
 دردنجیسی بیک اوچ سنه سنده وقوع بولان سلطان محمد ثالثک جلوسندن بیک طقسان
 طقوزده سلطان محمد رابعک خلعنه قدر اولان طقسان بش سنه لک وقایعی ، بشنجیسی
 سلطان سلیمان ثانینک جلوسندن بیک یوز سکسان سکر سنه سنده منعقد قینارجه
 مصالحه سنه قدر اولان وقوعاتی میندر .

بشنجی بابی تشکیل ایدن اشبو جلد رابع ایسه بیک یوز سکسان سکر تاریخندن
 بیک اکیوز الی یدی تاریخنه قدر جریان ایدن التمش طقوز ییلاق احوالی محتویدر .

« ومن الله التوفيق » محمد غالب



بشنجی باب

اشبو تاریخنک بشنجی بابی بیک یوز سکسان سکر تاریخنندن بیک ایکی یوز اللی
یدی تاریخنه قدر اولان وقوعاتی میندر .

باب سابقده بیان اولندیغی اوزره روسیهلو ایله عقد مصالحه اولوب لکن روسیهلور
قریمک ضبطه مقدمه اولان قاتار سربستلکنی قبول ایتدیرمش اولدقلرندن بمنه تعالی
آئیده تفصیل اولنهجغی اوزره نوبنو اختلالر ایقاع ایدرک بالاخره غصب و تملک
ایلدکاری جهتله اون اوچ سنه قدر تمتد اولان اشبو مصالحه عادتاً بر متارکه حکمنده
اولوب حتی بین الدولتین جریان ایدن منازعات و محاورات براییکی دفعه اعلان حرب
مرتبه سنه واصل اولمشیکن جسارت اولنه مامشیدی . چونکه دولت علیه تنظیم عسکر
و تقیم مهماته محتاج اولوب سلطان عبدالحمید خان حضرتلری ایسه بونلرک حصولی
مقصدیله صدر اعظمیره رخصت کامله و یرمش وارکان دولته تحمیل تمشیت مصلحت
ایش اوادیغی حالده ابتداکی صدر اعظمیری اولان عزت محمد پاشا غایت بطی و اقربا
و اتباعنه مغلوب و ایکنجیسی درویش پاشا هوا و هوسی ایله مشغول اولدیغنه و اوچنجیسی
اولان دارندهلی محمد پاشا تهدیدینی ایقاعه قادر کوپرلی طرزنده برپیر صاحب تدبیر
ایدیسهده سلحدار محمد افندی ایله او یوشه مدیغنه مبنی بودخی کما ینبغی برخدمته موفق
اوله مقسزین منفصل و قلفات محمد پاشا مسند صدارته واصل اولدی . بو ذات یکیکچریلکدن
نشأت ایدوب چندان اداره مهم دولته لیاقت و کفایتی حائز اولدیغندن بیک یوز طقسان
اوچ شعباننده عزل اولنهرق سلحدار مشارالیه که قره وزیر نامیله مشهوردر . اخذ
مهر هایون ایله بالذات متصدی امور صدارت اولغه مجبور اولدی . صدر مشارالیه
سلطان عبدالحمید خان حضرتلرینک معتمد و مؤتمنی اولغه هر خصوصده مستشار سلطنت
ایدی عاقل و معارف شناس و صلاح حال ایله موصوف مقدم و مقتدر بر ذات اولدیغندن
و استقلال دو بالا ایدوکنندن بر بحق سنه قدر تمتد اولان ایام صدارتنده حسن ادارهیه
موفق و باخصوص استانبولک ضبط و ربطی و حوایجینک جلب و استحضاری خصوصاً
ابراز مهارت و درایتله بین الانام ممدوح اولوب امور کلیه دولتک اصلاح و تمشیت دخی
مظهر اولسی امید اولنور ایکن بیک یوز طقسان بش صفرنده مرتحل دار آخرت

اولدی . عزت پاشا ثانیاً متکا پیرای صدارت اولوب سابقی وجهله وظیفه صدارتی اقربا وقرناسنه تسایم ایدرک برحق سنه قدر تعطیل مهام وخافی اولان یکن محمد پاشا غایت بغیض وغرضکار بر آدم اولمغله درت آیدن عبارت اولان ایام صدارتنده اجرای نفسانیه نصب نفس اهتمام ایدوب طقسان یدی محرمنده معزول و وزیر کتخداسی بولنان خلیل حمید انندی مسند صدارته ارتقا ایله نائل مسؤل اولدی .

خلیل حمید پاشانک تشبثاتی

قینارجه مصالحه سی متارکه حکمنده و دوات علیه لاجرم عهد قریبده حربه مجبور اوله جغی مرتبه بداهتده اولدیغندن دونمانک تکشیری ضمننده کلیتو کراسته ولوازم سائر ترتیب وتنظیمه اقدام اولندیغی مثالوسر حداتک احکام وترصینه واهمیت موقعیه سی سفر سابقده متحقق اولان اسماعیله مجدداً برقاعه بناسنه مباشرت وچرکس قبائانک لدی الحاجه قوالانلری مقصدیله تحت حکومته ادخال و اصلاح احوالری ضمننده فرح علی پاشا صوغوجق محافظی نصب اولوب مشارالیهک تدابیر حیتمندانه سیله آنابه قلعه سی بنا و قبائل مذکوره کوندن کونه دائرة دین مبین ومدنیته ادخال اولمقده ایسه ده بونلر تفرعات قیلندن اوله رق اصل اعتنا اولنه حق ماده عسا کر موظفنهک تصحیح انتظام واطاعتی قضیه سی ایدی لکن ضابطان عسکری اعتشاش نظامدن مستفیدونفرات نامنه اولان اشخاص ایسه خیر وشری تمیزه غیر مقتدر اولدقلرندن تنظیم احوالترینه قیام ومفت خواران اللرنده اولان علوفه عسکریهک استردادینه اقدام اولندیغی آنده ضابطانک جزوی تجریکاتیه رفیع علم عصیان و اوجاغمره سوء قصد ومعاملاتنه حقارت اولنه یور دپه رک انواع مفسدتیه اغاز ایده جکلری درکار اولدیغندن بوخصوصه جسارت اولنه میوب یالکز تیمارلو سپاهینک توجیهاتنه و نا اصل اولانلره تیمار وزعامت توجیه قلماسنه دائر برنظام یاباشیدی . حتی سلطان عبدالحمید خان حضرتلرینه برادرکز عسا کر منتظمه ترتیبه نیت ونظاماتلرینی قلمه آدیرمغه همت یاباشلر ایدی . سفر ظهوریله اجراسنه موفق اوله مدی دیدکلرنده الیه صفائی کوستروب انشااه اوغلی موفق اولور دیو جامع الکلم بر جواب ویرمش اولدقلری منقولدر .

صدر جدید فطین ودرایتکار وضرلی وجسور کنج ودینج برذات اولدیغندن بوکار الزم ودشواریه عازم اولوب اقدحجه ترتیب قلنمش اولان اوچیوز نفر سرعت طوبخیلرینی ایکی بیك نفره ابلاغ ومواقع مهمه ده ذخائر کلیه ادخار وسائر لوازم حربیهک استکمانه

صرف وسیع و اقتدار ایلدی . لکن تنظیم عسکر مصارفات عظیمه یه محتاج و قارشولق بولمق مقتضی اولمسیله اولامستحفظ نامیله سرحدتده بولنان طوائف عسکریه علوفه لری یوقلمه ایتدیروب کلیتو محلول بولدی . بعدده استانبولده دخی یوقلمه اجراسنه و فیما بعد علوفه عسکریه نك منع بیع و شراسنه و تباع و اصناف کبی ایرادجیلرک عهدهلرنده بولنان عساکر علوفه لری نك ابطالنه قرار و یروب بعض مرتبه اجرا آته دخی تشبث ایلمسیله اوجاقلو بیننده تحدث ایدن شراره قیل و قاله ایرادجیلر دخی لهیب افروز اولدقلرندن ولوله ساز مسامع اعیان اولمغه باشلدی . مع مافیه ابتدای صدارتنده اغراض شخیصه دن محاببت ایددجکله یمین وارکان دولتی تأمین ایدوب برسنه قدر عهدنده ثابت قدم اولمشیکن صکر دلری تغیر اوضاع ایسی و جمع نقود و امواله حرص و تهاکی و قریم استیلا سنك هنکام صدارتنه تصادفی چمانه وقع و اعتبارینی شکست ایلشیدی . خلا فکیران صدر مشار الیه دن شیخ الاسلام قدن معزول عوض پاشا زاده ابراهیم بك همشیره پادشاهی اسماء سلطانیه تذکره تحریر و صدر اعظمك علوفه عسکریه ی تنقیح دن مرادی یکی چریلری آیاقلندیروب تجدید سلطنت ایتدیرمکدر دیو تذکیر ایله لیل و نهار آرزومند اولدیغی مقام فتوایی تحصیله بو صداقتی آلت ایدوب قیودان دزیا غازی حسن پاشا دخی قول مذکور ی تأیید و صدق ایلدیکنه و دفتر دار بولنان سایم اغا زاده نظیف افندی که سلطان حمید خن حضر تلرینك شهزاده نکلری اواننده تولد ایدوب آخرتلك خانم نامیله مشهور اولان کریمه لری در شهوار خانك زوجیدر حرمی واسطه سیله اشبو شراره القا آته مروحه جنبان اشتداد اولدیغنه منی بیک یوز طقسان طقوز سنه سی جاذی الاولینك یکر می سکننجی کونی عزل و بوزجه اطه سنه نقل اولنوب بش اون کون مرورنده جدد و الیلکی توجه اولمشیکن متعاقباً قتل و اعدام اولندی . واقعا خلیل جمید پاشانك تشبثاتی باعث اختلال اوله یلمك مظنون ایلدهده اوله برشی واقع اولسه طویك آغزینه اولاکندوسی کله جکی آشکار اولمسیله بوسیه ایله تجدید سلطنت عزویاتی بی اساس و غیر معقول اولدیغی بدیهه تندر . معاً صدارته کتوریان شاهین علی پاشا امی و عامی بر آدم اولوب صدارتی ایسه سفر سابقده اوزی قلعه سنك محافظه و روسیه لی مهاجمانك مدافعه سنه موفقیتی ایچون بروع مکافات اولدیغندن سرحدتده طبعی ممکن اولمیان نفایس اطعمه اکلیله گذارنده یاه و طقوز آی قدر متکا پیرای مسند عز و احتشام اولدقدن صکرده معزول و اوچ درت آی مقدم قیودان پاشا کتبخدانقندن رتبه وزارتله مورد و الیسی نصب اولسان قوجه یوسف پاشا ایکی یوز سنه سی اواننده صدر صدارته منقول اولدی بونك

زماننده روسیه و نتیجه سفر لری کشاد قانمش اولدیغندن بمنه تعالی احوالی آتیده
تفصیل اولنه جقدر .

احوال جزایرلی غازی حسن پاشا

قپودان دریا جزایرلی غازی حسن پاشا دولت عبدالحمید خانی وقوعاتنده اکثریا صاحب
رأی و تدبیر اولدیغندن خدمات و قعه سیله احوال ذاتیه سی بیان اولنق مقتضی کورمشد که
سلسلهٔ حادثاتک توضیحه قوت ویرر .

جلد سابقده بیان اواندینغی اوزرد چشمه وقعه سنده ولنی جزیرده سی تخلیصنده مشارالیه دن
مشهود اولان شجاعت و موفقیت سببیه رتبهٔ وزارت ایله قپودان دریا نصب اولنوب
عنوان غازی ایله منشور اعتباری توشیح ایدلمشیدی . محاربهٔ سابقه او اخرنده روسجق
سر عسکرلکی و بعد المصالحه ایکنجی دفعه قپودان پاشالق خالغیه دوش افتخاری تزیین
قلندبی . برالشام طرفلرنده ماتریمیندن ایکن تحصیل ثروت و قدرت و دولت علیه نک روسیه
محاربه سیله اشتغالندن استفاده ایله سواحل شامیه نی ضبط و عکا قلعه سنده تحصن ایدن
طاهر عمر نام متغلب مصرده تفرعن ایدن بولوت قپان علی بک ایله اتحاد و مستقو
دوئماسی آمیرالیه دولت علیه عامینده اجرای مخایرات و مذاکرات ایتمکده ایکن ابوالذهب
محمد بکت سیف سطوتیه علی بک مقتول و او آراق مصالحه دخی منعقد اولنله مشارالیه
محمد بک جانب سلطنت سینه دن طاهر عمرک تنکیلنه مأمور ایدلمشده برالشامه وصولنده
مرتحل دار آخرت اولنله بو خدمت قپودان مشارالیه عهدهٔ درایتیه حواله اولندی .
بناءً علیه سکسان طقوز سنه سی او اخرنده دوئمای همایون ایله عزیمت و عکا قلعه سی
محاصره ده مباشرت ایدوب طاهر عمرک اکثری عسکری مغربی و قپودان مشارالیه
دخی غرب اوجاقلری بیننده صاحب نام و شان اولدیغندن مغریلردن ال طوته رق باغی
مرقومک قتل و ازاله سنه موفق اولدینغی مثالو ایرتسی سنه دخی اولحوالیده بولنان اولاد
و اتباعنک اشقیاسنی قتل و اعدام ایله بقیه سی استانبوله کتوردی . ینه سفر سابق سیأتندن
اوله رق هنکام محاربه ده مورد رعایاسی علم افراز طغیان اولنله آرئودلندن عسکر سوق
اولنوب جمعیت شقاوت پریشان ایدلمشیدی . لکن آرئود طائفه سی مورد جزیره سنده
یرلشوب تجارت صورتیه کرک اسلام کرک خرسیتیانلری پنجهٔ قهر و ظلملرینه آلدقیرینه
وبونلرک دفع تغلب و تسلطلرینه والیرک قدرت و لیاقتلری قاصر اولسنه مبنی بیات
یوز طقسان ایکی سنه سنده قپودان مشارالیه مورد والیاسی ضمیمهٔ بالتوجیه ارسال

قلندی . مقر ولایت اولان طرابلسیه تقریباً آرنالودولر استحكام انشاییه مدافعه قیام ایلدکلرندن عظیم بر محاربه وقوعیه ایکی اوچیک شقی اعدام اولوب بقیه سی استیمن ایلدیلر . اهالی اوزرند اولان مطلوبلری یوزبیک غروشه قطع و کندولری جزیره دن دفع اولوب فیما بعد کلماملریچون کرک ارنالودولر کرک اهالی یه نذرلر تخصیص و تعیین قلنهرق آسایش مسکت اعاده اولندی . جزیره مرقومه ده واقع مانیه رعایای مناعت موقعه لرینه استناداً اوتهدنبری شقاوت و عصیان اوزره اولدکلرندن مشارالیه ایرتسی سنه دونمای هایون ایله آق دکره خروچنده انلرک دخی تأدیپ و تربیه لرینه مباشرت و شمدی یه قدر مسبوق اولدیغی وجهله حرباً مانیه طاغلرینی آورده قبضه جلادت ایلدی بوندنکره هر سنه معتاد اولدیغی اوزره دونمای هایون ایله آق دکره سفر و جزیره لرده و آناتولی ساحلرند مخالف طور تابعیت حرکات باغیانیه متجاسر اولان دره بکلری مثلومتغلبه یی کشته تیغ ظفر ایتمکه کوندن کونه وقع و شانی مترقی اولوب اتابک دولت و محارس تحت سلطنت مقامنده بوانور ایدی . بیک ایکی یوز برسنه سی بغاه امرای مصریه یی تأدیپ مأموریتیه اولجانبه عزیمت و خطه مصریه یی عصاة امرادن تخلیص و تخلیه یه همت ایدوب انحق روسیه سفرینک ظهورینه مبنی بوجه مسارعت استانبوله دعوت اولدیغندن امر تأدیپ لایقیه اکیمل ایتمکیزین عودت و تحصیل ایلدیکی اون ایکی بیک کیسه ذمات امرای خزینه یه نسلیم ایلدی مشارالیه مهیب و وقور و کثرت ثروت و قدرت ایله مشهور بز وزیر شجاعت سمیر اولوب حتی اعانه سفریه اوله رق اون بیک کیسه ویرمشدرکه دیرکای ریال ایکی غروش اعتباریه شمدیکی حساب اوزره یوزبیک کیسه یی تجاوز ایدر . چشمه وقعه سنده دونمای هایون کلیاً محترق اولمشکن ازسرنو انشا و اکیلی اثر غیرت و اقدامی اولدیغندن بشتمه ترسانده مجدداً قالیونجی قشله سی و جسم برجامع شریف و سائر ابنیه خیریه انشاسنه موفق اولوب آق دکره آطه لرند و دونماتک کشت و کذار ایلدیکی ساحلرده چشمه و سائره مثللو آثار خیریه سی بولندق محل یوقدر . عصرینک مورخلری جمع ماله انهماک ایله اتهام ایدرلر سده هر حالده محاسنی سیئاتنه غالب اولدیغی درکاردر .

قریم وقوعاتی

کلام قریم وقوعاته : طائفه تاتار سر بست اولوب ایستد کلرینی قریم خانلغنه انتخاب ایلری قینارجه معاهده سی احکامندن اولق حبسیله عقب مصالحه ده قریم علما و امرای

صاحب‌کرای مقام خانی به انتخاب ایدوب لیکن موسقولونک نیت وافکار غصب کاریستی
تقرس ایتملریله طرف دوات علیه ارسال مبعوثان و تقدیم معروضات ایله سر بستامک
رفعی و قدیمی وجهله جانب سلطنت سنیه دن صاحب‌کرایه خانلق توجیه اولمسی استعدا
ایلدیلر. بوماده معاهده مذکور دنک اس اساسی اولوب روسیه لولرک بوکا بروجهله موافقت
ایتمه چکی معلوم ایهده هیچ اولمازسه بر صورت متوسطه به ربط اولمق اوزره پادشاه انام
خلیفه اسلام اولدیغدن خان مشار الیه ارسال تشریفات ایله تصدیق امارتی لوازم
مذمیه دن اولدیغی هنوز استانبوله کلان روسیه ایلیچیسنه افاده اولنوب قرق بر کونده
پترسبورغدن جواب موافق کلمکه میر علم محمد بک ایله ارمان سابقه ده معتاد اولان تشریفات
ارسال قلندی. سفر هنگامده سابق خانلردن دولت کرای خان جانب دولت علیه دن
مأموراً قوبان طرفلرند بواندیغدن عقد مصالحه عقبنده قریمه کذار ایلد کده طائفه تاتار
صاحب کرای خلع و مشار الیه مسند حکومته اقعاد ایدرک طرف سلطنت سنیه به
عرض محضر تقدیم و صاحب‌کرای خانانی اوان مضایقه ده اختیار اولنوب دولت کرای
کلدکن صکره آکا کیسه نک اطاعت و انقیاد ایتیه چکی بدیهی اولدیغدن رفع ربقه
اطاعت و دولت‌کرایه تجدید بیعت اولدیغی تذکیر ایتملریله برابر روسیه دولته دخی
بومالده تبلیغات رسمیه ایفا ایلدیلر روسیه لولر محاربه سابقه ده قریمه دخول و طائفه تاتار
ایله عقد مصالحه ایلدکاری اوانده صورت سفارتده پترسبورغه کیمش اولان شاهنکرای
آرایش دنیا به فریفته و صیدهای حکومت هوسیه بصر بصیرتی بسته بر میرزای اقبال
پرست اولدیغی روسیه لولرک معلومی اولدیغدن قوردقلری دولاب استیلانک اداره سنی
مشار الیه ک کردن بلاهته تحمیل ایلیکی تصمیم ایلدیلر بناء علیه پاردر صرف ایدرک
وانواع دسایس اجرا ایلیه رک پیدا ایتدکاری طرفدارلری واسطه سیله بیک یوزطقسان
برسنه سنده شاهنکرای مقام خانی به انتخاب ایتدیروب معاونت فعلیه ایچون دخی معینه
مقدار وافی روسیه عسکری ترفیق و دولت‌کرای قوه عسکریه ایله اخانه و فرارده مجبور
ایلدکن صکره مخالفت اظهار ایدن وجوه تاتاری جبراً و کرها شاهنکرایه بیعت
ایتدیردیلر. بوخبر طرف دولت علیه منعکس اولدقده قریم خالق حقنده روسیه لونک
قولاً و فعلاً واقع اولان مداخله لری معاهده منعقدنک تمامیه خلاقی اولدیغدن بوبابده
هردرلو شکایات و دعوا به قیام اواندیهده اصلاً بر ثمره حاصل اوله مدیغدن جانب دولت
علیه دن دخی بوندن مقدم ایکی دفعه قریم خانانغده بولنش اولان سلیم کرای خان انتخاب
و قریمه ارسال قلندی. شاهنکرای ایله سلیم کرای بیننده بالذفات محاربه لری واقع اولوب

لکن شاهنکرای طرفی روسیه عسکرینک اغانه سیله قوتلوبولندیغندن سلیم کرای ایشی باشه
 چقارده میوب بالشرورده استانبوله عودت ایلدی. آرنق بونک اوزرینه قریم امورینه
 دولت علیه نك دخی فعلاً مداخله ایسی بین الوکلا قرار کیر اولوب بوندن طولانی روسیه
 دولتی اعلان حرب ایدراسه متوکلاً علی اد مدافعه سنه قیام اولنسی اختیار اولنغله جانیکی
 حاجی علی پاشا قریم سرعسکری نصب و حوزة حکومتی اولان طربزون و جانیک طرفلرندن
 رقبیک قدر عسکر ترتیب اولوب بمنه تعالی ایلروده ایجابی وجهله حرکت اولنق اوزره
 شمذیک سکزاون بیک قدرینی بالاستصحاب دونمای هایون ایله قریم جانبه مرور ایسی
 ضمانتده ارسال مشور و قیودان دریاعازی حسن پاشادخی هم دونمای هایون ایله سرعسکر
 مشارالهی قریمه کچورمک و همدد بالاتفاق مطالب دولتی یرینه کتورمک ایچون مأمور
 بیورلدی طقسان ایکی سنه سی ربیع الآخر نده دونمای هایون ترتیبات سفریه ایله ملو اوله رق
 بشکطاش پیشکاخنه چیقوب موافق هوایه مترقب اولدینی خالد بحکمته تعالی قرق کون قدر
 لدوس روزکاری اسمدیکندن حرکت ایدمدی. فرانسه لولر سکسان ایکی سفرنده سلطنت
 سینه یی حربه تشویق و ترغیب ایتشلر ایکن بوکره روسیه لولره بر خدمت ایتک و قترینه نك
 نظر خشنودی و عنوایتی قزاقق پواتیقه لری اقتضاسندن اولدیغندن فرانسه ایاجیسی
 درلودلائل و اخذلرله قریم مسئله سنی صاحباً بتورمکه چالشمقده اولدیغندن بونک تأثیریه
 دولت علیه نك قرار سابق توهن ایدوب روسیه جنرالیه بالخا بر دایجاب وقت و حاله موافق
 حرکت اولنسی ضمانتده قیودان و سرعسکر مشارالیه مایه تعلیمات ویرلدی بنابرین دونمای
 هایون سینوب ایمانندن علی پاشا عسکرینی آلب قریم ساحلارینه وصول بولدقده مستولولر
 قرنتنه بهانه سیله مخا برده ماده سنی قرق کون قدر تأخیر ایلدکارندن مشارالیه مایه تعلیمات جدیده
 و قطعیه طایفه محبور اولدیلر بونک اوزرینه عساکر اسلامیه نك مناسب بر محله اخراج
 واکر روسیه لولر محاربه یه جرأت ایدرلر سه مقابله و مدافعه لرینه قیام اولنسی ایچون
 مأموریت قطعیه ویریش ایدمده قریه عسکر چیقارلدینی تقدیرده مستولولرک حربه
 مباشرت ایدمککاری میدانده بوانه رق موسم دریادخی کذارایش اولدیغندن حربه جسارت
 اولنه میوب دونمای هایون ایله مشارالیه مایه مذبذبه مزبورده رمضانده سینوبه عودت ایلدیلر
 فرانسه ایاجیسنک پیدرپی واقع اولان افادات صاحب جوانه سیله سنه مزبورده ایام شتاسنده
 دولت علیه نك درجه درجه حرارتی زائل و مطالعه مشکلات سفریه ایله برصورت تسویه یه
 مائل اولدیغندن عبدالرزاق باهرافندی مرخصانی و فرانسه ایاجیسی توسطیه آینه لی قواق
 تنقیح نامه یی تنظیم و طقسان اوچ محرمنده تعاطی اوانه رق قوه قریبه یه ککش اولان حرب

وقال بر مقدار تأخر ایتدی. بوتقیخنامه قینارجه معاهد سنک بعض موادینی مفسر حکمنده اولوب فقط روسیه لولر شاهنکرایدن وازچکمکدن ایسه اختیار سفر ایلک بزجه دها مرجحدر دیهرک مشارالیهک مؤبداً تصدیق حکومتی خصوصنده اصرار ایلمریله مؤبد لفظی یرینه محلولیت حقیقیه تعیری وضع اولنه رق بو قدرجه تعدیلات ایله اکتفا واوزی قیری دنیلان اراضینک جانب دولت علیه عائد اولدیغی تصریح و مملکت حقنده معهود اولان احکام دخی توضیح قانندی.

بوصورتله شاهنکرای مسقولولرک نصب کردسی اولدیغندن طرف خلافت اسلامیه یه یلک بارد معامله لر کو سترمکله برابر روسیه ایمپراطور یچه سی قترینه دن بررتبه عسکریه رجا وعادتا استحکام ایتکله استدعاسی قرین قبول و نشان و قوالیرلک رتبه سی اعطاسیله واصل مسئول اولوب یاور صورتنده یانه برقاق مسقو ضابطی دخی ترفیق قلندی. مشارالیه انلرک نعیم والقا آتیه عسا کر منتظمه یازمق وقریمده بولنان اوقافی الغا ایلک و آلافرانغه سفردده طعام یمک و علناً شراب ایچمک کبی اهاالینک حوصله لرینه صیغشمیه جق حرکاته مباشرت و طعن ایدنلر حقنده مجازات شدیدیه جرأت ایدوب بو حال ایله درت بش سنه قدر جابرانه حکومت ایلدیه ده مسقولر هم مشارالیه ی بو وادیلر سووق والقا و همده برفساد چیتارمق ایچون بس پرده دن امرای تاتاری تشویق و اغرا ایلکده اولدقلرندن عاقبت طقسان آتی سنه سی اواسطنده شاهنکرایک برادرلرندن بهادر کرای و آرسلان کرای اهاالینک اوکلرینه دوشوب شاهنکرایک اوزرینه هجوم ایلمریله مشارالیه بحرأ یکی قلعه ده بولنان روسیه قوماندانه التجا ایلدی. وجود تاتاردخی بهادر کرای مقام خانیه وارسلان کرای قالغایلق مسندینه اقعاد و عرض محضر و مبعوثلر ارسالیله کیفیتی طرف دولت علیه و روسیه یه اشعار ایلدیلر. روسیه لولرک تاتار سر بستلکندن و انتخاب قاعده سیله خان نصبندن مقصدلری قریمده اختلال و فساد اکسیک اولماق و برصردسی دوشوردیکی آنده غصب و استملاک ایتمک قضیه سی اولوب بو واند ایه انکلر دلولر آمریکا اختلالنک دفعی تدارکیله مشغول و فرانسه لولر ایه انکلر دنک تباعد طبعی سنندن ناشی قترینه نک نظر خشنودی سی قزانمق امانده بولنغله و آوستریا ایمپراطور یچه سی ماری تره زک و غتیه جالس تحت حکومت اولان ایمپراطور جدید غایت ساده دل و دولتنک منافع و مضراتی ادراکدن غافل اولوب ممالک ساحنت سنیه دن بعض یرلرک نیچه دو تنه الحاق قانسی حقنده قترینه نک عرض ایلدیکی مواعید ابله فریبانه یه قاپیله رق عقد اتفاق ایسکله مشارالیه انک آزادینی فرصت میدانه کلش و مارشال پوتمکینی عسا کر کلیه ایله قریم

جوارینه کوندروب تصمیماتی تهیه ایلد کند نمیکرد بودفعه کی اختلالی احداث ایشدی .
 بناءً علیه شاهنکرایک یانه مقدار کافی عسکر ترفیق ایدرک قریمه ارسال وقوۀ جبریه ایل
 تکرار مقام خانی به اقعاد ایتکله نقش بر آب حکمنده اوله رق مشارالیه بوکرده دخی یدی
 سکنز آی قدر مسند حکومتده بواندینگی حالده مارشال مزبور موجود معیتی اولان اردو
 ایل طقسان یدی سنه سی اوائلده قریمه داخل ووسط مملکتده واقع آق صوحر اسنده
 وجود تاتاری جمع ایل روسیه ایمرطور یچه سی قترینه قریم وقوبان مملکتلرینی کشور
 حکومتده ضم و الحاق ایلدیکنی بالاعلان جبراً تبعیت ایتدیردک نتیجهً ثبثاته واصل
 اولدی بر مدت ده اغفال قصدیه شاهنکرایه سنوی سکنز یوز بیك روبله معاش تخصیص
 قانمش ایشه ده اوچ درت سنه مرورنده استیقال اولدیغندن مشارالیه چارناچار ممالک
 عثمانیه رحلت وبالا خرده ردوسده مقتولاً دار مجازاته مواصلت ایشدر قوم تاتار بو نتیجه
 فلاکت اشتالی مشاهده ایله گرفتار اندوه و ملال اولوب چاره وتدبیره اقتدارلری مفقود
 اولدیغندن اون بیك قدر خانه اوزی قیرینه مزبور و برطاقی دخی بحرأ اناطولی ساحلرینه
 عبور ایدوب عجزه وضعغاسی کردنداده ربقۀ اسارت اولدیلر . بوندن صکرده یعنی طقسان
 یدی سنه سی اوآخرنده و خلیل حمید پاشا صدارتنک برنجی سنه سنده اوزی صوبی کنارینه
 جسم روسیه اردولری کملکه برابر در سعادتده بولمان مسقو ایاجیسی قریمک روسیه
 ممالکنه الحاق اولدیغنی مصدق سند ویرلمک اوزرد تکالیف شدیدیه ابتدار ونمیچه
 ایاجیسی دخی نشریک ایدوب حدودده بولمان قوۀ عسکریه یومیه یوز بیك غروش
 صرف قانمقده اولدیغندن بحثله سریعاً باسند مطلوبنک اعطاسی ویاخود جواب رد
 ویرلمسی خصوصنده فوق الغایه استعجال ایلدی . ارکان دولت بالدفعات عقد انجمن
 مشورت ایدوب ایکی میلیون نفوس اسلامیه یی حاوی اولان قوجه بر اقلیمک مسقولینک
 گرفتار ید استیلاسی اولسی دیناً و مالمکاً ساطنت سنیه یی حربیه مجبور ایدجکی بدیهی
 ایشه ده دشمن تدارکات قویه ایله حدودلرده حاضر و دولت علیه ایشه لوازمات حربیه سنی
 هنوز اکال ایلدیکی باهر اولوب باخصوص قریم روسیه لونک ید ضبطنه کیرمش و شمدی
 اختیار اولنه حق سفر مقدمۀ استیلانک وقوعنه ممانعت دائر سنی تجاوز ایدرک تخلیص
 ممالکت مقصدینه مبتنی بولنش اواغله اکال لوازمات حربیه ایچون سکوت ایله برار
 زمان تزانلق صورتی قرار پذیر اولدی لکن روسیه لو سند طلبنده اصرار و فرانسه
 ایاجیسی بلا محاربه اشک بتورلمسی خصوصنده صرف وسع و اقتدار ایتکله نهایت قینارجه
 معاهده سنک اوچنجی ماده سی که قوم تاتارک سر بستلکنی متضمندر انک کائن لم یکن حکمنده

اولدیغنی مشعرسند اعطاسنه قرار ویرلدی . وکویا دولت علیه قریمک روسیهلو حکمنه داخل اولدیغنی صراحة تصدیق ایتیموب یالکز قریم حقنده اولان معاهدهسنی الغا ایش اولدی مع مافیه ارکان دولت سند ویرمیهرك سکوت ایله کچشدیرمک خصوصنه چالیشدقلری حالدده بودرجهسنی طوتدیره میوب وقریمک روسیه ممالکینه الحاقنی صدیقاً سند اعطاسنی دخی کوزده آلدیره میوب ایکسی اورتاسی اولهرق قوم تاتارک وقریمک بیطرفلغنی مقالولهنی اسقاط ایله تنظیم مصاحت اولنمق ترجیح ایدلدی بوماده کویا بر دیلوماتاق اولوب ایلروده سلطنت سنیهنک دعوایه قیام ایدیه یلمسی حقنی محافظه مقصدینه مبتنی ایسهده دولتارک بومثالو دعوالرینی فصل ایدیه جک محکمه الحق توه حریه اولمغله بوکی تکلفاتدن هیچ بروقتده استفاده اولندیغنی کورلما مشدر . حتی ایکی یوزالتی سبه سنده عقد اولنان زشتوی عهدنامه سنک ایکنجی ماده سنده قریم و طمانک روسیه ممالکینه الحاقنی مین اولان سنده اختیار اولنان مطالعات و تکلفات هپ بهوده اولمشدر . بوکی شیر ایکی سبیدن منبعث اولوب برنجیسی حقیقه فائده امید و خلیاسیله یاییلور . ایکنجیسی هم عصر اولان معترضله نوعاً مدافعه ایچون حاضر انور . نته کیم عصر مزده بلغرادی صریستانه ترک ایدنلر بزقلعه یی امارتک امتیازینه ادخال ایتیموب بافرمان مخصوص محافظلغنی صرب بکنه تفویض ایتدک وقلعه ده صرب بایراغیله برابر عثمانلی سنجاغنک رکمز اولنمسنی دخی شرط قوشدق دیرلر ایدی بوبابده جریان ایدن مذاکرات ونشر اولنان اعلاننامه لر واعطا اولنان سند مفصلات توارینجده مسطور اولمغله ومرة بعد اخری اشعار اولندیغنی اوزره مقصد عاجزانهم هر عصرده اداره امور دولتی بیانه منحصر بولمغله سمت تفصیلاته کیدلیوب فقط بوماده حقنده وقوعات سابقه وآتیهدن استنباط اولنان احکامنک برنبده بیانه ابتدار قلندی .

حکم زمان چوق شیرلی جریان اصلیسندن چیقاردیغنی درکار اولدیغندن بیلور بیلمز احوال اسلافه طعن انذار اولمق مسلك عاجزانه محجه مغایر انصاف ایسه ده بوبابده وارد خاطر اولان شیرلرک اتیانی فائده دن خالی اولماقوله بروجه آتی ترقیمنه ابتدار اولندی روسیه لولرک قریم حقنده اولان اقوال و افعال لرینک حاصل ایدیه جکی نتیجه مرتبه بدهنده اولوب او یله برکشور اسلامک استیلاسی ایسه بلا محاربه هضم اولنمق قابل اوله میه جنی آشکار ایدوکنندن یدی سکز سنه صکره واقع اولان محاربه طقسان اوچ سنه سی یعنی شاهنکرایک خانلغه انتخابی زماننده اختیار اولنمش اولسه دولت علیه ایچون اهون اوله یلمسی مأمول ایدی . چونکه سلطنت سنیهنک وقت قزانوب حربه حاضر لنمسی

اقر دیلری اسماعیل قلعہ سی بنا و چرکستان طرفاری تحت انضباطه وضع اولفق و بر مقدار ذخایر ادخاریه ترسانه و طوپخانه جه بعض تنظیمات اجرا قلمق قضیه لرندن عبارت اولوب دشمنه جوانی و یریه بیلجک درجده برتدیر کالی اولدیغندن بونار مهما ممکن اولوقت دخی یاپیله بیلوردی لیکن مسقولولر تأخر سفردن دزت بیوک فائده یه دسترس اولدیلر که برنجیسی نیچه ایمپراطور نیچه سی ماری ترز قترینه نک مزاج و مشوارینه وبالا خره اوستریا دولتی دخی اضرار ایدم جکنه عارفه اولدیغندن قولاً و فعلاً حرکاته معارض اولدیغی حالده هم کندوسی همده بالا خره جالس مسند حکومت اولان اوغلی ایمپراطور ژوزف روسیه و ایله عقد اتفاقه مجبور اولمغه بالضروره قوه اسلامیه ایکی دشمن اوزینه منقسم اولفق لازم کلدی ایکنجیسی طقسان اوچ تاریخنده دها قریم اوجاغی کلیاً سونماش و قوم تاتار طاغلماش ایدو کندن مسقولو ایچون بر چبان اوله بیلوردی. اوینجیسی تاریخ مزبورده روسیه و نک قره دکرده دونمای هایونی تهدید ایدم جک درجده قوه بحریه سی تأسیس ایلامش اولمس یله سفر آئیده واقع اولان مشکلات بحریه یه محل یوغیدی. دردنجیسی روسیه لولر هنوز تفلیس خانی ارکلی خانی تحت حکومته آلامش اولملریه اولجانبدن سلطنت سنییه یی ازعاج و اضرا ره مقتدر دکل ایدیلر بونلردن باشقه پوانتیقه جه و تدارکاتجه اولان منافعلری نی بی حد و قیاسدر.

سفر ایران

عصر عبدالحمید خانیده خفیفجه بر ایران محاربه سی دخی واقع اولمش اولدیغندن آنی دخی اجمالاً بیان ایدم : نادر شاهک قتلندن صکره عجمستانده صفویه ونادریه منسوباندن خلیجه آدم دعوا ی شاهیه قیام ایدم رک یکدیگریله محاربه لر ایتشلر سده هیچ بریسی علم افراز استقلال اوله مدینی حالده طائفه زندیه دن کریم خان شیراز طرفلر نده امثاله نسبتله کسب عظمت و قدرت ایدوب کمال عقل و درایتندن ناشی اسلافی کبی شاهاق دعوا سنه عدم تصدی ایله ایران و کیلی نامنی اشعار و کویا مسند شاهی ایچون مذهب ایرانیانه موافق بریسی اختیار ایدم جکنی ایما و تذکار ایلدی. مع مانیه دولت علیه نک مشغولیت حریه سندن استفاده ایله بغداد طرفلرینی ضبط ایدم بیلورسه ایرانیان بیننده وقع و شانی برقات دها تزیاید ایدم جکی مجزومی اولدیغندن سکسان طقوز سنه سی اوائلنده بر قوه مفروزه ایله برادری صادق خانی بصره محاصرده سنه ارسال و بغداد ملحقاته دخی اطاله دست تجاوز ایستیه و قوه بحال اقدمجه سفارتله مشارایه زند کریم خانه کوندلرش اولان شاعر

مشهور و هبی افندی طرفندن و بغداد و ایسی عمر پاشا جانندن انها و عساکر کلیه ارسالیله اعانه و امداد اولمسی استدعا قلندی بناء علیه دیار بکر و ایسی اسپناچی مصطفی پاشا و اوزون عباد پاشا و کرکوک و ایسی عبدالجلیل زاده سلیمان پاشا و کیکی عبدی پاشا مشار الیه عمر پاشا معیتنه تعیین و ارسال اولندی فقط استیضاح ماده فی متضمن او لحوالی مأمور لرینه یازیلان امر نامه لرده کلان جوابلر یکدیگرینه موافق اولمیوب باخصوص مشار الیه ساین پاشانک تحریر اتنده زند کریم خانک بغداد طرفلرینه هجومی عمر پاشانک زوار ایران حقنده متجاسر اولدینی ظلم و تعدیسندن و بغدادده و ثات ایدن عجملارک مخالفاتلرینی ضبط و بابان پاشالرینی رشوت اخذیله صیق صیق عزل و تبدیل ایلسندن نشأت ایلدیکی اشعار اولندیغنه و عمر پاشا سکر اون سنه دنبرو بغداد و ایلاکنده بولنوب عزلی اوته دنبرو جایگیر ضمیر دولت بولندیغنه مبنی بغداد و ایلیکی بیک طقسان سنه سی اوائلده اسپناچی مصطفی پاشایه و دیار بکر و ایلیکی عمر پاشایه تفویض اولمهرق توجیه فرمانلریله برابر شاید عمر پاشا اطاعت ایتمیوبده بغدادی تسلیم ایلنر ایسه قتل اولمسی متضمن آیروجه برفرمان دخی خفياً مصطفی پاشایه تسلیار قلندی. عمر پاشا امر ساطانی یه اطاعت و بغداددن خروجه منسارعت ایشیکن مصطفی پاشا ماله طمعاً یدنده کی فرمان عالی بی سوء استعمال و بر تقریبه مشار الیهی قتله استعمال ایشکله برابر عجملارک صالحی متضمن اولان اخبار اغفال انکیزلرینه فریفته اولهرق عمر پاشانک ازاله سیله مخاصمات برطرف اولدی ظن ایدوب معیتنه مأمور اولان امرا و عسکری طاغندی. بصره محاصره سی ایسه اون درت ماعه بالغ و امداد ظهوری دخی ممتنع اولمغله صادق خان تکرار هجوم ایدرک بصره بی تسخیر و منسلمی بونان سلیمان اغا ایله اشراف بلده بی اسیر ایدوب اموال و فیره ایله شیرازه ایضال ایلدی. بو خبردر دولته و اصل اولدقده و یریلان فتوای شریفه موجبینجه زند کریم خان اوزرینه اعلان حرب اولنوب آنجق آزر بایجان خانلری جانب دولت علیه یه ابراز محبت و زند کریمدن عرض شکایت ایدکدکارندن آنلره استقامتله تحریر و اضرروم جانندن سوق عسکر اولمق صورتی تأخیر اولنوب بغداد و ایلیکی مقتول عمر پاشا کتبخدالرندن عباد آغایه و کرکوک ایل مار دین و یودوسی حسن آغایه بارتبه وزارت توجیه اولنوب مصطفی پاشا دیار بکرده قلعه بند و متعاقباً قتل و اعدام قلندی.

کردستان طرفلرندده بعض مرتبه محاربات و مدافعات واقع اولمش ایسه ده بصره دنک استخلاصی ممکن اوله میوب عباد پاشا دخی و ثات ایلدیکندن ایالت بغداد مشارالیه حسن پاشایه توجیه بیورلدی. صادق خان بصره بی ضبط ایتدکدنصکرده اون ایکی بیک عسکر ایله

برادر زاده سی علی محمد خانی محافظ براقشیدی . خان مومی الیه منتفک عشیرتی شیخی
 تامری تحت اطاعته آملق اوزرد اون بیک قدر عسکرایله بصره ددن حرکت و تقابل و قوعنده
 عسکر ایراندن اوتوز بش قدر آتلو آنحق تخلیص جان ایدوب ماعداسی و خان مزبور
 ایله ایکی نفر برادرلری مقتول اولمغله بووقعه زند کریم خانه بک زیاده تأثیر ایددرک خسته
 و بیک یوز طقسان اوج سنه سی صفر نده سفر آخرته کمر بسته اولدی . اوتوز سنه دنبرو
 مشار الیه زند کریم خان ممالک ایرانده اولدقجه علم افراز استقبال اولمشیکن وقوع و فتنه
 اقربا و تعلقاتی بیننده آتش اختلاف شرر انشان اولمغله و قاچار قبیله سندن آغا محمد خان
 عراق عجمده متصدی دعوی استبداد اوله رق کوندن کونه نشو و نما بولمغله دوات
 زندیه اون ایکی سنه صکره کلیاً منقرض اولمشدر بوجه محرر زندیه طائفه سی بیننده
 مقالات ظهور ایلك جهتیه ارتق بصره دی محافظه ایددمیه جکاری محسوسلری اولدیغندن
 سالف الذکر بصره مسلمی سلیمان اغایه بصره دی توجیه ایدوب ارسال ایشلرایدی . حالبوکه
 اولجه عجملرک بصره ددن چکلمش اولدقلری خبری بغداده واصل اولدقده حسین پاشا
 طرفندن نعمان افندی نامنده بریسی مسلم اوله رق کوندلرملش و شیخ نامردخی سلیمان اغانک
 خصمی بولنمش اولدیغندن اغای مومی الیه هویرده اقامت و وقوعات سابقه یی و کیفیت صداقت
 و خدمتی استانبوله تحریر ایدوب ظهور جوابه منظر اولدی . مومی الیه ک لیاقت و قابلیت
 نزد دولت علیه ده متعین و او آراق شیخ نامردخی مقتول اولمسیله ایالت بصره و متعاقباً
 ایالت بغداد بارتبه وزارت مشار الیه توجیه بیورلدی . اشبو سلیمان پاشا یگر می سنه دن متجاوز
 بغدادده حکومت و ضبط و ربط مملکته موفق اولمغله بعدازین بیوک سلیمان پاشا نامیله
 کسب شهرت و عظمت ایشدر .

ایرانیلر یکدیگرینه دوشوب غوغا ایتمکده اولدقلرندن و مطلوب دوات اولان بصره
 استخلاصی دخی حصول بولدیغندن طبعیه الیه ایران محاربه سی برطرف اولدی .

روسیه و نمچه یه اعلان سفر

قینارجه معاهد سی سنه دواتی مجروح ایدوب قریم استیلا سی ده داغ بر بالای داغ
 اولمشیکن طرف دشمنده کوریلان نشو و نما و بالعکس هیئت اسلامیه ده مشاهده اولانان
 عدم انتظام و فقدانی اسباب و قاچار ناچار ارکان دواتی صبر و سکوت اجبار ایتمکده
 اولمسیله برابر سلطان عبدالحمید خان حضرتلری واصل سن فتور اولدیغندن و باخصوص
 کمال ورغ و تقوی ایله متصف و سفر سابقده سرحداتده بولانان صبیان و نسوانک گرفتار
 اولدقلری فلاکتارده واقف اولدیغندن وقوع حربی ایسته من و زمانده عباداد یاممال

اوله جقسه جناب حق روحی قبض ایلسون دیودعا یلردی لکن روسیه ایلیچینسک نوبنو واقع اولان تکالیف طاقتفراسی وایمپراطور یچه نیک کمال دبدبه ودارات ایله قریمه کلمسی غیرت وحمیت عامیانه وامیانه ایله متصف اولان صدراعظم یوسف پاشانک واکاپرو اولان ارکان وخدامک صبر و آراملرینی احراق و افنا ایدوب انکلتزه وپروسیا ایلیچیلری دخی کندو دولترلرینک پولتیقه لری ایجابجه سلطنت سنیه یی حربه نشویق ایتکده ایدیلر روسیه ایمپراطور یچه سی کندی حسابجه سفرك برمدت ده تاخیری آرزو سنده اولدیغندن ابراز رفق و ملائمت ایچون ایلیچینسک تعلیمات کوندر مکده اولدینی حالدہ رئیس وکلاسی بولنان بوتمکین قریم و بساریه ولہستانی برلشدیروب حکمدار اولمق ماخلولیا سنده اولدیغندن وقوع حربہ متہالک وایلچی ایسہ انک تحصیل رضاسنہ منہمک اولمسیلہ ظاہراً ابراز ملائمت و حقیقتده استلزام سفری متضمن حرکاتہ نصب نفس مفسدت ایلدیکنہ مبنی طرفین حکمدار لرینک مرضیسی بکل ایکن مقتضای قدر امر سفر مقرر اولدی بناءً علیہ عقدا و لنان مجلس مشورتده صدراعظم کشاد سفری التزام ایدوب شیخ الاسلام مفتی زادہ احمد افندی صورت ممایشات کوستردیکندن ورأی خلافتده بولنان اکابر صدر مشارالہک چہرہ خراش ازاری اولمسندن و ہمناک اولدقلرندن بیک ایکی یوز برسہ سی شوال شریفندہ اعلان حربہ قرار ویرلدی حتی اولجہ آیینہ لی قواق قصرندہ عقدا و لنان مجلس مکالمہ یی ورای باب خفادن سلطان عبدالحمید خان حضر ت لرینہ اسماع و روسیہ ایلیچینسک اظهار ایتکده اولدینی رعوتہ بالذات کسب اطلاع ایله تہیج عروق غضب و غیرت ایتدیرلش و بو کرہ دخی ویریلان فتوای شریفہ موجبہ اعلان حرب اولمق ضروری اولدینی و تاخیری موجب مخافت اوله جنی صدراعظم طرفندن افادہ اولنہ رقی استرایستہ مز قبول و تصدیقہ اجبار ایدلمشدر شہریار مشارالہ حضر ت لری اگر سفر اولمزایسہ تختکده او طورہ مز سین دیورلر و مستوقمیلری بالا التزام سرای برونندہ یاتوب قصداً و تحقیر آبی ادبلکہ جرأت ایدہ یورلر دیو سویلیورلر لکن بن اولہ شی کورمدم دیدکلری منقولدر .

عقد مجلس عمومی اولدینی کونکہ بیک ایکی یوز برسہ سی شوال شریفنک یکر می سکزنجی کونیدر روسیہ ایلیچینسی باب عالی یہ احضار و تنفس او طہ سنہ اقعاد اولنوب مواد منازع فیہادن اولا بغدادہ مقیم مستوقونسلوسی مفسد بر آدم اولمقلہ بلا توقف ممالک محروسہ دن قالدیرنسی ثانیاً تفلیس خانی ارکلی خان حقندہ روسیہ دولتنک دعوی ایلدیکی صحابت مغایر عہد اولوب تفلیسده مستوق عسکرینک بولنسی دخی ایکی سنہ دنبرو چلدیر و کر جستان طرفلرندہ انواع شورش و اختلالہ بادی اولدیغندن روسیہ عسکرینک اولحوالیدن

چکلمسی ثالثاً استانبولدن مرور و عبور ایدن مستوکیلری ممنوعاتدن مال آلدقلى محقق اولمغله بلااستثنا یوقلامسى رابعاً التى آى مقدم یاشدن فرار ایدن بغداد و یوده سی علكساندرينك روسیه دولته التجا ایلدیكى تحقیق قلمش اولدیغندن طرف دولت علیه رد و تسلیم قلمسى خامساً بر موجب عهداوی اهاایسنه ویرلمسى مشروط اولان طوزك اعطاسنده تردد قانامسى سادساً روسیه ممالککنده بولنان دولت علیه تجارت و تبعه سنك حمایه سی ضمانده روسیه مملکتلرنده جانب سلطنت سینه دن مأمور لر اقامه سی قطعاً مطلوب دولت اولدیغی شفاهاً و بالواسطه افاده اولندقدہ ایایچی مومی الیه دولندن استیذان ایتدکجه جواب ویره میه جکنی بیان ایلکله و بودخی وقت کچورمک مقصدینه مبتیدر دینمکله ایایچی مومی الیه بر معتاد یدی قله ده بالتوقیف اعلان سفر اولندی صدر اعظم تدارکات سفریه الیه اشتغال ایتکده اولوب علامت حرکت اولان طوغ اخراجی رسمی اجرا اولندیغی کون نتیجه ایلیچیسى بر قطعه تقریر کوندروب موسقولو الیه اولان اتفاقلى حسیله انلردخی اعلان حرب ایلدکلرینی بیان و پساپورطنك اعطاسنى در میان ایتکله بو کیفیت صدر مشارالیه موجب دهشت و تلاش اولمشسده اظهار تجلددن بشقه چاره قالمدیغندن نتیجه دولتی حقنده جانب سلطنت سینه دن فوق العاده رعایت و مساعدده ابراز اولمشیکن بلاموجب نقض عهد ایلدیكى حقنده قلمه آلمان اعلاننامه نك دول معظمیه ارساله بیان حال قلندی بونك اوزرینه حضور هایونده عقد مجلس اولنوب اردوی هایونك قننى جانبه توجهی مقتضى ایدوکی مذاکره اولمش ایسه ده بر نتیجه استحصال اولنه مامغله ادرنه یه بعدالوصول ایجاب حاله کوره حرکت اولمغه قرار ویرلدى .

وبيك ايکي یوزسنه سی حمادی الاولنده سردار اکرم یوسف پاشا سنجاق شریفی و صوف عسکریه یی مستصحباً در سعادتن قیام و ادرنه صحرانسه ربط طناب خیام ایلدی یوزسنه دنبرو صربستان رعایاسنك دماغنه هواى استقلال صعود ایش اولدیغندن نتیجه سفرلى واقع اولدقجه طرف طرف عقد جمعیت الیه ذروه عصیانہ عروج و قطع طرق و معابر ایدہ کلدکلرندن اردوی هایون سلسلتره طرفلرینه سوق اولندیغی تقدیرجه بلغراد محصور حکمنده قاله جغی مطالعه سنى مبنی روسیه جانبنك جهت بحریه سی قبودان دریاغازی حسن پاشایه و ظرف بریسی اسماعیل سر عسکری صدر سابق شاهین علی پاشایه حواله اولنه رق موکب هایونك دخی ایکیسی اورته سی بولمق اوزره و دین جهته سوق اولمشى قرار لشدیرلدى و اسماعیل سر عسکری معینه و اوزی و خوتین و بندر قلعه لری محافظه لرینه صوف متنوعه دن یوزبیکدن متجاوز عسکر ترتیب و اسراقلندی .

نمجه لولره غلبه

نمجه لولر اول امرده بوسنه يه تعرض ايتمشلر ايسه ده ارسال ايلدكلري قوه مفروزه لر
 منهزم اولمغله بلغرادك محاصره سنه نيت ايتشلر ايدى لکن موکب صدر اعظمينک ودينه
 طوغرى توجهنى استماع ايلدکلر نده قرانته موقعى اولوب نظارت دينلان قصبه يه وکبر وسنده
 واقع مهاده بوغازينه استحکامات انشاسيله مترقب مدافعه وانجام کار اولديلر اردوى هايون
 ودين صحراسنه لى الوصول ايکي يوزايکي سنه سى ذى القعدة سنده ودين سرعسكرى بولنان
 ملك پاشا کتخداسى حسن پاشا که جنازه حسن پاشا دخی ديرلر قلفات طرفنه امرار
 واورادن نظارت اوزرينه ارسال اولمغله محاربات شديد ووقوعيله استحکامات موجوده
 ضبط وعساکر دشمن طرد قلندى صدر اعظم سنجاق شريفى واردوى هايونک آغزلغنى
 ودين صحراسنده براغوب عساکر منتخبه ايله فتح الاسلام صحراسنه وارد اوله رق پيدى
 سرعسكر اردوسنه عسکر ارسال ومهاده بوغازينک تسخيرينه اقدام اولمى اشعار ايدوب
 بالاخره کندوسى دخی مرور وساحل طونه ده واقع اينلک نام براسته حکام مشکل التسخيرى
 فتح ايلدى بوندن صکره زور بازوى مجاهدین ايله ذکر اولنان مهاده بوغازى استحکاماتى
 ضبط وغایت صرب طاغله طوپلر اخراجيله ونمجه ايمپراطورينک قومانده سى تحتند
 اولان بيوک اردوسى تضيق اوله رق عساکر منتظمه دن مرتب اولان ايله جسيم براردو
 رجعت وفراره مجبور اولمغله عساکر اسلاميه نك تعقيب اتندن کالى تلفات وضرره گرفتار
 اولدى بلغراد سرعسكرى دخی طونه نك قارشو سنده واقع پانچوده عسکر امرار ايله
 اورادن افلاق حدودينه قدر ساحلاً يکرمى وعرضاً کذلک يکرمى ساعتک اراضى که
 بنات اووده سى ناميله معروفدر کاملاً ضبط وتسخير وحاوى اولديغى قرا وقصبات يغما
 وتخریب قلندى بو محاربه لرده سکساندن متجاوز طوپ وعسکر واهالیدن اللى بيکدن زياده اسير
 اخذ واعتنام اولمشدر . صدر اعظم غایت مقدم وغيور برزات اولديغندن ضبط وتسخير
 اولنان يرلرک ترکى حوصله حميته صيغشديره مامقوله محافظه لرى اسبابنه تشبث ايتمش ايسه ده
 مال غنائمه مغنم اولان جيوش اسلاميه طاقم طاقم مملکتلى جانبه روبراه فرار اولدقلىرينه
 وروزقاسم مرور ايدوب روسيه طرفى دخی فناشمقده ايدوکنه مبنى بالضروره ايکي يوز
 اوچ سنه سى محرمنده طونه يى بروطرفه کچوب شهر صفرده روسجق مشتاسنه داخل
 اولدى ومهاده ونظارت طرفلر نده براغیلان مستحفظین دخی نمجه لولرک مهاجمانه تاب آور
 مقاومت اوله ميه جقلرينى ادراک ايله مجبور رجعت اولديلر . نمجه لولر ابتدای سفرده

دارالاماره بغداد اولان یاش شهری اوزرینه براردو سوق ایدوب بغداد ویوده سنی اسیر و شهر مذکوری ضبط ایش اولدقلری حالد افلاق ویوده سی بولسان مارویانی بک بذل اموال ایله خلیجه عسکر جمع ایش و اسماعیل سر عسکری طرفندن دخی معینه جیوش و فیرده تعین و ارسال قلنمش اولدیغندن طرف طرف نمچه مالکنه هجوم ایله ممالک دشمنی پامال جند منصور ایلدیکنه و قوبان خانلی نامیله بسارابیا طرفلرینه مأمور قلنسان شهباز کرای دخی عسکر تاتار ایله هیبت بخشای ورود اولدیغنه بناء نمچه لولر یاشی ترکه مجبور و خان مشار ایله جانیکلی علی پاشا زاده مقداد پاشا شهر مزبوره داخل اولملر ایدی .

استیلای اوزی

روسیه فلد مارشالی پوتمکین معینه تعین اولان یوزیکرمی بیک قدر عسکرک سکسان بیکنی بالاستصحاب اوزی قلعه سی محاصره سینه عزیمت ویکرمی بشر بیک کشیالک ایکی قوه مفروزه نك برینی یاش اوزرینه و دیکرینی خوتین تسخیرینه سوق ایلدی . یاش اوزرینه مأمور اولان مسقولولره بر نمچه قوه مفروزه سی دخی منضم اولغله شهباز کرای خان و مقداد پاشا اشبو ایکی دشمنه مقاومت ایدمه جکلرینی درک ایله اسماعیله کلر یله یاش شهری تکرار گرفتار استیلا اولدی . بنابرین اسماعیل اردوسیله خوتین بینه دشمن خیلوت ایش اولدیغندن امداد و اعانه قبولری مسدود اولغله بر آیدن متجاوز مدافعه دن صکره خوتین قلعه سی دخی اعدا اله کیردی . اوزی محافظی محمد پاشا ابتدای سفرده قله برون قلعه سنی ضبط ایش داعیه سیله اوچ بش بیک قدر عسکری اوفق قایقلا ایله قارشویه کچوروب مسقولولر کروه چکلماکه اشبو خدعه حربیه یه فریفته اوله رق تکرار عسکر کتورمک ایچون قایقلا عودت ایلدکده مسقولر کلیتله هجوم ایلدیکندن عسا کراسلامیه دوکوشه دوکوشه واصل رتبه شهادت و بویکفیت اوزیده مجتمع اولان عسکرک قلاتنه وضع قلبه عات اولدیغندن محافظ مشارالیه تبدیل و اسماعیل اردوسندن عسا کرجدیده ارسالیله بازوی اقتدارلری تشدید قلنمشیدی .

قپودان دریا غازی حسن پاشا دونمای هایون ایله اوزی پیشگاهنه واصل اولوب لکن صولر صیغ اولق حسیله بیوک کمیلر قلعه یه تقرب ایدمه مدکلرندن مستصحبی اولدیغی ایجه دونمای سوق ایدوب برقاق کون محاربه اولندی ، مسقولولرک ایجه دونماسی کثرت اوزره اولغله و طرف اسلامدن صیغ محالره وضع اولنان نشانلر بر تقریبله دشمن طرفندن

تحويل اولتهرق سفن عثمانیه نك خط حركتلىرىنى شاشرتمش اولمىرله مىراكب اسلاميه نك اكرىسى صيغله اوطوروب كيمىسى محترق و كيمىسى ايدى اعدايه كرفتار اولدى . بعده روسيه لوك بيوك دونمىسى سيواستبول ليماندىن خروج ايله برولر طوغرى كىمكه ايدوكلىرى استخبار اولنديغىدن قبودان پاشا دونمىسى هايونى قالدوروب اوزرلىرىنه وارمش وبالخاربه ينه مذكور ليمانه فراره اجبار ايلد كدن صكره اوزى پيشكاهنه عودت ايششده استانبولدن طاب ايلدىكى سفن صغيره ايله عساكر جديده مدت مدیده لدوس روزكارى اسامسندن ناشى قره دكز بوغازندن حركت و دونمىسى هايونه التحاقه مسارعت ايدمه دكارندن و موسم شتا دخى تقرب ايتديكىندن بالضروره قبودان پاشا عودته مبادرت وايكى يوز اوچ سنه سنى صفر نده در سعاده مواصلت ايلدى .

مسقولولر اوزى قلعه سنى كمال كرمى ايله تضيق ايتمكه اولدقلى حالد دونمىسى هايونك عودتندن صكره قلوبون وهوجه بك وسائر ساحلاره استحكامات انشاسيله بحراً دخى محاصره ي تشديد ايدوب حكمت خدا بوسنه كى قيش قرق اللى سنه دىبرى كورمليك صورتده شديد اولديغىدن كرك استانبولدن و كرك زوسجقده مشتانشين اولان اردوى هايوندىن ودها اقرب بولنان اسماعيل اردوسندن بووجهله اعانه وامداده چاره بولنه مدى . روسيه لولرك واقع اولان هجوملى تلفات كثر دى مؤدى اولمقده ايدى سهده مارشال پوتمكين هر درلو مشكلات وضايعاه تحمل ايدر ك تسخير قلعه يه نصب نفس اقدام ايدرايدى . اوزى نهري منجمد اولمق و قلعه نك اوجهتى سهل التسخير بولمق حسييله ايكى يوز اوچ سنه سى جمادى الاولنده كه اربعينك يكرمى التجبى كونيدير . لايعد نردبانلر ايله هجوم ايدوب اكرچه جيوش اسلاميه قلعه بدنلرنده مدافعه دايوانه ايله يكرمى بيك مسقولو تپه لى ايسه ده عسكر دشمن بيتر توكنور درجه ده اولمديغىدن بالآخره قلعه يى ضبط ايلدىلر . و پوتمكين اوچ كون نهب و غارته رخصت ويرمكه يكرمى بش بيك قدر عساكر واهالى غريق لجه شهادت اولدى .

ارتحال سلطان عبدالحميد خان اول و جلوس سلطان سليم خان ثالث

اوزى استيلاسى عامه اهل اسلامه موجب اندوه و ملال اولديغى مثلاً سلطان عبدالحميد خان حضرت تلىرىنه دخى زياده تاثير ايتمكه عيش زندگانيلىرى كوندن كونه متغير اوله رق نهايت بيك ايكى يوز اوچ سنه سى رجب شريفك اون ايكنجى كوني واصل رياض جنت.

و برادر زاده لری سلطان سلیم خان ثالث حضرتلری جالس تحت سلطنت اولدیله .
 شهریار مرحوم حضرتلری بیک یوز اوتوز یدی تاریخنده متولد و سکسان یدی
 اواخرنده نائل دیهیم عثمانی اولوب اون بش بحق سنه دن متجاوز پادشاهلق ایتشد .
 ورع و تقوی ایله متصف و عبادالله حقنده شفقت و مرحمتی مسلم برسلطان ولایت شعار
 اولوب قره سلحدار دیمکله مشهور سید محمد پاشا و جزایرلی حسن پاشا و کریمه لری در
 شهوار خانم زوجی نظیف افندی و اندرون رجالدن بعض مؤتمن و معتمدلرینک القاتی
 موجبجه حرکت ایدرلر و صدراعظمیره استقلال تام و یروب معروضاتلرینی رد ایتزلر
 ایدی . انحق صفوت قبلرندن و دسائس کونیه یه عدم وقوفلرندن ناشی تشخیص اغراض
 خصوصنده چندان مهارتلی اولمافله جابجا واقع اولان القات مزورانیه یی صخته حمل
 ایده کملشدر .

سلطان سلیم خان حضرتلری کنج و صاحب عزم برپادشاه اولمافله و اصلاح مصالح
 دولت حقنده اولان موفقیتسزلیکی خاقان سابقک اختیارلغنه حمل ایدنلر کندوسندن
 امیدوار بولنلریله اسباب غلبه نک تحصیلی و امور مهمه نک تنظیمی ایچون هر درلو فداکارلی
 اختیار ایده جکلرینی صادر اولان خط هایونلرنده بیان و توضیح ایدوب تفقد امور
 ضمتنده دائماً تبدیل کززلر ایدی .

پدرلری مرحوم اکثریا صویولجی قیافتنده و عملیری مرحوم دخی بعضاً سوخته
 هیئتنده کشت و گذار بیوردقلری مثللو سلطان سلیم حضرتلری غالباً خبره جی قیافتنی
 اختیار بیوردقلری منقولدر . شهزاده لکلری اوانده طرف هایونلرینه منتسب بولنلری
 مناصب مناسبه ایله تطیب و برنجی لالاری محمود بکی والده کتخدالغی و ایکنجی لالاری
 ولی شمس الدین بکی قوجیلر کتخدالغی ایله تلطف بیوردقلری مثللو خلیل حمید پاشا
 ماده سنده ذیمدخل بولنان ترسانه امینی حاجی سلیم اغایی و اوغلای اولان وزیر کتخداسی
 نظیف افندی یی اعدام ایتدیردیله . قپودان دریا غازی حسن پاشا دخی بوجه دن ایسه ده
 مسبق الخدمه غازی بروزیر اولدیغندن یالکز عزلیله اکتفا و اسماعیل سرعسکر لکیله
 اردوی هایون جانبیه اسرا قلندی . حتی اول عصری ادراک ایدنلردن منقولدر که مشار
 الیهک دائره سی خلقی درت بش بیک کشیدن مرکب اولوب استانبولدن حرکت ایلدیکی
 کون سلطان سلیم حضرتلری کاغد خانه کوشکندن آلاینی تماشا بیورمشلر قصر هایون
 حذاسنه کلدیکنده مشار الیه زمین بوس تمنا اولدقدن صکره عادت عصر اوزره کورک
 کیدیرمک ایچون درون قصره دعوت اولندقدن ده برخدمتمز سبقت ایتدی انشالله

تعالی خدمت ایدر و نائل التفات اولورز دیهرك آتئی سوروب و در حال البسه رسمیه سنی سفری قیافته تحویل ایدوب عسکرینك ایچنه قارشمش و تکرار دعوته تثبت قلندی ایسهده اولوقته قدر قارشوکی طاغده عسکرینك اوکنده کیتمکده ایدوکی مشاهده اولمشدر. روش حاله و بوروایتیه باقینجه انك حقنده دخی سو قصد ملحوظ اولدینی حالده کثرت خدم و حشمی و قدم خدمت و حیثیتی بر درجهیه قدر اغماض عینی موجب اولمشدر.

صدر اعظم یوسف پاشا غایت غیور و مقدم و تهدیدینی ایقاعه قادر بر ذات اولوب حتی شدت شتا مناسبتیه اوزی قلعه سینه امداد و اعانه طریقلری مسدود اولدوقده اوچ بیک نفر منتخب سواری به قیشلق البسه یابدیروب بالذات امداده کیتمک اوزره ایکن استیلا و قوعیله بالضروره تأخر ایتشیدی. موسم بهارک حلولی جهتیله طرف طرف تجمع ایتمکده اولان عساکری یوقلمق ایچون کاه یرکوکی به کچوب و کاه طونه ساحلرینی کشت و کذار ایدوب لوازم حربیه نك تنظیم و تدارکیله مشغول اولدینی حالده بیک ایکی یوز اوچ سنه سی رمضانده خدمت صدارت و سپهسالاری و دین سرعسکری کتخدا حسن پاشایه تفویض و ذکر اولنان سرعسکرلک دخی مشارالیه یوسف پاشایه احاله قلندی. چونکه قپوجیلر کتخداسی اولان ولی شمس الدین بك عصر سابقده کوردیکی مؤاخذلری یوسف پاشادن بیلوب غایت بغیض و بویله بروقت مضایقهده تبدل صدارتدن طرف سلطنت سنییه عارض اوله جق مضراتی ادرا کدن عاجز اولمغله مهر جدید سلطانی بی و ابقای صدارتی متضمن خط پادشاهی بی ایصاله مأموراً اردوی هایونه کلدکده یوسف پاشا هر نه قدر تطیب و تألیفه سعی ایتش ایسهده اغراض ذاتیه سنك تسکینه مقتدر اوله مدیغندن بعدالعوده پاشای مشار الیهك سنه سابقدهده نمچه دن آلنان اسرا قیزلرندن متمتع اولمق کبی احوال ذاتیه سنی و شوندن بوندن استماع ایلدیکی بعض قبایح واقعه و غیر واقعه سنی اعظام و ذات شاهانه بی اغضاب ایدرک عزل و تبدیلی استحصا ایلدی. لکن چوق کچمکسزین سلطان سلیم حضرتلری میر مشارالیهك امور مهمهده استخدماه لیاقتی اولمدیغنی تفتن ایتمکه نظر التفاتدن اسقاط بیوردیلر. واقعا یوسف پاشا سفرک مقتضی اولدینی مهمات و مشکلاتی لایقیه تدقیق و ارباب و قوفک سوزلرینه التفات ایتیهرك علی العجله اعلان حرب ایلسندن ناشی مخطی ایسهده حد ذاتنده مقدم و غیر مفتور و تهدیدینی ایقاعه قادر اولدیغندن اصلح موجود و پروسیالیر ایه عقد اتفاق ایدرک سبب اولدینی حربک ضرر سزجه ختام پذیر اولسی حقنده بذل مجهود ایلکده ایدوکی مشهود ایدی. یرینه انتخاب اولنان آدمک

رجحانی ونه یاپه بیله جکی موازنه اولنقسزین شمس الدین بک کبی بر بدلانک سوزیله مشار الیهک عزلی دولت علیه ایچون ضایعات عظیمه یی مؤدی اولدیغی وقوعات آتیه الیه معلوم اولور .

بوزه بوزغنی

صدر جدید سنه سابقه ده مهاده سر عسکری ایکن موفق اولمش ایسه ده سردارا کرم بولنان یوسف پاشانک علی التوالی عسکر ومهمات تشدیر مسی ومکرراً بالذات موکب سر عسکری یه کلوب تمشیت مهم ایلمسی اعظم اسباب فتح وظفر اولمشیدی امر عظیم صدارت مشار الیه جنازه حسن پاشانک دوش بی اقتدارینه تحمیل اولندقدنه ییاجغنی شاشیروب ارکان دولتک اقوالنه معقول ومناسب دیمکدن غیری چاره سی قالمدی . سلطان سلیم خان حضرتلری ایسه کنج وغیور وقرناسنک لاف وکذافلرینی واصل واساسدن عاری تداییر بی معنالرینی صحیح ظنیه مغرور اولدیغندن اردوی هایونک افلاق طرفنه کچوب مسقو ونمچه لولری تدمیر وتحت محاصره ده بولنان بندر وآق کرمان قلعه لرینی تخلیص ایلمسی ضمننده سردار اکرمی تضییق ایلمکده ایدی . بناءً علیه ایکی یوز درت سنه سی محرمی که ایام حریف ایدی . اردوی هایون ایله روسجقدن حرکت وماچین طرفلرندن طونه نهرینی قایقلرایله مرور وبونده نهرندن دخی عبور اولنوب فوفشان جوارنده بر موقع اتخاذا اولندی ایسه ده ایلروده دهها مناسب بریر بولمق احتمالیله موکب هایونک کافه سوارسی کانکش مصطفی پاشا رفقتیه ایلرویه سوق قلمشیدی . موکب هایوندن تقریباً ایکی ساعتک ایلروده نمچه لونک بر قوؤ مفرزه سنه تصادف اولنوب قاعده حربه اوزرینه کرو چکلکمک مقتضی ایکن حربه مباشرت قلمسیله ویالکز سوارینک طوپ وتضنک قارشوسنده پایدرا اوله مامسی طبیعی اولمسیله یواش یواش کیرولیه رک موقع اردوی هایونه کلدیله وبو آردلق بر روسیه فرقه سی دخی ظهور وهجوم ایلدیکه اشبواکی دشمن فرقه لرینک جمله سی اوتوز بیک قدر مکمل ومرتب عسکردن عبارت ایدوکی مرویدر بش بحق ساعت قدر محاربه اولنوب آنجق بروجه محرر سواریان اسلام درجنک اول زده لشم اولدیغندن پیادکانک جناحینی محافظه یه قادر اوله ماملریله اردوی هایون کرفتار کسر وانهمزام اوله رق افتان وخیزان بوزه نهرندن عبور ایلمک صددنده ایکن پک چوق انسان وحیوان ومهمات وحقی رئیس البکتاب خیری افندی دخی غرقاب عدم اولدیله . بوانهمزام سببیه تحت محاصره ده بولنان بندر وآق کرمان قلعه لری مسقولو طرفندن وباغراد حصن حصینی نمچه لو جانندن کرفتار کند استیلا

اولدی . مسقولولرک بیوک اردوسی اسماعیل اوزرینه هجوم ایدوب سرعسکر بولنان جزایرلی حسن پاشا اولاً خارجده مقابله بعددورای استحکامدن مدافعه ایدرک مسقولولر کلیتلو تلفاته کرفتار ومنهزماً عازم سمت فرار اولدقلری اخبار ساردسی اردوی هایونک رجعتی اوانده وارد اولمغله نوعماً موجب تسلیت اولدی . صدر اعظم جنازه حسن پاشا موکب هایونه مشتا اتخاذ اولنان شمنیه دخوانی متعاقب عزل وجزایرلی حسن پاشا مسند صدارته نصب اولنوب ابتدای صدارتنده مقدماً ویردایله بندر آقکرممان وکیلی قلعه لرینی تسلیم ایدن طیفور پاشا واکثر امرای قتل ایلد کد انصکره شمنیه وصولنک اوچنجی کونی کتخدا سلیمان رشید افندی ایله مکتوبی امین افندی یی دخی بغته اعدام ایلدی . بو بابده روایات عدیده به تصادف اولنوب عقله قریبی صدر سابقک جربره سزاکندن ناشی ایش بونلرک النده بولندیغندن هزیمت سابقه نك سببی کندولرینه عطف اولنه رق تأدیلری طرف پادشاهیدن اراده بیورلمش اولمسی و صدر جدیدک دخی عداوت سابقه سی بولنسی قضیه لریدر . صدر مشارالیه اول امرده استقلال تام ویرلمشیکن چوق کچمکسزین مبیانت افکار ظهوریله اجرا آت ومعروضاتی طرف هایوندن رد وابطال اولمغه باشلادی هر نه حال ایسه اول بهار ایچون تدارکات حربیه ایله مشغول بولندیغی وسکسان یاشنی متجاوز اولدیغی حالده صدارتنک دردنجی آبی اولان ایکوزدورت رجبنک اون دردنجی کونی جمای محرقه دن شمنیده وفات ایلدی . مهیب و خونریز بر وزیر غازی ایدی . رحمة الله علیه سالنیکده اولوققلری مدرک بر پیردن استماع اولنمشدرکه اورنوس زاده لردن فاتحان ناظری اولان احمد بک سفرد مأمور اولمغله کندوسی و عسکری حاضرلنوب سنجاقلر دیکلمش ووقت حرکت حلول ایش اولدیغی حالده میرمشار الیه ایاق سورویوب وقت کچورمکده اولمنسه کیسه برمعنا ویرد مز ایکن ناکاه جزایرلی حسن پاشانک وفاتی شیوعبولدقده درحال حرکت واردوی هایون جانبیه سوق سمند عزیمت ایتش اولمغله سبب تائی صدر مرحومک مهابتی خوفی اولدیغی آکلاشامشدر . اردوی هایون ارکانی دخی کمال دهشت ایچنده بولندقلری حالده مرحوم مشارالیهک و فتیله تحصیل حیات جدید ایلدکلری منقولدر .

مقام صدارته بریسنک انتخابی خصوصی اندرون رجالی وقائم مقام پاشا وشیخ الاسلام افندی بیننده بالدفعات مذاکره اولنوب لکن مطالعة انجام کار ایله هیچ بریسی بو امر عظیمه رأی ویردمدکلرندن نهایت قرعه شرعیه ایله انتخابنه قرار ویرلمکله روسه جققی شریف حسن پاشانک صدارتی موافق قرعه تقدیر دوشدی . مشارالیه سکسان ایکی

سفرنده روسجق اعیانلغندن رتبه و زارته نائل و ختام سفردن صکره اوتوده بروده اقامه مأموریتله ثروت و سامانی زائل اولوب بوسفرده راخو و محافظه سنه مأمورایدلمشیدی. بناء علیه حیثیت ذاتیه و زمانیه دن عاری برذاتک صدارتی نه کندوسنک ونه ده هیچ کمسه نك اصلا خاطرینه ظهور ایتمز ایکن سائق تقدیر بویله بر صورت غیر ملخوظه تصویرایلدی.

وقوع نصرت دزیرکوی

بکرشده بولنان نیمچه اردوسی قوماندانی قوبورغ قرق بیک قدر عسکرله یرکوی قلعه سنی محاصره ایدوب صدر مشارالیه دخی کمال غیرت و اقدام ایله اردوی هایوندن و روسجق حوالیسندن پیدرپی عسکر و مهمات ارسالله تقویه بازوی مجاهدین ایلدیکندن بالاخره عساکر دشمن هزیمت فاحشه یه کرفتار واللی قدر طوپ و خمبره و کلیتلو جبه خانه و مهمات ترک ایدرک رهروسمت فرار اولملریله بومظفریت و متعاقباً نیمچه لو ایله عقد متارکه یه موفقیت صدر مشارالیه باعث ممدوحیت اولمشیکن بروجه آتی ماورویانی بکی قتل ایلمسی مقدمه نکبتی اولدی چونکه میرمشارالیه مدت مدیده ترسانه ترجمانلغنده بولمغله جزایرلی حسن پاشایه منتسب اولوب انک همیتله عصر عبدالحمید خانیده افلاق و یوده سی نصب اولمش ایدی حد ذاتنده جری و جسور و غیور برذات اولمغله سفر ظهورنده خزینه ثروتی آچوب معینه تعیین اولنان عساکر و کندوسنک جمع ایده بیلدیکی بهادرلره ایثار ایدرک شهرت و شانی اولحوالی بی طولدیرلمش و مهاده محاربه سی هنکامده طرف طرف نیمچه ممالکنه هجوم ایله کسب مظفریت و اردوی هایونه کلی خدمت ایتمشدی بوزده بوزغندن صکره افلاقده پایدار اوله میوب برقاج بیک آدمیله زشتوی طرفنه مروره مجبور اولمشیدی یاننده کلیتلو مجوهرات بولنق شایعه سنه مبنی صدراعظم آنلری غصب ایتمک طمعنه دوشوب بیچاره بی دماغنده خیانت اولمق و متهمی فرار بولنق اوزره طرف پادشاهی یه عرض و اعدامنه اراده استحصال ایتمکله اولحوالیده بولنان مأمورین ایله اطرافنی بالا حاطه قتل و اعدامنه ظفر بولدی شو قدر وارکه میرمشارالیه مقدا افندیسی اولان پتراکینک فاملیاسندن ضربخانه صراف بولنان دیگر پتراکیه عداوت و غمز و سعایتله قتل ایتدیرمه درجه سنه قدر مجاسرت ایدوب حتی افلاق بکی اولدینی کون الای ایله باب هایوندن خروجنده صراف مرقومک سرمقطوعنی سیر ایلمش و کندوسی دخی بالاخره منلیله مجازات کورمشدر

استیلای اسماعیل

سکسان ایکی سفرنده اسماعیل موقعنک اهمیتی تحقق ایلدیکنه مبنی بعد المصالحه غایت

متین وجسیم برقلعه بنا و تجهیز و تسلیحنه اعتنا اولنوب اشبو سفردده عسا کر کلیه ایله
تحصین اولنمش و حدود اسلامیهنك الك مهم استنادگاهي بولنمشیدی . کچن سنه روسیه لیلرک
هجومنده اولوقت اسماعیل سرعسکری بولنان جزایرلی حسن پاشانک سیف سطوتیله
منهزماً ارجاع اولنمشلر ایکن بوسنه دهامکمل قوت و کمال شدتله محاصره ایلدیلر .
صدراعظم ایکی یوزدورت سنه سی ذی القعدة سنک دردنجی و تموزک التجی کونی اردوی
هایونله شمنیدن حرکت و روسیه اوزرینه توجیه وجهه عزیمت ایتمشیکن نمنجه لیلرک
یرکویده مبتلا اولدقدری انهزام سبیلله انلرک اوزرینه صولت اولنمق دهاسهولتلی کورندیکنه
مبنی تحویل نیت و روسجقدن یرکوی جانبنه مرووره مبادرت ایلدی . انجق متعاقباً
پروسیالیرلر حدود سابقه اساس اولمق اوزره آوستریا دولتی مصالحهیه اجبار وارضا
وعقد متارکه سئدلرینی امضا ایلدکلری خبری وارد اولغله یرکوی سحراسنده اللی کون
قدر امرار اولنان وقت اوان حربی اضاعه دن بشقه برشی مفید اولمدی . بعده اردوی
هایون روسجغه عودت و موسقولو اوزرینه عزیمته تجدید نیت اولنوب سلسترده قدر
کیدلمش ایسه ده موسم شانک حلولی جهتیله موکب هایونک اکثر عسکری طاغلمش
اولدیغندن حصول مقصده امکان و اقتدار مفقود اولغله بالضروره شمنی مشتاسنه رجعت
اولنوب فقط صدراعظم کمال حیرت و دهشتدنناشی بر مقدار سواری استصحاب واسماعیله
امداد ایلک خلیاسیله دوبریجه طرفلرینه طوغری شتاب ایلدی . موسقولیلر کیلی قلعه سنی
استیلا و طولچی و ایساجقی قصبه لرینی احراق ایلدکدن صکره بش التي آیدنبرو تخت
محاصره ده بولنان اسماعیل قلعه سنی برآ و نهراً تضییق ایدوب صدر مشارالیه هر نه قدر
امداد و اعانهیه دامن درمیان اولدیه ده بر وجهله مقتدر اوله مدیغنه و موسقولولر هر درلو
تلفاتی اختیار و کمال شدتله بالدفعات هجومه ابتدار ایلدکلرینه مبنی بالآخره ایکی یوز بش
سنه سی ربیع الآخرینک اون التجی و کانون اولک اون برنجی کونی حرباً استیلا ایلدیریه
طرفیندن یکر میشر بیک آدمدن زیاده تلفات واقع اولوب حتی روسیه لونک معتبر برجنرالی
و محافظ قلعه آیدوسلی محمد پاشا دخی قنطره سیفدن مرور ایلدی . صدر اعظم بووقعه
اوزرینه کمال خوف و خشیتله سحرالرده طولاشمقده ایکن عزل و قتلنه اراده سینه تعلق
ایلدیکندن ایکی یوز بش سنه سی جمادی الآخره سنک طقوزنجی و شمنی مشتاسنه دخولی
کونی قتل و اعدام اولنوب و دین سرعسکری بولنان صدر اسبق قوجه یوسف پاشا
ثانیاً متکا پیرای صدارت عظمی اولدی .

اسوچ اتفاق

ابتدای سفرده دولت علیه ایله اسوچ دولتی بیننده صالح و حربه برابر اولمق و جانب سلطنت سنیه دن یکر می بیک کیسه اعانه حربیه ویرملک اوزره عقد اتفاق اولمغله دولت مشارالیها دخی حربیه مباشرت ایتشیدی . واقع اولان محاربات بحریه ده اسوچلو مظهر غلبه اولمش ایسه ده محاربات بریه ده اکثریا مغلوب اوله کلدیکنه و دولت علیه اردولری دخی مبتلای انهرام اولدیغنه نظراً اسوچ قرالی منوی ضمیری اولان استرداد ممالکه قدرتیات اوله میه جغنی و روسیه لو افسادیه داخل ممالککنده دخی بعض مخالف فرقه لر ظهور ایلدیکنی مشاهده ایسیله عهد نامه اتفاقک مغایری اوله رق ایکی یوز بش سنه سنده روسیه لو ایله عقد مصالحه ایلدی . دولت علیه مبالغ موعودیه محسوباً بر مقدار اچقه اعضا ایش اولمغله بوکا مقابل بحر بالطقده بولنان روسیه دونماسنک آق دکره کله مامسی منافعه دسترس اولدی .

پروسیا اتفاق

سلطنت سنیه نك اعلان حرب ایلسنی متعاقب پروسیا و فرانسه واسپانیا دولتلری عرض توسط ایدوب آنجق پروسیالورلر اشبو توسطی عقد اتفاق ایله تأیید و تشدید ایدرک پروسیا دولتی طونه نك بو طرفنده اولان ممالک دولت علیه بی ضامن اولمق و روسیه و نمچه دولتلرینی با تهدید قبول صاحبه اجبار و بوصولت ممکن اوله من ایسه ایکسینه دخی اعلان حرب ایتمک و دولت علیه دخی پروسیالودن غیری بر دولت توسطیله عقد صالح اتمیه جکنی تعهد ایتمک شرائطیه تجاوزی و تحفظی اتفاق ایتمکی طلب ایدرلر و فرانسه لونک عرض ایتدیکی توسط مجرد رقیبیلری اولان انکلتدولوی روسیه ایمپراطور یچه سی قترینه نك نظرندن اسقاط ایتمک ایچون روسیه دولته خدمت ایتمک افکارینه مبنیدر دیرلر ایدی . فرانسه لورلر ابراز خلوص و مودتله برابر یالکز عرض توسط ایدوب پروسیالورلر ایچون آنلرک مرامی دولت علیه نك زمام اداره سنی ید اداره لرینه آلوب در دست تقسیم اولان ایستاندن حصه جسیمه اله کچیرمک و روسیه و آوستریا دولتلرینی اخافه و تهدید و دولت علیه اتفاقی بهالوصاتمق ضمانتده در دیوبسط و تمهید و اذهان ارکان دولتی تخدیش و تشویش ایلر ایدی اسپانیالورلر بزم اصلا منفعت ذاتیه و پولتیقه جه استفاده من اولیوب مجرد انسانیتیه خدمت و بوسیله ایله تحصیل شان و شرف ایتمکدن بشقه مطالعه من یوقدر دیرلر ایدی .

تفصیلاتی جودت پاشا تاریخنده مسطور اولدینی اوزره بوبابده بین الوکلا انواع مباحث و سفر ایله اوزون اوزون مجاوبات و مکاتبات جریان ایدوب توسط ایدجک دولتک اولدجقه تهدیدینی ایقاعه قادر اولسی لازمه دن واسپانیالو محارب اولان دولتردن اوزاق محله بولندیغندن انک توسطندن ثمره نافع مأمول اولماغله ذهنلر پروسیا و فرانسه لو اوزرنده قالب بالاخره پروسیا اتفاقی ترجیح و اجرای ایجابی تصحیح قلمقده ایکن سلطان سلیم خان حضرتلرینک جلوسلریله هوادکیشوب دشمنلرک دفع تغلب و تسلطریله قریمک استردادی خیلاری تجددایلدی و شهریار مشارالیه حضرتلری اخذ انتقام اولندجقه صلحه راضی اولدقلرینی خطوط متعددده ایله اعلان بیوردیلر برقچ ماه مرورنده بوزده بوزغنی وقوع بولماغله نظامسز عسکر و فقدان مهمات سیروسفر ایله غلبه ممکن اوله میه جنی و کارایده میم دیر ایکن ضروره اوغرا ندینی جهته جزایرلی حسن پاشا صدارتنده پروسیا اتفاقی تمهید و سنداتی امضا و تعاطی اولندی. انک اوزرینه پروسیالولر نمچه حدودینه بر قوه جسیمه سوق ایدرک حدود قدیمه اساسیله عقد مصالحه اجبار ایلرلیله متارکه اولنوب فقط نمچه لولر من جهة روسیه لویه معاوتی الدن بر امدقلرندن مصالحه مذاکراتنی طقوز آی قدر سور و کلیوب دولت علیه نك اوستریا حدودلرنده بولنان عسکرینی روسیه اوزرینه سوق ایتمه میدان ویرمدیلر.

محاربه ماچین

اول بهار حلولنده روسیه لولر دوبریجهیه کچوب ایصال خساره مباشرت و عساکر مجتمع اولمقسزین اولحوالیده بولنان جنود موحدینه ایقاع پریشانی و دهشت ایلدکلرندن صدر اعظم ایکی یوز بش سته سی شوال شریفنک سکزنجی کونی اردوی هایونی شنیدن قالدیروب دوبریجهیه طوغری عطف زمام و روم ایلی والیسی مصطفی پاشایی سرعسکر نصب ایدرک معیتنه عساکر کلیه ترفیقیه ماچینه اعزام ایلدی. سرعسکر مشار الیه دشمن طونه طرفندن ظهور ایدر ظنیه طویلری اوجهته تعبیه ایتدیرمش اولدینی حالده مسقولولر اولطرفدن بر مقدار عسکر ابراز و قوه موجوده لرلیله ارقه طرفندن یوریش ایتدیلر. کوردعلو و تپه دنلی علی پاشا و جبار زاده سلیمان بک و قره عثمان اوغلی محمد اغا کندولرینه منسوب سواری ایله برقچ دفعه دشمن آلایرینه هجوم و ابراز شجاعت و جلادت ایتدیلر ایسه ده سواری ایله پیاده بی مدافعه قابل اوله مدیغندن بش التی ساعت قدر محاربه دن صکره عساکر اسلامییه بر ساعت قدر برویه چکیلوب بوهنکامده موکب

صدر اعظمی دخی تقرب ایشیدی . محاربه نك غالیت و مغلوبیتی لایقیه تعین ایدم یوب روسیه لولر دخی کلیتو تلفات ویردکلرندن انلر دخی پایدار اوله میه رق طونه دن قارشویه کچدیلر . صدر اعظم حرسویه عودت ویکیدن استکمال اسباب مقاتله یه مباشرت ایدوب چندکون صکره تتمیم مهمات ایله تکرار ماجین صحرا سنه نصب سرادقات اسلام ایلدی .

محاربهٔ بحریه

محاربه نك ایکنجی و اوچنجی سنه لری قپودان دریا کریدلی حسین پاشا دونمای هایونی بالاستصحاب قره دکره چیقوب اوچ درت دفعه مسقو دونماسیله محاربه ایش و طرفیندن اوچر بشرکمی تلف اولمشسده غلبهٔ مطلقه هرا یکی جانبه ده نصیب اولدیغندن ختام سفره قدر قره دکره تحت امنیته انه مامشدر .

استیلای آناپه

مقدما چیچن قبیله سندن شیخ منصور نامنده برذات ظهور وباشنه طوپلادیغی قبائل خلیقه اولخوالیده بولنان روسیه فرقه لری اوزرینه هجوم ایدوب نائل فوز و ظفر اولمغله ولوله شهرتی عالمگیر اولمشدی سفر وقوعنده اقوام چراکسه دن استمداد نامه لر وارد اولسیله جانیکلکی حاجی علی پاشانك اوغلی بطلال حسین پاشا آناپه سرعسکری نصب اولنه رق عساکر و فیره ایله اعزام قانندی چراکسه خلقی خفیف سواری دیمك اولدیغندن اچیقندن عساکر منتظمه دشمنه مقابل اوله میه جقلری مطالعه سنه واردوی سرعسکری بی نقله کافی عرب و حیوان تدارکی مشکل ایدوکنه مبنی بطلال پاشا آناپه ده اقامت و اطرافه فرقه لر سوقیله تعجیز دشمنه مباشرت ایتمکی تصویب ایش و روسیه لولرک برنجی هجوملری بی دفع ایش اولدیغی حالده طرف پادشاهیدن همه حال عساکر اسلامیه بی قبارطای ایچنه صوقسی امر و تأکید و خاصکیانندن جالاد محمود دخی مباشر تعین و ارسال اولمغله بطلال پاشا خوف و دهشته دوشه رک چارناچار ایکی یوزدرت سنه سی ذی الحجه سنده آناپه دن حرکت ویش سنه سی صفر نده نهرقوبانی مرورایله قبارطایه موصلت ایلدی اردوده قرق قدر طوپ ایله یکیکچری و کوکالو و قپو خلقی اوله رق او توزیکه قریب عسکر موجود اولدقدن بشقه برطرفدن قبائل دلاورلری دخی تجمع ایتمکه اولدجه برقوت حاصل اولدیغندن رؤسای چراکسه سرعسکر پاشاینها ایلرویه طوغری تشویق ایتمکه اولدقلری حالده مشارایله اول امرده جوارده بولنان برروسیه فرقه سنی ازاله لازمدردیهرک دلی باشیسی ایله بر مقدار

عسکرافراز و ارسال و امرای چرا که باری هیئت مجتمع مزله کیده دید که تعند و تخییر اظهار ایلدی لدی التقابل دلی باشی منزهماً عودت و دشمن دخی تعقیبه مسارعت ایدرک بونلرک تقریبی اردوده قارغشه لق و قوعنی مستلزم اولدیغی هنگامده سرعسکر بطل پاشا اوچ بش آدمی ایلده روسیه عسکری طرفه فرار و دخات ایلدی بناء علیه عسا کر اسلامیة فوج فوج رجعتہ آغاز و قبائل خالق دخی بونلری تعقیب دشمندن محافظه ایدرک بونان نهرینی کچوب افتان و خیزان آناپیه واصل اولدیلر بطل پاشا کندو عهده سنده بونان طربزون منصبک پدیری کیتخدا لغندن نشأت ایدن ارضروم و ایسی صاری عبدالله پاشایه توجیه اولنمسندن و تبدیل خاصکیسی جلاد محمورک تعجیل قیام و حرکت ایچون مباشر تعیین قلمنسندن خوف و دهشته مستغرق اولوب خصوصیه بعض روایتہ کوره جلاد محمودده بطل پاشانک قتانی متضمن خط هایون اولدیغی دخی جمله تحقیقاتدن ایدی انسانک خوف جان ایلده هر فنانگی اختیار ایسی طبیعی اولسنه نظراً بطل پاشا بر درجه یه قدر معذور اوله بیلور سده معیتده مجتمع اولان قوه موجوده یی مقدمانه و غیورانه استعمال ایدرک دشمن ایلده لایقیله چارپیشمش اولسه یا غالب و یا خود مغلوب اولمقدن بشقه احتمال اولیوب غالب کلور ایسه حقنده اولان سوء تصمیم بدل الطاف و اعتبار اولور و مغلوب اولور ایسه اولوقت نفسی مستقولولره تسلیم ایدرک مجبوراً اسیر اولمش رنگنه قویه بیلور ایکن صرف وسع و قدرت ایتکسزین دشمنه دخالت ایسی کندوسنک مقدوحیتی و اولاد و منسوبیننک مقتول و محزون اولسنی مستلزم اولمشدر. بو خبر موخوش در دولته واصل اولدقده سالف الذکر صاری عبدالله پاشا آناپه سرعسکری اصیب اولوب سیر سریع ایلده یتشمی تأکید و توصیه اولدیغی حالدہ مشار ایلده طربزون طرفارنده بونان بعض خصمسیله اوغراشمغه ابتدار و مأموریت مهمه سنی عقدۀ تأخره دوچار ایتکله مستقولولر ایکنجی دفعه آناپیه هجوم ایدوب حرباً استیلا ایلدیلر و مؤخرأ بو تهمت ایلده عبدالله پاشا دخی قتل اولندی.

متارکه روسیه

دولت علیه قریمک استرداد ی خلیاسیله اعلان حرب ایش اولدیغی حالدہ بو قدر قلاع و ممانک ید دشمنه کچدیکندن امکانسنرانی میدانه چیقدیغنه مبنی ضرر سزجه عقد مصالحه اولته بیلور ایسه موفقیتدن معدود اوله جنی تسلیم کرده انام اولوب فقط سلیم خان ثالث حضرتلری هیچ اولمز ایسه بر محاربه قزانیه رق اولدقجه اکال ناموس ایلده صالح

اولنسی ارزوسنده بولمغله بوبابده سردارا کر مه تأکیدات و تویجات اجرا ایتمکده ایدی. اردوی
 هایون ارکانی ایسه عسکرک انتظام و انضباط سز لغنی مشاهده و پروسیا دولتی فرانسه اختلائک
 کسب اهمیت و جسامت ایتمکده اولدیغندن نه نتیجه حاصل ایده جکنی درپیش نظر ایدرک
 روسیه اوزرینه اعلان حرب ایتوب یا لکز تهدیدات ایله امر صلحی متمنی بولندیغنی
 مطالعه ایله غلبه دن بالکلیه مایوس ایدیلر بناء علیه طرف صدراعظمیدن قلاصده بولنان روسیه
 قوماندانی جنرال مکتوب تحریر واردوی هایونک عسا کر کلیه ایله ماچینه کلدیکندن
 و بو کره وقوع بوله جق محاربه ده غالبیت نه جانبه عائد اوله جنی مجهول بولندیغندن بحثله
 دولت علیه جنکه حاضر اولدیغنی مثللو صلحه دخی مهیا ایدوکی تزییر اولندی کلان جوابده
 طورله نهرندن حدود قطع اولمق و قینارجه معاهده سیله انک متفرع اتندن اولان مقاولات
 کماکان مرعی اولمق و مملکتینه دائر بولنان معاهدات و مساعدات ابقا قلنمق اساسلریله
 عقد متارکویه راضی اولدقلری اشعار قلنمغله کیفیت اردوی هایون ارکانی بیننده لدی التذکر
 احوال حربیه و عسکریه یه نظراً بوضورتک قبولنده مجبورت درکار اولوب محاربه یه دوام
 اولندیغنی تقدیر جه دهایوک فنا قلر ظهوری آشکار اولدیغندن هر حالده عقد مصالحه دولت و ملت
 ایچون خیر لو اوله جغه اتفاق آرا ایله قرار ویرلمکله و بواوانده مذاکرات صلحیه یه مباشرت
 قلنمسی ایچون طرف پادشاهیدن مأذونیت دخی وارد اولمغله مورخ مشهور واصف افندی
 ارسال اولنه رق چرکستان و آنا طولی حدودلری قبل السفر بولندیغنی منوال اوزره قالمق
 وید دشمنده بولنان قلاع و بقاعک طرف دولت علیه یه تسلیمی اساس اولمق اوزره ایکی
 ماده دخی علاوه سیله ایکی یوز بش سنه سی ذی الحجه سنک اوننجی و تموزک اوتوز برنجی
 کونی سکرز آی مدته قلاصده عقد متارکوه اولندی .

مصالحه نمچه

پروسیا و انکلتره و فلمنک دولتری توسطلری ایله زشتوی قصبه سنده عقد اولنان
 مجلس مکالمه یه دولت علیه طرفندن رئیس الکتاب عبدالله بری افندی واستانبول
 پایه لولرندن عصمت بک و مکتوبی دری افندی مرخص اول و ثانی و ثالث تعیین قلنمش
 اولدیغندن نمچه دولتری مرخصلری و دول متوسطه مأمورلریله لدی الاجتماع مباحثات
 کثیره و بالذفات بسط بساط مکالمه دن صکره ایکی یوز بش سنه سی ذی الحجه سنک اون بری
 تاریخله مورخ اولان مصالحه نامه یی تنظیم و تعاطی ایدیلر قلاصده مقیم و پا برکاب سوی
 جحیم اولان روسیه فلد مارشالی پوتمکین ایله بالمخبره یاش قصبه سی موقع مذاکره تعیین اولمغله
 مشار الیه مرخصلرک اردوی هایونه کللرینی متعاقب مرخصیتلری تجدید ایله قصبه مذکوره
 جانبیه بعث و تسیر اولندیلر .

مصالحه روسیه

طور له دن حدود قطعی اوزی ایالتی و اوزی قری دینیلان اراضی جسمیه نی مستقوله
ترك و تسلیمی متضمن اولدیغندن سلطان سلیم خان حضرتلری بغایت منفعل اولغله و هر تقدیر
اساس سندنده مندرج ایسه ده بونک رفع و ازاله سی مطلوب و ملتزمی بولمغله بوبابده اقدام
واصرار اولمسی و ممکن اوله مدیغی تقدیرده مدت متار که نک ختامنده ینه حربه دوام اولمق
اوزره شمیدین تدارکات مقتضیه به مباشرت قلمسنی صدر اعظمه امر و اراده بیور مقده
اولمیریه موکب هایونده بولسان وزرا و رجال دولت و اوجاق اغازی دینیلان ضابطان
عسکری اوطاغ سردار اکرمی به دعوت و افاده کیفیت اولندقدده مطالعات سابقه لری
تکرار و عسکره نظام ویرلدکجه و مهمات سفریه استحضار و استکمال اولندقدجه مستقوله
مقابله ناقابل و حربه دوام اولندقدجه ضایعات ملکیه و اتلاف نفوسدن غیر برشی حاصل اولیه جنی
ظاهر اولدیغنه مبنی طرف پادشاهیدن وقوعی ملحوظ اولان مؤاخذه به راضی اولور و دولت
وملته خیرلو اولان صورتی بیاندن اجتناب ایلز دهرک فدا کارلق اظهار ایلدیلر و تفصیلات
لازمه درجیه ترقیم اولنان عرض محضری بالاتفاق تمهیر و تقدیم ایتدیلر .

بونک اوزرینه استانبوله عقد اولنان مجالس متعدده آن بآن توسع ایتکده اولان
فرانسه سیل اختلالنک اوکنه سد چکمک قصدیه آوروپاده براتفاق دولی آرزوسی
مشدد اولدیغنه بناءً پروسیالور روسیه اوزرینه اعلان حرب ایتدکلرندن ماعدا مقدا
کندولرینه حصر ایتدیردکلری توسطدن فراغت صدندده بولندقلرندن واردوی هایونک
حالی دخی سالف الذکر عرض محضردن مستبان اولدیغندن چارناچار عقد مصالحه به قرار
ویریلوب طرف پادشاهیدن دخی قرین قبول اولغله موکب هایون شمنی مشتاسنه عودت
و یاش قصبه سنده بولنان مرخصلر مذاکراته مداومت ایدرک ایکی یوز آلتی سنه سی
جمادی الاولیسنک اون بشی تاریخیله مورخ واون اوچ ماده نی حاوی اولان و یاش عهدنامه سی
نامیه معروف بولنان صلیحنامه تنظیم و تعاطی اولندی . غرأبدندرکه قینارجه مصالحه سنده
سلطنت سنیه بالضروره تاتارک سربستلکنی تصدیقه مجبور اولغله بوکا مقابل مقدا وعد
اولنان تضمین سفری به محل قالماشیکن رئیس الکتاب و مرخص ثانی بولنان ابراهیم
افندیکن بوش بوغازلغی دولت علیه بی تضمین تقدی بلاسنه مبتلا ایتشیدی . بوکره آنک
خلافه اوله رق استانبوله ارکان دولت تضمین سفری اعطاسنه رضا داده اولدیغی و مرخصلره
مأذونیت ویرلدیکی حالدده روسیه مرخصی شرائط صلیحیه بی قبول و طلب تضمیندن عدول
ایتشدر . سکسان ایکی سفرنده اولان پریشانغنه نسبتله بو محاربه نک وقوعاتی اهو نجه در . زیرا

سفر مزبور در دولت علیهنک امرا و عسکری متروکیت حالند بولنوب بود دفعه ایسه سفر سابق سبیلله اولدقجه تجدید ممارسه ایتمیشلر ایدی . اگر نمچه لو اعلان حرب ایلامش و بوجهتله سلطنت سینهنک قوتی ایکی یه منقسم اولامش اولسه بلسکه بعض مرتبه موفقیت امید اولنور ایدی . نه چاره که شیوه قضا حکمنی اجرا ایدوب قریمی تخلیص ایدلم دیر ایکن اوزی ایالتی الدن چیقدی .

بعد المصالحه صدر اعظم یوسف پاشا ردوی هایون ایله شمنیدن حرکت و ایکی یوزالتی سنه سی شعباننده در سعادت موصلت ایدوب رمضانک اون ایکنجی کونی طربزون و الیلکی و آناپه سر عسکر لکیله مسند صدارتدن منفصل و عصر محمودخان اولده نائل وزارت اولوب سکسان ایکی سفرنده علی التوالی بش التی سنه قائممقاملقد بولنش و متفذان عصرک تحصیل رضالرینه موفق اولمش اولان ملک محمد پاشا مقام صدارته نائل اولدی .

بو اوانده ایسه قوه بریه و بحریه نیک تنظیمی ایچون باراده سنیه ارکان دولت لایحه لر تقدیم ایتکده و امور محتله دولتک یولنه قونسی خصوصنه جالیشمقده اولدینی حالد صدر مشارالیه برکار ادره یی متفذان عصره تسلیم ایلدیکندن بین الظرفا بال بیجاغی نامیله مشهر اولمشدر بعض محرملری رخاوت اداره سندن بحث ایلدکده (بن نائل صدارت اولدقدن بش اون کون صکره سلطان سلیم خان حضرت تریله ایلک ملاقاتده یوقلمه نیتیه طوغریسی رجال دولتکیزی پک غیور و صادق ذاتلر بولدم دیدم ایرتسی کونی متفذان عصر طرفندن عظیم تشکر و هدیه لر تقدیم اولندی اکلادمکه هر نه سویلر ایا سیم در حال آنلره واصل اوله جق وانلره استشاره بیور یله جق بناء علیه او یوشمق یوانی طو تدم و صفای خاطرله امرار اوقات ایلدم) دیو جواب و یردیکی مرویدر لکن بو بر عذر واهی ظن اولنور زیرا ابتدای نشاتندن بروحالی بو مرکزده در اسایش نفسی هر شیئه ترجیح ایدن ذوات بویله اعذار متوهمه تصنیع ایدرلر .

فتح و هرات

فی الاصل جزایر ملحق اتندن اولدینی حالد عصر محمودخان اولده اسپانیه انه کچن و هرات قلعه سی مؤخرأ جزایر لو ایله اسپانیه بیننده عقد اوانان مصالحه ده خارج از مکالمه طوتلش اولسنه مبنی بو اوانده جزایر غزاتی برأ و بحرأ هجوم ایله ضبط و تسخیر ایش اولدقلری خبر مسرت اثری در دولته واصل اولدی .

کوچک حسین پاشا ملک قپودانلغی

سلطان سلیم خان حضرت تری نیک اوان صیاوتندنیرو بنده خاص الخاصلری اولان

کوچک حسین اغا جلوس هایونده باش چوقدار نصب اولمش و بعد المصالحه بارتبه وزارت
قبودانلق واسما سلطان شوهر اکیله قدری دوبالاقانمشیدی سفر هنگامنده روسیه لو طرفندن
کوندریلان مأمورلرک تشویق و اقداریله موره جزیره سنده واقع صولوجه و مانیه اشقیاسی
علم افراز شقاوت اولوب تدارک ایلدکری اون بش بکرمی قدر سفینه نک قوماندن سنی قره قچاق
ولامبو نامنده ایکی شقیه تسلیم ایدرک سواحل و تجار کیلرینه خسارت ایده کلدکاری حالده
مصالحه و قوعیله قبودان جدید بونلرک ازاله و استیصالرینه مأمور بیورلدیغندن دونمای
هایون ایله شرعکشیای عزیمت و چاملیچه اوکلرنده ملاقات ایدوب بالمحاربه کیلرینک کیمنی
ضبط و کیمنی احراق و قره یه دو کیلان اشقیایی قتل و تدمیر ایلدکن صکره مرکز اتخاذ
ایلدکری موقعلرده اولان استحکاملرینی دخی تخریب ایلدی بو خبر اشبو ایکی یوزالتی سنه سی
ذی القعدہ سنده واصل اولوب سلطان سلیم خان حضر تلری تربیت کرده سی اولان قبودان
مشار الیهک بو وجهله موفقیتندن فوق العاده مسرور اولدی صدراعظم ملک محمد پاشا ایکی بحق
سنه قدر مسند آرای وکالت اولوب رضای هایونه توفیق حرکت و متنفذان عصرک
مزاجنه کوره حکومت ایتیش ایهده بواوانده شهریار انام حضر تلری نظام جدید عسکرینک
تنظیمنه و ترسانه نک اصلاح احوالنه و ایراد جدید تدارکنه همت و اقدام ایتیکده اولمسیله
و مقدم و مقتدر بر ذاتک مقام صدارتده بولنسی لزومی متین اولغله ایکی یوز طقوز سنه سی
ربیع الاولنک یکرمی التنجی کونی مشارالیه معزول و ایکی سنه دنبرو مصر و الیاکنده
حسن سلوکی مشهود اولان عزت محمد پاشا مقام صدارته موصول اولدی .

پاسبان اوغلی وقعه سی

ان شاء تعالی بوبابک تکمله سنده ایراد اولنه جنی وجهله انا طولی و باخصوص روم ایلی
مالکی اعیان و دره بکی و طاغلی اشقیاسی کبی متغلبه اللرنده اولوب بونلردن و دین محصلی
اولان پاسبان اوغلی عثمان اگا که فی الاصل و دین یمقلرندن یعنی مستحفظ یکیچر یلرندن
ایکن کسب قدرت و تمیز ایدرک محصلن دیر دست ایتیش و مؤخرآ و دین و الیلکنه دخی
ظفریاب اولوب کوندن کونه دائره حکومتی توسیع و طرنوی و روسجق طرفلرینه قدر پای
انداز لقلری اولمشیدی .

روم ایلیده بولنان ولایه متغلبه مرقومه نک تأدیب و تنکیلرینه چالشمقده ایه لرده پاسبان
اوغلی طاقی جسامت و اهمیت حاصل ایش و رفع و ازاله سی و لاتک حوصله اقتدارندن
خروج ایتیش اولدیغنه مبنی بیک ایکی یوز اون ایکی سنه سی قبودان دریا کوچک حسین پاشا

بالاستقلال و دین سر عسکری نصب و معیتہ عسا کر وافیہ و طوپ و مهمات تعیین و ترتیب
اولنہ رق ارسال قلندی پاسان اوغلنک روسجق و بلغراد جانبلرینہ سوق ایلدیکی ایکی فرقه
اشقیا و الیلرک مدافعہ سیلہ منہزم اولہ رق اردوی سر عسکرینک تقریبی جہتیلہ زیر حکمندہ
بولتان قلاع و بلدان دخی تخلص اولمغلہ و دین قلعه سی تحت محاصرہ یہ الندی برقاچ آی
مقاتلات ایلہ کرکی کی تضیق اولنمشکین فرانسزلرک مصری استیلا سی خبری وارد اولمغلہ
و پاسان اوغلی دخی فیما بعد رضای دولتن خارج حرکتدہ بولنماق شرطیلہ استیان ایتمکله
حسب الوقت قرین عفو پادشاهی اولوب رتبہ وزارتله و دین والیسی نصب اولندی .

فرانسزلرک مصرہ استیلا سی

فرانسه حکومتک جمهوریتہ تحولندن صکرہ در سعادتدہ بولتان مصلحتکنذارک طلب
و تشویقیلہ ایکی یوز طقوز سنہ سی جانب دولت علیہ دن جمهوریت مذکورہ تصدیق اولمغلہ
ورتناق نام ذات ایلچیلکله در سعادتہ واصل اولمش و اول اواندہ جانب سلطنت سنہ دن
آوروپا دولترینہ اقامت ایلچیلری نصب و ارسال قلمقمقہ ایدوکنندن دفتردار کیسه داری
علی افندی دخی پارسہ سفیر تعیین اولنہ رق اعزام ایدلمشیدی . مویمی الیہ ورتنابق دولت
علیہ الیہ فرانسه حکومتی بینندہ تحفظی و تجاوزی عقد اتفاق استدعاسنہ آغاز ایدوب بونک
ظرفینہ فوائدی حقندہ لسان دیپلوماسی اوزرہ انواع دلایل ایراد و قریمک استردادینہ
قدر توسیع منافعی مستلزم اولہ جغنی یاد ایدرک سلطان سلیم خان حضر تلرینک میل
و خواهشی استحصالہ موفق اولمغلہ الحالہ ہذہ آوروپادہ جاری اولان محارباتک ختامندن
اعتباراً آوروپا قطعہ سندہ و قوعبولہ جق محاربه لردہ دولت علیہ و فرانسه حکومتی مشترک
اولمق و یالکز فرانسنک انکلتراہ الیہ محاربه سی حالندہ سلطنت سنہ بیطرف قالمق شرائطیلہ
اون بش مادہ نی متضمن بر اتفاقنامہ لایحہ سی تنظیم و خواص وکلا بینندہ مطالعہ قلندی
فرانسه پولتیقہ سنک تغیرات متوالیہ سنہ و بو اتفاقدن اغبرار الیہ روسیہ و نمچه دولترینک
مخاصمہ یہ قیام ایللری وارد خاطر اولمسنہ نظراً بعض ارکان دولت بونک شمیدیلک
تاخیری رأیندہ بولنمشلر ایسہدہ بوبادہ طرف پادشاهیدن اقدام اولنمقدہ ایدوکنندن
شیخ الاسلام افندی الیہ صدور وسائر لازم کلنلرک جابیلہ بالاطراف تدقیق و مطالعہ کیفیت
اولمغلہ تعلیق اولنہ رق حضور ہایونہ عرض اولندقدہ بوایش صدورک بیلہ جکی شی اولمیوب
بغایت مکتوم طوتمسی دخی الزم اولدیغندن همان امضا و تعاطی اولنمسی باخط ہایون تأکید
بیورنمغلہ ایکی یوز اون سنہ سی ذی القعدہ سنک اون یدنجی کونی تمہیر و مبادلہ اولندی .

آراسی چوق کچمکسزین فرانسه‌لو ایله نمچه‌لو بیننده و ندیک اراضیسی تقسیم اولنوب جزایر سبعة ایله قارشوسنده واقع پروزه ساحلری فرانسلرک حصه‌نه اصاب ایش و بو جهته روم ایلی قطعه‌سی روسیه و آوستریا دولترایله همحدود ایکن برده فرانسه ظهور ایتش اولدیغندن سلطنت سینه‌نک اندیشه‌سی متزاید اولدیغی هنکامده فرانسه ترسانه‌سی اولان طولونده عظیم دونما و قرده‌سکری حاضر لمقده اولدیغی و بوتدارک مصرک تسخیری مقصدینه مبتنی ایدوکی حوادثلری شیوعبولغله دوات علیه مصر قلعه‌سندده استحکامات انشاسی و لوازم مدافعه استحضاری خصوصارینه تشبث ایش ايسه‌ده اورالره وقت قالمدی . شویله‌که بو اوانده ايسه فرانسلرک ازغونانی مرتبه کالده اولدیغندن ایتالیا محاربه‌لرنده تحصیل صیت و شهرت ایتش اولان جنرال بوناپارت تزید وقع و حیثیت ایچون بو امر عظیم وخیم نتیجه‌یه مباشرت و حکومت جمهوریه‌دن استحصال رخصت ایتکه حاضر لدیغی آتیش بیک قدر عسکری یکر می ایش قطعه سفن حربیه ایله اوچیوزدن متجاوز مراکب نقلیه‌یه تحمیل و طولون ترسانه‌سندن خروج ایتدی . اولاً مالطه جزیره‌سینه اوغرایوب جزوی محاصره ایله تسخیر و ردوسک فتح‌دنبری مالطه‌یه منتقل و اوچیوز سنه‌یه قریب حکومت ایدن شوالیه‌لر اداره‌سنی الفا ایدوب بعده بیک ایکیوز اون اوچ سنه‌سی محرمی واسطنده اسکندریه‌یه مواصلت و قرده‌یه عسکر اخراجنه مسارعت ایلدی . اسکندریه‌یه حرباً ضبط ایتدکدنصکره مصر اوزرینه توجه ایدوب والی ولایت بکر پشا و رئیس امرا ابراهیم بک و مراد بک اوتوز بیک قدر عسکر جمع ایله مدافعه‌یه مبادرت ایتشار و کوله‌من سوارسی دینانک برنجی اتلوسی ایدوکی فرانسلره تسلیم ایتدیر مشار ايسه‌ده طوب و تفنک ایله پر آتش اولان عساکر منتظمه دشمنه تاب اور مقاومت اوله مدقلندن هربری برطرفه پریشان اولملریله فرانسلر مصری تسخیر ایلدیلر . انکلتزه دونماسی فرانسلر کیارینی تحریده اولدقاری حالده برطاقم وقوعات جسیمه‌نک ظهوری و بیک چوق قانلر دوکلسی مقرر اولدیغندن اسکندریه‌یه عسکر اخراج ایتمکسزین راست کتوره‌میوب اون کون صکره انجور پیشکاهنده بولدیار و درحال ابقاء نأرة جنک ایله برمقدارینی حرق و غرق و ماعداسنی کمند تسخیره ربط ایلدیلر بونک اوزرینه فرانسه اردوسنک پارس ایله مخبراتی منقطع و امداد و استمداد قیوسی منسد اولغله فرانسلر مصرده محصور حکمنده قالدیلر جنرال بوناپارت افکار اسلامیه‌یه جلب ایتک قصدیه مصره ورودی انکلتزه لونک هند معاملاتنی قطع ایتک و کوله‌من بکارینی تأدیب ایتک ایچون مساعده دوات علیه‌یه مستند ایدوکی اعلان و شعائر اسلامیه‌نک کافی السابق اجراسی

و مملکتک اعمار و احیاسی خصوصاً رینه نصب نفس اهتمام ایده جگنی در میان ایتمکده اولوب بوبابده عکا و الیسی جزار پاشای دخی اغفاله چالیشمش و مخصوص ایاجی اعزامیله عقد اتفاقه دعوت ایتمش ایسه ده جزار پاشا جانب دولت علیه دن مصرک استخلاصنه مأمور اولمغله کلان ایاجی بی حضورینه بیله قبول ایتیه رک اعاده ولوازم حربیه نک اکانه مسارعت ایلدیکندن بوناپارت مصر دن حرکت و جزار پاشا اوزرینه عزیمت ایلدی حیف قلعه سنی و یردایله ویافه قلعه سنی حرباً استیلا و ترک سلاح ایدن بشیک قدر ارئودو عربان عسکرینی قورشونه دیزمک کبی غدارانی اجرا ایدرک عکایه واصل اولوب الی کوندن متجاوز کال شدتله تضییق و بالآخره میدعلی بورجی هدم ایله یوریش ایلدی جزار پاشا دخی مقدا حضرلمش اولدینی ایکی عدد لغمه آتش و یرمکه خلیجه فرانسز برهوا اولوب قلعه یه داخل اولنلر دخی طرف طرف تدمیر و یوزاللی قدری اسیر اولندی حتی جزار پاشا کندی سراینک نردباننده بالذات ایکی فرانسز قتل ایلدیکی مرویدر.

بوناپارت بونک اوزرینه بردها هجوم ایتمش ایسه ده ینه شجیعانه وفدا کارانه مدافعه اولندیغندن مأیوساً عودته قرار و یروب بیوک طوپلری اوتیه برویه کومه رک و کندی اغورنده مجروح اولان خسته لرینی آفیون روحی ایله تسمیم ایدرک مصره عودت ایلدی فرانسه ژورنال لرنده محرر اولدینی اوزره مصره کلان فرانسه عسکر ی آلتش بیکه قریب ایکن بووقعه دن صکره اوتوز بیکه تنزل ایدوب مصر محاربه لرنده تلف و خسته لقدن فوت اولان فرانسز لر اشبو عکا جنکینه نسبتله جزوی اولسنه نظراً بو محاربه ده بوناپارت اون بش بیک عسکر دن متجاوز تلفات و یردیکی و عکا اوزرینه هجوم ایتامش اولسه فرانسز لرک مصره دها زیاده اقامته مقتدر اوله جقلری استدلال اولنور. بوناپارت کبی هر طو تدیغنی قویاران برجهانگیرک عکادن منهزماً فراری جزار پاشایه بیوک بر سرمایه افتخار اولسه سنزادر.

مصرک فتح و استرداد

فرانسز لرک مصره استیلا سی خبری استانبوله واصل اولدقده صدر اعظم بولنسان عزت محمد پاشا معزول و ارضروم و الیسی یوسف ضیا پاشا صدر صدارته موصول اولمغله ایکی یوز اون اوچ سنه سی جمادی الاولنده در سعادت ککش و فرانسه علیه انکلتزه و روسیه دولتلریله عقد اتفاق قلمش اولدیغندن ایکی یوز اون درت سنه سی اوائلنده اون درت قطعه دن عبارت روسیه دو نماسی خلیج در سعادت وارد اولمغله قیودانه هایون

اولان شرمت قبودان رفاقتته بر فیلسفن حربیه ویریلرک مسقو دو نماسیله معاً فرانسه‌لو
النده بولنان جزایر سبعة نك تسخیرینه اعزام اولندی .

قورقه وچوقه اطهری حرباً وجزایر ملحقه استیماً تسخیر وایکی بیك قدر فرانسز
اسیر ایدلیدی مثللو ساحلده بولنان پروزه وپارغه و دیگر ایکی قطعه قلعه نك دخی فتحه
مأمور تپه دللی علی پاشا دلوینه قربنده فرانسز لری مبتلای انهمزام و پریشانی وقلاع
مذکورده بی علاوة قلمرو عثمانی ایلدی . جزائر سبعة نامیله مذکور اشبو اطهرده
بر جمهوریت تشکیل و دو بره وندیک جمهوری کبی اوچ سنه ده بر کره یتش بیك غروش
ویرمك اوزره تابعیت سلطنت سنیه یه رابط اولوب ساحلده بولنان قلاع اربعه طوغریدن
طوغری یه حکومت دولت عالییه الحاق و بوبابده سلطنت سنیه ایله روسیه دولتی بیننده
عقد مقاوله اولندی . بونا پارت منزه ما عکادن عودت ایلد کدنصکره بر مدت مصرده
مهمساز مصالح جمهور اولوب لکن کوندن کونه فرانسه عسکرینه تنزل طاری و فرانسه دن
امداد واستمداد قبولی منسد اولق حسبیه مصرده پایدار اوله میه جنی شهیدن عاری
اولغله استکشاف احوال شایعه سیله اسکندریه یه عزیمت و فرانسه یه آدم کوندرمک زمیننده
انکلتزه آمرانی اغفال و تحصیل رخصت ایله ایکی یوز اون درت سنه سی ربیع الآخرنده
ایکی قطعه کوچک کمی ایله مارسیلیه عودت ایلدی . مصرده بولنان جنرال قله بره یازدیغی
مکتوبده کندیسنک فرانسه یه کیتمنه لزوم کوندیکندن بحثله مقام اداره ده جنرال قله بری
توکیل ایلدیکنی والی ماهه قدر امداد کوندره مزایسه مصری تخلیه ایتک اوزره عقد
مضاحیه مأذون اولدیغی تحریر ایلدی .

اولجه جزایر پاشا مصرک تخلیصی ضمننده سر عسکر نصب اولنش ایسه ده حضورهایونده
عقد اولنان مجلس عمومیده صدر اعظم یوسف ضیا پاشا خفیفجه براردو ایله کندوسنک
عزیمتی خصوصنی درمیان ایدوب هر طرفدن تقدیر و تحسین اولغله ایکی یوز اون درت
سنه سی اوائلنده بر مقدار یکچیری و طویچی و دائره سی خلقیله اسکداردن حرکت و شام
شریفه موصلت ایدوب ولایه و امرا و زعمای و اصحاب تیمارک التحاقیله تقریباً الی بیك قدر
عسکر تجمع ایتسکه مصر اوزرینه تحریک لوای سطوت ایلدی . عریش قلعه سی تسخیر
و فرانسه عسکرندن مستحفظ بولنانلرک بقیه السیوفی اولان یوز الی قدری اسیر اولدیغی
متعاقب جنرال قله بر مصری ترک و تسلیم ایله حیقوب کیتمه راضی اولدیغندن سردار
اکرم وانکلز آمرالی و مومی الیه جنرال طرفندن تعیین اولنان مأمور لر بالاجتماع شرائط
تخلیه بی قرارلشدیروب بیك ایکی یوز اون بش سنه سی شعباننک یکرمی سکرنجی کونی

عقد مقاوله اولدی . بناءً علیه فرانسزلر تخایه مواقعه مباشرت ایلرله مصر والیسی نصب اولنان نصوص پاشا و وزیر کتخداسی موردهلی عثمان افندی وجهه جی باشی و شیخ البلد ابراهیم بک درت بش بیک قدر عسکر ایله مصره سوق اولنوب انجق قلعه نك تسلیم اولنه جنی کونك کیجه سنده یعنی سنه مزبورده شوالنك اون سکرنجی کوننده عکس قضیه ظهور ایلدی . شویله که انکلتزده دن آمیراله وارد اولان امرنامه ده فرانسزلرک سلاح ایله تسلیم ایلری اشعار قلندیغنه مبنی امیرال هزار شرم و حجاب ایله تبلیغ مأموریت ایلدکده فرانسزلر پر آتش اولوب در آن ساعت یکریمی بیک قدر عسکر ایله جنرال قله بر اردوی هایون اوزوینه هجوم ایلدی . عساکر اسلامییه متفرق و بیوک طویلر کیروده براغلمش اولدیغندن وقوعبولان محاربه ده موکب صدر اعظمی کرفتار انهرام و پریشانی اولمغله صدر اعظم شامه عودت و فرانسزلر مصره رجعت ایلدیلر . درون شهرده بولنان جیوش عثمانیه ایله زقاق آره لرنده جنکه آهنگ ایدوب برهفته قدر محاربه تمتد اولدیه ده قله دشمن النده اولدیغندن نتیجه مطلوبیه وصول ممکن اوله مامغله عساکر عثمانیه چیقوب کیتمک و اهالی حقنده عفو عمومی اجرا اولنق شرطیه عقد مقاوله اولنهرق نصوص پاشا و عثمان افندی موجود عسکری آلوب اردوی هایون جانبنه عازم اولدیلر . فرانسزلر اگرچه بویله بر غلبه یه نائل اولدیلر لکن کلیتو تلفاته کرفتار اولدقلرندن قوتلری بدرجه دها تنزل ایتدی . حلب اهالیسندن یکریمی یاشلرنده و سلیمان نامنده برفدای جنرال قله بری قتل و اعدام ایتمکله فرانسه ضابطاننک اتخابیله جنرال مینو مقام قوماندانی یه اصعاد قلندی . بیک ایکی یوز اون بش سنه سی او آخری که اول بهار ایدی انکلتزده لولر آلمانیا واسویچره و مالطه طرفلرندن تدارک ایلدکلری اون بیک قدر عسکری انجوره اخراج ایلدکلری مثلوقپودان دریا کوچک حسین پاشا دنخی دونمای هایونده بولنان الی بیک قدر نظام جدید و طویجی وارناؤد عسکریه اولارشیدی و بعده رحمانیه یی حرباً تسخیر و آلان فرانسز اسیرلری انکلتزده لولره تسلیم ایلدکدن صکره مصره طوغری حرکت ایتمکله جنرال مینو الی بیک فرانسز ایله اسکندریه محافظه سنه شتاب ایدوب تحصن ایلدی . بوسنه سوریه ده قحط و غلا و متعاقباً علت وبا ظهور ایتمک جهتیله اردوی هایونده کلیتو تلفات وقوعبولدیغنه مبنی عساکر اسلامییه نقصان طریان ایتمش اولدیغندن صدر اعظم یالکز اون بیک قدر یکچیری و طویجی و یکریمی بیک مقداری باشی بوزوق عسکریه شامدن حرکت و مصره تقرب ایتمکله مصرده قوماندان بولنان جنرال بلپار روم و قبطی طائفه سندن مقدما عسکر یازدیغی درت بش بیک کشی یه بش الی یوز فرانسز ترفیق ایدرک قپودان پاشا فرقه سنی اشغال ایچون

ارسال و کندوسی قله برک یابدیغی کبی اردوی هایونی اوروب طاغتمق اوزره سکز اون بیک قدر عسا کر متخبه ایله موکب صدر اعظمی اوزرینه هجوم ایلدی . لکن جیوش اسلامیه سنه سابقه کبی غافل و متفرق بولندقلرندن بیک ایکی یوز اون اتی سنه سی محرمی اوائلنده وقوعبولان محاربه ده فرانسلر منهزم اوله رق مصره عودت ایلدیلر . قپودان پاشا اوزرینه کیدن فرقه دخی جزوی محاربه دن صکره ترک سلاح ایلریله جمله سی اسیر ایدیلرک انکلتراه لولره تسلیم قلندی . بونک اوزرینه صدر اعظم و قپودان پاشا اردولری براشدیکندن جنرال مومی ایه آرتق تسلیم مملکت ایله چیقوب کیتمکدن بشقه چاره قالمدیغی تیقن ایتمکه یاپیلان مقاوله وجهله بقیه السیوف اولان فرانسلری آلوب رشید ساحلندن کیلره بینه رک فرانسه یه عودت ایلدی و عسکر اسلام مصره داخل اولدی . جنرال مینو بوناپارطه نک کوندردیکی امدادک ورودینه مترقباً اسکندریه قلعه سنک محافظه سنه اهتمام ایلدی ایسه ده ذکر اولنان امداد انکلتراه لولرک کرفتارنجه مدافعه کارانه لری اولدیغندن بالضروره تسلیم مملکت و معیتده بولنان فرانسلری مستصحباً مارسیلیه عزیمت ایلدی . فرانسلرک کرک مصره ده و کرک اسکندریه ده ترک ایلدکلری طوب و تفنک و مهمات و فیره دولت علیه ایله انکلتراه دولتی بیننده تقسیم اولندی . فرانسلرک مصره ده مدت اقامتلی اویچ سنه یه قریب اولوب کلوب کیتملری دخی قرق الی بیک قدر عسکر و بر دونما اتلافندن بشقه برشیئی مفید اولمادی . خطه مصریه نک تخلیص خبری درسعاده واصل اولدقد پک بیوک شنلکلر اجرا اولمشدر . مصر والیلکی قپودان پاشانک کتخداسی اولوب اولجه عهده سنه رتبه وزارت احسان اولنان خسرو پاشایه توجیه و کوله منلرک رفع تسلطلی ضمننده معینه سکز اون بیک قدر روم ایلی عسکری تعیین اولنه رق صدر اعظم برآ استانبوله رجعت و سکز آی صکره انکلیزلر دخی اسکندریه نک تخلیه سنه مباشرت ایلدیلر .

مقدمه وقعه سلیم خانی

بوندن صکره دولت علیه نظام جدید عسکرینک تکثیر و تنظیمه و روم ایلیده رفع لوای طغیان ایدن طاغلو اشقیاسنک تنکیلنه و حجازه تسلط ایتمکه اولان وهابیلرک استیصالرینه تقید و اهتمام ایتمکه اولمسیله برابر فرانسه ایمپراطورلغی تحصیل ایدن بوناپارت انکلیزلر ایله حربیه مداوم ونهجه و پروسیا و روسیه دولتریله کاد مصالحه کاد محاربه ایدرک مقام مظفریت و تعظمده قائم اولمغله انکلتراه و روسیه دولتری وقت وقت اتفاق سابقک تجدیدیغی طلب ایله سلطنت سینه بی تعجیزه ابتدار و بعد المصالحه درسعاده

وارد اولان فرانسه ایلیچیلری ایکنجی دفعه اوله رق سلطان سلیم خان حاضر تله رینی طرفلرینه جالب و اماله یه درلو درلو مواعید و معروضات ایله نصب شبیکه اختیال ایملریله ارکان دوات کمال حزم و احتیاط ایله اداره اشداده چالشمقده ایدیلر .

نظام جدید تکثر ایتدجه یکچیریلرک خصوصت و عداوتی دخی ترقی ایده کلوب ارکان دولتک رأیی ایسه یکچیریلرک کلیاً رفع و ازاله سی مرکزنده اولدینی خالد سلطان سلیمک حلمی و جسارتسزلکی مانع اوله رق ایکی طرفی دخی تلطیف ایله بروقه چقارمق سزین حصول مطایب متعی اولوب حالبوکه کوندن کونه یکچیریلرک شقاوتی آرتقمده و استمالت اولندجه شمارمقده اولدقلرندن بوکیدیشک بر فنا تنجه بی منتج اوله جفی مرتبه وضوحه رسیده اولمسیله صدراعظم یوسف ضیا پاشا تقدیم استعفا ایلدیکنه مبنی اقدجه بوستانجی باشلقدن قبودان دریا اولان حافظ اسماعیل پاشا ایکی یوز یکرمی ایکی سنه سی محرمنده نائل مسند صدارت عظمی اولدی .

روم ایلنک هر قضاسنده بر اعیان اولوب بونلرک اکثریسی کسب عصیت و قوت ایملریله و الیلرک امر ونهی کما ینبی جریان ایدمیبوب یکدیگریله محاربه لری دخی اکسیک دکل ایدی . برده طاغلو اشقیاسی دنیلان فرقه لر واردی که بالقانلرک ایکی جانبلرنده اوچر بشر یوز کشتی اوله رق کشت و کذار و قرا و قصباتی نهب و غارت ایدرلر و طرف دولت علیه دن اوزرلرینه سوق اولنان وزرا و مأمورینی کوزلرینه کسدره بیلورلر ایسه مقابله ایدوب عکس خالد صعب المرور طاعلره و اوزاق محللره چکیلوب صکره ینه سرنمای ظهور اولورلردی . بووجهله روم ایلنک اغتشاشی و باخصوص و دین و بلغراد یماقلرینک یعنی مستحفظ یکچیریلرینک مظالم و تعدیاتی روسیه لونک تشویقاتنه منضم اولمغله صربستان رعایاسی علم افراز بنی و شقاوت اولدقلرینه وودین و الیسی پاسبان اوغلی عثمان پاشا اگرچه مظهر عفو پادشاهی اولمش ایسه ده طرف دولتدن بروجهله آمین اوله مدینی جهته رئیس عصاة اولان قره یورکی ایله مخادنت اوزره بولندیغنه مبنی ماده عصیان مشدد اولدیغندن قونیه و الیسی قاضی عبدالرحمن پاشا سرعسکر نصب اوله رق معینه سواری و پیاده یکرمی درت بیک قدر نظام جدید ترتیب اولنوب ظاهرأ صرب عصاتی اوزرینه و حقیقتده روم ایلی اصلاحنه و بلکه ده روسیه لونک ممالک عثمانیه یه هجومی ملحوظ اولمغله انک مدافعه سنه مأمور ایدیلرک ایکی یوز یکرمی برسنه سی ربیع الاولنده ادرنه یه طوغری اعزام قانندی .

روم ایلی اعیانلری بو عسکرک سوقندن متوحش اوله رق بربرلریله عقد اتفاق و ادرنه ده اجتماع ایدوب مقابله یه و بعد الغلبه استانبوله هجومه حاضر لقمده اولدقلری استخبار اولندقه

اگرچه نظام جدیدك آنلردن پرواسی یوغیسه ده مرکز سلطنت دخی اشقیای مزبورده ایله متفق الافکار اولان یکچیریان ونظام جدید دشمنلری اولان سبکمزان ایله مالامال اولدیغندن ومدیran دولت ایسه عزم قوی و بطش شدید اربابندن بولتمدقلرندن نظام جدید اردوسی استانبوله جلب وعبدالرحمن پاشا منصبه اعاده اولمغله ادرنه جمعیتی دخی برلویرینه طاغدی .

سلطان سلیم خان حضرتلرینك اندرونده امور دواتجه مؤتمنی ومستشاری سرکاتبی احمد افندی وامور ذاتیه سنجه محرم اسراری مابینجی کرد احمد بك اولوب طشرده جه ده کیزلی ستمه دیو مشهور اولان حاجی ابراهیم افندی ایله کتخدا دینیلان ابراهیم نسیم افندی منظور ومعتمد پادشاهی ایدی . والده کتخداسی یوسف اغا سنه سابقه ده اوج اقبالدن ساقط وقبودان دریا کوچك حسین پاشا ایکی یوز اون سکر سنه سنده لحد قبره هابط اولمغله میدان شہسواری مذکورالاسامی اوتاد اربعه یه قالمشیدی . سرکاتب عقلا دن برذات اوله رق حتی مابینجی احمد بك ایچون بو کرد بك ایلرویه کیدیور جمله مزك باشنی بلایه اوغرا ده جق دیدیکی منقولدر .

صدر اعظم حافظ اسماعیل پاشا قلمباً نظام جدیدك خلافتده اولوب باخصوص ابراهیم کتخدانك اقبال واستقلالنه طاقت کتوره مدیکندن وطرف سلطنته اولان افاداتی دخی مشمر اوله مدیغندن علی روایه روم ایلی اعیانلرینی خفیاً تحریک ایش و ابراهیم کتخدای قایق ایله یالینسه کیدر ایکن ویا خود یالینسنده اوردرمق کبی افعال وحشیانه تصمیم ایش اولدیغندن هم افکار عامه بی تسکین وهمده یکچیریلری تلطیف یولنده بیوک بر توجیهاته لزوم کورتمکله ینه اوتاد اربعه مذکور دنك تنسیبلری اوزرینه ایکی یوز یکرمی بر رجبنده صدر مشارالیه اسماعیل پاشا وشیش الاسلام صالح زاده اسعد افندی عزل اولوب مقام صدارته یکچیری اغاسی بولنان وکچی بوینوزی دیمکله مشهور اولان ابراهیم اغا ومسند مشیخته دخی آل فیضدن عطاء الله افندی نصب اولوب اقبال واجلال ایله زبازرد انام ونظام جدید مخالفلری طرفندن مظهر دشنام اولان ابراهیم کتخدا ودفتردار مصطفی رشید افندی که کوسه کتخدا دیو معروفدر بونار دخی عزل اوله رق بر عظیم توجیهات اجرا قلندی . لکن سنه سابقه ده اعلان عصیان ایدوب خوف قهر سلطانی ایله قریمه فرار ایدن طربزون والیسی طیار پاشا ایله ادرنه ده مجتمع اولان اعیانلرک واستانبولده کی یکچیری بغاتنك شهزاده سلطان مصطفی ایله مخبره لری تحقق ایدوب واسطه اولئرک تأدیب وتربیه لری لازمه ذمت حکومت ایکن سلطان سلیمك حلم وشفقتی مانع اولدی .

وقوع سفر روسیه

مؤخراً وارد اولان فرانسه سفیری جنرال سباستیان از سرنو سلطان سلیمك فرانسه یه میلانی استحصال ایدوب جنك و صاحده متفق اولمق درجه سی متحقق اولمغله و بو اوانده روسیه دولتیله فرانسه بینده محاربه تجدد ایلمکله دالماچیاده بولنان فرانسه عسکری طونه ساحلیله لهستانه هجوم ایدوب یلملری احتمالی سد ایچون روسیه لو بغته ایکی اردو سوق ایدرك ایکی یوز یکر می بر سنه سی رمضانده سرحد خاقانیده واقع خونین و بندر قلعه لرینی استیلا ایلدیلر بو خبر در سعادت و اصل اولدقده روسیه اوزرینه اعلان حرب اولنه رق تداركات سفریه یه اشتغال قلندی .

انکلتزه دونماسنك استانبوله ورودی

انکلتزه دولتی فرانسه یه دوست اولنلره دشمن و دشمن اولنلره دوست اولمق مسلکندمه پایدار اولمغله انکلتزه ایاجیسی روسیه یه اعلان حربك تأخیری تکلیف و قلعین مرقومینك استردادینی ضامن اوله جغنی افاده ایله برابر سلطنت سنیه بو صورتلره موافقت ایتمدیکی حالده انکلتزه دولتی دخی دولت علیه اظهار خصومت و استانبوله دونما سوقیله حرب و قتاله مباشرت ایدوب جگنی بیان ایلدی . لکن فرانسه ایاجیسنك افاداتی نزد پادشاهیده بغایت مشمر و مؤثر اولدیغندن انکلتزه ایاجیسنك تکالیفنه حواله سمع اعتبار قیلنمیدی . بناءً علیه انکلتزه ایاجیسی بغته فرار و بوزجه اطهده بولنان انکلتزه دونماسنده قرار ایدوب موافق هوایه انتظاراً بوغاز محافظلرینی مخبرات ایله اغفال ایدرك نهایت سنه مرقومه قربان بیرامی کونی ایکی اوچ انبارلی و بش قپاق و ایکی فرقتین و ایکی قروتدن عبارت اولان انکلیز دونماسی قوتلی برلدوس هوا ایله آتش افشان اوله رق قلعه سلطانیه دن مرور و نغره بروننده لنگر انداز اولان التي قطعه فرقتیندن دردیخی احراق و ایکی عسددینی ده اخذ ایتدکدن صکره قزل اطه لر پیشگاهنه کلوب لنگر انداز اولدیلر . پای تحت عثمانی یه دشمن ورودی غیر مسبوق اولدیغندن بو کیفیت كرك دولته و كرك اهالی یه بك بیوك وحشت و دهشتی مستلزم اولمسایله یدی قله دن سرای بروننه و قاضی کویندن اسکداره قدر استحکامات انشاسنه و دونمای هایونك تجهیز و اخراجنه فوق الغایه اعتنا و سرعت کوسترلیدی . انکلیز آمیرالی بر تقریر ارسالیله روسیه لو ایله عهد سابق اوزره تجدید مصالحه اولتمق و فرانسه ایلیجیسی استانبولدن طرد قیلنمق و دونمای هایون امانه کندولرینه تسلیم اولتمق شرطلرینك قبولی یکر می درت ساعت مهلت ایله تکلیف ایلدیکندن ترسانه ترجانی اولان مشهور ریاضیات خواجہ سی اسحق افندی انکلتزه دونماسنه اعزام اولنوب دونمای هایونك

تسلیمی مسئله سی کلیاً طی والغا و فرانسز ایاجیسنک طردی انکلتزه دونماسنک عودتندن
 صکره برمناسب زمین ایله اجرا اولنمق وانکلتزه دولتک کفالتیه روسیه معاهده سابقه سی
 تجدید قلمق اوزره قرارلشدیر یله رق و اوچ کون دها مهلت آلنه رق افندی مومی ایله
 عودت ایلدی. لکن فرانسه ایلچسی سبستیانی کرک مابین هایونی و کرک باب عالی بی تشجیعده
 دامن در میان اولوب (انکلتزه دونماسنده قره عسکری یوقدرکه استانبولی ضبط ایدیه بیلیمک
 اجتمالی موجب خوف اولسون یایسه یایسه استانبولک بعض محالرینی احراق ایده بیلور .
 حد ذاتنده دخی طرف طرف قضاء یا تمقده در . بوندن دولت علیه بیوک بر ضرر ترتب
 ایتمز انجق اون بر قطعه انکلز کیسنده قورقیلویده اظهار موافقت و مغلوبانه تنظیم مقاوله
 اولنور ایسه پک بیوک نقیصه بی وسلطنت سنیه نک کسر ناموسنی مستلزم اولور) دیوبیان
 حقیقت حاله قیام ایتمکین بو افادات نزد دولت علیه ده قرین تصویب اولمغله انکلتزه امیرانه
 خبر ارسال و آق دکز بوغازندن چیقمقدجه تنظیم مصالحه قابل اوله میه جفی تذکار قلندی
 اسکدار و استانبول ساحلرینه بیکدن متجاوز طوب وضع اولنوب یکر می قطعه سفن حربیه که
 اکثریسی فرقتین و قروت ایدی بشکطاش پیشگاهنه چیقارلمش اولمغله انکلتزه لولر حربیه
 مباشرت ایلدکلری تقدیرده بعض مرتبه ایراث خسارایته لر بیله کندولری دخی زده لئه جکلری
 و لامحاله عودته مجبور اوله جکلری جهتله تشید و تنظیم قلمقده اولان آق دکز بوغازنده
 یکیدن بر آتیه طوتیه جکلری مطالعاتی مانع جرأتلری اولمغله استانبول پیشگاهنه ورودلرینک
 اونجی یعنی ذی الحجه نک یکر می ایکنجی کونی رجعت و اقدجه اخذ ایتدکلری ایکی قطعه
 فرقتینلری لاپسکی اوکنده براغوب بوغازدن خروج ایلدیلر. لکن چیقیشلری کیریشلری
 کبی قولای اولیوب ایکی قطعه فرقتینلری اغراق و قصور کیلری دخی کلیتله رخته دار ایدلمکله
 بر مدت بوزجه اطهده تعمیرات ایله مشغول اولدقندن صکره چکیلوب کیتدیلر ابراهیم
 کتخدا و ابراهیم افندی و سرکابی احمد افندی انکلتزه لو پولتیقه سنه مائل
 و فرانسه لولره التفات ایله انکلزلرک کوجندرلمسنه غیر قائل اولدکلری خالد سلطان سلیمی
 اقناع ایده مدکلری معلوم اولمغله فرانسه سفیری جنرال سبستیانی سبک مغز اولان
 یکیچر اغاسی پهلوان اغایه و سائر اوعیارده بولسانلره انکلز کیلرینک استانبوله
 کلیسی ارکان دولتک دعوتی اوزرینه در یوللو القات مفسده اجرا ایلدیکندن و ذاتاً
 مشار الیه هم حقنده خصومت عمومیه حاصل اولمش اولدیغندن پک چوق آدم بونک موافق
 حقیقت اولدیغنه اعتقاد ایش و درلو روایات تحدث ایشدر که عاصم افندی تاریخنده تفصیلاً
 محرر در . حالبوکه سالف الذکر ذوات اصدقادن و عقلا دن اولوب پادشاهی اخافه ایتک

ایچون پای تخت دولته دشمنی دعوت ایتمک مثللو خطر عظیمی اختیار ایتیه جککری
شویله طورسون پک ساده دل اولنلرک بیله بویله وخیم العاقبه حالاته قولایلقه جسارت
ایدیمیه جککری درکاردر . بناءً علیه بواسناد ، سباستیانینک اکدیکی تخم فسادک ثمره سی
وبرطام سبکغزانک اقوال بی مالی اولدیغنده شبهه اولیوب فقط عاصم افندی کی اصحاب
فضل وکالدن اولان برذاتک بوکا وجود ویرمی جای تعجدر .

خروج اردوی همایون

ایکی یوزیکرمی ایکی سنه سی محرمک یکرمنجی کونی که مارتک اون یدیمی ایدی صدراعظم
وسردار اکرم ابراهیم پاشا قاعده قدیمه دولت اوزرد سنجاغ شریفی استصحاب ومرتب
آلای ایله داود پاشا صحراسنه چیقوب صفرک اوچنجی کونی ادرنه یه طوغری حرکت
وربیع الاولک اون التنجی کونی سلستره یه مواصلت ایلدی واستانبولده مهام امور دولت
قائمقامغه انتخاب اولنان کوسه موسی پاشانک دست خیانت و شیطنته تسلیم قلندی .

وقوع اختلال وجلوس سلطان مصطفی خان رابع

ایکی یوزیکرمی ایکی سنه سی ربیع الاولک یکرمی برنجی کونی سلطان سلیم خان
حضر تلرینک خلعلری ماده فیجیه سی واقع اولمغه بونک اسباب وتفصیلاتی بوجه آتی
بیان اولنور شهریار مشارالیه حضر تلری طریق مولویه سالک وشعر وموسیقی یه مائل
غایت حلیم وسایم شاعر مشرب برپادشاه ظریف ونکته دان ایدی عسا کر منتظمه ترتیب
ایتمک وطوپخانه وترسانه مصالحنه نظام ویرمک وهندسه خانه وباروتخانه ومطبعه واقشه کار
خانه لری مثلومدنیت ومعموریتی مستلزم شیلر ایجادایتمک کی دولت وملته پک بیوک خدمتلی
اجراسنه تشبث ایلش وخیلیجه دخی ایلرولتمش ايسه ده اسباب آتیه ایله محووتلف ووجود
همایونلری سهام آلامه هدف اولدی . اولایکیچریلر ویکیچریلرک علوفه سنی ما کل ایدینان
ایرادجیلر نظام جدیدک دشمن قویلری اولدیغی مثللو مرض جزام کی عروق عوامه
سرایت ایتمش اولان یکیچیری غیرتکشاکیله مفظور اولانلر دخی آنلره منضم اوله رق
دائماً نظام جدیده لعن وطعن ایدرلر وبلکه کفره نسبت ایلرلر ایدی . ثانیاً عسا کر
منتظمه نک لزومنی متفطن اولان علما وصدور ورجال دولت معدود ومحدود اولوب ساده
لوحات ووزرا ومتعصین صدور وارکان وروم ایلی واناطولی اعیانلری عموماً طرف خلافتده
ایدیلر . باخصوص سلطان سلیم خان حضر تلری ذوق وشوق ایله آفته ومتفذان عصر
دخی اکاپیرو اولدقاری جهته بوغازایچنده مهتابارده وسیریرلرنده وقوناق وساحلخانه لردم
اولان طرب وسفاهتی ونظام جدید تمه سنندن اولان بعض الافرانغه شیلری کورنلرک

تعصب و اوکان دولت حقارنده اولان خصوصتاری آن بآن قوت بولمقدد ایدی . رابعاً
 شهریار مشارالیه حضرتلری طریق علمیه رجاله چندان اهمیت و یرمیوب حتی فرانسزلر
 ایله برنجی دفعه عقد اتفاق اولنهجی وقت ارکان دولت بسط محاذیر و صدور علمانک
 جمعیله کیفیت بالاطراف تذکر اولمسنی عرض ایتدکارنده بو ایش صدور دنیلان آدمارک
 بیلهجکی شی دکلدر دیو خط هایون اصدار بیورمغله درحال اتفاقامه تعاطی اولمشیکن
 متعافاً فرانسزلرک مصره استیلا ایلرینه و ایکنجی دفعه ینه فرانسزلره الدانوب و ارکان
 سلطنتک سوزنی دیکله میوب عقد اتفاق ایلمی انکلتزه دو نمانسک استانبوله کمنه و روسیه لونک
 قلاغ خاقانیه استیلا ایسنه سبب اولدیغنه مبنی طریق علمیه رجالنک اکثریسی مغیر
 و امور خارجییه و قوفی اولانلر معترض ایدیلر . خامساً خاقان مغفورک ارباب قدرت
 و سطوتدن برمعین صادقی یوغیدی .

اولوقتک احواله واقف بعض اصحاب و ثوقدن استماع اولمشدرکه برقاچ سنه اول
 برفساد جمعیتی تشکل ایتش ایکن قپودان دریا بولنان کوچک حسین باشانک مهابت
 و اقتداری مانع جسارت اولمشدر . چونکه قپودان مشارالیهک افراط عطایا و احسانی
 سببیه دائرہ سی خلقی و ترسانه چاوشلری و قالیونجی ضابطان و نفراقی اوله رق اوچ بش بیک
 قدر عسکر امر و اراده سنده ایثار تقدینۀ جان ایتمه حاضر و کندوسنک دخی سلطان
 سلیم خان حضرتلری اغورنده هر درلو فدا کارلغی اختیار ایدجکی ظاهر ایدی . مشارالیهک
 حلم و مرحمتی حکم مقامیله متناسب اولدیغندن ابتدای جلوسنده بعض قرناسنک تشویقات
 و تشجیعاتیله اظهار ایلدیکی جرأت و شہامتدن آز وقت ظرفنده فطرت اصلیه سنه رجوع
 ایتمهکله خوف سیاسی قلوب عامه دن زائل اولمشیدی . جودت پاشا تاریخده تفصیل اولندیغی
 وجهله یکیکچریلرک سرکشکلری آرتدجه تربیه و تادیبلری شویله طورسون بالعکس
 تلطیفات متنوعده بولنور و شهزاده سلطان مصطفانک عونہ سی ایقاظفتهده دامن درمیان
 اولدقلری طیارپاشا و ادرنه وقعہ لرندہ مرتبہ ثبوتہ و ارمشیکن مجازاتلرندن و هیچ اولمزایسه
 طرد و دفعہ لرندن بیله اجتناب ایلردی برده شیخ الاسلام اولان عطاءاه افندی ظاهراً
 زهد و تقوی اصحابندن اولمسيله برابر نظام جدید مروجلرندن کورینور
 ایکن قلباً طرف خلافتده اولدیغندن تقویت بخش اشرار ایدی متجربین صدوردن سیروزی
 زاده ماهر افندی مرحومدن استماع اولمشدرکه سلطان سلیم علیهنده بولنان فئہ باغیہ دن
 بعضیلری خزینہ کتخذالغندن مخرج رستم افندی و صالح بک نامنده ایکی نمک مجرامی خفیاً
 شیخ الاسلام مشارالیهک حضورینه کوتوروب شهریار شہیدک مقام خلافتہ منافی بعض
 احواله شہادت ایتدیرمشلر و انک اوزرینه قنوی المشلردر .

اشبهو رستم افندی ایله صالح بك مؤخرأ شامه تغریب اولنوب منفور انام اولدقلری حالدہ اورادہ واصل دارمجازات اولدیلر قائممقام کوسه موسی پاشا مقدما بعض تأدیه اوغرامش اولدیغندن ارکان دولت حقنده آتش عداوتی فروزان اولمشیکن درون شیطنت مشحوننده صاقلیوب تبصص کللی ایله قلوب کبرایی ربوده چوکان اختیال ایتمش اولمسيله لین الجانب برآمددر دینلهرک مقام قائممقامی به اصعادلنمشدی . حافظ اسماعیل پاشا وقتدنبرو حاضرانمقده اولان جمعیت فتنه یی حسن تلقی ودرحال شرزمه بغی وطنیان دائره اتفاقه دخول ایلدی . اسباب مشروحه ایله هیولای فتنه صورت بولمقده ایکن اردوی هایونك خروجندن صکره قره غوللره نظام جدید قونیه جق وقره دکنر بوغازی محافظه سیچون طرزوندن وقره دکنرک سواحل سائرہ سندن ترتیب و جلب اولنان ایکی بیک قدر قلاع یمقلرینه نظام جدید البسه سی کیدیریله جک حوادثلری شیوعبولمغله وباخصوص حرمین شریفه وهابی طائفه سی مستولی اوله رق بوسنه حجاج مسلمینی مدینه منورده قومیموب زیارت روضه مطهره دن محروماً عودت ایلدکلری خبرلری وارد اولمغله غلیان افکار مشتمل اولدی . مع مافیه مصر سفری نظام جدیدک زمان ایجادینه تصادف ایتمشیکن عکایه وقپودان پاشا معیتندہ اسکندریه به سوق اولنمش اولدقلری حالدہ بو دفعه دها مهم اولان روسیه سفرینه کوندرلما ملرینه دائر مطالعه رسمیه به تصادف اولنماسی ایکی ملاحظه به مبنی اولسی طبعیدر : برنجیسی یکیچری طائفه سی وروم ایلی اعیانلری نظام جدیدک دشمن جانلری اولدیغندن بر مقاتله داخلیه وقوعندن احتراز قضیه سی وایکنجیسی یکیچریلرک اردوی هایون ایله عزیمتلری اوررینه نوعمای استانبول اشقیادن تخلیه قلنمش اوله جغندن مرکز سلطنتک نظام جدیدہ تودیع وتسليم قلنمسی مقصدی اولمق کرکدر

وقوع فتنه و تبدل سلطنت

بیک ایکی یوز یکرمی ایکی سنه سی ربیع الاولنک اون یدنجی بازار ایرتسی کونی سالف الذکر قره دکنر بوغازی قلعه لرینک یمقلری عقد جمعیت و بزه نظام جدید البسه سی کوندریش قبول ایتیز دمدمه سیله رفع لوای شقاوت ایدوب قباجقی مصطفی نامندہ بر فتنه انکیزی قوماندان انتخاب ایدرک اغلری اولان خلیل خاصکی یی وطایه لر تعمیرینه مأمور رئیس سابق انکلیر محمود افندی یی پاره لدقلری خبری در سعادته واصل اولدقده استعداد دهر و شهره نظراً بوشرا درنک بر آتش خانمانسوز اوله جغنی سلطان سلیمک اصدقاسی کندوسنه تبلیغ ودر حال ده نظام جدیددن بر مقدار عسکر سوقیله تأدیب و تربیه لرینی تدبیر

ایتملر ایسه ده شهریار مشارالیهک مزاج هایونلری عطف نظر جلادت ایتمهکه مساعد اولمدیغندن و (آمان افندم هم کندیکزه و همده بزه قیارسکنز) دینلجکه قان دو کولمکسزین سهولته ایشک بتورلمسی رأینده مصر اولدقلرندن موجد فتنه اولان قائم مقام پاشا ایله آنکهکله همدست اتفاق بولنان خونیه جمعیت فتنهک حسن تدابیر ایله دفع و رفعی خصوصنی تحمیل ایلدیلر. حالبوکه براختلال عظیم وقوعبوله جغنی دور اندیش اولان اصحاب زکا چوقدنبرو جزم ایتملر ایدی. حتی دده پاشا مرحوم نقل ایدر ایدی که کوسه کتخدا دیمکهکله معروف اولان مصطفی رشید افندی وقعه نی استماع ایدر ایتمز حادثات مشکله ظهورنده عادت مألوفه و مشهوره سی اولدینی اوزره بش اون قیلدن عبارت اولان صقالنی انامل تفکر ایله قاریشدیره رق برمدت کزندکدن صکره کتخداسنی چاغروب عجا بزم دائرده قبالجی بی بیلور آدم وارمیدر دیو سوال و او دخی آشجی باشینک یکنی ایدوکنی اخبار ایلدکده آشجی باشی بی مابین اوطه سنه جلب ایله قبالجی مصطفی اغا اوغلمزده سلام ایدرم عامه نک معلومیدر که بن اتلی یه سوتلی یه قارشمدم هر نه امر اولندی ایسه آنک اجراسنه تقید ایلدیم بو جهتهکله حمایه ایلملرینی رجا ایدرم و شمدی اوغلمه بعض مصارف ایچون پاره لازمدر دیهرک بیکر عدد ییلدیز التونی ایله ملو ایکی طوربه التون اعطا و بریسنی قبالجی خر جلق ایلسون و دیگرینی رفاقتنده بولنان سوز صاحبزیننه توزیع ایتسون دیو ارسال ایسکهکله اشبو التونلر اشقیابه واصل اولدقده کوسه کتخدا بزم بابامزدر بزدن اکا ضرر کمنز مستریح اولسون جوابیله آشجی باشی بی اعاده ایتملر و بوجهتهکله تخلص کریبان حیات ایلمشدر.

صالی کونی شیخ الاسلام افندی و صدور علما جلب اولنه رق باب عالیده مجلس عمومی عقد اولنوب ویریلان قرار موجبنه اجرای نصیحت ایله جمعیت اشقیایی تفریق ایتمک ضمننده صنادید یکیکچریاندن قزغانجی مصطفی بوغازه کوندرلدی و مرقوم اخشام اوزری عودت ایدرک یماقلرک ضابطانی محمود افدینک و خلیل اغانک قتلندن بغایت مکدر و مضطرب اوله رق احاد عسکریه دن ظهور ایدن بو فعل مکروهک دامن عفو و صفح ایله مستور بیورلمسنی و نفرات عسکریه اولحوالیده خیمه نشین اقامت اولان نظام جدیددن متوحش اولدقلرندن عسا کر مرقومه نک قشله لرینه چکلمسنی و جا ایلدکلرینی سویلدی.

کیفیت حضور هایونه عرض اولنه رق نظام جدیدک قشله لرینه چکلمسی چون امر ویرلدی و سلطان سلیم حضرتلریله اصدقای دولت بر درجه اغفال و اشقیای مرقومه نک استدکاری کبی سیر و حرکت ایلملرینه ارئه طریق احتیال قلندی. بو صورتله ایش بیتدی

ظن اولنیورکن چهارشنبه اقامی اشقیاطویخانهیه واصل و قائم مقام پاشا طرفدن بومصلحت
 جمله اتفاقیله اولمشدر صاقین مدافعه قیدنده اولسونلر دیو طوپچیلره خبر کوندرلمش
 اولدیغندن انلر دخی اشقیایه ملحق اولمغله صباحه قدر استانبوله گذار وجمع یکیکچریان
 اولان آت میداننه قزغانلری چیقاروب مقام بغی و طغیانده قرار ایلدیلر . قلعه یمقلری
 بیک قدر کشتیدن عبارت ایکن طوپچیلرک و سائر یکیکچریلرک انضمامیله جمعیت عظیمه
 حاصل اولدی . پنجشنبه کونی علی السحر تکرار باب عالیده عقد مجلس اولنوب ابراهیم
 کتخدا نظام جدید ایله مدافعه اشقیایا خصوصنی ایراد ایدر ایتمز روم ایلی قاضیعسکری ولی
 شمس الدین اطاله لسان دشنامه اغاز و سائر متفقین دخی تصدیق ضمنی ایله اتحاد نهفته یی
 باز ایتمکله شمدییه قدر تحت شبهه ده بولنان اتفاق فته میداننه چیمغله ابراهیم کتخدا
 وحاجی ابراهیم افندی صاوشوب کتدیله و شیخ الاسلام ایله قاضیعسکرلر جمعیت اشقیایه
 اعزام قلندی . نظام جدیدک کلیاً رفع والغاسی و ابراهیم کتخدا وحاجی ابراهیم افندی
 و سرکاتبی احمد افندی و مابینجی احمد بک و کتخدا و کیلی محسن افندی و رئیس و کیلی
 صفی افندی و ضربخانه امینی بکر افندی و بوستانجی باشی شا کر بک و والده کتخداسی
 سابق یوسف اغا و نظام جدیدک ذخایرینه مأمور اولان قپان نائی عبداللطیف افندیکن
 قتل و اعداملری طائفه باغیه نیک مطلوبلری اولوب مساعدده اولندقجه انحلال جمعیت ممکن
 اوله میه جنی قائم مقام پاشا طرفدن حضور هایونه انها و بوبابده مجمع اشقیاده اولان شیخ الاسلام
 افندی جانبندن دخی تأکید و استعجال اولندیغی اشعار قلنمغله ارتق ایش ایشدن کچمش
 اولدیغندن بیچاره سلطان سلیم تخلص نفس ایچون اظهار موافقه مجبور اولدی . بناءً
 علیه نظام جدیدک رفع والغاسی دلاللر واسطه سیله اعلان و طلب اولنان ذواتک دخی
 هر بری بر یرده دردست اولنوب اعدام قلندی . فقط یوسف اغا هنوز حجدن عودت
 ایدرک قونیه طرفلرینه تقرب ایلدیکنه و قپان نائی دخی طریق علمیه دن بولندیغنه مبنی
 ایکسی دخی بروسه یه نفی اولنوب و نائب مومی الیه میرمیرانلق توجیه اولنوب بعده
 اعدام قلندیله .

رؤسای اشقیانک شدتلری زائل و دائره اطاعته رجوعلری متقرب اولمشیکن محرک
 فته اولان اعظم مصاحبت بو درجه یه کلد کدنصکره سلطان سلیمدن امنیت جائز اولماز
 دیو القات خفیه یه مبادرت ایلملریله تبدل سلطنته قرار ویرلدی و ایکی بیک قدر عسکر
 ترفیق اولنهرق شیخ الاسلام ایله صدور علما جمعه کونی صباحلین باب عالییه کوندرلدی .
 قائم مقام موسی پاشا خدنگ مفسدتنک هدف مقصده وصولدن منشرح الفؤاد اولهرق

باب عالی رجائی و علما طاقنی آلوب سرای هایونه بالعزیمه سلطان سلیمه افاده کیفیت اولندقدده بالضروره حرمسرای هایونه عزیمت بیوروب بعده ساعت بشه قریب سلطان مصطفی خان رابع حضرتلری جالس سریر سلطنت اولدی و رسم بیعت اجرا اولندقدن صکره آیاصوفیه جانشریفنه سلاملق رسمی دخی ایفا قلندی .

احوال علمدار مصطفی پاشا

سنه سابقهده روسجق اعیانی ترسنکلی اوغلی برفدایی قورشونیه فوت اولدقدده متعلقاندن هزارغراد اعیانی اولان مصطفی بیراقداریرینه قائم اولوب فقط جانب سلطنت سنییه عرض محضر تقدیمیه استحصال مساعدۀ سنییه مبادرت و مطاوعتکارانه حرکت ایتمکه روسیه سفری ظهورنده رتبه وزارتله سلسره ایالتی مشار الیه توجیه اولمشیدی . اصحاب قدرت و سطوتدن اولدیغندن اسماعیل ویرکوی طرفلرینه وقوعبولان تعرضات دشمنی مدافعه وغالبانه محاربه ایتمکه اولدیغی حالده اردوی هایونک طونه سواحله تقربنده بش التی بیک سواری ایله استقبال ایدرک موجب تقویت جیوش مسلمین ولوای شریف سرعسکر لکیله تعظیم و توقیر اولمشیدی . استانبولده اختلالک ابتدای ظهورنده اردوده یکچیری اغاسی بولان پهلوان اغادن امنیت دولت منسلب بولندیغنه مبنی عزل و تبدیلنه اراده سنییه سنوح ایتمکه موجبنه قول کتخداسی یکچیری اغاسی نصب اولمشیکن طائفۀ یکچیریان زور بازوی تغلب ایله ابقا ایتدیردکلرینی متعاقب جلوس خبری واصل اولغله اغای مومی الیه دخی یکچیریلری تحریک ایله صدر اعظم ابراهیم پاشایی فراره مجبور ایتدی . بوخبر استانبوله وارد اولدقدده بوغاز محافظی چلبی مصطفی پاشا صدر اعظم نصب اولنه رق ربیع الآخرک یکرمی دردنجی کونی مرکز اردوی هایون اولان سلستریه وصولنده بیراقدار مصطفی پاشا صدارتک تبدلندن داکیر و بوجهته صدر جدید ایله میانه لرنده آتش عداوت جایکیر اولغله ارائه روی درشتی ایله روسجق جانبیه عطف زمام ایلدی . مشار الیه تأمین و تلطیف مقصدیه یکچیری اغاسنه الباس فروه وزارت ایلمسیله عتو و طغیانی صدچندان اولدیغندن بعض ارکان دولتک تحریکیله یکچیریلر بوکره مشار الیه علیه قیام و پاره لیوب کنام ایلدیلر . سلطان سلیم رجالدن رامنر افندی و بهیج افندی برر طرفه نقل ایله تبعید اولمش ایسه لرده علمدار پاشا طرفندن جلب اولندقلرینه و وزیر کتخداسی رفیق افندی ایله رئیس غالب افندی دخی سلطان سلیم طرفدارلری ایدوکاری جهته حقلرنده معاملۀ غدیره اجرایی متصور ایدوکنی تفرس ایلدکلرینه مبنی آنلردخی یکچیری اغاسنک پاره لندیغی کون بغتۀ روسجغه فرار و علمدار

پاشا حمایه‌سنده قرار ایلدیلر . اردوی هایون بر بحران ایچنده ایکن فرانسه و روسیه ایمپراطوری بیتنده تیلستنده عقد مصالحه اولنوب دولت علیه ایله مسقولو بیتنده متارکه ومتعاقباً مصالحه اولنمسی دخی شرط قلمغله رئیس سابق غالب افندی مأمور ایدیلرک حمازی الآخره اواخرنده تنظیم متارکه اولندی . اردوی هایون دخی مشتانشین اولق اوزره ادرنیه عودت ایلدی .

محاربة بحریه

انگلیز کمیلرینک عودتندن صکره قبودان دریا سیدی علی پاشا اونسکر قطعه سفن حربیه ایله آق دکر بوغازندن خروج وانکلتره دونماسی مصر طرفه کیتمش اولدیغندن یونجه اطهده بولنان روسیه دونماسیله جنکه آغاز ایلدی . لکن سفن اسلامیه‌نک اکثریسی قارنیتده قاهره غوغا ایده مامکله یالکز قبودان پاشانک را کب اولدیغی مسعودیه نام اوج انبارلو ایله قبودانه بکک سوار اولدیغی قباق وبر ایکی کمی دهایدی سکر ساعت جنک ایلدیلر . واقعا پاشا کمیسنده یلکن و دیرکدن اثر قالمیوب قبودانه کمیی دخی ایادی دشمنه کرفتار اولدی ایسهده مسقو سفینه لرنده دخی ایلرطوتار یرقالمدیغندن یونجه اطه‌یی ترک ایله قورفیه رجعته مجبور اولدیلر وبوجهته آق دکر بوغازی محاصره دن قورتلدی . حقا که قبودان مشارالیهک اظهار ایلدیکی شجاعت محیرعقول اولدیغی معلوم انام ایکن لوندانه مشربی مزاح دولته غیر موافق اولدیغندن عصرینک مورخلری یعنی وقعه نویس عاصم افندی وشانی زاده خدمات جان سپارانه‌سنی مداهنه طریقه قربان ایشلردر . بشقه خصوصلرده فنائی اولسه بیله بویله برغازی آدمک دین و دولت اغورنده سبق ایدن قداکارلغی اضاعه ایلک لایق انصاف دکلدر .

انگلزلرک اسکندریه تسلطری

فرانسه‌لولردن استرداد اولندقدن صکره مصرک حالی پک قاریشمش وانکلتره‌لولر بعض کوله‌من بکلرندن ال طوتمش اولدقلرندن جزوی اقدامله خطه مصریه‌نی ضبط ایده‌بیله جکلری امیدیه اواخر سلطنت سلیم خانیده درونلرنده سکر بیک قره عسکری اولدیغی خالد قرق قطعه‌دن متجاوز سفن حربیه ونقلیه‌دن عبارت اولان انکلتره دونماسی یغته اسکندریه‌نی ومتعاقباً رشیدی تسخیر ایتشلر ایسهده مصر والیسی بولنان محمد علی پاشا کوله‌منلری تأدیب وتربیه ایله اولدقچه اداره‌یی یولنه قویمش بولندیغندن اولا رشید اوزرینه مهاجمه نمای سطوت اوله‌رق انگلزلولری تدمیر وبش‌التی یوز قدرینی اسیر ایدوب

بعده اسکندریه بی محاصره ایملکه انگلیز خلاص مأمول بو مدافعه بی کورد کلرند عقد شرائط تخلیه ایله عودته مجبور اولدیلر .

تبدلات داخلیه و جلوس سلطان محمود خان ثانی

قائم مقام موسی پاشانک اباواجدادن موروث چفتلکانی عصر سابقده ایکی دفعه مصادره اولوب بعدینه کندوسنه صاتمیش ومدت مدیده اینه بختی محافظه سندد ترک اولنه رق تذلیل و تحقیر اولنمش اولدیغندن ارکان دولت حقنده حاصل اولان بغض وعداوتی هضم و کظم ایدمیبوب اله فرصت کجدیکی آنده اخذ انتقامه مسارعت و مطالعه انجام کار ایله تبدیل سلطنت ماده فجیعہ سنه دخی جرأت ایتیش ومقتوللرک مجوهرات نفیسه واموال کثیره سندن خلیجه شیء اختلاس ایش ايسه ده افعال ملعونانه سنک یانه قالمیه جفی اندیشه سیله مسلوب الشعور ایکن پادشاه جدیدک قرناسی سلطان سلیمک اعدامی تکلیف ایله تضییق اید کلد کلرینه وبوکار مکر وهه دخی متجاسر اولدیغی تقدیرده ارتق کندوسی ایچون تخلیص کریبان حیات حیزامکانده اوله میه جفی مجزومی بولندیغنه مبنی ایشدن چکلمک تداییرینه تشبثله استغفایه آغایلدیکندن ایکی یوزیکرمی اوچ سنه سی ربیع الآخرینک یکر می دردنجی کونی چاوش باشی شہسوارزاده حمدا بک مقام قائم مقامی به اصعاد وموسی پاشا بروسه ده اقامت ایتک اوزره ابعاد اولندی اون کون صکره شیخ الاسلام عطاء افندی دخی عزل وصمانی زاده عمر افندی مقام فتوایه ابعاد اولندقدہ معزولک هوادارلری القا آتیه یکی چیری ضابطلری رفع پردہ ادب وعطاء افندیکن ینه مقامنه اعاده سنی طلب ایله اصرار ایلد کلرندن بالضروره ایرتسی کونی مسند مشیخته تقریر قلندی وبونک اوزرینه مفتی مشارالیهک استبداد واستقلال صدچندان اولدی بناء علیه حمدا پاشانک قائم مقامی قرق کونه وارمقسزین متفق اولان موسی پاشانی دفعه ثانیه اوله رق قائم مقام نصب ایتدیرتدی عصر سلیم خانیده طربزون والیسی ایکن عصیان ایدوب بعده قریمه فرار ایدن طیار پاشا پادشاه جدید اولان منسوبیت سابقه سنه مغروراً استانبوله کلکه نائل توقیر واحترام وموسی پاشا اوزرینه اواخر شعبانده قائم مقام اولدی لکن حبث طینت وسلطان سلیمه عداوت اصحابندن اولمغله شاید برغدر واهانته تشبث ایدر مطالعه سیله اردو رجالی بغایت متوحش ومضطرب اولوب رفع ودفعی ضمننده صدراعظم ایله بینلرینی افساد وطیار پاشا مقام قائم مقامیده بولندقچه ماجرای سابقه بناء جبارزاده اردوی هایونه کلز دیوبر مطالعه اختراع وایجاد ایدرک ایکی یوزیکرمی اوچ محرمنده عزله ظفریاب اولملریله رجال دولندن اکیلی مصطفی افندی مقام قائم مقامی به اعتلا ایلدی .

مقدمه و قعه ثانیه

علمدار پاشانك ياننده مجتمع اولان رفيق و غالب و تحسین و بهیج و رامنرا افندیلر سلطان سلیمك احساندیده و برکشیده سی و متغلبه عصرک منفوری اولدقلرندن علمدار پاشایه شهریار مخلوعك محاسن و مکارمنی تعداد وانك خلعیله دولت علیهك گرفتار اولدیغی اغتشاش و مصائبی بیان و ایراد ایدماید و عاقبت اعاده جلوس خصوصنه اقناع ایلدیلر لکن بوا امر عظیم پك چوق مقدماته محتاج اولمسیله صرهمسی دوشدکجه اقتضاسنه کوره حرکت اولمق اوزره ترتیب و تصمیم اولندقدنصکره اولار رفیق افندی و ایکنجی دفعه ده بهیج افندی استانبوله کلوب و مقربان دولته حلول ایدوب متغلبه دارالسلطنهك امور دولته مداخله و ذات شاهانهك بر شیخ الاسلام عزله اقتدارینی سلب ایتک درجه ده مغالبه لری اصدقای دولتی دلخون و خصوصیه علمدار پاشایی مکدر و محزون ایتمکه مساعدت سینه ازران بیوریلور ایسه تأدیب اشقیایه حاضر و ظهور امر فرمان پادشاهی به منتظر در دیه رك انواع ریش خند و حتی سلطان سلیمك اعدامی دخی تعهد ایله قرنانك بوم شوق فؤاد لرینی مطمح نظر اولان نقطه دن دانه ابله فریب ایله صیدوبند ایلدیلر بناء علیه علمدار پاشانك استانبوله کلمسه غایت خفی اوله رق رخصت سینه تعلق ایدوب یکدیگرینی متعاقباً رفیق افندی وزیر کتخداسی و غالب افندی رئیس و بهیج افندی دفتر دار و تحسین افندی چاوش باشی نصب اوله رق بو وجهله اردوی هایونك اداره سی متفقین انه کچدی و رامنرا افندی عقل خواهجه سی اولمق اوزره علمدار پاشا یاننده قالدی . متفقین مشارالیه هم صورت ظاهر ده علمدار پاشایی صدر اعظمه مطیع و منقاد ایدرك صدر مشارالیهی تحت امنیت و امتنانه اللدقدنصکره استانبول متغلبه لرینك تأدیب و تربیه لری کیفیتنی اشراب ایلرلیله و صدر اعظم دخی ذاتاً متغلبهك تسلط و تجربندن بیزار و ایشك ایچ یوزینی ادرا کدن عاجز اولمغله تدابیر متصوره بی حسن تلقی ایلدی بونك اوزرینه ارتق مصلحت مرکز مطلوبه واصل اولمش و حسب التعلیمات دور آیالت بهانه سیله علمدار پاشا اون اون بشیک قدر عسکر ایله روسیچقدن حرکت و برولره طوغری عزیمت ایلش ایدو کندن مذا کره احوال سفریه ایچون ادرنه به دعوت اولندی .

و بر قایچ کون لوازم مهمان سازی و تعظیفات فائحه اجر اقلندی بعده عقد اولنان مجلس مشورتده عتار که نك امتدادی سبیلله ادر نه ده اقامت بهوده مصارف کلیه به سبب اولمغله استانبوله عودت ایدیلر رك تنظیم مصالحه مقدار اولمدیغی حالده تجهیز لوازمات حربیه ایله حرکت ده اسهولتی و منفعتی اوله جفی تذکر اولمغله و علمدار پاشا دخی بنده برابر کیدر و خاکبای هایونه یوز سوررم دیمکه

اولوجهله حرکتہ قرار ویرلدی. فقط رسماً استیدان اولنورایسه طائفه متغلبه نك جواز کوسترمیه جکلری درکار اولدیغندن استیداندن صرف نظر وبرقاچ کون مارین وعابرینك سیر و سفرلری منع اولنه رق استانبوله تقرب اولندجقه طویلامسنه اعتنا اولنق صورتی اختیار اولندی. رئیس الاشقیاء اولان قره دکر بوغازی ناظری قباچی مصطفی نك درجنك اول تدمیری ایچون بر مقدار عسکر ایله خصکوی اعیانی ارسال و جمادی الاولینك اون طقوز تبحی کونی ادرنه دن انتخاب اولنوب اعیان مومی ایله بقته باغی مرقومك روم ایلی فناری قلعه سنك خارجنده اولان خانه سنی باصوب قتل وقلعه یماقلری مطلع اولنجه یه قدر قلعه یی ضبط وتحصن ایلدیکی خبریله باغی مرقومك سر مقطوعی اردوی هایونك چورلی مرحله سنه وصولی کونی وارد اولدی. قباچینك قتلی استانبوله انواع کفتکونی موجب اولدیغی حالده اردوی هایونك علمدار پاشا ایله کلمکده اولدیغی ارکان سلطنتك معلومی اولدقده جمادی الاولینك یکریمی اوچنجی بازار کونی باب فتوا پناهیده عقد مجلس اولنه رق کیفیت میدانه قونلدی. وقعه سابقه ده ذی مدخل اولنلرك جان باشلرینه صحرایوب بعضیلری مدافعهلرینی تدبیر و بعضیلری دخی قلعه قبولرینك سدیله دخوللرینه رخصت ویرلما سنی تقریر ایدرلر ایکن قائم مقام پاشا بوکون سلوری یه وصالی کونی استانبوله واصل اوله جقلرینی بیان ایلمکله ارتق تدابیر وتدارکاته میدان قالمدیغی تبین ایلدیکندن بالضروره بر معتاد طرف سلطانیدن دعوتجی ارسال اولندی. وبروجه ترتیب ماه مزبورك یکریمی بشنجی صالی کونی سلطان مصطفی خان حضرتلری سنجاغ شریفی استقبال ایچون انجیرلی چفتلکنه دک چیقوب مرتب الای ایله اردوی هایون استانبوله داخل وصدر اعظم باب عالی یه قائد اولوب علمدار پاشا ولی افندی صحراسنده مرکوز اردوگاهنده قرار ایلدی. ماه مذکورك یکریمی یدنجی کونی علمدار پاشانك اوچ بش بیک آدم ایله باب عالی یه کلمسنی متعاقب شیخ الاسلام عطاءه افندی عزل وعرب زاده عارف افندی نصب اولنوب ایکی کون صکره روم ایلی وانا طولی قاضی عسکرلری چاوش زاده شمس الدین افندی ولحومی زاده محمود نورالدین افندی وانا طولی پایه سنی حائر مشهور خواجه منیب افندی نفی وابعاد ویکيچریلرك اشداء اشراسندن ایکی چورباچی اعدام قلندی.

متفقیندن علمدار پاشانك معیتده بولنان رامز افندی سلطان مصطفی نك سنجاغ شریفی استقباله ورودنده بالتوقیف سرعت سیر ایله استانبوله کیدیلوب سلطان سلیمی اجلاس ایلك صورتی تذکر ایتمش اولدیغی حالده دیکرلری بونی تنسیب ایتیموب

متغایه نك طرد و دفعندن صكره سرای هایونده بر مجلس عمومی عقدیله سلطان محمد رابع
 خای طرزنده تبدیل سلطنت اولمنسنه قرار ویر مشلردی. بناءً علیه شیخ الاسلام و صدورك
 عزل و نفی اولملرینی متعاقب قبودان دریا سیدی علی پاشانك دخی عزلی طرف صدر
 اعظمیدن عرض ایتدیرلمش ایسهده والده سلطان حمایهیه قیام ایلدیکندن صدر مشارالیه
 شمذیلک بونك تأخیری لازم کلدیکنی وانتظام امور دولت حاصل اولمش ایدوکنندن
 ارتق عودت ایلری لزومی علمدار پاشایه اشعار ایلدکده علمدار پاشا بهممه حال قبودانك
 عزلی مقتضی و بزم عودتمز انك حصوله موقوفدر. دیوتند و تتیز بر جواب ارسال
 ایسکه و صدر اعظم بعض قرائن حالیه دن سلطان سلیمی اجلاس نیتنده بولندقلرینی
 استدلال ایدوب بویسه کندی منافع و مطالعه سنه مغایر بولمغله کیفیتی مقربان سلطنته اشعار
 و رفیق و بهیج و تحسین افندیلك قتللری خصوصنده طرف سلطنتدن ترخیص بیوریلور
 ایسه متفقینك ترتیب و تصویرلری زائل و قلعه قبولرینك سدیله علمدار پاشانك دخی
 مدافعه سی قابل اوله جغنی تذکار ایلش ایسهده مقربان سلطنت متفقین طرفندن اوله
 کرکی کبی اغفال قلمش اولدیغندن صدر اعظمك اختارینه اصلاً وجود ویرمدیلر
 و بویله شئك احتمالی یوقدر دیو جواب کوندردیلر رفیق و بهیج و تحسین افندیلر اشبو
 مخبرات خفیهیه مطلع اولدقلری آنده علمدار پاشا اردوسنده بولنان رامنز افندییه
 ابلاغ ماجری و بعدازین بر لحظه توقف موجب وخامت اوله جغنی آنها ایللریله جمادی الاخره نك
 دردنجی پنجشنبه کونی علی السحر علمدار پاشا اون بیك قدر عسکر ایله حرکت و باب
 عالییه دهشتنای مواصلت اولوب عرض او طه سنده قهرراً صدر اعظمدن مهر هایونی اخذ
 و چاوش باشی تحسین افندییه تسلیم و صدر مشار الیهی قرق الی سوارییه تسلیمأ ولی
 افندی صحرا سنده اولان اردوسنه ارسال ایلدکن صكره شیخ الاسلام افندی ایله سائر
 اقتضا ایدن ارکان دولتی جاب و جمع ایله سرای هایونه عزیمت ایلدی. سلطان مصطفی
 خان حضرتلری احواله واقف ولدقده اورته قیوی سد ایتدیروب سلطان سلیم
 و شهزاده سلطا محمودك اتلافنه امر ویرمش اولمغله باش چوقدار فتاح و خزینه کتخداسی
 ابه سلیم و میراخور محمد و خزینه و کیلی نذیر و تبدیل خاصکیسی بغدادلی علی و بونلره تابع
 بش اون نفر بوستانجی حرم هایونه دخول ایله سلطان سلیمی شهید ایدرك سلطان
 محمود خان حضرتلرینه دخی هجوم ایتمشلر ایسهده لالاری عنبر و حافظ عیسی آغلرك
 محافظه لریله سقف سرایه چیغوب تخلیص کریبان حیات ایلدیلر بعض سرای آغلرندن
 منقولدرکه سلطان مصطفی خان چراغان کوشکنه بینش امر ایدوب کیتمك اوزره

ایکن علمدارك باب عالی به ورودی استماع اولمغله ترك اولمش و اگر علمدار پاشانك كلسی یارم ساعت قدر تأخر ایش اولسه ایدی سلطان مصطفی سرایده بولنیه جق و امر مطلوب سهولتله حاصل اوله جق ایش نه چاره که مقدرات الهیه سلطان سلیم حضرتلرینك شهادتنه و بو سببله بك چوق قان دو كمنه متعلق اولمسیله حکم قضا قرین امضا اولمشدر . علمدار پاشا باب السعاده ایچدیرلدی چالشمقده ایکن سلطان سلیمك شهادتی متین و سلطان محموده سوء قصد و قوعی محسوس اولمغله اصدقای دولته بر درجه خشیت و ملال استیلا ایلدیكه کمال حیرت و دهشتدن نه یاپه جقلریخی شاشرمشدر ایدی .

هله رامنر افندیك اخطارات متجلدانه سی ایله آرتق سلطان محمودك صحت و سلامته حصر همت اولنوب زور بازو ایله باب السعاده ایچدیرلدی و مشارالیه حضرتلری دخی بالای بامدن اینوب قوشخانه قیوسی جانبندن ظهور ایتمکه درحال تخت عثمانی به اجلاس و بیعت عمومیه آتمام اولنوب علمدار پاشا مقام صدارته اعتلا ایلدی .

خاقان مغفور بیك یوز یتیش سنه سنده تولد و ایکی یوز اوچ تاریخنده جلوس ایدوب یکریمی ایکیده مخلوع و اون درت آی مرورنده شهید اولمغله سن شریفلری قرق سکر و مدت سلطنتلری اون طقوز سنه به قریبدر . شهادتلرینك ایرتسی جمعه کونی لاله لیده واقع پدرلری تر به سینه دفن اولندیلر قتله منفوره ایله بو ماده مستهجنده قولاً و فعلاً ذی مدخل بولنان اوچ یوزدن متجاوز اشخاص قتل و اعدام اولندیغی مثللو خونه سلیم خانیدن قائم مقام اسبق موسی پاشا و طیار پاشا منفالری اولان از میر و شمنیده شمشیر مجازات قنطردسندن امرار اولندیلر و وقعه خلعه آت میدانی جمعیتی ارکانندن اولان شیخ الاسلام اسبق عطاء اه افندی ایله قاضی عسکر لر نفی و تغریب و قیودانلق بارتبه و زرات رامنر افندی به توجیه اولنه رق سلفی سیدی علی پاشا بروسه ده اقامت ایتمک اوزره تبعید اولندی . صدر اعظمك هیبتی و سطوت سیاستی یکچیریلری سوت دوکش کدی به دوندروب باخصوص مذاکره احوال سفریه و تنظیم مهام دولت علیه ضمتنده اناطولی و ایسی قاضی پاشا و جبار زاده و قره عثمان زاده و سیروزی یوسف بك و سائر اعیانلر استانبوله جلب اولمغله درسعادت صحرالری عسا کر متنوعه ایله مالامال اولدیغندن اداره امور دولته تعرض و تعریض ایتمکه کیسه نك زهره سی قالمدی . بناءً علیه قانون اساسی طرزنده بر اتفاقنامه یازیلوب صدر اعظم و شیخ الاسلام و قیودان پاشا و قاضی عسکر لر و رجال دوات و مذکور الاسم اعیانلر جانبندن تمهیر و ظرف پادشاهیدن باخط هایون تصدیق بیورلدی و سکبان نامیه عسا کر منتظمه یازمغه شروع اولندی .

بعده سنه آتیهده سفر مقتضی اولدینی حالده عسا کر کلیه ایله سفره کلمک شرطیه اعیانلره رخصت ویرلدیکندن عودت ایتدیلر .
 بو کره دخی یکیچریلرک کلیاً رفع و الغاسی تنسیب اولنش ایسهده طرف پادشاهیدن مساعده بیورلدی . لکن بو عدم مساعده ایله سلطان سلیم مرحومک جسارتسزلکی بیتنده فرق کلی واردر . زیرا سلطان سلیم زماننده اون اون بشیک نظام جدید میدانله گمشیدی . بو دفعه ایسه هنوز عسا کر منتظمه تدارکنه تشبث اولنوب باخصوص آستانه علیه صدر اعظمک سکر اون بیک قدر قیرجه لی عسکریله مملو اولدیغندن ای فنانه دولت عسکری اولان یکیچریلرک محو وازاله سی حالنده مرکز سلطنت بتون بتون صدر مشارالیهک عسکری النده قالمق لازم کلوب بو ایسه موافق قانون عقل و سیاست دکل ایدی . حتی سبب اتفاق حضور هایونه عرض اولندقدن سلطان محمود خان حضرتلری خواجهلری اولان شهر امینی ابراهیم افندی و باش چوقدار عمر اغا ایله لدی الاستشاره بو شرائط استقلال سلطنتی محل اولدینی میدانده ایسهده شمدیکی حالده تصدیق اولنماسی ممکن اوله میه جغندن ایلروده الغا و امحا اولنق لازمه ذمت سلطنتدندر دیدکلی و سلطان محمود خان حضرتلری دخی بونیت ایله خط تصدیق کشیده بیوردقلری منقولدر .

وقعه علمدار پاشا

صدراعظم استانبولک احواله غیرواقف و مدیرامور اولانلر یکیچریلرک کلیاً مغلوبیتته معتقد اوله رق صدر مشارالیهی اطرافدن تقدیم اولنان جواری ایله ذوق و شوقه مبتلا و کندولری دخی تکمیل دارات و احتشامه اعتنا ایدوب حزم و احتیاطی فراموش وروم ایلی عسکرینی خانلره و وکلا قوناقلرینه تفریق و تقسیم ایله غروس غفلتی دراغوش ایلدکلیرینه مبنی منتظر وقت فرصت اولان صنایدید یکیچریان هیولای فتنه یه صورت ویردیلر ورمضان شریفک یکر می یدنجی صالی کیجه سی امساک و قتلرنده بغته باب عالی یه مهاجمه نمای ورود اوله رق القای آتش ایلدیلر ایش بو درجه یه کلنجه یه قدر ارکان دولت خبر آله مامش و حین اقتضاده عسکرک تجمعی ایچون اعیانلره تعلیمات و بعض علایم کی شیلر اعطا و ترتیب اولنماش ایدوکنندن صدر مشارالیه دائره صدارتده بولنان توابعیله مدافعه یه قیام ایلدی ایسهده امداده دسترس اولنه مامسیله و آتش هولناک باعث تفرقه جمعیت اولمغله بالضروره برمحزنه کیروب تحصن و هجوم ایدنلره قورشون آتمغه اغاز ایلدی . سکر طقوز ساعت قدر بو حال دوام ایلدکدن صسکره یکیچریلر مخزنک قبه سنی دلمکه شروع ایلدکلیرندن

صدر مشار الیه یاننده بولنان جبخانه به آتش ویرمکه قبه ده و جوارده اولان ایکی اوچیوز قدر شقی پابرهوا و کندوسی دخی عازم دار عقبا اولدی .

اشقیانک برطاقی بونکه مشغول ایکن برطاقی دخی رئیس غالب افندینک قوناغنه کیدوب مسافر بولنان الی التمش قدر روم ایلی عسکرینی طلب ایلریله افندی مشار الیه بلا مخالفت تسلیم ایلدی . اشقا دخی بزم خصوصتمز وزیر اعظمک ذاته منحصر وانک ایشی ایسه تمام اولدیغندن سزه برکونه ضررمرز یوقدر دیوب و اوکلرینه آدم قاتوب قلعه قپوسندن اخراج و خانلرده و سائر یرلرده بولنانلری دخی بووجهله طرد و دفع ایلدیلر . وزیر کتخداسی رفیق افندینک قوناغنه کلنله خاصکوی اعیانی اولوب نفراتیه برابر اوراده مسافر بولنان سلیمان اغانک رأی و تنسیبی اوزره دانه تفنک ایه جواب ویرمکه آنلر دخی جنکه ابتدار و بالاخره برچرخه طوبی کتوروب انک صدمه سیله قوناغک قپوسنی رخنه دار ایلدکلرندن افندی مشار الیه لاجل الاستیان بنک طاشنه ایندکده اوزرینه هجوم ایله پاره پاره ایلدیلر جهادیه ناظری بهیج افندی اختفا ایدوب دفتردار تحسین افندی مخفی اولدیغی محله طوتمش اولدیغندن آنی دخی پاره لیوب درجنک اول کشته تیغ شقاوت اولان یکیکچری اغاسنک اغا قپوسنده اولان نعشی یاننه القا ایلدیلر . اولوقتی مدرک اولان بعض ارباب و قوفدن استماع اولندیغنه کوره غالب افندی به عدم تعرضک سببی بوایمشکه رمضان شریفده رفیق و بهیج و تحسین افندیلر آیاصوفیه و سائر جوامعده اجتماع ایتدکجه تصحیح امور دولتی مذاکره ایدرلر و غالب افندی آنلره قارشیمیوب قرائت قرآن کریم ایله مشغول اولور ایمش . یکیکچریلرک جاسوسلری بونلرک احوالنه مد نظر دقت و استراق اقوالرینه حواله سامعه ملغت ایده کلدکلرندن غالب افندینک بو حال باعث سلامتی اولمشدر . قپودان رامز پاشا ظهور فتنه به واقف اولدقده کویا سلوری وادرنه طرفلرندن یکیکچریلره امداد کله چکی جمله تحقیقاتندن اولمق حسبیه آنلری مدافعه ایچون ادرنه قپوسی طرفلرینه برفرقة عسکریه کوندروب کندوسی ترسانه ده آرام و بویله بیهوده برمطالعه و تدبیر ایله افاته وقت ایلدی .

وقعه هولناک منظور پادشاهی اولدقده عسا کر منتظمه سرعسکری قاضی پاشا و قپودان رامز پاشا و جرخه جی علی پاشا و اسکدارده مقیم قپودان اسبق صالح پاشا و سلیمیه قشلا سنده بولنان عسا کر منتظمه دن اوچ درت بیک عسکری سرای هایونه جلب و نتیجه مصلحته انتظار اولنوب فتنه باغیه ایسه وکلایی افنا ایتدکدنصکره سرای هایونه هجوم ایلریله جیوش منتظمه سرکرده سی اولان سلیمان اغا ساعت طقوز راده لرنده ایکی اوچ بیک قدر

عسکر ایله خروج واشقیانی قهر وتنکیل ایدرك چنبرلی طاشه قدر کلوب اورادن باب عالی طریقله صغوق چشمه قپوسندن سرای هایونه دخول ایلدی وفرونلرده بوله بیلدیکی اتمک وسمید وچورك مثللو ما کولاتی آلوب کتوردی . سلیمان اغانک بو سیر وسفری ایکی ساعت اول واقع اولسه ورامز پاشا کبی دهاته عصردن بولنان برذات تدابیر بیهوده ایله امرار وقت ایتیموب باب عالییه امداد ایلسه صدرمشار الیهک تخلیصی ممکناندن اولمسنه نظراً عن قصد اغماض اولندیغی تحت شبهه ده در حتی سرای هایون ارکانک وقعه دن اول خبردار ایدوکلری بعض قرائن ایله استدلال اولمشدر .

سلطان مصطفانک تکرار سلطنتی زبانزد اشقا و سرای هایونه هجوملری دخی بونی مؤید اولدیغندن چهارشنبه کیجه سی شربت شهادت اشراب اولندی . پادشاه مشارالیه غایت ساده دل ومیوه نارسیده سلطنتی اله کچورمک ایچون ایقاظ فتنه یه متجاسر اولوب دولت علیه نک انواع فلاکت وضایعانه سبب اولمسيله برابر هم سلطان سلیمک وهمده کندوسنک اتلافه بادی اولدی . بیک یوز طقسان اوچ سنه سنده متولد وایکی یوز یکریمی ایکی سنه سنده جالس اورنک عثمانی اولوب اون درت ماه مرورنده مخلوع واوچ آی یکریمی کون صکره شهید اولمشدر . اختلالک ختام بولدیغی جمعه کیجه سی پدرلری یاننه دفن اولمشدر . فرداسی چهارشنبه کونی فتنه باغیه ینه سرای هایونه مهاجمه نمای ورود اولدیغندن سالف الذکر سلیمان اغا اوچ درت بیک عسکر ایله اخراج وخونریزانه چنکه شروع اولمغله درت بش بیک قدر شقی رهرو وادی عدم اولوب دونمهای هایوندن دخی جمع امرای یکیچریان اولان اغا قپوسنه کله انداخته مباشرت قلنه جغنه مبنی طائفه باغیه نک بنیان ثباتلری متزلزل اوله رق اقدجه اغا قپوسنه احضار ایلدکلری قاضی عسکرلری عفو جرایم رجاسيله حضور هایونه کوندردیلر و فیما بعد مرکز اطاعتده قائم اولمق شرطیه عفو پادشاهی ارزان بیوریلوب طوب وتفنک منقطع اولدی . بو وجهله ایش بیتدی ظن اولنور ایکن ایرتسی پنجشنبه کونی صنادیدیکیچریاندن قاندرملی نامنده برکشتی علی الصباح غلطه طرفلرنده علم افراز طغیان اولوب خوف قهر سلطانی ایله دونکی کون هر بری بر یرده اختفا ایدن اشقا اجتماع ایدرك درحال طوپخانه و ترسانه یی ضبط و طوپخانه نک قرغانلری میدان لحه ایصال ایسکه آتش فتنه یکی باشند علو افشان اولدی . ایکی کوندنبرو وقوعبولان مقاتلاتده مومی الیه سلیمان اغا وبعض ضابطان و الی یوز قدر سکبان مقتول اولوب اشقا ایسه سرای هایونک صولرینی کسمک و آياصوفیه منارملرندن درون سراهه قورشون آتمق درجه لرنده ادبسر لکه جرأت ایتملریله و سبک مغزان اهالی جانبدن قولاً

و فعلاً طائفه باغیه به معاونت و حتی سرای پادشاهی آشجی و قپوجیلری مثل و بعضی خائلی بیه عساکر منتظمه به اظهار خصومت ایتکده بولنلریله آرتق امید غلبه بر طرف اولدیغندن قاضی پاشا و رامز پاشا و ترسانه امینی موردی علی افندی فرارده مجبور اولدیلر بعده چرخه جه علی پاشا و قاضی عسکرلر مجمع اشقیایه کوندریلوب طول و دراز محاورادن صکره سکبان اوجاغی لغو اولمق اوزر سداب فته اولندی و ایرتسی جمعه کونی یکچیریلر سلیمیه ولوند چفتلیکی قشهرلری احراق و الیرینه کچن عساکر منتظمه ضابطان و نفراتی اعدام و افنا ایله تمیم شقاق ایلدیلر .

اشقیانک طعن انداز اوله کلدکلی شیخ الاسلام عرب زاده افندی عید شریفک اوچنجی کونی عزل و دری زاده عبدالله افندی نصب اولوب بدایت وقعه ده چاوش باشلیقدن قائم مقامغه انتخاب اولنان محسن پاشا دخی صدر صدارته اعتلا ایلدی رؤسای اشقیان قاندره لی محمد چکدیر کوندروب بروسه ده اقامته مأمور اولان قپودان سابق سیدی علی پاشایی کتورتش اولمسیله طلب اشقیایله مقام قپودانی به اصعاد اولندی قاضی پاشا مملکتی اولان علائیه به واصل اولمش ایسه ده یکچیریلرک ابرام و الحاحلریله صادر اولان فرمانلر موجبجه تکه لی اوغلی محمد اغا هجوم ایدوب سلح سنه مزبورده اعدام ایلدی بهیچ افندی و موردی علی افندی دخی دانه دام فریب ایله میدان چیقاریلوب سنه آتیه اوائلنده ازاله اولندیلر رامز پاشا روسجغه مواصلت ایدوب لکن سالف الذکر قاندره لی محمد میر میرانلق توجیهیله تعقیبه کوندرلش و سلستره و ایسی خسرو پاشا دخی روسجق اوزرینه مأمور ایدلش اولدیغندن بالضروره قارشویه کچوب روسیه لوره التجا ایلدی و درت بش سنه اورالرده آرام ایلد کدنصکره بعد المصالحه بلغراد محافظتلی نامیه اغفال و جلب اولنه رق یرکویده اعدام قلندی .

انکلتزه ایله تجدید مصالحه اولندی

دولت علیه فرانسه خاطری ایچون روسیه به و انکلتزه لولر روسیه خاطری ایچون دولت علیه به اعلان حرب ایلش اولدقلری حالده فرانسه و روسیه دولتری عقد مصالحه و تنظیم اتفاق ایلش اولدقلرندن سلطنت سیه ایله انکلتزه لودخی تجدید مصالحه به عرض خواهش ایتدکلی جهتله بالخباره طرف دولت علیه دن مرخص تعین اولنان و حید افندی ایله انکلتزه مرخصلری چناق قلعه سنده اجتماع ایتملرایلدی . افندی مشارالیه اسباب درایت و مکناتدن برزات اولمغه بک کوزل بر معاهده عقد و تنظیم ایتکله سلطنت سیه بی برغائله هائله دن تخلیص ایلدی معاهده مذکوره ایکی یوز یکرمی سنه سی ذی القعدة سنک اون طقوزی

تاریخچه مورخ و محافظه حقوق دولت علیه بی متضمن اولوب عهدنامه مجموعه سنده مسطور
اولمغله عیناً درجه تصدی اولندی

تجدد سفر روسیه

سلطان سلیم مرحومی درلودرلو مواعید دلفریب ایله اغفال ایدرک روسیه لویه اعلان
حرب درجه سینه قدر کتورمش اولان فرانسه ایمپراطوری پوناپارته یتلستیده روسیه
ایمپراطوریه عقد مصافات ایلدکده دولت علیه نک دخی روسیه لویایله متارکه و متعاقباً معاهده
ایلمرخی شرط ایلدیکنه مبنی روسیه نک ضبطه کچمش اولان قلاع و ممالک دولت علیه
و بوزجه اطه محاربه سنده ضبط اولنان قالیون عقب متارکده جانب سلطنت سینه یه تسلیم
قلنمق شرائط اساسیه سی ایله ایکی یوز یکرمی اوچ سنه سی جمادی الاخره سنک یکرمنجی
کونی عقد متارکه قلنمش و مذاکره مواد صلحیه پارسده اجرا اولنمق اوزره اوراده
بولنان دولت علیه سفیری محب افندی یه مرخصلق فرمانی کوندرلمشیدی . مؤخرأ
روسیه و فرانسه ایمپراطورلری ارفورتنده ملاقات ایدرک بیلرندنه منعقد اولان مصالحه
مرتبه اتفاقه ایصال اولنمغله و باخصوص فرانسه ایمپراطوری سلطان سلیمک خلعیله دولت
علیه نک برخیلی وقتدنبرو چالیشدینگی تنظیمات عسکریه و ملکیه سی برآنده محو و هبا
اولدینگی مشاهده ایله اصلاح احوال دولتن بالکلیه مایوس اولمغله ممالک دولت علیه نک
تقسیمی مذاکره سیله مسقوولرک حریص و منهمک اولدقلری نقطه دن ارائه دانه فریب
ایدرک روسیه ایمپراطورینک شهباز فؤادینی شکار ایلدی . لکن بوصورت پکده قولای
اولیه جغتدن بشقه استانبولک مسقولر اننه کچمسی بروجله تجویز اولنور مواددن
اولمدیغندن نهایت شمدیلاک افلاق و بغدادنک تملکیله روسیه ایمپراطورینی ارضا ایده بیلدی .
بناءً علیه مذاکره صلحیه یه مباشرت اولنمق ایچون محب افندی طرفندن فرانسه خارجه
نظارتنه افاده واستعجال اولندقجه کاه پترسبورغدن ایلچی کله جک دنیلوب و کاه سلطان
سلیمک شهادتندن ناشی عرض انفعال ایدیلوب بویله جه برخیلی زمان امرار اولندقدن
صکره بالاخره مسقولر افلاق و بغدادنی ترک ایتیمور و مقدا عقد اولنان متارکه شروطنه
روسیه ایمپراطورینک مساعدیه سی استحصال اولنه میور دیهرک و توسطدن دخی اعراض
ایدیله رک عادتاً محب افندی بی استیقال ایلدیله بوحالک ظهورنده آرتق دولت علیه نک
طوغریدن طوغری یه مسقولو ایله مخبره ایلمسی لازم کملکه علمدار مصطفی پاشا صدارتندنه
بکمرشده بولنان روسیه فلد مارشالنه مکتوب یازیلوب جواب موافق البیدیغندن
بعدالوقعه رئیس غالب افندی و حرمین پایه لولرندن محمد رضا افندی و بکلکچی

عزت بك مرخصی اول و ثانی و ثالث انتخاب اولنوب یكرمی اوچ سنه سی شوالنده اعزام قلندیلر غرائبندركه فرانسه ایمپراطوری سلطنت سنیه یی روسیه وانكلتره کبی ایکی دولت عظیمه ایله بوزشدیردقدنصكره اورته ده براقیویرمش وبوكره دخی واقع اولان بیوفالخی دولت علیه داغ بربالای داغ اولمشیکن ایکی سنه یه وارمقسزین روسیه وفرانسه دولتری بینده اولان مصافت و اتفاق مبدل خصومت وشقاق اولمقله بوناپارته دولت علیه یی یکی باشند اغفاله چالشدی ایسه ده دولت علیه اوچنجی دفعه اوله رق الدائمقندن اجتناب وکندوسندن اوكرندیکی لسان دیپلوماسی ایله كچشدیروب نهایت روسیه لویایله فرانسه لونك كرما كرم حرب و قتال اولدیغی اوانده مسقولرایله عقد مصالحه ایلشدر حتی بعض فرانستاریخلری بوناپارتك خطیاتی تعداد ایتدكری صروده دولت علیه یی نظر اتفاقدن براقسی سببیه مسقولولر فرانسلرك هجومی مشاهده ایتدكلرندن در حال سلطنت سنیه ایله عقد مصالحه ایدرك طونه سواحلنده بولنان یوزاللی بیکه قریب عسكرلرینی جلب وفرانسه علیه ده اعماله مقتدر اولدیلردیوبوناپارته یه طعن انداز اولمشدر در علمدار پاشاوقعه سنده صدراعظم نصب اولنان محسن پاشانك عدم اقتدارندن وسیدی علی پاشانك زوربالر التزامیه قبودانلق مقامنه اصعاد قلنمش اولمسندن ناشی یكرمی اوچ سنه سی ذی القعدة سنك اونجی كونی محسن پاشاویكرمی درت سنه سی صفرینك دردنجی كونی سیدی علی پاشا عزل اولنوب مهر صدارت حلب والیسی صدراسبق یوسف پاشایه ارسال وچرخه جی علی پاشا قائممقاملق ومؤخرآقپودانلق ایله اجلال قلندی و صدر جدیددخی ربیع الاولك طقوزنجی كونی در سعاته واصل اولدی اسماعیل ویركوی و ابرائیل قلعه لرینه هجوم ایدن مسقوفر قه لری مدافعه اولنمقده ایسه ده دشمنك طونه نك بو طرفنه كچمك صد دنده اولدیغی محقق اولمغله صدراعظم سردارا كرم نصب اولنه رق سنجاق شریفی مستصحباً موقع حربه عزیمتی قرار کیر اولدیغندن یكرمی درت سنه سی جمادی الاولیسنده قاعده قدیمة دولت علیه وجهله صدر مشارالیه اردوی هایونله حرکت و شمنی یه مواصلت ایلدی .

یكرمی درت سنه سی محارباتی

روسیه لینك بیوك اردوسی دوبریجه یه كچدكن صكره ایکی یه منقسم اولوب برفرقه سی وارنه و دیگر برفرقه سی شمنیده بولنان اردوی هایون اوزرینه صولت ایلدی و بك فدا کارانه جنكه کیرشدی عساكر اسلامیه دخی امر مدافعه ده دلیرانه حرکت و تدمیر دشمنده ابراز

شجاعت ایلر یله مستقولو خلیجه تلفاته دوچار اولدقلرینی مشاهده و برایشه مقتدر اوله میه جقلرینی استدلال ایدرک عودته مضطر اولدقلری مثللو دونمهای هایونک وارنه یه وصولی جهته اوراده بولنان دشمن فرقه لری دخی کاینغی تضیق اولندیغندن انلر دخی رجعت قهقری یه مجبور اولدیلر بناء علیه اردوی هایون روسجغه سوق اولنوب یرکویه کچمک و بکرشه طوغری حرکتله طونه نک بو طرفنده بولنان دشمنی عودته اجبار ایلک خصوصنه قرار ویرلمشیکن طونه سر عسکری خسرو پاشا رسوانده بر فرقه روسیه عسکر یله محاربه ایدرک منهزم اولمغله و مسقوبیوک قوماندانی کافه جیوش متفرقه سنی جمع ایدرک التمشیک قدر عسکر ایله سلستره دی محاصره ایشکله بالضروره بکرش اوزرینه مصمم اولان حرکت ترک و شجعان غزاتدن پهلوان ابراهیم اغا و بوشناق اغا و فوج فوج کلکده اولان دره بکلری و اعیانلر سلستره طرفه اعزام اولنوب و صدراعظم دخی اردوی هایونی روسچقده براغوب عبا کر متخبه ایله بالذات عازم سمت غزا اولدی .

روسیه لولر سلستره پیشکاهنده انشا ایلدکلری استحکاملرنده جزئی عسکر تدارک ایدرک قوه کلیه ایله سلستره نک ایکی ساعت بعدنده جنود اسلامیه بی قارشولیدلر و رمضان شریفک اون بشنجی کونی حربه مباشرت اولندی سکز طقوز ساعت آتش جنک و قتال کرما کریم اشتعال و احشامه قریب تپه دئلی علی پاشا زاده مختار پاشانک از نبود دلاور لریله امداده یتشمسی دشمنک باعث انهزامی اولوب سالف الذکر استحکاماتده دخی پایدار اوله میهرق دو بریجه یه طوغری فرار ایلدیلر بو محاربه ده اون بیکدن متجاوز روسیه لولر تلف اولدینی مرتبه تحققه واصل اولمشدر . بعده صدراعظم سلستره صحرا سنه اردو قوروب مشارالیه پهلوان ابراهیم اغایه وزارت توجیه و سائر غزات موحدینی عطایای مناسبه ایله تلطف ایلدی . روسیه لولر یار دلولرینی و مهمات و آغز لقلرینی و عسکر لرینک چوغنی قلاص طرفنه کچروب بروده برقاج استحکام ایچنده بر مقدار عسکر براغوب حال تدافعی یه کیرمش اولدقلرندن و موسم شتا دخی دخول ایلدیکندن صدراعظم شوال ایچنده واقع قاسمک اون التیسنده اردوی هایونی مشتای شمنی یه ایصال ایلدی .

بوسنه طونه نک بروجه تنده اگرچه خلیجه موفقیت ظهوره کلدی لکن التی یدی آیدنبرو محصور اولان اسماعیل و ابرائیل قلعه لرینه معاونته اسکان بوانه مامش اولدیغندن مذکور قلعه لریک گرفتار آیدای اعدا اولدینی خبری اردوی هایونک مشتایه دخواستند نصکره جه واصل اولمغله موجب تزیاد اکدار و آلام اولدی .

ارضر و مالیسی و شرق سر عسکری اولان فرهاد پاشا و طربزون و الیسی و چرکستان

سواحلی سرعسکری شریف پاشا و چلدیر والیسی سلیم پاشا اولخوالی خاندان قدیم لرندن و ذاتاً یکدیگریله منافس اولدقلرندن هنگام سفردده اولسون اتحاد ایملری فریضه ذمتلری ایکن بالعکس تشدید خصومت ایملریله بونلرک اتفاقسزلغی اولخوالیده برایش کوریه مامسنی وفاش قلعهنک روسیه لواله کچمسنی موجب اولمغله جمله سی عزل و تنکیل اولنوب سنه آتیه ایچون شمیدن ولایه وعسکر ترتینه مباشرت اولندی .

یکرمی بش سنه سی وقوعات حربیه سی

یوقاریده بیان اولدنی اوزره روسیه و فرانسه ایمپراطورلری بینده عقد اوئنان مساوله نامه حکمنجه دولت علیه بی افلاق و بغداد قطعه لرینی ترکه اجبار ایتک ایچون مسقولولر کمال کرمی و شدتله جنکه میاشرت ایدوب اگرچه اسماعیل و ابراهیل قلعه لرینی ضبط ایدوب یلمشلا ایدوب شمنی و سلستره محاربه لرند منهزم اولدقلرندن و سلطنت سنیه بلافتور مدافعه یه دوام ایتکده بولندیغدن ایکی یوز یکرمی بش سنه سی اول بهارنده روسیه لواله تکرار تدارکات جسیمه ایله دوبریجه ده اجتماع ایدوب وارنه و سلستره و شمنی و ینگبولی اوزرلرینه درت قول عسکر ترتیب ایدرک هجوم و اقتحامه مبادرت ایلدیلر وارنه بی محاصره ایدن فرقه دونمای هایونک اورایه و صولیه عودته مجبور و شمنی اوزرینه کلان قلمار شال اردوسی دخی بش اون کون محاربه ایتد کدنصکره تلفات کلیه یه گرفتار اوله رق رجعت مضطراولدی ایدوب دوبریجه جوارلرنده بولنان بابا پاشا و جرخه جی سروری پاشا و قوشانجه خلیل پاشا مفرزلرینه غلبه ایدوب بابا پاشا ایله سروری پاشایی اسیر و خلیل پاشایی شهید ایلدیلر و بالاخره سلستره و روسجق قلعه لرینی ضبطه ظفریاب اولدیلر ینگبولی اوزرینه سوق ایلدکلری فرقه اوجهتدن بالقانلره طوغری ایلروملک و ممکن اولورسه تجاوز ایدرک دولت علیه بی تهدید ایتک مقصدینه مبنی اولوب کرچه لوفیجه یه قدر تسخیر ایلشلا ایدوب مدافعات شدید شمره سیله اضمحلال درجه لرینه قریب تلفاته گرفتار اولدقلرندن لوفیجه ده پایدار اوله میوب ضونه ساحلنه عودته مجبور اولدیلر بوسنه نک ایام صیفی محاربات مذکوره ایله مرور ایدوب انجق روسیه لواله بیکندن متجاوز عساکر معلمه ضایع ایتلریله قوتلری خلیجه تدنی ایلدی .

صدارت لاز احمد پاشا

صدراعظم یوسف ضیا پاشا عصر سلیم خانیده نظام جدید مرتبلرندن اولمغله یکچیریلرک

منفوری اولوب کندوسی دخی بونی اندیشه ایدینه رک بغاة یکچریانک تلطیف واستمالترینه مکب وساعی وبوجهتله اردوی هایونده طائفه مرقومه نك متجاسر اولدقلری سیئاته اغماض عین ايله تربیه لرندن متحاشی اولمق تهمتیه عزل وتبدیلی نزد پادشاهیده قرارگیر اولمش واولوقتی ادراک ایدن بعض ارباب وقوفدن استماع اولندیغنه کوره تزیدد وقع وحیثیتی ضمنتدم خالق پایه سی طلبنه متجاسر اولسی اغبرار طبع ملوکانه بی استلزام ایش ایدوکنه مبنی ایکی یوزیکرمی التی سنه سی ربیع الاولنده عزلی واقع اولدی ومقام صدارته علمدار پاشا چاشنیسنده ارباب حرب وضربدن بریسی آراندیغندن ابرائیل ناظری لازاحمد اغا بومثالولرک مرحجی کورنمکه خدمت صدارت وسرداری محول عهده اشتهاری قلندی یوسف ضیاپاشا صاحب معارف وفن تاریخه واقف برذات اولدیغی حالده خالق پایه سی طلبی کبی معناسز وطبع ملوکه کران کله جکی شبهه سز اولان برشیئه تصدیسی عقله ناملایم ایسه ده پک زیاده زیب وزینته ودارات وحشمته مائل اولسنه نظراً بلکه بویه برامرنامعقوله جرأت ایتشدن چونکه صدرمشارایه اردوی هایون ايله داودپاشا صحراننده اقامت اوزره بولندیغی حالده شیخ الاسلام دری زاده عبدادافندی مکتوبیحیسنی استفسارخاطر ضمنتدم ارسال ایلدکده لوازم تکریماتی بعدالایفا خزینه دارینی چاغروب مکتوبیحی افندی اوغلمزه دائره خیائمنزی سیرایتدیردیو امرایتمکه اوطاغ وتیاق چادرلری تماشاولنورایکن بریسینک کمش آویزه سی ناقص اولدیغندن خزینه داراغا بورایه مقتضی اولان آویزه در دست اعمالدر دیدکدنصکرم لاجل التنفس خزینه دار اغانک چادرینه وارلدیغی متعاقب قیوجیحی باشی به عتاب و آل عثمان اردوسنک برهفته دنبرو تأخر عزیمته سبب اولدیغی بیان ايله آویزه نك سرعت تنظیمی تنبیه ایش اولدیغی مکتوبیحی مومی الیهک اوغلی موالییدن عزیزافندی مرحوم نقل ایدر ایدی .

یکرمی التی سنه سی محاریاتی

اول بهارک حلولیله عساکر عثمانیه فوج فوج اردوی هایونه وارد اولمقده اولدیغندن صدرجدید روسجنگ استردادینی تصمیم ایدرک ایکی یوزیکرمی التی سنه سی جمادی الاخره سنک التجی کونی شمئیدن حرکت وروسجق اوزرینه صولت ایلدی .

مسقولولرک مدافعه قصدیله کوندردکلری قوه مفروزه منهزم اولمغله وروسیه دولتیله فرانسه دولتی بینده محاربه وقوعی مرتبه تحققه وصول بولمغله مسقولولر(له) حدودینه عساکر

کلیه سوقه مجبور و بوجهتله کچن سنه طونه سوا حلتده واقع اولان ضایعات کلیه عسکریه لرینی اکاله غیر مقتدر ایدوکلرینه مبنی هجوم اسلامیانه تاب آور مقاومت اوله میوب ماه مزبورک اوزسکزنجی کونی روسجنی ترک ایلدکلرندن جیوش موحدین قلعهیه داخل اولدی .

اشبو روسجق مظفرتی اوزرینه سلسیره و دو برجه طرفلرنده بولنان مستوفرقه لرینک طرد و تنکیلی متصور ایسه ده طرف هایوندن طونه نک قارشو طرفه کچلمسی و بکرشه طوغری حرکت اولنسی امر بیورلدیغندن و دین والیسی ادریس پاشا و سیروزی اسماعیل بک قلفاته امرار اولنوب صدر اعظم دخی اون بیک قدر منتخب عسکر ایله خلال رمضانده یرکوی جانبه مرور ایلدی . روسیه لولر ایکی ساعت قدر کیرویه چکیلوب استحکام آلتنه کیردیکی مثللو صدر اعظم دخی استحکام انشاسیله مشغول اولدی . بعض ارکان دولت مادام که طونه عبور اولمشدر باری بلا توقف ایلرویه کیدیلور ایسه خصمک ضعف حالی مشهود اولسیله بلکه برایش کوریلور دیو صدر مشار الیهی تشجیع ایلدیلر ایسه ده کارکیر اولدی . رمضانک اواخرنده روسیه لولر روسجفک برقاچ ساعت آشایسندن اوچ بش بیک عسکر امرار و روسجق خارچنده بولنان تپه دلتلی زاده ولی پاشا اردوسنی باصوب تارومار ایلمکه وزیر کتخداسی غالب افندی ایله برابر قالان کتبه و خدمه واصناف مثللو درندی جمعیت بربرینی باصه رق درون قلعهیه جان آتدیلر . روسیه لولر دخی محاصره صورتنده ساحلیری احاطه ایلمکه صدر اعظم اردوسی مبتلای اضطراب اولدی . زیرا ذخایر و مهماتلری منقطع اولدقدن بشقه پک احتیاطسز کچلمش و حتی لزومی مقدار مراکب بحریه بیله استحضار قلماش ایدی . صدر مشار الیه هزار مشقته روسجفه عودت ایدوبیلوب قسم اعظمی حال محبوسیتده قالدیلر . بو اوانده ایسه فرانسه ایمپراطوری بوناپارت روسیه ممالکنه هجوم ایتک اوزره اولدیغندن روسیه لیلر عقد صلحه خواهشکر اولملریله بالمخابره وزیر کتخداسی غالب افندی مذاکره صلحیه ضمننده بکرشه کوندردی . آنجق مسقولولر عساکر اسلامیانه نک عودتنه رخصت و یرمیوب فقط ذخیره اعطا ایدرلردی بو حال ایله براز زمان ده مرور و موسم شتا حلول ایدوب چادرلرده آرام ممکن اولدیغندن مسقولولر عساکر اسلامیانه نک ساحلرینی آلوب مسافره افلاق کویلرینه تقسیم ایلدیلر .

مصالحه روسیه

بوندن اول وقوعبولان مکانه لرده مسقولولر افلاق و بغداد ممالکنی وفاش نهرینه قدر چرکستانی تماماً طلب ایده کلدکلرندن بشقه صربلولره دخی بیوک امتیازلر ایستلردی .

شمدی ایسه فرانسه لو ایله متهی' حرب اولدقلرندن هر نصل اولور ایسه دولت علیه ایله عقد صلحه مجبور ایدوکلرینه مبنی پروت نهرندن حدود قطع اولنه رق خوتین و بندروکیلی و آق کرمان و اسماعیل قلعه لرینک تمسکله اکتفا و صربلوری دولت علیه نک آغوش مرحمت و عاطفته تسلیم ایلدیلر. روش حاله باقیلنجه اکر هزیمت مزبوره واقع اولیوب دولت علیه اظهار ثبات ایده بیلسه حدود سابقه اوزره عقد صلح میسر اوله جفی امید اولنور ایدی. اولباید بکرش عهد نامه سی نامیه مشهر اولان وایکی یوز یکر می یدی سنه سی حمادی. الا آخره غره سی تاریخله مورخ بولنان صلح نامه رساله' عهدیده مندر جدر.

احوال صرب

ویانه انهرامندن صکره نمچه لولر بلغراد ونیشه قدر تجاوز واستیلا ایلدکلری هنکامده صرب رعایایسی تحصیل استقلال سوداسنه دوشوب علم افراز عصیان اولمشلر ایسه ده بیک یوز ایکی تاریخنده کوپرلی زاده صدر شهید فاضل مصطفی پاشا صربستان قلعه لرینی نمچه لولرک آبادی' تغلب لرندن تخلص و عصاة صربیه یی تازیانه شمشیر ایله تأدیب ایلشیدی. اوتوز سنه صکره بلغراد و سائر قلاع صربیه تکرار نمچه لولرک گرفتار استیلاسی اوله رق یکر می سنه قدر زیر اداره لرنده قالدقنصکره ینه جانب دولت علیه دن استرداد اواندی و صربلورک آرزولری استقلاله دسترس اولمق مرکزنده اولمسیله نمچه لولرک اداره. لرندن دخی چندان محظوظ اوله مدیلر. سالف الیان عصیان واستیلارل سببیه قرای صربستانده اولان اسلام طاغیلوب بعد ازین دخی امنیت کامله حاصل اوله مدیغندن اهالی' اسلامیه بلغراد و سمندره و بوگردلی و فتح الاسلام و اوزونجه و صوقل کبی صربستانده واقع قاعه لرده تمکن ایتمکه نوعما صربیه اراضیسی اسلامدن تخلیه اولمشیدی. بوندن صکره اجانبک القای مفاسدیه کوندن کونه فك ربه تبتعت هوای ذهلرنده تراید و تقرر ایدوب سلطنت سنیه دخی بوحاله مطلع اولمش حتی ایکی یوز ایکی سفرنده اردوی همایونک روسیه و آوستریا دولتلرندن قنغیسی اوزرینه سوق اولنوب دیکرینه سرعسکر کوندلمسی تذکر اولندیغی ائنده صربستانک ملحوظ اولان عصیان و طغیان در پیش نظر مطالعه قانه رق موکب صدر اعظمینک و دین جانبیه سوقی مقتضی کورلمشیدی. عصر سلیم خانیده روم ایلینک هرجهتی برر متغلبه النده اولدینی مثللو بلغرادده دخی قاعه یمقلرندن یعنی مستحفظ یکچیریلرندن جزایر غرب اوجاغی طرزنده زاینلر تغلب ایدرک صربیه رعایایسی حقنده انواع مظالم و تعمدیاته قویلدیلر وایکی یوز اون التی تاریخنده والی

بولتان مصطفی پاشای دخی اعدام ایلدیلر . بناءً علیه صربستان رعایای روسیه ولردن کوردکاری تشویقات و دایلدن مشاهده ایلدکاری تعدیات اوزرینه ایکی یوز اون سکر سینه سنده زروء عصیانہ عروج ایدوب قره یورکی نامنده برکنزی یعنی کوی کھیاسنی عموم قوماندانی انتخاب ایلدیلر . دایلدن بو وجهله ایشک فناالشدیغنی کوردکارنده کرک جانب دولت علیه دن و کرک بوسنه وودین جهتلردن استمداد وبلغراد الدن کیدیور دیو فریاد ایتشلر ایسه ده نظر دولته متهم اولدقلرینه وقره یورکی دخی صرب رعایای دولت علیه یه عاصی اولیوب دایلدن مظلانه طاقت کتوره مدکلردن بالضروره انلرک علیه قیام ایلش اولدقلرینی بیان ایله بوسنه وودین والیرینی اغفال اید کلدیکنه بناءً کرک جانب دولت علیه دن و کرک ولایه مزبوره طرفدن کما ینبغی معاونت و امداد اولنماغله صربستان قلاعنده بولتان اهالی اسلامیه محصور حکمنده قالدیلر . یکر می تاریخنده بلغراد محافظی سلیمان پاشایه توجیه اولنوب فقط صربستان طریقاری اهل اسلامه مسدود اولدیغندن نیچه ممالکندن مرورایله بلغرادک قارشوسنده واقع زمونه کلدی . اول آراق بوسنه والیسنک ایکی اوچ بیک آتو ایله بلغراد امدادینه کوندردیکی قوشانجه لی خلیل اغا حمله صف شکنانه ایله بلغراده واصل و بغه قلعیه داخل اولوب اهالینک اکثریسی دایلدن بزار اولدقلردن خلیل اغایه عرض مطاوعت ایلرله سلیمان پاشا دخی درحال بلغراده مرور و رئیس بغه اولان درت نفر دایی بی اعدام ایلدکن صکره قره یورکی یه خبر ارسال و سبب فتن اولان دایلدن ازاله سی جهتیه بعدازین اهالی صربییه مظهر عدالت دولت اوله جغندن ترک سلاح ایله یرلی یرینه طاغملری بیان اولدقدن ترک سلاح ایتک شویله طورسون بر درجه ده قلعده تقرب ایله دائره محاصره بی تضییق ایلدیلر . نهایت ایکی یوز یکر می بر سنه سی عید اضحی کیجه سی بغه وبلغرادلی راشد پاشا تاریخی قوانجه واروش قپوسی محافظی بولتان عزیز بک نامنده بر خانی بیک مجار التونی اعطاسیله اطماع ایدرک واروشه مستولی اولملرله قره یورکی قلعده بولتان محافظ سلیمان پاشا و قوشانجه لی خلیل اغایه خبر کوندروب دولت علیه بلغرادک محافظه سی بزه حواله ایلدی چیقوب کیتسونلر دیو تکلیف تخلیه و تسلیم ایلدی . بلغراد اوچ درت سنه دنبرو محصور حالده اولوب بوکره واروش دخی الدن کیتمش اولدیغندن بلا زاد و ذخیره درون قلعده او تور مق تحت امکانده اولدیغنه مبنی خلیل اغا کندی عسکرینی و اهالیدن بر مقدار کسان استصحاب ایدوب بر تقریب ایله نهر آ سمت سلامته واصل اولش ایسه ده محافظ پاشا و سالف الذکر عزیز بک نیشه کیتمک اوزره بلغراددن سکر اون ساعت مفارقت ایلدکلرند صربلر

باصوب جمله سنی اتلاف و اهالی قلعه حقه دخی انواع مظالم ایله قتل عام قاعد سنی اجرا ایلدیلر بو وجهله باغراد الدن کیتد کدنصکره صو قولدن ماعدا قلعه لر پاپدار اوله میوب جمله سی عصاة صربییه ید تغلبنه کجدی متعاقباً روسیه سفیری ظهور ایتمکله دولت علیه بونکله مشغول ایکن بوسنه و وودین و صوفیه طرفلرندن عسا کر کلیه تعیین اولنوب عصاة صربییه نك تأدیبله اوغراشیلوردی . صرب قومی بدویت و جفا کشلکله مألوف و بش اون سنه دنبرو کرک کنیدیلرینک ممارسه سی و کرک مسقولرک تعلیمیه قواعد حرربییه ذی وقوف اولدقلرندن پک کلیتلو تلفات و ضایعاته مبتلا اولدقلری حالده شدائد مقاتله یه تحمل ایدرک اصلا فتور کتور مدکلرینه و طاغیر باشنده تحصن ایده کلدکلرینه بناءً استیصاللری ممکن اوله مامشیدی . روسیه محاربه سی ختام پذیر اولدقدن صکره ایکی یوز یگر می یدی سنه سی رمضانده صدر اعظم لاز احمد پاشا معزول و صوفیه سر عسکری خورشید پاشا مقام صدارته موصول اولوب اردوی هایونی ادرنییه کتوردی و اغرائی استانبوله کوندردی مسقولولر حسب المصالحه صربلولره آچقدن معاونت، فعلیه ایده مامکده ایسه لرده تشجیعات و ترغیباتدن و اعمال شدت اولثامسی ایچون دولت علیه یی تعجیز اتدن خالی اولدقلرندن صرب رؤسای بکرش عهد نامه سنده مسطور اولان مساعداته قناعت ایتمیوب استقلاله قریب امتیاز طلبنه جرأت و حرکات عصیانیه یه مداومت ایلدیلر . بناءً علیه صدر مشارالیه اوچ قول عسکر ترتیبیه اوزرلرینه هجوم و راست کلدیکی فرق عصاتی تدبیر و تنکیل ایتمکله ارتق مقاومت طاققلری قالمدیغندن بالضروره استیمان و قلاع مغصوبه یی تسلیم ایله دائره اطاعته کیردیلر و سلاحلری دوشیریلوب قلعه لره وزرا و امرای و مستحقظین نصب و اقامه اولنوب صدر اعظم دخی یگر می طقوز سنه سی اوائلنده استانبوله واصل اولدی .

احوال حجازیه

جودت پاشا تاریخنده تفصیلاً بیان اولندیغی اوزره عصر عبدالحمیدخان اولده حادث اولان وهابی مذهبی جزیره العربده کوندن کونه توسع ایدوب بونلرک دفع شر و شورلری ایچون بغداد و شام و الیرینه مأموریت ویرلمش و بغداد طرفلرنده بالدفعات مقاتلات واقع اولمش ایسه ده دفع صائل صورتنه منحصر و مرکز اجتماع وهابیان اولان درعییه مواصات غیر قابل اولغله کیتدکجه اکثر قبائل مذهب مذکوره مائل ودرعییه ده مقیم اولان نجد شیخی سعودک اطاعتنه داخل اولملریله شیخ عزبور حرمین شریفینی تهدید ایتمکله باشلادی . اول اوآنده سلطنت سنییه فرانسلری مصردن چیقارمق تدارکاتیه مشغول

اولدیغندن وهابیلرک استیصاللرینه باقمه وقتی یوغیدی . بناءً علیه اواخر سلطنت سلیم خانیده وهابی طائفه سی حرمین شریفینی ضبط ایلدی . متعاقباً روسیه سفری و تجدد سلطنت وقوعیه دولتک مشغولیتی تزیاید . یدوب خصوصیه حرمین شریفینک تخلیصی مصردن اعمال قوته موقوف اولدیغی حالده سردار اکرم یوسف ضیا پاشانک مصرده یراقدیغی اون بیک قدر ارنبود وروم ایلی عسکریه کوله من طائفه سی بیتنده مقاتلات جریان ایتمکده ایدی . بمنه تعالی فصل مخصوصنده تفصیل اولنه جفی وجهله محمد علی پاشا مصر والیلکننده مستقر و کوله من بکترینک استیصالیه استقلال و اقتداره نائل اولدقدن صکره ایکی یوز یکریمی الی تاریمچنده اوغلی طوسون پاشایی عساکر کافیه ومهمات لازمه ایله ینبوعه ارسال ایدوب محاربات عدیده ایله حرمین شریفین تخلیص اولنغله یکریمی سکر سنه سی اوائلنده اولا مدینه منوره نک و مؤخرأ مکة مکرمه نک مفتاحلری والی مشار الیهک انختار اغاسی لطیف آغا و اوغلی اسماعیل پاشا واسطه لرله استانبوله واصل وعظیم آلائی ایله خرقة سعادت دائره سنه داخل اولدی . احوال حجازیه نک اصلاحی وطائفه وهابیه نک استیصالی ایچون والی مشار الیهک بالذات جانب حجازه عزیمتی امر و اراده بیورلدیغندن مشار الیه ایکی سنه قدر حرمین شریفین ده اقامت وشیش وهابیان اولان سعودک کتخداسی عثمان طامی نام شخصی بالحاربه اله کتوروب استانبوله ارسال ایلکله الای کوشکی پیشکاهنده اعدام قلندی . بعده والی مشار الیه اوغلی طوسون پاشایی بالاستصحات مصره عودت ایتسنی متعاقب طوسون پاشا مطعوناً مرتحل دار آخرت اولدیغندن منحل اولان جده والیلیکی رتبه وزارتله دیگر اوغلی ابراهیم پاشایه توجیه بیورلدی . مشار الیه برقاج سنه دها وهابیلرک تعقیب واستیصالنه اقدام وبالاخره مرکز اجتماعلری اولان درعیه بی تسخیر وسعود ایله اوغلی عبدالاهی اسیر ایدوب روضه مطهره دن اختلاس ایلدنکری مجوهراتی استرداد ایلدیکندن جمله سی آستانه علیه وارد اولدقده سعود وعونه سی قنطره سیفدن امرار ومجوهرات مذکوره بالتعمیر محل غالیسنه ارسال قلندی .

دره بکترینک استیصاللری

سلطنت سنیه نک غائله سفریه سی برطرف اولدقدن صکره بروقتدنبری اناطولی وروم ایلینک هر طرفنده حادثات اولوب دره بکی واعیان تعبیر اولنان و اوامر دولت علیه کلیمبغی انقیاد ایلیان اشخاصک رفع وازاله لرینه تشبث اولنوب بونلردن تسکلی اوغلی

وقلیونجی و طاع دویرن اوغلی و سائر معلوم الاسامی اشخاص مأمور تنکیلیری اولان وزرا و امرا معرفتلیله اعدام اولنوب سیروزلی یوسف بک و قره عثمان زاده و جبار زاده دره بکلرینک احباب قوت و سطوتندن اولملریله برابر مرکز اطاعتده قائم و سفرلرده خدمتله مسبوق اولمغله انلره تعرض اولمندی .

احوال تپه دئلی علی پاشا

یانه والیسی تپه دئلی علی پاشا ذاتاً ارنبودلق خاندانندن و احباب درایت و شجاعتن اولوب یالکز کندیسنک امارتی قرق سنهیه قریب تمتد اولمسندن ناشی یانه و یکیشهر و سلانیک و مناستر سنجاقلرنده ایکی یوزدن متجاوز جسم چفتاکلره مالک اولدیغندن ثروتی کوندن کونه متزاید و قوت و مهابتی مترقی اوله رق اولحوالیده علم افرازا استقلال اولمش و روسیه و نیجه و فرانسه سفرلرنده خدمات مبروره اظهار ایش ایدوکنه بناءً اوغلی ولی پاشایه وزارت و دیگر اوغلی مختار پاشا و صالح پاشا و حفیدی محمد پاشایه میرمیرانلق احسان اولنوب مورد والیایکی و جوارده اولان سنجاقلر مشار الیه همه توجیه اولنوردی . علی پاشانک افراد حقنده مظالم و تعدیاتی فوق الحد ایسه ده یوللر تنظیمی و زراعتک تکشیریله اولحوالی بی اعمار ایتک خصوصنده اولان اقدام و غیرتی غیر منکر اولوب حتی طوینجی نامیه سکز اون بیک قدر عساکر منتظمه ترتیب ایلدیکی حالده استانبولده یکچیریلر تعریض و شکایتله آغاز ایلدکلرندن عساکر مرقومه بی قلعه لره تقسیم ایش ایدی .

اولویه متصرفی وزیر ابراهیم پاشا که علی پاشانک بیوک اوغلی ولی پاشانک قائم بدریدر علی پاشا عادت مألوفه سی اوزره اورالرینی دخی حوضه حکومتله ادخال ایلک ایچون یکر می بش تاریخنده اهالی بی تحریک ایلله ابراهیم پاشا اوزرینه غلو ایتدیروب اعانه صورتنده بر مقدار عسکر ارسالیله ابراهیم پاشای تحلیص و یانهیه جلب و حبس ایلدی . بو کیفیت سلطان محمود خان جضرتلرینک باعث غضب و انفعالی اولوب ابراهیم پاشانک تکراریرینه اقامه سی ایچون متعدد خط هایونلر کوندرلمشیکن برطاقم 'عذار واهیه سردیله عدم مطاوعت اظهار و بالآخره روم ایلیده استخدام اولنماق اوزره پاشای مشار الیهک تخلیه سبیلی اشعار اولندقدده بونده دخی مبادلاتسزلق ابراز ایلدیکنندن تأدیب و تنکیلی لازمه ذمت سلطنت اولوب فقط مستعد فساد اولان مورد اهالیسی علی پاشانک هیبت و سطوتیله اجرای مافی الضمیره قادر اوله مدقلری معلوم اولدیغندن یک ایلرویه کیدلیوب کاد تهدید

و کاد تاطیف ایله معامله اولنوردی. اول عصرده مستشار سلطنت و مؤتمن پادشاهی اولوب
 زمام اداره ید استقلالده بولنان ناشنجی حالت افندی علی پاشانک معتاد اوزره تقدیم
 ایلدیکی مبالغ و هداییه عدم قناعتله مقطوعاً سنوی بیک کیسه طلب و علی پاشا دخی بویله
 ویرکوی معین کبی تقدیمه اعطاسندن بجانب ایلدیکندن حالت افندی مفعول اولوب علی
 پاشانک قهر و ازالهنه نصب نفس اهتمام ایلدی. وقتا که علی پاشانک کتخداسی اولان
 پاشو بک بعض اسباب ایله مشارالیهدن خوفه دوشوب فراراً استانبوله کلدی. علی پاشا
 بر ارنبود فدایسی ارسال ایدوب میرومی ایله سلطان یازید جوارنده ساکن اولدیغی
 قوناغک پنجره سنده اوطورر ایکن قورشون اتدیرمش اولدیغندن علی پاشانک دارسلطنت سینه ده
 بوجهله فدایی استخدام ایسی کندوسندن بالکلیه امنیت و اعتمادی سلب ایلدیکنه و برجه مشروح
 حالت افندی دخی شراره فساد و مروه جنبان اولدیغنه مبنی علی پاشانک تنکیلنه قرار ویرلدی اشبو
 قورشون آتلق ماده سنی بعضی حالت افندینک تصنیعاتنه حمل ایتیشلر ایه ده عقلاً ضعیف کورینور
 اول امرده علی پاشا و اوغللرینک حوزه حکومتلرینی یانیه سنجاغنه حصر والویه سائرده
 کف یدله اورالرده اولان چفتلکاتی سائر اصحاب املاک کبی اداره ایتدیرمسی امر اولوب
 علی پاشا عفو جرایم رجاسنه اغاز ایتدیکجه شدت غضبی مؤدی و رفع وزارت و امارت لریله
 تپه دلنده اقامت ایلری اراده بیورلمسینه بادی اولوب بالاخره اوتوزالتی سنه سی اوائلنده
 موره والیسی صدر اسبق خورشید پاشا سرعسکر نصب و تعیین وروم ایلی والیسی ایله جوارنده
 بولنان وزرا و امرا علی پاشا توابعاتنک رفع تسلط و استیلا لرینه مأمور بیورلدیلر بناء علی ذلک
 طرف طرف مقاتلاته بدأ و مباشرت اولمغله و علی پاشانک اوغللری ولی پاشا و مختار پاشا و صالح
 پاشا و حفیدی محمد پاشا بلا مخالفت موکب سرعسکریه دخالت ایلریله علی پاشایانیه قلعه سنده
 تحت محاصره یه آلنوب اوغللری کوتاهی و انقرده نفی اولندیلر.

ایام محاصره ممتد اولدقد مصادحتده سهولت بیان ایدنلر خوفه دوشوب علی پاشا
 خانداننک اضمحلالی کورلمدیکجه ارنبود طائفه سی عاقبت اندیشلک ایدر ولایقیله علی پاشا
 علیهنده اوله مزلدیه رک سلطان محمود خان حضرتلرینی غدر صریحه سوق ایتلریله سالف الذکر
 ولی پاشا و صالح پاشا و محمد پاشا منفالرنده اعدام اولندیلر مختار پاشا روسیه سفرنده اردوی
 هایونک مضایقه سی حالنده یتشوب غلبه اسلامیه سبب مستقل اولمغله حضر پاشا دینلورایدی
 ایکی سنه یی تجاوز ایدن مدت محاصره ده علی پاشانک متخجی اولان درت بیک قدر عسکرینک
 بک چوغنی تاف و بر مقداری دخی فرار ایتمکله ناچار علی پاشا استیما ایدوب قلعه دن چیقمش
 و خورشید پاشا سنه و قدم خدمته بناء مظهر عفو عالی اوله رق استانبولده اقامه سی

بالدفعات عرض و نیاز ایتمش اولدینگی حالده قرین مساعده پادشاهی اوله مامغله ایکی یوز
 اوتوز سگزنه سنه سنده قنطره تیغدن امرار اولندی . بعض تواریخ خصوصیه ده کورلدیکنه
 نظراً علی پاشاده مأمول اولان درجه مجوهر و نقود چیقمیوب املا کندن ماعدا قرق بیک
 کیسه یه قریب نقودی ظهور ایشدر .

روم اختلالی

موره جزیره سنده برروم حکومتی تشکیلی خیلی وقتدنبرو روسیه لولرک آرزو کرده لری
 اولدینغدن واقع اولان تشویق و ترغیبلرله سکسان ایکی سفرنده موره رعایاسی علم افراز
 عصیان اولمشلر ایشه ده محسن زاده محمد پاشانک و مؤخرأ جزایرلی حسن پاشانک سیف
 سطوتلرله تأدیب اولمشلرایدی دهاصکرملری تپه دللی علی پاشانک حاصل ایلدیکی قوت
 و اقتدار مانع تصمیما تلری اولمقده ایکن علی پاشانک قولی و قنادی قیریلوب یانیه ده تحت محاصره ده
 وضع اولمغله و موره والیسی خورشید پاشا دخی جزیره موره طوائف عسکریه سنی
 بالاستصحاب عزیمت ایشکله مسقولولرک ارادینگی وقت وروملرک منتظر اولدقلری زمان
 مساعد یوز کوستردی و علی پاشا دخی تخلص کریبان ایچون روملری عصیانه دعوت ایلدی
 بناء علیه اوتوزالتی سنه سنده افلاق و موره ده آتش فساد علوانداز اولوب اکرچه افلاق
 اختلالی دائره سنی تجاوز ایده مامش و ابرائیل و یرکوی کچی قلاع طونه ساحلنده اولدینغدن
 بیدرپی اعانه و امداد اولندینگی جهتله کیدعصا تندن مصون اولمش ایشه ده موره نك مقر ولایتی
 اولان طرابلیجه قلعه سی وسط جزیره ده و امداد و اعانه دن مأیوس و ذخیره سزلکدن بی تاب
 اولمغله درجنک اول تسلیمه مجبور اولدی یانیه ده مشغول جنک و ستیز اولان سرعسکر
 خوشید پاشانک حریمی دخی طرابلیجه ده بولمغله دائره اساوته داخل اولدقلرندن مشارالیه
 کلیتلویاره اعطاسیله تخلص ایشدر اشبوروم اختلالنده کرک استانبول بطریقخانه سنک
 و کرک طشره لرده بولنان پک چوق پاپاس و قوجه باشیلرک ذیمدخل و متفق الکلم اولدقلری
 اله کچن اوراق مزایاسندن معلوم اولمغله مظنه سوء اولان اشخاصک قتل و اعدامنده استعجال
 و طرف طرف اطهره و ساحلره وزرا و امرا و محافظین تعینیه تقویه لرینه اعتنا اولندی
 اوتوزیدی سنه سنده سرعسکر خورشید پاشا انتخابیه درامه لی محمود پاشا موره
 سرعسکری تعین اولنوب یکریمی بشیک قدر عسکر و معیتته مأمور ورزا و امرا ايله
 ازدیندن تحریک و موره دربندندن امرار اولنوب محصور بولنان انابولی قلعه سی
 پیشگاهنه نصب سرادقات سطوت اولمش و اولحوالیده بولنان اشقیا طرد و تنکیل و قلعه یه

قرق کونلك قدر ذخایر جمع و وضع اولندقدنصکره طرابلسجه نك استردادى ضمانتده سوق
 موکب عسکرى اولمنسنة تشبث قلنمش اولدینى حالده یدى بيك قدرارنبودعسکرى گذشته
 علوفه لرینى طاب ایدوب ایفاسنه چاره بولنه مامسى سبيله بغته عودت ایش اولدقلرندن
 بو کیفیت عسا کر سائر نك شاشقنلغنى مستلزم اولدى چونکه بواردونك لوازمات نقلیه
 ومهمات مقتضیه سی پک ناقص وموره خرسیتانلری عموماً ایاقده وطاغ ودره واورمانلر
 ایچلرنده مترصد فرصت اولدقلرندن مخبره طریقلری وجلب ذخایر ومهمات یوللری
 بالکلیه مسدود اولمسیله انابولی به کلورایکن چکیلان مضایقه ومشقت یوماً فیوماً مزداد
 اولدى بنابرین طرابلسجه به کیدمک شویله طورسون اناپولیده دخى اقامته
 امکان اولمديغندن افتان وحیزان عودت وکردوسه مواصلتده اناپولینک آچلقدن
 تسلیمه مجبور اولدینى استخبار اولندی وبوغموم ایله سرعسکر محمود پاشا وفات ایلدى .
 تبه دلیلى ایشی بتدکدنصکره موره اختلالی برطرف اولور امیدى بالکلیه خلاف چیقوب
 کیتدکجه آتش عصیان کسب اشتداد ایلدیکندن بوفناقلره سبب مستقل عد اولنان حالت
 افندی اوتوز سکر سنه سنده مقتول و خورشید پاشا دخى موره اردوسنک پریشانلقه
 عودتندن ناشی کندیسى تحت مسئولیتہ آنور واهمه سیله خسته نوب ایکی اوچ کون
 صکره دار آخرته موصول اولدى . بوندنصکره موره سرعسکری نصب اولنان بوسنه
 والیسی جلال یاشا موقع مأموریتنه واصل اولقسزین وفات ایدوب خلنى ابوکبود محمد
 پاشا دخى یکیشردن ایلرویه کچه مامکله روملر موره جزیره سنه کاملاً استیلا ایتدکدن
 یشقه خارجه دخى تجاوز ایدرک آتیه یی ضبط وساقزه یرایکی بيك اشقیا ارسالیله اهایلسنى
 آیاغه قالدیروب قلعه یی محاصره ایلدیلر . محافظ بولنان وحید پاشا قرق کون قدر مقام
 مدافعه ده قائم وقپودان علی پاشانک دونمای هایونله ورودی اوزرینه اشقیا بالکلیه منهزم
 اولوب قرای رعایا سرتاسر یغما اولندی . خورشید پاشا مرحوم معیتده ابراز حسن
 خدمت واطهار شجاعت ولیاقت ایتمش اولان ودین والیسی رشید محمد پاشا ایکی یوز
 قرق سنه سنده روم ایلی سرعسکری ومصر والیسی محمد علی پاشانک اوغلی ابراهیم پاشا
 موره والیسی نصب اولمغله مشار الیه ابراهیم پاشا چند سنه دنبرو مصرده ترتینه اقدام
 اولنمقده اولان عسا کر منتظمه دن اوچ آلاى عسکر ایله موره جزیره سنه داخل اولوب
 طرف طرف اشقیایى تشکیل وطرابلسجه یی تسخیر ایلدکدن صکره سرعسکر رشید پاشا
 ایله بالملاقات روملرک دارالحرکات آنخاز ایلدکلری مسلنک استحکاماتى محاصره ایلدیلر .
 قپودان دریا خسرو پاشادخى دونمای هایونله وارد اولوب روملرک بحرأ امیدوار اولدقلری

راه اغانه بی سد ایتمه که محصور بولنان التی یدی بیک قدر فدای اشقیادن پک جزو قیسی
فرار ایدم بیلوب ماعداسی قطره شمشیردن مرور و مسلنک قلعه سی ایادی اسلامیه
دخول ایلدی . قبودان مشار الیه قرق برسنه سی خلالنده مجمع سفائن اشقیا اولان سیسام
اطه سی اوروب استحکاماتی تخریبه و یوزدن متجاوز سفائن اعدای ضبطه موفق اولدی .

وقعه خیریه

عسا کر موظفه دولت علیه نك اك كزیده سی اولان یکیچریلرک نظام و انتظامی بالکلیه
مختل اولدیغی مثللو لوازمات سفریه ترتیباتی دخی محو و مندرس اولدیغندن مورد قلاعه
بش التی سنه دنبرو سوق اولنان اردولره ذخیره و مهمات یتشدریله میوب بو حال ایسه
میدانده و دشمن خارجی اولسه بیله موجب پریشانی اوله جنی درت یوز سنه دنبرو دولت
علیه نك رعیتند بولنان روم طائفه سنك متجاسر اولدقلى عصیانك رفع و ازاله سنه قدر تیاب
اوله مامسیله متین و تنظیم احوال عسکریه و سفریه یه تشبث و اعتنا اولندیغی حالده دوام
دولت تحت مخاطره ده ایدوکی آراق عقول بسیطه اصحابنك دخی کرکی کبی منظورلری اولدیغنه
مبنی اتفاق ارکان دولت ایله یکیچریلردن اشکنجی عنوانیله عسا کر منتظمه ترتیبه قرار
و یریلوب قرق برسنه سی اواخرنده تعلیم و تعلمه شروع اولمشیدی . لکن صنادید یکیچریان
بو خصوصده اظهار مضاعفت و اعطای سند ایتمشلر ایسه ده امنیت جائز اوله میه جغندن
عصیان و طغیان ایدرلر ایسه تأدیب و تربیه لرینه حاضر بولمق ایچون طویجی و خبره جی
ولعجی و ترسانه اوجاقلری رؤسای و ضابطانی ایفاظ اولندقدن بشقه روم اختلالی سببلا
قره دکر بوغازینك جانبینی محافظلری اولان آغا حسن پاشا و عزت محمد پاشانك معتلرند
بولنان ایکی اوج بیک قدر سکیانك در حال استانبوله نقلی لوازماتی دخی تهیه ایتدیرلشیدی
فی الحقیقه ظن و تخمین اولندیغی اوزره تعلیمه مباشرت اولندقدن برآی کچرکچمزفه باغیه
علم افرازشقاوت اولمق اوزره عقد اتفاق ایدرک قرق برسنه سی ذی القعدة سنك طقوزنجی
پنجشنبه کیجه سی باب عالی نی و آغا قیوسی باصوب یغما ایتمشلر ایسه ده صدر اعظم یالینده
بولمغله و یکیچری اغاسی جلال الدین اغا دخی اختفا ایتمه که تعدی اشقیادن مصون اولدیلر
صدر اعظم سلیم پاشا و مشار الیهما حسین پاشا و عزت پاشا و معزول و منصوب شیخ الاسلام
وقاضی عسکرلر و درس خواجهلری و رجال دولت سرای هایونده مجتمع اولوب سلطان
محمود خان حضر تلری دخی بشکطاشدن سرای مزبوره کذار ایلدی . عسا کر مرتبه
مذکورده فوج فوج سرای هایونه واصل اولمغله سنجاق شریف اخراج اولنوب سلطان
احمد خان جامع شریفی مرکز حرکت اتخاذا اولندی . اشقیا ات میدانده واقع قشله لرده

مجمع اولدقلرندن حسن پاشا و عزت پاشا و طوپچی باشی قره جهنم ابراهیم اغا و خبره جی باشی دده اغا کندولرینه منسوب عسکر و ایکی قطعه طوپ ایله اعزام اولدیلر. فئه باغیه میدان قبولرینی سد ایله تحصن ایتک ایسته مشلر ایسه ده طوپ صدمه سیله قپو قیریلوب برقاق نوبت صالحم انداخت اولنه رق بر مقدار اشقیا عازم داربوار اولسنی متعاقب پراکنده و پریشان اولدیلر. قشله لر دخی درحال یاغلو پاچاوره ایله احراق اولندی. یکچیجری اوجاغنک بقا و یاخود الغاسی بین الارکان تذکر اولندقدن فیما بعد بولردن حسن خدمت مأمول و امنیت جائز اولماغله برغله واقع اولمشیکن اضاعه فرصت اولنماسنی رئیس الکتاب سیدا افندی و سائر اصدقا ایراد و اتیان ایملکه و اراده سنیه پادشاهی دخی بومرکزده متعلق اولغله یکچیجری اوجاغنک کلیاً الغا اولندیغی ممالک محروسه یه اعلان و یکچیجری ضابطان و نفرا تندن اسائت سابقه لری معلوم اولان بیکدن متجاوز اشقیا کرک درسمعادته و کرک متفالرنده اعدام اولنوب اهون شر اولانلرینک نفی و تبعیدیه اکتفا قلندی.

بشیوز سنه دن زیاده تمتد و وقوعات جسنیمه یه مظهریتله اس اساسی مشد اولان یکچیجری اوجاغنک بویه اوچ بش ساعت ایچنده محو و نابود اولیورمسی نفرت عامه یه مبتلا اولملرندن و بو دخی نظامات موضوعه لرینک بالکلیه محو و مندرس اولمسندن نشأت ایلمشدر. بمنه تعالی تفصیلاتی تکمله ده ایراد اولنه جق ایسه ده یالکز فقره آتیه نک بیانه شروع اولندی. مومی الیه دده اغا که اللی اوچ تاریخنده فریقلو رتبه سیله قرانته ناظری نصب اولنوب مأموریتنه نسبتله حفظی پاشا نامی ویرلمشدر. مشار الیه شویله سویلر ایدیکه واقعا یکچیجریلرک ملحوظ اولان طغیانلرنده نه وجهله حرکت اولنه جغی اولجه مصمم بولمش و طوپچی و خبره جی اوجاقلری ضابطانندن بر درجه یه قدر امنیت النمش ایسه ده تمامیه اطمئنان حاصل اوله مامشیدی. وقعه نک ظهورنده درحال خاصکویده اولان خبره جی قشله سنه کیتدم قشله قپوسنده ضابطان و نفرا تک مجمع و بکا مترقب اولدقلرینی کورمکه بعض مرتبه خوف و تلاشه دوشدم لکن ای اغالر وقعه معلومکر اولمشدر. نه ییاجتسکر دیدیکمده جمله سی یکزبان اوله رق سلطان سلیم خان مرحوم بزم اوجاغمزک تنظیمه پک چوق همت ایلمش و حقمزده احسانلر ایتمشیکن هر نصاسه اووقعه ده یکچیجریلره اتباعمزدن ناشی متهم اولدیغمزدن بولکه نک اوزرمزدن ازاله سی ایچسون بر خدمت ابرازینه منتظر ایدک بناء علیه شمدی اراده دولته جان و باش فدا ایتکه حاضرز دیدیلر بن دخی او یله ایسه بیورک کیده لم دیدیکمده کمال سرعتله قایقلره بنبوب و ارقم صره یالی کوشکنه کلوب جانسپارانه خدمت ایلدیلر دیو توضیح افکار ایدر ایدی. سائر اوجاقلر و علما و اهالینک دخی عموماً متفر بولملری ایشک بویه سهولته بتمسنی موجب اولمشدر.

ظهور سفر روسیه

بالا بد مسطور اولدیغی اوزره مورد جزیره سیله حوالی سنده بریونان حکومتی تشکیلی روسیه لولرک نصب نفس اهتم ایتدکری شی اولوب بو خصوصده انکلتزه و فرانسه دولترینک موافقتلرینی دخی قزانش اولدقنلرندن دول مشار الیم طرفندن اچقه و مهمات و کولکلو ضابطان و نفرات اعطاسیله فسدّه روم اقدار اولمغله برابر مورد رعایاسته امتیاز اعطا اولمسنی هر بار تکلیف ایتدکه ایدیلر اولجه مسلنک و مؤخرأ رشید محمد پاشانک سیف سطوته آتیه دخی فتح اولنوب اشقیای روم کرکی کبی تضییق اولمش و بوحالدن برمدت دها دوام ایدر ایسه بالکلیه مقاومت اقدارندن ساقط اوله جقلری میدانه چیقمش اولسیله دول مشار الیم سفراسی تکلیفات سابقه لرینی آشدیدا بدوب مقدماموره قلاعی اهل اسلام انده بولنق اوزره امتیاز طلب ایدرلر ایکن شمدی مورد و حوالی سنک بالکلیه اهل اسلامدن تخلیه سنی وبر ویرکوی مقطوع ویرمک شرطیه اداره داخله لرینک کندولرینه ترکی طلب و موافقت اولندیغی حالده ترک سفارت ایدم جکلرینی قطعاً بیان ایتدیلر طرف هایوندن دخی مورد اهالیسی سلطنت سینه نک تبعه قدیمه سندن اولوب تأدیب و تربیه لری متختم ذمت حکومت اولمغله اجانبک مداخله یه حقلری اوله میه جفی و بو باده هر درلو حادثاتک اختیارقلنه جفی صورت متجددانه ده افاده و بیان اولندیغندن سفرای مومی الیم قرق اوچ سنه سی اوائلنده استانبولدن افتراق وانکلتزه و فرانسه و روسیه لونک مورد ساحلر نده طولاشمقده اولان سفن مجتمعه لری بغته هجوم ایله ناوارین لیمانده لنکر انداز اولان دوختای هایونی اغراق و احراق ایلدیلر بوجه تله مورد مصاحفی فنا لشمش و تکالیف مزبورده نک عدم قبولی حائده روسیه لولرک اعلان حرب ایدم جکلری مرتبه وضوحه رسیده اولمش ایسه ده طرف سلطنت سینه دن طونه ساحلرینه و مورد جهتلرینه عسا کر و مهمات ارسالله ابراز متانت و صلابت اولندیغنه مبنی ایکی یوز قرق اوچ سنه سی شوالنده روسیه عسکری مفصل حدود اولان پروت نهرینی مزور ایله حرکات خصمانه یه مباشرت ایلدی .

اغا حسین پاشا طونه سر عسکری و قودان دویا عزت پاشا وارنه محافظی تعیین وارسال و طرف طرف مدافعه تشبثاته ابتدار اولنوب انجق دولت علیه عسا کر منظمه ترتینه اشتغال ایدم لی ایکی سنه یه وارمق سزین روسیه سفری کبی برابر کران آتیه کیرمش و دوختای هایون ناوارین وقعه سنده تلف اولق حسیله موجود اولان و یکیدن تدارک قنار بش اون قطع سفن حربه قرد کزک محافظه سنه غیر کافی بولنش اولدیغندن روسیه لولر

طو لچی و ایساقی و ابرائیل قلعه لرینی ضبط و استیلا و وارنه یی برآ و بحرآ تضییق ایلدک لری خبر لری وارد اولدقده اول و وارنه یی تخلیص و بعده طونه ساحل لرینه عزیمت ایتمک اوزره صدر اعظم سلیم پاشا سکر اون بیک قدر عسکر ایله قرق درت سنه سی اواسط صفر نده اعزام اولنوب ذات پادشاهی دخی داود پاشایه خروج و اوراده بولنان رامی قشله سنی مرکز موکب هایون اتخاذا یتدیلر اوچ آی قدر محصور یتدن صکره وارنه قلعه سی گرفتار دست اعدا اولغله محافظی بولنان عزت محمد پاشا صدر اعظمه اسناد قصور و رخاوتی متضمن خاکبای هایونه عریضه لر تقدیم ایلسنه و صدر مشارالیه ک دخی وارنه نک تخلیصنه موفق اوله مامسنه مبنی عزل اولنوب مشارالیه عزت پاشا صدر اعظم نصب اولندی غرائب ندرکه سلیم پاشا موکب صدارتده عزت پاشانی کوز حبسنه وضع ایدوب ترتیب مجازات شدیدیه عزمنده ایکن کندوسنه خلف اولمش و سلیم پاشانک کافه اموال و اشیاسی و حتی ادرنه ده برصرافه براق دینی تحقیق کرده عالی اولان بشیوز کینسه لک نقودی دخی عزت پاشایه احسان اولمشدر .

دول ثلثه دونمالری موره یی ابلوکه تحتنه آلمرلیله موره سر عسکری ابراهیم پاشا بعد ازین اوراده عسکرینک ذخایر و مهماتی تدارکده عاجز اولدیغندن و بروقتدنبرو بدری محمد علی پاشا مشارالیه ابراهیم پاشانی مصره جلب ایلمک استدعاسنده بولندیغندن هر قدر مساعدت سینه ارزان بیورلماش ايسه ده بالضروره عسکرینی مستصحباً مشارالیه ابراهیم پاشا مصره عودت و در حال موره یی بر مقدار فرانسه عسکری چیقوب ید اسلامده بولنان برقاق قلعه یی ضبط ایلدک لری خبری وارد اولدی فرانسه و انکلتزه دولتلری روسیه لو ایله متفقاً دونمای هایونی یا قش و علناً روملره اعانه ایتمکده بولنش ايسه لرده رسماً سلطنت سینه یه اعلان حرب ایتمدکلرندن مقتضای وقت و حال الجاسیله استانبولدن مفارقت ایدن ایلچیلری دعوت اولندیغندن قرق درت سنه سی او اخرنده وارد اولدیلر و حقلرنده تکریمات فوق العاده اجرا اولنه رقی نه موره مصالحتی مذاکراتنه مباشرت قلندی موسم شتانک تقریبی و وارنه نک الدن چیقمی سبیلرله صدر جدید موکب صدارتی شمنی مشتاسنه ایصال ایلسیله برابر فحشیاته انهماکی و خلاف رضای عالی بعض حرکاتی شیوعنه و ایفای خدمته مقتدر اوله میه جفی تحقق ایلدیکنه مبنی قرق درت سنه سی رجبنده معزول و موره محاربه لرنده ابراز شجاعت و تحصیل شهرت ایدن رشید محمد پاشا مقام صدارته موصول اولدی . مستقولونک قفقاسیه اردوسی انابه و صخوم و اخسقه و قارص قلعه لرینه استیلا ایتدکدن صکره ار ضرورم اوزرینه یوریمکده اولدیغندن و ار ضرورم و ایلسی

و شرق سرعسکری اولان صدر اسبق غالب پاشا مدافعه نك امكانسز لغندن بخله عقد مصالحه نك لزومنی عرض ایلش ایدو کندن بو کیفیت فتور ورخاوتنه حمل اولنه رق عزل اولنوب اکیللی صالح پاشا شرق سرعسکری نصب اولندی . قرق درت سنه سی بوفلا کترلله مرور و قرق بش سنه سی موسم حربی حلول ایلدکده تکرار مقاتلاته مباشرت اولنوب بعض محالرده اوفق تفک مظفریتلر ظهور ایتش ايسه ده دشمن برقاج آیدنبرو تضیق ایلدکده اولدینی سلسیره قلعه سنه استیلا و شمئیده اردوی هایونی محاصره ایلدی . شمئینک استحکامات موقعیه سی و ایچنده اوتوز بیك قدر عسکر بولمنسی جهتلریله ضبط و تسخیری ناقابل اولدینی مسقولرک معلومی اولدقده شمئینی تحت محاصره ده طوتوب دیگر براردویی ادرنه یه طوغری سوق ایللریله بالقانده و قزانلقده مدافعه سنه چالیشلدینی حالده موفق اولنمدیغندن و ادرنه شهری استحکاماتدن خالی ایدو کندن قرق بش سنه سی صفرینک اواخرنده اول پای تخت قدیم کرفتار دست اعدا و متعاقباً ارضرومک استیلا سی خبری دخی هویدا اولدی بناءً علیه هر نه صورته اولورسه اولسون مصالحه دن بشقه چاره قالمدیغندن دفتر دار صادق افندی و موالیدن امین بك زاده عبدالقادر بك و آمدجی کوسه عا کف افندی مرخص تعین و ادرنه یه اعزام اولنغله قرق بش سنه سی ربیع الاولی واسطنده شروط آتیه ايله عقد صالح قلندی .

ادرنه معاهده سی نامیله مشهور اولان اشبو معاهده حکمنجه مورد حکومتی تصدیق اولندقدن بشقه کاملاً چرکستان و آخسقه قلعه لری روسیه لویه و افلاق اراضیسنده بولان قلاع هدم اولنه رق امارته ترك قلنش و مملکتینک و صربیه نك امتیازاتی تزئید و احکام والی ناحیه علاوه سیله صربیه حدودی توسیع اولنمشدر تجارت تضمیناتی اوله رق برحق و سفرتضمینی اولنه رق اون میلیون مجار التونی ویرمک دخی جمله شرائطدن اولدینی حالده مؤخرأ روسیه ایمپراطوری کمال فتوتندن اوچ ملیونی عفو ایلمشدر .

سلطنت سنیه موردیه امتیاز ویرمامک سوداسیله بوقدر مال و جان اضاعه ایلدکدن صکره هم موردنک قراللق وجهله تصدیقنه و عهده ضایعات مذکورده نك اختیارینه مجبور اولدی اولوقتک اصحاب نفوذندن و سفر طرفولرندن پرتو پاشا برلایحه سننده اگرچه مسقولویه غلبه امید اولنمز لیکن بلا محاربه مورد قراللقی قبول اولنورایسه یول اولور وپك چوق محالره سرایت ایدر بناءً علیه و سعمزی صرف ایتدکدن صکره بالجبوریه اختیار ایلر ايسه ك دشمن هر وقت بوقدر تکلف التزام ایلز دیمشدر .

بونک محاکمه سی اوزون مقالاته محتاج ايسه ده طقسان اوچ سنه سننده بوقضیه نك عینی

مع زیاده بزم دخی باشمزد کلدیکندن بویه شیر حکم زمانک اقتضاسنه تابع اولدیغنی اعتراف ایتک ضروریدر .

احوال بغداد

فصل سابقده ذکر اولدیغنی اوزرد بغداد ایالتی یوز سنهیه قریب زماندنبرو کوله منلر النده اولوب بونلر طرف دولت علیه اطاعت ابراز ایدرلر سده دولتک حکمی کینبغنی جریان ایتمز ایدی . ایکی یوزیکرمی التی تاریخنده مشهور حالت افندی بغدادک مختصات سنویه سی اولان ایکی بیک کیسه یی تزیدد ایتدیرمک وبقایانی تحصیل ایلک مأموریتیه اعزام اولنوب اولوقت والی بولنان سلیمان پاشا بورلرد یناشمدیغندن حالت افندی موصله عودت و حائر اولدیغنی استقلال ویدنده بولنان فرمانلر موجبجه بابان پاشالریغنی وموصل والیسنی معیتنه بالاستصحاب بغداده رجعت وبالحاجره سلیمان پاشانک قتلیهینه کوله منلردن عباده اغانی مع الوزاره والی نصب ایش و مؤخرأ بیوک سلیمان پاشانک اوغلی سعید پاشا مقام ولایت انتخاب قلنمش ایسهده سوء اداره سی جهتیه پدرینک کوله لرندن داود افندی تغلب ایلدیکندن ایالت بغداد مشارالیه داود افندی یه بارتبه وزارت توجیه ببورلمشیدی بو ذات فضلاذن واصحاب لیاقت واقتداردن اولدیغندن تزیدد قوت ومکنته موفق اولوب حتی اوتوز طقوز تاریخنده ایرانلو ایله دولت علیه بیننه شقاق طاری اولمغله ایرانلولرک شهزاده عباس میرزا ومحمد علی میرزا معیتلریله ارضروم وبغداد طرفلرینه سوق ایلدیکی ایکی اردونک برنجیسی شرق سرعسکری نصب اولنان جبارزاده جلال الدین پاشا عسکرینی پریشان ایلدیکی حالده ایکنجیسنی مشارالیه داود پاشا منهزم ایش اولدیغندن تجدید معاهده خصوصنده منافع کلیه سی مشاهده اولنمشیدی سلطنت سنیه عسا کر منتظمه ترتیبندن وموره وروسیه سفولرینک متابعدنناشی مصارف کلیه یه مبتلا اولوب اگرچه بغدادده دخی عسا کر نظامیه تشکیل قلنمش ایسهده مختصات سنویه نک تزیددینه بغداد خزینه سنک تحملی آشکار ایدوکندن مختصات قدیمه یی اون ایکی بیک کیسه یه ابلاغ ایتدیرمک مأموریتیه دفترده سابق صادق افندی قرق ایش سنه سنده بغداد اعزام قلندی صادق افندی نک احوال محلیه یه لایقیله کسب وقوف ایتمکسزین بغداد والیلکنی داود پاشانک دائره سی متخیرانندن بعضیلرینه وعدا یلسی کندوسنک سبب اتلافی اولدیغنی خبری طرف دولت علیه منعکس اولدقد بغداد ایالتی حلب والیسی لازعلی پاشایه توجیه ومعیتنه عسا کر نظامیه وتجارلو سواریسندن مقدار کافی عسکر ترتیب وترقیق اولنه رق ارسال اولمغله وبواوانده بغداد

وحوالیه‌سند شدتلو بر طاعون ظهور ایدرک داود پاشانک قوت و مکنتنی اضاعه ایتمکه طقسان کون محاصره‌دن صکره بغداد قلعه‌سی فتح و داود پاشا در دست اولنوب استانبوله کوندرلدی و کوله‌من طائفه‌سندن اکثریسی کرک اننای محاربه‌ده و کرک بعدالفتح مقتول اولدیغندن کوله‌من اوجاغی بالسکلیه منطفی اولدی داود پاشانک علم و فضلنه حرمة و تیه‌دللی علی پاشانک قتلی امثالی مثللو وزرانک و باخصوص مصر و الیسی محمد علی پاشانک موجب توحشی اولدیغنه بناءً اعدامنه تصدی اولنموب استانبوله اقامه اولمش و مؤخرأً بعض مناصبه بولندقدنصکره شیخ الحرم ایکن ارتحال داربقا ایشدر .

احوال اشقودره‌لی مصطفی پاشا

اباًعن جد اشقودره والیسی بولنان مصطفی پاشا هنگام سفرده‌ودین سرعسکری نصب اولنوب مسقولونک ادرنه‌یه تخطیسی اوانده معیتده بولنان اون‌بش یکریمی بیک قدر ارنبود عسکریله فلبیه جلب اولنه‌رق بر درجه‌یه قدر مصالحه‌ده حسن تأثیری کورلمشیدی بعدالمصالحه روم ایلی ایالتی صدراعظم رشیدپاشا عهدده‌سنددابقا وارنبودلغک اصلاحنه مأمور بیورملغله صدر مشارالیه‌یه مصطفی پاشا بنینه شقاق مستولی اولدیغندن قرقیدی سنه‌سندده مشارالیه مصطفی پاشا صورت ظاهرده رشیدپاشا عاینه و حقیقتده دولت علیه اوزرینه علم افراز طغیان اولوب بوسنه وارنبودلق طرفلرنده بولنان امرای تحریک ایله صوفیه‌یه قدر تحت حکمنه آلمشیکن صدر مشارالیه عساکر نظامیه ایله پرله‌ده مدافعه و منهزم ایتمکه اشقودره قلعه‌سندده تحصن ایلدی و برمدت محصوریت حالده بولندقدنصکره نفسی تسلیمه مجبور اولدی . بودخی اصحاب علم و معرفتدن اولوب عینیه داودپاشا کی مظهر عفوهایون اولمش وعصر عبدالحمید خانیده مناصب عدیده‌ده بولنه‌رق شیخ الحرم ایکن وفات ایشدر .

غرب اوجاقلری و فرانسه‌لونک جزایره استیلاسی

فصل سابقده مسطور اولدیغی اوزره غرب اوجاقلری اوروپا دولتریه حرب وصاحبه مأذون اولوب توارنخ مختلفه‌ده اوروپالولر جانبندن یالکیز جزایر غرب اوزرینه اونیدی دفعه هجوم واقع اولمشیکن ضبطنه مقتدر اوله مدقلرینه مبنی سفن تجاریه‌لرینک تأمین مقصدیه بر مقدار بدل مقطوع اعطا ایدرک صالح اولورلر ایدیکه بونا پاره‌کی بر جهانگیر بیله بوجهنله عقد مصالحه ایشدر . حتی مورخ واصف افندی سفارتنامه‌سندده یازارکه ایاجیلکله اسپانیاده بولندیغم اوانده جزایر لولر کلیتلو مبالغ و هدایا اخذ ایدرک اسپانیالولر ایله عقد صالح ایش اولملریله جزایر ضابطانندن بر قایق دای ایله مادرید شهرنده ملاقات وسرک مدار تعیشکن

اسپانیا سفائن و ساحل لرینی غارتہ منحصر ایکن نصل صلحہ راضی اولدیکز دیوسؤال
ایلدیکمده بوصلحک غایتی انجق ایکی سنہ تمتد اوله بیلر و بوکره الیغمز مبالغ و هدایا
اغتنام ایدہ جکمز اموال دن زیاده در دیو جواب و یردک لرینی بیان و صلح لرینک
مبنی علیہنی و ماہیتی ایضاح ایشدر . اشبو جزایر مجاہد لرینک محاربات بحریہ دہ اولان
ورزش و الفت لری و نائل اولدق لری غلبہ و مظفریت لری حیرتدہ عقول اوله جق درجہ دہ
ایدی لکن اوروپادہ صنایع حربیہ و اسلحہ ناریہ ترقی ایتدکچہ اولکی کبی دشمن کملرینہ
چاتوب رانہ ایلک قابل اوله مدیغدن بازوی ہمت لرینہ فتور ککشیدی جزایر بکلر بکیسی
حسین پاشا احوال عالم دن بی خبر بر جاہل جسور و ادخار ایلدیکی نقود و فیردیہ مغرور اولمغله
فرانسہ تجار سفائن دن ضبط و تسخیر اولنان کملری و درونلرندہ بولنان مال و ملاحلری
فرانسہ دولتی طابہ آغاز ایلدکدہ رد و تسلیم ایتدکدن بشقہ فرانسہ قونسلوسی حقندہ
معاملہ باردہ دخی اجرا ایش اولدیغدن اول امردہ فرانسہ دولتی جانب سلطنت سنیہ یہ
عرض شکایت ایشکلہ طرف دوات علیہ دن جزایر والی و امراسنہ خطاباً اصدار اولنان
فرمان عالی مأمور مخصوص واسطہ سیلہ تسیار و مطلوبات مذکورہ نک اعادہ و تسلیمیلہ برابر
ترضیہ و یرلمسی دخی امر و تذکار اولنمشیکن والی مشار الیہک حق و بلاہتی و امرا
وارکاننک بوبادہ مشارکتی اندفاع مضرتی حاصل ایدہ مدی مرویدرکہ والی مشار الیہ
طرف دولت دن کیدن مأمورہ قلعه نک متانت و رصانتی و طول لرینک جسامت وجہ خانہ سنک
کثرتی و نقود مدخرہ نک و فرتنی تماشا ایتدیروب بوقدر قوت و قدرت لہ فرانسہ لویہ نصل
سرفرو ایلہ یم دیدکدہ مأمور مومی الیہ بوالتونلر بوجہ خاہنی طوللرہ وضع ایدوب
آتہ مز دیو جواب و یرمش ایسہ دہ والی غافل بوالتونلر بندہ اولدچہ آدم تدارکنندہ
زحمت چکلمز دیہرک رأی و قرارندہ اصرار ایشدر . بناء علیہ بر فیلو فرانسہ دونمائی
ایکی سنہ قدر جزایر لیمانی آبلوقہ ایلہ تضیق ایتدکدن صکرہ قرق یدی سنہ سی واسطندہ
برفرقہ فرانسہ عسکری طولون ترسانہ سندن حرکت و خارج لیماندہ قرہ یہ خروج ایدوب
جزایر قلعه سنی تحت محاصرہ یہ آلدی درون قلعه دہ آنجق دوت بیک قدر ترک عسکری
بولنوب پاشانک امیدوار اولدیغی عربان دخی امدادہ شتابان اولمغله بش اوز کون ظرفندہ
امکان مقاومت بالکلیہ مندرس اولدیغدن حسین پاشا کندوسنک و امرانک اموال ذتیہ لر یلہ
چیقم لرینی مقاولہ ایدرک اموال و فیرہ حکومتی و دارالچاہدہ اولان جزایر قلعه سنی
فرانسزلرہ تسلیم ایتدی و بودہ بویلہ کیتدی . مؤخرآ قلعه مرقومہ نک ردی جانب
سلطنت سنیہ دن فرانسہ دولتنہ تکلیف اولنمش و بعض مرتبہ وعد دخی آنمش ایسہ دہ

علت فرنگی کی التیام پذیر اوله مدی جزایر ملحقانندن قسطنطنیه قلعه سنی مرکز اتخاذ ایدینان مشایخ عربانندن شیخ عبدالقادر اون بش سنه قدر فرانسزلر ایله اوغراشمش ایسه ده بودخی بالاخره نیل مقصددن مایوس اولغله فرانسه لویه دخالت وانلرك التماسیله شام شریفه رحلت ایدوب اوراده عازم دارعقبا اولمشدر .

قره مانلی خاندانندن طرابلس غرب بککر بکیسی اولان یوسف پاشا فوت اولدقده بیوک اوغلی علی پاشا مقام امارته صاعد اولوب جانب دولت علیه دن دخی تصدیق اولمش اولدیغی حالده برادرلری عصیان قیام و طرابلسی محاصره دیه اقدام ایلر یله علی پاشا طرف دولتدن استمداد ایش اولسنه مبنی الی ایکی سنه سنده برقاچ قطعه سفن حربیه ایله سکنر طابور عسکر فریق نجیب پاشایه ترفیقاً ارسال قلمشیدی . وصول لر نده علی پاشا قلعه قبولریخی آچوب عسکری ایچرویه آلمسی عقبنده تجیب پاشا کندو والیلکنی اعلان و علی پاشانی بالمله عیال و توابعیله استانبوله اعزام ایلدی بوجهتله طرابلس ایالتی طوغریدن طوغرویه حکومت سلطنت سنیه یه کیرمش و علی پاشانک قرنداشلری مندرس اولمش ایسه ده عربانک اطاعته آلملری ضمانتده قبودان دریا ظاهر پاشا کوندریلوب برقاچ سنه حرکات عسکریه قمرادی اولمشدر . علی پاشا حقنده الطاف سنیه ارزان بیوریلوب اون بیک غروش شهریه تعیین وقوناق تخصیصیه توقیر اولندی لکن بو کیفیت تونس حکومتک طرف دوانندن توحشنه بادی اولغله نه نتیجه نی انتاج ایلدیکی بمنه الکریم محمده توضیح اولنه بقدر .

احوال مصریه

عصر سیم خان ثاشده قبودان دریا اولان کوچک حسین پاشا فرانسزلرک ید غصبندن مصری تخلص ایلک اوزره دونمای هایون ایله مأمور اولدقده کندوسنه منتسب بولنان قواله چور باجیسی حسین اغایه مکتوب کوندروب بر مقتدر ضابط ایله برایکی یوز کزیده عسکر طلب ایش اولدیغندن حسین اغا دخی یکنی محمد علی اغای اتخاب و معیتنه ترتیب ایتدیکی عسکر ایله ارسال ایتکله حسین پاشا بونلری دونمای هایونه بالارکاب صوب مأموریته عزیمت ایتشدی . بعد الفتح آرنبودلقدن وروم ایلینک سائر جهتلرندن کیدن طوائف عسکریه نك اکثریسی اوراده قالدقلری مثللو محمد علی اغا دخی قالمش و کندوسی امی ایسه ده درایت و شجاعتله متصف و حکمت حکومته واقف تهیدینی ایقاعه قادر بر ضابط متبصر اوفق حسابیه سرچشمه لک یعنی بالمله باشی بوزوق عسکری سرکرده لرینک رئیسی مقامنه قائم اولمشدر .

سردار اکرمک عودتند مصر والیسی نصب اولتان خسرو پاشا عساکر نظامیه ترتیبی وقشه بناسیله مشغول اولوب باشی بوزوق عسکرندن مصری تخلیه مقصدیله بعض سرکرده لره رخصت ویرمش ایسه ده گذشته علوفه لرینی اعطایه مقتدر اوله مدیغندن باشی بوزوق طاقمی عصیان قیام ودفتردار جانی افندی نی اعدام ایتدکلرندن ماعدا خسرو پاشایی دخی فراره اجبار ایملریله میرمیراندن ارنبود طاهر پاشا قائممقاملغه انتخاب وجانب سلطنت سینه دن والی کوندرلمسی عرض محضر ایله استدعا اولندی .

قپودان سیدی علی پاشانک برادری جزایرلی علی پاشا مقدما خیلی وقت مصرده اقامت ایدرک احوال مملکته کسب وقوف ایلدیکنه وبو اوانده استانبولده بولندیغنه مبنی والی نصب وبجراً ارسال قلوب آنجق حجازه مأموراً مصره وارد اولان یکیکچریلر علوفه طلبیله طاهر پاشایی قتل ایش وکوله من بکری دخی علی پاشادن سوء قصد توهمیله مصره تقربنده تلف ایتدیرمش اولدقلرندن مصر والیایکی خورشیدپاشایه توجیه بیورلدی ومکمل دائره سی خلقیله قاهرده داخل اولدی ذکر اولتان وقعه لر بتون محمدعلی اغانک تصنیعاتی آثارندن اولدیغی متین اولمغه قولایلقله مصر دن چیقارلمسی ضمننده خورشیدپاشانک انهایسی اوزرینه جده والیایکی رتبه وزارتله محمدعلی اغایه توجیه قلندی ایسه ده مشارالیه محمدعلی پاشانک معیتنده بولتان عسکری طائفه سی ینه عصیان آغاز وخورشید پاشایی قلعه ده محاصره ایلدکلری خبری در دولته واصل اولمغین قرنا ی شهریاریدن صالح بک ارسال وقغنی طرف قوتلو ایسه اکا ویرلمک اوزره برقطعه ابقا وبرقطعه توجیه فرمانی اصدار وتسیار اولندی . محمدعلی پاشا هدایای کلیه اعطاسیله میرمومی الیهی جاب ایسکه مصرک محمدعلی پاشایه توجیهی متضمن اولان فرمان ابراز اولندیغندن ایکی یوز اون طقوز تارینخنده ولایت مصر محمدعلی پاشا عهده سنده تقرر ایلدی .

محمدعلی پاشاشمدی یه قدر کوله من بکلریله خوش چکینوب اقتضا ایتدکجه والیلرعلیه ند آئلری دخی استعمال ایدر ایلدی . زمام اداره ید اقتدارینه کچد کدنصکره بالطبع کوله منلرک رقیب حکومت اولملری حقنده اولان مضمیرینی اظهار وبعضلرینی قوله آله رق دیگرلرینی اوروب ازمکه شروع ایلدی . محمدعلی پاشانک کیدیشی و مصری تحصیل ایدیشی سلطنت سینه نک نظر دقتنی جاب ایسکه ایکی یوز یکرمی برسنه سنده ایالت مصر موسی پاشایه واندن منحل اولان سلانیک وقواله سنجاقلری محمدعلی پاشایه توجیه اولوب موسی پاشا قپودان قدری پاشایه ترفیقاً ودونمای هایونه ارکاباً اسکندریه یه کوندرلدی . محمدعلی پاشا اسباب مدافعه نک استحضارینه مسارعتله برابر کندوسنک ابقاسنی متضمن مصر علمانی واشرافی

طرفین تنظیم ایتدیردیکی عرض محضرلری قبودان پاشایه واستانبوله تقدیم وکلیتو مبالغ
وهدا یا دخی تسیار ایسکه موسی پاشا سلائیکه ارجاع و محمدعلی پاشانک بیوک اوغلی ابراهیم
بک که مشهور ابراهیم پاشا در رهن صورتیله استانبوله اقامت ایتمک شرطیله ایالت مصر
محمدعلی پاشا عهده سنده ابقا قلندی . بوخصوص حقنده ارکان دولتک مذاکراتی متضمن
اولان مضبطه خزینة اوراقده محفوظ اولمغله منظور فقیر اولمشر ایکی یوز یکر می ایکی
سنه سنده انکلتزه دو نمانسی استانبول لیمانه ولوج و بش اون کون ظرفنده خروج ایتدکدن
سکره اسکندریه یه عزیمت و سکرز اون بیک قدر عسا کر بریه اخراجیله اسکندریه
ورشیدی ضبط ایتدیکی زمانده محمدعلی پاشا کوله من بکلریله محاربه اوزره بولمغله در حال
کوله منلر ایله باویشوب بالاتفاق انکلیزلر اوزرینه هجوم ایلدیلر

وقوعبولان مقاتلاتده انکلیزلرک بک چوغی مقتول و برمقداری دخی مرکز دو کسکه
مجبور اولمغله دو نمانلری رجعت قهقری یه مبتلا اولدی و محمدعلی پاشا تشریفات پادشاهی ایله
تاضیف بیورلدی بوند نصکره بر طرفدن مأمور اولدینی حجاز سفری تدارکاتنه اقدام و بر جانبدن
دخی کوله من بکلرینک تنکیانه نصب نفس اهتمام ایدوب کوله منلری مغلوب و اقطار مصریه
حاصلات و اداره سنه مداخله لرینی قطع ایتدکجه حکومتک وقع و نفوذی و واردات و اقتداری
ترقی ایتسکده ایدی نهایت حجازه اردو چیقاراجنی کون آلایده بولمق اوزره مصرده
موجود اولان کوله من بکلرینی قلعه یه دعوت و ترتیب ایتدیکی عسکری بغته اوزرلرینه
هجوم ایتدیروب بر آنده بر قاچ یوز امرا و کاشف اتلاف ایتدیردیکی مثلوا اطراف و نواحیده
بولنانلرک دخی اکثری اله کیریلوب قتل و اعدام و برمقداری افریقا چوللرینه و طرابلس
طرفلرینه فراره اجبار اولندی و کوله من اوجاغی بالکلیه سوندی و بو دفعه ده بیکدن
متجاوز بهادران چرا کسه محو و نابود اولدی یوقاروده بیان اولدینی وجهله حرمین
شریفینی وهابی طائفه سندن تخلیصه موفق اولسی بین الاسلام موجب توافرشان و شهرتی
اولمغله برابر مصرک زراعت و عمارتی تزیید و باخصوص نهر نیلدن اسکندریه یه آجدینی
جدول که محمودیه نامیله مشهوردر اقطار مصریه نک فوق العاده ثروت و ترقیسنی استلزام
ایلدیکندن محمدعلی پاشانک موفقیتلری دللرده داستان اولمغه باشلادی صدر اسبق یوسف
کامل پاشا محمدعلی پاشادن استماعاً روایت ایدرایدی که ایالت مصری اون اوچ بیک کیسه
وارداته بولوب بو واردات ایکنجی سنه سی اون سکرز بیک کیسه یه ترقی ایتمشیکن اوچنجی سنه سی
اون بیک کیسه یه تنزل ایسکه غالباً بونک سبی انکلیزلرک اسکندریه و رشیدی ضبط
ایملری غلله سی اولمشر . دردنجی سنه اوتوز بشیک کیسه یه حیقوب بعده ترقی ایده ایده

محمد علی پاشانك اواخر ایامنده غیراز برالشام درت یوزبیک کیسه یی تجاوز ایلدیکی محققد ر . بو ترقینك برمقداری فیثات مسکوکاتك تقریباً بش مثلی راده سنده تزايد ایلمسی قضیه سی ایسه ده قسم اعظمی کوله من بکلرینك مضبوطاتی اولان اراضینك حکومته انتقال ایلمسندن وزراعت و تجارتك تکرندن منبعث اولمشدر .

طرف دولته ویریلان مال مقطوع بالترقی اون ایکی بیک کیسه به بالغ اولمش ایسه ده حاصلاته نسبتله پک جزوی بولندیغندن و محمد علی پاشانك عزیمی قوی و افکاری بلند ایدوکنندن کندوسنه قالان مبالغ کلیه ایل برطرفدن عساکر منتظمه ترتیب و تکثیریه طوب و تفنك و باروت فابریقه لری و ترسانه و حوض انشاسی مثللو لوازمات حربیه به اقدام ایدر و برجانبدن دخی کوله لرندن و اولاد اهلیدن اوروپا به شاگردان ارسال ایدرک علوم حربیه و فنون ریاضیه به مالک آدم یتشدیرر و آوروپا ارباب معارفندن جلب ایلدیکی اشخاص واسطه سیله هم نظامات عسکریه سنی اکمال و همده شکر و منسوجات فابریقه لری انشا ایتدیرمک کبی وسائط تمدن و ترقیه به اهتمام ایلر ایدی مع مافیه بو وجهله دول مستقله ده جاری اولان قاعده و آینه تطبیقاً تدارکات حربیه به مباشرت ایلمسی نزد سلطنت سنیه ده قرین جواز اوله میه جنفی طبیعی بولمنسی درپیش مطالعه ایدرک بونک ازاله تأثیری مقصدیه طرف هایونه و متنفذان مقرینه و سائر ارکان دولته پیدرپی هدایای کلیه تقدیم ایده کلدیکی کبی ممالک محروسه نك هرجهتندن حجج شریفه کیدن علما و مشایخ و اشرافه پاره لر و هدیه لر ویرر و بعضلرینه کیزلوجه ماهیه و - الیه لر تخصیص ایدرک عامه ناسک قلوبنی جلبه بغایت اعتنا ایدر ایدی حتی یوسف کامل پاشادن استماع اولنمشدرکه کمرچکی عثمان پاشانك سلحدار علی اغایه چوق پاره ویره کلدیکی و برکره اوچیوز کیسه بردن تقدیم ایلدیکی بالمناسبه محمد علی پاشانك حضورنده تفوه اولندقدده اوچیوز کیسه نك لقر دیسمی اولور بن سلحدار اغایه بالدفعات آغرنجه آلتون اعطا ایلدم دیمشدر . رجال دولتعلیه دن مشهور حالت افندی وهابی غائله سی بتدکدنصکرده که تقریباً اوتوز بش تاریخلریدر شام و حلب و یاخود بغداد و موصل ایالتلری برلشدیریلرک صورت تلطیفده محمد علی پاشانك بو قدر خدمت و موفقیتی اوزرینه بو وجهله ازعاج اولمنسی لایق شان سلطنت دکلدردیه رک منعنه نصب نفس اهتمام ایلدیکی مرویدر . سرعسکر اسبق سلیمان پاشا مرحوم که سرای هایوندن مخرجدر مصر مسئله سنك ظهوری اثناسنده بر رسم کونی سرای هایون اغالرینك متخیزانیله برابر بر معتاد حضور هایونده قائم ایکن سلطان محمود خان حضر تلری سلحدار اغای مؤاخذیه باشلامغله اغالر طشریه حقیقمق استدکدرنده صالیور میوب وقعه مذکورده یی تذکار و اغالر خطاباً محمد

علی پاشانک بو درجه یه کیمسنت سبی بو احمددر دیو سلحدار اغایی ارئه ایش ایدوکنی
نقل ایله تأیید روایت ایدر ایدی

استانبولده یکچریلرک العاسندن اول محمد علی پاشا مصرده عسا کر منتظمه ترتیب
وتأسیس ایدوب موردده ابراهیم پاشا معیتنده استخدا ایش ومحسناتی دخی کورلش
ایدی روسیه سفری ظهورنده جانب دولت علیه دن وقوعبولان طلب اوزرینه اون ایکی
بیگ عسا کر نظامیه وعد وترتیب ایشیکن او آراق مصر آلتونلرینک فیئاتی بر مقدار
تزیل اولمغله بونی بهانه ایدرک عسا کر مرتبه یی کوندرمیوب یکر می بشبیک کیسه قدر
اعانه نقدیه ارسالیله اکتفا ایلدی بلا استیذان موردن عسکرینی چکمی ومسقوسفرینه
اعانه عسکریه ده بولنامسی بروقدنبرو حقتنده مضمراولان شبهه یی تأیید ومركز مطاوعه تکاریدن
انحرافی تحقیق ایشکله روسیه سفری بتدکدن وبغداد تسخیری حاصل اولدقن صکره
صدر اسبق سلیم پاشا شام والیسی نصب اولوب علی روایه مصرده بر حادته احداثیله محمد
علی پاشانک تنکیلی اسبابنه چاشمق اوزره مأموریت خفیه ویرلش ایش ومحمد
علی پاشانک ایسه اچقه قوتیله اندرون هایونده و ارکان دولت ایچنده متعدد جاسوسلری
اولدیغدن کیفیت کسب اطلاع ایدرک ذکر آتی تشبثنه ابتدار ایلدی چونکه محمد علی
پاشا یکر می اوتوز بیگ عسا کر نظامیه و قیاق وفرقتین اوله رق اون بش یکر می کمی یه
مات اولوب اوتهدنبرو ارزوسی دخی شام وحلب ایالتلرینی حوزه حکومتته الحاق ایش
ایدی حتی بو صورت ارکان دولتک مجزومی اولدیغدن وقت سفرد شرق سبر عسکر ی
غالب پاشا مذکور ایالتلرک محمد علی پاشایه تفویضیله اناطولی حدودینک محافظه سنی عهدده
اقتدارینه تودیع ایش حکم زمان ایجابندن اولدیغنی یازمش اولدیغنی ن بو کیفیت غالب پاشا
حقنده موجب اغبرار هایون اولمشیدی جزار احمد پاشادن صکره عکا والیسی اولان
عبداد پاشا چندسنه مقدم فرمانلی اولدیغنی حالد محمد علی پاشانک توسط وشفاعتیله مظاهر عفو
پادشاهی اولمشیکن محمد علی پاشانک عکایه فرار ایدن کوله لرینی ویرمامسندن طولای بیملرنده
حاصل اولان مخالفت اوزرینه محمد علی پاشا سوق ایتدیکی عسکر ودونما قوتیله عکائی تضییق
وتسخیر ایلیوب عبداد پاشائی استانبوله ارسال ایلدی وبعض وسائط ایله شامده اختلال
احداث ایدوب والی بولنان سلیم پاشائی اتلاف ایتدیرمکه شام اهالیسی مؤاخذه دواتی
درپیش ملاحظه ایدرک محمد علی پاشایه دخالته مجبور اولدیلر بوبابده نصایح وتهیدی
حاوی اصدار وتسیار اولنان اوامر علیه دن بر ثمره حاصل اولیوب باخصوص محمد علی
پاشانک اشقودرولی مصطفی پاشائی عصیان تشویق ایلدیکی مرکز ثبوته وارمغله طرف

شیخ الاسلامیدن ویریلان فتوای شریفه که بالجمله معزول شیخ الاسلاملر ایله صدور علما و مشهور درس خواجهلرینک امضالریله دخی توثیق و تصدیق اولمشدر انک موجب شریفی اوزره محمد علی پاشا ایله عونهنک تدمیری ضمنده ادرنه والیسی اغا حسین پاشا سردار اکرم و مصر والیسی نصب اولنوب معینته ترتیب اولنان اوتوز بیک قدر عساکر منتظمه و غیر منتظمه ایله اعزام قلندی .

عساکر عثمانیهنک طلیعه سی اولان اینجه بایراقدار اوغلی محمد پاشا معیتنده کی باشی بوزوق عسکر یله میرلوا بکر پاشا قومانده سنده بولنان اوچ آلا ی پیاده و میرالای عصمت بکک سواری الای خنص و حورانیه واصل اولدقلری کون ابراهیم پاشا یدی الای پیاده و بش الای سواری ایله خنصه داخل اولغله و سردار اکرم مدیق قلعه سنده و جیوش دولتعلیه مذکور ایکی نقطه نک اردسنده واقع اوتوز ساعتک مسافه ده طاقم طاقم کچمکده بولنلریله قاعده حریبه یه توفیقاً عسکرک اجماعیه حربه مباشرت لازمه دن ایکن امرای عسکر یه جاهل و حرکات عسکر یه دن غافل اولدقلرندن قرق سکر سنه سی اواخر محرمنده ذکر اولنان طلیعه فرقه سی همان جنکه کیریشوب بوزولدیلهر بوانهزام کیروده اولان عسکره و سردارا کر مه موجب دهشت و تلاش اوله رق اولا حاجی طوتمق ایچون اولجانبه حرکت ثانیاً اسکندرونه کلان مهماتی محافظه اینک مطالعه سیله اسکندرونه رجعت ایدرک یتش سکسان ساعتک مسافه نک قطعیه عسکر ده تاب و توان قالمیوب بر طرفدن قولرا عاتی دخی ضایعات کثیره یی موجب اولدیغندن اردی هایونک ایلر و طوتاری قالمدی بناء علیه سردار اکرم عزل و اولجوارده بولنان صدر اسبق رؤف پاشا قائم مقام و مشارالیه محمد پاشا سر عسکر نصب اولندی . مسقوسفری ختامندن برو ارنبودلق اصلاحیه مشغول اولان صدراعظم رشید محمد پاشا معیتنده بولنان عسکرک بر مقدار یله استانبوله جلب و ابراهیم پاشا اوزرینه مأمور ایدیلرک اولکی اردودن دهامکمل براردو ترتیبیه اعزام قلندی ابراهیم پاشا قونیه یه کیرمش و موسم شتادخی حلول ایلمش اولدیغندن صدراعظم بهارده قدر آق شهرده اقامت و خفیف سواری ایله قونیه یی تحت محاصره یه الوب مصر ایله مخبراتی قطع و محتاج اولدینی لوازم و مهماتک و رودینی منع ایله تضییق اینک افکارنده ایدی .

زیرا اولوقتک حکمنجه قونیه نک اطرافنده بولنان والی و متصرف و مساملرک بشرالیشریوز قدر قبولری خلقی اولدیغندن قریب و بعید بولنری قونیه نک اطرافنده دور ایتدیردرک ممکن اولان تضییقاتی اجرا ایتدیرمک قابل ایدی لکن سلطان محمود خان حضر تلی حسین پاشا اردوسنک پریشانلغندن پک زیاده متأثر و راحت و آرامی منسلب

اولمغله صبره اقتدارى قالمیوب اولوقت مابین هایون مشیری بولنان فراری احمدپاشای ارسال و بلافاة وقت حربہ مباشرت اولنسنی قطعاً امرایلدی بناءً علیه قرق سکز سنه سی رجینک اواخر یله کانون اول اوائل ایدی که آق شهر دن حرکت وقونیه صحراسنه موصلت اولنوب شدت شتادن ناشی موقع طوتمق واستحکام یایمق کبی شیلره زمان وامکان مساعد اولمدیغندن همان عسکرک ایاغی توزیله حربہ مباشرت قلندی الی ساعت قدر جنکه دوام اولنوب آثار غلبه نمایان اولمش و صدر اعظم قونیه دروننه عسکر صوقق ایله مشغول بولنمشیکن هواغایت سیسلی اولدیغندن واقشام تقرب ایلدیکندن صدر مشارالیه کندو عسکری اولمق ظنیه دشمن سوارسی ایچنه کیریور مکه اسیردوشدی وبونک در حال شیوعی عساکر عثمانیه نك رجعتنه بادی اولدی عساکر عثمانیه جیوش مصریه نك ایکی قاتی درجه سنده ايسه ده مصر عسکری هم معلم و همده فرانسز جنرال لرندن اولوب سلیمان پاشا نامیله مشهور اولان برفن حرب ماهرینک ترتیب و پلانی تحتند اولمغله نائل غلبه اولدیلر .

بووقعه اوزرینه ایش کسب اهمیت ودهشت ایلدیکندن سلطان محمودخان حضر تلری روسیه ایمپراطورندن استعانه ایلمکه سنه مزبورہ ذی القعدہ سی اواسطندہ برفرقه روسیه عسکر یله برفیلودونما بوغاز ایچندہ واقع خنکار اسکله سنہ وارد اولدی .

وابراہیم پاشا دخی کوتاہیہ کلدی عقب وقعه ده طوپخانه مشیری خلیل پاشا و آمدی رشید بک که صدر اسبق مشهور رشید پاشا در مصره اعزام اولندقلری مثللو روسیه لو طرفندن دخی مأمور مخصوص کوندرلش وانکلتره وفرانسہ دولتلری سریعاً ایشہ برنتیجہ ویرمز ایشہ بک بیوک وقعه لک ظهورینه سبب اوله جغنی تفرس ایدرک انلو طرفندن دخی محمد علی پاشایه اجرای نصایح وتهیدات اولنمش اولمغله محمد علی پاشانک عهده سنده بولنان مصر و کرید آیالتلرینه الحاقاً شام و حلب و صیدا آیالتلرینک و ابراهیم پاشانک عهده سنده بولنان جدہ و الیالکنه الحاقاً طنه آیالتنک توجهیله اصلاح ذات البین اولنسنی قرارلشدیرلدی ورشید بک استانبوله بعدالعوده کوتاہیہ کیدوب ابراهیم پاشای ارجاع ایلدی .

سر عسکر سابق نامق پاشا که قدمای ارکان دولتن اولوب وجودیله افتخار اولنور و هروقتده طوغری بی سویلر بر ذات اولدینی جمله نك معلومیدر الی تار یخندہ میرلوالق رتبه سی حائز ایکن محمد علی پاشا حقندہ اوروپا دولتلرینک افکارینی یوقلمق ودولت علیه نافع بر صورت استحصال ایلمک اوزره سفارت مخصوصه ایله اوروپایه کوندرلش وانکلتره دن بدأ ایله فرانسه ونمیچه و پروسیا و روسیه حکمدار لر یله کوریشوب بویادم استحصال ایلدیکی معلوماتی کلوب سلطان محمودخان حضر تلرینه عرض ایلشدر مشارالیه دن

شوجیهله مرویدر که محمد علی پاشا کوندن کونه تزیید قوت و تکثیر ثروت ایتسیله برابر دولت علیه نك گرفتار اولدیغی مهاجمات خارجییه و داخلییه دن ناشی اعادة اقبال ایتسی غیر ممکن کبی کوردیکندن سلطنت عثمانیه یه وارث اوله بیلیمسی ذهننده قرار اشدرمش و بونک مقدماتی استحضاره نصب نفس اهتمام ایشیدی . اوغلی ابراهیم پاشانک موردیه مأموریتنده چونکه اوجّه عساکر منتظمه ترتیبه موفق اولمش اولدیغندن عصاة درومی تنکیل واستیلا ایلدکلری قلاعی استرداد ایلدی و یالاکیز طاغیر باشلرندده بعض اشقیاء فرقه لری قالدی . بوحال اوروپا لولرک مشهودی اولدقدده یونان حکومتک تأسیسی بین الدول مقرر اولدیغندن بواشدن ال چکلمسی محمد علی پاشایه تبایغ ایلدیلر مشارالیه دخی شمیدیکی حالده کندوسنک اورادن چکلمسی دولت علیه دونتاسنک محاسنه موقوف اولدیغنی و اولوقت خط رجعت منقطع اولدی اعتذاریه عسکرینی مورددن جاب ایدد بیله جکنی تعهد ایتکله فوارین وقعہ سی ظهور و ابراهیم پاشا دخی عسکرینی بالاستصحاب مصر و عودت ایلدی بونک اوزرینه روسیه محاربه سی آچیلوب اون ایکی بیک عسکر امداد کوندرمک اوزرد تعهد ایشیکن بعض اعذار واهیه سر دیله آتی دخی بدله ربط ایتدیردی و ایکی اوج سنه مرورندده اجرای مافی الضمیرہ قیام ایلدی .

بوروایتی مؤبد اولمق اوزرد لطفی افندی تاریخننده مسطور بعض خطوط هایونده (محمد علی مورد حقه ده اوروپا دولتلریله مذاکرات و مقالاته کیرشمش بونه دیمکدر هیچ بروالینک بویله شیلرد لیاقت و استحقاق وارمیدر) مألنده بعض فقره لر واردلر لکن نه چاره که اولوقتلردده محمد علی پاشانک بو تصمیماتی احاد ناسه دکل ارکان دولتک اکثر بسنه آکلاتمق غیر قابل ایدی . چونکه محمد علی پاشا اصحاب خروجک دول قدیمه حقه ده اختیار ایدد کلدکلری ابن خلدوندده مسطور اولان قاعده و مسامکه تمامیه توفیق حرکت ایدر ایدی بناء علیه حکمت بین اولان ذوات محدودددن غیریه کافه خلق محمد علی پاشا دولتک صادقی اولوب تنظیم احوال نخبه آمالی و مسقودن اخذ انتقام نتیجه مقصد مافی البالیدر اعتقادندده ایدیلر حتی بو افکارک بقیه سندن اوله رق لطفی افندی بیله تاریخننده حیف صد حیف که بعض ارباب نفاق پادشاه آنام ایله بویله بروزیر ذی قدرتک آردلرینی بوزدیلر دیو تأسف ایدر .

ارباب نفاقدن مراد خسرو پاشادر چونکه بین الانام مشهور اولدیغنی اوزرد خسرو پاشانک تا مصر و ایلکندن برو محمد علی پاشایه غیظ و خصومتی اولوب دائماً علیهنده بولنور ایش . حالبوکه خسرو پاشانک الی وفاته مصردن موظف اولدیغنی صکره دن

تحقق ایلدی مع مافیہ خسرو پاشا مصر دن پاره آملغه سلطنت عثمانیه اولان صداقت
 واستقامته خال کلیوب هم پاره آلور و همده دولت علیه حقنده اولان تصمیمات مضر دنك
 اندفع و ازالهنه چالیشور ایدی ظاهرده مصالحت بتمش ایسهده حقیقته تدارکات و تمهیه
 دوام اولمنسی ضروری ایدی چونکه ابراهیم پاشا قونیه ایله اطنه نك آردسنده واقع کولك
 بوغازینی استحكامات جسیمه ایله ترصین ایدوب مصرده دخی دوئمانك تزییدینه اقدام
 و عسا کرنظامیه نك تکشیرینه اهتم اولمقده و آیالات سائر دنك مقطوعات معینه لرینك اعطاسنده
 تسامح و خصوصیات سائرده مستبدانه معامله قلمقمده ایدی صدراعظم رشید پاشا کوتاهیهده
 موقوف ایکن معزول و صدر اسبق رفیق ثابت پاشا صدر صدارته موصول اولوب بش اون
 کون صکره رشید پاشانك سبیلی تخلیه قلمقله استانبوله گلش و ایکی یوز اللی سنه سی
 اواستمده سیواس ایالتی و مؤخرأ دیار بکر و خریوت طرفلرینك اداره سی عهده سنه
 تفویض و معینته براردو ترتیبیه صورتا کردستانك اصلاحنه مأمور ایدلمشیدی خلیجه
 کردستانده اصلاحاته دخی موفق اولمش ایسهده اساس مأموریتی اولان مصرلو مدافعه سنه
 حاضر لمقده ایکن اللی ایکی سنه سی شعبانده مرتحل دار آخرت اولمغه عهده سنده بولمان
 دیار بکر و سیواس ورقه ایالتلری بارتبه وزارت کوتاهیه فریقی حافظ محمد پاشایه توجیه
 بیوریلوب اردوی هایونك استکمالنه اعتنا ایلدی .

بروسیا مارشالی مشهور مولتکه اولوقت خدمت دولت علیهده و حافظ پاشا اردوسنده
 ایدی آنك رأی اردوی هایون فرات نه رینی کچمیوب یالکیز ارائه سطوت و مهابتیه
 اکتفا ایدلدیکی حانده آز وقت ایچنده مصر عسکرینك طبیعتیه پریشان اوله جنی مرکزنده
 ایدیهده طرف هایوندن جنکه مباشرت اولمنسی خصوصنده تأکید و تعجیل بیورلمقده
 اولوب حتی قرناى شاهانه دن محمد علی بك که صکره داماد و صدر اعظم اولمشدر تنفیذ
 مر بادشاهی ضمننده اعزام اولمشیدی بنابرین اللی بش سنه سی ربیع الاولنده حافظ پاشا
 اردوی هایونی مستصحباً فرات نه رینی مرور و حلب جوارنده واقع تزیب نام محالده
 محاربهیه آغاز ایدوب سوء تدبیر ثمره سیله معسکر عثمانی بوکرده دخی رهین انهزام و پریشانی
 اولدی .

سلطان محمود خان حضرتلری مصر و قوعاتیه خواب و حضوردن مهجور اولدیغندن
 دفع اوده و ملال قصدیه استعمال ایلدکاری مشروبات شدید ضبع هایونلرینی تغییر
 ایتمکه چاملیجهده واقع اسما سلطان باغنه نقل بیورمشدر ایدی .
 خبر انهزام و اصل اولقسزین اللی بش سنه سی ربیع الآخرینك اون طقوزنجی

کونی الی الی یاشنده و سلطنتک اوتوز ایکنجی سنه سنده مرحل دار آخرت اولوب
 وصیتلری موجبنجه دیوان یولنده واقع اسما سلطان سرائی عرصه سنه دفن و بعده مکلف
 تر به بنا قلندی خاقان مرحوم حضرتلری یوز الی سنه دنیرو کلان پادشاهلرک اعظم
 واعقلیدر هنکام سلطنتلری دولت علیه نک اوان انحطاطنه تصادف ایلدیکندن ممالکجه
 خلی ضایعات واقع اولمش ایسه ده برمدتدنبری طوائف ملوک حکمنه کیرمش اولان اعیان
 ودره بکلرینک ازاله سیله حقیقه سلطنتی خار آزاردن تطهیر ایلدی باخصوص بغاة
 عسکریه بی تأدیب و جنود منتظمه تأسیسنه موفق اولملری غیور و مقدم و مصالح دولتک
 و خدمه سلطنتک دقایق احوالنه واقف تهیدیننی ایقاعه قادر و بالذات اداره دولته مقتدر
 برشهریار جلیل المآثر ایدی .

جلوس سلطان عبدالمجید خان حضرتلری

بیوک شهزاده سلطان عبدالمجید خان حضرتلری اورنک عثمانی اولوب صدارت
 عظمی مجلس والا رئیس خسرو پاشایه و مجلس والاریستی سانی رؤف پاشایه و سرعسکرلک
 چند کون اولجه تجارت ناظری نصب اولنان خلیل پاشایه و نظارت مذکوره سرعسکرلکدن
 انفصال ایدن سعید پاشایه توجیه بیورلدی . ایرتسی کون تزیب انهرامی خبری و بش
 اون کون صکره قپودان دریا فوزی احمد پاشانک دونمای هایونی اسکندریه یه کوتوروب
 محمد علی پاشایه تسلیم ایلدیکی پیام غربی واصل اولدی . چونکه احمد فوزی پاشا
 معتمد و مؤتمن محمودخانی ایدی . اولوقت کسب اشتهار ایدن روایته نظراً کویا سلطان
 محمود خان حضرتلری خلیل پاشا و خسرو پاشادن سلب امنیت ایله بعض مرتبه و سوسیه
 مبتلا اولدقدده احمد فوزی پاشا شهزاده جوانجخت حضرتلرینه سوء قصدی درعهده
 ایتمش ایدوکنندن شمدی جلوس هایون وقوعنی و خصماندن خسرو پاشا و خلیل پاشانک
 صدراعظم و سرعسکر اولدقلرینی استماع ایله جان خوفنه دوشوب بوخباتی اختیار ایشدر .
 شویله که دونمای هایون قلعه سلطانیه ده ایکن تبدل سلطنت خبری واصل اولدقدده احمد
 پاشا کتخداسی بولنان شریف اغا وانک اوغلی اولوب ریاله هایون اولان عثمان بک که
 تحویل حکم زمان ایله مؤخرآ استانبوله کلوب مع الوزره بوسنه والیسی اولمشدر . انلرایله
 بالذاکره صورت فراری قرارلاشدیردقدن صکره امرای بحریه بی بعض اقوال ابله فریبانه
 ایله اغفال ایدهرک همان حرکت و مصره طوغری عزیمت ایلدیلر .

دونمای هایونک بووجهله کیدیشی ارکان دولته موجب اندیشه اولغله مجلس والا
 کاتبی محسن افندی یه بریسی احمد پاشانک ابقاسنی و دیکری قپودانه هایون بولنان مصطفی

پاشانك قبودان دریا لقبی متضمن ایکی فرمان ویریلوب اولابقا فرمانی اعطا ایله احمد پاشایی اغفال وبعده مصطفی پاشانك مأموریت فرمانی ابراز ایله اجرای مأموریت ایتیمی تعلیم قلنه زق مخصوص واپور ایله اعزام قلندی. مومی ایله محسن افندی ردوسدن ایلروده دونمای هایونه مواصلت واحمد پاشایه ابقا فرمانی اعطا ایلدکده احمد پاشا فرمانی قرائت ایتدیروب محسن افندی نی کتخداسی شریف اغایه مسافر ویردی. ومحسن افندی کرك مصطفی پاشا وکرك امرای بحریه ایله ملاقات قبولری مسدود اولدیغنی کوروب شاید تحری اولنور خوفیله مصطفی پاشانك مأموریت فرمانی دکره آتمغه مجبور اولدی . اکر مصطفی پاشانك قبودان پاشالغی رسماً اعلان وفرمانی دخی طوغریجه کندوسنه اعطا اولنش اولسیدی احمد پاشانك هیچ برشیته قادر اولهمیجنی بدیهی ایکن ارکان دولتك عقلالغی ایشی مشکلاته کرفتار وبالعکس احمد پاشانك ابقا فرمانی تقویه نفوذ واجرای مافی الضمیری امرنده تسهیلاتی استلزام ایلدی. خارجیه ناظری رشیدپاشا مصر علیهنه دول معظمه ایله عقد اتفاق ایچون ایکی سنه دنبرو اوروباده بولنوب موفق دخی اولمشدی. تبدل سلطنت عقبنده استانبوله کلوب اللی درت سنه سنده اجرایی تصمیم اولنمشیکن بالایحاج تأخیر اولنان تنظیمات خیریه یی اعلان واجرا ایتدیردی بوباده کلخانه ده قرائت اولنان خط هایون ایله سنه مزقومه ده تنظیماتک ایلرویه تعلیقنی متضمن اولافرمان عالی صورتلری دستور نامنده اولان مجموعه ده مسطوردر .

مصر محاربه اخیره سی

انگلتره و اوستریا و پروسیا و روسیه دولتریه باعه دنامه عقد اتفاق اولندی . فرانسه دولتی محمد علی پاشانك مجلوی اولدیغندن قرال بولنان لویی فلیپ وخارجیه ناظری کیزو بو اتفاقك حاصل اولهمامسنه يك چوق اقدام ایتشار ایه ده مقبدر اولهمدیله . ومع مافیه اتفاق دوله داخل اولمدیلر ایه ده مصر دخی اعانه یه جسارت ایدهمدیله بناء علیه مصر ایالتی بالورانه وعکاقله سیله صیدا ایالتی قید حیات ایله محمد علی پاشایه تفویض اولنمق اوزره شام وحلب وجده کرید واطنه ایالتلرینك ردی ودونمای هایونك اعاده سی تکلیفیه صدارت مستشاری رفعت بك مصره کوندریلوب مذاکرات ومخابرات طویله جریان ایلدیکی حالدده محمد علی پاشانك ارضایی قابل اولهمدیغندن اللی التي سنه سی واسطنبده حربیه مباشرت اولندی .

استانبولدن کوندریلان بر قیاق وبرقاج قطعه سفن حربیه ونمچه لولرك چندقطعه سفینه لری انگلتره دونماسیله بالاجتماع مصر وبر الشام سواحل تحت ابوقیه الندی ومركز

عسکری اتخاذ اولنان قبریس جزیره سنه تقریباً یکرمی بیک قدر عسا کر عثمانیه سوق
اولنوب اردوسر عسکر لکی صدر اسبق عزت محمد پاشایه و عسکر قوماندانانی سرویلی سلیم
پاشایه احاله قانندی بیروت قلعه سی جزوی محاربه ایله تسخیر اولندقدنصکرده ابراهیم پاشا
درزی طاعی اتکلر نده چند دفعه مقاتله تصدی ایتش ایسه ده جمله سنده مغلوب اولدیغندن
طوبقی راده سنده ایکن شامه فرار ایدوب اعتماد ایلدیکی عکا قلعه سنک دخی اوج بیق ساعت
ظرفنده قود بخریه ضریله فتح اولندیغنی استماع ایتدکده اراتق شامده دخی آرام ایدمه یه رن
چوللره دوشدی و تعریف اولنمز مضایقه و شائد ایله آج عریان مصره طوغری حیقوب
کیتدی .

ابراهیم پاشا رشید پاشا و حافظ پاشا اردولری مثللو جسم قوتلره غلبه ایتشیکن بو کرده عسا کر
جزویه قارشو سنده تحته پرده قدر مقاومت ایدمه مامسی غریب کورینه جکندن بونک اسبابی
تفصیل ایتک اقتضا ایلدی .

مقدمه بخنده ترقیم اولندیغنی اوزره محمد علی پاشا حج شریف ایچون مصر دن کلوب چن
مشایخ و خواجه لره و اشراف مالکک عطیه لر و خراج راهر اعطا ایدرک و قبل خطاب اولدرینه
دولتک اغتشاش احوال دن و مستقوک غلبه سندن یانوب یاقبله رق دین و دوائه خدمت ارزوسنی
اظهار ایدمه کسکه و بر طرف دن دخی کرک استانبول و کرک طشره لر اشرافنه خفی و جلی باره لر
کوندر مکه او یله بر توجه عمومی جلب ایتشیدیکه اکثر خلق ولایتنه و مؤید من عنده
اولوب قریمک تخلیصی بونک یوزندن اوله جغه اعتماد ایدرلر و حرمینک خوار جدن تطهیرینه
موفقیتنی براءت استیلال عد ایدرک مدح و ستایشیه امرار اوقات ایلرلر ایدی . باخصوص
مرض جزام کی عروق انامه سرایت ایتش اولان یکی چری غیر تمکشدکندن و عسا کر
نظامیه احداثدن و آنک تفرعاتندن اولان بعض معاملات دن و البسه اجنیه یه میل و رغبت
قلمسندن طولای کافه انام بیزار اولوب بوشیلرک سببیتنی خسرو پاشایه عصف ایله پادشاهی
بویوللره سوق و ترغیب ایدن خسرو پاشادر دیرلر ایدی . حتی محمد علی پاشا ایله خسرو
پاشانک فی الاصل بینلری بوزوق اولدیغندن محمد علی پاشا بونی سر رشته ایدینه رک ابله قریب
اولان بومثللو سوزلر ایله اصلاح مزاج دولت ختمنده اتفاقه دعوتی متضمن بعض والیرله
مکتوبلر کوندر وب اغفاله چالشمش و بو مکتوبلرک اکثری ولایه طرفدن جانب دولت
علیه یه تقدیم قلمشدر . توجه عامه شول درجه ده ایدیکه حسین پاشا اردوسنه دفتر دار
نصب واعزام اولنان عظمای رجال دولت علیه دن طاهر افندی عقلا دن و اصدقای دولت دن
بر ذات اولدیغنی حالد یولده کیدر ایکن بونه کیفیتدرکه بن جانب سلطنت سنیه دن مصر

اوزرینه سوق اولنان اردونك دفترداري اولديغ حالد كوكم اوطرفه محب ومتوجهدر
 ديو بعض محرملرينه سويلديكي محققدر . ايسته ابراهيم پاشانك غابه سي توجه عمومينك
 كند و طرفه معطوف اولمسندن وقدمنه هر كسك ديده كشاى انتظار بولمسندن منبعتدر.
 بودفعه كي پريشانغى ايسه يدي سكر سنده دبرو زير اداره سنده بولنان سوريه اهايلسك
 انعكاس اميد عدالت ايله نهيه اوغرا دقلىغى اكلاملرندن ناشى كمال نفرتلرندن وطائفه
 عسكرينك روگردانلغندن نشأت ايتمشدر . چونكه حربه مباشرت اولمسييله برابر جبل
 لبنان اهايلسي وعشاير و عربان مصر لو عاينه قيام ايدوب جنود مصريه دخى فوج فوج
 وحى صادق بك نامنده بر ميرالايك تحت قومانداسنده بولنان الاى هيئت مجتمعه سييله
 اردوى هايونه دخالت ايلدى . بونلرك جمله سي دوبريجهيه كوندريلوب اوراده اسكان
 اولندبلر امراي مصريه دن اولوب كذلك طرف دولته دخالت ايتش اولان كليسى محمد
 پاشا ومير آلاى صادق بك نقل ايدرلر ايديكه ابراهيم پاشا درزى طاغندن شاهه عودت
 واطرافده بولنان عسكرينى جمع ايتد كده كيجه لرى طاقم طاقه فراره غاز ايللريه محافظه لريچون
 قره غوللره ضابطان اقامه اولمش اولديغى حالد فراريلرك اوكى النق شويله طورسون ضابطان
 دخى فراره شتاب ايلدكلرندن بر قچ كون ايچنده عساكر مجتمعه نك نصفى قلمبوب قالانلرك
 دخى كوزلرى اويولده اولديغى مشاهده اولمغين ابراهيم پاشا بالضروره چوللرى طوتوب
 مصره طوغرى عودته مجبور اولمشدر

عكا قلعه نك تسخيرندن صكره اسكندريه نك ضبطى تصميم قلمبقده ايدى لكن محمد
 على پاشا آرق قوه نقوديه اعمالى زمانى كمش اولديغى تفرس ايدرك انكلتره باش وكيلى بولنان
 ذاتى دام اطماعه دوشورمش اولديغندن مصر اياتى وراثتله توجه اولمق صورتنه محمد على
 پاشا راضى اولور ايسه ايشك بتورمسي ضمنتده اميراله تعليمات كمش واللى يدي سنه سي شوالنده
 بو باده محمد على پاشانك ركاب هايونه استعفافنامه سي وروذ ايتمش اولمسييله مصر بالتوارث
 محمد على يايه توجه بيوريلهرق ايشه ختام ويرلدى ودونماى هايون استانبوله واصل اولوب
 ايلات مستحصله ولاه عظامه توجه بيورلدى اولوقت انكلتره اياچيسى بولنان بونصوبى
 بوقرارك عاينده اولديغندن مقتضاي مأموريتى اوزره رسماً قبولانى باب على يه عرض ايدر
 وخفياً انكلتره دواتى محمد على پاشانك كلياً قالديرلمسنة باعهده نامه بورجلى ايدوكندن قبول
 اولنامسى اخطار ايلر ايتش لكن هر نفاسه قرار واقع نزد دواتعليه ده قرين تصويب
 اولمشدر واقعا مصرى حرباً ضبط ايتك بيوك تكلفاته وكايتلو تلفاته محتاج اوله جفندن
 شقه انكلزولر دخى برانكده بولنه جفى جهته ايلروده نه رنك كسب ايدجكي مظالمه سي

جای دقت ایدی بناءً علیه بوقدرله اکتفا مناسب کورلمشدر خارجیه ناظری رشید پاشا مرحومک امتیاز شرائطنی حاوی قلمه آلدینی فرمان عالی مصره ارسال اواندقدمه محمد علی پاشا ایکی شرطنک تبدیلی استدعاسیله اعاده ایلمکله بوکا دخی مساعده اولنق اقتضا ایلدی مذکور شرطک بریسی وراثت ایالتک اولاد ارشده منحصر اولسی شرطنک اولاد اکبر شرطنه تبدیلی وایکنجیسی مصرک حاصلاتندن اوچ ربع مصارف محلیه ایچون بالتوقیف ربع دیکرینک خزینة دولته تقدیمی فقره سنک دخی سکسان بیک کیسه مقطوعه ربط قلمسی ایدی مذکور فرمانلر دستورده مسطوردر بوندنصکره مصرک تغیرات احوالی بمنه تعالی جلد آتی به عائد اولغله بو فصلک تکمله سنه شروع اولندی .

بشنجی فصلک تکمله سی

سلطنت سنییه بو فصلک حاوی اولدینی زمانده ضایعات عظیمه یه مبتلا اولدی اولاد سکسان ایکی سفرینک نتیجه سی اوله رق اقلیم قریم الدن چیقمغله بوماده ارکان دولت وافراد اسلامیه یی دلخون ایلدی چونکه بوندن سکسان سنه مقدم محارستان دخی حکومت سلطنت سنییه دن منفک اولمش ایسه ده اورالرده اهل اسلام یالکنز قلعه لرده ساکن و مسافر صورتنده اولوب کافه اهالیسی خرسه تیان ایدی قریم ایسه ایکی ملیونه قریب سکنه مؤمنینی حاوی بولندیغندن بوجهته بالطبع اهل اسلامه زیاده تاثیر ایلشیدی بناءً علیه قریمک تخلصی نخبه آمال انام اولوب موقوف علیهی لایقيله مطالعه و موازنه یه دخی صدر اعظم یوسف پاشانک شدت تهالکی مانع اولغله وانکلیرلر ایسه فرانسه لونک روسیه ایمپراطور یچیه سی نزدلرنده حاصل ایلدکوری اعتبارده رغماً سلطنت سنییه یی حربیه تشویق و ترغیب ایده کلر یله ایکی یوز ایکی سفری کشاد اولندی لکن بونک نتیجه سی اوله رق قریمی تخلص ایدلم دیر ایکن اوزی ایالتی اوسته ویرلدی فرانسلر ايله عقد اتفاق قلمق حسیله ایکی یوز یکرمی بر سنه سنده ینه روسیه سفری ظهور ایدرک بوکره دخی طوزله نهریله پروت نهری بیننده اولان اراضی وسیعه وقلاع متعدده ضایع ایدلرکدن بشقه صرب ملتته امتیاز ویرلمک مجبوریتی حادث اولدی بوندن صکره روم اختلالی ظهور ایدوب بونک نهایی دخی هم موردنک قراللق اولمسی و همده چرکستان وچلدیر ایالتلرینک روسیه لویه ترک قلمسی وافلاق ایچنده بولسان قلاع خاقانینک احسانی و صرب امتیازینک توسیع و تأکیدینی مستلزم اولدی و بونی متعاقب فرانسلر دخی جزایر غربی استیلا ایلدی .

سلطان محمود خان حضرتلرینک جلوسلرندمه ارنبودلغک بر جهتی یانیسه والیسی
تپه دانلی علی پاشا و برجھتی اشقودره والیسی قره محمود پاشا خاندانی تحت ادارهلرندمه
وسپروز و سلانیک طرفلری سپروزلی اسماعیل بک عهدہسندمه وروم ایلینک سائر بلاد
وامصاری اعیان دینیلان متغلبه ضبطلرندمه اولدینگی مثللو جزایر غرب اوجاقلری داییلرک
وحرمین محترمین وهابی طائفهسینک ید غصبندمه و مصر محمد علی پاشا حکمندمه و بغداد
کولهمن پاشالری وچلدیر وکردستان ایالتلری دخی امرا نامنه اولان بغاۃ اللرنده ایدی
اناطولینک بوزوق طرفلری جبار زاده و آیدین طرفلری قره عثمان زادهلرده اولوب
قصور بلاد و قصباته دره بکلری دینیلان متغلبه مستولی اولمغله والیلر یالکیز مرکزایالت
اولان یرلرده اوطورور و بونلرہ مداهنه ایله جلب منفعت وامرار ایام حکومت ایلرلر
ایدی جبار زاده و قره عثمان زادهلر ایله سپروزی اسماعیل بک هم عظاما واشراف اعیاندن
وهمده اوامر پادشاهینک اجراسنه مداوم مطاوعتکاراندن اولوب سفرلرده دخی
خدمتلری سبق ایتمش اولدیغندن مومی الیم حقلمندمه معامله تأدیبیه اجراسنه محل
اولامغله خاندانلرینه تعرض اولنمیوب مؤخرآ اسماعیل بکک اوغلی یوسف بک و جبار زاده
جلال الدین بک و قره عثمان زاده یعقوب اغا رتبه وزارتہ نائل وتغیر اداره امور دولت
سببیه ایالات عدیدهده والی اولمشلردر وقوعات صردسندمه مسطور اولدینگی اوزره بونلرک
غیریبی پنجه سطوت محمود خانیده نابود اولوب طوائف ملوک رنگنه کیرمش اولان
ممالک دولتعلیه قوه قاهره پادشاهی ایله هیئت منتظمه سابقهسنه رجعت ایلدی و سلسله
انضباطی قرین انحلال اولان نسخه کبرای سلطنت شیرازه بند انتظام اولدی .

سالف الذکر اعیانلر ایله دره بکلری یوز سنهیه قریب زماندنبرو کسب قدرت
وتمیز ایلمش اولدقلرندن بونلرک منشائی بروجہ آتی تفصیل اولنور : فصول سابقهده
مسطور اولدینگی اوزره ولایه و متصرفین طرفندن برسنجاق ادارهسنه مأمور اولان کسانه
متسلم وقضا ادارهسنه مأمور اولانلرہ و یوده تعبیر اولنور وهر شهر وقصبهده اهالی
طرفندن منتخب برده اعیان بولنور ایدی ممالکتک ضبط وربطی ولایه و متصرفین و متسلم
و یودهلرہ وامور حقوقیه و نرخ ارزاق حکام شرع شریفه عائد اولدینگی مثللو مراتبات
امیریہنک و مملکت مصارفی اولان مبالغک توزیع و تحصیل و دفترلرینک ترتیب و ترقیمی
خصوصلرندمه ولایه و حکام طرفلرندن مخاطب اعیانلر اولمغله اعیان بولنلر
بوایشلری اشراف مملکت ایله بالاجتماع تسویه ایدر ایدیکه اعیانلر اهلینک وکیل و حکام
ایله اهالی ارمسندمه واسطه دیمک اولور ایدی اشبو اعیانلر مملکتلرینک اغیاسندن

واصحاب حیثیت و نفوذدن اولملریله ولاء و متصرفینه امیدلرندن زیاده منفعت ابراز ایدرک
 متسلملیکی و و یوده لقلری درعهده ایتمهک باشلادیلر ایچلرندن لیاقت و درایتی حائز اولانلر
 هم ولاتی و همده حکامی خشنود ایتمهکله تزیید حشمت و ثروت و تأسیس بنیان عصیت
 ایدوب و قاتلری و قوعنده یاخاندانندن و یا منسوبینندن بر مقتدری انک مقامنه قلم اولور
 ایدی بونلرک بک و حشی اولملری چوقلق پایدار اوله میوب دور اندیش و حکمت بین
 اولملری مملکتی کما ینبغی اداره و ولاتی مطیب ایتدکدن بشقه ارکان دولتن بعضیلرینه
 کسب انتساب ایدرک و کندوسنی دولته طانتدیروب سفر و حضرده خدمات مقبوله ابراز
 ایلمه رک کوندن کونه توثیق حکومت ایلرلر ایدی سلطنت سینه عساکر منتظمه ترتیبینه
 موفق اولدقدن صکره تنظیماتک مقدماتی حکمنده اولان اصلاحات ملکیه دخی یوز
 کوسترمکه باشلامشیدی شویله که والی و متصرف و و یوده لرک کیف مایشاء قتل نفوسه
 محاسرتلری بافرمان عالی منع اولوب قصاصاً و یاخود سیاستاً ازاله لری مقتضی
 اولملر حکام شرعشرفک تحت تصدیقنه التمدیجه اجرا قلنمامسی امر اولندی
 و مخلفات ضبطی فی الاصل نوعاً معقول و مشروع بر درجهده یعنی مخلفات واقعه اموال
 امیره دن مختلس و مدخر اولمسی مظنون اولملر حقنجه جاری ایکن صکره لری سوء استعماله
 وارد یغندن میری ایله معامله سی اولسون اولسون و خدمت دولته بوانسون بولمسون
 اغنیادن بریسی فوت اولدقده ورثه سنه جزئی برشی ترک اولنه رق مصادره قلنور و بعضاً
 دخی مخلفات ورثه یه ترک اولنه رق مقطوعه ربط اولنور یعنی بر مبالغ معین اخذیله بتریلور
 ایدی بودخی بافرمان عالی الفا قلندی یکچریلرک الغاسیله انلره متعلق منصب و قلملری یعنی
 یکچیری افندیلکی و سپاه و سلحدار کتابتلری و بونلره مماثل مأموریتلرکه لغو اولسان
 اوجاقلرک محاسبه جیلکلی دیمکدر بونلر دخی الفا اولوب عساکر منتظمه سرعسکرلکی
 و مقاطعات و مصرف نظارتلری خاصه و نظامیه محاسبه جیلکلی منللو منصبلر احداث و ماهیه
 معاشلر تخصیص قلندی فصول سابقهده برنبذه بیان اولدینی اوزره اوقاف سلاطیندن فاتح
 و سلطان سلیم و سلیمان حضراتی و قفلرینک اداره سی صدراعظم لره و سلطان بایزیدک اداره سی
 شیخ الاسلام لره مخصوص اولوب قصور اوقاف سلاطین ایله نسللری منقرض اولمش بعض وزرا
 و امرا و قفلری قرنا و خدمه مخصوصه پادشاهی یه چراقلق اوله رق توجیه اولنور ایدی
 بردفعه وقف ترتیب ایدن اصحاب خیرات و قفلرینک شرائطی تعیین و خیرات و مبراتلرینه
 صرف اولنه بحق مبالغی و خدمه سنه و یریه بک و طاغی تخصیص ایتدکدن صکره تولیتی اولاد
 و اعقابنه و نظارتی صدراعظم و شیخ الاسلام و دارالسعاده اغاسی و استانبول قاضی منللو

ارباب مناصبه تفویض ایلمش اولدقلرندن بونظارتلرک برر مفتشی اولوب تحت نظارتلرندمه بولنان اوقافک هر سنه محاسباتی رؤیت ایتدیرر و شرط واقفک اجرا قلنمدیغی و یاخود خیرات ومبراتک محتاج تعمیر ایدوکی خدمه وقف طرفلرندن و یا محله لیمی جانبندن افاده واشتکا قلنور اینسه متولیلری شرائط اوقافک تمامی ایفاسنه اجبار ایدرایدی وقتاً بوقت واقفلرک سلاله لری منقرض اولدقده تولیتلری نظارت طرفلرندن مناسب آدملره توجیه ایتدیریلور و اراق اولاد مشروطیتندن چیقمش اولدیغندن بومثللو تولیتلره صدقه تولیتلری اطلاق قلنور ایدیکه توجیه پادشاهی ایله تصرف اولنور برنوع مأموریت دیمکدر استانبول شهری مرور زمان ایله کاملاً دیه جک درجه ده وقفه منقلب اولمغین معاملات بیع و شرانک توثیق و اجرایی متولیلرک و جابیلرک اللرنده قالدیغندن انواع فساد و تزویر واقع اولمقده ایدوکنه مبنی ذکر اولنان مناصبک حق نظارتلری برلشدیرلرک اوقاف هایون نظارتی احداث قلندی انجق بوضورتک موافق حال و مصلحت ایدوکی مسلم اولسیله برابر ناظر اولنلردن بعضیسنک مزاج غصبکارانه سی و بعضیسنک امر مهم حقوقدن بی خبرلکی جهتلیله خزینه اوقاف سواستعمالات ایله مالامال ایدی شویله که سلطان محمودخان حضرتلرینک وقفلرینه ایراد بولمق فکریله اسم بی مسما اوله رق کدک ایجادقلندی بوکدکلرک برصنفی محدود اولوب مثلاً استانبولده یوزسکسان قلایحی کدیکی احداث واصفانه بیع اولمقله بومقداردن زیاده قلایحی دکانی کشاد اولانه مز ایدیکه برنوع انحصار امتیازی دیمک اولور ایدی برصنفی دخی قوندره جی کدیکی مثللو غیر محدود کدکلردر که هر یکم طالب اولور ایسه ویریلور و هیچ کیمسه بلاکدک قوندره جیلق صنعتی اجرا ایدمه مز ایدیکه بودخی من جهة اوصنعتکده اجراییه رخصت دیمک اولور ایدی بوکدکلر اصناف بیننده آلتوب صاتیقله عادتاً مستققات اوقاف کبی خرج فراغ وانتقال واجاره مقرر اخذ اولنور ایدی مع مافیه بر دکان و یاخود بوستانده بر قاق سنه مستأجراً مقیم اولنلر مال صاحبک خبری اولمقسزین خزینه اوقافدن برر کدک الوب صکره مال صاحبی مستأجری حیقارمق و یا کرای تزیید ایلک مراد ایلدکده مستأجر نیم بوراده کدیکم بولندیغندن مقرر اولان کرادن بشقه بر شی طاب ایلکه حقت یوقدر دیو دعوایه قیام وتنفيذ مرام ایلکه او مثللو دکان و بوستان و سائر نک هم وقف قدیم ومده صاحبلرینک حقلری مصادره اولمش اولدی .

سواء استعمالاتک برنوعی دخی فراغ وانتقال خرجلرینک ومحلولات معجلاتنک نصفی متولی وجانی وکاتبلره ویریلوب نصف دیگرینک خزینه اوقافده توقیف اولنمیدر .
بو اصولک اتخاذندن مقصد کویا بوپارملر خزینه اوقافده تجمع ایدمک و هر وقتک

خیرات و مبرات آتی تعمیر و محتاج اولدقدن نقود مترا کمه سندن تسویه اولنه جق ایدی .
 حالبوکه اوقاف خزینه سندن متعدد قلملر و بک چوق مأموریتلر احداث اولمغله
 بونلره و خارجدن شوکا بوکا معاشلر و معیناتلر و ثواب اعتقادیله نوبنو تحداث ایدن
 تکیه لر طعمایه لر و تعینلر تخصیص و بیکر و بیک بشر یوز کیسه لر صرفیه مجدداً و تعمیراً
 تکیه لر انشا اولمغله و قفلرک مبالغ مترا کمه لر اضاغه قلندی و خیرات و مبراتک تعمیره
 احتیاجلری محله لی و متوالیر طرفلرندن اوقاف نظارتنه خبر ویرلدجه و قفلرک حاصلات
 مترا کمه سی دفترلرده موجود ایسه ده و زنده ده مفقود ایدو کندن بالضروره کچوشدیریلور
 اولدی اوقاف خزینه سی بو خصوصده مدعی علیه اولدینی حالدده حاکمک صفتی دخی حائر
 اولمسیله و قفلرک حامیسی اوله جق ایکن مخربی اولدی .

نظیماتک ظهوریه بالجمله سلاطین و سائر اراضی موقوفه سی مالیه خزینه سی طرفندن
 ضبط و تعشیر اولوب عندالحساب اراضی موقوفه مزبوره حاصلات عشریه سی سنوی
 قرق درت بیک کیسه یه بالغ اولمغله شهریه یه بالتقسیم خزینه مالیه دن اوقافه اعطا قننور
 ایدی . صکرده لری فؤاد پاشا مرحوم اشبو بدل مقطوعه مالیه نک اوقافه ویردیکی پاره یه
 اعانه نامنی و یروب موازنه عمومیه ده آچیق کورندکجه تنقیص ایده ایده ربع درجه سندن
 آشاغی تنزیل ایلدی جوامع سائر خیرات سلاطینک ایسه اکثر وارداتلری اراضی موقوفه
 حاصلاتی اولدیغندن و بروجه مشروح بوندن تنزیلات کلیه وقوعبولدیغندن مصرفلری
 قارشولقسز قالمق حسبیه بالضروره شونک بونک و قفلری حاصلاتیه اداره اولملری ایجاب
 ایلدی بناء علیه پک چوق اصحاب خیراتک مبراتلری خراب و متروک اولدیکه مشهود آنامدر
 کله لم تنظیماتک اجراسیه اداره امور ملکیده اتحاد اولنان اصول اداره جدیدنک تفصیلاتنه
 کلخانه و تنظیمات فرمان عالیرنده بیان اولنان شرائط ایله تنظیمات خیریه اعلان اولدقدن حکومت
 کیفیه یه مألوف اولان والی و متصرف و و یوده لر و عموماً ملتزم لر بونک علیه بنده بولندینی مثلاً
 حکمت حکومتدن غافل و منافع شخصی لرینه منعمک بعض ساده دلان ارکان دخی طعن
 و تشنیع ایدرلر و انواع محاذیر بسط و بیان ایلرلر ایدی لیکن حقیقت حالدده قیام و دوام دولت
 ایچون تنظیمات خیریه نک اهم و الزم اولدینی کوندن کونه میدان جیقدی و تفرعاتی نوبنو
 اصلاح قلندی بویه امور کلیه ده کوچک کوچک یا کلشقلر ضروری اولوب حالبوکه
 هر شیده نظر و اعتبار کلیاته راجع اولدیغندن بشقه بدایت حالدده یولسز کوریلان مواد
 درجه درجه حسن نتیجه یه ایصال قلنمش و الا آن قلنمقدن بولنمشدر .

تنظیماتک اس اساسی امنیت جان و مال و ناموس قضیه لرندن عبارت اولمغله شرعاً

وقانوناً حکم ترتب ایتمد کجه هیچ کیمسه حقنده مجازات اولنماسی و مصادراتک بالملکیه رفیی و مظنون جنایت اولانلر حقنده جاری اولان اشکنجه ماده فحیه سنک ترکی متعدد فرمانلرله تنبیه و تأکید و مرقفی مأمور اولور ایسه اولسون و نه رتبه و حیثیتده بولنورسه بولنسون افعال مردوده مزبوره یه متجاسر اولانلرک مجازات شدیدیه کرفتار اوله جقلری اعلان و اشاعت قلندی زیرا ولایه و متسلمین شهر و قصبه لرده اغنیادن بریسی کوردکلری آنده یاقباحث جزویه یه بناء و یاخود کلیاً بی اساس برافترایه ابتناء قتل و نفی مثللو مجازات شدیدیه تهید و مال و املاکی مصادرده و تجریم ایتمکی اعتیاد ایدنمشلر ایدی . عصر سابق و کلاسندن اولوب آیدین و ادرنه و بروسه و سلانیک و الیلکلرنده بولنان طاهر پاشا و عاکف پاشا و نافذ پاشا و صدر سابق خسرو پاشا و حسیب پاشا کبی عظاماً خلاف تنظیلات حرکات تهمتیه تحت محاکمه یه آلنوب مأمورین سائر یه عبرت کوسترلدی اگرچه بولنر حقنده اولوقنده خارجیه ناظری اولوب تنظیلاتک مؤسسی اولان و متکلم و حده بولنان رشید پاشانک بعض مرتبه اعراض شخصیه سی مروی و تقویم و قایع نسخه لرله نشر اولنان مقالات نوعما بونی مؤید ایسه ده تنظیلاتک تقرری بومثللو تهیدات و عبرته محتاج ایدی .

تنظیلاتک اساسلرندن بریسی دخی هر نوع واردات دولتک طوغریدن طوغری یه خزینه یه کلوب هر درلو مصارفک دخی خزینه دن اعطا اولنسی ماده سی ایدی . چونکه فصول سابقه ده بیان اولندیغی اوزره سلطنت سنیه نک الباشلو وارداتی اولان اعشار خاص هایون و مقاطعات میریه و زعامت و تیمار و مالکانه مقاطعاتی و یوردلق و اوجاقلق و اوقاف ناملریله منقسم اولمغله خاص هایون ضربخانه عامرهدن و مقاطعات میریه خزینه طرفندن ولایه و یا ملتزمینه الزام و دیکرلری دخی اصحابی جانبندن یا بالذات تعشیر اولنور و یاخود الزام قلنور ایدی تنظیلاتک برنجی و ایکنجی سنه لری کافه اعشار و رسومات امانه اداره ایتدیرلدی لکن معشرلرک ارتکاباتندن بشقه ذخائر مدخره یی حفظ ایتک و وقت و زمانیه صاتمق دولت مأمورلرینک یاپه بیله جکی شی اولمدیغندن کلیتلو خسار نمایان اولمغله تنظیلاتدن اول ملتزمملرک متجاسر اولدقلری مظالم و تعدیاتک ازاله سی وقاعده معتدله وجهله استیفای حقوق عشریه قلنمسنی متضمن نظامات وضع و یا تأسیسیله یه الزام اصولنه رجعت قلندی مالیه ناظری اسبق صفوتی پاشا مرحومدن مسموع فقیر اولمشدرکه بدایت تنظیلاتده درت سنه قدر مالیه نظارتنده بولندیغی حالده امانتاً اداره اولنان سنه لرک کار و ضرری شویله طورسون قاج غروش حاصلات اولدیغنی میدانه چیقارمق ایچون نصب نفس اهتمام ایلشیکن مقتدر اوله میوب خلفی اولان نافذ پاشا مرحومک دخی بوبابده واقع اولان اقدام و اهمامی نتیجه

بخش مطلوب اولاً مغله تعیین ماده محکمه کبرایه قالمشدر دیر ایدی
برده و قیلله اراضینک قوه نابتسه کوره اونده و طقوزده و سکزده بر اوله رق تعیین
اعشار اولمش و قیود خاقانی ده هر مملکتک مقدار اعشاری و رسومات متنوعه نک کمیت
و کیفیتی تحریر قلممش ایکن بدایت تنظیماتده کار فرما بولنانلرک عدم و قوفلرندن ناشی عشر
دیمک اونده بر دیمک اولوب طقوز و سکزده بر اوله رق عشر استحصال اولنان یرلر ملتزم لرک
غدر و ظلمنه اوغرایوب تأسس ایلمش ظنیه اونده بردن زیاده عشر النامسی مؤکداً امر
و اعلان قلمشدر . شیخ الاسلام اسبق رفیق افندی مرحوم یا ککشلقله بویله بر حقوق
مشروعه اضاعه اولندی دیو تأسف ایدر ایدی .

مقاطعات امیریته نک غیرسی اولان و اعشاری اصحابنه عائد بولنان اراضی که بروجه
بالا خاص هایون ایله مالکانه مقاطعاتی و زعامت و تیمار و اوقاف و یوردلق و اوجاقلق
ناملریله منقسم اولان اراضیدر بونلرک امانه اداره اولندقلری اوچر سنه نک حاصلاتی
بالتبلیث بدل تعیین اولمق و سنه بسنه جانب خزینه دن اصحابنه و یرمک اوزره قرارلشدیریلوب
اجرا اولندی . انجق بر طاقم ارباب نفوذ اعمال قوه نفوذ ایله طشره لرذن حاصلات
واقعنه نک بر قاچ مثلنه مضبطه لر کتوروب موجبجه مالک اولدقلری مقاطعه و زعامت لرینه
اضعاف مضاعفی اوله رق بدل تقدیر ایتدیردیلر و هنوز بدله ربط اولنمیان مقاطعات اصحابندن
اشترا ایدرک و اولوجهله خلاف واقع مضبطه لر جلب ایلیه رک عشر تعیین ایتدیردکلری
یک چوق واقع اولمشدر .

ینه تنظیمات اساسی جمله سندن اولمق اوزره و یرکونامیه طشره لرده توزیع اولنان مبالغت
سنه بسنه خزینه مالیه کوندرلمسی امر اولندی فصول سابقه ده تفصیل اولندیغی وجهله
و یرکونک ماوضع لهی اولان شیلردن ولایه و متصرفین حضریه و سفریه لری توزیع دفترلرینی
تصدیق ایتدکلریچون حکام شرعشریفه و یریلان خرج امضا و کلوب کیدن مباشر لره
اعطا اولنان خدمت مباشریه و مسافر خانه مصرفلری کلیاً الغا اولندی چونکه حسب التنظيمات
بیوک و کوچک کافه مأمورینه معاش تخصیص قلممش ایدو کندن جمله سی مصارفات واقع لرینی
معاشلرندن تسویه ایلک و هیچ کیمسه دن بر آقچه و بر حبه مطالبه و اخذ ایتماک
شروط اعظمندن ایدی و ینه و یرکودن تسویه اولنه کلان حکومت قوناغی و کوبری
و قالدیرم مثللو شیلرک مصارفات انشائییه و تعمیریه لری و منزلخانه مصرفلری خزینه
جلیله دن اعطا اولنه جفی اعلان قلندی بناءً علیه هر قضانک محصلی هر سنه توزیع اولنان
مبالغت مقدارینی تحقیقه قیام و بعضلری شمیدییه قدر بلا فرمان توزیع اولنان مبالغی

سلطنت سنیه متجاسر لرندن استرداد ایدم جکدر دیو وجوه مملکتی اغفال ایدرک توزیعات سابقه یکوئی قباتیلر واعتقاد لر نجه دولته خدمت ایلدیلر. لکن بعض مملکتلرک وجوهی نتیجه مصلحتی درک و تفطن ایسکله غایت خفیف دفتر تقدیم ایلدیلر.

واقعا توزیعات دفترلری استانبوله کلمک و قومیسون مخصوصنده بالتدقیق قبولی حاوی فرمان عالی صادر اولمق نظامی اقتضاسندن ایدی لکن ولایه و متسلم و ووده لر خارج از فرمان چوق شیلر علاوه ایدرلر ایدی اشبو دفترلرک موجب نجه هر قضا و قرایه ویرکولر تخصیص اولدقدن صکره شهر و قصبه لرده واقع املاک تحریر و ارباب تجارتنک تمتع نمنه لری درجات وضعیله ترقیم اولنه رق آرو آرو ویرکولر طرح و توزیع اولندی. لکن تحریر املاک و تمتعات ماده سی امر عظیم و وقوعات یورتنک تکلفات متبادیه به موقوف اولدیغندن بوقاعده باشه چیقاریله میوب ایکی سنه مرورنده هر شهر و قصبه و کویلرک معین و مخصوص اولان ویرکولری قومشوجه توزیع و تقسیم و بالتحصیل خزینیه تسایم قانمسی اختیار قلندی یدی سکیز سنه بوقاعده جاری اولدقدن صکره الا آن مرعی اولان تحریر املاک اصوله تشبث و سنه بسنه اکماله اعتنا قانمشدرکه الی هذه الا آن سعی و غیرت اولنقده در.

کراسته و کندیر و کهرجه مثللو تکالیف عینیه ایله مکلف اولان قضالره دخی ویرکولر وضع اولنوب او مثللو لوازمات حربیه یی دولت پاردسیله مبايعه ایدم جکدر دینلیدیکی کبی بعض کویری و طریق تعمیر و تنظیمی مقابله سنده ویرکودن معاف اولان کویلره دخی ویرکو وضع اولنش و مکلف اولدقلری شیلرک جانب خزینهن دن تسویه قلنه جخی اعلان قانمشیدی. برقاج سنه مرورنده خزینهنک تعمیراتی درعهده ایلدیکی شیلرک خراب اولمغه باشلا دیغندن پیدر پی محللرندن استدعالر کلدجکه پک جزئیسی اجرا اولنه بیلوب ماعدالری استعمالر ایله و بو سنه خزینهنک وقتی یوقدو جوابیله کچشدیریلور اولدی لکن کیتدجکه خرابی تمکثر ایدرک خزینهنه ایسه واردات مقرر سیله مصارف دائمه سنی اداره دن عاجز قالدیغندن اومقوله مملکتک مصارفنی رؤیت ایتمک ایچون شهر و قصبه لرده بلدییه صندوقلری کشاد اولنوب قنطاریه و کیالیه مثللو رسومات متفرقه بو صندوقلره ترک اولندی.

فصل سابقده ذکر اولندیغی اوزره ذخیره یتاغی اولان محللردن کیله سی یکر میشر پارد فیئات مقطوعه ایله و مبايعات امیریه ذخیره سی نامیله ذخایر کلیه مرتب اولوب بو ذخیره استانبوله کتوریلوب و تعیینات عسکریه و سائره بوندن ایفا اولدقدن صکره بقیه سی رایج وقته کوره فرونلره توزیع اولنور ایدی. حسب التظلیات بو دخی رفع اولنوب اکمکچی

اصنافك ديله دكلىرى يردن ذخاير مبايعه ايدرك طوتيلان چاشنى به تطبيقاً تعيين اولنان نرخ ايله صاتملىرى اعلان قلندى. لغواولنان اشبو مبايعات ذخيره سنك اداره سى ايجون دولتيجه مناصب معتبره دن اوله رق ذخيره ناظرى و خزينه كتبه سى وار ايدى. آرتق بونلره لزوم قالمىوب فقط وكلالق مناصب دن اولمق و ممالك محروسه نك تكثير زراعتنه چالشمق اوزره زراعت نظارتى احداث اولمقله معيته مستشار و مجلس و مکتوبنجى و محاسبه جى و كتبه و مأمورين ترتيب و تشكيل اولندى شوراسى غرايبدندر كه ايكي اوچ سنه ظرفنده نظارت مزبور ذخيره خزينه سنده مدخراولان مبالغى معاشات مخصوصه و يرد كدن صكره اككمچى اصنافدن اولان بقايابى تحصيل و معاشره توزيعه صرف همت ايدوب بو دخى ختامه رسیده اولدقمه غيرى ايش قالمديغندن هيئت نظارت طاغلمشدر .

جزیه شرعيه اوروپالولرك اك زياده كوزلرينه باتان ديكن اولوب بو اوانده ايسه اوروپالولرى خشنود ايدمچك دولتعليله نك دول متمدنه مسلكنه سلوك ايتديكنى كوستره چك شيلر التزام قلمقمده اولديغندن درجك اول على الرؤس جزیه جبايتنى الفا و بطريقخانه لر معرفيله عن جماعة تحصيله قرار و يرلدى لكن تنظيماتك ايكنجى سنه سنده مؤسس و حامى تنظيمات اولان رشيد پاشا موقع اقتداردن ساقط و عزت پاشا صدارته و صفوتى پاشا ماليه به صاعد اولمقله مشيرك نظامى ناميله تنظيماتك مواد متفرعه سى اصلاح اولنديغى صرمده جزیه نك على الرؤس جبايتى اصولى اعاده قلندى زيرا بطريقخانه لر دخى عن جماعة استيفای حقوقدن اظهار عجز ايتمشر ايدى بش آلتى سنه صكره كه رشيد پاشانك كوگب اقبالى تكرار ضيا پاش كمال اولديغى زماندر ينه عن جماعة تحصيله رجوع اولنوب نهايت قریم محاربه سى اواننده صادر اولان اصلاحات فرمانى حكمنجه بدل عسكرى به منقلب و صور اجرائيه سى برقاق هيئته متحول اولديسه ده الآن برقرار صحيح و سالم تحتنه وضع اولنه مامشدر .

وقعه خيريه دن صكره اصول اداره دولت تحويل اولمغه باشلا ديغندن اگرچه وكلا و مأمورينه معاشر تحصيل اولمقمده ايدى حسب التنظيمات كافة مأمورين و كتبه به ايلقلر تخصيصيله انه كلان خرجلى بعضلى كلياً الفا و بعضلى خزينه به ايراد قيد اولندى مقام صدارته يوز بيك و وزرايه يتمش بشر بيك و عظامى رجاله يكرميشر اوتوزر بيك و اوچنجى درجه ده بولنان مناصبه اون بشر يكرميشر بيك غروش و قلملره دخى مقدار كافى معاشر تخصيص وات اككم تعيينلى دخى ترتيب و اعطا قلندى مركز ايالت اولان سنجاقلره بر والى و بر محصل والويه ملحقه به امرای عسكريه دن برر

ضابطه مأموری و برر محصل و قضالره دخی کذلک برر ضابطه مأموریه برر محصل و مال و تحریرات کاتبیری تعیین اولنوب و الیله یتش بشر و کافه محصل و ضابطه مأمورلرینه یدیشربیک بشر یوزغروشدن اوزر بیک غروشه قدر و کاتبیره بیک بشر یوز ایکیشربیک غروش راده لریده معاشلر تخصیص قانددینی مثللو حکام شرع شریفه و تشکیل اولنان مملکت مجلسلری اعضالرینه و ترتیب قلنان ضبطیه و تحصیلدارنفراتنه معاشات متناسبه تعیین قلندی قدیمآ مرتب اولان ایالتلر اکر چه ظاهراً ایقا اولنش ایسه ده قضا محصلنک سنجاچاق و سنجاچاق محصلنک مرکز ایالت محصلنه ارتباطی اولیوب جمله سی مستقل اولغله بر والی ایله قضا ضابطه مأمورینک و عموماً محصللرک وظیفه جه یکدیگرنندن فرقلری یوغیدی بر ایکی سنه قد بو وجهله اداره اولنوب لکن ترتیب اولنان معاشاتک یکونی وارداتی احا ایلمش و حتی بعض قضالرک کافه حاصلاتی مصارفه مقابل کورنمشدن بناء علیه سالف الذکر مشیرلک نظامی وضع اولنوب بونک حکمی موجبنجه ولاتک الویه ملحقه جه حکمی جاری اولمق قاعده قدیمه سی اعاده و معتلرینه برر دفتردار و هر سنجاغه برر قائممقام و قضالره اهلینک ارباب حیثیت و اقتدارندن برر مدیر نصب اولنوب اشبو مدیرلره معاش مقابلی قبو آلتی حاصلات موضوعه سیله اراضی فراغ و انتقال حاصلاتی و ایکی بیک غروشدن اشاغی اولان محلولات معجلاتی تخصیص قلندی حکام شرع شریفه بر موجب نظام اخذ اولنه کلان خرج مواتیق اعاده اولنه رق معاشلری قطع و مجلس اعضالری مملکتلرینک خاندانندن اوله رق خدمتلری فخری اولمق اقتضا ایدم جکندن معاشلری بالکلیه الغا اولندی.

احوال عسکریه

فصول سابقه ده تفصیل اولندیغی اوزره دولت علیه نک بدایت ظهورنده ترتیب و تشکیل اولنوب اولوقلرده اکثر دولده موجود اولیان عسا کر موظفه منتظمه نک ثمره نظام و انتظاملریله سلاطین عثمانیه حضراتی فتوحات متوالیه نائل و دشمنلرینک دفع و تنکیله کوکب شان و شهرتلری اوج کاله واصل اولمشیدی عصر سلیمان خاندن صکره اداره دولت بشقه رنک و هیئته منقلب اولمقدن ناشی موظف و منتظم اولان عسا کر عثمانیه نک یعنی یکیکچری و سپاهینک دخی انضباط و انتظاملری مختل و مشوش اولدیغندن تحدث ایدن عتوو طغیانلری درجه درجه تزايد ایدرک سلطان عثمان وقعه فجیعیه سی مثللو نسیانی ناقابل بر مصیبت عظیمه جه قدر منتهی اولدی مؤخرآ سلطان مراد رابع و کوپرلی محمد پاشانک سیف سطوتلریله تأدیب و تربیه اولندیلر ایسه ده هیئت منتظمه سابقه لرینه

ارجاعی ممکن اومدی مع مافیه معایش عسکریه اولان علوفه مخصوصه نك بيع و شراسنه مساعدده اولندقدن صکره مخصصات عسکریه نك قسم اعظمی ایرادجیلره منتقل اولمغله جیوش موظفه اطلاق اسم بی مسمی حکمنه کلوب یکچریلک فخری بر خدمت دیمک اولدی پیدر پی ممالک دولت علیه استیلای اجانبه کرفتار اولمغه باشلادی .

بناءً علیه احوال سیاسییه واقف اولان ارکان دولت بیننده عسا کر منتظمه ترتیبینک لزوم و اهمیتی میدانه چیقوب حتی داماد ابراهیم پاشانک اواخر ایامنده بر مقدار عسکر ترتیب و اسکدارده بر قشله تنظیم اولنمشیکن بطریق وقعه سنده محو و مندرس اولدینی شمعدانی زاده تاریخنده مسطوردر عصر محمود خان اولده ینه بوداعیه تجدد ایدوب بعض نظامات ولایچه لر قلمه الیرلمش ایسه ده اجراسنه موفق اولنه میوب فقط طوبجی خبره جی اوجاقلرینه عسا کر منتظمه ترتیبه شبه نظام ویرلمشدی سلطان مصطفی خان ثالث حصر تلری بومقصدک حصولی پک زیاده ارزوایلمش اولدینی حالده یکچریلرک سرکشکلرندن خوف اولنه رق میدانه کتوریلهمدیکی محققدر عصر سلطان عبدالحمیدخان اولده صدراعظم اولان خلیل حمید پاشا عاقل فطین و حمتکار بر ذات اولمغله عسا کر عثمانیه نك اصلاحنه تشبث ایدوب اوله سرعت طوبجیلری نامیلله اولوقته کوره منتظم و مکمل وقشله نشین اوله رق ایکی بیسک نفر طوبجی تحریر و خبره جی ولغمجی اوجاقلرینی دخی بر درجه ده ها تنظیم ایلدی ثانیاً سرحدده بولسان یکچریلری یوقلمه ایتدیروب کلیتو محمولات میدانه چیقارمش و مخرب نظامات عسکریه اولان علوفه بيع و شراسنی کلیاً منع ایدرک استانبولده بولسان یکچریلرک دخی یوقله مسنه شروع ایلمش اولمسیلا تحبث ایدن قیل وقال خصماسنه سر رشته اعتراض اوله رق القات مفسدتکارانه ایلله بیچاره بی قتل و اعدام ایتدیردیله و بقای دولت ایچون اهم والزم اولان او یله بر تشبث خیرک تأخرندن حاصل اوله جق نتایج وخیمه بی یادرک ایده مدیلر و یاخود اختیار ایلدیله متأخرین ارکان دولتدن قیوجی مراد پاشا و کوپرلی محمد پاشا سکسان طقسان یاشنده اولدقلری حالده اصلاح مزاج دولت ایچون راحت و حضوری ترک ومدت صدارتلیری سفرلرده آت اوزرنده و انواع مشاق و مخاطرات ایچنده مرور ایلیشکن تبابع دهور مزاج ابنای زمانی افساد ایلدیکندن مشارالیه مزاج و مشوارنده جوان طبع و یأس و کسلدن عاری ذاتلر و اوصاف برکزیده بی جامع آدملر بتشدیرمکه مزرعه دولتک قوتی قالمامغله نه راغب پاشانک فضل و کمالیدن ونه ده قوجه یوسف پاشانک امیانه فدا کارلغندن برثمره نافع حاصل اولماشدر یوز سکسان ایکی وایکی یوزایکی سفرلرنده اوروپالورک عسا کر

منتظمه سینه باشی بوزوق حکمنده اولان جیوش اسلامیه نیک مقابله ایدمه جهکی عامه ارکان دولت نظرند مرتبه ثبوت واصل اولمش اولمغه سلطان سلیم مرحومک اوائل سلطنتده نظام جدید نامیه عساکر منتظمه ترتیب و قشله و سائر لوازماتی تتمیم اولنوب تکمیل و تنظیملرینه اقدام و همت قلمقده بولمشدی لکن مدیران سلطنت بوعسکرک یکچریلرله برابر دوام و بقای حیزامکانده اولدیغنی تفتن ایتمکه و بر قاج سینه ظرفنده عساکر مرقومه یکچریلری الفا ایدمه بیلجک مرتبه رسیده اولمغه بغته یکچیری اوجاغنک رفی خصوصنده متفق الکلم بولمشلر ایسه ده سلطان سلیم خان حضرتلرینک حلم و شفقتلری مانع مجاسرت اولدیغندن یکچریلر فرصتی دوشیروب شهریار مشارالیهک خلیعه ارکان دولتی کشته شمیشر اعتساف و عساکر منتظمه بی دخی محو و اتلات ایلدیلر علمدار پاشا و قهسی دخی اشو مقدمه یه تالی اولدی .

بوندن صکره یکچریلرک کانون عتو و طغیانلری لهیب افروز اشتعال اولوب وقعه خیریه یه قدر بر اختلال دائمی ایچنده بولندیلر بو وجهله امالی غیر مسبوق صورتده تمتد اولان آرزو نلقلری نفرت عامه بی مستلزم اولدیغندن وقعه خیریه ده پک قولایلقله تنکیل و الغاری میسر اولدی نظام جدید عسکرینک یکرمی بیکنن زیاده یه واصل اولدیغنی تاریخلرده روایت قلمقده ایسه ده بونلرک ساکن اولدقلری سلیمیه قشله سی شمیدی قشله نیک ثانی راده سنده ولوند چفتلکی دها کوچک اولدیغنی اووقلری مدرک اولنلر متفقاً روایت ایدرلرایدی بو حاله کوره مذکور قشله لرک اولمقدار عسکری استیعاب ایدمه جهکی درکار اولدیغنه و قونیه والیسی قاضی پاشا معیتده و بولی متسلمی احمد آغا رفاقتنده تنظیم قلمش و قونیه و بولیده انشا اولنان قشله لرده اقامه اولمش اولان نظام جدید دخی ایکی اوج بیك کشیدن عبارت ایدوکی کذلک مسکنلری دلالیله میدانده بولندیغنه نظراً یکرمی بیك راده سنده و ارمق مستبعددر اکثر خلقت مشهود اولان جمعیت عسکریه بی اوج مثلی تخمین و اشاعه ایللری طبایع بشریه اقتضاسندن اولدیغندن بوروایتک دخی اوقیلدن اولمی ظن اولنه یور بروجه مسطور استانبول و قونیه و بولیدن غیری یرده نظام جدید یاییله میوب جبار زاده دخی تعهد ایتش ایسه ده فعله کلامشدر چونکه جبار زاده عاقبت اندیش بر آدم اولدیغندن بو خصوصده جانب سلطنت سینه دن وقوع بولان تکلیفی ردایده میوب فقط بنده بند بر لایحه تقدیم ایدرک مألنده امر دولتی اجرا ایدمه جک ایسه ده ایشک نیک و بدنه متداخل و مسؤولیته شریک اولیه جغنی بیان ایتش و صدر عصر بوئسان کچی بوینوزی ابراهیم پاشا دخی هر بندک اوزرینه شرح و یروب تمهیر ایلشدر بولایحه

منظور فقیر اولوب تاریخچه نظراً سلطان سلیم مرحومك اواخر ایام سلطنتی اونیق حسابیه موقع اجرایه کله مدیکی وقوعات دلائله متیندر .

وقعه خیریه نك ايرتسی کونی عساكر منتظمه تحریرینه شروع اولوب پیدرپی تکثیرینه اقدام قلمقده اولدینی حالد ایکی سنهیه وارمق سزین روسیه سفیری ظهور ایدوب عساكر منتظمه ایسه هنوز اوتوز طابوره بالغ اولمامشدی حسب القدر مسفولولر مظهر غلبه اوله رق ادرنهیه قدر پای انداز تجاوز اولملریله استانبولده یکچیری بقیه سی وغیر - تکشیری اولان اجلاف بومغلوییتی یکچیریلرک الفاسنه وجیوش منتظمه ترتینه عزو واسناد ایدرک انواع قیل وقاله جرأت وبعض مرتبه نمایشه مجاسرت ایتشلر ایسه ده سلطان محمود خان حضرتلری مهیب وغیور برشهریار قوی العزم اولدقلرندن اصلا فتور کتور میوب لازم کلنلری تأدیپ وتأسيس نظامات عسکریهیه فوق الغایه اهتمام ایتکله برطرفدن قشلهلر وخسته خانهلر ودبویلر یاپیلور وبرطرفدن عسکرک تکثیریه برابر اوروپادن تعلیمجیلر وخواجهلر جلب قنهرق تعلیم وتعلمک اکالنه چالیشلور ایدی عساكر منتظمه موظفه خاصه ومنصوره نایله ایکی صنفه تقسیم وبعض وزرا معیتلرنده دخی طابورلر تشکیل اولونوب الی التمش بیک زاده لرینه بالغ اولدینی حالد الی تاریخنده اناطولی وروم ایاتک ایالات مناسه سنده عساكر ردیفه ترتیب وتحریر اولندی اشوب عساكر ردیفه هر سنجا قده اوچر دردر طابور دن عبارت اولملره هر ایاتک اونر اون ایکشیر طابور ردیفی حاصل اولوب ولایه عظام بونلرک مشیری وقوماندانی ایدی اهلینک شوق وغیرت لرینی مستلزم اولقی اوزره عساكر مذکور دنک بیکباشی وقائم مقام ومیرالایه قدر ضابطانی مامکتلرینک اعیان ووجوه زاده لرندن ترتیب اولوب عساكر منصوره دنک ربع معاشلری ویریلور . وهفته ده ایکی کون البسه عسکریه یی لابس اوله رق تعلیم ایدرلر وسائر کونلرده ایشلریله مشغول اولورلر ایدی .

سلطان محمود خان حضرتلری بدایت نظامده اندرون اغلرندن برطابور ترتیب ایدوب تعلیم ایتدیرر وبعضاً بالذات کندوسی قومانده ایلر ایدی سرعسکر خسرو پاشانک اوتهدنبرو دائره سنده یتیم سکسان کوله اکسیک اولمیوب بونلری اوقودور ویازدیرر وبعضیلرینی اوروپایه کوندروب تحصیل فنون ایتدیرر ایدی . نوبنو کشاد اولنان عساكر خاصه ومنصوره طابورلرینه بونلردن ضابطان انتخاب قانمقده ایسه ده فنون حربیه یی تعلیم وتعلم ایتدیرمک اس اساس نظام اولدینی تین ایتکله الی بر سنه سی مکتب حربیه انشا وخواجه وشاگردانی ترتیب وتنظیم اوله رق مقتضیات عسکریه اجرا قلندی . یعنی

ردیفتر عساكر منصوریه قلب و ضابطانی مملکتلرینه ارجاع قلوب بش سنه خدمت
عسکریده بولندقدن صکره ردیفه چیقماق نظاماتی و تفرعاتی اعلان و خاصه و در سعادت
وروم ایلی و اناتولی و عربستان اردولری نامیله بش اردو تشکیل اولنوب هر بریسنك
سواری و پیاده و طوینجی اوله رق اوتوز بیک کشیدن مرتب اولسی تصویب قلندی .
چونکه بدایت نظامدن برو عساكر خاصه و منصوریه النان نفرائك خدمتلی مدتی
غیر معین اولدیغندن خلق عسکره کیدن اولادلرینه فوت اولمش نظریله باقرلر و بوجهتله
عسکرلکدن کمال مرتبه نفرت کوسترلر ایدی .

وقیله سلطنت سنیه نك صنف عسکریده سندن بر شعبه اولان تیمارلو سوارسی یوز
بیکن متجاوز منتظم و مکمل و امور حربیه ده و فن فروستده ماهر ایالات عسکری
ایکن فصول سابقه ده بیان اولدینی اوزره درجه درجه نظام و انتظاملری مختل
اولدیغندن وقتاً بوقت اصلاح احوال لرینه اعتنا اولمش و عصر عبدالحمید خان اولده توجیهاتلرینك
اجراسی و بر طرفه مأموریتلری وقوعنده صورت حرکتلری حقنده نظامات جدیده
وضع اولمشیدی . ایکی یوز بش سنه سنده اناتولی ایانتنك بالجمله سپاهیسی اسماعیل قلعه سی
محافظه سنه مأمور اولدقلری حالدده روسیه لو حرباً قلعه مرقومه یه مستولی و یک چوق
تلفات واقع اولدیغندن شهدانك کیفیات و مقداری تبیین ایدنجه یه قدر محلول دینیلان
تیماراتك توجیه اولنماسی خصوصنه اراده سنیه متعلق بیورلمشیکن بعد المصلحه اصحاب
تیمارك اکثریسی حیاتده و بلده لرنده استراحتده اولدینی نمایان و سفره کلیوب برر صورتله
الای بکلرینی و سائر ضابطلرینی ارضا و اسکات ایلدکلری عیان اولغین هم ارباب تجارتی
بر نوع تأدیب و همده نظام جدید ایچون واردات بولماق مقصدیله تیمارات محلوله جبهه لرینه
یعنی ملازم لرینه توجیه اولنوب جمله سی مقاطعه یه تحویل و میری یه ضبط اولماق جاری
ایدوکی فصول سابقه ده اتیان اولمشدر بناء علیه زعامت و تیمارلرک مقداری تنزل ایتمش
ایسه ده یه یکریمی اوتوز بیک سپاهی موجود اولدیغندن بونلرک عساكر منتظمه هیئته
قونلسی تصمیم و آایلر ترتیبیله امرای عساكر موظفدن و کندولرندن ضابطلر نصب
اولنهرق تعلیم و تنظیم لرینه اعتنا قلندی یدی سکر سنه بویله جه مرور ایلدکدن صکره
آلتش تاریخنده عساكر ضبطیه و وظائفی ایفا ایلر ایچون حکومت اداره لرینه جلب اولندیلر
صدر اسبق مترجم محمد رشدی پاشا مرحومدن استماع قلندیغنه کوره ذکر اولنان سپاهیلر
سنوی ایکی یوز بیک کیسه یه قریب تیمارات بدلاتی اعطا قلنمقده اولدینی حالدده لایقیه
استفاده اولنه مدینی و بو قدر پاره ایله مکمل و منتظم یکریمی بش بیک سواری اداره

اولنه بيله چكى تذکر و مطالعه قلنديغندن التمش اوچ سنه سی کافه ارباب تیار باقید حیات نصف بدل تیار ایله تقاعد ایدلدیلر .

واقعا وزرا و امرانك سوء استعمالینله اکثر زعامت و تیارلر نا اهل و ضعفاالیرینه کچوب عادتاً ما کل حکمنه کیرمش اولدیغندن بونك اصلاحی لازمه دن ایدی لکن کلیاً الغا اولمقدن ایسه تحت نظام و انتظامه آلمسی دها خیرلو اوله جفی شمیدیکی حالده متفق علمدر چونکه لسان قانونده صاحب ارض دینیلان سپاهیلر تیارلری داخلنده بولنان قرانك جدبجد ضابط و حامیسی اولدیغندن اهالی نظرند قدر و حیثیتلری و قوه عصیه لری وار ایدی و زراعت و حرثتدن خالی قالماسی منفعتلری اقتضاسندن ایدو کندن اهالی یه اقتضاسنه کوره چفت و تخم ادانه ایدرلر و صو باصمق و بطاقلق حاصل اولمق کبی مانع زراعت حالات و قوعنده اهالی بی جمع ایدوب علی قدر الاستطاعه دفع مضرت ایلرلر ایدی . برده بونلرک لوازماتلرندن بولنان الك برنجیسی آت اولدیغندن دائماً حیوان یتشدرمکه اعتنا ایده کملریله ممالك محروسه ده استلیدیکی قدر حیوان بولنور ایدی که بوماده مهمه یتارلورلرک الغاسندن یکرمی یکرمی بش سنه صکره لری عسا کر نظامیه ایچون ممالك دولت علیه ده حیوان بولنه مبهرق ممالك اجانبه مراجعت اولتمق محبور یتیلله ثابت اولمش و اسلافك بومثللو تأسیساتده اولان دقایق و مطالعاتی بونکله دخی تحقق ایلمشدر .

بالاده تسطیر اولندیغی اوزره طوبیجی و خبره جی و انعمجی او جاقلری اللی آلتش سنه دنبرو فی الجمله نظام و انتظام تحتنه وضع اولمش و وقعه خیریه ده خدمت دولته بولنش اولدقلرندن بونلرک الغاسی طرفنه کیدلیوب اصلاح احوال و توثیق نظاماتلرینه مباشرت و چور باجی و اوسته و سائر یکیکچریلره منسوب ناملرله مسمی اولان ضابطلرینه عسا کر منظمه یه تطبیقاً یوزباشی و بیکباشی دینلوب طابورلر و آایلر ترتیب قلندی و جمله سی بر اشدریلوب طوبخانه مشیرلکی احداث اولندی جلوس عبدالجید حانیدن صکره حربیه نظارتی که اولعصرک اصطلاحنجه اعمالات لوازم حربیه ایله مکلف ایدی بومأموریت و بار و تخانه لر نظارتی کاملاً طوبخانه مشیر لکنه علاوه و الحاق قلنمشدر .

ترسانه عامره نك کدکلو تعبیر اولنور طوبیجی و آرمادور نفراتی ایچون جزایرلی حسن پاشا مرحوم قشله انشا ایتدیروب علی الدوام ترسانه ده توطین ایلمش و نظام جدید شروع اولندیغی وقت بالجمله قبودان و کمی خواجه لرینک و طوبیجی ضابطاننک وظیفه لری تزئید و تنظیم قلنمغله برابر کیلره مطبخلر انشاییه عسا کر بحریه یه چور با و پلاوویرلمکده یاشلامش ایسه ده بنه هر سنه روز حضرده ساحل اولان یرلردن بیراق عسکری تعبیر اولنان

کوکلو عسکرلری کلوب کملرہ بالتقسیم سفر دریا یا اولندقدن صکرہ روز قاسمده مملکتلرینه کیدرلر و بونلرہ قوری تعیین و یریلہ کلدیکندن کملرک ایچنده بقال و مناود کانلری آچوب سفینه لرک ایچنی چارشو و بازارده دوندیررلر ایدی .

آرمادور نفراتنک اکثر بی روم طائفه سندن ایکن روم اختلالنده بونلردن سلب امنیت اولندیغندن طرد اولندیلر ایسهده فن دریاده کسب مهارت ایتمش اولملریله عصاتنک خلیجه ایشلرینه یرادقلری اول عصرده یتشمش اولان قپودانلردن استماع اولنور ایدی وقعہ خیریه دن صکرہ ارتق بایراق عسکری ابطال و عسا کر منتظمه بحریه ترتیب اولنوب روملردن ینه نفرات آلمغه باشلاشمش ایسهده جبخانه جی کبی مهم ایشلرده و اونباشی و چاووشدن بیوک ضابطه کده استخدام اولنمز لرایدی آلمش درت تاریخنده ینه ترک اولندی سلطان محمود خان حضرتلری عسا کر منتظمه نک ایلروله مسنه بالذات اقدام بیوردقلری مثللو ترسانه نک دخی اصلاحنه اهتمام بیورملریله اوروپادن خواجهلر و معمارلر و مهندسلر جلب ایتدیروب مکتب بحریه نی تشکیل و فنون بحریه نی تعلیم ایتدیرد کلرندن ماعدا طلبه نک مستعدلری لوندریه اعزام و انکلیز کملرنده سیر و سیاحت ایتدیریلرک علماً و عملاً فن دریاده ماهر ضابط و قپودانلر یتشدیرلمکة اعتنا و غیرت قلندی

سفن جسمه نک تعمیر یچون عصر سلیم خاندہ برحوض یابلدیغنی مثللو سلطان محمود و سلطان عبدالحمید زمان سلطنتلرنده دخی برچوق انشا و ترقیات فن بحریه تطبیقاً فابریقه و دستکاهلر و محزنلر بنا اولنوب ترسانه عامر نک کوندن کونه اکمال نواقصنه همت قلندی و سلطان عبدالعزیز خان حضرتلرینک اقدام مجددانه لریله اوروپاده و ترسانهده اون بش قدر بیوک و کوچک زرہلی سفن حریه یابدیرلدی ضبط و ربط ممالک و محافظه طرق و مسالک و لایه یچون و متسلمین و وودملر کندی بدنلرندن دلی و تفنکجی و سکبان ناملریله عسا کر متنوعه استخدام ایدرلر ایدی تنظیماتدن صکرہ هر ولایتک اقتضاسنه کوره ضبطیه نفراتی و اموال امیریہ نک استیفاسه یچون تحصیلدارلر تعیین و صکره لری عسا کر منتظمه تطبیقاً آلایار و طابورلر و ضابطان ترتیب اولنوب الحاله هذه استکمال نظامات و انضباط اداره لرینه چالشمقده درکه بوگونکی کونده یعنی اوچ یوزبر سنه هجریه سنده مقدار ضابطان و نفرات اللی بیکی متجاوز و مصارفات واقعه لری ایکی میلیون لیرایه قریبدر .

احوال مالیه

سلطان مصطفی خان ثالث حضرتلری مبالغ کلیه ادخار ایتمشیکن سکسان ایکی سفری اوغورنده استهلاك اولنوب حتی خلیل حمید پاشا برهند ایلجیسیله مکالماتده سفر مزبور

ایچون یالکز خزینۀ دولتدن ایکی یوز بیک کیسه صرف اولندیغنی سویلشدر اول عصرده یلدرز التونی درت درت بچق غروش راده لرنده اولق حسبیله سالف الذکر ایکی یوز بیک کیسه شمیدیکی حسابیه کوره اون ایکی ملیون لیرا درجه لرینه بالغ اولور ومذکور سفر ایسه بش سنه متمد اولدیغندن ظاهر حالده بوقدر مصرف آذربشی کورینور لکن فصل سابق تکمله سنده بیان اولندیغنی اوزره سفره مأمور اولان ولایه و متصرفین حوزه حکومتلری ایچنده بولنان اهالی یه سفریه نامیه ویرکو توزیع و تحصیل ایتدکلرندن ماعدا صیف وشتا ترتیباتی اوله رق هر بر مملکتدن تحریر اولسان جیوش اسلامیه نك لوازمات سفریه لری و التي ایلق علوفه كذلك مملکتلری اهالیسنه بالتوزیع استحصال اولنه کملکه وزعامت و تیمار اصحابی دخی ذاتاً دیر لکلری حاصلاتیله موظف بولمغله بونلر خزینۀ دولتدن ویریلان پاره نك خارجنده در قینارجه مصالحه سندن صکره سلطنت سنیه نك آز وقت ظرفنده ینه حربیه مجبور اوله جغنی تحقق ایتک حسبیله دونماتک تکشیرینه و طونه سواحلنده استحکامات انشاسنه و ذخیره ادخارینه اقدام اولمغله برابر اس اساسی لوازم اولان پاره استحضارینه دخی اعتنا اولنوب ضربخانه عامرده او توز بیک کیسه تهیه ایدلمشیدی ایکی یوز بر سفری ظهورنده در حال او توز بیک کیسه قدر مبالغ دها تدارک اولندی که جزایرلی حسن پاشانک مصر دن کتوردیکی و اعانه حربیه اوله رق کندوسنک اعطا ایلدیکی یکر می بیک کیسه ایله حلب جوارنده واقع مقاطعات امیریه نك مالکانه مقاطعاتنه تحویلده طالبلرینه صابلمسندن حاصل اولمشدر

حساب سالف الذکر اوزره بونلرک مجموعی دخی درت ملیون لیرایه قریب بر مبالغه بالغ اولور عصر سلیم خانیده نظام جدید تنظیمنه شروع اولندقدن مصارفنه قارشو لاق تدارکی لازم کملکه قدیم شق ثانی دفتر دارایی نظام جدید دفتر دارلغنه تحویل و مستقل خزینۀ تشکیل اولنوب پموق و انشیه و افیون کبی شیلر یدواحد اصولی اوزره تحت انحصاره النهرق و زجریه رسمی ازسرنو تنظیم قلنه رق بونلرک حاصلاتی نظام جدید خزینهنه ایراد قید اولندقدن بشقه محلول اولان جسم مالکانه مقاطعاتی و تیمار وزعامتله دخی خزینۀ مرقومه طرفندن ضبط و سائر صورتلرله واردات بولندجه ضم و غلاوه قلنور ایدی حتی سلطان سلیم مرحومک خزینۀ اوراقده منظور فقیر اولان برقطعه خط هایونلری مفادی (والدهم مرحومه نك حاصلرینی نظام جدید خزینهنه ویرمکی تصور ایلدم ایسه ده والده حاصلری ایدو کندن و قتیله اخراج قلنور مطالعه سنه مبنی ترسانه ده انشا اولمقدن اولان حوض مصارفنه قارشو لاق تخصیص ایلدم) حکمنی متضمندر که نظام جدید خزینهنسنگ توسیغنه نه درجه لرده اقدام قلندیغنی بوندن معلوم اولور

بعض تواریخك روایتہ كورہ نظام جدید خزینہ سی وارداتی یتش بیک کیسہ یہ رسیدہ اولمشیکن وقعہ معلومہ دہ خزینہ مذکورہ الغا و وارداتك بعضلری دخی ابطال و افنا اولوب قصوری ایچ خزینہ شعبہ سی اولان ضربخانه عامرد خزینہ سنہ نقل اولندی چونکہ مره بعد آخری ذکر وتفصیل اولندیغی اوزرد دولتك میری خزینہ سی وایچ خزینہ نامیله ایکی خزینہ سی اولوب مصارفات دائمه حکمنده اولان علوفه عسکریه ایله بعض مصارفات متفرقه میری خزینہ سنندن رؤیت وتسویه وفضله واردات ایچ خزینہ تعبیر اولتان اندرون هایون خزینہ سنہ وضع اولنه ککله سفر ظهورنده ویاخود مهم بر مصرف کای وقوعنده اورادن اخراج واعطا قلنور ایدی

ینه روسیه سفری ختامندن صکره بیک ایکی یوز یکرمی طقوز سنه سنندن اوتوز الی سنه سنه قدر واردات مرقومهدن خلیجه مبالغ تراکم ایتش اولدیغی حالده روم اختلالنده صرف واستهلاك اولمشدر قرق بر تاریخنده عساكر منتظمه تنظیم اولنغله ینه قارشوایق تدارکی ایچون كرك استانبولده و كرك طشردده واقع جسیجه شهرلرده رسوم احتسابیه احداث اولندیکه یومیه دكاکین وسائردهن عبارت اولوب برنوع پاننت رسمی دیمك ایدی حتی شامده حادث اولان فتنه وسلم پاشانك اتلافی بونلردن نشأت ایتشدر برده اناطولایده واقع اون بش قدر سنجاق ولایه و متصرفینه توجیه اولنیوب متسلم ایله اداره ایتدیریلهرك ولایه و متصرفینه طائد اولان منافع مقاطعات خزینہ سی که عساكر نظامیه خزینہ سی دیمك ایدی اورایه ایراد قید قلندی

نافذ پاشا مرحومدن استماع اولندیغنه كورده تنظیمات خیریه یه قدر معینیات مرتبه دن بشقه سلطنت سینه نك كافه وارداتی الی یوز بیک کیسه راده لرنده اولوب بوقدر پاره ایله روسیه و مصر سفرلری اداره و روسیه تضمیناتی اولهرق بشیوز بیک کیسه قدر مبالغ اعطا قنمش اولدیغی حالده عساكر ردیفه دن ماعدا خاصه و منصوره و بحریه و طوینچی اولوق اوزرد یوز بیکه قریب جیوش موظفه نك و یکرمی قدر اوج انبارلی و قباق و فرقتین و بر چوق سفن صغیره نك معاشات و مصارفاتی کونی کوننه تسویه اولنور و مصارفات معتاده دن بشقه فضله اولهرق مستقو سفرنده خسار دیدده اولان محللر اهالیسنه ایکیشر اوچر بیک کیسه ادانه قلنور ایدی که تفصیلاتی اسکی تقویم وقایع نسخه لرنده مسطوردر بودخی سلطان محمود خان حضر تلرینك كافه مصالح سلطنت سینه یه بالذات نظارت و حسن اداره یه اهتماملری ثمره سی ایدی خافان مشار الیه حضر تلرینك ارتحاللرندده طوبوقو سبرای هایوننده واقع شوقیه دائرده سننده سکسان بیک کیسه لك التون و مالیه و مقاطعات اوقاف و ذخیرد

خزینہ لرندہ دخی مبالغ و غیرہ مدخر و موجود ایدو کی ینہ ناند پاشا مرحوم مدین استماع قائم شد .
 تنظیمات خیریه اجرا سنده واردات دولت دفعه بر مثلی راده سنده ترقی ایتیمش ایسه دم
 انک مقابلی اولان مصارفات دخی یکون مصارفاتی او نسبتده قبارتدی و تغییر اصولدن
 ناشی واردات تأخر ایدرک خزینہ جه مضایقه حاصل اولدیغندن یوز بیك کیسه لک قائمه
 نقدیه اخراج قانیدی که خزینہ صورتلری مثللو یازمه و مالیه ناظری بولنان صائب پاشانک
 مہر یله مہور ایدی ایرتسی سنہ صفوتی پاشا مرحوم بالاستقلال مالیه ناظری نصب قائمقله
 و مشار الیه فن آدارده ماهر و درایت و لیاقله متصف بر ذات اولمقله درت سنہ قدر
 متمد اولان اشبو برنجی نظارتنده سالف الذکر قوائم نقدیه یی احسا و بدایت
 تنظیماتده تخصیص اولنان معاشات لا تحصایي تنقیح والغا ایدرک خزینہ یی بر حسن حاله
 قویدی که معاشات و مصارفات کونی کوننه اعطا اوانوب حتی بعضاً ای باشندن برکون
 اول عسکرک توزیع معاشاتنه مباشرت قانور ایدی . مع مافیہ وزرانک یتیمش بشر بیك
 وعظمای رجالک یکر میشر اوتوزر بیك وطشره دنتردار و متصرفلرینک اونر اون بشر
 بیك غروش آیقلری وار ایدی . تصرفات مشروحه عموم آیالوردن یوزده شو قدر
 بوقدر کسمک قاعدۀ غیر صحیحہ سیله اولیوب لزومسز مأمورلری واهم اولیان مصارفاتی
 تنقیح ایله حاصل اولمشیدی .

دولت عایہ نک داخلأ و خارجأ اصلاً دیونی اولیوب بعض تجارتدن مہایمه اولنان
 اشیانک اثمانی اعطا قلنق اوزره تجاره تکلیف اولند قیجه مصارف نقلیه سندن اجتناباً
 المقدن استنکاف ایدرلر ونه وقت اقتضا ایدر ایسه اولزمان اخذ ایدرز دیرلر ایدی .
 مشار الیه التیمش برسنه سنده ورضا پاشانک انحطاط اقبالنده عزل اوانوب یرینه ناند پاشا
 مالیه ناظری اولدی و خزینہ ده یوز طقسان بیك کیسه اموال مدخره بولدی بوندن صکرده
 رشید پاشا دوری ظهور ایدوب امور مالکیه و مالیه و خارجیه ده تغییرات کلیه حاصل اولمش
 اولوب آنجق انلرک تفصیلاتی و نتایج طبیعیہ سی احوال آتیہ وقوعاتنه عائددر .

سلطان مصطفی خان ثالث عصرندن سلطان سلیم مرحومک اواخر سلطنتنه قدراللی
 سنہ مقداری مدتده بانتدریج سیم مسکوکاتک وزن عیاری تنقیص اولمقله التونک فیائی
 بر مثلی ترقی ایلدی یعنی یلدر التونی درت بحق غروش راده لرندہ ایکن طقسوز اون
 غروش طوغری فیرلادی . سلطان محمودخان حضر تلری زماننده کرک التون و کرک کموش
 مسکوکاتده تبدلات کثیره واقع اولمقله ابتدای سلطنتلرنده یکر می بش غروش قیائله قطع
 اولنان محمودیه التونی که بر بحق درهم و یکر می ایکی عیارنده ایدی اواخر سلطنتلرنده

یتیم عز و شه چیقدی چونکه الکصره قطع اولنان مدوحیه التونی یکر می عیارنده و یارم
 درهم وزننده اولدینی حالده یکر می غروش فیأله تداخله چیقارلمشدر . سلطان سلیم مرحوم
 شهزاده ایکن اجداد عظامک سکهلرینی جمع ایدوب عیارلرنده اولان تفاوتی نظر تأسفله
 کوردر و کندولری نائل سلطنت اولدقده اصلاحنه عزم و جزم بیوررلر ایش . حالبوکه
 جلوس هایونلری اوان سفره تصادف واسوچ دولته اعانه حربیه اوله رق ویرلمسی شرط
 اتفاق اقتضاسندن اولان سکیز بیک کیسه نک ایفاسی کسب مشکلات ایتمکله بالضروره
 کموش مسکوکاتک عیاری تنقیص اولندی و بوتدیر ایله دفعه برایکی بیک کیسه منفعت
 کورلدی . سلطان محمودخان حضر تلری دخی بعض سبکمغزانک القاآتیه ایچ خزینه ده
 مدخر بولنان نقودی نوبنو احداث اولنان مسکوکاته تبدیل ایتدیره رک غروش حسابیه
 اولان ترقیاتی منفعت صحیحجه اعتقاد ایدرلر ایدی . واقعا بوصورت یکیکچری علوفه سی
 مثللو معیناتی تنقیص دیمک ایسه ده اشیا فیأتنک اوتوز سنه ظرفنده اوچ درت مثلنه ترقیسی
 مستلزم اولدی . اوائل سلطنت عبدالحمید خانیده یعنی التمش درت تاریخسنده تصحیح
 سکله اولنوب یوزلک التون ویکر میلک حمیدیه واقسامی قطع اولندی . شوراسی جای
 دقتدرکه سیم مسکوکاتک الک معیاری اولان متالک اقسامک بشاکنده طقسان بش پاره ک
 قدر مالیت اولدینی حالده الی سندن متجاوز اتونندن جزوی فرق ایله تداول ایلدی .
 یعنی یکر می برعدبشلسکه بریوزلک التون تبدیل اولنور ایدی . بوندن استدلال اولندیغنه
 کوره برملیون کیسه ک قدر نقود مغشوشه قطع اولنمشیکن ممالک عثمانیه یه منتشر ومنقسم
 اولمق ودوائر امیریه ده قبول اولنمق وتناسبی مرتبه افراطه واصل اولمامق حسیله مالیتندن
 برملی زیاده کسب اعتبار ایتشددر . بوقضیه یی مؤخرأ قطع اولنان ودرجه افراطه ایصال
 قلنان باقر مسکوکاتک احداثی تأیید ایتشددرکه تفصیلاتی احوال آتیه یه عائد اولمسیله اولبابده
 اطناب مقال اولندی . فقط اشیانک تزايد فیأتی یا لکیز تغیر مسکوکاتدن اولیوب ترقی
 طبعی دخی ظاهر اولدی . چونکه ایکی سنه دنبرو مسکوکات برحاله ایکن اشیا ده برملی
 دها زیاده ترقی مشهود اولدی . منلا التمش تاریخخه یتیم تاریخنی بیننده بغدایک بهر
 کیله سی سکیز و طقوز غروشندن اون بش غروشه و لحم یاز وقیش اعتباریه اوچ غروشندن
 بش غروشه طوغری ایکن تاریخ تحریر اولنان اوچیوز سنه سی خلالنده برملی درجه سنده
 ترقی ایتشددر . التمش سکیز و طقوز تاریخلرنده شعیرک کیله سی و حطبک چکیسی التیشر
 غروشه مبایعه اولدینی خاطر نشان نامق الحروفدر . سکسان بش والقی تاریخلرنده بعض
 محالسه واردات عشریه برملی تزايد ایلدی بودخی اخراجات کمرکنک الغاسیله زراعتک

تکثرندن منبعثدر دنیلوب بعضلری دخی بونی رد ایله فیأت ذخائرک برمثلی ارمسنی واردات عشریه نك دخی اونسبتده تزايدینی مستلزم اولدی دیو مقابله ایلمشدرکه برنجیسی حساب تخمین ایکنجیسی حساب بسیطدر . دولتک احوال مالیه سی بومر کزده اولوب ارکان سلطنتک دخی ثروت وسامانلرینی ودارات واحتشام وعلو جنابلرینی ایراد ونمونه طرزنده بعض واقعات موثوقه لرینی ذکر وتعداد ایتمک نوعما فائده دن خالی اولماغله بیاننه مباشرت قلندی : ارکان دولت دنیلان صدر اعظم وشيخ الاسلام وقبودان پاشا واجله صدور ووزیر کتخداسی ودفتردار ورئیس کبی عظمای دولتک یالی وقوناق ودائرہ صاحبی کتخدا ومهردارلری اولدقدن بشقه اوتوز قرق دانه ملبس ومزین ایچ اغلری وبر اولقدردده چوقدارلری بولنور واشچی وسایس وقایقچی وسرایدار مثللو خدمه دخی داخل حساب ایدلکده بر ایکی یوز کشی یه بالغ اولور ایدی وسائر دارات واحتشاملری بونسبتده اولوب حتی ابراهیم کتخدا بر دفعه اتلرینک بر مقدارینی بعض بندکاننه اعطا ایتدکدنصکرده ارتق التمش آتم قلدی بعد ازین کیمسه یه ویرم دیدیکنی عاصم افندی مرحوم تاریخنده حکایه ایدر . خلیل حمید پاشایه برهند ایلاچیسی عرض معاونت زمیننده جانب سلطنت سینه یه بشیک کیسه ویره بیله جکارینی افاده ایدلکده مشار الیه اولقدر پاردینی بن وحاضر بالمجلس اولان قبودان پاشا پدرمز دخی ویره بیلور دیمشدرکه حساب عصره کوزه ایکی یوز الی بیک التون قدر ایدر . وقعه سلیم خانیده مقتول اولان والده کتخداسی یوسف اغا و ابراهیم کتخدا و کیزلی ستمه حاجی ابراهیم افندینک اکثر اشیا نفیسه لری قائممقام موسی پاشا وسائر یغما کرانک دست غصبیلرند نابید اولمشیکن مخافتلری اوتوز بیک کیسه یی تجاوز ایتشدر بونلرک عطایا واتصدقاتلری حقنده ایشیدیلان حکایه دخی عقل قبول ایدمیه جک درجه لرده مبالغه لی ایسه ده رمضانلرده و سائر اوقاتده فقرا محله سی اولان یرلره مخصوص آدملر کوندروب محله بقال واتمکچی وقصابلرینک ذمت دفتلری رؤیت وفقرا دینلرینی کاملاً اعطا ایتدیرمک عادات جاریه لرندن اولدینی و محبس لرده اولان مدیونینک وقت وقت بورجلرینی آسویه ایدکلدکاری متوترأ ثابتدر . روایات موثوقه دندرکه طوبقپولی صالح افندی شیخ الاسلام ایکن سلطان مصطفی خان ثالث حضر تلی تبدیلاً خانلرینی تشریف ایدوب اثنای صحبتده (افندی هر وقت کلمک ایسترم فقط قوناغکز پک اوزاق یرده در) دیدکده جوابنده (بشقه بر قوناق تدارک قابل ایسه ده جوارمزده بولنان ومنظور شاهانه کز اولان شو اولرک هیچ بریسنده مطبخ بولمیوب سایه هایونکزده طعاملری بنده خانه کزدن

کیدر و بو جهته مخرومیتلرندن اخترازا تبدیل مسکن ایدهمیورم) دیمشدر
 کوسه کتخدانامیله مشهور اولان مصطفی رشید افندینک چاملیجهده واقع کوشکی که
 حالا سامی پاشا مرحومک ورثه سندهدر و کوسه کتخدا بناسیدر بر مقدار باغچی
 حاوی ایدوکندن بعض بندکانی انصاننده واقع بر باغی مبایعه ایتک اوزره تشویق
 و اوزومندن استفاده اولتور دیو ترغیب ایلدکه اوزوم و سبزه یتشدیرمک زراع اهالی به
 عتد برسی اولوب انلرک منافعه اشتراک طبعی بزه یاقشمنز مناسب اولان باغچیلر اوزوم
 کتورمک و بز پاره ایله آلمقدر دیمشدر مع هذا مشارالیه خست و اداره به اعتنا ایله
 مشهورلردندر.

محمد علی پاشانک انسلاب شعوری حسابیله اوغلی ابراهیم پاشا مصر والیسی اولوب
 انجق متعاقباً وفاتی وقوعنه مبنی التمش درت تاریخنده عباس پاشا ایالت مصر ایله کامروا
 اولمش و عیسنک و بیوک باباسنک مساکلرینی ترک ایله طرف سلطنت سنییه ابراز تمحض
 ایتشیدی لاجل الشکر اسبابوله ورودنده وکلا و مأمورینه وحق قلملره قدر عطیهلر
 اعطا ایلدی مالیه ناظری بولسان نافذ پاشا که بودخی خست و اداره امور بیتیه ایله
 معروف و ثروت و غنا ایله مشهوردر خصه سنه اصابت ایدن بشیوز کیسه نی تذکیر ماسبق
 ایله قبولدن استکاف و صدر عصر اولان رشید پاشا بوصورت ملتزم اولان مضی ما ماضی
 قضیه سنی اخلاص ایدمچکی جهته قبولانی ابرام و الحاح ایتمکه نهایت مشارالیه پاره بی المنه
 مجبور اولدیسده ینه کندوسی وضع ید ایتیوب بعض اصدقا و بندگانه تقسیم ایلدیکی
 مشهودات عاجزانه مدندز.

فصل سابقده ذکر اولان مناوبه منصبلری که مالیه خزینه سنه نظام ویرلدکه جمله سی
 لغو اولمشدر ازان جمله باش محاسبه دنیلان قلم خزینه عامر ملک اس اساسی اولوب دولتک کافه
 واردات و مصارفاتی و نظامات و قوانین مالیه سی و حتی اندرون هایون و خاص اخور
 خزینه لرنده بولان مجوهرات و هر نوع اشیا یوقلمه ده مقید ایدی قلم مذکور بر کیسه دارک
 والقی صنفه منقسم اوله رق الی خواجه نک تحت اداره سنده اولوب هر خواجه طوپخانه و ترسانه
 و مطبخ و ذخیره و حرمین خزینه لری مثللو شعبات خزینه نک حساباتنه مأمور اولمغله
 علی الدوام واردات و مصارفاتلرینی تدقیق ایدرلر ایدی قنغی خزینه دن اولورایسه اواسون
 اصحاب مطلوبه ویریه جک دین صورتلری مطلقا باش محاسبه دن اعطا اولتور و ذکر
 اولان شعباتک امانا و مأمورلری و خزینه کتخداسی و میراخور اغا تبدیل اولندقدن حسابی
 رؤیت و قیودیه تطبیق قنور ایدی

اشته باش محاسبه‌چی دینیلان ذاتکه اکثریا وزیر کتخداسی و دفتردار و رئیس کبی
عظما معزول قالدقچه بو منصبی و دفتر امانتتی و نشا‌انجیانی حائز اولورلر ایدی بو قلمک
خواجیه‌سی اولوب نادراً خزینیه کلور و اکثریا خانه‌سنده مقیم اولوب کیسه‌دار افندینک
کوندردیکی اوراقی صح و تمهیر ایدر ایدی مصالح جاریه‌دن النان خرچلردن قلمک
شاگردان و کتبه‌سینه توزیع خصوصی اجرا اولندقدن صکره‌باش محاسبه‌جیلره سنوی یوز
یکرمی بیک غروش مقدار حاصلات قالدیغی بعض معروضات قیودندن استنباط اولمشدر
اشبو قلم دفتردار بولنان ذاتک معیننده ایسه‌ده خلاف نظام ویا خود مغایر منافع
خزینیه بر امری صادر اولسه بلا تردد جواب ویریلور ایدی چونکه قلمک حامیسی
اولان محاسبه‌چی عظمای دولندن و بلکه دفترداردن حیثیتی ذواتدن اولوب دفتردارلر
بر وجهله بو قلم اوزرینه اجرای نفوذ ایده‌مزلر ایدی اشبو اصول پک
حکیمانه بر شی ایسه‌ده بالالتزامی وضع اولمشدر یوقسه کیف مانتق می تأسس ایشدر
یوزاسی محل شبهه‌در .

مواد خارجیہ

اشبو فصلده بیان اولندیغی اوزرد پروسیا و اسوچ دولتلیله تجاویزی و تحفظی عقد
اتفاق اولنوب بو اوانده واقع اولان ایکی یوز ابکی سفرنده اگر پروسیالیر حربه اشتراک
ایتمام‌شالر ایسه‌ده جسیم بر اردو سوقیله نتیجه‌لوری تهدید ایدرک قبل السفر معین اولان
حدود اوزرینه تجدید معاهده‌یه موفق اولدیلر فقط روسیه حقنده اولان تعهدلری
(له) تقسیم‌اندن حصه‌اخذی منفعتی اوغورنده ترک وفدا ایتدیلر اسوجلور دولت علیه ایله
برابر حربه قیام ایلدیلر ایسه‌ده نه‌چاره‌که بر قاق دفعه مغلوب اولملریله اکمال تعهده قدرتیاب
وسلطنت سینه‌نک عقد مصالحه‌سینه قدر پایدراوله میوب بالضروره بعض فدا کارلق اختیاریه
مسقولور ایله تجدید معاهده ایلدیلر دولت علیه حسب‌المقاوله اسوجلور سنوی سکزر
بیک کیسه ویرمک تعهدی التنده بولندیغندن خلیجه پاره ویرمش و بونک مقابله‌نده
اسوچ دونماسی بحر بالطقده بولنان روسیه دونماسه غلبه ایلدیکی جهته روسیه دونماسنک
آق دکزه کله‌نامسی منفعتنه دسترس اولمشدر .

ایکی یوزاون بر تاریخنده سلطان سلیم خان حضرتلری فرانسزلرک یاغلی‌باللی سوزلرینه
آلدانوب عقد اتفاق ایشیکن ایکی سنه مرور ایتمکسزین فرانسزلر بغته مصره استیلا
ایملریله سلطنت سینه دخی انکلتزه و روسیه‌لور ایله اتفاق ایدرک خطه مصریه تخلیص

اواندی چونکه اولوقلرده انکلیزلر فرانسه لولرک دشمن دائمی و مسقولر دخی فرانسزلر ایله بوزوشوق اولدیغندن منافع تقابل ایلدی چند سنه مرورنده فرانسه ایمپراطوری بوناپارته ایکنجی دفعه اوله رق سلطان سلیمی اغفال و عقد اتقاقی از سرنو استحصال ایسیله بو کیفیت انکلیتره دونماسنک استانبوله و رودینه و روسیه لونک اعلان حرب ایلمسینه و بالاخره سلطان سلیمک دوچار فلاکت اولمسینه سبب اولمشیکن فرانسزلر تیلست نام شهرده مسقولولر ایله عقد مصالحه ایتدکارنده دولت علیه یی براقیویردیله و دها غیری ممالک عثمانیه نك تقسیمى مذاکرانه کیریشدیله ایشه فرانسه اتفاقلری دخی بو نتیجه یی حاصل ایلدی. بوندن صکره روم اختلالی ظهورنده سلطنت سنیه بر متفق بولمغه موفق اوله میوب بالعکس فرانسه و انکلیتره و روسیه دولترى دولت علیه علیه عقد اتقاق ایتدلیله مورد قرالغنک حدوتی منتج اولدی. مصرلولر کوتاهیه یه قدر کللری اوزرینه سلطان محمود خان حضرتلری روسیه لولره مراجعته مجبور اولمغه بر فرقه عسکر ایله بر فیلو دونما بکقوزه کلشیدی یوقاروده اسمی و اوصافی مسطور اولان نامق پاشانک تحقیقنه کوره مصر و ایسی محمدلی پاشا صاحب قوت و قدرت اولان ولایه دولت علیه یه مکتوبلر کوندروب سلطان محمود خان حضرتلرینه بر طاقم عزویات بسط و بیانیه شهزاده سلطان عبداجید خان حضرتلری اجلاس ایدرک امور محتله سلطنت سنیه یی یولنه قویمق و بعدد بالاتفاق روسیه لو اوزرینه هجوم ایله اخذانتقام ایلک دعواى ابلهفریبانه سیله اتفاده دعوت ایش و ولایه صادقه طرفلرندن بو مکتوبلر طرف پادشاهی یه تقدیم اولمش اولدیغندن سلطان محمود خان حضرتلری تلاشه دوشمش و حق روسیه ایمپراطوری نیقوله دخی معاذه تعالی بویه بر غائله عظیمه ظهوری احتمالندن توحش ایدرک عرض معاونت ایش اولدیغندن سلطان محمود خان حضرتلری دخی حسن تلقی ایدرک مذکور عسکر و دونما بروجه محرر بکقوزه کلشدر

بعد ازین سلطان محمود خان حضرتلری روسیه ایمپراطوریه متفق حالنده بولنوب بونک عات غایه سی دخی مصر مسئله سی اولمغه و بواتفاق اوروپالولرک و همنه الویر مامکله بالاخره انکلیتره و اوستریا و پروسیا و روسیه دولترى سلطنت سنیه ایله مصرلو علیه نه بالاتفاق نتیجه معلومه استحصال قلندی بوفصلک جاری اولدیغی زمانده دوات علیه نك احوال خارجییه یه دائر معاملاتى بواساسلره مستند اولوب تفرعاتی ایسه وقوعات صردسند مسطور اولمغه بو قدر اجمال قلندی

اعتذار

بلطفه تعالی اشبو اثر عاجزانهم بوراده ختامه رسیده اولمش ایسه ده من غیر حد
بعض اخطارات خصوصیه نك دخی تذیلله قصور و خطیئاتك خلوص نیت فقیرانه مه بناء
عفوی و بلکه تصحیح و توثیق مطالعهیه رغبت بیوران اخوان کرامدن مرجودر
اولا وقایع سابقه نك نتیجه منبعثه سی اعتباریله بادی نظرده تحسین و یا تقبیح اولمق
طبیعت بشریه ایجابنددر الحاق بو بابد تعمیم افکار یعنی قبل الوقوع حکم
حال و زمانه قیاساً ایشی نه نظرله کورمك ایجاب ایدجکی امثالی دلائله
ویا خود سائر قرائن ايله تدقیق اولمق لازمدر مثلاً یلدرم بایزیدخانك تیمورله محاربه سی
تقیح اولنوب او قدر شدت کوسترماملی ایدی دینلور .

یاوز سلطان سلیمك شاه اسماعیل ايله محاربه سی تحسین وقوجه ارسال شویله هجوم
ایتدی بویله قیردی کچردی دیه مدح اولنور شمیدی بونلرده اولان فرقی تعداد ایدمه:
برنجیسی تیمور ممالك عثمانیه یه کیرمش و سیواسی تخریب ايله شهزاده علاءالدینی اتلاف
ایلمشدی شاه اسماعیل ایسه کوندردیکی نامه لرده پدریکزله بابا وغل ایدك نه ایجاب ایلدیکه
اوزیمه هجوم ایدورسکزمقالنی تحریر ایدر ایکنجیسی تیمورمالك رومی تملك ایتمی قابل
اوله میوب بعدالغلبه یقیلوب کیده جکی طبعی وشاه اسماعیل ایسه ممالك عثمانیه یه ملاصق
بولندیغندن اگر غالب اولسه اناطولینك اکثر یرلرینی تملك ایدمیله جکنه نظراً مخاطره سی
بالنسبه دها قوی ایدی اوچنجیسی یلدرم خان زمانه قدر رایات عثمانیه مغلوبیت کورمده
یکندن مرارت انهزام هنوز دماغ دولته طوقنماش اولوب سلطان سلیم زماننده ایسه
دها تیمور وقعه سی اونودنماش اولمغله اندن عبرتین اولمق ایجاب ایدرایدی بونلری ایراد
ایتمکدن مقصد سلطان سلیمك حرکاتنه تعریض معناسنی متضمن اولیوب بویله شیلرده حکم
عصره کوره حرکت اولمق ضروریدر

اما بعضیسی موجب منفعت و بعضیسی مستلزم مضرت اولور دیرلر بودخی اوقیلنددر
یوقسه کافه محاذیردن سالم ایش بکلمك محض مضرتدر بناء علیه یالکیز نتیجه یه حصر
نظر ایلک طوغری اولماز ثانیاً سردار و قپودان پاشالرك اکثریا امور خیریه و فنون بحریه یه واقف
آدملردن اولماسی معترضدر حالبوکه سردار اکرم اوللره کافه مهام دولت مفوض اولد
یغندن ایکی صفی حائر اولمق مقتضی اولوب برنجیسی اصحاب رأی و تدبیردن و ایکنجیسی
فنز حریه یه واقف ذواتدن اولمقدر لکن هر وقتده بوا یکی صفی جامع آدم بولمق قولای

اولمديغندن برنجی صنفك اربابی ترجیح اولنه كشمدر چونكه صاحب عقل و درایت اولان سردارلرهم امور مهمه دولتی اداره ایدر و همدارباب حرب اولان وزرا و امرا و غزوات اسلام ایله بالاستشاره آرای متنوعهك معقول و صائبی فرق و تمیز ایدرك او یوله کیدر و مستفید اولور نه کیم کوریللی اوغلی فضل احمدپاشا رتبه و فعلاً مدرس ایکن یکرمی اتی یاشنده وزیر وایکی سنه مرورنده صدر اعظم و سردار اکرم اولوب اون اتی سنه مدت صدارتنده فتوحات متوالیهیه مظهر اولمشدر کذلک بالطه جی محمد پاشا موسیقی شناساندن کوزجه مؤذن نامیله مشهور بر بالطه جی ایکن برایکی سنه ظرفنده وزیر و متعاقباً صدر اعظم و سردار اکرم اولوب فتوحات عظیمه معلومهیه نائل و شهید علی پاشا دخی سلیحدارلقدن وزارتله چیتوب نشانجی و قائمقام اولدقدن صکره ایکی اوچ سنه مرورنده صدر اعظم و سردار اکرم اولوب بر آیه وارمقسزین کاملاً موره قلاعی فتحه موفق اولمشدر. عهد محمد خان رابعده و سلطنت احمد خان ثانیده قیودان پاشا اولانلردن مراد پاشا یکیکچری اغلغندن و قیلان مصطفی پاشا میراخورلقدن و عموجه زاده حسین پاشا ملکیه دن یتشمش ذاتلر ایکن معیتلرنده بولنان اصحاب فنون بحریه یی حسن استخدامه قادر و تهدیدلرینی ایقاعه مقتدر ذواتدن اولملریله فتوحات فاخره بحریهیه موفق اولمشلردر عصر مزده دخی بونك مثالی واردرکه مالیه ناظری اوله جق ذاتك مطلقاً فن حسابه ماهر اولسی التزام اولتمیوب ادارهده صاحب لیاقت اولسی ارانیلورزیرا الدقیق حساباتی ایکنجی و اوچنجی درجهده بولنان مأمورین یاپه بیلورلر.

ثالثاً خلق بیننده بعض مبالغات و بعضاً دخی هیچ اصلن برطاقم حکایات تأسس ایتمشدر که شبهه دن وارسته وقوعات محققه کبی تلقی اولنور مثلاً صدر اعظم لر عزل اولندقدن مطلقاً بالقخانهیه کورتوریلوب اکثریسی اعدام و بعضیسی نفی اولنورایمش حالبوکه سلطان محمود خان حضر تلرینك اون اتی صدر اعظم لرندن یالکیز بندرلی علی پاشا قبریسه و سلطان سلیمك طقوز نفر صدر اعظم لرندن یالکیز روسجقلی شریف حسین پاشا اردوی هایونده و سلطان عبدالحمید خان اولك اون نفر صدر اعظم لرندن خلیل حمید پاشا بوزجه آطهده و سلطان مصطفی خان ثالثك کذلک طقوز نفر صدر اعظم لرندن مصطفی ماهر پاشا مدلولوده و یاغلقجی امین پاشا ادرنهده قتل اولنمشدر که قرق درت ذاتك ایچندن بشی مقتولدر دها یوقاریلره نظر اولندقجه بعض زمانلرده بر درجه تکرر و بعض اوقاتده بر درجه تنزل ایتدیکی کوریلور هله بدایت دولت علیه دن فاتح زمانه کلنجه یوز الی سنه یی متجاوز مدتده صدر اعظم قتل واقع اولماشدر و قبو آره سنده و سرای هایونك سائر مواقعنده بالاده مسطور

اولان مقتولیندن اول بعض صدر اعظمرا اعدام اولمش ایسه ده هیچ بروقده بالقخانه ده بردانه اولسون قتل واقع اولمامشیکن بو شهرت کاذبه اولقدر تأسس ایتمشدرکه هر کیمه سویلنسه بدیهیاتی انکاره حمل ایدر وقغیسی قتل اولمش دینلسه بریسی تعین ایده من صدر اعظم لک حین عزالرنده بالقخته یه ایندیرملری اکثریا آقدکر اطهرینه کوندریله کلدکلی جهتمله اوران کیمی بندیریلوب اعزام اولمق مقصدینه مبنی ایدی بو شایعه یه قوت ویرن شی رؤف پاشا مرحومک حکایه مشهوره سیدرکه کویا رؤف پاشانک صدارتدن برنجی عزالنده بالقخانه یه ایندیریلوب قتلی تصمیم ولوازماتی احضار اولمشیکن سلطان محمود خان حضرتلری رؤف پاشا کنج و کوزل آدمدر قلاوی دخی پک یراشور دیه قتلندن غمویه نفی ایش ایدوکنندن پاشای مشارالیهک صکرده کی صدارت لرنده کوشک لکنندن بحث ایدن محرم لینه شمدی کنج لک و کوزل لک قلمدی قلاوی دخی ابطال اولندی جوابیله حکایه مسطوره نی تلمیح و تذکیر ایده کلی قضیه سیدر حاجوکه رؤف پاشانک آسایش حال و آرامش بالندن بشقه ملتزمی اولیوب هر صدارتنده عصرینک متفاننه تسلیم زمام امور ایتک عادت اولدینی عصرینی مدرک اولنلرک معلوم لیدر حتی تنظیمدن صکرده دخی بالدفعات صدراعظم اولمش ومدار اعتذار ایلدیکی خوف اعدام بالکلیه مرفوع ومندرس بولمش اولدینی حانده سرعسکر رضا پاشا ومالیه ناظری صفوتی پاشانک دست اقبالرینه تسلیم ریش سفید ایله وقتنی خوشجه کچورمشدر برده فلاکت اعدامه اوغرایانلر بیوک بیوک ایشلره تشبث ایدنلردر مثلاً بندرلی علی پاشا حالت افدینک ازاله وجودی ایچون یکچی یلری تحریک ایلک و شریف حسین پاشا اسماعلی قلعه سنک استیلاسنه سبب اولمق و خلیل حمید پاشا اصلاح احوال عسکریه کبی امر عظیمه مباشرت ایتک سبیلرله قتل اولندقلری مثلاً یاغلقچی زاده امین پاشا سکسان ایکی سفرنده سرداراکرم اولوب خوتین محاربه سنده عساکر اسلام پریشان اولغله قاچوب کلان یکچی یلرک بز دشمنی قزل المایه قدر سورده جک ایدک لکن یاغلقچی اوغلی براقدی دیهرک اصل واساسدن عاری اولان نشریاتلری لاف و کذافدن و جمله مفتریادن عبارت اوله جنی معلوم ایسه ده بالضروره ایشی اولیه اکلامق وطوائف عسکریه نی تألیف وتصدیق ایلک واهمه سیله اعدام اولمشدر حتی شیخ الاسلاملقدن معزولاً وفات ایدن عمر وحید افندی حفیدی حسام الدین افندی جندن روایه نقل ایدرایدی که ابدایت سفرده عسکر اسلامک پریشانلغندن سلطان مصطفی خان مرحوم بغایت منفعل و بیک طقسان سکر سنه سنده اولدینی کبی عسکریننده اختلال ظهور ایدر وهمیله متوهم اولوب کمال اضطراب و حیرتندن ناشی علی الدوام تبدیل

قیافله کشت و کذار و بالذات تحقیق احوال ایده کلدیگندن برکون وفاده واقع امینه سلطان سراینه کلوب قارشوسنده قوناغی اولان رکاب دفتر داری عمر وحید افندی بی جلب ایله اردونک حالی نصل اوله جق و خزینه ده پاره قالدیغنی حالد هرکون پاره ایسترلر دیویانوب یاقلدیغنی صروده امین پاشانک دخی قتلنه امر ویرمش اولدیغنی افاده ایلد کده عمر وحید افندی عفونی استرحامه قیام ایلمی اوزرینه امین پاشا ذاتاً بیتمش و شعوری مخمل و بلکه ویریلان امر شمدی به قدر اجرا قلمشدر دیمسیله عمر وحید افندی شدیداللسان بر ذات اولدیغندن امین پاشایی اوچ دوت سنه ایچنده مکتوب بحیلقدن رئیس و مؤخرأ مع الوزاره نشانجی و داماد و متعاقباً صدراعظم و سردار اکرم نصب بیورمش اولدیغکز دن انک ایچون دیوانه اولمقدن بشقه برشی قالدی دیو جواب ویرمشدر .

مصطفی باهر پاشایه کلنجه مشارالیه او اخر محمود خان اولده اعدام اولنانه دارالسعاده اغاسی بشیر اغانک بر کشیده سی ایکن قتل ایتدیرمکه ترتیب مقدمات مکر و فریب ایلمسیله عموماً اندرون خلقتنک خصوصتته مبتلا اولمشیدی سلطان مصطفی ثالثک لابوین برادری اولوب عصر عثمان خانیده و پاشای مشار الیهک ایکنجی صدارتنده مغدورأ وفات ایدن شهزاده سلطان محمدک اتلافنه مانع اولمق اقتدارینی حائز اولدیغنی حالد تقید ایتماسی تهمتی عزو اولنه رق و خاندان عثمانی به خیانت ایدنلرک بقاسی جائز دکلدر دینلرک اعدام ایتدیر- مشدر وؤف پاشا ایسه بویله اغرایشلره تشبث شویله طورسون خاطرینه کلسه برقاچ کون اویقوسی قچار و کولکه سندن اورکر بر ذات اولمسنه نظراً مجازات اعدامدن وجهاً من- الوجوه عاری ایدی بو تفصیلدن مقصد التزام راحتدن حاصل اولان تسکاسلری ستر ایچون بویله حکایه لر تصنیع اولنوب سلطنت سنیه نک یار و اغیار نظرند بلام سبب صدر اعظم قتل ایتمک و قلاوی یاقشیمق کی غایت کوچک بر سببته عفو ایلمک مثللو حرکات کودکنشانه دن اولدیغنی بیان و حقایق احوالی میدانه قویوب بو قیلدن حکایات منتشره غیر واقعه و غیر معقوله به وجود ویرلما مک ایچون براخطار خالصانه و بیغرضانه در .



افادۀ مخصوصه ده عرض ايتديكم اوزره اشبو اثر مفيدك دردنجي جلدني شوصورتله
طبع و نشر ايتمه و بناءً عليه وصيت واقعه يي يرينه كيتيرمه موفق اولديغمدن طولاني
جناب حقه حمد ايلرم .

ينه او افادۀ مخصوصه ده بيان اولنديغي وجهله اثرك نسخ منتشره سي قالماش اولان
اوج اولكي جلدلرينك ده صرسييله يكيدين طبعي وانشاء الرحمن قريباً موقع انتشاره
وضعي مقرر در .

دولت عثمانيه ده جريان ايدن اصول ووقايعه دائر شمدي به دكين مورخين سالفه
طرفدن يازيلن تاريخلر مياننده برقيمت مخصوصه يي حازر بولنان (نتايج الوقوعات) ك
مضبوطاتي بيك ايكي يوز اللى يدي سنه سنه قدر اولوب او تاريخدن اشبو بيك اوج يوز
يكرمي يدي سنه هجريه سي ربيع الاخرينك يدنجي كوننده كي جلوس حضرت محمد خان
خامسه قدر مرور ايدن يتش ييللق وقوعاتك دنجي بواثر نافع ذيل اولمق اوزره تحريري
جملة تصورات عاجزانه مدندر حتى در دست طبع اولوب نچيه حقايق و معلومات مهمه
تاريخيه يي محتوي بولنان (سعاد پاشا - ياخود مزاردن ندا) نام اثر ناچيزانه مك
مقدمه سنده افاده ايلديكم كي اشبو ذيله سلطان عبدالمجيد خانك جلوسنه مصادف
اولان بيك ايكي يوز اللى بش تاريخدن تا بيك ايكي يوز طقسان بش تاريخنه دكين
كذار ايدن قرق سنه لك وقايعه متدائر پدرم سعيد افندي مرحومك قسماً تحرير و قسماً
تقرير ايتمش اولديغي خاطراتك ده علاودسي مصمدر .

مقدمه ده كي (افادۀ مخصوصه) نك صوك فقره سي كه اشبو جلد رابعك بيك يوز
نسكان سكين سنه سندن بيك ايكي يوز اللى يدي سنه سنه قدر جريان ايلان آلتش طقوز
ييللق احوالي احتوا ايتديكنه متعلقدر او فقره نك باشنده (آلتنجي بابي تشكيل ايدن)
دينيله جك ايكن سهواً (بشنجي بابي) ديو ترتيب ايدمش اولديغمدنك ده
تصحيحاً بياننه مبادرت قائم مشدر .

محمد غالب



